



H. xxv

17/m

Barrel  
11-3-28  
120 lbs



Digitized by the Internet Archive  
in 2019 with funding from  
Wellcome Library

[https://archive.org/details/b30540690\\_0001](https://archive.org/details/b30540690_0001)







# CAESARIS MAGATI

SCANDIANENSIS.

IN ALMO FERRARIENSI GYMNASIO

Medic. Doctoris & Professoris Celeberrimi  
DE

## RARA MEDICATIONE VULNERUM

Seu de Vulneribus raro tractandis

### LIBRI DUO

IN QUIBUS NOVA TRADITUR METHODUS

qua felicissime ac citius quam alio quovis modo sanantur vulnera: quaecunque  
praeterea ad veram & perfectam eorum curationem attinent diligenter  
excutiuntur.

### HÆC AUTEM DUPLICI QUÆSTIONE

- I. Utrum melius sit vulnera quotidie solvere ac procurare, an pluribus interjectis diebus.
- II. Utrum Turundarum, & Penicillorum usus in Curatione vulnerum sit necessarius.

Accessit

### JOANNIS BAPTISTÆ MAGATI

Tractatus, quo rara Vulnerum curatio contra Sennertum defenditur.

*Cum triplici Indice Capitum, Questionum & Rerum omnium memorabilium.*

ET CUM PRÆFATIONE

### FRIDERICI CHRISTIANI CREGUT

MED. DOCT. ILLUSTRIS. ac CELSIS. HANOVIAE COMITIS CONSILIARIUM,  
ARCHIATRI, AULAEQUE MEDICI

Philos. Natural. ac Medic. Profess. utriusque Urbis & Celeb. Abbatiae Seligenst. Physici  
ac S. R. I. Acad. Nat. Cur. Caesareo-Leopoldino Carolinae Collegae, Marcelli,

### DE ITALORUM IN REMPUBLICAM LITERARIAM

PRAECIPUE VERO MEDICAM MERITIS MAXIMIS.

Veneunt in Nund. Franc. Lips. & Amst. apud JOH. P. SCHMIDT,

MDCCXXXIII.





\* \*

\* \*

\* \*

\*

\*

\*

CARMINE CUR TENUI LIBRUM LAUDARE LABOREM  
VENDIBILI VINO NIL OPUS EST HEDERA :  
PERLEGE MI LECTOR : QUANDO PERLEGERIS AUTEM  
HIC NULLA, DICES, LAUDE LIBELLUS EGET.

\* \*

\* \*


\* \*

\*

\*

\*





FRIDERICUS CHRISTIANUS CREGUT  
Med. Doct.

Lectori Benevolo salutem plurimam dicit.



Oeli ac Terræ in Italia tantam harmoniam  
ad fertilitatem summam, & hinc omnium  
rerum abundantiam atque bonitatem  
esse, ut quicquid est, quo carere vita  
non debeat, nusquam in Europa præ-  
stantius sit, jam olim notavit Plinius  
Hist. Nat. lib. 37. cap. 13. & Virgilius  
Poëtarum Princeps lib. 2. Georg. de Man-  
tuæ suæ pascuis ita cecinit:

Et quantum longis carpent armenta diebus  
Exigua tantum gelidus ros nocte reponet.



Hoc etiam hodierna experientia multijuga confirmari, non nisi illos latere potest, qui vel ex autopsiæ defectu hanc veritatem ignorant, aut in Historia Paradisi totius Europæ plane sunt hospites. Aurei Virgilii versus Georg. lib. 2. in Italiæ laudem scripti, in compendio, quæ fusius deducere nec ratio instituti nec pagellarum angustia permittit, exprimunt.

Sed neque (ait Maro) Medorum sylvæ, ditissima terra,  
Nec pulcer Ganges, atque auro turbidus Hermus,  
Laudibus Italiæ certent: non Bactra, neque Indi,  
Totaque thuriferis Panchaia pinguis arenis  
Hæc loca non tauri spirantes naribus ignem  
Invertere, fatis immanes dentibus hydri  
Nec galeis, densisque Virum seges horruit hastis:  
Sed gravidæ fruges, & Bacchi Massicus humor  
Implevere. Tenent oleæque, armentaque læta,  
Hinc bellator equus campo sese arduus infert:  
Hinc albi, clitumne, greges, & maxima taurus  
Victima. Sæpe tuo perfusi flumine sacro,  
Romanos ad templa Deum duxere triumphos,  
Hic ver assiduum, atque alienis mensibus æstas;  
Bis gravidæ pecudes, bis pomis utilis arbor.  
At rabidæ tigres absunt, & sæva leonum  
Semina: nec miseros fallunt aconita legentes,  
Nec rapit immensos orbes per humum, neque tanto  
Squammeus in spiram tractu se colligit anguis.  
Adde tot egregias urbes, operumque laborem.  
Tot congesta manu præruptis oppida Saxis,  
Fluminaque antiquos subterlabentia muros  
An mare, quod supra, memorem? quodque alluit infra!  
Anne lacus tantos? te Lari maxime, teque  
Fluctibus & fremitu assurgens, Benace, marino?  
An memorem portus! Lucrinoque addita claustra?  
Atque indignatum magnis stridoribus æquor?  
Julia qua ponto longe sonat unda refuso,  
Tyrrhenusque fretis immittitur æstus Avernis:

Hæc



Hæc eadem argenti rivos, ærisque Metalla  
Ostendit venis, atque auro plurima fluxit.  
Hæc genus acre virum, Marfos, pubemque Sabellam,  
Assuetumque malo Ligurem, Volscosque verutos  
Extulit: hæc Decios, Marios, magnosque Camillos,  
Scipiadas duros bello: & Te, Maxime Cæsar.

Sicut autem Italia nobiliorum bonorum terrestrium est feracissima, ita quoque hæc Europæ pars, locus sapientiæ ac doctrinæ humanæ semper fuit & adhuc est fertilissimus. Tanta enim in Italia ingeniorum bonitas ac felicitas est, ut Ingenii ac Studii vi, nationibus cæteris in scientiis & artibus tam veteres quam recentiores multi facem sæpissime prætulerint. Quod veterum pariter ac recentiorum historiæ literariæ multorum seculorum locupletissima monumenta abunde testantur. Postquam enim Roma, paulo post Punicum primum bellum teste T. Lansio in consultat. de principatu inter Provincias Europæ, literas accepit, statim una cum imperio eas diffudit & sparsit in omnes terras. Verbis exprimi nequit, quæ postea ingeniorum felicitas extiterit, & quæ scientiarum opes ac gazæ incredibiles hinc in Italiam ac universum orbem redundaverint. Quanta industria, fide ac studio, in hac summa Republica in ipsa sapientiæ literarumque tutela versati sint illorum temporum Homines, novi humanitatis atque solidioris doctrinæ Instauratores testari possunt inter Alios sequentes Q. Ennius Rudinus; M. Accius Plautus; T. Lucretius Carus; Q. Catullus; Q. Horatius Flaccus; Sex. Aurelius Propertius; P. Ovidius Naso; Phædrus; A. Persius Flaccus; P. Papinius Statius, C. Valerius Flaccus; D. Junius Juvenalis; P. Virgilius Maro, M. Porcius Cato Censorinus; Q. Claudius Quadrigarius; Marcus Varro; C. Sallustius Crispus; M. A. & L. A. Seneca. Cornelius Nepos; Pompejus Trogus; T. Livius; C. Julius Cæsar; C. Vellejus Paterculus; C. Cornelius Tacitus; Valerius Maximus; C. Suetonius Tranquillus; Plinius Comensis, M. Vitruvius Veronensis; & instar omnium M. TULLIUS CICERO.



Et cui quæso, qui in Historia literaria tantisper versatus, ignotum esse potest, scientias & artes ex Oriente ad Græcos ac Romanos pervenisse! Postquam autem Romanorum Imperium diversæ Gentes barbaræ quasi inundarunt, extincta fuere studia pedetentim, & per aliquot seculorum decursum crassissima ignorantia in Europa regnavit. Hinc ingravescente ubique barbarie per omnes fere libros veluti Lolium Tritico adnascebatur, imò in tota Europa plerique homines Literarum ac solidioris doctrinæ erant Inimici quasi jurati. Qua seculorum sterilitate magnis passibus ad tenebras crassissimas Mortales contendere videbantur. Mirum itaque non est si omnia studia quemadmodum in aliis Europæ partibus ita etiam in Italia optimorum ingeniorum alias fertilissima sepulta prorsus ac neglecta jacuerint. Si scientiarum omnium magna est affinitas ac encyclopaedia, nemini paradoxum videri debet, si Philologis, Philosophis, Historicis aliisque Studiorum Cultoribus in magno & fere incurabili sopore viventibus, hoc etiam morbo Theologi, Jurisconsulti atque Medici laboraverint. Quemadmodum autem Deus T. O. M. in horum temporum Homines maximum severitatis exemplum edidit, ita etiam illi hanc castigationem proprio merito, nimirum ignaviâ, pigritiâ, atque malitiâ meruerunt, hinc stupor Animos, ac velut torpor quidam insolitus membra plerorumque tenebat. Talis ubique deplorabilis erat status. Et cum ita in barbariem ac vastitatem studia omnia abierant, Grammatici, Poëtæ & Historiarum perscrutatores, cæteris Doctoribus quiescentibus imò dormientibus, intermortuas ac fere sepultas scientias ac Artes excitarunt. Hos Homines, Celeberr. Petrus Burmannus in Orat. anno præterito Leidæ habita pro Literatoribus & Grammaticis, solidiori doctrinæ proluisse inquit, liberrimis & ridiculis, sed sententiosis & argutis, dictis, Jocis, Communibus & plebeis proverbiiis, fabulis & narrationibus, quas avidissime vulgi aures imbibunt, Satyris, Mordacibus Carminibus, ludis etiam theatralibus, Neque vero, notante ingenue, Paleario, Italo Doctissimo, quicquam erat miseris perditisque temporibus magna facta jactura, quod magis fortissimo Patrocinio indigere videretur, quam Philosophia, cui



cui ornamenta omnia misere essent detracta : quæque olim in illustri Doctorum Hominum conspectu posita, jam locum in quo consisteret, non haberet.

Primam autem seriam artium ac sciëntiarum restaurationem Italis debemus, Francisco Petrarchæ, qui linguæ latinæ & græcæ studium incepit diligentissime excolere, quem secuti sunt, Æneas Sylvius ; Laurentius Valla ; Johannes Franciscus Poggius ; Leonardus Aretinus ; Gaspar Contarenus ; Paulus Manutius, aliique seculis innumerabilibus adhuc celeberrimi. Circa eadem tempora Docti Manuscripta Græca ac Latina è squalidis & pulverulentis altâque sordium multorum seculorum congerie repletis Bibliothecis extrahere, legere ac explicare ceperunt. Et cum in Germania Ars Typographica tunc fuerit inventa, & dein in Italia exulta, ad tantum perfectionis gradum, Romæ, Florentiæ, Venetiis, pervenit, ut illæ antiquæ editiones Librorum Theologicorum, Juridicorum, Medicorum, Philosophorum, Historicorum, Poëtarum, Grammaticorum aliorumque modernarum Bibliothecarum maximo nunc sint ornamento : Imo, Judæis Italis debemus impressionem Pentateuchi, Bibliorum Sacrorum, in Hebraica Lingua in Italia Typis ante annum 1478. impressorum. Ita etiam in Italia primò Libri in Lingua Græca, Chaldaica, Arabica, & Æthyopica fuere typis evulgati.

Circa finem Seculi XV. & initium XVI. Viri docti Barbariem adhuc regnantem funditus destruere ac expellere seriò conati sunt. Inter quos merito laudandus Jacobus Faber Stapulensis, qui ingenio felicissimo, hinc magna eruditione gaudens totius Europæ Scholam antiquissimam & celeberrimam Parisiensem a Barbarie totaliter liberare omni studio laboravit. Hinc a Viris istius temporis doctis faberrimus Faber vocari solebat. Ab hoc Homunculo genere staturaque perhumili, sed ab ardenti ingenio cum optimatibus haud dubiè conferendo totius Galliæ Juventus ad Literarum ac Studiorum culturam alacriter excitata est. Faber enim Ingeniorum appellari volebat, quum in omni fere doctrinæ genere aptissimus ad docendum haberetur. Inde Magnus Historicus Thuanus Fabrum Literis renascentibus facem prætulisse scripsit. Mirum itaque non est si ex ejus schola  
innu-



innumeri ferè Eruditi Viri prodierint. Ipse Galliæ Rex Franciscus primus, in Hispania captivus, in literis ad Supremum Senatum in Gallia magnam Fabri esse apud Italos & Hispanos opinionem ejus doctrinæ ac virtutis testatur. Quia autem Viris doctis omnem deinceps benevolentiam præstare cogitet, ideo mandare, si quæ sit contra Fabrum post abitionem suam instituta lis & actio, ut ad Matrem suam, quæ sit cum imperio, referant, quo per eam certior ipse fiat, utque suam in eo mentem atque sententiam exspectent, neque longius progrediantur, & omnino supersedeant, donec vel ipse reverterit, vel aliud in eo Decretum Ipse vel Mater fecerit. Ille est itaque Faber Stapulensis qui Barbariem atque Ignorantiam e celeberrima Europæ Universitate, in qua spatio tot annorum imò seculorum ita tranquille requieverat, expulit felicissime. De eo Thomas Morus ad Erasmus Roterodamum ita scribit: Jacobum Fabrum sic observo, suspicio, veneror, quomodo virum debeo, quo non aliquot ante seculis extitit quisquam literis ac virtute venerabilior, qui an plus adnissus sit, ut præter sacrarum literarum studium, in quibus illustrandis utiliter est versatus, scholas aliquando ab inepta ista garrulitate atque absurdis argutiis ad Sobriam ac Severam Philosophiam & ad neglectas jamdiu disciplinas traduceret, ambigo.

Redeo autem hic in Italiam, & noto Sapientiores in Philosophia naturali didicisse in verba Aristotelis, Antiqui Magistri non amplius servili obedientia jurandum esse. Veritates enim Philosophicæ non ab authoritate Philosophorum, sed a consensu observationum & ratiocinio phænomenis Naturæ convenienti dependent.

Hinc in Italia in omni genere studiorum floruerunt, Pomponius Letus; Sabellicus; Fulvius; Ursinus; Eneas Vicus; Erizzo; Pirro Ligorio; Panvini; Thomadini; Vignoli; Bianchini; Galilæus Galilæi, ejusque discipulus Toricellus; Benedictus Castelli, Zannichelli, Michaël Mercati, aliique. In Mathesi in specie celebres sunt Viviani; de Cassini; de Guillelmini; Manfredi; Poleni; Zendrini; In Criticis Cælius Rhodiginus, Alexander ab Alexandro; Petrus Victorius; Conti; Recanati.



nati. In artibus sic dictis liberalibus, Architectura, Pictura, Sculptura, Musica, nomina Raphaëlis; Mich. Angeli; Titiani, Reni; Bernini; aliorumque fere innumerorum tam nota sunt quam quæ notissima. Quis enim in angustis ejusmodi cancellis omnes enumerare vellet saltem memoria dignissimos, propterea coactus silentio prætereo Jurisconsultos aliosque viros doctissimos, celeberrimos & omni laude dignissimos.

A temporibus summi Pontificis Nicolai V. Societates in Italia Academiarum nomine ortæ sunt, quæ studiorum humaniorum & scientiarum cognitionem ita explanarunt, ut ad eorum exemplum aliæ nationes in Europa ad tantum perfectionis gradum pervenerint. Ejusmodi autem societates in Italia ultra 500. sub diversis nominibus a duobus seculis ultimis facili negotio numerari possent, si ratio mei instituti id postularet. Sufficiat hic notasse, Jarckium in specimine Historiæ Academiarum seu societatum Eruditarum Italiæ Lips. in 12. 1725. eas circiter ad 520. redegisse. Academia di Ricovrati in Padua adhuc cum laude subsistit, in qua subinde sermones Academici de rebus Physicis habentur doctissimi & acutissimi. Inter quos Ant. Vallisnieri Prof. Prim. in ea universitate Celeberrima de Origine Fontium numerandus est sermo. Huc etiam pertinet Academia Muti Di Reggio, in urbe Modena, cui tanquam loco natali modo dictus Vallisnieri Orationem suam doctissimam de scala omnium entium creatorum, quam inseruit historiæ suæ de generatione Hominis & Animalium impress. Venet. 1721. dedicavit.

Tot societates Doctorum in Italia argumentum præbent omni exceptione majus innumeros existere in hac Europæ parte nobilissima Doctissimos ac Sapientissimos viros, quibus universa respublica litteraria multis nominibus adstricta esse debet. Et quod mirabile est, in Italia floruerunt etiam Virgines ac Fœminæ in omnibus scientiis & artibus doctissimæ. Hinc etiam in Sena, Urbe Italiæ spectatissima inaudito exemplo Academiam sequior sexus formavit, cognomine, Assicurate. Historiæ autem litterariæ studium uti in tota Europa, ita etiam in Italia nunquam ita fuit excultum quam a secu-



li spatio. Venetiis primò novellæ litterariæ fuerunt publicatæ, non autem typis editæ, sed manu scriptæ, quia senatus Venetus non permittebat, ut Novellæ, cujuscunque generis sint, typis exeant. Magliabechus Ducis Toscani Bibliothecarius multa Volumina ejusmodi Novellarum Seculi XVI. aservavit. Postea autem prodierunt Giornale de Letterati, Romæ, Parmæ, Modenæ, & Ferraræ. Venetiis etiam septem Volumina in Fol. sub titulo la Galleria di Minerva, uti fusi-  
us hæc recenset Don Hiacinte Gimma in idea della Storia dell' Italia Letterata in duobus Tomis in 4to Neapol. 1723. Non minorem autem operam ad Medicinæ culturam Italos ab omni ævo quoque contulisse, tam certum est, quam quod certissimum. Quod enim Romani quondam sub Catone cen-  
sorio Medicos omnes, & urbe tota, & tota Italia pepulerint, falsissimum est. Hanc calumniam primus ex male interpre-  
tato Plinio incunte seculo decimo sexto evomuit acris ille lit-  
terarum litteratissimus hostis Henricus Cornelius Agrippa lib. de vanitate scientiarum cap. 83. Modo dicta calumnia perva-  
sit totam Galliam, hanc recoquente & propalante Michel de Montaigne dans les essais edit. Parisiens. 1640. in Fol. p. 503. ubi ita inquit : Les Romains avoyent este six cens ans avant  
que de recevoir la Medecine, mais apres l'avoir essayee, ils la chasserent de leur ville par lentremise de Caton le censeur. E quibus fontibus virulentum hoc malevolorum & ingratis-  
simorum hominum odium in Belgium aliasque regiones pro-  
pagatum est. Non defuerunt tamen Celeberrimi Medici a quibus dicta calumnia Apologiâ fuit depulsa. Quemadmo-  
dum enim Gallis Medicis apud senatum supremum causam dicere integrum est, Teste Medico & Polyhistore Magno Guidone Patin qui bis apud judices supremæ curiæ Parisi-  
ensis causas oravit, vid. ejus Epist. 9. & 42. edit. 2. ita et-  
iam Carol. Drelincurt Regius olim in Gallia Medicus & tan-  
dem Profess. in celeberrima universitate Lugd. Batava solen-  
ni die nonis nimirum Juliis 1671. apud Senatores Urbanos & Academicos causam non privatam sed quæ omnium, Me-  
dicorum erat, contra illos egit, qui non minus falsò quam inju-  
inju.



injuriōse Medicos sexcentis annis Roma fuiſſe pulſos promul-  
gaverant. Merentur etiam legi quæ de dicto fictitio mero-  
que ac palpabili mendacio, maligne & turpiter excogitato,  
criminōſe ac ſuſpicioſe ab aliis accepto, in chartam conjecit  
Gaſpar A Reies, Francus, Elys, jucund. quæſtionum camp.  
Quæſtione I. Veterrimi Authores Cicero, Seneca, Suetonius,  
Plutarchus, Horatius, Juvenalis, Martialis alique mentio-  
nem faciunt multorum Medicorum Illuſtrium qui Romæ &  
in Italia proximis Catonis & ſequentibus temporibus florue-  
runt, & ſui memoriam maximis meritis immortalitati conſe-  
crarunt. Inter quos Principes ſunt, Eraſiſtratus, Herophilus,  
Antithius qui Julii Cæſaris Principis ſui tribus & viginti pla-  
gis conſoſſi cadaver in ſenatu perlustravit. Aſclepiades Ma-  
gni Pompei familiaris. Themison, & Auguſti temporibus  
Antonius Muſa, cui Romani juxta ſignum Æſculapii ſtatuum  
ex ære ſtatuerunt. Habuit eum in honore Auguſtus, quia  
ejus conſilio & opera e graviore morbo evaſit. Dedit ei non  
modo magnam vim auri & argenti, ſed permittit eidem uſum  
Annuli, Equitibus tantum eo tempore familiaris. Conceſſit  
etiam teſte Dione Caſſio Rom. Hiſt. lib. 53. Immunitatem  
non ipſi modo, ſed omnibus eandem Artem Medicam exer-  
centibus, & id quidem non ad præſens, verum etiam ad tem-  
pora futura. Præter eum etiam poſtea floruit, Aurelius Gor-  
nelius Celfus; Scribonius Largus; Andromachus Senior &  
Junior; Crina, ut nihil dicam de Caſſiis, Calpitanis, Arun-  
tiis, Albatiis, Rubriis, Ruſſis, Soranis, multisque aliis Celeber-  
rimis Medicis. Barbarie autem ante duo, & quod excurrit, ſe-  
cula ex Europa fere radicitus exſtirpata, Medicina etiam dili-  
gentius non ſaltem in Gallia, Germania, Hiſpania, Anglia,  
Belgio aliisque Europæ partibus, ſed maxime in Italia fuit ex-  
cultata. Præcipui Itali qui ab illo ævo ad noſtra uſque tempora  
floruerunt ſunt. Julius Cæſar Scaliger, illud Naturæ Mi-  
raculum, Eraſmi Roterodami adverſarius acerbus, Philoſo-  
phus & Medicus incomparabilis, A Benivenius; Jacobus Car-  
pus; Antonius Fumanellus; Andreas Thurinus; Joh. Ma-  
nardus; Joh. Bapt. Montanus; Gabr. Fallopius; Bened.  
Victor.



Victor. Faventinus ; Donat. Anton. ab Altomari ; Hieronymus Fracastorius ; Joh. Argenterius ; Victor Trincavellius ; Vidus Vidius ; Bartholomeus Eustachius ; Hieronymus Cardanus ; Alexander Massarius ; Andreas Baccius ; Andreas Cæsalpinus ; Franciscus Valleriola ; Hercules Saxonia ; Hieronymus Cappivaccius ; Hieronymus Frabit. ab Aquapendente ; Hieronymus Mercurialis ; Joh. Bapt. Cortesius ; Joh. Bapt. Porta ; Joh. Andreas a Cruce ; Ludovicus Septalius ; Prosper Alpinus ; Ulysses Aldrovandus ; Johannes Marinelli ; Sanctorius Sanctorii ; Joh. de Vigo ; Petrus Salius Diversus ; Angelus Sala ; Julius Cæsar Claudinus ; Cæsar Magatus ; Julius Cafferius Placentinus ; Joh. Bapt. Ferrarius ; Benedictus Sylvaticus ; Dominicus de Marchettis ; Dominicus Panarolus ; Prosper Martianus ; Anton. Molinetus ; Marc. Aurel. Severinus ; Laurentius Bellinus ; Caspar Afellius ; Marcellus Malpighius ; Joh. Raym. Fortis ; Georgius Baglivius. Joh. Maria Lancisius ; Bern. Ramazinus ; Joh. Baptist. Morgagnus ; Lucas Tozzi ; Anton. Mar. de Valsalva ; Joh. Bapt. Bianchus ; Julius de Pantedera ; Franciscus Torti ; Vallisnerius ; Joh. Dominicus Santorinus ; Illi modo recensiti, magnæ diligentæ ac optimi judicii scriptores in omnibus Medicinæ partibus multa doctrinæ ac Sapientiæ Medicæ monumenta nobis reliquerunt. Oprandum esset ut in omnium Eruditorum Medicorum manibus essent, & nonnulli thesaurum veritatum, qui in eorum scriptis continetur, exciperent, ac Valleriolæ locis communibus adderent. Tanta enim sunt dictorum virorum Merita ut horum nunquam sine gratiarum actione Litteratos Medicos meminisse oporteat. Dolendum est, Lectionem Librorum Veterum a plerisque negligi, ita nimirum plerique novis propter Hypothesium etiam sæpe absurdissimarum novitatem delectantur, ut Priscorum Patrum Monumenta Medica fere ipsis sordeant omnia. Juxta Fernelium tam peccant qui a veteribus pervestigata omnia comprehensaque esse contendunt, quam qui eisdem primam rerum cognitionem detrahunt, illosque de Veteri Doctrinarum possessione dejiciunt. Sunt tamen nonnulli qui Veterum Medicorum exemplaria di-  
urna



urna nocturnaue manu versare & frequentius vertere solent, hi etiam sunt qui ex horum lectione didicerunt, quantum distent æra lupinis; Inter hos merito nostra ætate nominandi duo Illustres & Excellentissimi Medici Hoffmannus ac Boerhave, qui in veterum lectione exercitatissimi, Conringii Magni Polyhistoris & Medici Excellentissimi, nec non Juris Germanici Magistri ut & Vesalii aliorumque Medicorum Celeberrimorum opera bibliopolarum tabernis elapsa, hinc rariora, typis novis ut describant Librarii curarunt.

Paucis adhuc hic specialius aliquid de Italorum meritis mihi dicendum est, præcipue quod Medicorum Studia attinet. Qui hospites sunt in Historia Italiæ Litteraria, Transalpinos recentiores ad Physicæ, Anatomix, Botanicæ imò Medicinæ Practicæ Studium tantum contulisse, quantum Natio ulla in Europa contribuit, credere non possunt; Consensu autem omnium Philosophorum experimentalis Philosophiæ Studium quod nostra ætate tantos fecit progressus, quoniam extraordinario ab omnibus fere nationibus in Europa excultum fuit, explorationibus atque inventis Italorum, Gallilæi, ejusque discipuli Toricelli unicè debetur. Uti Ruyschius Anatomicus, in Belgio Maximus exstitit, ita in Italia Celeberrimus Bianchi omnibus in Anatomix Studio sua Anatomia artificiali facem prætulit. Vocatur autem ea, quæ Cerâ fit quâ corpus humanum ejusque singulas partes tam internas quam externas ita exactè representat, ut spectatorum oculi facili negotio præter omnem expectationem decipi possint. Gaëtano Giulio Zumbo ex Sicilia Syracusanus ejus fuit Inventor. Gallus autem Desnouës ad magnum perfectionis gradum hanc artem perduxit, uti fusius patet, ex collectione Epistolarum quas Romæ 1706. in Octavo imprimi curavit. Dictus Desnouës Parisiis quinque aut sex demonstrationibus ita Anatomiam in cerâ sua colorata demonstravit ut Curiosi Naturæ Scrutatores, qui ob nauseam Anatomicis demonstrationibus veris adesse nequeunt, libros Anatomicos cum utilitate legere potuerint: Tanta enim est Anatomix artificialis cum Dissectionibus Naturalibus conformitas, ut etiam in Anatomia exercitatissimi fuerint decepti.



Swammerdamio & Ruyschio Anatomiae Professoribus Amstelodamensibus Celeberrimis debemus, quidquid nostris temporibus de viscerum excarnatione, de ceræ varii coloris injectione in vasa cujuscunque generis & viscerum atque partium a corruptione defensione, cui solidæ partes molliores valde sunt obnoxiae, Anatomici didicerunt. Opulentum ac Magnificum Armarium, quod spatio circiter XII. annorum Magnus Ruyschius formaverat, nunc curiosissima pars est Pinacothecæ Russiæ Imperatricis quam e Belgio Petersbourg Petrus Russiæ Imperator Maximus, immortalī Gloria dignissimus miserat.

Anatomia artificialis cerâ coloratâ instituta quia opifices peritissimos postulat, & nimis sumptuosa est, ideo demonstrationes per injectiones diversæ materiæ coloratæ utiliores magisque idoneas judicarunt Sapientiores & Peritiores Naturæ Scrutatores. In ejusmodi demonstrandi modo supranominatus excellēbat Joh. Bapt. Bianchi in Taurinensi Universitate Anatomiae Professor Celeberrimus. In Tomo III. de la Bibliotheque Italique, demonstrationes recensentur, a Celeb. Viro 1724- & 1725. in Magnifico Taurinesi Theatro Anatomico institutæ, quas compendiose hic excerptare Operæ pretium erit.

Locus Theatri Anatomici tantæ est capacitatis ut aliquot hominum millia continere possit. Hora tertia pomeridiana initio demonstrationis erat destinata, sed horâ primâ post meridiem magno confluxu Homines omnium ordinum aderant, ut vix illi qui Magistratum gerunt locum assignatum attingere potuerint: Splendidissime Auditorium & ejus Cathedra Peristromate ornatum erat, Mensæ Anatomicæ aliquot ordinatè etiam erant dispositæ. Quatuor dictarum mensarum Arterias, Venas, ac Nervos e cadavere humano separatos continebant, vasa autem Sanguifera repleta erant injectione Ceræ, sebi, & aliarum materialium selectarum jucunde coloratarum operâ Andr. Verna Anatomici ac universitatis dissectoris; & Medici Docti Mauritiū Mori, Bianchi studio informati. Dicta Organa ita ordinatè Periti Pictoris Operâ in Mensis erant disposita, ut magna concinnitate corpus humanum representaverint e venis, arteriis ac nervis contextum. Præterea etiam 24. Mensæ juxta Naturæ



Naturæ Ordinem erant delineatæ; una earum representabat Auris internas ac externas partes omnes septies majores quam in Statu Naturali cum exacta proportionem, ut facili negotio hujus admirabilis Organi minimas particulas observare licuerit. Existimarunt præsentem forsan nunquam figuram magis distinctam omnium partium Auris eo ordine ac situ naturali oculis fuisse exhibitam. Altera mensa ostendebat basin cerebri cum Origine distincta decem parium nervorum, eorum distributionem & implicationem tam internam quam externam & longe a Cranio tenerrimam. Duodecim sequentes Mensæ exactissime secundum naturalem magnitudinem, & decies majorem, omnes oculi partes tam internas quam externas, continentes ac contentas, ostendebant. Decem aliæ mensæ in magna objectorum varietate omnia phænomena Optices, Catroptices, & Dioptrices complectabantur, & ut curiosis satisfiat magis Mensæ magnæ Camera obscura imponebatur, in qua imagines objectorum exteriorum videbantur.

Hiscæ peractis ac sermone doctissimo finito, in quo eloquentissime Naturam se ipsam ob oculos ponentem introduxerat Bianchi, Auditorium in magnam admirationem rapiebatur aspectu corporis foeminæ gravidæ formosissimo. Velo enim sublato, quod illam tegebat, post excellentem discursum de partibus externis corporis humani, omnem cutim & tegumenta externa Corporis istius foeminæ auferre jussit. Hoc quasi momento facto muscoli Brachiorum, Pedum, Trunci in situ, figura, ac connexione naturali, apertoque Pectore & Abdomine, viscera in proprio loco, & præcipue uterus foecundatus in abdomine videbantur. Foetus extrahebatur cum placenta & funiculo umbilicali. In superficie intestinorum apparebant vasa lactea, usque ad chyli receptaculum, quod simili injectione repletum erat. Ita etiam Principium, Progressus, ac distributiones canalibus thoracici usque ad insertionem in venam subclaviam sinistram ope valvulæ semilunaris in sensus incurrebant. Ita etiam Cor, trachææ, Pulmones aliæque Corporis partes e pectoris cavitate trahebantur & iterum in naturalem situm reponebantur. Non  
fatis



fatis admirari ac contemplari poterant spectatores singuli, tam admirabile & non expectatum objectum. Indicata autem & finita hac functione præliminari, foeminâ parvo temporis spatio suo habitu externo iterum exornatâ, omnes adstantes fateri cogebantur, neque Taurini, neque alibi talem publicam functionem hucusque tanta dexteritate, accurata administratione, magnificentia atque splendore visam fuisse. Sequentibus XX. lectionibus incomparabilis Anatomix Professor totum Corpus humanum, partes post partes demonstravit & exposuit accuratissime, innumeris Auditoribus Litteratis ac Nobilibus accurrentibus. Ita etiam 1725. sequente, in solenni cursus Anatomici aperturâ, & per totum decursum Auditoribus Omnium Ordinum satisfaciebat optimè. Valde autem adjutus erat operâ Domini Guidoboni Artificiosissimi Pictoris Genuensis, qui in Taurina urbe sedem posuerat. Merentur legi quæ fusius loco allegato exposita sunt a pag. 62. ad pag. 93.

In studio veræ & solidæ Medicinæ Practicæ colendo Itali aliis nationibus certe non cedunt. Cirillus Med. Doct. & Prof. Primarius Neapolitanus, Ettmülleri opera omnia in V. Voluminibus in Fol. cum suis Notis doctissimis Neapoli imprimi curavit 1728. Sancassanus Medicinam pristinæ puritati & simplicitati, in quo statu Hippocrates eam reliquit, restituere corde, animo omnibusque viribus persecutus est. Valisnierus existimavit, nunquam futurum ut Ars Medica, in morbis debellandis, qui adhuc remediis non auscultant incrementum capiat, nisi Hippocraticum observationum & experimentorum studium, fere intermissum revocetur. Hæc etiam Mens erat Bianchi supra laudati, qui in præfatione Historiæ suæ Hepaticæ in hæc erupit verba : Quod si procul ab his fucis atque illusionibus (Hypothesium varietates intelligit) Ars nostra post Auream Hippocraticam ætatem, quoquo inde seculo per assiduas nitidasque constantium Naturæ motuum observationes, atque ab ipsis duntaxat diagnoseos & prognoseos argumentis & incrementis alita, solidè luculenterque adolevisset an non a sua illa felici infantia in florentem postea juventutem traducta jam prope maturitatis splendorem attingeret ? Non ergo jure transactorum Medicinæ,

atque



atque præsentium inprimis temporum tenebras, & infortunia dolebimus ! quibus nempe tam paucos Hippocraticæ observationis sectatores deprehendimus, atque suspicimus, ut tota simul Europa vix aliquot hujusce ingenii Viros, rarisque non nisi intervallis annorum obtulerit. Italia, Mercurialem, Martianum, atque Baglivium ; Anglia, Sydenhamium ; Gallia, Duretum ; Hispania, Mercatum ; Germania, Cratonem ; Franciscus Torti Med. Doct. & Prof. Mutinensis 1712. tractatum de Chinæ Chinæ usu Therapeuticæ specialis ad Febres Periodicas Perniciosas in lucem edidit. Statim habuit suos adversarios qui publice tractatum suum refutarunt, contra quos Apologiam 1714. publicavit. Alius etiam Vir doctus eum Apologiâ quadam defendit. Mutinæ autem 1730. editio altera auctior suæ Therapeuticæ specialis a doctis desiderata in lucem iterum prodit, in 4to. In hoc libro certe multa continentur e praxi clinica desumpta, quæ Febrium Pathologiæ ac Therapiæ veræ lucem tantam afferre potuerunt, qualem vix in omnium aliorum Scriptorum modernorum monumentis de Febribus deprehendere liceat. Mihi valde placuit quod Lib. II. Cap. VII. pag. 183. hisce declaravit : Cardo, inquit, Præceos versatur non in multiplicitate, sed in Electione Remediorum, simulque in opportunitate noscendâ & captandâ occasione. In iisdem propterea circumstantiis idem morbus remediis iisdem ab uno Medico tollitur, ab alio non ita. Ordo quippe, seu tempus peculiare administrati remedii exitus varietatem parit. Ars quævis Mechanica paucis instrumentis perficitur, eademque iisdem a duplici Artifice inæqualiter exercetur, parium instrumentorum usu dispari diversitatem faciente. Haud aliter modicus medicamentorum apparatus (quem in numero satis parco vere consistere, & nihilominus sufficere aliquando forsân ostendam) in manu periti Medici, Morbis fere quibuslibet sanabilibus sanandis par est. Octo tantummodo voces Musicæ, si rythmice disponantur, concentibus omnibus, utut diversis, edendis sunt satis : inconcinne verò, vel intempestive prolatae, & dissonant, & harmoniam perturbant. In regenda sanitate, quæ in fluidorum, & solidorum harmonia consistit, Analogismi par ratio. Quæ Torti *Lib. I.*



Cap. I. pag. 5. & sequentibus de innocuo Chynæ usu scripsit, merentur ut hic in compendio recenseantur, quia tam mascole, vere & practice quam ab ullo Medico unquam scripta sunt. Febrifugum præstantissimum ait, ac summe innocens est Cortex Chinæ. Præstans equidem præ omnibus, quia præ omnibus infallibiliter & celerrimè Febres omnes intermittentes abigit, dummodo nulla partis alicujus solidæ læsio organica sit morbi fomes. Inde fit, ut propinatis semel cuilibet Quartanario aut Tertianario drachmis duabus corticis, more maxime vulgari, in principio vel declinatione Febrilis accessus, possit Medicus absque ulla hæsitazione spondere, ultimum fore paroxysmum illum, nec rediturum alterum. Quid citius? quid certius? Testari possum ait de experientia quinquaginta circiter annorum, quo temporis tractu semel tantum, vel bis, quod memor sim in casu Febris Quartanæ, absque ullo tamen Ægri detrimento, expectationem meam fefellit Cortex, siquidem NB. ille genuinus fuerit, quod nihilominus credere non recuso. Sed quid tum? Quandoque per accidens materiam combustibilem non comburit ignis: numquid propterea non erit idoneus ad comburendum cum millies combusserit? Quod vero innocuus & insons ille sit, experientia pariter mihi satis demonstrasse videtur. Testor pergīt coram Deo & Hominibus, quod & plures testantur de suis Ægrotis gravissimi scriptores; nullum unquam ex meis Ægrotantibus periisse, quod sciam, ob usum Corticis, neque in morbum graviolem, sed in leviolem fere semper etiam cum reciderit, incidisse; idque pariter mecum perpetuo animadvertērunt, quotquot sub me Praxin Medicam exercuere, & propria dein experientia sejunctim noverunt. Si quid vero unquam incommodi accidisse fortuito visum sit, id certe non culpa remedii, suapte naturâ insonis, tunc contigit, sed ob intempestivam suppressionem Febrium plane Salubrium, & depurativarum, culpa videlicet Medici, remedium Febrifugum, ubi progressus Febrium remedii loco stabat, incaute offerentis. Quod de substantia Corticis semper innoxia a me deprehensa tam fidenter assero, haud ita facile proferre possem de ullo alio Medicamento usitatore. Lib. IV. Cap. II. a pag. 311. usque ad 317. narrat histo-



historiam morbi magni notabilem , quo 1696. laboravit , & consentiente magno Ramazzino , sex integras Corticis drachmas in vino paullo ante infusas uno haustu felici cum successu potaverat. pag. 388. Profess. Mutinensis Eruditus. Ferrarius, ejus vices supplens in Cathed. publica ita ad eum scribit : utere citra ullam sollicitudinem per totum hoc fervidum, ut soles , anni tempus , Febrium licet Periodicarum supra morem ferax , utere inquam liberaliter , quò melius valetudinem tuam firmes , atque unde etiam prodesse non cessas , honestissimo ruris otio , cum abunde jam dederis unde febres æstivas fere omnes etiam graviores & periculo plenas certo sanemus. Manu tua medemur omnes a Te uno in hoc manuducti. Utinam vero methodum tuam omnes exacte teneamus in China China (rite , opportune , ac , ubi tantum convenit , & prout convenit , administranda , Febresque dignoscamus a Febribus , tempus a tempore , & modum a modo , quæ omnia utut dilucide a Te tradita fuerint , ac explanata , a cunctis nihilominus haud æque clare sunt forsan percepta , unde identidem NB. abusus emergit , nonnunquam vero & neglectus. Quid autem noster Experientissimus Practicus suis scriptis ominetur , ingenue scripsit pag. 250. 251. & imprimis 252. & 253. Tanti viri Sapiencia Medica ab omnibus veris & solidis Medicis est merito imitanda. Dolendum est nonnullos Magni Nominis Medicos in Germania innocentissimum remedium , Peruvianum scilicet Corticem , e foro Medico proscribere conatos fuisse , quatenus operose statuerunt illum in Praxi Medica plus nocumenti quam emolumenti edidisse. Qua opinione ipsi certe plus damni quam emolumenti effecerunt. Sic enim Medicamenta pro hypothesium varietate sua etiam habent fata , laudantur ab his & ab illis culpantur. Solidæ autem experientiæ hic habenda est ratio , ne in utroque pecemus. Eadem , quæ China , fata habuerunt in Germania generosa opiata remedia. Ante quinquaginta & quod excurrit annos usus Thee a duobus Magnorum Principum Germanorum Archyatræ ita hyperbolice , quod alii ante me in Scriptis publicis etiam notarunt , laudatus fuit , non obstantibus



aliorum Archiattrorum oppositionibus in ratione & experientia fundatis, unde tantus abusus ille ortus, quem Sapientiores nunc animadverterunt. Notabilis est locus qui habetur pag. 259. du supplement de L'histoire du Japon par Engelbert Kœmpfer Doct. en Medec. Allemand, Amsterd. in 8. 1732. ita audit: L'usage du Thee, conformément au recit qu'en font les Japonnois, empeche & trouble l'effet des autres remedes, il est nuisible & l'on doit surtout l'eviter dans cette sorte de colique qui est ordinaire dans le pais. L'infusion des feuilles trop nouvelles, qui attaque beaucoup la Tete en general, fait beaucoup de mal a ceux qui ont des inflammations aux yeux, comme l'experience la enseignè. Ita etiam posteritas Germanica tandem aliquando discet Venæ Sectionis abusum è Sthalianorum Hypothesi in Germaniam introductum, scopo autem magis curationis quam præservationis, plus nocuisse quam profuisse. Quia in Patria nostra, quod in Gallia ob climatis naturam magis licet, Homines non ita Venæ Sectiones semper & in tot morbis quibus adhiberi solent ferre possunt. De Salivationis abusu in Germania fusius dicere vellem, præcipue in expositione casus notatu in Praxi dignissimi, quo Historia exponenda est Viri Illustris ac Generosi carie ossis claviculæ sinistræ laborantis quem Medicus frustra Salivatione adhibita, mecum dissuadentibus aliquot in praxi Exercitatissimis Medicis ac Chyrurgis, imprimis Magni Principis ac Electoris Archiatro Primario Celeberimo, postquam enim Salivatio spatio duodecim Hebdوماتum propinato aliquoties Mercurio, quo modo præparato nescio, duraverat, cum fine Salivationis, Vitæ finis etiam immediate sequeretur. Caries talis a quacunque causa sive interna sive externa oriatur præcipue in tali loco certe Mercurio ore assumpto curari vel potius sanari nequit, post sectionem enim tota claviculæ substantia carie corrupta deprehensa fuit. Utinam Medico innotuisset locus Petit, Medici Galli in ossibus tractandis incomparabilis, traité des maladies des os, Tom. II. pag. 442. Edit. Paris. 8. 1723. ubi inquit, Les préparations du Mercure qu'on prend par la bouche sont des remedes insuffisans, NB. toujours pernicieux dans L'exostose; Non ita ægrotum spatio temporis jam dicto inaudito



Salivatione omnimodo excruciasset, quem casum in Juniorum usum accuratissime alibi exponam. Silentio etiam hîc præterire non possum Gentis Germanicæ nimiam credendi facilitatem, qua quibusvis Circumforaneis, Alchymistis, Cultoribus Artis quæ sine Arte, cujus principium mentiri, medium laborare & finis mendicare ita facili negotio se credulos præbent. Theophrasti certè Paracelsi temporibus non tot in Germania reperti fuere Deceptores, Impostores, Crumenarum Magnatum emunctores, quot nostris temporibus ubique circumvagantur. Lutetiæ Parisiorum Teste Patin, & Petit innumeri tales Nebulones quoque inveniuntur. Ultimus lib. cit. Tom. II. pag. 443. ait; Toute la ville est pleine de ces Charlatans; les nombreuses affiches qu'on y voit de toutes part, annoncent des remèdes certains pour toute sorte de maladies, & feroit croire aux Siamois que l'on ne doit point mourir a Paris, ils auroient même lieu de demander a quoy servent les Medecins, les Chirurgiens, & les Apotiquaires. Quid autem dicendum! Mundus vult decipi, decipiatur ergo. Tandem id nimis serò intelligent Homines;

Cum mala per longas invaluerè moras.

Merentur attentionem verba Virgilii 3. Æn. V. 57. quibus exclamat,

Quid non mortalia pectora cogis  
Auri Sacra fames?

& Propert. 3. Eleg. 12.

Aurum omnes victâ jam pietate colunt;  
Auro pulsa fides, auro venalia jura,  
Aurum Lex sequitur, &c.

Sed Aurum quocunque modo præparatum & ut Medicina assumptum tantum valet ad sanitatis conservationem & amissæ recuperationem, quantum Silyphi inanes labores, quando versat Saxum sudans nitendo, neque proficit hilum. Qui Arcana, Panacœas, sic dictas Auri Tincturas miseris mortalibus dolosis ac impudentibus pollicitationibus offerunt vel potius more Agyrtarum credulis obtrudunt, nil nisi ægrorum crumenas pecuniâ exhaurire conantur.



Modernorum Italorum rerum Naturalium ac Medicarum Scrutatorum, v. g. Redi, Monti, Zendrini, Micheli, Michelotti, Vogli, Fantani, Mazini, Tillii, Giorgi, Pachioni, Pinelli, Bertini, Sacchi, Davini aliorumque labores in specie hic intueri ob chartæ angustiam non licet. Effet autem optandum ut Italorum supra a me recensitorum multa opera Medica, Theoretico-Practica de novo lucem aspicerent. In Germania pleraque plurimis etiam recentiora sunt incognita. Multum autem debemus in hoc Germaniæ meditullio Viro de Republica literaria optime Merito, Domino J. L. Koënic, Bibliopolæ Basiliensi, Offenbaci in limine Celeberrimæ Urbis Francofurti ad Moenum nunc degenti Famigeratissimo. Hic enim non saltem rarissima opera in omni studiorum genere, Antiqua & Recentiora ex Italia & Gallia sumptibus magnis in centrum Germaniæ numero fere innumerabili transferri curavit, sed etiam Libros rarissime inveniendos nitidis typis iterum in lucem prodire studet. Cum enim solertissime animadvertisset a multis doctis Medicis supra nominati Cæsaris Magati Libros duos de rara Medicatione vulnerum, seu de vulneribus rarò tractandis magnopere desiderari, novam editionem nitidis typis commodiori forma in quarto adornavit & in publicum bonum cum Erudito orbe nunc communicat. Dum hæc scribo mihi mittit incomparabile opus Lancisii posthumum De Motu cordis & Aneurismatibus in duas partes divisum, Romæ in Folio 1728. nitidissimis figuris & eleganti typo impressum. Erat hoc opus diu desideratum & expetitum, estque a doctissimo Authore more suo doctissime scriptum. Cordis structura ulterius in hoc opere illustratur, & qua ratione morbi inde oriundi prænoscantur & præcaveantur docetur. Hujus Libri mentionem fecerat author in Libro de repentinis morbis, & quidem in Scholio Observat. V. his verbis, possem hic de ortu ac discriminibus aneurismatum plura differere, sed quia nunc scholiorum brevitati studendum, aptiorem illis locum, volente Deo, tribuamus. Huic Lancisio Clementis XI. Pont. Max. Intimo Cubiculario & Archiatro debemus edit. Tabularum Anatomicarum B. Eustachii, quas e tenebris tandem vindica-



catas & Summi dicti Pontificis Munificentia dono acceptas præfatione notisque illustravit, ac ipso suæ Bibliothecæ dedicationis die publici juris fecit, Romæ in Fol. 1713. Harum Tabularum Eustachius mentionem fecerat in suis opusculis Anatomicis Venetiis 1564. in 4to editis, pag. 68. de renum structura, hisce verbis: *Quemadmodum nostræ Anatomica Tabula anno salutis millesimo quingentesimo secundo æri incisæ patefaciunt.* Dicti Lancisii opus posthumum Dom. König propediem iterum nova editione in hominum manus dare statuit. Quod Magati opus attinet, non eget illud mea laude, uti vino vendibili hederâ suspensâ nihil opus est. Ita enim elaboratum ut per se placere debeat, & exoticam commendationem non desideret. De Authore tamen ejusque libris nonnihil præfari operæ pretium esse duxi, quod benevolo Lectori haud ingratum fore etiam confido. Natus est 1579. Scandiani; Vix fines infantia suæ egressus & plurimis, primisque literarum rudimentis applicitus, singulare ingenii specimen exhibuit. Inde ad humaniores properans miros in eisdem progressus ostentavit. Præmaturæ enim adolescentiæ limina attingens, Philosophiæ prius dein & Medicinæ Studium Bononiæ feliciter transegit, quo loco & publicas utriusque theses summa cum laude propugnavit, & tandem supremos in utraque Facultate honores est assecutus Anno 1597. annum ætatis circiter tum agens decimum septimum. Eadem postea in urbe annis aliquot perstitit Medicæ Artis Praxin observans apud viros Clarissimos Rotam, Claudinum, imprimis Cortesium. Romæ etiam Praxis Medicæ exercitationem apud viros Celeberr. firmiorem sibi comparare conatus est & magis adhuc Anatomicarum dissectionum & vulgaris Chirurgiæ, cujus studio maxime tenebatur, unde cum huic strenuam operam jugiter impenderet, Romanis illis Professoribus innotuit, ac ab eis raram vulnerum curationem hausit. Termino peregrinationibus imposito, in Patriam reversus, felicissime praxin in tunc temporis maxima & florentissima Italiæ Urbe, Ferraria dicta, exercuit, imprimis vulnerum apud alios deploratorum, plurimas curationes subinde aggressus est, & summa felicitate perfecit. Unde non obstante invidia maxi-  
ma



ma 1613 de Cathedra Medicinæ in Almo Ferrariensi Gymnasio ipsi prospectum fuit, publicis lectionibus raram vulnorum curationem quam Romæ observaverat, quæ autem ab Adversariis suis ceu Empirica quædam doctrina traducebatur, non modo adstruere sed ad methodum revocare visus est.

Huic indefesso labori debentur Libri duo, qui prima vice Venetiis apud Ambros. & Bartholom. Dei 1616. in Fol. in publicam lucem prodierunt. Secunda vice iterum Venetiis eadem forma apud Joh. Jacob. Hertz typis fuerunt descripti. Huic autem editioni accessit ab ejus Fratre Joh. Bapt. Magato conscriptus tractatus, quo rara vulnorum curatio contra Sennertum defenditur. Hic Professor Acad. Wittenbergensis & Practicus Celeb. Practicæ Medicinæ Lib. V. Part. IV. Cap. IX. Editionis primæ in 4to 1634. de Cæsaris Magati & Ludovici Septalii curandi vulnera nova methodo judicium tulerat, eamque modeste refutaverat, dum pag. 422. affirmat se nihil illorum laudi detractum velle. Frater Cæs. Magati 1637. Bononiæ apud Jacob. Montium in 4to Considerationes Medicas, quibus potiores difficultates in Praxi contingentes expenduntur publicaverat. Fere sub typis erat (inquit) tertia pars nostrarum considerationum, quæ difficultates ad putridarum Februm curationem attinentes complectabatur, cum illam partem Praxis Sennerti, in qua res Chirurgicas tractat, percurrrens, in hoc judicium quod ipse de ea curandi ratione protulit, incidi, gavisus sum valde, cernens modum hunc novum, qui jam in multis Italiæ locis, immo in illustrioribus ejus urbibus feliciter observatur, a viris doctis agitari; mutatoque consilio ad alterum Tomum Quaestiones de Februm curatione rejiciens, in hanc arenam & ipse descendere statui, & in tertia parte hujus Tomi, hoc negotium conficere, mihi minime vitio dandum ratus, si a materia pulcherrima & digna in qua omnes elaborent, allectus, interrupto paulisper nostrarum considerationum ordine, non nihil digrediar. Hæc itaque fuit Origo, refutationis Sennerti, quæ cum tertiæ, huic Cæsaris Magati Editioni accedat, plura de hac hoc loco recensere meritò supersedeo. Hæc Cæsaris



faris Magati methodus raræ vulnerum curationis & Turundarum fere totalis ablegationis Ludovico Septalio suo coætaneo, Mediolanensium Archyatro ita arrisit ut ipsam ad Praxin optimo ac felici successu adhibuerit, & etiam in suis scriptis doctissimis posteritati commendaverit. Inique etiam cum arte Medica se acturum judicavit Cæsar Magatus, si observationes suas novas, in experientia vera, & quidem antiqua Hippocratis, Galeni, Celsi aliorumque Experientissimorum Virorum, & solida ratione fundatas ulterius in tenebris, jacere, permetteret. Quare ut nova aut si mavis reformata hæc rationalis methodus ad posteros & longinquos perveniat, onus scribendi subire decrevit, cui decreto optimo debetur ortus ac progressus tanti operis. Hinc etiam suo tempore non saltem per totam Italiam sed per universam Europam inclaruit. In praxi clinica diligentissimus omnium circumstantiarum secundum naturæ ordinem observator, & fidelissimus in digerendis practicis commentariis Annotator; in lectione veterum scriptorum optimorum in specie Hippocratis Exercitatus ac Peritissimus Medicus. O utinam Neoterici Medicinæ Cultores ejus essent Imitatores! O quantam Scientiam, Experientiam, Doctrinam, Sapientiam atque Prudentiam Medicam a Patribus Conscriptis Scholæ Medicæ Græcæ discere ac haurire possent! Lectio enim operum Principis Medicorum Hippocratis Artis Saluberrimæ Veris Cultoribus non nisi valde placere potest. Galenus Stylo J. C. Scaligeri, Pontifex Maximus Medicorum, Methodi Medendi Lib. VII. Cap. II. inquit Hippocratem nobis omnium Salutarium præceptorum Semina præbuisse, postulare autem quæ ille reliquit, non malos Agricolas, qui ea tum seminant commodè, tum augeant, tum perficiant. Magnus Italiæ Medicus Baglivus Praxeos Medicæ Lib. II. Cap. III. more suo judiciose notavit Scholam Coam inter cœteros viros eximios peperisse Hippocratem. Hunc Scholæ illius vestigia secutum in observatione fuisse multum, in Historia Morborum fideliter exacteque delineanda diligentissimum, in Stabiliendis demum Præceptis practicis longo usu confirmatis supra Cœteros Mortales Sapientissimum ac ferme mirabilem. Illustris enim Hippocrates, quod in uno-

d

quo.



quoque Græco Doctissimo & Experientissimo Medico optimum fuit non saltem studio indefesso consecutus est, sed plurimas vel potius omnes Virtutes Medico necessarias ex se ipso extulit; immortalis ingenii beatissima ubertate. Ita ejus lectione jam delector ut mihi hac nihil sit prius nihil antiquius. Idque mihi vehementer dolet, quod præteritis annis superioribus lectionem diligentiolem Tanti Medici neglexerim. Mihi itaque post hanc ingenuam ac liberam Confessionem nemo vitio ut quidem opinor vertet, si Posteritati ad exemplum nostri Cæsaris Magati, Magni Hippocratis lectionem optimo modo suadeam. Erit enim illa lectio cuivis Medicinæ Solertiori Cultori utilissima, & repetita adhuc magis placebit, si ipsi jungat Celeberrimorum Viro- rum in eum animadversiones doctissimas: nimirum Foëssii, Mercurialis, Zwingeri, Vallesii, Dureti, Martiani, Hollerii, Heurnii; addo etiam inter recentiores Celeberrimum Medicum Gal- lum Hecquet, qui nuperrime doctissime secundum Mechanica Principia in Hippocratem commentatus est. Præcipue ii im- mortaliter gaudebunt & vehementer lætabuntur, qui Gorraei Parisiensis definitionum Medicin. Libros XXIV. ex Officina A. Wecheli M. D. LXXVIII. in Fol. & Oeconomiam Hippocratis Alphabeti Serie distinctam apud A. Wecheli hæredes M. D. LXXXVIII. in Fol. nec non P. M. Pini Indicem in Hippocra- tis Opera Venetiis M. D. LXXXVII. impressum in Fol. pos- sident.

Neotericorum Labores in Theoria Medica laude sunt dignissimi, ratione Studii Physicæ Experimentalis, Mechanicæ, Anatomix, Chymix, quibus subsidiis, Mixtionis Chyli, San- guinis, Salivæ, Bilis, Urinæ, Seminis aliorumque fluidorum in corpore humano existentium corporum; Structuræ autem, fabricæ, ac contextus omnium humani corporis partium, profundiorẽ cognitionem nobis facilitarunt, quam veteres hisce Mediis destituti attingere non potuerunt.

Quod vero Medicina ab ultimis duobus Seculis in suo perfectiori progressu multum fuerit impedita ac retardata præcipuè ratione Praxeos, non nisi diversarum Hypothesium infelicibus natalibus adscribendum esse firmiter credo. Cui enim



enim ignotum, quantum Arti Saluberrimæ nocuerint opinionum divortia ? Quem enim latet, quantas turbas Paracelsus in Medicina suis novis causis plerorumque morborum à Sulphure, Sale, Mercurio & Tartaro derivandis excitaverit ? ut nihil dicam de aliis suis opinionum Commentis, Nugis, Barbaris, falsis ac Monstrosis Dogmatibus, quæ literis mandare non erubuit. Quibus novis opinionibus, quam absurdæ etiam fuerint, brevi temporis spatio tamen confecit, ut magnum discipulorum numerum acquisiverit, qui Chimici appellari voluerunt, & postquam cum Galenicis diu acriter dimicarunt, eos penitus fere extirparunt. Hunc Paracelsum Magnus Hermannus Conringius Introd in Art. Med. Monstrum Hominis & in perniciem omnis melioris Eruditionis natum dixit. Mihi aliquando cum attentione Paracelsi Opera perlegenti protinus in mentem venit, quæ olim in Cartesii methodo recte utendi ratione & veritatem in scientiis investigandi legisse memineram. Ita inquit Vir Sapientissimus : Gloriam etsi, non plane ut Cynicus aspernari me profiterer, illam tamen non magni faciebam, quæ non nisi falso nomine, hoc est, ob scientiarum non verarum cognitionem, acquiri posse videbatur. Ac denique jam satis ex omnibus, etiam maxime vanis & falsis degustasse me judicabam, ut facile caverem ne me unquam vel Alchymistæ promissa, vel Astrologi prædictiones vel Magi imposturæ, vel cujuslibet alterius, ex iis qui videri volunt ea se scire quæ ignorant, inanis jactantia fallere posset. Memorabile est quod Conradus Gesnerus, Tigurinorum decus immortale & totius Europæ ornamentum, Vir Pius & omni virtutum genere ornatissimus, Monstrum Eruditionis ut ait J. C. Scaliger, vitio carens, in Libri de Chirurgiæ Scriptoribus pag. 408. M. D. LV. in Fol. Tiguri impresso de Paracelso notavit. Theophrastus Paracelsus, inquit, nostro tempore vixit, qui veterum omnium placitis contemptis multa nova in Artem Medicam inducere conatus est, & Medicinam per diversas Helvetiæ, Germaniæ & Poloniæ regiones vagabundus exercuit, dum pecunia careret, qua modica acquisita vino & ludis deditus ut Constans fama est nemini medebatur; Dæmone utebatur familiari, ut ex ejus discipulo audiui, vir natura &



eloquentia quam literis & studio doctior: prorsus inconstans, nunc Theologus, nunc Medicus, nunc Magus, sæpe compotator & aleator inter rusticos. Audio tamen multos passim ab eo in morbis desperatis curatos, & ulcera maligna ab eo feliciter sanata. Callebat enim Chymisticam Artem, qua liquores, succos, olea, de Antimonio præcipue, & alia mirabilia Medicamenta parabat. Itaque in scriptis suis obscurus est, tum aliâs, tum sua remedia & suis nominibus sæpe nominans. Latine nihil edidit ob imperitiam Linguae, Germanice verò impressa est Chirurgia ejus Magna in Folio, Ulmæ 1536. & sequente anno etiam Augustæ. Hoc Testimonium omni exceptione majus hic eo lubentius communico, quia ob Libri forsân raritatem nullibi allegatum in Historiæ Medicæ Scriptoribus mihi observare licuit. Guy Patin dans ses lettres Chois. Lettr. 58. ita ait Avez vous oui dire, que le Paracelse s'imprime a Geneve en quatre Volumes in Folio: Quelle honte qu'un si mechant livre trouve des presses & des ouvriers, qui ne se peuvent trouver pour quelque Chose de fort bon. Jaymeroie mieux qu'on eut imprimé L'Alcoran, qui nes pas si dangereux, & qui au moins ne tromperoit pas tant le monde. Post hunc Paracelsum secutus est Helmontius notissimus qui per ignem insolenti titulo Philosophus dici maluit; hic vocabula Archæi, Fermentationis, & Fermentorum in Medicinam præ aliis maxime introduxit, & omnes in corpore humano actiones & functiones ab illis fieri putavit. Quamvis autem Helmontii perniciosissimum fuerit dogma, acidum in ventriculo esse Fermentum non saltem digestionem alimenterum perficiens sed & plurimos morbos produciens, unde errores fere innumeros in Praxin Medicam introduxit, nihilominus tamen Celeb. Guidonem Patinum Volum. I. Epist. III. nimis asperè eum perstrinxisse (quoniam etiam sua habuit merita) existimo, quando ita inquit. Pour van Helmont, c'estoit un mechant pendart Flamand, qui est mort enragè depuis quelque mois: Il na jamais rien fait qui vaille. Jay vu tout ce qu'il a fait. Cet homme ne meditoit, qu'une Medicine toute de Secrets Chymique & Empirique, & pour la renverser plus vite, il s'inscrivoit fort contra la saignée, faute de laquelle pourtant il est mort phrenetique.

Qua



Quales absurdas Doctrinas, quales opiniones novas, ne dicam opinionum monstra, quæ placita, & quas Hypotheses, Petrus Severinus, Oswaldus Crollius, Scheunemannus, Campanella, Joh. Rogertius, Robertus Flud, in Medicinam introduxerint, recensuit fideliter & compendiose Joh. Conr. Barchusen in Libro Doctissimo de Medicinæ Origine & progressu a pag. 397. usque ad 476. Edit. in 4to 1723. Tachenius Fundamenta Medicinæ in acido & Alkali ponere studuit. Acidum omnium morborum causam constituere existimarunt Willisius, Sylvius, Bontekoe, & horum multi discipuli, qui ubi de causis morborum agunt, vel fermentum, vel acidum, Sanguini visciditatem, coagulationem, vel effervescentiam inducens accusarunt. Inde factum esse judiciose judicat Heisterus in sua Inaugurali Oratione, ut perniciosissima hacce Hæresi totius fere Europæ Medici infecti fuerint, ita ut nullus haberetur bonus Medicus qui non secundum hæc Principia Praxin exerceret. Imò ipsos Chyrgurgos Medicorum ministros, Barbæ Tonsores, Balneatores ac circumforaneos omnes, ubi de causa Tumoris, Ulceris, aut alius Externi morbi forte interrogabantur, gravi atque alto supercilio respondisse; acidum in hoc morbo peccare, hoc alcalicis esse destruendum, hocque modo se rem bene gessisse imò rem acu tetigisse, eos autumasse, cum nihil nisi fumos vendidisse comperti fuerint.

Circa medium seculi præteriti incomparabilis floruit Galliæ Philosophus Cartesius, vir acutissimi ingenii. Qui uti nova Principia Physica ingeniosè excogitaverat, ita secundum hujus Philosophi Hypotheses, Medicinam explicare conati sunt; Benjamin a Broeckhuysen; Theod. Craanen; Waldschmid, alique, qui Arti Saluberrimæ in Theoria novam dederunt faciem. Silentio præterire lubentissime vellem Medicos nonnullos, qui Seculo præterito posteritati hypothesebus singularibus sui memoriam omni opera commendare conati sunt, nisi eorum Manes meum silentium sinistre interpretaturos timerem. Wirdigium itaque primo loco nomino, qui in Medicina nil nisi spiritus peperit: Dein Dolæum qui Reges suos, nimirum Cardinelechem, Microcosmetorem, Gastera-



nacem ineptè ac crassiori musâ , in medium produxit & postea tanquam re bene gesta , sed incassum defendere conatus est. Quemadmodum autem præcedentes Hypotheses pleræque Cerebrosæ imo etiam Stomachosæ merito erant nominande , quid verat , ut sequentem Verminosam appellem ! Postquam enim Celeberrimi Viri Leeuwenhoek, Andry & Hartsoeker in sanorum virorum semine , optimorum microscopiorum ope innumeros vermiculos observaverant, ac repetitis experimentis & observationibus veritas hujus novi inventi confirmata fuerat, nova orta est hypothesis in generationis negotio. Leeuwenhoek in tractatu suo de generatione Animalium opinatus est hominem non ex ovulo , sed ex animalculo in semine virili contento oriri. Duorum etiam generum animalcula ipsi in semine genitali maris visa, conjectat, alia masculini alia foeminini generis esse. Andry autem in tractatu de vermium generatione Cap. XI. ita negotium explicat; vermiculos inquit spermaticos, separato prius ab ovario, & delapso in uterum ovulo, ultro citroque uteri cavitatem perambulare, tandemque dicto ovulo fieri obvios, idemque gyrare supergredique. Præter hæc conjectat ovulum in extremitate, qua ovario adhæsit, habere foramen tantulum, juxta ac pomum decerptum a pediculo cui adnectitur, sejunctum: in hoc tandem unicum vermiculum irrepere, occludere, quem deinde, seposita cauda, sicut hoc ranulis usu venit, transformari verum in homunculum; exire autem modo memoratum vermiculum ex ovulo non posse, quia valvula id impediat, quæ quidem ingressum ei permittat, sed deneget exitum. Cæterum denique vermiculorum ineffabilem numerum mori, præterquam quod alii plura ovula ad ingrediendum apta inveniant. Acutissimo autem Hartsoekero verisimile videtur, ejusmodi punctum albicans, (cicatriculam vocant) quod in avium ovis observamus, foeminarum ovis itidem inesse, & hanc cicatriculam nihil aliud esse, quam parvulam cellulam, aptam ad unum seminis virilis animalculum hospitio accipiendum. Et enim sive locus fuerit tantulus, ut ab uno solum animalculo occupari possit, sive via, postquam unum intravit, occludatur,



tur, ovulum, quod ex ovario per tubam in uterum decidit, & dictum animalculum suscepit fieri foetum, nutririque primum succo lento, quale ovi album est. Siquidem vero succi tantum, quantum foetui perficiendo ad nutriendum opus est, non insit ovulo; eapropter, putat, id ipsum, ovulum intervenientibus iisdem papillis, quibus antehac ovario affixum erat, jam nunc interiori uteri membranæ glandulosæ adhære re indidem alimentum, quantum ipsi pro nutrimento sufficit capere. Recensitam Hypothesin Novam alii non saltem in dubium vocarunt, sed absolute negarunt. Inter hos Celeberrimus Theodorus Zuingerus, Helvetiæ Aesculapius, olim Hospes, Doctor & Ductor meus in Praxi optimus, nunc piæ memoriæ & a me ad cineres usque colendus Fautor Maximus in compendio suæ Medicinæ Universæ Basil. Edit. 1724. pag. 115. ita inquit: Curiosiores Medici hodierni suorum ope microscopiorum viva in hoc liquore animalcula s. vermiculos deprehenderunt, eorumque uni grandiori conceptus & formationis negotium, tanquam causæ efficienti adscribere vermiculoso conatu sategerunt. An vero in omni semine virili talia existant animalcula dubitandi rationes non desunt. In semine corrupto hominum lue Venerea, Scorbuto, Lepra, &c. affectorum concedi forsan, in aliorum vero magis sanorum genitali liquore negari possunt. A vermiculo autem qui foecundationem ovuli in foemina produci contendunt, eorum, vermiculis cerebrum scatere, hincque verminosam nimis hanc opinionem esse credimus. Hanc celebrem Hypothesin copiosè examinavit Celeb. Italus Medicus & Prof. Vallisnieri in sua Istoria delle generazione dell' Uomo & degli animali 4. Venezia 1721. Examinat accuratissime Vir Ingenii acutissimi, & judicii solidissimi rationes omnes eorum, qui putant vermiculos seminales generationis negotio inservire. Non erat amplius quæstio de horum existentia, hodie ab omnibus recognita, sed de eorum usu. Vallisnieri idem sentiebat quod Listerus, uti ipse fatebatur 1713. in Epistola ad Gallum doctissimum & acutissimum Philosophiæ Naturalis cultorem Bourguet. Nimirum Vermiculos Seminales Spermati non essentialiter sed accidentaliter inesse. Et quidem



dem non aliter ac vermes longi, rotundi, lati & ascarides, alii-  
que in corpore humano existunt, crescunt, multiplicantur, vi-  
vunt ac moriuntur. Exinde conjecturam trahebat vermiculos  
semini inexistere ad ejus liquiditatem motu illorum perpetuo  
conservandam. Eodem Anno 1713. Venetiis prima vice Val-  
lisnieri Vermes Seminales in Societate Marchionis Maffei &  
Domini Bourguet Membri Societatis Regiæ Scientiarum Bero-  
linensis vidit. Merentur cum attentione legi ejus Lettres Phi-  
losophiques à Amsterdam 1729. in 8vo, & quidem Lettre 3. sur  
la generation des plantes & des animaux. Etiam ejus Epistola  
de vermiculis seminalibus ad Collectorem Bibliothecæ Italicæ  
Tomi IX. a pag. 209. ad pag. usque 214. Lectione dignissima  
quoque scripta est, a Neufchatel le 28. Juillet 1731.

Duobus itaque illis Viris Acutissimis debemus Gloriam istius  
Novi Systematis in quo Prudenter & Sapienter refutatur ver-  
miculos Seminales ad generationis negotium aliquid contribue-  
re. Huic etiam Vallisnieriano & Bourguetiano Systemati lu-  
bentissime subscribo, nullusque dubito, quin omnes Sapientes,  
qui ordine res naturales demonstrare didicerunt, verminosum  
absurdum systema tandem derelicturi sint. Mihi que semper pla-  
cuit Virorum Doctissimorum Sententia, qua omnia Animalia  
adeoque & hominem ex ovulo produci statuerunt, ut & Celeb.  
Bohnii distinctio qua alia Animalia ova intra, alia extra se fo-  
vere docet. Et uti experimentis ac observationibus constat in  
Plantarum Seminibus totam Plantulam contineri, ita ad mini-  
mum verosimile ac probabile est, in Ovulis omnium Animalium  
corpuscula integra cum omnibus suis Partibus Organicis delite-  
scere, & non nisi ratione magnitudinis à foetus adultioris parti-  
bus differre. Experientia multijuga Naturæ Scrutatores didi-  
cerunt, foetum abortivum unius mensis non superare imo vix  
æquare Formicæ majoris mensuram, in quo distincte cernere  
licet caput, truncum & artus, oculis etiam non microscopio ar-  
matis. In foetu autem abortivo inter secundum ac tertium  
mensem qui ordinario non duos totos pollices mechanicos lon-  
gus esse solet, in manibus & pedibus digitos, in capite labia,  
nares, oculos & aures imo etiam sexum distincte cernere possu-  
mus.



mus. Corpusculum itaque hominis in ovulo delitescens cum ovario per appositionem succi nutritii in majorem molem crescit, & succedentibus annis talem acquirit magnitudinem, qualem Creator ac generis humani Conservator aptam esse sapientissime judicavit, ut foecundari possit. Conceptionis autem ac foecundationis nomine non formationem Structuræ, Fabricæ ac Contextus admirabilis Corpusculi Organici intelligendam arbitror.

Hæc enim formatio unicum Authorem, Deum T. O. M. agnoscit, qui in Principio omnium mortalium corpuscula in tanta exilitate produxit, ut sensuum nostrorum & omnem mentis ac imaginationis aciem fugiat. Opus saltem est ad conceptionis ac foecundationis negotium certa vi ac determinata activitate, ut vitalis in ovulo vel potius in hoc delitescente corpusculo motus excitetur, qui non nisi a Liquoris Seminalis activitate in generationis admirando & occulto negotio derivari potest. Conceptio itaque contingere videtur, quando in actu Venereo liquor Seminalis naturaliter est constitutus & omnia ad hoc negotium pertinentia organa in utroque Sexu secundum Naturæ Ordinem sese habent. Actiones inde orientes cum naturaliter pertractantur. nihil aliud ut ego quidem arbitror requiritur, quam ut singulæ Corpusculi ad uterum ex Ovario per tubam Fallopii devoluti eique adnexi Particulæ nutriantur, & continua Succi Nutritii appositione in dies augeantur, unde magis ac magis extenduntur dum sese explicant & evolvunt, usque dum aptum natum sit corpusculum humanum ad exclusionem per partum. Qua ratione autem Anima Rationalis Corpori Organico suo uniatur res est tam obscura quam quæ obscurissima. Probabilia ac Verosimilia sunt, quæ nonnulli Acutissimi ac Sapientissimi Viri de hac materia difficillima in chartam conjecerunt, non autem possunt dici certissima ac verissima. Non enim scire velle debemus, quæ Deus in hac vita Mortalibus dilucidè ac perspicuè revelare noluit, immensæ enim Sapientiæ placuit Hominibus certos Scientiæ ac Cognitionis limites ponere, quos transgredi conari, esset, quasi animus inaniter & effuse exultare vellet.



Multa tegit Sacro involucro natura, neque ullis  
Fas est scire quidem Mortalibus omnia multa  
Admirare modo, nec non venerare : neque illa  
Inquires quæ sunt Arcanis proxima : namque  
In manibus quæ sunt, hæc nos vix scire putandum :  
Est procul a nobis adeo præsentia veri.

Ita judicat incomparabilis Fernelius Henrici II. Franciæ Regis  
Archiater Lib. II. Cap. XVIII. de abditis rerum causis. Lan-  
cisius Summi Pont. Clementis XI. Archiater Mysteria Naturæ  
ita abdita esse existimat, ut partem Sapientiæ humanæ maxi-  
mam in eo consistere judicet, si lubenter fateamur nos maxi-  
mam partem ignorare. Illi qui in Scientiis Naturalibus ac Ma-  
thematicis sese exercent, optime sciunt, rarissimum esse progre-  
di posse, ut non invenias aliquid, quod sit infinitum, aut ut  
Cartesio placuit, indefinitum, quasi Author Naturæ & omnium  
Veritatum, omnibus rebus Attributi sui Principalis Sigillum  
imprimere voluisset, vid. Nieuwentyt de l'existence de Dieu,  
Amst. 1727. pag. 360. Estque, notante Musschenbroek in Orat.  
de certa methodo Philosophiæ Experimentalis, tanta diversissi-  
morum in hoc universo Copia ac Ubertas, ut quamvis omnes  
Mortales per Millia Seculorum examinandis iis tantummodo oc-  
cuparentur, nunquam tamen exhaustum foret hoc Copiæ Cornu.  
Quemadmodum in Philosophorum Scholis Hypotheses suas ha-  
buerunt vicissitudines, a Thalete usque ad nostra tempora, ita  
etiam in Medicina pro opinionum diversitate Theoria Variatio-  
ni valde fuit obnoxia. Fermentorum & Fermentationis Doctri-  
na jam dudum deferbuit, præcipue postquam Clariss. Geuderus  
in diatriba de Fermentis Variarum Corporis Animalis partium  
specificis & Particularibus, Varia ex modernorum placitis de eo-  
rum existentia & operandi modo dubia proposuit, in rationes  
probandi libere sed modeste inquisivit ac phænomenorum &  
effectuum ab his dependere creditorum complurium explicatio-  
nem ex dictis Modernorum Placitis tentavit. Principiorum  
Acidi & Alkali insufficientiam Bohnius demonstravit ex professo.  
Et cum jam recensitæ Principales Hypotheses innumeris la-  
boras-



borassent difficultatibus, mirum certe non erat, si vel plane excussæ fuerint, vel, ea cum erant conditione, illarum Memoria sensim obscurata sit, ut fere evanuerit. Nostra enim ætate Medica Theoria fere ad duo Principia est redacta, quorum unum e Sthalianorum alterum è Mechanicorum Scholis Originem habet. Quod Celeberrimum Sthaliū attinet Fundator est novæ Theoriæ Medicæ; Quamvis enim in veterum nonnullorum monumentis vestigia aliqua hujus doctrinæ existere Ipse ac nonnulli alii voluerint, a nullo tamen eo ordine ac connexionē Theoria Sthaliana exposita fuit. Illustri Sthaliū Regis Borussiae Primus Archiater a prima fundatione Academiae Hallensis Celeberrimæ Professor Diligentissimus, spatio triginta & quod excurrit annorum suas novas Hypotheses cum erudito orbe in multis scriptis communicavit. Tantum applausum ejus doctrina statim invenit, ut fere innumeros discipulos habuerit, quibus magnam Germaniæ aliarumque Regionum partem replevit. Imo etiam fuerunt Medici Practici qui lectione Scriptorum Sthalii, priora sua Principia deseruerunt & Sthaliana Placita agnoverunt. Circa novæ hujus doctrinæ natalitia, Academica mea studia fere absolveram, & cum in Philosophia æque ac Medicina Veritatibus inquirendis aliquot annorum spatio occupatus fuero, magna etiam attentione ac cupidissime omnia Sthaliana aliorumque ad ejus mentem differentium scripta veritatis inveniendæ spe diurnis nocturnisque horis versavi. Cum autem a Cartesio ab incunabulis Studii mei Philosophici præeuntibus Doctoribus Celeberrimis, N. Gürthlero J. H. Suicero, & J. Bernoulli a Cartesio didiceram nihil admittendum esse, quod non clare ac distincte perceperim, ideo in Sthaliano Systemate Castra hætenus ponere non potui, quamvis virum Celeberrimum ob Meritorum suorum magnitudinem carè æstimem. Existimat Theoriæ suæ Medicæ firmissima fundamenta consideratione Corporis, quatenus id mixtum & vivum est, inniti. Corpus humanum ad nihil aliud aptum esse, quam ut Animæ, tanquam instrumentum quoddam inserviat. Ut autem id jussa Animæ patrare possit, constare debere ex omnis generis organis, solidis & fluidis partibus, præsertim



vero flexibilibus. Vitam corporis esse conservationem partium, solidarum & fluidarum ab omni corruptione, cui respectu materiæ valde obnoxia sunt. Hanc conservationem fieri absolute motu, quem revera esse rem incorpoream, Corpori adjunctam, genericè ejusdem indolis & habitudinis qualis ipsa Anima est. Animam generalissime esse aliquid activum; generaliter aliquid movens; & specialissime aliquid intelligens. Eam Rectricem esse omnium actionum quæ in Corpore fiunt, imo omnia, quæ Corpori vivo usui veniunt, prudentia sua gubernare ac moderari. Verbo, Animam suum artificiosissimum Corpus struere, in eo motus vitales, tam in sano quam morbofo statu per organismum administrare. Hanc Animam vigilantem, dirigentem, regentem, propugnantem, esse illud activum & effectivum in Corpore vivo Principium, quod plerique Medici Naturam vocare solent. Morbum esse actum, ab ipsa Anima, materiam perniciosam expugnandi gratia, susceptum, hinc ad vitæ conservationem summe necessarium. Febres omnes, excepta Peste, esse intensiones Motuum Vitalium secretiorum & excretiorum ab ipsa natura humana, seu Anima, vitaliter movente, ad conservationem Corporis institutas, directas & ad effectum perductas. Clarissimus Barchusen, Dissert. Medic. XXV. mirum dictu, inquit, quantopere Sthalio hæc sibi Febrium Theoria placeat, & quam Ostentationem Scientiæ suæ literis ultro citroque prodidit: pergit in eadem pag. 590. Quanquam Clarissimus Author passim inventa sua, quibus Theoriam Medicinæ ditavit, extulerit, ac gloriosius de se ipso prædicarit; tamen non possum non heic perscribere, quæ literis mandavit pag 22. Disput. de Febr. Pathologia in genere. Ego sane, scribit, Disputationis Præses, cujus est hæc Hypothesis, provoco confidentissime ad universi Orbis Practicos, e qua Hypothesi ante aut extra hancce meam, bona fide, cordate, nedum distincte & connexe deduci potuerit, vel solum ὅτι, quod in Febribus pleræque commotiones sint activæ, contra materiam Corpori noxiam directæ: eidem ex amissim quadrantes: & quidem non ad ejus difficiliorem, plus moræ requirentem, imò interdum impossibilem, alterationem tenden-



dentes; sed ad evacuationem naturarum respicientes, & si nihil ex accidenti impediat, pervenientes. Nedum, ut ex alia Hypothesi quacunque illi parti τὸ διότι, quibus Mechanicis aptitudinibus hi organici effectus deducantur, vel minima lux afflisset. &c. vid. etiam Theoria Medica ejusdem, & notæ, quas nuperrime ad Satyr. Harv. in chartam conjecit. Quod autem universi orbis Practici (intelligo Exercitatissimos, Celeberrimos, ac Doctrissimos Practicos) suæ Hypothesi non subscripserint, veritas tam nota est, quam quæ notissima. E multis mihi instar omnium sint, duo Illustres ac Celeberrimi hujus ævi Practici, Hoffmannus atque Boerhave; Prior fufius hinc inde in System. suæ Medicinæ Tom. I. & II. Posterior Succincte, Sincere, ac more suo Modeste, in Pathologia de Morbi Natura §. 696. & 697. Edit. Paris. 1722. ubi ita inquit: Status Corporis viventis tollens facultatem exercendæ actionis cujuscunque, vocatur morbus. Nec mentio Animæ facta in hac definitione; quia Corporis statum determinatum idem Animæ status individuè comitatur; & quia Medicina, in solum Corpus agens, consuetas Animæ conditiones restituit, tum etiam quoniam mentis mutata conditio ignoratur, nec bona vel mala noscitur sanitati, nisi effectû corporeo, jam nato, edito, cognito. Proinde omnes morborum quorumcunque naturæ cognoscendæ, & inveniendæ sunt in variis conditionibus diversimodè affecti corporis benè observatis, enarratis, explicatisque. NB. Nec juvant, quæ de principio animato his intermiscuerunt Egregii in arte nostra Viri, ut cuilibet sincero indagatori, & æstimatori rerum apparebit. Neque ad Tribum aut Porticum Sthalii pertinent tres sequentes Tractatus Hypothesi ejus oppositi, quibus non Chalybeo sed arenoso, hinc ruinoso fundamento universam hypothefin superstructam esse, multaque a Sthalianis fingi, Animæque tribui, quæ nullo ipsi jure adscribi possunt, solidissimis & inexpugnabilibus argumentis docuerunt. Prior est Stentzelii Tract. de Naturæ Sthalianæ in Chirurgia impotentia, Witteb. 1729. Posterior, Mart. Nagii Borosnyai Disquisitiones de Potentia & Impotentia Animæ in Corpus organicum sibi junctum, Halæ 1729. ultimus est Petri Christoph. Burgmanni

Med.

c 3



Med. Doct. succinctum Hypotheseos Sthalianæ examen, Lips. 1731. quibus addo Christoph. Martini Burchardi Med. Doct. & Prof. Rostoch. Meditationes de Principio movente primo in Animatis in specie de Anima Plantarum & Bruorum, Rostochii 1726. ejusdem Meditationes de Anima humana ib. 1726.

Restat ut de Mechanicorum Principiis in Medicinam introductis pauca etiam dicam. Mechanica Ars tractat de Machinis quæ secundum Mathematicorum & Physicorum Principia effectæ aut efficiendæ sunt, ad producendos motus ac effectus admirabiles & quam maxime utiles. Horum Artificialium Corporum Vires, Effectus ac Proprietates ex Mole, Figura, Structura, Fabrica Artifices Calculo æstimant Geometrico. Qui itaque solidus evadere cupit Mechanicus, Geometriæ præceptis imbutus esse debet: Hinc etiam Magnus Germaniæ Eclecticus Philosophus Christianus Wolffius, ubi suorum vernacula Lingua Scriptorum Editorum Indicium fecit, 1726. in 8vo Francof. ad Moenum pag. 652. Geometriæ Studium Philosophiæ culturæ præmittendum suadet. Ita etiam olim Hippocrates & Galenus Artis Saluberrimæ Venerandi Patres, Prior, Filio suo Theffalo; Posterior, suis Discipulis Geometriæ Studium tanquam maximè necessarium suaserunt. Quod etiam docuerunt Plutarchus ac Cicero, quia Geometriâ a sensibilibus ad contemplabilia deducimur. Aurelii Cornelii Celsi temporibus floruit Casius, quem ingeniosissimum Seculi sui Medicum vocat, qui Geometrarum more jam eo tempore explicare conatus est, quare ulcera rotunda cœteris difficiliter coalescere soleant.

Ex ejusmodi principiis qui Phœnomena, Actiones, Functiones, Vitam, Sanitatis rationem, Morbos, Symptomata, Medicamentorum operationes, Morborum solutiones, imo ipsam Mortem, in Medicina explicare conantur, Mechanici vocari volunt. Corpora enim Animalium uti Artificialia obnoxia sunt legibus Mechanicis. Mechanici sic dicti Medici ab omni secta liberi sunt, hinc Eclectici vocari volunt, qui uti Apes ex omnibus floribus Mel colligunt, ita ope certorum inventorum ex Anatomia, Chymia, Physica Experimentalis, Mechani-



ca, in specie Hydrostatica, Hydraulica ac Statica Medicinam explicare quoque conantur. Et quando ad Praxin Medicam perveniunt, Hippocratem, observatorem accuratissimum ac fidelissimum sequuntur. Hic enim est ille Vir a me supra non satis adhuc Laudatus, qui arte & facundia insignis, Democrito Philosopho Celeberrimo Coætaneus, suis simul Sapiens observatis, notante Boerhave, bona quæque adunando, Corpus Medicinæ Græcæ conflavit, quique experientia propria ac aliena instructus Castæque Philosophiæ peritus, Medicinam omnibus fundavit Seculis Dogmaticam, hinc etiam Primus Veri Medici nomen suo Merito meruit. Hic Medicinæ Parens observatione multijuga edoctus erat in Medicina esse Axiomata evidentialia, certa, vera, ex ipsius Artis visceribus per experientiam notissima, sæpiusque per innumeras Clinicorum observationes probata. Veritas enim in Medicina non è falsis Hypothesibus, sed experimentis & repetitis observationibus è Praxi Clinica desumptis exploranda est. Hinc Malpighius familiariter cum Lancisio agens dicere solebat, se quosdam vehementer admirari simul & irridere, qui in naturalium rerum perquisitione multas Hypotheses, quas dundaxat ex viscerum Natura, Contextu, Fabrica ac Structura eruere deberent, mente confingere solent. Non igitur advocemus Hypotheses, Chymeras, Cerebelli ludibrium, ad effectus explicandos, qui certe longe melius, multoque Verius ex Analogicis exponi possunt effectibus. Mechanismum autem in Homine Vivo ac Sano cum Opificum Mechanismo, etiamsi inter ea opera magna Harmonia vel Conformitas observetur, confundere non licet, in Machinis enim Animalium solida contra fluida & vicissim fluida contra solida nituntur. Est nimirum reciprocus utrumque partium itus ac reditus, quod in arte factis Machinis non deprehendi solet. Quamdiu enim in homine Circulatio Sanguinis subsistit, non mere passive sese organa habent, quamdiu singula suo rite fungi possunt officio. Fibris enim motricibus reagendi quædam vis quasi innata est, qua fluidorum impetum moderari ac determinare valent ut Finis ac Effectus secundum præstabilitam Dei voluntatem necessario sequi



sequi debeant. Quemadmodum autem Vita ac Sanitas à liquoris vitalis quem Sanguinem vocamus intestino ac progressivo motu immediate dependet ; ita Sanguis corruptioni sua indole valde obnoxius hisce motibus , & depuratione per organa Cribriformia , Secretione Mechanica conservatur. Hinc fit ut in Hepate, Bilis; in Renibus ; Urina; in Pancreate, succus Pancreaticus; in Intestinis, mucosa Corporis humani substantia ; in Poris cutaneis , Insensibilis transpiratio & Sudor ; in Organis Salivalibus ; Saliva ; & in aliis partibus , alii liquores ex Sanguine , se & excernantur. Et quod ita evacuatum & consumptum est Chylificationis negotio , modo pariter Mechanico restaurari debere , quotidiana experientia confirmari solet. Uti autem in sano statu Mechanica necessitate actiones ac functiones prædictæ contingunt , ita etiam in morbofo statu ex eadem necessitate juxta leges a Legislatore, Deo T. O. M. Corpori inditas , tam accurate motus Vitales fiunt , ut quasi Summo Consilio ac Deliberatione humana, quod tamen non esse unius cujusque propria conscientia Testis est, regi videantur. Uti enim in Macrocosmo præter Deum nullum ens cogitans illum mundum immediate regit atque gubernat , ita probabile ac verosimillimum esse judico , in Microcosmo eodem modo actiones contingere. Authores, qui Mechanico modo Medicinam hisce ultimis temporibus tractare ac exponere maluerunt , multi sunt , inter quos eminent ut Sol inter Stellæ minores , Borellus sine controversia Mechanicorum Neotericorum Princeps, Bellinus, Santorius, Malpighius, Ramazinus, Baglivus, Lancisius, Bohnius, Brunnerus, Bergerus, Hoffmannus, Albinus, Boerhave, Steno, Pitkarnius, Schelhammerus, Thomson, Frind, Nebelius, Scheuchzerus, Hecquet, alios autem silentio brevitatis causâ prætereo.

Finite digressionem justò longiore , ad meum Cæsarem Magatum , qui scribendi mihi hæc otia fecit, sine ulterioribus ambagibus redire liceat.

Annum præterpropter trigesimum septimum ætatis agebat, cum novam methodum vulnera curandi publici juris fecit, quæ methodus præter Ludov. Septalium etiam Joh. Veslingium in  
Pata-



Patavino Athæneo Anatomicum Celeberrimum approbatorem ac defensorem habuit. Post nonnullos annos, quibus ab edito de Vulneribus Libro, Ferrariæ Medicinam professus est, cum præsentaneum vitæ periculum Cæsar noster incurrisset, reliquum ævi, siquidem evaderet, Religione in aliqua se traducturum pollicitus, votum adimplevit. Nam Fratrum Minorum, quos Capuccinos vocant sese adscribendum coetui curavit, in quo pluribus annis piè ac religiosè convixit. At nec ibi prorsus latere, aut otiari, nomen ipsius Famæ celebre permisit. Quin sibi largita ab iis, ad quos spectat, facultate, imò ex expresso Superiorum Religionis jussu, indictaque obedientia, huc illuc in proximas, imo in remotas regiones passim transferri, ad curandos agros nobilitate ac dignitate præstantes necesse habuit: Sic excepere eum Mantua, Bononia, Mediolanum aliæque Italiæ Civitates illustriores. Serenissimorum etiam Italiæ Principum Valetudini utiliter præfuit, ex quo suo Ordini & Fratribus suis Favores & Protectionem pro re nata subinde impetravit. Nec Medicam saltem Praxin noster Medicus per Metamorphosin factus Capuccinus exercuit, sed & venia a Superioribus impetrata Medicis Studiis privatim vacare, & si quid vellet scriptis etiam committere ipsi licitum fuit. Ejus Frater Joh. Baptista Magatus, Medicus etiam non incelebris, opus Considerationum Medicarum, quibus potiores in Praxi contingentes difficultates expendantur, moliebatur. Harum Tomus I. Typis Bononiæ editus est 1637. apud Jac. Montium in 4to. II. autem & III. Manuscriptus apud Prosperum Magatum Med. Doct. J. B. Filium fuit asservatus, & dolendum nondum in lucem prodiisse. In primi tomi fine legitur responsio ad judicium Dan. Sennerti, quo rara vulnerum curatio ab eo Celeb. Practico oppugnatur. Verosimile est eam Sennertum vidisse, cum enim Veslingio scripserit, ut, tanquam in rebus Chyrurgicis exercitissimus sententiam suam ipsi communicaret, reposuit illi Veslingius modum Vulnera curandi à Magato assertum, verissimum esse, & innumeris experimentis à seipso feliciter confirmatum, unde spes erat, Sennertum, si diutius vixisset, immature namque 1638.



a Peste fuit sublatus, quæ summa Viri ingenuitas erat, ea quæ adversus Magatum & Septalium conscripserat, recantaturum fuisse. Refert supra dictus Prosper Magatus in Vitæ Historia sui Avunculi, eum aliquid amplius ad Rei Medicæ Illustrationem conferens meditaturum fuisse, licet admodum pœvectæ ætatis fuerit. Nephriticos autem dolores ipsum acriter torquere aggressos alias curas ingessisse. Renales calculos subinde excluferat, cum unus autem ex his in Vesicam Urinariam delapsus, nec ut antea excretus, in eam molem assurrexit, qua assiduos atque immanes cruciatus experiri cogeretur. Tales tandem effecti dolores, ut vix ab Homine constantissimo licet, ferri possent, quare ut liber efficeretur, Bononiam se contulit, anceps sectionis periculum ibi subiturus, illud passim ingeminans semel potius, si ita DEO placuisset, quam pluries imò continuo moriendum. Atqui sectione, licet cautius administrata, obstare non potuit, quo minus Vesicæ inflammatio & secuta inde gangræna eum de medio tollerent, qui toties alios feliciter restituerat. Contigit hoc Anno 1640. Ætatis suæ 70. Has circumstantias particulares Clariss. Mangeto debemus in Bibl. Script. Medic. Tom. II. pag. 125. & 126.

Si præteriti Seculi Alicujus Medici Memoria immortalitati est consecranda, certe nostri Cæsaris Magati est dignissima. Hinc etiam post seculi decursum extiterunt Viri Celeb. & Doctiss. qui ejus indefessos labores in emendanda Chirurgia laudibus extulerunt promeritis & posteritati denuo commendarunt. Inter Italos Medicinæ Professores, qui alienæ magis Saluti, quam propriæ utilitati scriptis suis consulere nostra ætate studuerunt, non infimum locum sibi vindicat Dyonisius Andreas Sancassanus. Hic spartam talem illustrare tentavit, ut ejus doctrinæ fructum illicò senserit Vulneratorum Respublica, quæ seculis retroactis innocentis aut saltem non voluntariæ Carnificinæ torturam in Medentibus experiebatur. A teneris unguiculis Sancassanus in Chirurgos Gregales mirum quantum exarsit, se tot ærumnas passum recolens, quot illi obtigere ex nutricis pravitate,



te, quæ utero gerens, lacte vitiatō Infantem novem mensibus aluit, imò morboſo ſeminio ita infecit, ut pueritiā totā morboſe traducere coactus, in ſolo adoleſcentiæ limine ſe vix ſanum credere potuerit. Neceſſitas anſam dederat ob Lactis Materni defectum, extraneum, idque caſu peſſimum ſufficiendi. Dum enim uberibus Matris ſuæ Chirurghi ferro ſuccurrerent, quo congeſto puri exitum pararent, inditis Turundis exaſperata parte, eo ventum erat, ut multiplicatis in dies ſectionibus Mammæ Lacti reproducendo redditæ ineptiores Calamitatem in cœteros Filios corrivaverint. Ubi ætas attento Medicorum Documentorum ſtudio ſuffulta, eo devenit, ut Maternarum ærumnarum uſque ad Fontem retrogradi mente purgatiſſima datum ſit, opugnare perverſum Turundarum uſum adorſus Cæſarem Magatum in Antefignanum delegit. Huic itaque dato nomine Chyurgis peſſime inſtructis bellum acerrime indixit, nec ulli parcens incommodo, ab eo deſtitit, finem illi niſi cum morte fa-cturus. Magatus cujus opera nocturna verſare manu, verſare diurna, illi in deliciis fuit, centum ante annos præmonſtraverat, quanta damna vulneratis, inferrent Turundarum & Lici-niorum uſus, & quæ hunc conſequitur pernicioſa, & naturæ, quæ vera eſt vulnerum Medicatrix hoſtica medentum ſedulitas, quâ dum quotidie bis & ter, vulneratos ſolvunt, ſpecioſo puſ educendi prætextu, eorum crumenas emungunt, & non raro or-co devovent illos ipſos, qui ſecus curati paucos intra dies ex eo-rum manibus ſalvi & incolumes evaſiſſent. Herculem Durelli-um & Antonium Boccacinum Chyurgos à tam ſontica medendi methodo revocare & Magati Documentis ſenſim aſſuefacere ag-greſſus, dictato privatim & compendioſe eiſdem, quod ex illius mente foret, ſic profecit, ut attonitos propemodum ex iteratis, quæ illis ſe obtulere experimentis Chirurgiæ antea-ctæ eos exacte puderet, & Magato haud auſcultare piaculi loco haberent. Ve-rum dictu eſt incredibile, quot turbas in Sancasſanum noſtrum honeſti & laudabiles hi ſui conatus excitaverint, prout fuſius re-cenſet, ejus alumnus Vacantiuſ Ilariuſ Camertes in Mangeti Biblioth. Scriptor. Medic. Tom. II. pag. 152.



Sancaſſanum magno in pretio habuerunt, dum viverent Italiae Maximi Medici, Lanciſius, Bellinus, Malpighius, Vallisnerius, Bianchi, Verna, & Auguſtinus Belloſte Pariſienſis quidem, ſed tandem Sardiniae Regis in Aula Chyrurgus Magni nominis. Id voluptatis affecutus eſt noſter Sancaſſanus, ut quanto ab homuncionibus teruncii æſtimandis ſe impeti ſentiit, tanto à Laudatiſſimis viris ſuos labores commendari gaviſus eſt. Septuagenario proximus ſuum Magatum Redivivum in lucem edere voluiſſet, modò Typographum in Italia reperiſſet liberalem atque munificum. Scripſit Italicè Aphoriſmos generales de vulnerum cura, ſecundum Methodum Cæſaris Magati, in quatuor centurias diſtributos, partimque ex præmemorato ſiſſimo Profeſſore excerptos, & partim ex ejusdem, documentorum regula elicitos, adjecta methodo adminiſtrationis Baſami Simpatici. In Venetia 1713. appreſſo Giov. Gab. Henz. in 8vo. Modo citatus Belloſte cum antehac Primus Chyrurgus Exercitus Regis Galliae Ludov. XIV. in Italia erat, 1695. in 8vo. libellum in Medio Alpium natum edidit, cui titulus Le Chirurgien D'Hopital enſeignant une maniere douce & facile de guerir promptement toutes ſortes de playes. Hic liber non ſolum à Medicis Regiis approbatus, ſed etiam ſæpius impreſſus fuit. In prima præfatione exiſtimat Veteribus nos inventionis, Neotericis autem perfectionis gloriam debere. Jacobum de Marque in Præfatione du ſommaire des bandages, celebres Medicos Magatum & Septalium citaviſſe ait, qui uſum Turundarum & Frequentem vulnerum curationem damnarunt, hancque methodum longo temporis ſpatio, nimirum ultra 40. annos feliciter cum ſucceſſu exercuerunt. Exiſtimat autem ſe primum fuiſſe qui uſum Turundarum totaliter Praxi excludere auſus fuerit exceptis paucis in caſibus. Ita ipſe ait : Comme l'experience rend l'ouvrier plus adroit, on ne doit pas eſtre ſurpris ſi apres avoir travaille dans les Hopitaux d'Armée les pace de plus vingt années, jay fait quelque d'ecouverte dans lagueriſon des playes. Jay autrefois veu presque toute la France, jay parcouru une partie de L'Allemagne, & toute Litalie, & je nay gueres trou-  
vé



vé de lieux ou les Tentes ne fussent en usage, bien de gens les blament, & peu se mettent en peine de les éviter. Quelques-uns avant moy ont escrit pour les d'escrier mais je croy avoir esté le Premier de ce temps, assez hardi pour les supprimer entierement dans la pratique, excepté dans l'hémorragie & dans quelques uns des premiers appareils. In præfatione secundæ editionis Principalem ejus Scopum in eo consistere dicit, ut methodum, quam ratio & experientia ipsum docuit, accommodatissimam esse curationi vulnerum, indies magis ac magis confirmet, non obstantibus illis qui præconceptis opinionibus se huic methodo opponunt, quoniam lucri & proprii commodi causâ prolongare malunt vulnerum curationem. Non possum quin hic recenseam quæ nimis gloriose de se refert Bellost hisce verbis : La Voye que la Nature Semble indiquer aux Praticiens, a esté autrefois connue & suivie par des Fameux Medecins, mais leur Authorité na pu prevaloir sur la Multitude des Docteurs opiniatres, & des Chirurgiens accoutumez NB. a une vielle routine. De sorte quelle estoit presque effacée de la memoire des personnes les plus savantes dans la Medicine, & quelle le trouvoit entierement hors de l'usage vulgaire. Ainsi ce n'est que par hazard si je me suis rencontré avec Magatus & Septalius qui florissoient en Italie il y a environ un siecle. Car ne scachant que la langue de ma Nourrice, si je me distingue par quelque connoissances peu communes jen ay la principale obligation a mes applications particulieres dans l'exercice de mon metier, aux experiences que jay faites dans mes voyages, & sur tout dans les Hopitaux d'Armées par lesquelles jay acquis plus de lumieres, que le grec & le latin ne m'en auroient pu donner. Quasi vero Itali, Germani aliæque gentes ejusmodi inanes jactationes, ostentationes ac magniloquentias sine dubitatione cæco obsequio legere ac credere coacti sint ! Ingenuum Virum decet lubentissime profiteri per quos profecit, quod certe ipsi non est dedecori. Bellost meritis nihil detractum volo, laudanda est ejus diligentia ac peritia in Arte Chyrurgica. Sibi autem soli attribuere non debet, quæ de nova vulnera



tractandi methodo scripsit. Nolo clarius mentem meam aperire, mecum autem sentire videtur Franciscus Torti supra laudatus lib. cit. pag. 187. quando ait : Accuratissimum Sancassanum, Sponsorem operis inscribendi, *Magatus Redivivus*, omnium optime determinare potuisse an Bellost Conformitas cum Cæs. Magati doctrina fortuito tantum, sive potius de industria contigerit. Ultimum ideo firmiter credo, quia Bellost cum Sancassano, Cæsaris Magati admiratore summo literarium habuit commercium. Cur autem Sancassani nullam in suo opusculo mentionem fecerit, aliis dijudicandum relinquo, qui arcanum facile divinare poterunt. Novam vulnera tractandi methodum etiam imitatus est 1688, Chabert, Chirurgien Real des Galeres & de leurs Hopitaux, & juré de la ville de Marseille, ille autem ingenuè fassus est qua ratione ad novam hanc cognitionem pedetentim pervenerit, ut videre licet in ejus Observat. Chyrurg. Pract. à Paris 1724. in 8vo. Inter Germanos pauci Medici hujus Reformationis in Chyrurgia mentionem faciunt præter Clariss. Heisterum in Chyrurg. suæ 1719. Norimb. in 4to. impress. pag. 21. ubi memorat Belloste usum Turundarum totaliter e foro Medicinæ proscribi velle. Heisterus autem more suo judiciose existimat, magis de abusu quam rationali usu hoc intelligendum esse. Huic addo Junckerum, qui in conspectu suæ Chyrurgiæ in 4to. 1721. pag. 54. & 55. ita inquit : Irritationis incommodum haud dubie ansam dedit ut Auctores quidam, inter quos præcipuus est Belloste (inde evidentissime patet Magatum ipsi fuisse ignotum) omnem Turundarum usum rejicerent, dicentes : Illas Dolorem, Humororum Congestionem, & Inflammationem causari, Materiæ effluxum impedire, & Vulnera in Ulcera diducere. Hinc judicat Junckerus ad evitandam utrimque offensionem eo respiciendum esse ut Turundæ ita molles & læsioni proportionatæ parentur ne incommoda jam dicta exspectanda inde veniant. Opus etiam esse, ut justum tempus, quo plane auferendæ sunt observetur. Quamprimum enim vulnus vel ulcus satis detersum & depuratum est, sensim minuendas & tandem plane removendas esse, Turundas, c. g. in





in Vulneribus Sclopetariis post tertium diem Turundas magis nocere quam prodesse. Impedire enim puris exitum aliarumque rerum heterogenearum. In Vulneribus faciei plane rejiciendas esse, quia deformes causantur cicatrices. Si meam mentem circa hoc negotium libere mihi aperire licet, optasem ut Diligentissimus Chyrurgiæ Cultor Belloste, doctus quoque utriusque Sermonis, Linguae, nimirum ut Gallicæ ita etiam Latinæ fuisset, juxta Ovid. 2. de Arte amandi vers. 121.

Nec levis, ingenuas pectus coluisse per artes  
Cura sit ; & Linguas edidicisse duas.

Si enim Linguam Eruditorum, nimirum Latinam addidicisset, Cæsaris Magati Libros duos de rara vulnerum medicatione & Turundarum noxæ legisset, imo relegisset, & sic Doctior factus, non tam audaciter Turundas totaliter ac imprudenter proscribere conatus fuisset. Hæc enim non erat mens nostri Experientissimi ac Doctissimi Magati, neque ad ejus mentem e fundamentis Artis Saluberrimæ solidissimis, rationis nimirum ac experientiæ differentium, Septalii ac Sancassani, utpote qui casus quandoque dari existimabant, in quibus antiqua methodo utendum sit. Has curationes coactas vocabant, regulares autem, quæ ex Turundis punctis, procedunt. Docuit Magatus Turundas convenire in vulneribus; quando remorari eorum sanationem oportet, usquedum corpora quæcunque peregrina, quæ sanationi obstare possunt educta fuerint. Quod etiam Antiquissimum ac Excellentissimum Patrem nostrum Hippocratem judicasse, noster Magatus libro primo solidissime demonstravit. Hoc itaque tam certum est quam quod certissimum Cæsari Magato, Reformationem Chyrurgiæ, ratione frequentis curationis Vulnerum, & Turundarum irrationabilis usus, Posteritatem unice debere. Magati enim methodus Rationi & Experientiæ solidissimis Medicinæ fundamentis est fundata, quia non minus firma stat observatio, sæpissime cum debita attentione rite repetita, hinc vera, quam  
ratio-



rationem severissimum. Testatur Septalius cum in magno Mediolanensi Valetudinario, in quo per annos quadraginta medendis ægris operam dedisset, spatio unius anni in portione illa cujus curam susceperat, plerique capite vulnerati antiquo more curati interiissent, absenteque Chyrurgo, cui eorum cura demandari solebat operatio substituto injunxisset, ut deinceps nova hac medendi forma uteretur, ex quatuordecim vulneratis in capite unum solum interiisse, & inter hos tres existisse qui fuerant vulnerati cum ossis Calvariæ & membranarum incisione, & unum ex casu ab alto cum ossis, introessione & duo cum rima in osse: & cum Chyrurgus rediisset, ac antiquum modum resumpsisset, & infeliciter succederent curationes, ratione & exemplis tandem convictum, manus dedisse, & ut is curandi modus introduceretur acquievissse felici cum successu. Ex vulnerum autem capitis curatione, quæ magis negotii, quam reliqua curantibus afferunt, vulnerum in aliis Corporis Partibus existentium curandi modum collectum ac paulatim introductum esse. Multo citius etiam ac facilius hoc reformato modo curari vulnera affirmat, quod ne vigesima pars excrementorum generetur, neque semper in eo necessarium sit os abscedere, & si abscessus expectandus sit, longo citius abscedat novo hoc modo quam communi, & sæpius etiam in minori quantitate, ex quibus infert etiam tutius sanari vulnera, quia cum Natura sit, quæ sanat vulnera, ubi citius introducitur sanitas, signum est adversus impedimenta magis prævalere, at quo magis prævalet, inquit, eo etiam tutius fit curatio. Videatur etiam Magatus Lib. II. pag. 567. & 568. hujus editionis. Vulnera vulgari modo etiam quandoque curantur, sed multo felicius & tutius altero. Non itaque solvi debent vulnera, nisi quando necessitas id absolute postulare videtur. Excellentia hujus methodi etiam inde judicanda, quod hac via non ita vulneratorum loculi exhauriantur. Nihil dicam de incommodo, quod parit frequens vulnerum tractatio. Quid enim opus est nimis affectatâ ac incommoda diligentia? quando non est necessaria, nam



Ire per ambages cum sint compendia rerum  
Stultitiæ summum dixeris esse gradum.

Dantur enim vulnera quæ nimia cura non mitescunt, sed laces-  
sita potius ferociunt, ut eleganti veritatis modulo Poëta cecinit:

Curando fieri quædam majora videmus  
Vulnera, quæ melius non tetigisse fuit.

Tom. II. pag. 601. hujus editionis refert Cæsaris Magati Frater,  
Nostrum Magatum curandi rationem a vulneribus ad ulcera  
transferre non dubitasse, idque adeo felici successu attentasse ut  
sæpe deplorata ulcera, & innumeris tractata remediis facillimo  
negotio hac via incedens sanaverit. Romæ eum didicisse ratio-  
nem abstinendi a multis remediis, multoque plura ac majora  
non medendo præstitisse, quam cum crebris utebatur remediis,  
& non raro magnum remedium esse remediis parcere. Et pag.  
617. notatu habet dignissima, quæ ut juniores Practici legant &  
relegant Suafor & Auctor sum; ita autem sonant: Vires Natu-  
ræ maximæ sunt, cum nactæ fuerint Medicum, qui illis præsto  
esse noverit, non autem eas fatigaverit importunis remediis, uti-  
nam id intelligerent Medici omnes, & aliquando parcerent re-  
mediis, quæ sæpe non minus, quam morbus ipse, eas affligunt,  
neque ita diligentes haberi vellent, & non minus denique ægro-  
ti commodis inservirent, quam suis, fortasse felicius succederent  
curationes, nec adeo infamarentur remedia, ut fit quotidie, ita  
prudentissime sentit Magati Frater. Hoc etiam existimarunt ve-  
teres nonnulli Practici Celeberrimi, hinc statuerunt optimam  
Medicinam esse, quandoque a Medicina abstinere. Sancte etiam  
testari possum me in Praxi triginta & quod excurrit annorum in-  
numeris vicibus felicissime multos magnosque morbos Dei gra-  
tia debellasse, non multis sed selectis adhibitis Medicamentis  
imo etiam sæpissime factis pro circumstantiarum Varietate ali-  
quot dierum induciis. Hæc vero methodus in experientia anti-  
qua & moderna ac solida ratione fundata Pharmacopœis non pla-  
cet. Medicis eorum, qui nil nisi Medicorum Ministri sunt, ho-  
diernæ artes quoque non placent, & multo minus posteritati



ut opinor placebunt, si non tandem aliquando pro Salute Populi, Autoritate Principali, ii quorum officium est, vel certè esse deberet, ad Medicinæ Autoritatem & Plenissimam Integritatem conservandam vel potius restituendam, omni cogitatione, cura ac viribus operam conferant. Et hoc est quod posteritati ex animo opto, quod mihi Ehen! ob conditionem inemendabilis hujus temporis, ad minimum in hisce Germaniæ regionibus, videre non licuit. Articulus VII. est Illustriss. Senatus Augustani Decreti, contra quem quotidie peccatur, & hinc Cives in republica supra modum, imo atrocissime læduntur. Quia autem dictum Decretum non in omnium manibus est, operæ pretium erit, illud hic apponere. Sic audit: Pharmacopœi quoque falcem in Medicorum messem, Consilia ægris dando, non mittant, qua intentione nec pharmaca, electivè præsertim purgantia, opiata, aut menses ac foetum pellentia medicamenta, absque Medici præscripto neutiquam divendant, ne vel Cives incauto eorum usu lædantur, vel medicamenta ipsa infamiam subeant, cum de his, solis Medicis fidei præstandæ, dignotionis habendæ, ac rationis reddendæ onus incumbat.

Praxis Medica non consistit in indifferenti Medicamentorum assumptione, quando enim importune sunt propinata, molesta ad minimum, si non noxia esse solent, & tunc dolendum, quod factum est, infectum fieri nequeat. Vomitoria autem ac purgantia ut alia taceam remedia intempestive ægrotis data, nulla habita ratione, ætatis, sexus, temperamenti, morbi ortûs, progressûs ac exitûs, ægritudinum indolis aliarumque circumstantiarum, eos occidere possunt. Et tunc meritò dicendum tales Medicos vel potius Medicaistros Ægros impunè necare. Si Plautus Poëta Comicus, Natione Italus, quem Cicero lib. I. de Officiis, urbano, ingenioso & faceto jocandi genere scripsisse memorat, si inquam adhuc viveret, qui anno ante Christi Nativitatem 182. claruit, sine dubio exclamaret, Anne Tibi Pharmacopolæ impunissime id facere licet! O tempora! ô Mores! Nostra ætate in Universitate Lipsiensi Celeberrima, innumerosum Celeberrimorum Medicorum Nutrice felicissima, floruit Vir immortalis Gloria dignissimus Bohnius, qui in Aureo Libro de Officio Medici Clinici ac Forensis cap. III. de Empiricis, postquam eos ubique terrarum esse copiosissimos asseruit, ita inquit: Ast de Germaniâ nostra haud inique



que vulgari proverbio asseritur ; plus esse Medicastrorum in hac, quam Muscarum sit in Armenia : Seu, prout non nemo Scriptorum ait , Copia passim Medicorum (Medicastrorum) Germania ita fere obruitur ut vel Medico opus sit, qui a Medicis illam purget ; vixque ullus terrarum angulus, qui non ab INSECTIS his inquinetur. Quippe

Fingit se Medicum quivis Idiota, Sacerdos,  
Judæus, Monachus, Histrio, Rasor, Anus,  
Miles, Mercator, Cerdo, Nutrix & Arator,  
Lamia, Decoctor, Pharmacopola, Magus.

Inter Empiricos, sic dictos Medicos primo loco Idiota nominatur, quo Character omnes dignos judico cujuscunque sint ordinis, dignitatis, conditionis, qui Medicinam facere audent, & non Artem generi humano Saluberrimam didicerunt. Uti enim Theologia, Jurisprudentia, Scientiæ ac Artes omnes sua habent fundamenta, ita etiam Medicina Dei munere Mortalibus data, certissima in experientia ac ratione fundata habet Principia. Et si non omnia evidentissime explicare possunt Medici, ac etiam non omnia ex voto semper succedant Medicis, quia

Non est in Medico semper relevetur ut Æger  
Interdum docta plus valet Arte malum.

Ita cum Theologis ac Jurisperitis idem etiam habent Fatum Medici, quod abunde testantur illorum Opinionum ac Sententiarum divortia, nec non in Praxi multifarii illorum quoque inanes, ne dicam inanissimi Labores. In Republica bene constituta legibus atque edictis caverunt Domini Territorii, ne quis Praxin exerceat aut ut clarius eloquar Populo Medicamenta propinet qui non Artem didicit, & qui in Universitate quadam ad munus Licentiæ gradum non sit adeptus. Vid. Imperatoris Caroli V. Constit. Criminal. Artic. 134. Sed merito quæritur quæ causa sit tantæ calamitatis, qua Populi creduli & innocentis salutis non diligentius consulitur. Respondet Ah. Fritsch, Juriscons. Celeberr. qui præclarâ conscientiam de Republica meruit optime, in T. de Peccatis Principum, eorum Ministr. Advocat. Procurat &c. quando ita clare & verissimè inquit ; in culpa sunt Magistratus, qui vagam ac publico perniciosam Licentiam medicandi non coërcent, & ἀπαίδευτος ac veræ artis protinus ignaros impostores e Republica expellunt. Caroli V. Edictum anni 1540. ita audit : Ne quis Apothecarius ægros visitet, aut illis absque Medici consensu Medicamenta porrigat. Ordinationis Bavar. Provinc. 3. Tit. II. Artic. 3. Es sollen die Apotheker vor sich selbst



und ohne Erlaubniß derer Doctorum sich nicht unterstehen die Leute zu curiren/ selbst Recepte zu ordnen/ und das Amt eines Doctoris zu gebrauchen. Cui notante Bohnio Parallelæ observantur, die Hessische Medicinal-Ordnung 1617. Leipziger Apotheker-Ordnung 1669. Constitutiones Medicin. Brandenb. aliæque. Vulgum sapissime insanire quotidiana experientia constat, quando autem Homines sanæ mentis, Docti, Literati valetudinem suam Hominibus in Arte imperitis concedunt, annon etiam insanire videantur aliis dijudicandum relinquo. Ejusmodi interea Hominibus Fabulam XIV. Lib. I. Phædri Fabularum, editionis Burmanni cum ejusdem aliorumque Comment. Amstel. 1698. in 8vo. attenta mente legendam seriò sed tamen bono Animo commendo.

Aliorum tandem Conatus in Chyurgia emendanda non vitupero, modo non fiant cum Magati Sugillatione & Obtrectatione, quod ferre nunquam potero. Tanta enim est Suorum Meritorum Magnitudo ut verbis nullis exprimi facile possit. Hæc est nimirum Magati Gloria immortalis, ut nullius Laudibus crescat, & nullius Vituperatione minuat. Uti autem Sancassano supra laudato nihil magis in deliciis fuit, quam Magati Libros nocturna ac diurna versare manu, utpote cui in vulnerum tractatione, illarum circumstantiarum ratione quæ e solida Praxi & Experientia vera hauriendæ sunt, nullus præferendus, qui de vulneribus unquam scripsit, tantum enim inter omnes ejusmodi scriptores excellit

Quantum lenta solent inter Viburna Cupressi.

Ita omnes Medicinæ Studiosi qui Medicinæ efficacis, quam Chyurgiam vocamus, Cultores sunt, Læctionis attentæ ac frequentis Magati Librorum neque pudeat, neque pigeat. Ille enim Princeps, imò Cæsar in vulnerum curatione eos fidelissime ac doctissime docebit, quale eorum officium sit ut curent ad sanandum appositè, & tunc discent facile quantum distent æra lupinis. Qui itaque Magni Magati nomini Illustri favetis Lectores Benevoli, Rosas Tumulo ejus inspergite, manibus date Lilia plenis & flores purpureos spargite, ac libris ejus doctissimis novis typis in lucem editis magno vestro commodo diutissime fruamini, mihi que lingua animoque favete. Valete iterumque valete. Scribebam in Hanoviæ Philippopoli die 13. Febr. 1733.







# CÆSARIS MAGATI DE RARA MEDICATIONE VULNERUM

## LIBER PRIMVS.

In quo de vulneribus generatim  
pertractatur.

### P R Æ F A T I O.



Nihil mihi fuit antiquius ac magis in optatis,  
quam ut de re Medica benè mererer; quia verò  
propter tenuitatem ingenii ad omne commentum  
infœlicissimus, quod arti fructum afferret, sup-  
peditare non poteram, id saltem affecuturum  
speravi, si viros præclaros, ac fama celebres ad  
ea scribenda excitarem, quæ posteris forent uti-  
lia, & Medicam ipsam artem locupletarent, atque, ornarent.  
Hac de causa cum mihi se se, obtulerit materia pulcherrima, de  
qua nihil hætenus, quod sciam, habemus scriptum, eam tradere  
monumentis, ac literis decrevi primus: illud quidem mihi non  
sumens, ut naris emunctæ viris satisfaciam, aut auctoritatem  
quandam illi comparem; neque enim id contenderem, qui in  
propriis ædibus vix cognitus in me non esse, quod vel medio-  
criter eruditis placere valeat, optimè noverim; eoque minùs id au-  
derem, cum non ignarus sim quàm anceps lubricum sit, ut dice-  
bat Plinius, rerum omnium novarum: sed hoc tantum consilio,  
ut qui plurimum ingenio possunt, eandem, & ipsi, arrepta hinc



ansa, suscipiant causam, ac majora, quæque à communibus abhorreant, ex intima depromant parte, publicæque utilitatis gratia in medium proferant. Satis enim præstitisse, quin etiam metam attingisse mihi videbor, quando omnes intelligent, potius defuisse patronum causæ, quàm causam patrono.

Negotium est de vulneribus. Et quamvis ab antiquis, & recentioribus de iis plura sint tradita, immò forsan ea sit antiquior pars Medicinæ, homo tamen, qui nunquam conquiescit, sed assiduus inquit, ac investigat, nova scire desiderans, & ad inventa maiorum adjicere, non multis ab hinc annis novum curandi modum excogitavit, qui usque adhuc apud inventores immoratus in lucem non prodiit; Inde profectum est, ut plurimi solo nomine audito perhorrescant. quippe solvenda quotidie vulnera, detergenda; recentibusque medicamentis, ut ajunt, nutrienda, linamentis, ubi cava sunt, impositis, adeò communiter receptum est, ut apud plerosque aliter ea tractare sit nefas; eademque curationis ratio ab omnibus ferè qui aliquid in hanc sententiam literis prodiderunt, passim proponitur. At una, vel altera, vel saltem post plures dies repetita solutione citra turundarum, & penicillorum usum, qua quidem via incedit novus hic modus, idem & facilius obtineri posse, quod à crebra illa procuratione præstatur, & paucis cognitum est, à multis verò tanquam portentum, aut vix, vel neutiquam auditum. Et tamen rei Medicæ causa inquirendum esset, num hic modus, quod ejus fautores prædicant, possit explere, num rationi, veterumque sapientum doctrinæ sit consentaneus, an potius fucatus, & fallax sit, vulneratisque perniciosus, & à rationum, majorumque doctrina simul abhorreat. Namque si à principiis veræ Medicinæ progenitus ratione, & experientia, quæ firmissima sunt ejus fundamenta, niteretur, cur permittere, ut in tenebris perpetuò delitescat? cur in lucem non prodire? cur imminuta pars hæc Medicinæ relinquenda.

Habemus, dicet fortasse quispiam: à majoribus nostris alium modum, cujus virtutem, & excellentiam innumera experimenta comprobant, proinde parum sapientis esset, novitatem affectare. Dum enim veterum viam deserentes, novas, & inusitatas  
indaga-



indagamus, sæpius in asperas, & difficiles semitas incidentes, & ad angustissimos, præcipitesque locos ducti, gradum sistere, pedem referre, tandemque non satis prudenter nos fecisse cognoscentes, ab instituto desistere cogimur. Unde illud Pythagoræ apud Diogenem Laërt. *ἐκτος λεωφόρου μὴ βαδίζειν*, id est, extra publicam viam ne deflectas. Verum si æquè sub rara, ac sub crebra solutione sanarentur vulnera, non video, quid nos urgeat, ut multiplicem, & operosum hunc modum magis quàm illum deligamus, qui cum sit simplicissimus, neque molestiam ægroto, neque Medico negotium vel minimum faceffit. At si melius, ac foelicius idem assequeremur, raro solutis, ac veluti neglectis vulneribus, nonne stupidus, & amens, aut pervicax, & duræ cervicis jure habebitur, qui hac medendi ratione contempta vetustiore sequi maluerit? Equidem & ego communem illum modum, quem etiam apud auctores verè omnes observabam, à præceptoribus meis edoctus, quodam tempore non aliter tractabam vulnera. Ut postea mutarem consilium, hinc accidit: Dum Romæ commorarer, præcipuos Urbis Chirurgos novam hanc curationem vulneribus adhibentes intuebar; novitate rei permotus, & quod antiquorum sapientum placitis adversari mihi videbatur, cæpi à nonnullis percunctari, quibus eam fulcirent rationibus. Argumentis quoque ex Artis Medicæ principiis depromptis, & ipsius Galeni doctrina hunc morem infringere, atque convellere studebam. Sed communes tantum rationes afferebant, proprias nullas, ex eventu potius illum comprobabant. In Hippocratem, ut primum auctorem referendum esse ex aliquot ipsius locis persuadere conabantur: quos tamen parum ad rem facere tunc judicavi. In Galeni doctrina defensionis spem non reponebant. A multis, quæ obiciebantur, nunquam se explicare potuerunt. Immo non defuere, qui ejusmodi curationem rationi repugnare apertè contenderent: in eas redacti angustias, ut unicum experientiæ perfugium relinqueretur. Miros tamen eventus quotidie magis, magisque conspiciens, cæpi egomet fundamenta, & rationes, quibus firmaretur, accuratè perscrutari. Verùm fatear, tot, tantæque sese obtulerunt, ut me, qui in nullius magistri verba juravi, cuique magis amica est veritas, quàm Socrates, aut Plato, novam



hanc medendi viam mirum in modum extollere, & alii cuique methodo præponere, ac dignam, quæ omnibus nota redderetur, existimare coegerint. Cum ergo illos, à quibus religiosè colitur, parum de hoc, digno tamen opere, in quo omnes nervos ingenii, & industriæ suæ contenderent, sollicitos animadverterem, iniquè cum ea, & cum medica ipsa arte me acturum duxi, si ulterius in tenebris jacere permetterem. Et propterea de illa publicas habui lectiones.

Quoniam verò angustia temporis negotium conficere non potui, quod etiam parum usui erat futurum, cum viva vox neque ad posteros, neque ad longinquos permanet, onus scribendi subire decrevi. Atque provinciam hanc, licet difficillimam, eò suscepti libentius, ut egregii quidam Medici, miræ eruditionis titulo, Galeni verbis utar, passim se se venditantes, sed Liberide inaniores, & cœciores, qui me in curandis vulneribus à trita viâ recedere intelligentes, Empyricis remediis, quæ secreta vulgus appellat, non ratione, ac methodo inventis, uti existimarunt (admiracionem miseratione dignam) & præterea nullo suffulti fundamento professi sunt, & ignaris persuadere voluerunt, quàm longè in scientiarum studiis processerint, & quam aciem, ac præstantiam ingenii naturæ munere, disciplinæque beneficio sint consecuti, exactius cogitantes, ad bonam frugem se recipiant, admoneanturque in posterum, de iis, quæ proprium captum superant, non debere quempiam, qui sapientis exoptet nomen, longiorem habere sermonem, nedum iudicem agere, nihilque graculo cum fidibus. Et si quo semel odore testa recens imbuta fuerit, hunc non ita facile elueris. Ne quid autem hac in re desideretur, utrumque modum, & rationes, quibus uterque, aut infirmari, aut corroborari possit, examinare, ac momento suo ponderare constitutum est mihi, & perquirere, num illud repugnet, & hunc, & illum esse Methodicum, nec ne: si verò uterque sit talis, quisnam ipsorum præstantior, ac magis eligendus, ut rejecto altero tandem concludatur, quid in unoquoque vulnere sit agendum. Novum id videbitur, fateor, & absurdum fortasse. In dubium enim revocare eum curandi modum, qui à prioribus illis inventus, à posterioribus autem approbatus, ac per-



tot annorum secula experientia confirmatus, quo tot vulnerati ab Orco sunt erepti, pristinaeque salutis restituti, & alium invehere, speciem habet paradoxo, quod veterum sapientum doctrinam pervertat, & ipsius Medicinæ candorem turpi inficiat labe. Cæterum qui experti sunt, & propriis viderunt oculis, quam facile, ac, ut ita dicam, foeliciter novo hoc modo sanentur vulnera, secus profectò sentient, exploratum habentes, quemadmodum reliquæ artes, ipsam quoque Medicinam ita fieri per additamenta, nec esse absonum, si ei quidpiam nunc adderetur. Plura, dicebat Galenus, inveniuntur hodie, quæ apud nostros majores non fuerunt inventa, Id Galeni temporibus erat verum; at non minùs his nostris, sumus enim pueri in gigantis collo. Quantum incrementi non multis ab hinc annis susceperint pleræque artes, nemo non videt, quot medicamentis utimur hodie, quæ fuere antiquis prorsus incognita? Vera methodus, inquit Galenus, potest vel nunc etiam post tot, tantosque Medicos non solum meliora medicamenta, quàm prius fuere, sed etiam universum curationis modum invenire. Medicina jam ab antiquo existit, dicebat Hippocrates, & principium, & viâ inventa, per quam inventa & multa, & probè habentia comperta sunt, per multum adeò tempus & reliqua deinceps inveniuntur, si quis idoneus sit, & jam inventorum gnarus ex his ad perquirendum procedat, πάντ' ἀνακαλύπτων ὁ χρόνος πρὸς φῶς φέρει. dicebat Menander, hoc est, omnia detegens tempus ad lucem fert. Non igitur quia hic modus novus est, hac una ratione est improbandus, nec quia ille est vetustior, idcirco primas meretur partes; sed hujus, illiusque fundamenta diligenter consideranda, & discutienda, & vis utriusque exactè perpendenda. Nam qui firmioribus nititur fundamentis, magisque proposito finì conducit, ille quidem præstantior, ac dignior est judicandus. Totam autem hanc considerationem duabus quæstionibus perstringemus. Cum enim novus hic modus in duobus potissimum consistat, videlicet, ut rarò solvatur vulnus; atque ut turundæ, ac penicilli, seu linamenta ablegentur, altera quæstio ad solutionem, altera ad usum linamentorum attinebit. Primò itaque perscrutabimur, utrùm melius sit, & magis ex arte quotidie vulnera solvere, an pluribus



interjectis diebus; secundò utrùm in curatione vulnerum turundarum & penicillorum usus sit artificiosus, & recipiendus, aut etiam necessarius, an non. Quod verò ad primam quæstionem attinet, quoniam duæ sunt propositæ methodi, communis scilicet, atque nostra, quam novam appellabimus, ut hanc undique difficultatibus urgeamus, ex quarum solutione postea magis conspicua fiet ejus integritas, in primis argumenta, quibus communis comprobatur, & necessitas crebræ solutionis ostenditur, afferentur in medium. Licet autem ad causam tendant alterius methodi, attamen secundo loco subjungentur alia, quæ magis è directo eam impugnant. Tertiò verò adducentur nonnulla, quibus firmari posse videtur nova methodus: Et quoniam, ut apparet, ejusdem fundamenta continent, ut difficultatem augeamus, addemus rationes, quæ fundamenta illa non solum infirmant, verùm etiam, ut aliquorum est opinio, prorsus evertunt. Circa usum pariter turundarum, & penicillorum in utramque partem differetur: extabunt enim, & quæ illis non mediocriter faveant, & quæ acriter adversentur. Deindè veritas ex ipsa rei natura, & propriis principiis investigabitur; & qua via in curatione vulnerum incedere oporteat, clarè patebit. Ad uberiores tamen doctrinam, utque Medicinæ candidatis satisfaciamus, postremò constitutam jam methodum vulneribus partium aptabimus, in eo elaborantes, ut nihil prætermittatur, quod ad rem vulnerum faciat.







## C A P U T I.

*Utrum melius sit vulnera quotidie solvere, an pluribus interjectis diebus. Proponuntur rationes, ex quibus præstantia Communis Modi, qui quotidie vulnus solvit, colligitur.*

**R**ationes adducere, quæ communem curandi vulnera modum comprovent, minus necessarium fortasse videbitur, cum ejus præstantiam tot gravissimorum virorum, qui hac de materia commentarios ediderunt, auctoritas, & quotidianus insuper eventus fatis, superque declarent. Quia tamen quæcunque illum constituunt, ea omnia novam methodum labefactare, immo funditus evertere creduntur, idcirco quæ aliqua consideratione digna huic favent modo, nihil eorum prætermittendum duximus; quorum vim perpendentes &, quid contra methodum alteram possint, haud ægrè deprehendemus. Cum autem simplicia vulnera solam agglutinationem exposcant, nihil est, quod in iis quotidianæ procurationis ostendatur necessitas, exiguo siquidem tempore agglutinatio absolvitur, & eorum non pauci, qui crebram solutionem diligunt, unico apparatu duntaxat hujusmodi vulnera sanitati restituere profitentur, neque id *ἀμεθόδον*, existimant. Quod verò ad turundas, & penicillos attinet, in iisdem ablegandos prorsus esse, nullus unquam dubitavit. Quapropter de cavis tota erit controversia. Curativæ igitur methodi legibus crebram hanc solutionem præscribi, & omnino modum, qui quotidie solvit, esse methodicum, optimum, atque sine ulla exceptione recipiendum, probant quamplurima.

Primò, in cavis vulneribus semper habetur quod exsiccari, & abstergi postulat: igitur quotidie solvendum est vulnus cavum, ut exsiccans, & abstergens medicamentum apponatur. Consequentia patet, quia nullum est tempus, in quo non utrumque medicamentorum genus desideretur, sicuti nullum est tempus, in quo non reperiatur in vulnere, quod exsiccationem, & absterfionem indicet,



indicet, quæ autem adhibentur servare proprias vires diutiùs nequeunt, à calore siquidem partis eorum virtus exoluitur, atque ob excrementorum permixtionem corrumpitur, quare necesse erit quotidie vulnus solvere, ut, quæ integris sunt viribus, admoveantur, ita enim facultas medicamentosa vulnus nunquam destituet. Probatur antecedens, nam in cavis vulneribus semper generantur, & colliguntur duo excrementa, tenue unum, crassum alterum, quæ, quoniam vulneris repletionem, & sanationem impediunt, tenue quidem, utpotè quod est serosa quædam humiditas, vulnus humidius reddendo, sordidum verò, quod crassius, cum sordi, quæ in summo corpore colligitur, proportionem respondeat, removeri desiderant, tenue per exsiccantia, crassum verò per abstergentia; Et hac præterea ratione, quoniam novi cujuscumque mali possunt esse causa, diutiùs enim intra vulnus retenta malam qualitatem sibi asciscunt, & exitialem interdum concipiunt putredinem: ac in majori quantitate collecta partem distendunt, dolores concitant, atque fluxiones commovent. Igitur semper est in vulnere quod exsiccandum est, & abstergendum. Quod autem humiditas, & sordities vulneris sanationem impendant, apud omnes est in confesso, & ideo Galenus quarto Meth. quinto dicebat, si vulnus coire nequit, humecta caro est in causa. & Hippocrates lib. de Ulceribus, a quo Galenus in libris Meth. de vulneribus tractans, ne latum unguem recedit, exsiccationem ulcerum proponit, nam siccum sano dicebat propius est, & humidum non sano, est enim ulcus humidum, quod verò sanum est, siccum. Similiter puritas ulceris rationem obtinet ejus, sine quo non potest generari caro, quæ est sententia Galeni tertio Meth. nono, atque hanc sordes interpellans curationem moratur. Semper verò generari talia excrementa in vulneribus, patet ex Galeno tertio Meth. tertio, & ratione, quam ibidem affert Galenus. Etenim omnem qualitatis alimentii mutationem alterum crassius alterum tenuius excrementum sequitur, & in vulnere quoque ipsam alimentii mutationem non minus consequentur, & in majori adhuc copia, & magis sensibilia ob caloris naturalis imbecillitatem. Quapropter tenue quod invisibilis erat perspiratio, dum pars erat sana, visibile factum, hoc est serosa quædam humiditas, vulnus



vulnus reddit humidum, crassum verò sordidum. Et cum nullo unquam tempore natura cesset alimentum permutare, nec tempus ullum erit, in quo non ambo hæc in cavo vulnere colligantur.

Secundò, In cavis vulneribus præter medicamentorum appositionem, ut optimè vulnus ab excrementis emundetur, necessaria quoque est manualis operatio, igitur quotidie solvendum est vulnus, ut manuali operatione vulnus perpurgemus. Probatur antecedens, nam in vulneris cavitate colliguntur excrementa, quæ medicamentorum actionem refugiunt, cum hoc solum habeant medicamenta, ut carnem humidam exsiccent, & a vulneris parietibus sordes abstergant, nequaquam autem excrementa ducere extra vulnus possint, unde fit, ut ad hoc necessaria sit manualis operatio, quippe lanam, aut gossipium stylo obvoluentes, aut linteum, vel arida filamenta admoventes, quamcunque humiditatem intra vulnus existentem exugimus, & si quæ hæreant adhuc, à medicamentis non deterfa, detrahimus. Consequentia patet, sicuti enim in dies colliguntur hæc excrementa, ita in dies sunt removenda, ne retenta sanationi obstant, aut alia mala accersant, & ex consequenti solvendum erit quotidie vulnus.

Terriò, Nisi quotidie vulnus solveretur, abscessus, & corruptiones fierent, & ulcus ferinum evaderet, igitur quotidie solvendum est vulnus. Probatur consequentia, nam præter duo illa excrementa, in propositis vulneribus pus quoque generatur, quod cum aliis excrementis retentum abscessus, & corruptiones faceret, & ulcus ferinum redderet, fit enim ulcus ferinum, ut dicebat Hippocrates libro de Loc. in hom. ubi sanies in vulnere existens non habet exitum. retinerentur autem excrementa, nisi crebrò vulnus solveretur, & expurgaretur.

Quartò, In curatione vulnerum immutanda sunt medicamenta pro vario ipsorum statu, unde quandoque suppurationem procuramus, quandoque absterfioni incumbimus, & carnis generationi, quandoque superfluam carnem detrahare conamur, quandoque cicatricem inducere: Detegendum ergo vulnus quotidie, ut quandoque illius status immutatur, innotescat, & immutari medicamenta juxta exigentiam possint. Confirmatur antecedens ex Avic.



quarta, quarti, tract. tertio, cap. quinto, ubi inquit Avic. Et primum quidem quod oportet te regere de esse vulneris est sanatio ejus cum medicinis suis, deinde mundificatio cum medicinis suis, deinde nascentia carnis, & consolidatio; & ex Gal. 3. de fract. text. tertio, ubi habet, perspicuum autem est suppurare prius ulcera, ac purgari, quam ad conglutinationem deveniant: quod tribus, aut quatuor diebus nequit fieri.

Quintò, humidiora vulnera siccioribus sunt curanda, igitur quotidie solvendum est vulnus, ut humiditatis copia innotescat. Consequentia est manifesta, quoniam sola inspectione cognosci potest, quam humidum sit vulnus. Antecedens est Galeni tertio Methodi cap. tertio. Sed & ratione facilè probatur, nam quò major est recessus à naturali statu, eò fortiora medicamenta conveniunt; si affectibus medicamentà debent esse æqualia, juxta Medicinæ decreta.

Sextò, effectus apppositi medicamenti observari non potest, nisi quotidie, vel crebrò vulnus detegatur, igitur &c. probatur consequentia, nam effectus apppositi medicamenti in vulnerum curatione observandus est, ut ex eo dijudicare possimus, num medicamentum, quantum satis est, exsiccaverit, nec ne. cum enim ex medicamentis siccantibus alia magis, alia minus siccent, ut dicebat Galen. tertio Meth. tertio, partim ex ulcerum diversitate, partim ex ægri natura, quod expedit, est desumendum, at cujusque privatim natura ad unguem explorari non potest, ut habet Galenus eodem loco, igitur adjungenda est observatio effectus medicamenti, ut ex eo, an in appposito perseverandum, an magis, vel minus siccans sit adhibendum, cognoscamus, qua de causa dicebat Galenus tertio Meth. tertio, si notum sit aliquod medicamentum ad cavum ulcus implendum facultatem habere in iis, quæ humidiores sunt temperamento, deinde nunc tali admotum nihil profit, aut parcius siccavit medicamentum, aut nimium; horumque notam habebimus sordem, & saniem; si enim plusculum sordis sit, totumque ulcus humidius, intra modum siccavit, sin purum, & absque humore cernitur, ultra. Statimque mensuram quoque excessus, & defectus ex ipso notarum modo intelligemus, tantoque pharmacum, quod deinceps applicabitur, vel siccius, vel non tale admovebimus.

Sep-



Septimò, multa mala solent vulnere supervenire, quæ si futura sint, aut immineant, perutile est, ut prævideamus, si verò jam supervenerint, necessarium est, ut cognoscamus, quò à futuris per abscissionem causarum possimus vulneratum præservare, & a præsentibus liberare opportunis auxiliis, ergo detegendum quotidie vulnus, quò ejus statu inspecto, & futura prævidere, & præsentia cognoscere valeamus, & quid agendum sit, invenire. Antecedens patet, nam vulnere supervenire solent inflammatio, erysipelas, gangræna, sphacelus, & alia multa, quæ prohibere ne fiant, dum ea futura timemus, si verò jam supervenerint, tollere oportet.

Octavò, lintea, sicut & fasciæ, pura esse debent, quotidie igitur immutanda, cum ab emanante sanie quotidie conspurcentur, solvendum igitur quotidie vulnus, & hac de causa, ut lintea munda apponantur. Antecedens est Hippocratis libro de Off. Med. sec. secunda, cujus rationem reddens Galenus dicebat in com. illius loci, quod sordes, quibus lintea, & fasciæ inficiuntur, morsus excitant, quod quidem inflammationis occasio est non levis; deinde cum oporteat quandoque ea liquore aliquo aspergere, quæ sordida sunt, ut dicebat Galenus libro de Fasciis, id non admittunt, & id, quo perfunduntur, malè afficiunt.

Nonò, inhibenda est pravorum halituum generatio, & eorum, qui geniti sunt, aut quorum generatio prohiberi non potest, procurandus est exitus, igitur quotidie solvendum, & curandum est vulnus. Consequentia est manifesta, dum enim vulnus quotidie solvimus, & detegimus, exitum conclusis vaporibus præstamus? apposita namque lintea vapores supprimunt, ut ex Galeno habetur libro de Off. Med. com. 2. tex. 26. & sexto Meth. cap. quinto, dum autem excrementa eluimus, materiam halituum tollimus. Antecedens probatur, nam pravi halitus conclusi vulneratam partem distendunt, ac morsus excitando malè afficiunt, atque insuper ejusdem temperaturam vitiant, & ita vulneris sanationem impediunt.

Decimò, ille curandi modus, sub quo melius natura, & status vulneris innotescit, maximè omnium est probandus: At sub modo, qui quotidie solvit, melius natura, & status vulneris inno-



tescit, igitur, &c. Major est evidens, nam methodica curatio fit per indicationes, quæ à natura cognita indicantis desumuntur, unde & Hippocrates libro de Ar. dicebat, si medicus sufficit ad cognoscendum, sufficiet ad curandum; & Galenus quarto Meth. cap. quinto. Hæc tria deinceps se habent, signum, affectio, & curatio. Minor pariter probatione non eget; si enim vulnera quotidie solvantur, & detegantur, & oculis ipsis subjiciantur, plenius quoque licebit eorum statum contemplari, & appositi medicamenti effectum perpendere, maxima enim cognitio est, quæ sensu habetur, unde & consensu omnium longè melius internis affectibus consuleretur, si sensibus obvii forent; notior enim esset eorum natura, & longè melius auxiliorum effectum observare nobis liceret.

Undecimò, si præfagia in re vulnerum sunt necessaria, quotidie solvendum est vulnus, atqui sunt necessaria non minus ac in reliquis morbis, & ideò auctores omnes præcipui rationem præfagiendi in vulneribus tradunt, igitur, &c. Consequentia facile probatur, postquam multa sunt, quæ sine vulneris inspectione laterent, cum tamen eorum cognitio sit necessaria, si ex eis elicendum sit præfagium; inquit enim Hippocrates primo Prædic. text. 18. Vulnera sanguinem fundentia, exudantia maligna sic affecti loquentes latenter moriuntur: at quomodo talia vulnera cognoscemus, nisi oculis inspexerimus? inquit etiam quinta Aph. 65. Quibus tumores in vulneribus apparent, hi non maximè convelluntur, atque insaniunt, verùm his evanescentibus de repente, quibusdam à tergo convulsiones, & distensiones fiunt, quibusdam ante insania, vel dolor lateris acutus, si tumores sint rubicundi; pater autem nisi vulnera solvamus, ac detegamus, fieri non posse, ut cognoscamus, an vulnere tumor supervenerit nec ne, & an, postquam supervenit, evanuerit de repente, & cujus naturæ sit tumor ille, ex quorum cognitione pendet Hippocratis præfagium. Eadem est ratio de Aphorismo 66. ejusdem sectionis: Si in vulneribus fortibus, & pravis, tumor non appareat, ingens malum. & de sexagesimo septimo ejusdem: Molles boni, crudi vero mali, & de quarto sextæ: Vulnera circumglabra prava sunt, & de pluribus aliis præfagiis. Sed ab excrementis vulneris maximi momenti



menti eliciuntur præsagia, varia enim excrementa varium vulneris statum consequuntur, qua ratione dicebat Galenus quinta Aph. vigesimosecundo. Nihil mali potest advenire vulnere pus generanti, quæ tamen nullius usus esse constat, recto servato vulnere, quoniam excrementa observari non possunt.

Duodecimò, arcendus est pruritus, & erosio à vulnerata parte, at hæc arcentur per quotidianam solutionem, & deterfionem, igitur, &c. Major est manifesta ex Hipp. & Gal. lib. de Frac. ubi ob pruritum, & erosionem jubent, ut solvatur pars fracta, & aqua calente perfundatur, quo inquit Galenus com. 1. text. 39. evacuentur humores albi, & serosi in loco perfracto contenti, qui perspiratione egent, atque etiam deliniatur dolor, & prurigo tollatur, neque ab re, cum ab his exulceratio immineat, unde subjungebat Galenus, Quando nullam amplius pruriginem, nullumque dolorem agrotus sentiret, & omnia denique rectè se haberent circa fractam partem, si vel quarta unaquaque die solvas, maximè verò in hieme, nihil oberit, & longè adhuc magis, si rustici sint illi, qui plerumque lavari minimè consueverunt: at eos qui in more habent, ut per singulos dies, atque etiam magis, si bis in die laventur, non est in his solutio in longius protrahenda, & adhuc magis, si illi sint molles carne. En quanti fecerit Hip. & Gal. ut tollatur pruritus, & erosio. Quod verò per quotidianam solutionem arceantur hujusmodi symptomata, manifestum est, nam eorum causa tollitur, siquidem pravis vaporibus datur exitus, qui ab apposis linteis, & defectu exercitii suppressibantur, ut superius ex Galeno dictum est.

Decimotertiò, ille curandi vulnera modus, ad quem tamquam ad sacram anchoram, ubi urgent mala, cogimur devenire, maximè præstans, atque methodicus est judicandus, atqui ubi urgent mala in vulneribus, ad quotidianam, & crebram solutionem devenire cogimur, ut pus, quod negotium faceffebat, exprimatur, & idoneum medicamentum apponatur, igitur modus ille, qui vulnera crebro solvit, & abstergit, ac procurat, methodicus, & præstantissimus est judicandus.

Decimoquartò, modus, qui sanitatem facit, non est immutandus dicebat Hip. At eo modo, qui vulnera sæpè solvit, detergit,



atque procurat, præclarè vulnera ad sanitatem perducuntur, ut experientia testatur, ergò non est immutandus. Solvendum igitur quotidie vulnus.

## CAPUT II.

*Reprobatur nova methodus.*

**H**is, & hujusmodi aliis intendentibus necessaria videbitur quotidiana solutio, atque detectio, si ex arte, atque methodicè tractanda sint vulnera. Sed & ex eo idem confirmari potest, quòd si fiat aliter, perperam, & absque methodo instituatur curatio: quamvis enim & hoc prædicta argumenta sequatur, sunt tamen & alia magis propria.

Primò, curatio methodica certa est, non fallax, at modus ille curandi vulnera, quo rarò solvuntur, fallax est, non certus, ergò non est methodicus. Major est vera, si verum est Medicinam esse artem, & firma habere principia. Minor eventu probatur, ut enim refert Ambrosius Paræus in suo de vulneribus sclopo infectis libro, per certam quandam temporis constitutionem, si vel dies præteriisset, in quo vulnera non fuissent soluta, & ab excrementis expurgata, vermes nascebantur, quid ergò actum fuisset de illis vulneratis, si tres, aut quatuor dies, vel quatuordecim, aut viginti præteriissent, quibus detecta, & procurata non fuissent? fallax est ergo modus iste, cum omnibus vulneribus, & quolibet tempore aptari non possit. Prætereà fallax est, & periculo plenum, acria, & fuliginosa excrementa suppressere, ac pravos halitus; periclitatur enim calor natus, quando non fit idonea perspiratio, at suppressuntur, dum rarò vulnera solvuntur, ergò fallax est, & periculosus hic modus.

Secundò, illa curatio, sub qua congruis auxiliis destituuntur vulnera non est methodica; at sub modo, qui rarò solvit, congruis auxiliis destituuntur, igitur talis modus non est methodicus. Major est manifesta, sed tamen & ex Gal. colligi potest 6. Aph. 18. ubi Gal. causam afferens, cur quædam internarum partium vulnera sint insanabilia, sic dicebat, Tenuja intestina tota discissa



discissa usque ad eorum cavitatem, rarissimè agglutinantur. Hoc autem non, ut mihi videtur propter eorum substantiam accidit, sed quoniam non possumus æquè intrinsecis, sicuti extrinsecis imponere vulneribus medicamentum idem ex 3. Meth. 4. licet colligere. Minor probatur, nam virtus medicamenti primùm impositi, brevi evanescit, quare si differatur novi medicamenti appositio, toto illo tempore congruis auxiliis destituitur vulnus.

Tertiò, si modus ille curandi, qui rarò solvit, esset methodicus, omnibus vulneribus aptari posset, sicuti modus, qui quotidiana solutione procedit, at non omnibus vulneribus aptari potest, ergò non est methodicus. Sequela probatur, quoniam methodus est universalis quædam via, quæ omnium particularium est communis, ut inquit Gal. 4. Meth. 4. Assumptum patet, namque si vulnus fuerit acuto telo inflictum in parte nervosa, idemque sit profundum, & stricti orificii, ut pus exeat, necesse erit quotidie manibus comprimendo pus exprimere, & præcipuè, si orificium vulneris sursum spectet, aliter fit ulcus illud ferinum Hippocratis, retento pure, ut experientia sæpè comprobatum est, præterea in linguæ vulneribus inanis est ille modus, cum non reperiatur materia medica, quæ possit tandiù adherere parti, neque fieri possit conveniens deligatio, neque tegumentum apponi; eadem est ratio de internarum partium vulneribus.

Quartò, si modus ille curandi, qui rarò solvit, esset methodicus, & rationalis, de eo pertractassent principes auctores, qui de re medica scripserunt, sicuti communis modi meminerunt, cum veram medendi methodum optimè callerent, at neque Hipp. neque Gal. neque Cornel. Celsum, neque alium ex illustrioribus hac de re pertractasse comperimus, vanus igitur, & ἀμέθodos iudicandus est hic modus.

Quintò, pravus est ille curandi vulnera modus, qui adnexus habet fiderationis periculum, at huiusmodi est curandi modus, qui rarò solvit, ergò, &c. Major est manifesta, minor verò ex eo probatur, quod ait Gal. lib. de Fac. com. 2. tex. 22. de calce, quem ex longo decubitu nigrescere inquit, nisi sæpiùs attollatur, ut perspiret, ideòque dicebat, cum orbem ex molli lana confectum imponendum consulisset, quo orbe ita firmandus est calx, & inferior



ferior ejus pars adeò elevanda, ut non collidatur, sed facilè perspiret, & minimè excalefiat, quod etiam prius dixerat Hippocrates eodem loco. Pari ergò ratione periculum erit siderationis, vel saltem fluxionis, & inflammationis, si diutiùs recta servantur, cum tollatur perspiratio partis ob tegumentum. Etenim applicata linthea constipant partem, atque ita calorem suffocant, vel adaugent, & fluxionem advocant, unde Gal. lib. de off. med. com. 2. text. 16. reddens rationem, cur Hip. velit non esse linthea sicca assuenda in ulla prorsus deligatione, sed quæ sint aliquo liquore madefacta, hæc dicebat, sicca enim præter id, quod illius utilitatis, quam madefacta præstant, expertia sunt, etiam partium, quibus injiciuntur, poros constipantia, in eis calorem adaugent, & proinde ad affectam partem humores è locis vicinis attrahunt, quod quam molestum sit, utpotè quod occasionem præbeat tumoribus excitandis, nulli sanè obscurum est.

## CAPUT III.

*Nova Methodus pluribus argumentis comprobatur.*

**A**Dmodum urgere videntur hæc argumenta, sæpiusque cum Romæ degerem, iisdemmet tanquam tutissimis machinis novum illum modum oppugnare sum aggressus. Et nonnullis ex primis, qui tunc temporis eam curandi rationem profitebantur, nescientes quò se verterent, meminì respondere solitos, ejusmodi viam non esse methodo curandi ab antiquis traditæ, consentaneam, ac non solum non posse à contra allatis rationibus vindicari, verum neque ratione quapiam efficaci posse firmari: ideoque soli experientiæ standum esse. Alii ut res suas tuerentur, hoc argumentum excogitarunt, Quando ratio contra sensum militat, & invicem discordant, sequi sensum oportet, & judicanda est ratio sophistica; prima enim nostra cognitio ortum ducit à sensu, & experientiis, quæ à rebus sensatis accipiuntur, artes constituuntur, quamobrem experti, dicebat Aristoteles primo Metaph. magis id, quod intendunt, consequuntur, quam illi, qui rationem absque experientia tenent; at sensu deprehendimus, hoc novo modo



modo felicissimè vulnera sanari, & breviori tempore, quam quovis alio, ergo sequi hunc novum modum oportet, & rationes, quæ contra ipsum faciunt, sophisticæ sunt judicandæ. Sed tamen nec arduum negotium fuit apud cordatos, & perspicaces viros media validissima in illius comprobationem adinvenire.

Primò quidem, ille modus curandi vulnera methodicus, & præstantissimus est judicandus, quo præcipua opera, quæ ad ea sananda requiruntur, optimè, & maxima cum securitate celebrantur, at sub novo hoc modo hujusmodi opera felicissimè celebrantur, ergo methodicus, & præstantissimus est judicandus. Major est manifesta; minor verò probatur, illo siquidem modo, quo naturalis calor fortior, & vegetior redditur, eò melius, & majori cum securitate perfici talia opera existimandum est, at novo hoc modo naturalis calor fortior, & vegetior redditur, quam quovis alio, igitur & eò melius, & majori cum securitate perficiuntur hæc opera. Major probatur, namque præcipua opera, quibus vulnera ad sanitatem perducuntur, sunt naturæ, seu naturali calori attribuenda, sive enim agglutinare oporteat, sive suppurare, sive carnem generare, omnia hæc naturæ sunt opera. Minor manifesta erit, si consideraverimus in vulneribus duabus potissimum de causis imbecillum reddi naturalem calorem, prima quidem quia diffatur ejus substantia ob defectum naturalis tegumenti, & sanguinis effusionem: altera quoniam ambientis frigore ejus qualitas obtunditur: utrique autem huic incommodo peroptimè consulitur, dum tecta servantur vulnera; Etenim ob tegumentum prohibetur caloris difflatio, ambientisque in ipsum actio; quare necesse est, nisi quid aliud accidat, & brevi pristinum robur recuperet naturalis vulneratæ partis calor.

Secundò, ille modus curandi vulnera optimus censeretur, quo maximè avertuntur ea, quæ vulnerum sanationem remorantur, ac prohibent; At novo hoc modo id maximè assequimur, ergò, &c. Minor probatur, nam inter ea, quæ maximè remorantur, & prohibent vulnerum sanationem est humorum confluxus ad partem vulneratam, at eo curandi modo maximè præcavetur fluxus ille: Cum enim ad partem aliquam potissimam fluant, vel quia ab aliis partibus ab eam transmittantur, ea verò recipiente propter

C

imbecilli-



imbecillitatem, vel quia ab eadem attrahantur ob dolorem, aut calorem, teste Galeno secundo, de dif. Feb. Cap. ult. & 13. Meth. secundo, si cooperta servantur vulnera, principia hæc fluxionis valde imbecilla redduntur in vulnerato, fit enim pars robustior servato, & firmiori reddito ipsius calore naturali ob tegumentum, unde non æque apta est ad recipiendum, neque dolor concitatur, qui in vulnerum contrectatione solet concitari, dum videlicet quotidie vulnera solvuntur, & detergantur: quare ob nostrum curandi modum nulla omnino additur accersendæ fluxionis causa.

Tertiò, ex Galeni doctrina quarto Meth. tertio, validissimum argumentum pro hujusmodi comprobatione desumi videtur, ibi enim inquit, sive ulcera simplicia sint, sive cum cavitate, ex fugiendis, prospiciendisque iis, quæ naturæ officiunt, sanatio perficitur, hoc fundamento constituto sic arguitur: Ex iis, quæ naturæ maximè officiunt, est expositio vulneris aëri ambiens; hac enim imbecillis redditur calor partis proprius, & naturali tegumento destitutæ, tum quia ab ambientis qualitate alteratur, tum etiam quia ejus substantia diffatur, quo nihil ferè pejus contingere potest vulnere; igitur optima erit curatio, qua paratur tegumentum parti, quod ab injuriis externis proprio tegumento destitutam partem protegat, & ejus naturalem calorem conserve, hoc autem cum novo illo modo paretur, manifestum est eum tanquam optimum esse approbandum.

Quartò, ex ipsius Hippocratis doctrina depromptum argumentum affertur, istius modi perfectionem comprobans. nam lib. de Frac. sect. tertia. text. septimo, reprobans curationem quorundam Medicorum sui temporis in fracturis cum vulnere, inter ea, quæ objicit tali curandi modo, illud est, quod ossa, quæ discessura non erant, discedunt, necesse est, inquit, ut ulcus decoloratum sit, & labiis eversum, ac protuberans, verum lachrymosum, & minimè suppurans, ossa verò, quæ discessura non erant, discedant, hoc stante sic arguo: Novo hoc modo ossa, quæ sub communi separari solent, non discedunt, igitur perfectissimus est novus hic modus. Consequentia patet, duobus enim propositis vulneribus penitus æqualibus, quæ diverso modo curentur, si ab uno eorum ossa discedant, ab altero verò nequaquam, vel in minori



### C A P U T I I I.

19

nori longè quantitate, id, constat ex Hipp. attribui non posse, nisi perfectiori, & minus perfectæ curationi, si cætera supponantur æqualia. Antecedens ipsa experientia comprobet. Curavi ego novo hoc modo capitis vulnera cum insigni ossis læsione, ut quilibet magnam ossis portionem abscessuram judicaret, & tamen mihi nunquam licuit minimam ossis portionem, quæ abscesserit, observare, ut res admiratione digna videretur. Sed quoniam unusquisque idem poterit experiri, non est, quod de hoc plura dicamus.

Quintò, modus ille curandi vulnera, sub quo pauciora in ipsis generantur excrementa, potior est judicandus, at sub novo hoc modo pauciora in vulneribus generantur excrementa, quam sub communi, igitur, &c. Major est manifesta, quod enim in duobus vulneribus æqualibus inæqualiter generantur excrementa, in aliud referri non potest, quam in perfectiorem, & minus perfectam curationem. Minoris veritatem experientia demonstrat, eamque cuivis licet consulere.

Sextò, ille curandi modus, sub quo vulnera foelicius sanantur, & citius, quam sub aliis, præstantissimus est judicandus, at sub novo hoc modo vulnera foelicius, ac citius sanantur, quam sub quovis alio, ut experientia testatur, ergo novus hic modus præstantissimus est judicandus.

Adducuntur insuper quædam Hipp. loca, ex quibus nonnulli colligunt Hippo. non alio modo vulnera curasse, in alium tamen locum ea rejicere satius duximus, in eum videlicet, in quo Hippo. mens Galeni, & aliorum illustrium Medicorum indagabitur.

### C A P U T I V.

#### *Destruuntur fundamenta. Novæ Methodi.*

**Q**UAMVIS contra novum modum plura allata sint, & ex iisdem etiam argumentis, quibus quotidiana solutio necessaria probatur, infirmetur idem modus, sunt tamen & alia non minoris momenti, quæ illius fundamenta penitus evertere censentur, videtur siquidem hic modus, quatenus argumenta in ejus com-



probationem adducta demonstrant, soli naturæ fidere, & parum admodum medicamentis tribuere; verum quàm vanum sit hoc fundamentum, ex his conjici potest.

Primò, si natura ex se posset vulnera sanare, hoc maximè verum esset in vulneribus internarum partium, & viscerum; At hæc non potest absque continua medicamentorum ope ad sanitatem perducere, ergo nec ulla poterit. Consequentia est manifesta, nam in partibus internis maximè viget naturalis calor, & ad eas injuriæ ambientis vix possunt pervenire, quare hæc minimè omnium quotidiano medicamentorum usu videntur indigere, Assumptum probatur ex Galeno pluribus in locis, quarto enim Meth. sexto, inquit: Quæ vulnerata sunt in crassis intestinis, iis, quæ per sedem injiciuntur, medicamentis magis indigent, quæ in superioribus, ambo requirunt, & quæ per sedem injiciuntur, & quæ supernè sumuntur. hoc stante sic arguitur: Si vulnerata intestina talibus indigent medicamentis, fateri oportet, non magis iis egere uno tempore, quam alio, cum quovis tempore æqualiter se habeant ad medicamenta, ergo quotidie, & pluries etiam qualibet die oportebit medicamenta injicere, cum non semper eorum actio perduret, immo vulneris locum vix momento attingant. Quòd si hoc est necessarium, certum est, solam naturam ad sananda ejusmodi vulnera non sufficere, & tamen intestina sita sunt intra peritonæum ab externis injuriis remota. In idem tendere videtur, quod eodem loco ait Galenus, videlicet: Communis internarum partium indicatio est, ut ea eligantur, quæ sunt naturæ animalis valde familiaria, fugiantur, respuanturque contraria, & illud si ulcus sit in interioribus, & ad cicatricem illud perducere, aut agglutinari studemus, eligenda alimenta sunt tum austera, tum glutinosa, tum quæ minimè mordeant; sin emundare quæ modicè abstergant, quod munus mel non coctum inter cætera præstat. Ecce quomodo Galenus hîc alimenta medicinalia eligit, quæ non solum quotidie, sed qualibet etiam die his, quandoque etiam sæpius exhibentur, ergo necessarius est quotidianus medicamentorum usus in vulneribus internis, igitur & in omnibus, non ergo sola natura id potest. Eodem etiam loco dicebat: Gargarizare quoque jubendum esse ei, qui ad fauces ul-



cus habet: manifestum autem est, si de unica gargarizatione intellexisset Galenus, irridendum esse cum citò transeat vis ipsius; intelligebat ergo de crebra gargarizatione, unde & ibidem dicebat: Ad ulcus, quod in arteria sit aspera, ut supinus, quàm diutissimè in ore teneat, ac omnes, qui illic sunt musculos relaxet, remittatque præcipiendum. Et eodem: Expositu, & figura partis excogitatum est ei, cui exulceratus est ventriculus, medicamenta esse bibenda, cui gula non semel, nec tota simul assumenda, sed paulatim, & assiduè. Sed quid pluribus opus est, nonne quisvis Medicus in partium internarum vulneribus, ut ventriculi, epatis, intestinorum, vesicæ, renum quotidie exhibet medicamenta ulcus respicientia? Si ergo hoc est necessarium in vulneribus viscerum, quorum providentiam habet natura, dicebat Hippocrates, cur non erit necessarium quotidie medicamenta apponere externarum partium vulneribus? Quomodo, aut qua ratione tantam rem egenti naturæ committere audebimus? Nec valet, quod forsan dicet quispiam, tunc esse necessariam quotidianam medicamento- rum applicationem, quando eorum actio, & virtus servari diutius non potest, at quando vulnerum medicationes adeò protrahuntur, talia adhibentur medicamenta, quæ diutius proprias vires servant, & propterea non est, cur quotidie vulnera solvantur, cum pluribus diebus perduret vis medicamenti primò appositi. Quamvis enim in levioribus vulneribus quæ cito sanantur, hoc forsan possit admitti, non admittendum tamen in iis, quæ graviora sunt, & longiori tempore sanari solent, ut in penetrantibus vulneribus capitis; non enim apparet, quomodo genito in vulnere pure, atque ipsi medicamento admixto, non pereat vis medicamenti, aut quomodo propter calorem partis non evanescat, quin videtur necessarium ex pravorum halituum, & excrementorum putridorum permixtione malam, & adversam qualitatem eidem advenire.

Secundò, non possunt curari vulnera cava citra abstersionem, veluti demonstrat Gal. tertio Meth. quarto: Atqui abstersio est medicamentorum opus, non naturæ, qua ratione dicebat Galenus tertio Methodo octavo: Purgari sordida posse etiam carne naturalem statum non servante, quia hoc medicamentorum est



opus, igitur citra usum medicamentorum non potest curatio vulnorum perfici. At medicamenta apposita non possunt integras vires diu retinere, ut etiam superius dictum est, igitur crebro solvendum erit vulnus, ut semotis iis, quorum vires jam sunt perfractæ, quæ ex usu sint, substituantur.

## CAPUT V.

*Nûm turundarum, & penicillorum usus in vulnorum curatione sit methodicus & necessarius.*

**Q**uantis urgeatur difficultatibus prima quæstio, argumenta utrinque allata facile declarant, verum nec leves continet difficultates altera, quæ ad usum turundarum, & penicillorum spectat. Communis siquidem usus eos recipit, immo necessarios judicat pro certa cavorum vulnorum curatione; altera verò eorum usum non admittit; & pro utraque parte adsunt non contemnendæ rationes; qui enim turundis, & penicillis utuntur, sic suas tutantur partes. Oportet in curatione vulnorum, quæ cava sunt, parare exitum generandis excrementis, ne fiat ulcus illud ferinum, de quo Hippocrates meminit libro de locis in hom. quod quidem fit, quia materia contenta non habet exitum, at paratur hic exitus ope turundarum, & penicillorum; servant enim vulnorum ora hiantia, unde nullum subest periculum retentionis puris, ergo usus talium non solum methodicus est, & admittendus, verum etiam necessarius.

Secundò sic arguunt, Studendum est in curatione horum vulnorum, ut medicamenta undique tangant vulnus, qua ratione dicebat Galenus tertio Methodo quarto: Studere oportet, ut eo modo componatur medicamentum, ut ad fundum ulceris ejus vis penetrare valeat, at hoc optimè fit per turundas, & linamenta, cum hæc congruis medicamentis illiniantur, & per vulnus disponantur, ergo necessarius est usus turundarum, & penicillorum. Probatur major, quia omnis actio fit per contactum; si ergo medicamenta agere debent, oportet ut tangant. Adducunt teritiò quædam Galeni, & Cornelii Celsi, ac ipsius Avicennæ loca,



ex quibus manifestè deprehenditur, eosdem uti consuevisse turundis, & penicillis in vulnerum curatione. Sed ea posteriùs considerabimus.

Contra qui penicillos, ac turundas ablegant, sic arguunt.

Primò, si talium necessarius esset usus, hoc esset maximè, ut vel servarent ora vulneris hiantia, vel medicamenta per ea vulnerum parietibus adhærerent, veluti argumenta priùs allata videntur assumere; At neque hac neque illa ratione conveniunt, igitur non est necessarius eorum usus. Probatur assumptum; quòd enim non convenient, ut servant hiantia ora vulneris, ex his elici potest: Os vulneris claudi non potest, nisi vel labia ejus agglutinentur, vel caro generetur, ita ut vulneris ora obstruat; at hæc fieri non possunt, nisi pars naturalem suam dispositionem habuerit, quia hæc sunt naturæ opera, ut dicebat Galenus 3. Method. 4. 8. & 9. & 4. Meth. 1. frustra ergo ponuntur turundæ, & penicilli intra vulnera, antequam pars naturalem suam dispositionem habeat, ut servant aperta ora vulneris, cum neque si vellemus, claudi possint. Ubi verò pars naturalem suam dispositionem habuerit, manifestum est non convenire, quia tunc est tempus generationis carnis, & agglutinationis, quæ impedirentur ex talium impositione, nihil enim interponi debet inter ora agglutinanda, Gal. 4. Meth. primo, & lib. Art. Med. c. 90. non igitur conveniunt, ut servant ora hiantia. Sed neque ut medicamenta tangerent vulneratam partem, cum hoc optimè assequi possimus, etiam si talia à natura vulneratæ partis aliena intra vulneris labia non immittantur, puta si liquentur & intra vulnus instillantur; frustra autem fit per plura, quod potest fieri per pauciora, & æque benè.

Secundò, nihil vulnere apponendum, quod naturæ subjectæ partis sit infestum, alioqui etiam debilis ob solutam unitatem, & effusionem sanguinis, qui innatum calorem partis fovet, & alterationem ab ambiente inductam, cum partes aëri exponantur, quæ nunquam antea illum fuerunt expertæ; Atqui turundæ, & penicilli naturæ partis affectæ sunt infesti; sunt enim ab ea prorsus aliena, cujus signum illud esse potest, quod in illis expellendis semper laborat, unde necessarium est fateri ab iis naturam abhorreere, &  
ob



ob pondus etiam, quo partem opprimunt, igitur in vulneribus eorum usus est reprobandus.

Tertiò, in vulnerum curatione cavere oportet omnia dolorifica, & irritantia, ne fiat attractio fluxionis ad partem, at huiusmodi solent esse turundæ, & penicilli, igitur fugiendi. Probatur minor, nam turundæ, & penicilli partem distendunt, comprimunt, & pondus inutile, quin potius pondus noxium adjiciunt, quare dolorifica, & irritantia erunt auxilia, si modò auxilium dici mereatur, quod est morbifica causa.

Quartò, quod evadit causa morbifica, fugiendum est in curatione vulnerum, at huiusmodi sunt turundæ, & penicilli igitur &c. probatur minor propterea quòd turundæ, & penicilli pure imbibuntur, & pravis halitibus inficiuntur, unde malam qualitatem sibi asciscunt, & eò magis quoniam impediunt puris diffusionem sunt in causa, ut & ipsum pus pravum reddatur, & pravae qualitatæ malignam putredinem concipiens.

Quintò, adducunt Hippocratem, & Galenum, qui nunquam eorum meminerunt, cum de vulneribus curandis sermonem haberent, immo Galenus ut medicamentum ad fundum vulneris penetrare valeat, non utitur turundis, sed medicamentum liquat, ut videre est 3. Meth. 4. quo loco dicebat: Studere oportet, ut eo modo componatur medicamentum, ut ad fundum ulceris penetrare ejus vis valeat. Ecce quo modo à medicamento compositione, non à turundis id requirit. Idem colligere licet ex Galeno lib. de fract. sect. 3. com. 21. ubi inquit: Ego plures gravissimè vulneratos curavi apposisis super ipsum vulnus linteis multiplicibus ejusmodi vino madentibus, superadditaque exterius molli spongia. Ecce quomodo intra vulnus nihil immittebat Galenus etiamsi gravissimum esset vulnus.

Primum quoque argumentum adversariorum in ipsos retorquent hoc modo, Parare oportet exitum puri, ne, eo retento, fiat ulcus illud ferinum Hippocratis, atqui turundæ, & penicilli, cum ora vulneris claudant, potius purulentam materiam supprimunt, ergo absque turundis, & penicillis curare vulnera oportet.

Afferunt insuper, qui turundas, & penicillos reprobant, nonnulla, Galeni, & Hippocratis loca, ex quibus directè videtur impugnari



pugnari illorum usus. Verum considerationem ipsorum in eum locum rejiciemus, in quo quaestionem dissolventes, Hippocratis & Galeni mentem perscrutari oportebit.

## CAPUT VI.

*Undenam petenda sit harum difficultatum solutio.*

**U**T in hisce difficultatibus è tenebris abditam veritatem in lucem proferamus opus est imprimis videre, quid postulent hæ quaestiones. Id quidem, quod quaeritur summatim propositum est; at si diligenter inspiciamus, aliud etiam exposcere videntur, quærere enim, an sæpe, aut rarò solvendum sit vulnus, & an turundarum, & penicillorum usus sit recipiendus, nihil aliud esse videtur, quam inquirere, an quæpiam sit causa, propter quam oporteat aut sæpe aut rarò vulnus solvere, & turundis, ac penicillis uti, & quænam illa sit: hac etenim inventa procul dubio cessabit omnis quaestio, ex ea siquidem fiet manifestum, num hoc, vel illo modo procedendum sit in vulnerum curatione. Quod quidem necessarium sit ponere aliquam causam, quæ nos ad hoc, vel illud impellat, negari non potest; nihil enim sit sine causa. Verum unde petenda est hæc causa? non aliunde profectò quam ex ipsa curandi ratione? seu curativa arte, ut quæ rationalium curationum omnium reddit causas. Sed, quoniam ipsa curandi ratione & quid agendum sit, & rectus usus materierum medicarum innotescit, videndum est, an hæ quaestiones ad quid agendum, an ad rectum usum pertineant, Prima quidem facie ad rectum usum materierum medicarum, quibus ad curationem vulnerum utimur, spectare videntur: & quod ad primam attinet, partim ad quando agendum, partim autem ad agendi modum reduci nemo inficiabitur: quærît enim, an melius sit quotidie solvere vulnus, & medicamenta applicare, an per longiora temporis intervalla. En supponit jam inventa fuisse remedia, & eorum materias, sed tamen dubitat, quando istæ materiæ sint applicandæ, nùm quotidie semel, aut bis, an quarta quaque; aut decima die, vel etiam rarius. Ad modum etiam utendi partim re-

*An prope-  
sitæ quæstio-  
nes spectent  
ad Quid  
agendum an  
ad rectum  
usum.*



*Totam methodum exposcunt.*

digi debere, non est dubitandum, siquidem an pluribus, aut paucioribus vicibus medicamenta inventa sint in usum revocanda, ad utendi modum attinet. Altera similiter quaestio ad utendi modum reducenda videtur, siquidem cum jam inventa sint praesidia pro curandis vulneribus, ambigitur modò quānam sit germanus utendi modus, nūm videlicet applicanda sint cum linamentis, an potius citra hæc. Attamen, si rem, ut decet, perpendamus, totam potius methodum vulneribus medendi, quam rectum usum tantum materiæ medicæ postulare videbuntur, id ex eo licet colligere, quod qui quotidie vulnera solvunt, eisdemque medicamenta applicant, non ea tantum gratia id faciunt, ut rectè materiis praesidiorum jam inventis utantur, quo evadant materiæ indicati specifici, & determinati, verum etiam, ut siccent, abstergant, & huiusmodi alia faciant proponentes sibi aliquas intentiones, quibus quotidiana illa solutione satisfacere profitentur: non aliter & qui rarò solvunt vulnera, cum non ea tantum gratia id faciant, ut rectè utantur praesidiorum materiis inventis, sed scopos quosdam peculiares propositos habeant, quos aliter curantes non assequuntur, nam ad decimam, vel ad vigesimam, exempli gratia, non differunt solutionem vulneris, ut rectè utantur terebinthina, vel alia materia, sed fervendum, exempli gratia, fovendum, ac roborandum naturalem calorem censent, quo propria munia promptè perficiat, & hoc diuturno illo tegumento assequi sperant. En quomodo quærere, an sæpè an potius rarò solvendum sit vulnus, est quærere, quānam sint veræ, & propriæ intentiones curandorum vulnerum, seu quānam sint scopi, quos attendere debemus vulnera curantes. Similiter & qui turundis utuntur, & qui citra turundas, & linamenta curanda esse vulnera contendunt; non enim ea tantum ratione id faciunt, ut eo modo invento medicamento utantur, sed utrisque proprii sunt propositi scopi, quos hac curandi ratione hi, illa illi assequi volunt. Quocirca ut propositæ difficultates solvantur, necessarium est invenire, quānam sit rationalis via, seu methodus vera curandæ vulnera; ex ea prorsus manifestum reddetur, cur hac via magis, quam illa incedere oporteat: cum principia curationis vulnerum contineat. Vera autem methodus illa est profectò, qua vulnerum auxilia per indicationes



dicationes inveniuntur, omnis enim medendi methodus, ut dicebat Galenus 2. Meth. 7. per indicationem fit. Cum autem indicationes curativæ ex natura morbi, cui mederi paramus, desumantur, ut colligere licet ex Gal. 2. Meth. 7. & 3. Meth. 1. & 4. Meth. 4. & pluribus aliis in locis, necessarium quoque est, ut in vulneribus ab eorum natura eliciantur. Quapropter investiganda nobis est inprimis vulneris natura, ut quas indicationes vulnus suppeditet, notum fiat.

## CAPUT VII.

*Quid sit Vulnus.*

**Q**UOD vulnus sit quædam solutæ continuitatis species, accipiunt omnes: at quamvis in hoc conveniant, in afferendis tamen differentiis, per quas vulnus à cæteris solutæ unitatis speciebus distinguatur, non idem sentire videntur. Gal. enim 3. Meth. 1. inquit: Vulnus esse continui solutionem ex vulnerando in carnosa parte relictam, à qua forsan definitione quidam ex posterioribus distinctionem inter vulnus, & ulcus acceperunt, vulnus esse dicentes, quod ab externa causa infligitur, ulcus verò, quod ab interna. Verum quidem est, ulceris nomen quandoque largè accipi, prout etiam vulnus comprehendit, sicuti id ipsum accepit Galenus in libris Methodi, & aliis in locis; & ipse Hippocrates libro de Ulceribus, immo quandoque etiam pro omni continui solutione accipitur; cum ipse Hippocrates omnes morbos ulcera dici posse nonnunquam asserat: At si propriè sumatur ulceris nomen, dicit peculiarem continui solutionem à vulnere distinctam, quam determinaverunt illi per internam causam. Alii videntes mancam esse Galeni definitionem, propterea quòd non convertitur cum definito, sed amplior esse videtur, cum multæ sint solutæ unitates à vulnerante causa in carnosa parte, quæ tamen non sunt vulnera, veluti contusiones, & hujusmodi; addiderunt solutionem illam continui esse evidentem, & sensibus conspicuam, ut integra definitio sit talis: Vulnus est continui solutio evidens, & conspicua ex vulnerando in carnosa parte relictæ. Alii existimantes per hujus definitionis partes non omnino sejungi vulnus ab

*Definitio  
vulneris à  
Gal. desum-  
pta.*

*Definitio  
alicrum.*



*Definitio  
vulneris ex  
Avic.*

ulcere, cum enim vulnus putridum, & sordidum evadat, quemadmodum sæpè contingit, ulcus fieri videtur, addiderunt definitioni absque pure, & sorde. unde Avic. prima primi doctrina secunda, cap. quarto: Solutio continui carni accidens, quæ quidem est propinqui temporis, in qua nondum est factum pus, vocatur plaga, sed cum pus sit ibi, vocatur ulcus. Hinc Guido Cauliacensis dicebat: Vulnus est solutio continuitatis recens, sanguinolenta, sine putredine in partibus mollibus. Et hanc definitionem ex posterioribus plurimi receperunt, & ideò ulcus propriè dictum definientes, dixerunt: Ulcus esse continuitatis solutionem in carne, in qua consistit una, vel plures dispositiones, quæ consolidationem impediunt, ex quibus sanies, aut putredo causatur. Quòd ad Galeni definitionem attinet, difficultatem pati videtur, & eam quidem non levem; est enim communis lex in omnibus definitionibus, quod idem per idem, vel per æque ignotum non definiatur, sed per notius, cum ignotum aliud ignotum manifestare nequeat, neque idem seipsum, aliter idem simul esset notum, & ignotum, quod est absurdum: at in Galeni definitione conspicuum est hoc vitium, siquidem vulnus definit per actum vulnerandi, at quid aliud est vulnerare, quam vulnus inferre? si ignorem quid sit vulnus, quomodo quid sit vulnerare cognovero? idem igitur per idem definitur, & ignotum per æquè ignotum. Et ideò alii, qui forsàn difficultatem hanc effugere voluerunt, non per actum vulnerandi, sed per externam causam vulnus determinarunt, dicentes vulnus esse continui solutionem in parte carnosa

*Reprobatur  
def. à  
Galeno de-  
prompta.*

*Reprobatur  
à causa  
externa  
defini-  
tio.*

à causa externa. Sed neque definitio hæc caret difficultate, si enim ab ignea vi, puta ab aqua fetvente excitentur vesicæ in parte carnosa, vel etiam exulceretur pars carnosa, profectò solutio continui est in carnosa parte à causa externa, nemo tamen hujusmodi solutam continuitatem vulnus diceret. Præterea contusio carnosæ partis, e. g. à lapide, est soluta continuitas in parte carnosa à causa externa, & tamen non est vulnus. Quare non soli vulneri definitio hæc competere videtur; sed neque omni vulneri; etenim si erus frangatur, ita ut os egrediens carnem laceret, nemini dubium est, solutam illam continuitatem in carne vulnus dicendam esse, & tamen non ab externa, sed ab interna est causa.

Defini-



Definitio igitur proposita neque omni vulnere, neque soli vulnere convenit, cum tamen bona definitio neque excedat definitum, neque ab eodem excedatur. Neque si addatur, quod talis continui solutio sit evidens, omnes tolluntur difficultates; namque exulcerationes ab aqua fervente, vel alia vi combustiva excitatae conspicuae sunt, nec tamen sunt vulnera: & soluta unitas in carnosa parte cruris ab osse tracto, & egrediente facta, est vulnus, neque tamen ab externa causa. Postremo allata definitio easdem patitur difficultates, sed & alias insuper; ut enim ab ulcere melius distinguatur vulnus, ponitur in ea, quod sit recens, & sanguinolenta continui solutio sine pure, & sorde, cum tamen per hoc non possit vulnus ab ulcere sejungi: nam & ulcera dantur callosa, & ficca, absque sorde omnino, & putredine. Præterea absurdum videtur, quod in generatione puris vulnus propriam immutans naturam, rationem accipiat ulceris, & eo magis, cum pus, sive putredo, aut sanies faciant in vulneribus, & in ulceribus compositionem, non differentiam, ut quæ seorsum possunt consistere, qua ratione dicebat Gal. 3. Meth. c. 9. At phlegmone, gangræna, putredo, & huiusmodi seorsum, & per se consistere possunt, & propterea faciunt quidem compositionem affectuum in ulcere, non tamen differentias. Assignanturque vulneris differentiae à tempore, ut videre est 3. Meth. c. ultimo; dicimus enim aliud esse recens, aliud verustum, insuper aliud brevi tempore curari, aliud verò longo tempore: quod si vulnus tantummodo esset, quod recens est, ineptæ essent hæ differentiae. Sed & rei veritatem ipsa curandorum vulnerum methodus ostendit, quæ quidem non solum sanguinolentum, & recens illatum vulnus respicit, verum etiam illud, cui sordes, & putredo annectuntur, & alia excrementa, ab hisque excrementis proprias elicit indicationes. Amplius si vulnus esset tantum quod recens, & sanguinolentum, & omnino puris-expers, darentur morbi quorum nulla esset curativa methodus, multa enim sunt vulnera, quæ necessario pus generant. Transitum quidem hunc ex vulneribus in ulcera & ego libenter admitto, sed quod vulnus in prima ipsa generatione puris ulcus fiat, à ratione videtur alienum, cum nec sæpè contingat huiusmodi transitus. Ut ergo, quænam sint ea, per quæ vulnus à reliquis

*Reprobatur definitio  
Guidonis.*



*Quid signi-* solutæ unitatis speciebus distinguatur, & omninò quid re vera sit  
*ficetur no-* vulnus, fiat manifestum, primum statuendum est, vulneris no-  
*mine vulne-* mine, secundum communem appellationem, eam tantum continui  
*ris.* solutionem designari, quæ in carnosâ parte contingit, ita tamen ut

per carnosam molliores omnes partes intelligantur, non autem propriè dictam carnem tantummodo. Solet enim dividi humanum corpus in partes molles, & osseas: & per partes molles omnes illæ intelliguntur, quæ ad ossis naturam non pertinent, & eadem partes carnosæ dici consuevere. Hoc modo carnosam partem sumpsit Gal. 6. Meth. cap. 1. lib. de dif. mor. c. 2. & lib. de caus. mor. cap. ult. & pluribus aliis in locis. Libro enim de caus. mor. cap. ult. dicebat contusionem fieri in omnibus partibus carnosis, & in ossib. etiam, & maximè puerorum: & ibidem priùs dixerat fractionem, & cariem vocari in osse solutam continuitatem, in carne verò ulcus, aut vulnus. Et lib. de dif. mor. c. 2. Porro continui solutio in osse quidem fractura nominatur,

*Totum corpus dividi-* in carne verò communiter ulcus. Videtur itaque totum corpus  
*tur in car-* distinxisse Gal. in carnosam, & osseam partem, quæ ossa, & car-  
*nosam, &* tilagines complectitur. Galenus ipse non aliter vulneris nomen  
*osseam par-* sumpsit, ideoque 3. Meth. 1. dicebat, Vulnus esse continui so-  
*tem.* lutionem ex vulnerando in carnosâ parte relictam: & materiam

*Significa-* hanc pertractans, de vulneribus carnis propriè sumptæ nervo-  
*rio nominis* rum, venarum, arteriarum, membranarum, tendinum, liga-  
*Vulneris ex* mentorum meminit. De vulneribus quidem abdominis, mus-  
*Galeno.* culorum, ac peritonæi 6. Meth. 4. nec non & de intestinorum, ventriculi, & gulæ vulneribus. De nervorum vulnere 6. Meth. 2. & 3. unde postremò dicebat de nervis vulneratis satisfaciant, quæ dicta jam sunt. De tendinum, & ligamentorum vulneribus 6. Meth. 4. ideò dicebat, ligamentum verò vulneratum, &c. De vulneribus venarum, & arteriarum 5. Meth. 2. usque ad caput octavum. De vulneribus pulmonis 5. Meth. 8. De vulneribus diaphragmatis 5. Meth. 9. De vulnere membranarum cerebri 2. de Comp. med. per loca. c. 1. & sic de reliquis, & innumera

*Amplior si-* pene adduci possent loca, ex quibus luce clarius apparet, com-  
*gnificatio* munem hanc appellationem sequuntum fuisse Galenum. Sed hæc  
*nominis vul-* sint satis. Veruntamen Cornelius Celsus vulneris nomen etiam  
*neris ex Cel-* ad ossium fracturas ampliavit, unde lib. 5. c. 26. Vulnus, dice-  
*so.* bat,



bat, malum est quodcunque musculus, aut nervum, aut membranam, aut os, aut cartilaginem læsit. Sed nos cum Galeno juxta communem usum vulnus appellabimus, quod mollioribus partibus accidit. Secundo animadvertendum est, quòd contusio carnosæ partis, quamvis sit ejusdem soluta unitas, ob id tamen non est vulnus, quia non est conspicua, igitur habet hoc semper vulnus, quod est conspicuum. Nec objiciatur, quòd viscera multoties sint vulnerata, & ipsorum vulnus non est conspicuum, quia ex se conspicua sunt hujusmodi vulnera, licet ex accidenti lateant, aut quia angustum nimis sit vulnus, aut quòd medium non sit illuminatum, & propterea vulnus sit in tenebris: unde potest dici vulnus esse visibile, quamvis actu ob aliquod impedimentum non videatur; deinde si visui minimè pateat, specillo tamen, aut candela cerea, aut alio quopiam potest explorari; quàm enim vulneranti causæ patuit via, & sensui patere potest. Dicunt nonnulli satis esse si vulneris principium sensui sit patens: verùm si uteri corpus immisso per vulvam telo vulneretur, intacto ipso pudendo, quomodo in hoc principium, & quod in superficie est vulnus erit conspicuum? Satis est igitur si vulnus ex se sit tale: ideoque rectè dixerunt Vulnus esse evidentem continui solutionem in carnosâ parte. Adhuc tamen non apparet, per quod ab ulcere vulnus sejungatur, ulcus enim & ipsum in carnosâ parte contingit, & plerumque est evidens continui solutio, idcirco à causa utriusque distinctionem accipiunt, vulnus ab externa, ulcus ab interna causa fieri dicentes. Verum si ab apposito caustico medicamento, aut ab aqua fervente, vel ferro candente solvatur evidenter continuum, hujusmodi soluta unitas erit ab externa causa, & tamen non vulnus, sed ulcus appellabitur. Prætereà vulneratur caro ab osse intra ipsam contento; ergo non ab externa tantùm causa est vulnus, sed & ab interna, sicuti ulcus non ab internâ tantùm, sed & ab externa. Qui per externam causam extrinsecus incidentem causam intelligunt, ab extrinseco scilicet humano corpori advenientem, non aliter ab hac difficultate se explicabunt, quàm negando rationem vulneris unitati solutæ, quæ à tali fit causa, convenire. Cum tamen huic repugnare videatur communis loquendi usus, aliter est statuendum.

*Vulnus est  
continui so-  
lutio conspi-  
cua.*



*Causa vul-  
neris est ex-  
tra carno-  
sam, par-  
tem non ex-  
tra corpus  
necessario.*

Nos igitur dicimus per externam causam haud intelligi debere, quæ communiter à medicis externa dicitur, quæ videlicet est extra humanum corpus, sed causam extra ipsam carnosam partem existentem: unde licet intra humanum corpus contineatur, cum tamen carnosæ partis unitatem solvit, ut, quando fracto crure, os egrediens carnosam partem lacerat, externæ causæ habet rationem, utpote extra carnosam partem existens. Eadem enim est ratio, ac si quis dentibus linguam laceret: quis negaret dentes externam esse causam illius vulneris? Majorem difficultatem habere videtur ea soluta unitas, quæ ab aqua fervente, aut candente igne, vel escharotico medicamento fieri consuevit. At si diligenter intueamur, ab his non parùm differt vulnerans causa, hæc enim confertim agit, causticum medicamentum paulatim. Præterea causa vulnerans prima qualitate non agit, veluti aqua fervens, aut candens ferrum, sed acutie, duritie, & pondere. Quod si externam causam qualitate secunda exulcerare dixeris: multa namque erodendo exulcerant, istud nostræ determinationi non obstat, postquam sensim agit causa erodens, non confertim, & in virtute primæ qualitatis agit, caliditatis scilicet. Sed neque secunda qualitate videtur agere causa vulnerans, verùm potius mole, & ut ita dicam, corporeitate: ensis enim acutie secans, vel pungens non vulnerat qualitate secunda, sed sui ipsius corpore divellens: Lapis lacerans, aut contundens non agit qualitate, sed mole sua, dum impetu projicitur, solvit, quamvis non sine duritie; mollia namque corpora, licet impetu projecta, continuum evidenter saltem non solvunt. At corpus durum cum impetu projectum molliores partes, quarum respectu dijudicanda est durities, facilè dividit; duriores verò, atque renitentes frangit. Ponderosum quoque non parum corporis actionem adjuvat, utpote quod est in causa, ut major sit impetus ferientis corporis, immo corpus ponderosum solo pondere potest continuum solvere, licet vulnerare nequeat, nisi per accidens, puta os frangendo.

*Definitio  
vulneris.  
Objectio.*

Concludamus igitur, Vulnus esse solutam unitatem in parte carnosam evidentem à causa externa, mole, atque confertim agente, operationes lædentem. Sed neque hæc definitio omni caret difficultate: videtur enim esse amplior, quàm par sit, cum, & aliquibus



bus ulceribus competat, iis nimirum, in quæ vulnera transierunt, sive ob malam curationem, sive alia de causa. Ponamus, quod ex vulnere thoracis ulcus fistulosum remanserit, profectò ejusmodi ulcus erit evidens continui solutio in parte carnosa, & à causa externa mole, atque confertim agente, cum eandem habuerit causam, quam vulnus. Quare neque vitio carebit hæc definitio. Huic tamen objectioni respondere possumus, licet ulcus, in quod vulnus transit, sit evidens solutio continui, & prima ejus causa fuerit externa, mole, atque confertim agens, attamen si consideretur, ut ulcus, non ab eadem ortum habere, sed ab affluentibus succis, & ita à causa interna.

*Solutio.*

## CAPUT VIII.

*De Vulnerum Differentiis.*

**D**ifferentiæ vulnerum aliæ veræ & propriæ sunt; aliæ verò *Veræ differentiæ vulnerum unde sumantur.* impropriæ; quæ propriæ sunt ab iis desumuntur, quæ vulneribus inexistencia seorsum consistere non possunt, & proinde neque vim habent indicandi, sed solum alias indicationes coarctant, & ad cognitionem faciunt, ut quæ à figura, magnitudine, tempore, & hujusmodi sunt ductæ. Impropriæ ab iis ortum ducunt, quæ seorsum possunt consistere, & proinde etiam *Impropriæ unde.* peculiarem indicationem præstant ut sunt intemperies, phlegmone, gangræna, & hujusmodi: Ab iis enim non prodeunt veræ differentiæ, ut quæ complicationem potius faciant, seu compositionem affectuum, quam differentiam, quod enim seorsum, & per se consistere potest, dicebat Galenus 3. Meth. ultimo, id nullius unquam alterius fuerit affectus differentia. Hinc eodem loco subjungebat, magnitudo, parvitas, æquabilitas, inæquabilitas, tempus, figura ex eorum numero sunt, quæ aliis accidunt, idcirco faciunt differentias in ulceribus, at phlegmone, gangræna, putredo, & hujusmodi, singula seorsum, & per se consistere possunt, & propterea faciunt quidem compositionem affectuum in ulcere, non tamen differentias.

Propriæ autem vulnerum differentiæ aliæ substantiales sunt,

E

aliæ



*Substantia-* alia accidentales : Substantiales , quæ etiam maximè propriæ di-  
*tes differen-* cuntur , cum à vulneris substantiâ ortum habeant , à figura vul-  
*ria unde su-* neris ducuntur , ejusque magnitudine secundum unam , vel plu-  
*mantur.* res dimensiones , divisionisque æqualitate , vel inæqualitate. Unde Galenus loco citato , Ulcerum quidem maximè propriæ sumuntur differentiæ à substantiâ rei , nempe quæ à figura ducuntur , & à divisionis magnitudine , idque vel in longitudine , vel in altitudine , vel in ambabus dimensionibus præterea æqualitate in his , & inæqualitate. Juxta variam igitur figuram vulneryum dicimus , alia esse recta , alia obliqua , alia pampini modo retorta , alia hamitu unca , alia triangularia , alia orbicularia , alia denique hanc , alia verò illam figuram referentia : juxta verò divisionis magnitudinem alia dicimus esse magna , alia parva , alia profunda , alia superficialia , & in summo resistantia , alia ampla , alia arcta , & angusta ; alia longa , alia brevia. Juxta verò æqualitatem , vel inæqualitatem , alia dicimus esse æqualia , alia inæqualia. Attenditur autem hæc æqualitas , & inæqualitas penes profunditatem tantum , illud enim vulnus appellatur æquale , quod æqualiter est profundum , inæquale verò quod in una parte magis in summo residet , in alia verò magis profundum est , unde Gal. 3. Meth. ult. Quod si hæc ita se habent omnino profectò & æquale ulcus , & inæquale penes profunditatem erit , quippe dissilo , si ita fors tulit , per longitudinem femore , potest superior divisionis pars altè descendere , inferior in summo corpore harere : aut contra in summo esse , quæ superior est , profunda quæ inferior. Appellantur

*Non sunt re-* autem hæ differentiæ essentielles , licet re vera essentielles vulnerum  
*vera essen-* differentiæ non sint , cum eorum essentiam non constituent , ut  
*tales diffe-* quæ à nonnullis vulnerum accidentibus desumuntur , sunt namque  
*rentia.* vulnerum accidentia magnitudo , figura &c. aliud siquidem est esse vulneris , aliud magnitudinis ipsius , atque figuræ , qua fors ratione Gal. 3. Meth. ultimo dicebat , magnitudinem , parvitatem , æquabilitatem , inæquabilitatem , tempus , & figuram ex eorum esse numero , quæ aliis accidunt : unde fit , ut nec solis competant hujusmodi differentiæ , verum etiam ulceribus ; non inconvenit tamen Medico eas , ut essentielles accipere , posteaquam non in cognitionem , sed in operationem eas dirigit. Accidentales

diffe-



differentiæ, ut ait Galen. loco citato, extrinsecus accedunt, ob- *Accidentales differen-*  
 tinentque rationem ejus, sine quo non; namque à tempore de- *tie unde.*  
 sumuntur, unde dicimus aliud esse recens, aliud plurium die-  
 rum: & à generationis ratione, cujus gratia dicimus aliud esse  
 totaliter incisum, aliud totaliter disruptum, aliud partim incisum,  
 partim disruptum, & à modo, quo se habent vulnera ad conspe-  
 ctum nostrum: aliud enim est omninò conspicuum, aliud omninò  
 inconspicuum, aliud secundum partem conspectum fugit, secun-  
 dùm partem verò conspiciendum se præbet. Neque huic adver-  
 satur, quod superius diximus, vulneris naturam explicantes, vi-  
 delicet vulnus esse evidentem continui solutionem, siquidem ex  
 sui natura est evidens, at ex accidenti quandoque latet.

His adjungere possumus differentias eas, quæ ab affectis par-  
 tibus deducuntur, secundùm quas dicere consuevimus, aliud vul-  
 nus esse in cute, aliud in carne, aliud in capite, aliud in ven-  
 tre, &c. ad substantiales enim reduci non possunt, eò quod pars  
 læsa de vulneris essentia esse nequeat: hinc Gal. loco citato: Quod  
 si quæ à loco quoque in quo est ulcus, differentias censeas, veluti  
 si finis musculi, vel principium musculi, vel medium musculi, vel  
 cutis sit, quod ulceratum est, vel jecur, venterve, in quo ulcus  
 consistit, fuerint profectò, & ipsæ ulceris differentia, non utique  
 à propria ipsorum natura, sed à locis, in quibus consistunt, de-  
 sumptæ, pariter, & quæ ab externis causis desumuntur: cum  
 enim aliæ causæ vulnerent secando, aliæ pungendo, aliæ contun-  
 dendo, aliæ disruptendo, & lacerando, tot erunt vulnerum diffe-  
 rentia: aliud enim est vulnus, quod à telo secante, seu cæsim in-  
 fligitur, unde & ipsum sectionem, vel incisionem dicimus, aliud  
 quod punctim, unde & puncturam, seu punctionem appellamus;  
 aliud, quod telo contundente contingit, aliud, quod à vi lace-  
 rante. Impropria differentia ab iis sumuntur affectibus, qui cum *Differen-*  
 vulneribus complicantur, sive morbi sint, ut phlegmone, gan- *tie impro-*  
 græna, cavitas, supercrescens caro, fractura, luxatio, &c. sive *pria.*  
 causæ morbigæ, ut vitiosus succus, & omnino fluxio, venenum,  
 telum, & hujusmodi; sive symptomata, ut sordes, dolor, super-  
 fluus sanguinis fluxus, &c.



## CAPUT IX.

*De Vulneris effectibus in parte vulnerata.*

**I**Nter effectus qui à vulnere proveniunt, principem locum obtinet operationum læsio; cum enim sit continui solutio morboſa, operationes vulneratæ partis ſenſibiliter lædat neceſſe eſt; lædit autem non eas tantum quæ organicarum ſunt partium, ſed & quæ ſimilarium, licet non utraſque neceſſariò, & ſemper. Quod quidem lædantur interdum organicarum actiones, neminem *A vulnere læduntur actiones tum ſimilarium tum organicarum partium.* latet. Quot mancos, & claudos ex vulneribus obſervamus? quot cæcos? Quod etiam nonnunquam, & quæ ſimilarium ſunt partium, negari non poteſt, cum ex vulnere partem quandoque contabescere videamus, quod citra læſionem alicujus ex iis actionibus quæ ſimilaribus partibus attribuuntur, fieri nequit. Quandoque etiam ex vulnere pars ſphacelo corripitur, in quo naturales actiones non ſolum læduntur, ſed pereunt. Verum, quænam ſint illæ actiones, quæ à vulnere ſemper, & primò lædantur, non eſt adeò difficile determinare. Illud eſt certum, organicas non ſemper lædi, ut neque rationi conſonum videtur, quod ſemper lædantur per ſe actiones ſimilarium, & naturales. Ideò à multis, nec forſan ab re, hoc in dubium revocatur, & ab aliis quoque penitus rejicitur; à temperamento ſiquidem actiones naturales prodeunt, igitur temperamento partis minimè vitiato, ſed propriam naturam obtinente, inculpatas eſſe omnino actiones ab eo provenientes, aſſerendum eſt, quippe cauſam naturaliter eſſe diſpoſitam, & effectum ab ea non ſecundum naturam prodire, à ratione videtur alienum: At vulnus non ſtatim, nec ſemper temperie partis vitiat, quin multa ad ſanitatem ſæliciter perducere in dies obſervamus citra ullum temperamenti vitium, neque enim dolor, aut calor, aut tumor, aut quid aliud mali ſupervenit, quod ſanitatem remoretur, ſed probè caro generatur, ſive ea pro vulneris agglutinatione opus ſit, ſive pro cavitatis repletionem. Et quomodo ſanaretur vulnus, ſi intemperaturam annexam haberet? nonne ipſa partis temperatura eſt ſanationis principium? ideoque communiter acceptum



acceptum est, quod à Gal. 3. Meth. ult. dicitur, videlicet temperatam esse subjectam carnem ad ulcera conglutinanda, tum carne implenda prorsus oportere, & eodem libro cap. 3. fieri non posse, ut in ulcere vel carnis productio, vel sinus impletio, vel agglutinatio, vel cicatricis inductio rectè unquam cedat, nisi subjecta caro pro naturali modo se habeat. Sed 3. Meth. 4. expressè habetur, posse ulcus absque intemperie reperiri, dicebat enim; Hæc si feceris, fueritque ulcus solùm citra vitiosum succum, aut fluxionem, aut intemperiem, aut phlegmonem, aut aliud quodlibet vitium, &c. Si tamen diligenter inspexerimus, quòd naturales actiones lædantur, fateri oportebit: namque cum attractio fiat per partem post partem, & expulsio redundantis ad proximam, & de parte in partem, soluta partis unitate attractionem, expulsionemque ipsius lædi necessarium est, quod si hæc lædantur, nec reliquæ à læsione immunes esse poterunt. Quocircà etiam si temperamentum naturaliter se habeat, idemque sit operationum naturalium causa, non est ob id inferendum, inculpatas esse naturales actiones, cum ad eas præter temperamentum unitas requiratur; ea est enim, veluti dicebat Gal. lib. de dif. mor. c. 4. qua unumquodque corpus si præditum fuerit, unum esse, & unam functionem, vel unum usum perficere dicitur. Amplius coctionis læsionem manifestè deprehendimus, cum pars vulnerata excrementa generet, quæ non consueverat. Antea duo illa excrementa, tenue videlicet, & crassum in minori longè quantitate generabantur, tenueque per insensibilem halitum dissolvebatur, crassum verò observari vix poterat: At vulnerata parte non solùm in majori copia generantur hæc excrementa, verùm invisibilis perspiratio redditur subinde visibilis, & fit ichor, à quo vulnus redditur humidum, ut Gal. dicebat 3. Meth. 3. quod non aliundè contingere potest, quam ex coctionis læsione. Hic est igitur primus effectus vulneris, operationum sensibilis læsio, quod si actionibus officit, & usum quoque partium vitare, ac tollere posse non est dubitandum: dissectum peritonæum, effatu digna existente dissectione, non amplius intestina, ut prius continebit. Dissecta vesica contenta urina effluet. Cum etiam à principio, & fonte, à corde scilicet ad unamquamque partem influat calor, absque

*Semper naturales actiones læduntur à vulnere.*

*Usum partium à vulnere oblectitur.*



quo nulla pars ad proprias functiones potens esset, hujus enim gratia dicebat Galenus §. Loc. af. c. 1. partes omnes peculiari cordis temperie actiones suas perficere, propter vulnus necesse est influxum hunc intercipi; fit enim per partem post partem, atque ita requiritur partium continuïtas; soluta igitur continuïtate ad proportionem intercipietur influxus, neque in una parte magis, quàm in altera, cum omnes hoc influxu indigeant. Hujusmodi

*A vulnere læsionis genus animadvertit Theoph. Paracel. idemque in sua minori Chirurgia lib. 1. cap. 2. his verbis circumscripsit. Quod intercipitur influxus vitalis caloris.* vulnus in morbum transeat, ex repressiōe substantiæ, naturæ, cursusque sui contingit, prout in externis elementis, ubi tale quid eis accidit. Ut in ignis firmamento, si fissura lata vulneris instar in cœlo per transversum fieret, quæ comparatione quadam ita pateret, qui possent astra cœli sui circuli cursum perficere? Ab uno labio vulneris ad aliud saltatio non admittitur. Nonne aliàs gradum suum sistere Sol, & Luna cogerentur, si circulus eorum sectus foret? Natura si quidem integro plurimum gaudet, ruptaque prorsus abhorret. Comparatione prout astra cœli stare cogerentur, interna pariter astra corporis humani sisti propter vulnus est necessum, ut integer naturæ cursus perfici nequeat; Et prout per stationem astrorum in cœlo, sphæræ corruptio, finisque fieret, itidem & cordis naturæ casus foret, & extinctio. Præter hæc quid aliud maximi momenti, & maxima consideratione digni à vulnere provenit, hoc autem est vitium in temperamento vulneratæ partis.

*A vulnere læditur partis temperamentum.* Paradoxum videbitur; attamen fieri aliter non posse suadent multa. Quod plerique veluti per se notum admittant, posse vulnus ab intemperie separari, & à vulnere temperamentum partis vitari absurdum existiment, probè novi. Ejusdem sententiæ videtur esse Galenus ut qui vulnus ab intemperie

*Objectiones.* sejunctum concedat 3. Meth. cap. 4. & aliis in locis. Idem ratione haud levi ostendi potest, etenim si à vulnere temperamentum læderetur, tolleretur principium, quod vulnera ad sanitatem perducit, & ex consequenti nullum vulnus sanaretur. Istud enim principium est inculcata vulneratæ partis temperies, ut etiam ex Galeno superius dicebatur, nec ullus reperitur, qui aliter senserit. unde si vulnere semper annexa sit intemperatura, nihil erit amplius,



amplius, quod vulneratis partibus sanitatem afferat. Præterea temperamentum partis non aliter vitiari potest, quam vi agentis, quod qualitatem in parte introducat illius temperamento contrariam, calidam videlicet, aut frigidam, aut humidam, aut siccam, aut harum plures, nam morbi calidi causæ sunt calefacientes, frigidi refrigerantes, humidi humectantes, sicci exsiccantes, soluta vero unitas neque calefaciendi vim habet, nec refrigerandi, nec humectandi, nec siccandi; igitur neque intemperiem inducere poterit. Nihilominus, si rem exactius consideremus, ad vulnus *Probatum ex* necessario consequi temperamenti vitium comperiemus: idque *Gal. ladi &* non minus ex Galeno colligitur, inquit enim 3. Meth. 3. quod *vulnere par-* invisibilis perspiratio subinde fit visibilis, quoties naturalis calor *tis tempera-* languet, vel nutrimento utitur quam justum sit ampliori, vel motus quispiam vehementior animali contingit. Subjungamus nos, quod in vulnere invisibilis illa perspiratio fit visibilis, cum fiat excrementum illud tenue, quod ichor dicitur, & ulcus reddit humidum; igitur hoc accidit, aut ob naturalis caloris imbecillitatem, aut quia pars ampliori, quam justum sit nutriatur alimento, aut propter vehementiorem aliquem motum. At duo postrema in vulnerato locum non habent ut plurimum, nam eis tenuis iungitur victus, & quies imperatur, quare ob naturalis caloris imbecillitatem, id contingat necesse est: ergo vitatur temperamentum vulneratæ partis. Idem colligi potest ex 3. Meth. 4. ubi vires partium ex vulnere imbecillas reddi accipit. ejus verba sunt hæc: Atque etiam si quod affluit pro justo naturæ modo se habeat, attramen vires ipsæ partium, quæ tum propter dolorem, tum etiam ex vulnere sunt imbecillæ, ne quod justum est ferent: quod si vires partium ex vulnere redduntur imbecillæ, temperamentum esse læsum necesse est, per vires enim dubio procul intelligit Galenus ipsas facultates, atqui facultas est temperamenti proprietas, ut dicebat Gal. lib. de plenit. c. 3. & facultatum omnium essentia, ut ab eodem determinatur 5. Loc. af. 7. & 1. de Prælag. ex pul. c. 4. in peculiaribus partium temperantiis consistit, siquidem non aliud est facultas, quam relatio ad actionem, ut videre est apud eundem primo de Nat. fac. 4. & id, in quo fundatur relatio hæc, est temperamentum tamquam actionis causa, qua



qua ratione Gal. lib. Quod an. mo. 2. dicebat singulorum, quæ sunt effectrix quædam causa est, quæ ad aliquid refertur, huic verò causæ tamquam alicui certæ rei privati ac per se appellatio, quædam indita est, in quadam autem à seipsa ad genitum relatione geniti potestas consistit: quocircà tot potestatibus substantiam, quot etiam actionibus esse præditam dicimus. Facultatum igitur imbecillitas necessariò arguit temperamenti vitium. Sed clariùs adhuc ex 3. de Symp. caus. c. 1. idem ostenditur, inquit enim ibi Gal. Duo prima sunt genera aberrationis, unum cum potentia ipsa affecta est, alterum ab externo quopiam errore nascitur, atque utrumque rursùs dividitur, nam potentia bifariam læditur aut per suam ipsius essentiam aut per aliquem instrumentorum morbum. & paulò post: Jam in propria essentia noxæ intemperies quædam agentium qualitatatum sunt, & quamvis Gal. de causis læsæ coctionis ventriculi sermonem habeat, patet tamen, id commune esse omni actioni; quæcumque enim actio lædatur, vel læsa facultate, vel ob externum errorem læditur, quibus de causis contingit, ut à proprio scopo aberret potentia; quòd si facultas lædatur, aut in sui essentia læditur aut ob morbum instrumentorum. Cum ergo ex vulnere vires partium reddantur imbecillæ, ipsas in propria essentia lædi, fateri oportet, non autem ob instrumentorum morbum, per quem potius impediuntur, atque ita adesse intemperiem quandam agentium qualitatatum, ipsa namque facultatum essentia est temperamentum. Confestim etiam sanarentur vulnera, si temperamentum vulneratæ partis nihil oblæderetur; numquam deest materia pro agglutinatione & carnis generatione, agens naturaliter est dispositum, temperamentum videlicet, supponamus, quod nihil aliud mali vulnere supervenerit, & illud solummodo detrimentum habeant partes, quod à vulnere primò illatum est, quid igitur impedimento esse potest, quominùs subsequatur statim sanatio? Quid est in causa, quòd per aliquod temporis intervallum facultas veluti ociari videatur? Nulla alia profectò assignari potest causa præter facultatis imbecillitatem, ac temperamenti vitium. In læsam attractionem, vel expulsionem, quas ab unitate soluta lædi diximus, id non est referendum, cum enim hæc semper sit eadem,

*Confirmatur  
ratione.*



dem, sicuti à principio sanationem impediret, ita quoque in progressu. Sed hujus effectus veritatem ex ipsa rei natura, & propriis principiis comprobemus. Tota difficultas in eo sita est, ut rectè, quid sit temperamentum, intelligatur: hoc habito simul reddetur manifestum, num à sola qualitate possit vitari, an potius alter sit læsionis modus. Propterea paulò altius exordiri rem hanc oportet; cum præsertim non omnes in statuenda temperamenti natura conveniant, & ex malè intellecta ejus natura multa ignorari sit necesse, & eorum maximè, quæ ad vulnera pertinent, & in multas, atque inextricabiles difficultates incidere.

## CAPUT X.

*In quo ratio temperamenti sit constituta, & quod à vulnere ledatur temperamentum partis.*

**E**TI, qui ex antiquis fuerunt illustriores, in assignando temperamento convenerint, ex posterioribus tamen non pauci ab eorum placitis deflectentes, in varias distracti sunt sententias; alii enim mixtionem esse voluerunt, alii concentum, & harmoniam primarum qualitatum, alii earum proportionem. In quibus tamen opinionibus recensendis non immorabimur, ne à proposito nostro longius abeamus: Sed brevitati studentes ex rei natura, quid temperamentum sit, investigabimus. Præmittendum est igitur, in quo jam conveniunt omnes, corpus nostrum ex quatuor <sup>Primum fundamentum.</sup> elementis non secus ac reliqua mixta esse constitutum: An verò potentia, & virtutibus insint, an actu, & propriis formis, non <sup>Elementa sunt in mixto actu ex Hipp. & Gal.</sup> est hic determinandi locus, & parum ad rem nostram facit. Ex Hippocrate tamen lib. I. de Diæta manifestè colligitur, elementa non modò virtutibus, sed & propriis formis manere in mixto, licet refracta, & castigata: quasi elementorum formæ sint necessariae ad constituendum mixtum, ut quæ materiam primam reddant idoneam materiam ipsius mixti, cui muneri citra has formas esset inepta. Et Hippocrati videtur subscribere Gal. I. de Elementis. Et quod ex primis quatuor eorum qualitatibus ob mutuam actionem refractis post activarum actionem in passivas,



*Temperies  
Elementa-  
ris.*

*Due mix-  
tiones in  
mixti con-  
stitutione,  
scilicet, sub-  
stantiarum,  
& qualita-  
rum.*

*Tempera-  
mentum  
substantiale  
Tempera-  
mentum ac-  
cidentalē.*

veluti artificis in materiam, & earum elaborationem, sicut in mixtis omnibus, ita in corpore nostro alia diversa qualitas exoritur, quæ meritò quinta appellari potest, & temperies dicitur. Duas tamen mixtiones in constitutione mixti excogitare possumus, sicuti & duo licet considerare in ipsis elementis, eorum videlicet substantias, nec non & primas eorum qualitates. Etenim, si constituendum sit mixtum ex elementis, necessarium est, ut elementorum substantiæ usque ad minima dividantur, & misceantur, quò minimum unius tangat alterius minimum; sic enim demum sub una forma, quæ mixti est, coercentur, necessarium quoque est, cum mixtum fiat per mutuam actionem, & passionem contrariarum qualitarum elementis inexistentium, ut tandem istæ primæ qualitates se mutuò refringant, & commisceantur, & in unam quintam qualitatem transeant. Ex commixtione igitur substantiarum oritur modus substantiæ ipsius mixti, & quidem diversus pro diversa proportionē substantiarum ipsorum elementorum, & appellatur substantiale temperamentum. Ex commixtione verò primarum qualitarum oritur una qualitas, quæ temperamentum accidentale dicitur. De substantiali temperamento intelligebat Gal. quando primo de Usu partium dicebat, nihil aliud esse esse carnis, quàm temperamentum carnis, & nihil aliud esse esse ossis, quàm temperamentum ossis. & 1. Meth. 6. quod in tantum una pars differt ab alia, in quantum temperamentum unius differt à temperamento alterius. Et unamquamque rem talem esse, qualis est propter calidi, frigidi, humidi, & sicci temperamentum. & 3. de Temp. c. 4. idem esse temperamentum, quod universa rei substantia. Hæc si quidem intelligi non possunt de temperamento accidentali resultante ex quatuor primarum qualitarum commixtione: cum enim hoc temperamentum in dies permutetur, sequeretur, quod etiam esse partis permutaretur. Neque os est os propter suam frigiditatem, aut siccitatem, multa namque mixta sunt talia, quæ ossa non sunt, sed propter modum illum substantiæ, & substantiale temperamentum, quod est fundamentum omnium functionum, utens tamen accidentali temperamento, tanquam instrumento.

Sed istius temperamenti substantialis considerationem nunc  
omite-



omitemus, ut quæ parum ad rem nostram facit, atque ad alterum temperamentum ex commixtione primarum qualitatum resultans sermonem convertemus, quod à dominanti qualitate in mixtione, si quæ dominetur, denominationem accipit: temperatum verò dicitur, si nulla exuperet, & proindè in diversis diversum pro diversitate proportionis eorum, quæ in mixtionem veniunt, de quo dicebat Avic. 1. 1. Tract. 3. c. 1. esse qualitatem, quæ ex actione adinvicem, & passione contrariarum qualitatum in elementis existentium, quarum partes ad tantam parvitatem redactæ sunt, ut cujusque eorum plurimum contingat plurimum alterius, provenit. Non enim est una simplex qualitas, sed ex miscella contrariarum qualitatum, quæ sub una forma coercentur, quasi ad amicitiam, & concordiam redactæ, consurgit: unde subjungebat Avic. Cum enim adinvicem agunt suis virtutibus, atque patiuntur, accidit earum summa qualitas in toto earum similis, quæ est complexio. Rejicienda ergo eorum sententia, qui volunt temperamentum esse calidi, frigidi, humidi, & sicci mixtionem, cum potius ad hujusmodi mixtionem consequatur; & eorum similiter, qui existimant, temperamentum esse mixtionis rationem, seu primarum qualitatum proportionem, & harmoniam, seu concentum; hæc enim priora sunt ipso temperamento, & ab eodem præsupponuntur, immo illius sunt causa. Licet enim calidum, frigidum, humidum, & siccum sint prima temperamenti causa, ratio tamen efficiendi est ipsa primarum qualitatum proportio, si enim misceri debent, atque temperamentum efficere, aliqua proportionem misceantur necesse est, & illa profectò, quam postulat introducenda forma. Amplius de temperamento dicimus, esse calidum, vel frigidum, vel humidum, vel siccum, quod de proportionem illa, & harmonia, ac de mixtione dici non potest. Et facillimè temperamentum corrumpitur, si in harmonia, & proportionem consisteret, corrumpitur enim proportio ex cujusvis proportionati mutatione: itaque ex quolibet vel parvo excessu alicujus qualitatis corrumpi proportionem illam esset necessarium, sicuti convenientia, & proportio chordarum citharæ ex quacunque depressione, vel elevatione alicujus chordæ corrumpitur. Et quoniam temperamentum est ultima dispositio ad mixti formam, eo

*De temperamento  
accidentali.*

*Temperamentum  
accidentale non est  
mixtio, neque harmonia, aut  
concentus.*



corrupto, & mixti forma periret, cum tamen & sub maximo excessu calidi, aut frigidi, aut humidi, aut sicci mixtum permanere conspiciamus. Sed hæc missa faciamus, jam enim satis, superque à cordatis viris reprobatur hoc dogma.

*Secundum  
fundamen-  
tum,*

Præmittendum est etiam illud esse proprium hominis temperamentum, quod est causa operationum vitæ in ipso homine, quæ de causa forsan dicebat Galenus primo de nat. fac. cap. 3. & 2. ejusdem eap. 8. Singulæ partes agunt hoc, vel illo modo ob certam quamdam temperiem, quam ex primis quatuor qualitatibus sunt nactæ. Et rursus, De numero primorum morborum esse, inquit, immoderatus calor: nisi actio ex commoda nascatur temperie. Et rursus, In omni actione id, quod melius est, commodo temperamento referendum est acceptum. Et 2. Meth. 6. Affectus, qui actionis est causa, temperamentum est calidi, & frigidi, humidi, & sicci. Et 5. Loc. af. 7. Tota semper particula agit secundum temperamentum, quod ei frequentius inest, proprietatem. Unde etiam primo de fan. tu. c. 5. Totidem sunt temperamentorum diversitates, quot sunt functionum differentiarum, ita tamen, ne intelligamus temperamentum esse primam operationum causam, hæc enim anima est, quamvis non sine facultatibus agat, quæ ab ea emanantes in partibus recipiuntur, tanquam in subiectis, sed ideo temperamentum operationum dicitur causa, quod per ipsum partes evadant idoneum instrumentum animæ pro operationibus perficiendis, seu potentes redduntur ad proprias functiones. Ex hoc sequitur, quintam illam qualitatem ex primis elementorum qualitatibus resultantem non esse proprium hominis temperamentum, per eam enim non possunt fieri partes idoneum instrumentum operationum animæ, quoniam nec per eam vivunt, unde & in cadavere manet, ut commune, & elementale temperamentum omnium mixtorum, quod tamdiu durat, quamdiu servatur ipsum mixtum. Hinc est, quod sequitur postea cadaveris corruptio, atque putrefactio: necessarium est igitur, ut temperamentum sit quidpiam corporis nostri partibus inexistens, quatenus etiam sunt viventes, sicuti & actiones illi competunt, quatenus viventes sunt.

*Tempera-  
mentum  
quorum ope-  
rationum  
fit causa.*

Considerandum est itaque quodnam sit illud, per quod partes



tes vivunt, & quod vinculum est inter animam, & corpus, non quidem, quod anima, & omninò forma subiectum informet per causam aliquam mediam, hoc enim absurdum est; sed illam qualitatem dicimus animam connectere cum corpore, & formam cum materia, quæ materiam præparat ad receptionem formæ, cum non sub quacunque dispositione forma subiectum informet. Hoc esse calorem accipiunt omnes, eoque nos vivere fatentur; Unde illud vulgatum Philosophi, calido vivimus, & humido nutrimur. Et quoniam ipsius est, corpus reddere ad recipiendam animam dispositum, elaboranda enim, præparandaque materia pro receptione formæ à primordiis generationis extitisse existimandum est, & proinde non aliud esse, quàm innatum illud calidum, quod in femine existens facit, ut fœcunda sint semina, inest enim, dicebat Aristoteles 2. de Gen. animalium cap. 3. in femine, quod facit, ut fœcunda sint semina, videlicet quod calor appellatur, idque non ignis, non talis facultas aliqua, sed spiritus, qui in femine, spumosoque corpore continetur, & natura, quæ in eo spiritu est proportionem respondens elemento stellarum; non quidem quod calor hic non sit elementalis qualitas, procul dubio enim cum sit in mixto ex elementis, elementalis sit necesse est, unde & eum igneum appellat Gal. primo de San. tu. cap. primo. Sed quoniam non agit ut elementalis, sed cœlesti quadam virtute, & ut animæ instrumentum, ea perficiens; ad quæ, ut calor est, non pervenit, idcirco cœlestis virtus vocatur. Verùm hæc alterius sunt negotii.

Hic igitur spiritus ubi efformavit partes, non eas deserit, sed in iisdem permanet usque ad mortem, sicuti enim primò dispositum fuit corpus ad receptionem animæ, ita ut in corpore conservetur anima, & proprias possit exercere operationes, ac ad debitam maturitatem perveniat corpus, permaneat necesse est in omnibus partibus. qua ratione Galenus prima Aph. 15. Nec aliud quicquam animal ab initio formavit, sicuti neque rursus adauxit, aut usque ad mortem enutrivit, præterquam iste calor innatus. Neque illud obstat, quod spiritiosa pars seminis pauca sit, & ob id extendi nequeat per omnes corporis partes, ac perdurare usque ad extremum vitæ, eoque minus, cum facile in auras dissipetur, &

*Calore humanum eorpus est idoneum subiectum animæ.*

*De calido innato.*



corrumpatur: sicuti & absurdum videtur, quod pars spirituosâ in semine cujusdam magnæ arboris existens, quæ arborem produxit, extendatur per omnem partem arboris jam ad insignem magnitudinem effectæ. Si enim consideretur ex tenuiori alimenti parte augmentum recipere partem illam spiritalem, dum alimentalem portionem sua insigni activitate in propriam naturam transmutat, conspicuum erit, nullam subesse difficultatem: Verum quidem est, cum pars illa alimentalis, quæ ipsi additur, non sit adedò elaborata, nec eam habeat puritatem, quam spirituosâ pars seminis sola & per se, quò plus hujusce alimentalis materiæ additur, eò etiam spiritum illum magis de extraneo habere, unde quò longius distat homo à generationis principiis eò plus de extraneo habeat necessarium est calidum ipsius innatum. Hinc Hippoc. prima Aph. 14. Qui crescunt plurimum habent caloris innati, senibus verò modicus est calor. Semper tamen dicitur innatum calidum, sive natus spiritus; non quia totum à principiis generationis ortum habuerit, sed quia semper habet de illius natura, & proprietate. Hanc ex alimentali materia innati spiritus aggenerationem videns Galenus dicebat 5. de sim med. fac. cap. nono. In spatiis inanibus non parva ejus inest substantia, immo potius veluti materia quædam leviculam etiamnum mutationem exposcens, ac innati spiritus suis qualitatibus generationem, nihilominus tamen jam tum etiam admodum ad naturalia opera conferentem.

*Innatus calor est de temperamenti essentia.*

Si igitur temperamentum inesse partibus debet, ut viventes etiam sunt, atque operationum instrumentum, liceat nobis hoc pacto loqui, necessariò dicendum est innatum calorem esse de ejus essentia cum eo & vivant partes, omnium Medicorum consensu, & proprias exercent operationes, qua ratione dicebat Galenus libro de forma fætus, partes omnes operari proprio, & innato calore. & 2. ad Glauco. cap. 7. Nativum calorem substantiam virtutum existere, & si non hoc, saltem pri-

*Influens calor est de temperamenti essentia.*

mum, & maximè necessarium ipsarum instrumentum. Sed præterea & influentem à corde calorem ope vitalis spiritus, atque arteriosi sanguinis, cum ipse non minus sit necessarius pro vitæ conservatione, ac pro actionibus obeundis; Etenim innatus calor permanentem non habet essentiam, sed haud difficili negotio dis-

sipari,



fipari, & intemperari potest. Amplius quodammodo fopitus est, ideo calore illo, cujus cor fons est, & origo, fuit opus, qui ad omnes partes influens infitum illud calidum foveret, roboraret, ac in omnibus fuis operibus adjuvaret. hinc Galenus 8. de Ufu par. cap. primo, dicebat, nullam partem poffe vivere fine venis, & arteriis. Et lib. Art. Med. cap. 2. partes habentes facultates innatas venis, & arteriis ad ipfarum confervationem indiguiffe. & primo loc. af. cap. ult. naturalia inftrumenta & venis & arteriis indigere, quia nutrimento egent, & fervari oportet intimi caloris fymmetriam, nam permanens non est eorum effentia. unde & 5. loc. af. capit. 1. Partes omnes, dicebat, peculiari cordis temperie actiones fuas perficiunt, & proinde hac pereunte, actiones quoque ipfarum perire neceffe est. & 2. de fymp. caufis cap. 5. At quæcunque tandem fuerit (de animæ effentia loquebatur) è duobus alterum fateri oportet. aut quod ad omnes functiones, ut primis inftrumentis utatur fpiritu & fanguine, & vel alterius, vel utriusque calore, aut quod in his ipsis confiftat. Ut concludere liceat temperamentum partium, quatenus ad naturales functiones funt potentes, & quod est proprium hominis temperamentum ex elementali illo temperamento, nec non & ex innato, & influente calore confitui; illud enim folum est adæquarum operationum inftrumentum, & eo folo redduntur partes aptæ ad proprias operationes. negandum enim haud est, quin & illud elementale temperamentum ad operationes non requiratur, tanta fiquidem partium varietas, & tam diverfum earum temperamentum in alium finem referri non potest, præter quam in varietatem operationum, quæ per partes exerceri debebant, & in varios ufus, quos in humano corpore erant allaturæ. Hoc nifi fateamur, oportebit admittere fruftrâ factam naturaliter fuiffe aliam partem calidam, aliam frigidam, aliam humidam, aliam ficcam, vel fecundum harum qualitarum combinationem, aliam verò temperatam. Itaque dicendum est potiùs, quia finis partium hic erat, idcirco partes fic, vel fic fuiffe confitutas, quin fi idem prorfus caloris gradus, qui est in ventriculo, in altera foret parte, puta in pede, non ob id pars illa ex alimentis chylum generaret, quia elementale temperamentum illius partis nihil facit ad alimenti coctionem. Dixi autem

*Quæ fit natura  
temperamenti.*



tem temperamentum partium, ut sunt naturalium operationum instrumenta, nam de temperamento partium, ut ad animales actiones sunt potentes, aliter forsan statuendum est. Verum id non est præsentis negotii.

*Quod à  
vulnere læ-  
datur tem-  
peramen-  
tum partis.*

Ex his non est difficile videre, quomodo à vulnere lædatur temperamentum partis, & si diligenter inspexerimus, non potest non lædi, primò enim facta morbosa aliqua continui solutione, ut superius dictum est, non potest ita transmitti ad partem illam influens calor, ut priùs, cum ad hanc transmissionem continuïtas partium requiratur, & mutua quædam earum communicatio. At imminutio influentis caloris in parte nihil aliud est, quam temperamenti oblæfio. Præterea caloris naturalis substantia est vaporosa, & spiritiosa, quæ promptè dissolvi potest: sublato itaque naturali partis tegumento, ac intimis, & reconditis partibus ob solutam unitatem ambienti expositis, substantia naturalis caloris dissipetur, necesse est, quod nihil aliud est, quam temperamenti oblæfio. Eadem etiam naturalis caloris substantia una cum sanguine, qui à vulneribus effluit, evacuatur, quamvis enim innatus calor in sanguine sedem non habeat, sed in solidis partibus, attamen vitales spiritus semper sanguini adjuncti sunt, & ipse sanguis est insiti caloris fomentum; quare evacuato, qui in parte continebatur, sanguine, non solum influens calor dispendium patitur, verum & ipse insitus. Sed citra sanguinis effusionem propter naturalis tegumenti defectum, à quo fovebatur, dissipetur ejus substantia necesse est. Per solutam quoque continuïtatem privatur pars communicatione sibi proximæ, quare fieri non potest, quin ejus temperamentum jacturam patiatur, partes enim mutuam sibimet operam præstant, & una sibi conjunctæ calorem, ac temperamentum conservat. Tandem per vulnera partes, quæ numquam antea aërem ambientem fuerunt expertæ, eidem exponuntur. Ambiens autem semper ipsius naturalis caloris respectu est frigidior, quantumvis calidus sit, veluti sensus ipse judicat; quare & affici, & hebetari naturalem calorem est necesse, atque ita temperamentum lædi, quod vitium constat esse intemperiem frigidam. Hic aëris occurfus est momenti maximi, & plurimum animadvertendus, majoresque sunt ejus injuriæ, quam excogitari facile

*Aeris occur-  
sus multis*



facile possit: licet id quamplurimos latuerit: attamen ut ad male-<sup>rebus ad-</sup>ficium faciat, ex quibusdam externis non est arduum intelligere. <sup>versus, &</sup> Ova respiciamus, quæ citam putredinem, si in eorum testa con-<sup>maximè in-</sup>tracta sit rimula, nedum portio testæ detracta, effugere nequeunt, <sup>jurius.</sup> immò adeò naturæ suæ obliviscuntur, ut neque ampliùs excludendis pullis sint apta. Corruptitur celeriter pomum, si ejus cortex, quantumvis leviter dissecetur. Quis inanitis tam adver-  
sum aerem dixisset? Sed & arbores, detracto Cortice inarescunt. Longior nimis essem, si mirandos ambientis effectus, ubi iis ob-  
viat, quæ ipsum nunquam antea persenserunt, vel malefacta po-  
tius vellem recensere. Hæc non fuerant Paracelso incognita, &  
ideò in sua minori Chirurgia libro primo cap. 2. dicebat, Mox  
atque datus est ictus in vulnus transiens, adest momento simul  
accidens; ut ovo contingit, cujus cortex aperitur, hoc ab externo  
statim aere talem infectionem recipit, ut in priorem statum re-  
dire nunquam valeat, & si testa subtilissimam fissuram accepisset,  
quæ quoquo modo posset accidere momentaneeque possibile fo-  
ret eam consolidare, nihilominus in perfectam suam essentiam  
illud nunquam redit. Latius, quicquid ovo huic accidit, ut pu-  
trefactio, exsiccatio, vel arefactio clari, vel albuminis, vitellique  
resolutio, corticis vastatio, &c. hoc omne contingit humano cor-  
pori per apertionem vulnere factam. Ita contrarius est circulus  
externus interno, prout essentiae quintæ, quæ quantumvis bona  
sit, aut nobilis, ubi minimam fissuram firmamentum conciperet,  
quicquid eo circulo continetur intrinsecus, id est, cœlo, suam  
essentiam nunquam retineret. Pariformiter omne, quod involu-  
tum tela reperitur, cortice, vel pelle, mox atque minimum pa-  
tuerit includens, ab externo sic inficitur inclusum aere, ut ibidem  
integra nunquam essentia reperiri valeat ampliùs. Considerate  
pomum, cui facta sit incisio, putrefit hoc non alio, quam aere  
solo, qui circulum intravit, &c.

Sed quid patiatur natus calor à vulnere, facile intelliget, <sup>Quam ini-</sup>  
qui consideraverit, quidnam inter fracturas, & luxationes, quæ <sup>micus sit aer</sup>  
cum ulcere, & eas, quæ sine ulcere contingunt, intersit. Siqui- <sup>calori na-</sup>  
dem si fracta sint ossa, & ulcus absit, absque negotio coaptatis <sup>turali.</sup>  
partibus restituetur sanitas; & tamen neque mente concipi potest



in intimis partibus à fracto osse non excitatum ulcus fuisse, cum proprium loco egrediatur, absque labore tamen sanescunt, quoniam paucum, vel nullum detrimentum expertus est naturalis calor, neque enim in ambientem ejus substantia fuit dissipata, nec ejus qualitas fuit hebetata. At si ulcus sit adjunctum, quanta negotia faceffant, nemini in arte exercitato est ignotum. Sæpè præ manibus habui ossa multipliciter fracta, & in multas testulas difracta, quæ tamen, quoniam cutis erat integra, fœliciter fuere conglutinata. Quod si ulcus accessisset, multa frustra necessario discessissent, & malè moratum ulcus evasisset. Idem aliis evenisse crediderim. Si verò ad luxationem ulcus accedat, & illud compertum est; non posse os luxatum ad pristinam sedem reduci citra convulsionis periculum, nisi articulus fuerit ex minimis. Sed & suppurationes interdum per insensibilem halitum materiam digerentes absque negotio, & brevissimo tempore sanitati restituimus: quod si secaretur abscessus, longè difficilior redderetur curatio, tardiusque sanitas subsequeretur. Quapropter fateri cogimur, insignem admodum esse noxam, quam à vulnere contrahit natus calor.

*Solvuntur  
in contra-  
rium addu-  
ctæ.*

Iis etiam suppositis rationes adversæ nullius sunt momenti: quod enim asserunt, reperiri vulnus non rarò absque ulla intemperie, & ut Gal. admittit, verum est, si de intemperie positiva sit sermo, quæ videlicet contingit ob causam adversa qualitate in solidas partes agentem, easque alterantem; Etenim absque hujusmodi intemperie sæpissimè observamus, minus gravia vulnera fœliciter ad sanitatem perducì; hæc non est intemperies, quæ vulnus comitari statuebatur, verum privativa, quæ videlicet naturalis caloris dispendium sequitur; hebetato enim ejus vigore, cum sit de temperamenti essentia, negari non potest, quin oblædatur temperamentum, & pars frigidior evadat; nec removetur hæc privativa frigiditas, quamvis postea vulneri superveniat calida intemperies, & inflammatio, postea quam stat cum caliditate positiva. Et quando communiter dicitur, ad sanitatem perducì vulnera, etiamsi intemperies non accedat, quæ sanitatem remoretur, de illa præsertim intelligitur, quæ affluentes succos causam habet, non semper inflammatio, exempli gratia, aut erysipelas supervenit.

Patet



Patet etiam nihil esse quod objiciebatur, intemperiem videlicet non induci à vulnere, quia non habet vim calefaciendi, aut refrigerandi, &c. ad productionem positivæ intemperiei agens requiritur, quod qualitate agendo refrigeret, aut calefaciat, aut humectet, aut exsiccet, at sine tali agente manifestum est, posse naturalem calorem malè disponi. Neque sanationis vulnorum principium tollitur. Leditur quidem temperamentum partis; at nisi vulnus omninò sit lethale, non penitus pars facultate destituitur edendi opera naturalia, sicuti neque in febricitante actiones istæ tolluntur, licet naturalis calor igneus evaserit. Naturalis calor malè dispositus obire naturalia munia potest, non tamen probè, ut antea. Tunc tantùm ab agendo cessat, quando lethalis penitus est affectio. In vulneribus igitur modò major, modò minor est læsio pro vulneris gravitate, quam natura arte præsertim adjuta paulatim refarcit, unde & paulatim vulnus sanatur, post cujus sanationem aliqua etiam remanet imbecillitas in parte, sicuti neque ad pristinum statum rediit naturalis calor. Hinc non pauci aeris mutationes prædicunt. Non est ergo mirum, si vulnera sanentur, quamvis imbecillitatem aliquam contraxerit calor.

Ex his etiam manifestum esse potest, cur non statim sanentur vulnera, & cur alia citiùs, alia verò tardiùs: Et cur excrementa generentur, omnium enim causa in vitium temperamenti est referenda. Ut vulnus, quatenus morbifica est causa, temperamento scilicet officiens, majus negotium faceßere videatur, quam ut morbus. Si quis tamen non acciperet, calorem innatum, & influentem esse de temperamenti essentia, id scòlum credens esse temperamentum partium, quod elementale est, modò concedat utrumque calorem ad operationes naturales esse necessarium, eosdemque propter vulnus dispendium pati quod viri præstantissimi nunc etiam profitentur, non refragabor, non enim de re, sed de nomine erit controversia, & veluti demonstratum accipiemus lædi à vulnere naturalem partis calorem.

*Quomodo  
sanentur  
vulnera,  
cum ab iis  
lædatur  
tempera-  
mentum,  
quod incul-  
patum esse  
debere à  
Galeno sta-  
uitur.*



## CAPUT XL.

*De fluxione, & fluentibus humoribus, & quod ex vulnere partes red-  
dantur fluxioni obnoxia.*

**D**Ura fortasse videbitur prædicta consideranti vulneratæ partis conditio, sed neque hic malorum finis, est enim aliud, quod deteriore quoque reddit ejus statum, posteaquam & hoc habent vulnera, quod fluxionis periculo partes exponunt. Hoc non erit perdifficile videre, si fluxionis occasiones, & causas percurramus.

*Dua præci-  
pue fluxio-  
nis causa,  
attractio,  
& transmis-  
sio.* Duæ autem sunt universales, & præcipuæ fluxionum causæ, quarum una in partem recipientem refertur, altera verò in eam, aut eas, à quibus humor profluit: quiescens enim humor in aliqua parte aliò non movebitur, in quo quidem motu, quando concitator est, & humoris, qui recipienti parti non est ex usu, fita est fluxionis ratio; nisi aut à partibus, in quibus continetur, impellatur, aut à partibus, in quas decumbit, attrahatur. unde Gal. de dif. feb. c. 2. ult. duplicem dicebat esse fluxionis causam, seu occasionem: altera, quando materia inutilis ad imbecilliores partes ab aliis detruditur: altera, quando ab eadem attrahitur. Et appellat Gal. materiam inutilem, quæ fluit, non quia semper ex sui natura sit inutilis, sed quia est inutilis recipienti parti, unde & Hipp. 6. mor. vulg. com. 2. t. 9. Dissimilia, dicebat, si sursum repant deorsum detrahare oportet, in cujus loci expositione dicebat Galenus per dissimilia intelligendos esse humores, qui natura sunt ab eo loco alieni.

*Dua attra-  
ctionis cau-  
sa dolor, &  
calor.* Porro pars aliqua materiam aliunde trahit vel ob dolorem, vel ob calorem, vel utraque de causa, ideò Gal. loco citato sub-  
jungebat: Duæ sunt fluxionis causæ, quæ ex ipsis laborantibus partibus originem trahunt, quarum altera in eisdem est accensa caliditas, altera dolor excitatus. In dolore quidem ab ipsa recipiente parte fluxionis oritur causa, at postea superpositæ partes fluxionem persequuntur, tum quia dolor imbecillam reddit partem, ex quo, quæ robustiores sunt, propria excrementa ad eam prom-



promptè transmittunt : tum etiam, quia natura, quod sibi molestum est, ac triste, expellere aggressa, si illud quidem reluctetur, & propterea primo aggressu nihil proficiat, vehementiori conatu ipsum adoritur, in quo sanguinem, & spiritum ex aliis partibus in affectam simul exprimit. Ex his tamen magis dolens pars redditur; nam à sanguine expresso, & spiritibus magis repletur, ac distenditur: unde cum non esset expressionis occasio, neque natura ab hoc opere desistit, & hoc est fluxio. Neque mirum videri debet, si partes sanæ occasione doloris ad expellendum insurgant, posteaquam, ut dicebat Hip. lib. de alim. Confluxio una, conspiratio una, consentientia omnia; totum corpus unius particulæ affectum sentit, & ideò qui succi in aliis partibus continentur, non rarò speciem irritantis subeunt, & ita expelluntur. Hinc. Gal. 13. Metho. 3. In doloribus incipit quidem causa ab eo, quod affligitur, sed quicquid est phlegmones id superpositæ partes efficiunt. Et paulò post modum explicans, dicebat: Excretrix suo munere fungens doloris causam tanquam contristantem ejicere dum properat, phlegmonem interdum concitat; cum enim in primis conatibus nihil proficiat, vehementius aggrediens quod infestat expellere, sanguinis aliquid, & spiritus ex superpositis partibus in affectam simul exprimit. Atque hinc fit ut ex dolore particula proportionè confluentis in eam humoris in tumorem attollatur. Duplici autem ratione videtur expressio hæc à natura fieri, prima quidem, quia sit contristata ratione dolorificæ causæ, & ob id vasa contrahat, ad quorum contractionem contentorum sequitur expressio: altera verò, quia facultas vitalis spontè spiritum, & arteriosum sanguinem pro ratione indigentia, cuique parti transmittit, & cum doloris tempore affectæ, atque languenti parti fit in propulsione molestantis causæ laborandum, spiritum quoque copiosorem, & sanguinem, ut validius expellat, ad eam transmittit. Et quoniam non operatur intellectu, sed lege, & instinctu naturæ, neque transmissionem hanc semper moderatur, sed plusquam par sit, & à parte regi possit, sanguinis transmittit, unde fluxio. Et eò magis, quoniam spiritus, & sanguis copiosius transmissi, neque moderati à natura partis, eam distendunt, ac dolorem augent, & ita fit major, fluxionis occasio. Et hoc forsan



voluit Avic. lib. de Viribus cordis trac. 2. cap. 1. quando dicebat: Et secunda causa, qua ad membrum dolens confluunt materiæ, est, quia spiritus naturalis procedit ad ipsum ad impugnandam causam nocivam, quem sequitur sanguinis multitudo.

*Neque dolor, neque calor re vera attrahunt.*

Quod verò caloris ratione pars attrahat, ex eo liquet, quod calidi est attrahere, si communem loquendi modum sequi velimus, quandoquidem, si exactius rem perpendamus, fortasse comperiemus, re vera neque dolorem, neque calorem attrahere, sed calorem esse in causa fluxionis fundendo, & liquando circumstantium partium succos, meatus quæ partis aperiendo, & laxando, ac præterea naturæ molestiam inferendo, & quod calor non attrahat argumentum esse potest ignis hic noster, à quo nihil attrahi videmus, etsi calorem habeat in summo. Nec mihi objiciat quispiam flammam ellychnij, quæ videtur oleum in lucerna existens tanquam proprium pabulum attrahere, re vera enim non illud attrahit, sed tamen, quod in extremo est ellychnij absumit, cujus locum consecutione quadam alia olei portio subit, & sic deinceps, donec totum oleum fuerit consumptum. Id autem verum esse manifestè deprehendet, si extincta lucerna oleum quod in extremo est ellychnij extra lucernam exprimatur, protinus enim observabitur oleum, quod est in lucerna, sponte ad ellychnij extremum fluere, & si hoc ellychnij extremum ita collocetur, ut pendeat deorsum spectans, brevi tempore oleum universum effluet. Ita consuevimus liquores per filtri portiones percolare, filtri quidem alteram partem in percolandum liquorem immergimus, inde alteram partem in vase, quod percolatum liquorem debet excipere, ita aptamus, ut deorsum, & vasis fundum spectet, & eodem modo alias filtri portiones disponimus per quas subinde ab uno vase in alterum transfertur liquor. Comperiemus pariter neque ipsum dolorem attrahere, sed ea ratione fluxionem ob ipsum consequi, quod superpositæ partes, dum causam contristantem nituntur expellere, sanguinem, & spiritum in affectam partem simul exprimunt. Cum dolor sit qualitas intentionalis, non videtur posse vim habere attrahendi, quæ realis est actio. Quod forsan respiciens Gal. 13. Meth. 3. dicebat: In doloribus incipit quidem causa ab eo, quod affligitur, sed quicquid est phlegmones id superpositæ partes efficiunt.



ciunt. Faciliorem verò reddunt fluxionem, eidemque occasionem præstant situs declivis attrahentis partis, communem loquendi formam sectabimur, & viarum laxitas, venarum scilicet, & arteriarum, & aliorum meatuum, qui in partibus intermediis existunt, siue sensibiles sint, siue sensum effugiant; promptius namque feruntur succi, & ab imbecilliori facultate propelluntur per ampliores vias, & ad inferas, & in imo loco sitas partes, in quas ut graves suapte natura tendunt. Succī quoque calidiores, ac tenuiores prompti admodum sunt ad motum.

In fluente tamen humore duo licet considerare, qualitatem *Qualitas* videlicet, & quantitatem; qualitatem habet humor à partibus, à *fluente hu-* quibus profluit, talis quippe ab ipsis profluit, qualis in eisdem *moris unde.* continetur: quamvis postea ascititiam qualitatem in affecta parte plerumque contrahat. At quantitas fluentis humoris, & à parte attrahente pendet, & ab iis quoque à quibus discedit. quò istæ *Quantitas* partes pluribus erunt succis refertæ, ab eisdem humores in ma- *fluente hu-* jori copia secedere poterunt. Similiter quò major extiterit dolor, *moris unde.* & calor in attrahente parte, eò plures attrahentur succi: quando enim non multum redundant succi in partibus, multi tamen attrahuntur, quoniam majori vi, & à pluribus partibus. Quade causa Gal. loco citato, dicebat: Dolor, & membri, in quo phlegmone residet, calor etiam si purum ab excrementis sit totum corpus, fluxionis causa fiunt. Hanc quoque fluentis humoris qualitatem quantitatemque considerans Gal. 2. de dif. feb. ult. dicebat: Quòd autem vel plus, vel minus, vel melius, vel deterius influat, causa non tantum in parte fluxionibus obnoxia consistit: sed quòd melius sit, aut deterius, ex partibus mittentibus pendet; quòd plus, vel minus, tum ex iis, quæ mittunt, tum ex iis, quæ recipiunt.

Sed & aliud in fluente humore oportet considerare, scilicet velocitatem motus ipsius, ac tarditatem, alias enim fluxiones veloces deprehendimus, alias segnes, & tardas, & in his etiam alias differentias consideramus. Quòd tamen velocius, aut tardius *Cause velo-* confluat humor, tum ex attrahente pendet parte, quæ velocio- *cis & tardæ* res concitat, fluxiones, ubi quæ in ipsa causæ fluxionem accer- *fluxionis.* sunt, dolor videlicet, & calor, fortiores extiterint; tardiores ve-



rò ubi cædem leviores, tum ex qualitate, & quantitate confluentis succi, nam quantò copiosioribus humoribus reliquæ partes erunt refertæ, & quò humores fuerint calidiores, ac tenuiores, & ad motum aptiores, tantò velocius movebuntur: quamvis succorum quantitas eò videatur ad velocitatem motus conferre, quod majorem habet speciem proritantis. Non parum etiam ad velocitatem motus facit situs declivis attrahentis partis, cum ad eam propria gravitate ferantur succi. Viarum quoque per quas fit fluxio, amplitudo, & laxitas velocioris succorum motus est non levis occasio, per ampliora enim spatia faciliùs moventur. Quod si plures causæ convenerint, velocissima erit humorum fluxio.

*Vacuum an  
attrahat.*

Existimant aliqui partes attrahere non solum ob calorem, & dolorem, verum & propter vacuum. Si per hoc intelligant vacuum inter attrahentes causas esse connumerandum, cum in rerum natura non detur, prorsus ableganda est illorum sententia. At si velint ob inanitionem, partes, ut indigentes, ab aliis magis attrahere, utique non reluctarer: Atqui non hac tantum de causa evacuationes ab aliqua parte, veluti sanguinis profluvia ad eam fluxiones concitant, verum etiam quia, dum pars aliqua inanitur, ne detur vacuum, necessariò à superpositis partibus in locum succedentis corporis consecutione quadam aliquid confluit, quo quidem motu ansa datur aliis partibus impellendi ad eundem locum succos, quibus ipsæ sunt refertæ. Ut commotio illa in succis sit causa, cur expultrix partium ad expellendum proritetur: commoti enim succi speciem subeunt irritantis. Quod si opus aliarum particularum tolleretur, ratione inanitionis nulla sequeretur fluxio; quantum enim est de ratione vacui, nihil aliud habet, nisi ut è proximis partibus aliud subeat in locum ejus, quod evacuetur: in hoc tamen non est ista fluxionis ratio, sed in eo, ut partibus affluat plusquam ab eis confici possit, quod profectò ab aliis partibus pendet, quarum fluxiones, quæ occasione vacui suboriuntur, potiùs ad eas essent reducendæ, quæ occasione transmittentium partium concitantur.

*Transmissio-  
nis causæ.*

Expellitur porrò materia ad aliquam partem, vel à parte una, vel pluribus, quia hæ illa sint robustiores, sive quæ recipit sit imbecillior sui natura, sive ascititia aliqua causa. Etenim si una

pars



pars altera haud esset imbecillior, sed omnes essent æque potentes, non esset major ratio, quod hæc potius reciperet, aut transmitteret, quam illa: unde Galenus secundo de dif. feb. ultimo. Aliæ verò & propter harum imbecillitatem, & propter earum robur, quæ superfluitates transmittunt, consistunt: non enim satis est, ut partes vim habeant supervacui expultricem, sed insuper requiritur, adesse aliam partem, quæ admittat expulsum humorem; non admittet autem, nisi imbecillior fuerit, vel natura, vel ascititia causa. Verùm si alia quæpiam hac fuerit imbecillior, & ad eam aditus habeat, quæ primò transmissum humorem recepit, utique receptum humorem ad eandem seipsa imbecillio rem transmittet, & sic deinceps. Cumque ad eam fuerit deventum, quæ receptam materiam aliò pellere nequeat, in ipsamet fluxio consistit, & morbus ex fluxione oritur, hinc est, quod ad cutem, & emundatoria, ut partes omnium imbecillimas plurimæ fluxiones terminentur. Ideò Galenus lib. de Caus. mor. 6. & secundo de dif. feb. ult. Quoniam ex partibus aliæ sunt robustiores, aliæ minus robustæ, in impuris corporibus, in quibus plurimum materiæ inutilis abundat, ad ignobiliores partes aliquid confluit: superfluous enim humor à robustioribus partibus expulsus, ac nullibi consistere potens, tandem ad imbecillimam omnium pervenit partem, sive natura talis sit, sive ascitita causa. & 13. Meth. 5. Supervacua, quæ valentioribus partibus ob redundantiam, vel qualitatem expelluntur, in imbecilliores partes decumbunt, & ideò glandulæ facilè fluxiones admittunt. & 6. de san. tu. 13. singulæ partes facultatem habent, qua, quod superfluum est, expellere in vicinam desiderant, & , si quæ vicina particula est, corporis habitum firmum habeat, quod sibi obtruditur, utique non admittit, facitque, ut in ipsa sola, quæ primùm affecta est, dolor subsistat. Sin imbecillior, quam illa, unde excrementum mittitur, admittit illa quidem, cæterum ipsa quoque ad imbecillio rem quampiam à se rursus transmittit, atque hæc rursus ad aliam, donec in illam procumbat, qua imbecillior nulla sit. Accidit tamen interdum in aliquam partem fluxionem decumbere, quæ suapte natura aliò poterat fluxionem propellere, verùm à qualitate, vel quantitate materiæ adeò afficitur, ut ex hoc ipso ad eam aliò pellendam fiat.



impotens. Non tamen æqualiter ab una parte ad quascunque fieri solet transmissio, sed præsertim fit ad eas, ad quas pars mittens vias habet idoneas. hinc caput ad omnes ferè subjectas partes solet transmittere, quoniam, & ad omnes ferè vias habet: sic cor, & jecur ad propria emunctoria, & sic de reliquis.

*Fluxiones  
à toto etiam  
in nobiliores  
partes de-  
cumbunt  
Cur partes  
transmit-  
tant.*

Illud etiam animadversione dignum est, quod non semper ab una aliqua parte provenit fluxio, sed interdum à toto, & tunc in quamlibet partem, quantumvis præcipuam, potest fluxio decumbere, quoniam totum potentia vincit singulas partes, & ideò nec partes præcipuè sunt à fluxione immunes. Cur verò partes fluxionem in alias transmittant, in causa est multitudo, & malitia succorum, vel utrumque vitium, à copia enim oppressæ, & à mala qualitate irritatæ, ad expellendum, quod nocet, insurgunt, ideò Gal. 13. Meth. 5. supervacanea, dicebat, quæ valentioribus partibus ob redundantiam, vel qualitatem expelluntur, &c.

*Obiectio.*

Dicet fortasse quispiam, nonne natura cuique parti vim expultricem tribuit, ut quæ infestant expelleret, qua etiam ratione instrumenta quædam fabrefecit, ut vias, per quæ fieret infestantium superfluitatum expulsio? fecit enim vesicam felleam, lienem, intestina, vesicam, uterum, & alia id genus, pro diversorum excrementorum expulsionem, ipsique crebro plura emissoria paravit, quibus ejus excrementa expurgarentur, veluti Hippocrates dicebat libro de Loc. in hom. Præterea & corpus totum fecit minutissimis foraminibus pervium, ut & per insensibilem halitum, & sudoris specie supervacua expellerentur; quomodo ergo fiunt istæ fluxiones? Negari profectò non potest, quin sagax natura pro redundantium expurgatione varia instrumenta fecerit, pluresque vias paraverit, sicuti & unicuique parti expultricem tribuit, qua infestantia ejiceret. Verùm ad cujuslibet supervacui educationem hæc tantum sufficiunt, quando naturæ legibus gubernatur corpus, si enim delicta contingant, & major excrementorum copia generetur, quam naturaliter fiat, non amplius naturalia illa instrumenta sunt satis; tunc enim neque naturaliter gubernatur corpus, & ut accidit in Republica malè disposita, potentiores partes ad minus potentes, quæ redundant, expellunt, & hæc ad alias adhuc seipsis imbecilliores, & sic deinceps, donec ad eam fuerit per-



perventum, quæ amplius admissos succos aliò detrudere nequeat. Qua de re Galenus libro de cau. mor. 6. Multa, dicebat, ab initio instrumenta materiæ inutilis expurgandæ gratia natura molita est, & hæc quidem ad sanitatem tuendam sufficiunt, cum nullam corpori labem is, qui nobis circumfunditur, aër adjecerit, aut delinquens victus ratio humorum vitiosorum abundantiam immodicam non effecerit, cum enim talis accidit error, non amplius naturalia instrumenta sufficiunt ad multitudinem excrementorum expurgandam, fluxiones proinde a potentioribus partibus depulsæ in imbecilliores irruunt.

Habent verò partes mandantes superflua, quæ transmittunt, *Unde habent partes, quod transmittunt.* aut quia aliundè ea recipiunt, quemadmodum venæ ab hepate secundum plurimum sanguinem habent, aut quia eadem generant, quod dupliciter potest contingere, naturaliter scilicet, ac præter naturam: naturaliter quidem, ut quando generatur humor excrementitius, sed per consuetos meatus, ut qui obstructi seu clausi sint, juxta naturæ leges expurgari non potest, & propterea pars generans ab illo tandem oppressa, & irritata quoquo pacto ad alias partes expellit. Quam fluxionis sortem tetigit Galenus lib. de cav. mor. 6. his verbis: Atqui evenit interdum, constipatis meatibus, per quos excerni consueverant, ut ad partes alias deriventur. Præter naturam generantur superflua, vel ob intemperiem partis, quæ nonnunquam est morbosa, interdum verò nondum eò crevit, ut morbosa appellari mereatur, vel ob alimenti vitium, vel quia parti suppeditetur copia materiæ excrementorum, ut ob id pars illa non possit non generare excrementa, sicuti contingit cerebro, quando vaporum copia à subjectis partibus ad ipsum fertur, quos in pituitam subinde convertit, & ad subjectas partes, si robustum sit, transmittit. Quandoque etiam in partibus excrementa paulatim congeruntur, eò quòd pars propter imbecillitatem propriam alimentum, etiam si sit optimum, nequeat conficere, ex quo necessariò excrementa resultant, quæ paulatim congesta, ubi eò devenerint, ut potentiam vel opprimant, vel irritent, expelluntur. In confluyente humore occasione mittentis partis eadem sunt consideranda, quæ antea diximus consideranda esse, quando ratione recipientis partis concitatur fluxio, qualitas



videlicet, & quantitas, nec non, & velocitas, ac tarditas motus, qualitas quidem ejus, quod influit, quod videlicet melius sit, aut deterius, ex mittentibus provenit partibus, sicuti & quod major, aut minor humoris copia influat: quamvis quò pars recipiens est imbecillior, eò promptius reliquæ partes ad ipsam propria excrementa transmittant, & plures etiam partes proprium pondus in eam conentur deponere.

*Veloces, &  
tarda fluxiones.*

Velocitas motus, ac tarditas & in qualitatem materiæ est referenda, & in robur mittentium partium; quò enim calidior, ac tenuior est materia, eò velocius moveri consuevit; quò frigidior, & crassior, eò tardius. Pariter quò mittentes partes robustiores, & magis irritatæ, atque coactæ, eò vehementiori impetu irruunt fluxiones. Sed & situs partis declivior, & amplitudo meatuum, ac viarum, per quas humor confluit, sicuti ad facilitatem fluxionis faciunt, ita quoque & ad motus velocitatem, veluti etiam superius dictum est. Aliqui, licet nulla pars corporis mittat, vel attrahat nihilominus fieri posse fluxionem opinantur, eò quòd alia sint,

*An fieri  
possit fluxio  
extra actionem  
partium.*

quæ ad motum possunt humores excitare, cujusmodi sunt mora in sole, balneum, motus corporis, & animi. quòd à Gal. sumptum est 2. de symp. cau. c. 4. ubi hæc habet: Sol, balneum, & exercitatio ad motum excitant excrementa alioqui quiescentia, & ex animi affectibus ira. Commoveri quoque succos, & fluxiones concitari dicunt, & ab ambientis frigiditate, & à ventis tum calidis, tum frigidis, testemque Hippoc. adducunt, qui 3. Aph. multos morbos ex fluxione. ventorum occasione genitos, recenset; & experientiam ipsam, namque à frigidis, & adstringentibus medicamentis repelluntur succi, igitur quæ refrigerant humores ad motum excitant. Idem asserunt de pluribus quæ ingeruntur, cujusmodi sunt vinum, præsertim meracius, & aqua gelida copiosè bibita, & maximè post labores, aromata, acria, & hujusmodi: hinc pleuritide, & alia interna inflammatione laborantibus dicunt, potu interdici, neque alia ratione, nisi quia vinum ad partem affectam succos deferat, & sic de reliquis. Quinimò à seipsis ad motum excitari nonnunquam humores, asseverant, cum servant, & liquantur quod visus est voluisse Gal. lococitato, cum dicebat: A seipsis ad motum excitant excrementa, si

vel



vel calefiant, vel extenuentur, vel in spiritum degenerent. Medicamenta quoque acria admota partibus, succos ad partem alligere, absque quod pars ad attractionem concurrat, profitentur, idque vesicantium exemplo declarant. Attramen si diligenter consideremus non sunt hæc primæ & immediatæ fluxionis causæ, sed ad fluxionem faciunt, vel calefaciendo plus quam par sit recipientem partem, & meatus ejusdem aperiendo, & laxando, & succos in ea existentes digerendo, ac naturæ molestiam inferendo, ut acria pharmaca parti admota, vel aptiores reddendo humores ad motum, ut quæ humores calefaciunt, fundunt, liquant, & extenuant, sic enim fluxiles admodum fiunt; vel eosdem ad eam dispositionem reducendo, cum qua opprimant, vel irritent partes, vel utroque modo afficiant, ut quæ fundunt, atque attenuant succos, & quæ repellunt: nam fusi, & attenuati succi, præterquam quod magis fluxiles fiunt, majorem locum occupant, & cavitates, ac spatia magis replent, unde & potentiam partium, in quibus continentur, magis opprimunt; præterea calidiores redditi succi, & acriores, partes irritant, ideò mirum non est, si ad eorum expulsionem insurgant, & fluxionem promoveant. Sic quæ repellendi vim habent, cujusmodi sunt ambiens frigidus, & venti frigidi, & medicamenta repellentia dicta, non alia ratione fluxionis causa fiunt nisi quia sunt in causa, ut interiora vasa, ac spatia, & ea omninò, ad quæ repelluntur succi, magis repleantur, ac distendantur, ita enim oppressa earum partium potentia ad expellendum insurgit, & fluxionis est causa. Omitto, quòd à frigiditate repellentium malam qualitatem contrahunt, qua partibus sunt infesti, & idcirco irritatæ partes, quod infestat, aliò transmittunt. Quæ autem repellunt, aut extrinsecus occurrunt, & hæc succos à circumferentia ad centrum commovent; aut ingeruntur, ut quando copiosè potantur gelida, & hæc ab iis intimis partibus propellunt, ad quas vis frigiditatis pervenit. Mora in sole, balneum calentis aquæ, immodicus motus animi, & corporis, mora in aere calido, ut in æstuariis, vendi calidi, meri potio, aromata, acria, & mordacia ingesta, calefaciendo, fundendo liquando, & attenuando succos, qua ratione fit, ut magis repleant, ac distendant partes, & mala qualitate infestent,



*An à seipsis  
moveantur  
succis.*

fluxiones excitant. Quocirca licet concludere non sine mittente parte has fluxiones fieri; aliqua forsan humores movebunt, at fluxionem citra partium actionem non concitabunt; aliud est enim succos movere, aliud fluxionem. Minus credibile est; revera à seipsis humores ad motum insurgere: quomodo enim à seipso moveri potest, quod prorsus inanimatum est, nec dividi potest in partem moventem, & partem motam? Sed cum dicatur id contingere, quando fervent, extenuantur, & in spiritum vertuntur, manifestum est, motionis causam in partem, in qua continentur, referendam esse, tales enim redditaeam opprimunt, & irritant, sed prætereà, & fluxiles facti ad motum sunt faciliores. Dicuntur tamen à seipsis ad motum insurgere, quoniam hujusmodi motus valdè inordinati sunt, & incompoti, ut nihil ad eos natura facere videatur. Exemplo sit materia, quæ à vulgo Medicorum turgens appellatur, quæ effrenata, & veluti furiosa huc, illuc inordinatè movetur, ut propter sui malitiam videatur à seipsa adeò variis, & inordinatis motibus cieri, cum tamen hujusmodi motus ab ipsa natura partium fiant, dum omnes pravitatem materiæ abhorrentes eam nequaquam admittunt, sed vix accedentem expellunt.

*Mediata  
fluxionis  
causæ.*

Ex his liquidò constat, quæ possint esse fluxionis occasiones, & causæ, nam partis recipientis ratione, quæ aliquam inferunt parti imbecillitatem, & quæ temperamentum ejus evertunt, & substantiam laxant, & quæ dolorem promovent, aut calorem accendunt, & quæ eandem exhauriunt, ea omnia poterunt dici fluxionis causa. Et propterea frictions asperæ, dolorosæ deligationes, calefacientia, sive per se id faciant, sive per accidens, sanguinis profluvia, & omnia, dolorifica, sive natura sua sint talia, sive in respectu ad partem, cujusmodi sunt incongruus situs, & incompotus motus, & alia contrectatio dolentis partis, & ejusdem oppressio ab aliquo pondere, atque adstrictio medicamento comparata, & alia id genus possunt humorum fluxum commovere. At ratione viarum, per quas fit fluxio, quæ illas reddere ampliores, ac laxiores valent, ut ambientis caliditas, balneum calentis aquæ, inunctiones digerentes, & laxantes, frictions, & hujusmodi. Ratione verò mittentium partium, quæ sunt in causa,

ut



ut corpus totum, vel pars aliqua uno, vel pluribus succis scateat, ita ut ob quantitatem, vel qualitatem ejusmodi materiæ incitetur expultrix ad expellendum, vel ut qui præerant vim recipiant irritandi. Et ideò improba victus ratio ad id maximè confert, tum materiam suppeditando pro generatione multi, & pravi succi, tum etiam, dum est in causa, ut præexistens inficiatur, seu malam qualitatem contrahat. Flatus pariter frigidi, & frigidum extrinsecus obvians, præsertim postquam ex laboribus, aut mora in ambiente calido quis fuerit excalesfactus, repellendo, seu exprimendo succos, ut communi utar loquendi formula, faciunt, ut partes iis ptximæ, ad quas vis refrigerationis pertingit, vel remotiores etiam nimis repleantur, ac distendantur. Flatus similiter calidi, & mora in ambiente calido succos calefaciendo, attenuando, ac fundendo, idem præstant, siquidem attenuati succi majorem locum occupant, & vasa magis distendunt. Ex parte verò confluentis materiæ quæ ipsam calefaciendi, attenuandi, liquandi, & fluxilem reddendi vim habent, ut corporis, animique motus immodicus occurfus calefaciendis corporis, vini præsertim meratoris potus uberior, usus aromatum, & acrium, & hujusmodi. Eadem ratione situs declivis recipientis corporis occasionem præbet fluxioni, eò quòd à proprio pondere succi ferantur in decliviorum locum. Tot sunt fluxionis causæ, quarum vis tamen respectu subjecti est dijudicanda, levis enim causa, si secundum seipsam consideretur, alicui adveniens, in quo aliæ sunt fluxionis occasiones, & causæ, fluxionem facile promovebit, aut adaugebit, sicuti unica alii comestio, & unica meri potio in graviter vulnerato. Et ubi plures concurrunt causæ atque fortiores, tanto magis de fluxione timendum est.

Hæc si diligenter expendamus, facile patebit veritas ejus, quod ab initio proposuimus, videlicet per vulnera partes reddi fluxionibus obnoxias. neque enim unico nomine hoc præstant vulnera. *Cur pars vulnerata sit obnoxia fluxionibus.* Primò quidem pars vulnerata ob unum ipsum vulnus à quo proprium temperamentum evertitur, imbecillior facta aliundè transmissos succos facile admittit, & ab ejus imbecillitate possunt robustiores partes ansam arripere, sese in eandem exonerandi, & eò magis, quòd vulnus majus extiterit, quia & imbecillitas est major.

Accidit



Accidit secundo loco dolor, neque tantum ex vulnerante causa, sed quoniam partes proprio, & naturali tegumento destitutæ ex qualibet, vel levi causa irritantur, ac dolent. Tertiò sanguinis fluxus accidit sectis, aut laceratis vasis, & consecutione quadam movetur sanguis à suprapositis partibus ad vulneratam, ut subeat locum ejus, quod effluxit, & à spiritibus etiam pulsus, & eò magis ad eam sanguinis motus convertitur, quod ex hac succorum commotione molestiam quandam persentiunt aliæ partes, & proindè irritatæ ad id, quod infestat expellendum insurgunt. Tandem & ex continui solutione, & sanguinis, ac spirituum effusione, & aeris occurso, quem antea solutæ partes non fuerunt expertæ, molestia infertur non solum vulneratæ parti, sed & reliquis partibus; omnia enim in corpore sunt sibimet consentientia, atque succi irritantis subeunt speciem; Ut igitur natura rem contristantem expellat, dum vehementius nititur, spiritus, & sanguinem ad affectam simul exprimit. Has itaque fluxionis causas in vulnerato statim ab initio manifestè intuemur, quibus si altera, vel plures accesserint, longè magis augebitur fluxionis periculum, ut si ambientis injuriis exponatur pars vulnerata, ejus enim ratione calor naturalis languidior redditur, & pars fit imbecillior, & fluxioni magis exposita, aut nova doloris causa acciderit, ut intempestivus, & incongruus motus, ineptus situs, contractio aspera, pharmacum aliquod mordax; aut si quis partem nimis excalefecerit, aut ipse vulneratus ita luerit percitus; quæ quidem frequenter evenire conspiciamus. Urgebit adhuc magis fluxionis periculum, si præstita occasio fuerit generationi multorum, & pravorum succorum, vel ut jam geniti attenuentur, fundantur, aut aliud vitium contrahant; hæc autem à minùs proba victus ratione potissimum expectare oportet; si corpus fuerit plethoricum, aut cacochymum, jam plures fluxionis causæ præter communes, & eæ potissimæ in eo concurrunt, & propterea in hujusmodi corporibus facilè admodum contingunt fluxiones. Hæc satis sint de fluxione, quæ in inflammationem partis terminatur, nisi cohibeatur.

Est alius fluxionis modus, qui non in inflammationem, sed in excrementa desinit, eo quod humores supervacui non confertim, & cum



& cum impetu, seu motu concitato, sed paulatim moveantur, quo fit, ne prorsus opprimant potentiam partis, sed tantum redatur vulnus pluribus excrementis scatens. Oritur autem id fluxionis genus, toto corpore, vel parte aliqua propria excrementa in vulneratam deponente, sumpta occasione ab illius imbecillitate. Hæc est fluxio, quæ vulnerum curationem protrahit, facitque ut in ulcera degenerent, neque fieri consuevit, nisi in curationis progressu. Talis est vulneratæ partis status, cujus ratione innumeris periculis expositi sunt vulnerati, de quibus alias.

## CAPUT XII.

*De Signis Vulnerum.*

**N**on satis est ad vulnerum curationem nosse vulnus esse talem continui solutionem, qualis superius descripta est, & ex ea congruas indicationes depromere, sed cum in particularibus operetur Medicus, necessarium est insuper, ut universale particulari subiecto possit adaptare, determinatam vulneris essentiam in quolibet obvio cognoscere. Et propterea cum propositum sit non solum universalem viam tradere curandi vulnera, verum etiam explicare, quomodo in particularibus quivis eam exerceat, operæ pretium est notas proponere, quibus omnis vulneris differentia in quolibet subiecto dignoscatur. Est quidem vulnus, ut talis continui solutio, ex sui natura conspicuum, ideòque nec signis indiget, quibus ostendat, nisi ex accidenti ipsum latere contingat; At qua in parte consistat, & quæ partes oblædantur, quod ad specificam essentiam ipsius intelligendam requiritur, non semper sensibus patet, non enim semper manifestum est, quando nervos, aut ligamenta, aut tendines, aut ossa oblædat, minùs etiam, quando aliquod viscus: & ideò in hac generali vulnerum tractatione videndum est, quibus signis haberi possit, quando hæc, vel illa pars sit vulnerata, vel aliter à vulnerante causa malè affecta, idque sensibus haud licet percipere: quæ etiam erunt eadem, quibus latius vulnus cognoscitur. Peculiaria verò signa, quibus partium vulnera manifesta fiunt, afferentur, cum de partium vulneribus erit sermo.



*Ex quibus innotescat pars vulnerata, quando non est conspicua.* Sicuti ergo pars affecta alias cognoscitur ab actione læsa, cuius vicem subit usus, quando pars actione peculiari careat; excretisque, dum eorum substantia, quantitas, qualitas, locusque per quem excernuntur, & excernendi modus consideratur, dolore, situque aut doloris, aut tumoris, si hæc adfuerint, aut cuiuspiam alterius, & propriis accidentibus: ita hæc eadem observando laborandum nobis est, ut in vulneratæ partis latentis cognitionem deveniamus.

*Actio læsa.* Plurimum quidem ad affectam partem inveniendam actio læsa conducit, fieri enim haud potest, ut vulnerata sit pars aliqua, & ejus actio non sit aliquo modo læsa. Sic vulnerato diaphragmate, læditur respiratio, vulnerato cerebro, læ-

*Usus oblatus.* duntur principes functiones, & sic de reliquis. Usus & ipse læsus non leviter confert, namque si à vulnere pars quæpiam sensum, & motum amittat, unde ejus ratione usum illius partis læsum deprehendimus, cujus est sensitivam, ac notivam qualitatem ad partem illam deferre, protinus affectos nervos judicamus, quorum est ille usus.

*Excreta.* Verum, quoniam non semper statim à vulnere conspicua fit actionis læsio, & non rarò etiam per consensum læditur actio partis, in qua non est vulnus, quod & de usu dicendum est, ad alia signa confugere cogimur. Excreta itaque per vulnus oportet considerare, situm vulneris, & accidentia consequentia: & in excretis quinque alia superius commemorata perpendenda erunt. Substantia quidem excreti monstrat, quæ pars sit vulnerata, eò quod excretum vel sit de illius substantia, vel in ea contineatur, aut ei hæreat. Sic si urina per vulnus exeat, vesica est vulnerata; si ster- cus, intestina crassa; si chylus, intestina tenuia; si ingesta edulia, ventriculus; Si sanguinis copia vel vena magna, vel arteria: Sed an à vena, vel ab arteria exeat, modus, quo egreditur, patefaciet, nam si ab arteria, quoniam pulsat, saliendo egredietur, à vena autem nequaquam. Qualitates quoque egredientis sanguinis idem poterit commonstrare: nam color ejus, qui ab arteria fertur, magis rubicundus est, atque ad flavum vergens, tenuior, ac ferventior, crassior verò qui à vena, & magis obscurus, ac minus fervens. Locus, per quem fit excretio, non mediocriter confert ad inveniendam partem vulneratam, nam si per anum sanguis exeat,



exeat, vulnerato abdomine, indicatur intestinorum vulnus, sanguis enim per anum exiens non ab hæmorrhoidibus, sed occasione vulneris, aliunde provenire non potest, quàm à solutis intestinorum venis à vulnerante causa.

Sed excernendi modus semper est considerandus; idem enim per eandem partem excerni potest à pluribus partibus, quarum distinctionem excernendi modus patefacit. Sic per os sanguis excernitur, & à ventriculo, & à partibus spiritalibus, & à capite etiam, sed à ventriculo vomitū rejicitur, à pulmone verò cum valida tussi, cum leviori à trachea arteria; absque tussi, sed sola excretionem à capite, quandoque etiam cum aliqua tussi, sicuti & à cavitate thoracis cum valida tussi educitur illæsis pulmonibus; unde, ut certior sit cognitio, qualitas sanguinis est consideranda; namque à thorace prodiens ater, & grumofus est, à pulmonibus rubicundus, & spumofus, à capite pariter sæpiùs nigricans est, atque grumofus, tussis tamen semper est levis. Advertendum autem non semper ab excretis indicari primariò affectam sedem, sed sæpè secundariò adjunctoque discursu: non enim expuitio sanguinis cum tussi est proprium signum vulneris pulmonis, cum & hujusmodi fiat expuitio ex erosione, vel aperitione osculi, vel disruptione venæ in thorace, vel pulmone, sed ex tali expuitione arguitur consequentia quadam vulneratum esse pulmonem. Cum enim à vulnere thoraci inflictò contigerit, nec alia fuerit prægressa causa, quæ vas in pulmone diruperit, aut ejus osculum aperuerit, & vulnus sit in promptu, conjicimus id ex vulnere ortum habuisse, quia pulmo videlicet fuerit vulneratus: pariter, si per anum sanguis excernatur, non est proprium signum vulnerum intestinorum, sed tamen ex eo adhibito discursu elicimus vulnerata fuisse intestina; cum enim vulnus sit in abdomine, & ab inflictò vulnere contigerit sanguinolenta excretio, neque alia præcesserit hujusque excretionis causa, in vulnus referendum esse non dubitamus, posteaquam à vulnerato abdomine non potest excerni per anum sanguis, nisi tota intestinorum substantia sit discissa.

Situs vulneris maximam vim habet indicandi vulneratam partem, una tamen cum aliis, per se enim plerumque parum ad cognitionem facit, quando quidem si vulnus sit in abdomine, atque

*Situs.*



etiam in ejus cavitatem penetret, non ob id dicendum est intestina esse vulnerata, nisi adsit signum quoddam proprium. Scimus in hypochondrio dextro ad nothas costas collocatum esse hepar; verum, licet vulnus ibi fuerit inflictum, atque cavitatem permeet, non est dicendum telum ad jecur pervenisse, nisi quoddam signum ex propriis simul adfuerit. Est ergo situs vulneris signum quoddam commune, quod unà cum proptio, quamvis proprium sit ex iis, quæ non soli competunt, certò affectam sedem ostendit. In arte tamen secandi corpora oportet exercitatum esse illum, qui ex situ vulneratam partem vult deprehendere.

*Accidentia  
consequen-  
tia.*

Accidentia consequentia diligenter observari debent; sunt enim potissima, præsertim si addatur consideratio situs, si enim vulnus sit in abdominis medio, neque chyli egressum potuerimus observare, pulsusque prostratio, & animi deliquium fuerint subsequuta, aut bilis vomitus, aut etiam æruginosus, faciesque talis apparuerit; qualis ab Hippocrate primo Præfagiorum describitur, intestina tenuia fuisse vulnerata non dubitabimus. Si in artus vulnus inciderit, ac sævi dolores supervenerint, nervos convulneratos suspicabimur. Sed de propriis accidentibus vulnerum cujusque latentis partis suo loco pertractabimus.

### CAPUT XIII.

#### *De Vulnerum Præfagiis in genere.*

**D**UO sunt, quæ in medicina facienda Medico proposita esse debent: unum est, ut ægrotantis saluti consulat: alterum, ut propriæ famæ, ac existimationis rationem habeat. Saluti ægrotantis consulat congrua præfidia ex arte administrando: propriæ

*Medicus* verò existimationi pluribus quidem modis, sed potissimum quæ *futura prædicendo pro-* futura sunt prædicendo; ita enim meritò admirationi fuerit, ut *pria existimationis con-* dicebat Hipp. primo. Præfag. & ægrotantium res probè cognoscere existimabitur; & si quid mali, vel etiam mors subsequatur, non ejus errori, quod non levem notam inureret, sed morbi naturæ ascribetur. *sulit.*

*Medicus* Quin & hoc in ægrotantis salutem cedit, præ- *futura præ-* videns enim futura Medicus, & ex multo tempore antea consilium



lium adhibens, ut ibidem dicebat Hippocrates, ad singula, poterit nonnunquam futura mala avertere, vel saltem longè minora reddere: sicque quos superstites manere possibile est, eos adhuc magis rectè conservare poterit. Propterea non satis est ei, qui vulnerum curationem profitetur, congrua præsidia excogitare, sed insuper, quæ futura sunt, necessarium est prænoscere, atque prædicere, & adhuc magis, si vulnerum curationem novo hoc modo instituere delegerit: vulgus enim res ex eventu dijudicans, posteaquam fieri non potest, ut omnes vulnerati ad sanitatem perducantur, in curationis modum rejiceret, quod naturam vulneris necessariò consequitur. Unde non satis laudari potest consilium Celsi, quod lib. 5. suæ Medicinæ cap. 26. his verbis obtulit: In his autem (de vulneribus loquebatur) ante omnia scire Medicus debet, quæ insanabilia sint, quæ difficilem curationem habeant, quæ promptiorem; est enim prudentis hominis primùm eum, qui servari non potest, non attingere, nec subire speciem ejus ut occisi, quem fors ipsius peremit: deinde ubi gravis metus sine certa tamen desperatione est, indicare necessariis periclitantis in difficili rem esse, ne si victa ars malo fuerit, vel ignorasse, vel fefellisse se videatur. Hisce de causis antequam vulnerum curationem pertractarem, æquum visum est de præfagiendi in ipsis ratione sermonem habere.

In primis igitur, quoniam non sanatur vulnus, ut & plebi ipsi notum est, nisi mediante unione solutarum partium, prænoscatur oportet, num partes omnes similes ex sui natura unionem admittant, sitque idem in omnibus unionis modus; numque omnes ejusmodi sint, ut si portio substantiæ ipsarum fuerit deperdita, regenerari possit: norunt enim omnes organicam partem, si fuerit abscissa, & materiæ, & formatricis defectu regenerari non posse, sicuti neque coalescere, quæ penitus abscissa est, ut in qua principium vitæ non reperitur: qua ratione dicebat Gal. lib. Art. med. cap. 9. unionem in partibus organicis esse impossibilem. Hæc enim si præsciverit, quodcunque sibi obtulerit vulnus, ipso diligenter inspecto, prævidere, ac prædicere poterit, quæ unio in discissis partibus sit expectanda, atque ita assistentibus satisfacere, qui non ignorantes vulneris sanationem perfici per unionem solu-

*videns re-  
bus agro-  
tantis con-  
sulit.*

*Quæ sint  
prænoscenda  
primum.*



tarum partium, atque per regenerationem substantiæ, quæ deficit, vel ejus loco alterius cujuscumque, sæpè sciscitantur, videntes, e. g. venam, aut arteriam dissectam, vel nervum, vel os, aut portionem cutis, vel carnis, aut nervi, vel ossis esse deperditam, futurum ne sit, ut coalescant divisiæ partes, & quis sit conjunctionis modus, possitque, quod ex substantia deperditum est regenari. Nec incautus decipietur, quod futurum non est expectans, aut id assequi contendens, quod fieri nequaquam potest.

*Secundum.* Prænoscatur secundò oportet, atque prædicatur, num oblatum vulnus sanabile sit, vel insanabile; & si sanabile, num facilis & prompta, an difficilis futura sit ejus curatio, & an inculpata sanitas sit expectanda, an potius cum alicujus functionis dispendio; non pauci enim ex artuum vulneribus in reliquum vitæ manci sunt redditi; & ex cerebri vulneribus alii muti, alii immemores facti, alii etiam fatui.

*Tertium.* Insuper brevi nè, an longum post tempus futura sit sanitas. Si vero insanabile, num ad mortem sit terminandum, an ad ulcus incurabile: & si ad mortem, quando, & quomodo sit sequutura.

*Utilitates* Hac ratione deploratis auxiliares manus denegare poterit, nisi alii  
*provenientes* ter suaserit Christiana pietas, posteaquam, ut admonebat Celsus,  
*ex præco-* non est attingendus, qui servari non potest ne occasionem mortis  
*gnitione.* illi dedisse videamur, quem fors ipsius peremit? eorum verò, qui in periculo sunt constituti sine certa tamen desperatione, cum cautione, ut infamiae periculum fugiat, curam suscipiat. Necessariis quoque vulnerati, quid de ipso futurum sit scire cupientibus, vel exposcentibus, licebit, quis sit rei status, & quæ sanitas sperari possit, indicare. Nec in tractandis vulneratis assidue sollicitabitur animus, quòd iis evenire solet, qui haud probè tenent, quid, & quando sit timendum; unde vel hæsitant, & timent, atque anxii sunt plusquam par sit, ubi timendum non esset; vel nimis sunt audaces, ubi etiam timendum foret? utrumque enim, ut dicebat Hippocr. in lege, est imperitiæ soboles; nam timiditas impotentiam arguit, ut ibidem assererat, quæ ab ignorantia puræ negationis provenit: audacia verò eam artis ignorantiam, quæ pravæ existimationis dicitur.

*Postremum.* Prævideat tandem oportet, atque prædicat futuras permutationes



tiones in vulneribus, five ad bonum tendant, five ad malum, futuraque symptomata: sic enim futuris malis ire obviam poterit, contra ipsorum causas acriter pugnando, & si quid adversi prohibere in ejus potestate non fuerit, suspicionem saltem omnem, atque calumniam effugiet, omnesque intelligent sibi satis perspectum esse vulnerati statum cum nihil ipso incerto contigerit.

## CAPUT XIV.

*Quæ unio in solutis partibus sit speranda, & in quibus deperdita substantia regeneratio sit expectanda.*

**A**B eo igitur, quod primo loco propositum est, exordium sumamus. *Partes omnes ex sui natura uniri posse censendum est; experientia enim constat, & ossa, & carnem uniri, quod si quæ durissimæ sunt, ac siccissimæ uniuntur, & pariter quæ molissimæ, intermediæ & ipsas sui natura uniri posse necessatio inferendum est.* Unde neque hepatis substantia, neque cordis sui natura unionem refugit, & ad sanitatem perduceretur cordis vulnus, nisi quid aliud obstaret, ideò Gal. 5. Loc. af. 6. dicebat: Si verò in cordis substantia vulnus consistat, ex ita affectis aliqui non solum eadem die, quæ vulnerati sunt, sed sequenti quoque nocte vivere potuere, qui inflammationis ratione extincti sunt. Sui autem natura dixi, quoniam ob aliam rationem accidit multoties unionem impediri; potest enim eam interpellare actio partis, ususque, ac situs, & substantiæ tenuitas; item quid intra uniendas partes existens, & superveniens pravus affectus. *Quæ unio- nem impe- diant.* Actionem, situm, & usum proposuit Gal. 3. Meth. 1. Tenuitatem autem substantiæ 6. Aph. 18. Quod labris jungendis intercedit lib. Art. med. cap. 90. recensens enim, quæ Medico agenda sunt, ut unio rectè succedat, tertio loco, dicebat, cavere opus est, ne quid labris ulceris intersidat. Supervenientem pravam affectum 3. Meth. 4. his verbis: Hæc si feceris, fueritque ulcus solum citra vitiosum succum, aut temperiem, aut phlegmonem, aut aliud quodlibet vitium, procul dubio coibit.

Quantum possit actio ad unionem impediendam dissecta ar- *Actio quo- modo unio- neria sit obster.*



teria demonstrat, quæ ob pulsationem uniri non potest, efficit enim motus, ut agglutinanda ora distent, quæ ad mutuum contactum adducta esse, atque ita permanere necesse est, si sint unienda. Quod si fortè citra dispendium intercipi posset actio illa, ut nonnunquam usu evenit; nec aliud impedimento esset dissitarum partium unio procul dubio sequeretur. Arteriam enim in brachio graviter sauciatam coaluisse observatum est, intercepto ipsius arteriæ motu, quæ antea nullis præsiidiis uniri potuerat. Propter

*Usus.*

*Situs partis.*

usum vesica usque ad cavitatem dissecta, si effatu digna sit divisio, non coalescit; nam urina quam continet, assiduò discissas partes alluens, ne uniantur prohibet. Et bilis, quam jejunum intestinum recipit, in causa est, ne, si vulneretur, discissæ partes coeant. Situs partis unioni sæpè reluctatur: agglutinanda siquidem labra proxima esse debent, unde cum discissæ partes distantes sint, ut ad mutuum contactum reducantur, necesse est; quod ob situm sæpè non assequimur, eò quòd pars manualementem operationem refugiat. Hinc est, quòd intestinorum vulnera, nisi excidant, rarò agglutinantur, præsertim si per transversum fuerint dissecta; intra cavitatem enim abdominis contenta manualementem operationem refugiant. Et omninò distantes partes quandiu distant uniri non possunt: quare si ipsarum adductio qua de causa fieri nequeat, spes agglutinationis nulla remanet. Tenuitas substantiæ non semper unionem impedit, sed tunc tantum, quando substantia illius partis est exanguis; cum enim exanguis sit, ac tenuis, non potest tantum sanguinis ad ora vulneris ferri, quantum ad unionem requiritur. Hinc Gal. 6. Aph. 18. Quòd verò partes ipsæ divisæ agglutinari non possint, in corde quidem, ac septo transverso ex jugi eorum motu contingit, in vesica autem, quia nervosa, tenuis, & exanguis. Tollitur tamen hoc impedimentum, quando tenui membranæ subest pars, ex qua pullulare possit caro, & propterea vesica ad ligamenta, quibus dorso adnectitur, vulnerata, nisi ampla nimis sit dissectio, solet coalescere. Substantiæ tenuitas hac etiam ratione coalitum impedit, quod dissidentia labia rectè adduci non possunt.

*Quid interpositum inter labia.*

Quid agglutinandis labiis interponitur, quando unionem prohibeat, satis, superque notum est: & hoc quidem non solum est quid



quid extrinsecus occurrens, ut pilus, oleum, telum, & hujusmodi, verum etiam aliquid intra uniendas partes genitum, ut sanguis. Tandem adnexus pravus affectus unionem prohibet, quod si est, niam aut est partis intemperies, aut quid partis temperiem, cujus est unionem perficere, destruens; vel materiam, qua mediante fieri coalitus debet, vitians. Unde non immerito dicebat Gal. Fueritque ulcus citra vitiosum succum, aut fluxionem, aut intemperiem, aut phlegmonem, aut aliud quodlibet vitium, procul dubio coribit. Si igitur partes non coalescant, quodpiam ex his erit in causa, cum sui natura uniri omnes possint.

Veruntamen non est idem in omnibus unionis modus, alia *Quot modis* siquidem vera unione, quæ est per medium ejusdem generis, non *uniantur* alterius substantiæ interventu coalescunt, namque ex nutrimento *partes.* in extremitatibus vasorum divisarum partium existente, & à poris resudante, generatur portio quædam substantiæ parti agglutinanda similis, quæ est gluten solutæ partes conjungens, & ad pristinam unionem reducens: alia verò medio extraneo, & heterogeneo connectuntur, eò quod substantia solutæ parti similis generari nequeat, unde Gal. 3. Meth. 4. duplicem hunc divisarum partium coalitum his verbis tradidit; Porro bifariam simul manent, quæ commissa sunt, cum alia per se, alia ope aliorum maneat; per se quidem, quæcunque secum concreſcunt, ac coalescunt, aliorum ope, & quæ colligantur, & quæ glutino aliquo tenentur. Unionem priorem communiter appellant Medici secundum primam intentionem, quoniam talis unio à Medico principaliter intenditur; vellet enim partes omnes per se, & medio homogeneo, ac simili coalescere: alteram verò secundum intentionem secundam, quoniam cum non semper possibilis sit prior unio, hæc ab eò secundario quæritur. Et hanc appellationem à Gal. desumpserunt lib. Art. med. c. 91. ubi fracturam ossis, quantum ad primam intentionem (*κατὰ πρῶτον σκοπὸν* Græcè) insanabilem esse asserit; quantum verò ad secundam (*κατὰ δεύτερον* Græcè) quodammodo sanabilem. Quæ igitur partes vera unione coalescant, & quæ non vera coeant, ipsarum natura docebit, licet enim, & per experientiam, ut asserit Gal. 3. Meth. 1. haberi id possint, quia tamen huic longo usu est opus melius est ex rei natura id investigare.



*Partes vere conglutinandæ cuius naturæ sint.*

*Mollities.*

*Materia copiosa.*

*Facilitatis robur.*

Natura igitur partium hoc ostendet ; quoniam quæ verè sunt conglutinandæ , molles sint oportet , humidum enim continuationis est causa , siccæ verò , & duræ ob humidi defectum verum coalitum non admittunt , sed extraneo medio indigent , quo connectantur sejunctæ ipsarum partes. Unde Gal. 3. Meth. 4. Quæ concresecunt , mollia sint naturaliter oportet , talis sanè est tum caro ipsa , tum quæ ex carne consistunt , quæcunque verò dura , siccaque sunt , eorum divisæ partes coire simul nequeunt , sed glutinum aliquod vinculumve , quo commissa maneant , requirunt. Et 6. Meth. 5. Quòd igitur coalescere nequeat tam durum os , quàm id , quod in juvenibus & adolescentibus , & viris , multòque magis in senibus cernitur , id profectò , vel cuivis patere potest ; potest certè illud tantum unionem recipere , quod abundè molle est , cuiusmodi aspicitur in puerulis ; quòd autem alia quæpiam interveniente substantia , seu glutino quodam agglutinari , colligarique secum separatæ fracti ossis particulæ queant , hinc maximè speret quispiam , &c. Præterea , quæ juxtà primum scopum coalescere debent , ex tali materia constitutæ sint oportet , quæ solutionis tempore præsto esse possit , nec deficiat pro novæ substantiæ generatione. Non enim satis est subesse materiam pro nutritione , & incremento , si adhuc augeatur corpus , cum insuper nova substantia pro glutine divisarum partium requiratur , ac tandem , ut valida facultate , copiosoque calore sint præditæ , quoad novam formationem sufficiat : si quidem facultas in partibus divisis existens , ut dicebat Gal. 1. de sem. c. 13. Opifex est ejus substantiæ , quæ innascitur. Materiæ largæ , & copiosæ necessitatem proposuit Gal. 1. de sem. c. 11. eandemque una cum agentis robore eodem c. 13. In quibus ergo partibus aliquid horum deficit , non est , cur veram agglutinationem speremus. In carnosissimis nullum ex his desiderari manifestum est ; molles enim sunt , calore abundant , & ex consequenti validam facultatem obtinent , & ex sanguine constant , qui copiosus in corpore reperitur ; ex quo , quia admodum affinis est naturæ carnis , levissimè mutatio caro concresecit ; qua de causa dicebat Gal. 1. de sem. c. 12. facillimum esse sanguini carnem fieri. Hinc fit , ut quolibet tempore vera unio perfici in ipsis possit , nisi quid aliud impediat.

Immo



Immo & si quid ex earum substantia deperdatur, haud multo negotio propter dictas causas regeneratur. Unde Gal. 1. de sem. c. 11. Quæ ex sanguine generata sunt, si corrumpantur, quandoque facile rursus generantur, ut quæ materiam generationis largam habeant.

De spermaticis autem partibus est non levis controversia; videtur enim nonnullis, & qui etiam magni sunt nominis, non solum ex sui natura vera unione posse coalescere seminales partes, verum etiam si portio earum deperdatur, iterum posse generari, siquidem dicunt, & materia idonea adest, & agens, igitur & uniri, & regenerari possunt. *An seminales partes possint regenerari, & uniri.* Quod verò adsit materia, ex eo colligunt; quod usque ad vitæ extremum proprio alimento nutriuntur partes, & ex iisdem nutrimur, ex quibus sumus. quæ de causa in Hippoc. & Gal. doctrina, ut 14. de Usu partium, est videre, necnon & primo de sem. c. 12. Partes omnes spermaticæ vim habent seminis generativam, ex quo necesse est, ut nutriantur, sicut ex illo sunt constitutæ. Hinc Gal. 1. de sem. 12. Nequaquam igitur unaquæque primarum partium animalis à principio quidem ex semine nata esse videtur, aliud autem esse ipsarum ultimum, & familiarissimum alimentum. Et rursus: Nutritio partes generat eorum, quæ nutriuntur, similes, sed non ex alia materia generatum est totum vas. ex alia nunc generantur ipsius partes. Si ergo unaquæque pars spermatica vim habeat semen generandi, ob materiæ defectum dicendum non est, quod neque agglutinentur, neque regenerentur. Non deesse autem efficiens, ex eo demonstrant, quod idem calidum, quod à principio partes efformavit, in iisdem, ut ex Galeno colligitur prima Aph. 15. post generationem permanet, ut easdem adaugeat, & usque ad mortem enutriat, atque conservet. Neque enim, dicebat Galenus 1. de sem. 11. reliquit natura animal, neque oblita est virium sibi insitarum: quas enim à nullo acquisivit, sed ex semine habet, eas impossibile est eam abjicere, undè inferiùs subjungebat: Itaque putas, quod arteriæ tunica, aut nervi corpus gubernantem ipsam facultatem non ampliùs habeat, talis substantiæ effectricem, qualem ipsum possidet? Atqui si quid aliud, & hoc naturis inest, ut sibi ipsis similia faciant. Quomodo namque aliàs nutrietur cor-



pus, si ejusmodi facultas non semper ipsi permaneret? Ex his inferunt, posse partes omnes sui natura non solum verè coalescere; verum etiam si quid ex eis deficiat, regenerari: neque duritiem, & siccitatem obstare, quia quantumcunque siccæ, & duræ sint, vivunt, & nutriuntur, & sic in sui naturam sanguinem mutant. Et sic hoc est, & ex his, quæ similia sunt, rationi consonum est, fieri posse non solum nutritionem, verum etiam regenerationem, ut in carne, & si quid siccitatis ratione interturbetur, non ad rem, sed ad tempus attinebit. Et quoniam experientia constat in adultis non fieri hujusmodi coalitum, atque regenerationem, causam potissimum hujus esse dicunt carnem, quæ interponitur, antequam vera generatio, aut agglutinatio fiat. Cum enim sanguis nimis absit a natura feminalium partium, & in semen vertendus sit, antequam in earum substantiam abeat, multis profectò transmutationibus indigebit, ut assimiletur; & propterea ægrè admodum ex eo fiet novæ alicujus substantiæ generatio; quemadmodum enim dicebat Gal. 1. de sem. 11. Non ex omni in omne similiter transmutationes fieri dicere licet, in id enim, quod naturæ ejus, quod transmutatur, propinquius est, facilis transmutatio est, & propterea sanguini facillimum est carnem fieri, difficillimum verò membranam, & nervum, & venam, & arteriam, & tunicam. Multo igitur tempore ad id opus erit, cum præsertim ex sanguine a partibus paulatim semen generetur, ideòque multum etiam temporis requiretur, ut sufficiens ejus quantitas coacervari possit. In hac ergo temporis mora carnem, cujus prompta est ex sanguine generatio, exoriri, interponique dicunt, quæ interposita, patet, fieri amplius non posse regenerationem deperditi. Galenumque adducunt, qui primo de sem. 13. hæc habet: Tantum enim nullibi acervatim contentum semen reperire licet, quando unumquodque eorum, quæ deperdita sunt, indiget ad generationem, quin & cum per multum tempus coacervari possit, à præoccupante carnis generatione impeditur. Quòd etiam regenerentur feminales partes, ex eo persuadere insuper conantur, quòd ulcera cava carne implentur, etiam si multa carnis quantitas deficiat, quæ quidem aggenerata caro non minùs sentit, & nutritur, ac reliqua, ut fateri oporteat, & nervis, & venis, atque arteriis esse præditam; & ex  
confe-



consequenti has partes unà cum carne regenerari, & Galenum adducunt primo de sem. 13. quo in loco testatur Galenus, se observasse in ulceribus venas renatas, licet nunquam arteriam, & nervum. Dentes quoque, qui omnium consensu ex femine generationem habent, regenerari constat, igitur sui natura regenerari possunt spermaticæ partes, quamvis sæpius hæc generatio impediat. Quod si regenerari possunt, & per se suapte natura coalescere, tantò magis existimandum est, unde & Galenus sæpè observavit agglutinatas arterias, & in adultis, ut videre est 5. Meth. 7. & 14. Meth. 16.

## CAPUT XV.

*Quod seminales partes in adultis neque verè coeant, neque regenerentur.*

ET si apud nonnullos tanti sint momenti allatæ rationes, ut iis *Partes se-* penitus aquiescant; attamen si rem magis ad vivum refere- *minales,* mus, non solum non regenerari, sed neque perfectè agglutinari *nec regene-* posse facile apparebit. Quod quidem ex hoc licet conjicere: Cu- *rantur nec* tis cæteris spermaticis partibus mollior est, atque calidior, ut quæ *verè coales-* non ex femine solo, sed etiam ex sanguine constet, & tamen in *cunt.* dies observamus eam in adultis non solum non regenerari, qua ratione dicebat Gal. 3. Meth. 5. Cutis talis omninò, qualis erat, quæ periit, prorsus restitui non potest, sed simile quiddam cuti, & quod ejus vicem suppleat, potest, verum neque perfectè, & per medium homogeneous conglutinari, sed per heterogeneous, & extraneum solummodo, cicatricem scilicet, tantò minùs igitur cæteræ spermaticæ partes regenerabuntur, & coalescent. Quod enim cicatrix sit à natura cutis diversa, ejus densitas demonstrat, & illud etiam, quod in ea non oriuntur pili, unde Gal. 14. Meth. 16. Cicatrix verò, quæ in hac tali modo indurata gignitur, ea cuti quidem est quàm simillima, cutis tamen non est, quando, & densior ea visu, tactuque sentitur, & ratione, ex eo, quod pilos non edit, intelligitur. Neque mirum videri debet, posteaquam *Defectus* in omnibus materia deest, & efficiens: in plurimis etiam nimia *materia,* & *agentis non* siccitas



*regenerantur, neque coalescunt seminales partes, & propter siccitatem.*

siccitas obest, ob quas causas superius dicebamus partes neque regenerari, neque coalescere. Siccitas manifesta est in arteriis, nervis, ligamentis, membranis, & ossibus, qua ratione dicebat Gal. lib. Art. med. c. 91. Fractio est continuitatis in osse solutio, quæ quantum ad intentionem primam insanabilis existit, quò verò ad secundam, quodam modo sanabilis.

*Defectus materia, & agentis.*

Prima igitur intentio est coalitus partium, qui ob ossis duritiem fieri non potest. Et 6. Meth. 5. Quod igitur coalescere nequeat tam durum os quam id, quod in juvenibus, & adolescentibus, & viris, multòque magis in senibus, id profectò, vel cuivis patere potest. Et 5. Meth. 7. Siquidem arteriæ natura difficultatem quidem durioris tunicæ suæ conglutinandæ prorsus indicat, non tamen ejusmodi, quæ evincí omninò nequeat; neque enim ita sicca est, & dura, ut os, vel cartilago. Deesse verò in omnibus materiam, & efficiens negari non potest, licet enim calor, qui à principio partes efformavit, in iis usque ad mortem permaneat, nec propriis viribus sit destitutus (neque enim natura, dicebat Gal. 1. de sem. c. 11. reliquit animal, neque oblita est virium sibi insitarum. Et quomodo aliàs nutriretur corpus, si ejusmodi facultas non semper ipsi permaneret?) & sanguinis semper subsit copia, commune omnium partium alimentum, ex quo etiam ipsum semen generatur, attamen non est tantus, quantus erat, cum primò partes constituit, nec ea vi præditus, cum semper reddatur impurior, & propterea non est sufficiens ad novam generationem, seu fomationem; satis est, si possit partes nutrire, & augere in ætate augmastica, & omninò eas conservare. Sanguis verò non est immediatum alimentum seminalium partium, sed, ut ab adversariis quoque afferebatur, necesse est, ut prius semen fiat, vel semini simile, si ex eis nutrimur, ex quibus constamus; quare in substantiam seminalium partium non convertitur, nisi difficillimè, multisque transmutationibus mediantibus, ut notavit Gal. 1. de sem. 11. satisque materiæ præparabitur, si tanta fuerit, quanta sufficiat pro nutritione, & incremento, si augeatur corpus. Eoque magis cum præparatio hæc fiat à facultate nutriendæ partis, quæ solummodò ad nutritionem, & augmentum sufficit, nec uberiores materiam præparare potest, quàm pro dictis operibus requi-

ratur.

*Ex semine nutriuntur seminales partes.*



ratur. Quòd autem sufficiens materiæ quantitas possit coacervari, si efficiens desit, absurdum est dicere. Dato etiam quòd tanta seminalis materia possit congregari in loco deficientis partis, quanta sufficeret ad ejus restorationem, neque tamen ob id ex ipsa reficeretur quod deperditum est, eò quòd vi formatrice destitueretur: prolificum enim semen in membris generationi dicatis tantummodò gignitur, quod verò in spermaticis sit partibus pro earum nutritione non est prolificum, neque enim potest alterius esse naturæ, ac illud sit, ex quo constitutæ sunt ipsæ partes, quæ ex sola crassa portione feminis, non ex tenui, & spirituosâ, in quavis formativa recidet, suam habent generationem. Non ergo spiritus ille formationis auctor per totam illam materiam esset diffusus, quemadmodum erat à principio generationis, nam in materia, ex qua generandum os erat, residebat spiritus, qui ipsam elaborabat, & in ossis naturam transmutabat, & sic de reliquis seminalibus partibus: qua de re tunc facili negotio formabantur, & adhuc magis, quoniam eo tempore alter aderat opifex, ut dicebat Gal. 1. de sem. 13. facultas videlicet existens in uteri vasis, quibus allapsum est semen, sed ad naturalem calorem, seu implantatum spiritum ipsarum partium, quibus ad mensuram datus est, & ita ad facultatem, quæ extra ipsam materiam existit, elaboratio materiæ, ac formatio pertineret. Constat autem eam vim nunquam id munus expleturam, quod formator spiritus materiam totam penetrans. Omitto sine mulieris semine fieri conformationem non posse. Defectus hic ex parte agentis, cum non possit opifex efficaciter agere, est maxima consideratione dignus, & eum tetigit primo de sem. 11. cum diceret: In generatione verò animalis in utero larga erat materia, & adest sibi opifex alius, non solum tangens materiam, sed & per totam ipsam perambulans.

Neque tamen ob id rejiciendam censeo calli, carnisque interpositionem, namque & hæc per se prohibere regenerationem, & agglutinationem posset. *Interpositio calli, & carnis.* Cum enim sanguis multis egeat transformationibus, ut fiat nervus, aut membrana, vel os, eò quòd nimis ab istarum partium natura recedat, & prius in semen verti debeat, ob idque non possit hoc, nisi longo tempore consequi, eoque



edque magis, cum sensim generetur semen, quod futurum est substantia ipsarum partium, & tamen larga ejus debeat subesse copia, ne carnis generatio locum præoccupet, aut aliud quodpiam, ut vix longo temporis spatio coacervari sufficiens quantitas possit; in hac mora excrementum, quod ab alimento resultat, inter divisas partes sese interponit, & fit callus, vel generatur caro, quæ facilè ex sanguine concrevit, in id enim natura studet, ut quamprimùm repleatur vacuum, quod maximè abhorret, sicuti unionem maximè desiderat; palam autem est, ob interpositionem hanc, & regenerationem, & agglutinationem impediri, quæ de causa dicebat Gal. 1. de sem. 13. ut & adversarii animadverterunt; Tantum enim nullibi acervatim contentum semen reperire licet, quantum unumquodque eorum, quæ deperdita sunt, indiget ad generationem, quin & cum per multum tempus coacervari possit, à præoccupante carnis generatione impeditur. Quod verò ea sit potissima causa, cur neque regenerentur, neque perfectè uniantur seminales partes, ut quidam accipiunt, probare nunquam potui; Ossa enim fracta in adultis, & callo firmata, si diligenter conspiciantur in cadaveribus, comperientur extrinsecus solum callo esse circumalligata, in interiori verò parte minimè agglutinata, quamvis nec ibi callus reperiatur, ut in solis labiis fracturæ circumcirca sit alligatio, de quo nos admonuit Galenus primo de fract. com. 50. & sexta Aph. 19. dicens: Quod igitur neque cartilago, neque os generetur, est in confesso, an verò agglutinentur, nonnulli dubitant, inquiunt enim perspicuè videri ossa perfracta agglutinari. Hi verò aberrant, & doceri possunt in brutis, quorum pars aliqua fracta contraxerit callum; hæc enim seu viva, seu mortua si quis velit inspicere dissecando, videbit manifestè à callo quodam, veluti vinculo circumscripto, partes ossium discissas esse constrictas, quas si abraferint, fracturæ profundum videbunt non glutinatum, & propterea etiam libro Art. med. c. 91. dicebat: Secunda intentio (qua videlicet ossis fractio est quodammodò sanabilis) est alligatio, quæ fit callo superinato partes fractas circumalligante: At si calli interpositio est potissima causa, cur non agglutinentur verè ossa, in intima fracturæ parte, in qua non reperitur callus, longo saltem tempore perfectæ



perfecta unio fieri deberet, & tamen nunquam fit; referenda igitur potius causa est in materiæ inopiam, & agentis imbecillitatem, nec non & siccitatem. Tot igitur sunt, quæ in adultis spermaticarum partium regenerationi agglutinationique reluctantur, sed pro vera unione eam efficit natura, quæ est per medium heterogeneum, & per secundam intentionem, prout vulgo dicitur. Verum quidem est, cum ex partibus spermaticis aliæ sint molliores, aliæ verò sicciore, & aliæ ex solo semine consistant, aliæ verò etiam ex sanguine, prout molliores sunt, vel sicciore, & magis, vel minus de sanguine participant, medium illud, quod solutas partes conjungit, magis vel minus à natura illarum partium differre; hinc est, quod in cute non multum à natura cutis recedit, at in osse callus, qui fractas partes connectit, tantum abest à natura ossis, ut nec etiam sit pars vivens, sed merum excrementum, quamvis in duritie, & siccitate ossi non sit parum similis. Ferè autem in omnibus medium hoc heterogeneum eundem præstat usum, ac si homogeneous foret; cicatrice enim in cute inducta, ita subjectam carnem defendit, ac tegit cutis, ac si cicatrix illa vera cutis foret: & callus ossa fracta alligans æquè idonea ea reddit ad sustentandam, & fulciendam partem, ac si verum os esset: cicatrix venæ, vel arteriæ adeò sanguinem continet, ac propria venæ, vel arteriæ substantia. In nervis tamen, & ligamentis secus res se habet; medium enim, quod nervorum discissas partes conjungit, non admittit irradiationem qualitatis animalis à cerebro, & proindè resoluta semper manet pars illa, ad quam ferebatur nervus, quod etiam ligamenti partes connectit, non facit, ut ligamentum æquè ad motum conferat, ac prius; causa autem est, illic quidem crassities, & densitas medii illius heterogenei; in ligamento verò medium hoc ipsum alligat proximis partibus, ut ob id moveri pars ea, veluti prius, nequeat. Sed rarissima est in his partibus, & quæ ex illis constat, agglutinatio, etiam per heterogeneum medium, eò quod discissæ partes huc, illucque se recipiunt, & propter situm adduci ad mutuum contactum nequeunt, eoque minus, cum non sint consuendæ, ut suo loco demonstrabitur; & ita, cum distent, agglutinari non possunt, quam legem etiam subeunt venæ ipsæ, atque arteriæ, si penitus

*Medium heterogeneum uniens eundem præstat usum ac si foret homogeneous præterquam in nervis & ligamentis.*



dissecantur; protinus enim dissectæ partes in carnem se recipiunt, veluti notavit Gal. 5. Meth. 3. tota enim per transversum præcisa vena, dicebat, retrahitur ex utraque parte pars utraque. Hoc voluit Gal. 6. Aphor. 19. quando dicebat: Quæ nunc Hippocrates inquit non coalescere, non ob id tantum, quod nervosa sunt, & tenuia; sed quoniam etiam ex eo, quod talem habent materiam, labia vulneris non sunt parum distantia. Et profectò si committi adamussim possent dissecti nervi partes, sperarem in adultis etiam, mollioribus tamen, & efficaci calore præditis, agglutinationem per tale medium, quod licet heterogeneous, aliquam tamen irradiationem admitteret, & hoc experientia confirmat. Idem dicendum est de eo, quod loco deperditi in adultis regeneratur; in aliquibus enim partibus non admodum recedere videtur à natura deperditæ substantiæ, ut patet de cicatrice cutis: in aliis verò recedit quidem valde à natura ejus, quod perit, ut patet in eo, quod loco deperditi nervi, vel ligamenti, vel cartilaginis, vel ossis regeneratur. Sed tamen, & in accidentibus eidem non parum simile existit: callus enim, qui pro osse generatur, ossi in calore, siccitate, & duritie assimilatur. Prætereà in aliquibus eundem usum præstat, ut cicatrix, quæ cutis loco genita est; si enim, quod ad decorem attinet excipias, eundem habet usum, quem vera cutis, & propterea dicebat Gal. 3. Meth. 5. Cutis talis omninò, qualis erat, quæ perit, prorsus restitui non potest, sed simile quiddam cuti, & quod ejus officium suppleat, potest, & lib. Art. Med. c. 87. Licet tamen aliquando loco eorum alia facere, quæ usum hæud dissimilem præstent, quandoque etiam loco deperditæ venæ, si parva tamen fuerit, regeneratur corpus, non solum valdè similè, sed quod & ejus vicem, & officium suppleat, cujus similitudinem respiciens Gal. 14. Meth. dum loqueretur de iis, quæ loco eorum, quæ perierunt, generantur, ac de similitudine, quam habet cum iis, dicebat: Quòd autem venas quoque sensibiles regeneratas aliquando vidimus, prius dictum est, verum has non tam similes iis, quæ perierunt, quàm easdem renasci dixeris, veluti in cavis ulceribus carnem. Quamvis & de vera regeneratione venæ intellexisse Galenum nonnulli contendunt, id insuper ex eo elicientes primo de fem.



sem. 13. ubi hæc habet : Fortassis igitur dixerit quispiam magis durum, & obscurum nobis factum esse sermonem; si enim arteriæ, & venæ semen generare possunt, cur amputatis partibus ipsorum non aliàs pro ipsis producant? Duplex autem fuerit, & ad hoc responsio, altera quidem, quòd jam aliqui viderint venas in magnis ulceribus natas, quemadmodum & nos ipsi, tum juxta alias quasdam partes, tum juxta caput satis memorabiles, & multas, &c. voluntque Galen. quando 3. Meth. 7. dicebat, se vidisse in mulieribus, & pueris conglutinatas arterias, & in juvene etiam agresti, de verò coalitu intellexisse, qua de causa subjungebat : Arteriæ natura difficultatem quidem durioris tunicæ suæ conglutinandæ prorsus indicat, non tamen ejusmodi, quæ vinci omninò nequeat : neque enim ita sicca est, & dura, ut os, vel cartilago, immò longè his mollior, ac magis carnosa, quo utique minùs de unienda sectione ejus est desperandum, ubi tum ipsa sit parva, tum hominis corpus natura molle, quòd si agglutinari potest arteria, tanto magis coalescent partes, quæ arteria molliores sunt, & magis carnosæ. Idem confirmant ex Avicenna 4, quarti tractat. primo, capitulo primo, qui à Galeno desumens, concludit partes medias inter carnem, & cartilagine, ac ossa, veluti sunt venæ, arteriæ, & nervi, mediam quoque habere dispositionem, & ideo minùs quidem agglutinari, quàm carnem, magis vero, quam cartilagine, & ossa; ut si sectio sit minima, & parva, & corpus humidum, ac leve, agglutinari possint, nequaquam autem, si magna sit divisio, & corpus siccum, ac durum; quare & prima primi, doct. quinta, capitulo primo, dicebat. Membra autem, quæ ex spermate sunt creata, cum solutionem continuitatis patiuntur, certa continuitate non restaurantur, nisi pauca ex eis, & in paucis habitudinibus, & in ætate pueritiæ videlicet. Idque isti non esse præter rationem volunt, posteaquam neque rationi repugnat, reperiri talem corporis habitum, in quo saltem quorundam partium respectu, nec siccitas obstat, nec materia desit, nec opifex, eo quod efficaci adeo calore sit præditus, ut priusquam agglutinandis partibus aliquid extranei interponatur, vel deperditi loco quid aliud exoriatur, tam largam materiam præparare, ac efformare possit, quantam exigit agglutinatio, vel deperditi reparatio. Sic



igitur robustissima facultas, antequam caro in locum deficientis venæ subeat, copiosam materiam præparat, & ex ea substantiam venæ generat: hinc Gal. primo de sem. 13. Si itaque neque caro præoccupaverit, in osculo præcisæ venæ orbiculatim enascens, neque larga materia humoris destitueretur, poterit utique regenerari. Oportet igitur simul robustissimam reperiri in præcisis venis facultatem; hæc enim est opifex ejus, quæ innascitur: simul autem, & materiam seminariam tantam ut ne à præoccupante carne, quæ excrefcere solet, osculum claudatur. Sed quoniam huic determinationi obstare videbatur, quod rarissimè ab iis, qui viderunt renatas venas, hoc observatum est, nunquam alias seminales partes ipsa vena ficciores, subjungunt hujusmodi causam esse, quod corpora eo habitu prædita rarissima sunt, & idcirco rarissimè parvi venarum ramī regenerantur, reliquæ verò partes vena ficciores nunquam. Si enim in venis hoc ita rarò contingit, in reliquis subinde partibus, quæ minus ab offis natura distant, quam venæ ipsæ, regenerationem omninò fieri non posse asserendum est. Quod & Gal. voluit loco citato; reddens enim rationem, cur vena rarò visa sit regenerata, & reliquorum nullum, dicebat: Vas namque quod præexistenti venæ innutritur, non in omni corporis natura largam, & copiosam materiam ad generationem habet: & inferius. Rarissimè autem contingit ambo hæc simul in unum concurrere (robustissimam videlicet facultatem, & copiosam materiam) si igitur in vena, quæ simplicem, & tenuem habet tunicam rara est generatio, nihil utique mirum est in arteria, quæ sextuplam respectu venæ crassitiem habet, non rarum, sed impossibile esse generari; propterea quod & tantæ materiæ præparatio impossibilis extet. Hic autem, & singula alia, quæ ex semine generationem habent ob largæ materiæ penuriam rursus non nascuntur. Hæc est causa, dicunt cur Gal. loquens de agglutinatione, & regeneratione spermaticarum partium, absolute impossibilem haud pronuntiaverit, sed difficillimam solum, & ferè impossibilem; dicebat enim primo de sem. 11. Quæ verò ex semine generata sunt, aut nec prorsus, aut valde rarò generantur. & libro Art. Med. capit. 87. Deficientes partes, quæ ex semine ortum habuerunt corrigi propemodum impossibile existit.

Hæc



Hæc etsi spernenda minimè videantur, nihilominus adversæ *Seminales* rationes adeò urgent, ut in adultis neque veram agglutinationem, *partes neque* neque veram seminalium partium regenerationem sperandam esse *verè regene-* prorsus existimem; & si cutis neque verè agglutinari potest, neque *tantur, ne-* si deperdita sit reparari, veluti sensu ipso deprehendimus, sed ci- *que verè co-* catrice coit, & cicatrix cutis vice generatur cum tamen non ex *eunt.* solo semine, sed magna ex parte ex sanguine quoque sit constituta, quid sentiendum de reliquis seminalibus partibus, quæ aut ex solo semine, aut ex minori seminis portione fuerunt, conflatae? Equidem quamcunque agglutinationem à Galeno relatam non veram agglutinationem fuisse existimo, sed per medium heterogeneum. Et quod ad venas, quas renatas tradit satis memorabiles, & multas, non veras venas fuisse conjicio, sed quid venis simile. Sicuti enim censeo in adultis non regenerari deperditam venæ portionem, ita persuasum habeo, aliquid interdum fieri, quod simile sit venæ, atque officium ejus suppleat, Sanguis enim impetu quodam latus per venam, cujus portio deperdita est, progressu saltem temporis parat sibi viam per novam carnem, & fit veluti canalis quidam, qui interdum etiam cum altera venæ portione conjungitur, & si fiat in superficie, videtur regenerari vena. Quod vero tale quidpiam generetur, ab ulceribus evidens argumentum deduci potest: quandoque enim ingens carnis moles deficit & usque ad subjecta ossa, & regeneratur caro, impleturque cavitas; non apparet autem quomodo nutriri possit tanta novellæ carnis quantitas, nisi per canales quosdam in penitiores ejus partes fluere sanguis. Sed & si vulneretur caro illa, id erit conspicuum; copiosa siquidem profusio sanguinis à vulnere sequitur, quæ nisi vas quodpiam sauciatum esset, procul dubio non eveniret.

Objicient nihil esse argumentum à cute desumptum propterea *Obiectio.* quod substantia cutis est crassa valdè, & idcirco materia copiosa opus est, ut regeneretur, aut verè agglutinetur, quæ tamen præparari nequit, cum prius generetur caro, cujus prompta est ex sanguine generatio; at venæ tunica tenuis est, & propterea etiam pauca materia satis est ad ejus reparationem. Sed objectio nulla est, *Solutio.* quamvis enim pauca materia requiratur pro venæ generatione, non leviores tamen difficultates habet hujus paucae materiæ præparatio,



quam habeat præparatio copiosæ pro cute: pauca enim illa materia præparanda est etiam à tenui vi formatrice, à formatrice videlicet in tunica venæ existente: quæ vis autem formatrix in tenui adeò parte reperiri potest? at uberior materia pro cutis restauratione à facultate quoque robustiori præparatur. Præterea tota materia, ex qua regeneranda est vena, seminalis esse debet, at ea, ex qua regeneranda esset cutis, etiam sanguinea existit. Sed concedamus portionem venæ regenerari a formatrice in vena existente, ex Galeni sententia prima Aph. decimo quinto, calor, qui à principio partes efformavit, eas non deserit, sed usque ad mortem easdem nutrit, & conservat; necessarium igitur erit, ut calor, qui novellam venam formavit, in eadem permaneat, & ita priorem deferat, quòd ne excogitari quidem potest. Quod vis formatrix totam materiam non perambulet, sed extrinsecus posita sit, probè novimus. Præterea generet vis formativa aliquid venæ, puta quanta est digiti latitudo, quidnam quod deinceps est generabit? non enim dici potest ejusdem formatricis esse munus, cum non è operveniat, aut pertingat, mediat siquidem regenerata venæ portio. Neque ergo materiam præparare, neque ex genita materia partem fingere poterit, cum eam nec tangat. Quod vero dicitur reperiri posse talem corporis habitum, in quo nec siccitas obsit, nec materia desit, nec opifex, saltem quarundam partium respectu, ad placitum est. Si daretur tale corpus, neque negarem ego prorsus veram agglutinationem, & regenerationem seminalium partium. Sed figmentum esse non dubito. Depictus est profectò hic corporis habitus. Galenus ipse corpora hujusmodi habitu prædita rarissima esse confitetur, neque hoc ipsi negant; At de rarò contingentibus non sunt artes, ut prorsus statuendum sit in adultis neque regenerari, neque verè coalescere seminales partes. Hæc respiciens Hipp. lib. de mor. tex. 7. & lib. de Coacis Prænot. dicebat: Si quod præcisum fuerit tenuium intestinorum, non coalescit. Nervus dissectus, aut quod in gena est tenue, aut præputium, non coalescit. Si quando in corpore, vel os exectum fuerit, vel cartilago, nunquam augetur, & 6. Aph. 19. Cum discissum fuerit os, aut cartilago, vel nervus, aut genæ particula tenuis, vel præputium, neque augetur, neque coalescit.

Per



Per augeri enim, ut animadvertit Gal. in com. illius Aph. intelligit talem aliquam substantiam generari, qualis est abscissa; per coalescere autem verum coalitum significavit, quorum neutrum admittunt seminales partes, ut jam ostensum est.

Rationes verò, quibus probare conati sunt, posse ex *Solvuntur* sui natura spermaticas partes, & regenerari, & coale- *contrariae* scere, patet nullius esse momenti. Quod enim ad primam *rationes.* attinet, desumptam à materia, & opifice, jam demonstratum est, & largam requiri materiam, & robustissimam facultatem, quæ rarissimè, vel nunquam simul reperiuntur in adultis, cum sola illa materia præparetur, quæ ad nutritionem partium, earumque augmentum, si adhuc augeantur, necessariò requiritur, efficiens verò calor nutriendis, augendisque partibus vix sufficiat: Immò substantiæ, quam deperditæ loco reponit, non est omninò illi similis. Quoad ad alteram, quæ à carne in magnis ulceribus genita desumebatur, posteaquam talis caro non minùs vivit, sentit, & nutritur, ac reliqua, ut necessariò videatur asserendum, unà cum carne regenerari venas, quæ alimentum deferant, & arterias, per quas vitalis calor à corde influat, & nervi, per quos animalis qualitas à cerebro ad novam carnem ducatur, cum ei vis sentiendi sit deferenda, dicendum est, non in quacunque vivente particula necessariam esse venam pro nutritione, & arteriam pro vitæ conservatione, nec in quacunque sentiente nervum; oportet enim totum corpus esse venosum, & arteriosum, & quacunque sentientem particulam esse nerveam, sed pars, in qua vena non reperitur attrahit alimentum à vena proxime partis: Similiter arteria proximis partibus vitalem calorem impertit, & irradiatio nervi ad proximas se diffundit. Ad Galenum, qui parvarum venarum regenerationem admittit, ex supradictis patet responsio. Neque par ratio est de dentibus, & aliis seminalibus partibus plurima enim materia seminalis à generationis principio in cavitatibus utriusque mandibulæ asservatur, & ideò, si deficient, semel regenerantur, & pluries etiam; quoniam adest locus, in quo asservari diutiùs potest alimentalis materia, cavitas videlicet mandibulæ. Non sic est de reliquis seminalibus partibus, & propterea non est mirum, si reliquæ non regenerentur. Quod ad reliqua, patet ex enarratis, quid dicendum. Quis



*In pueris  
seminales  
partes verè  
coalescunt.*

Quis igitur coalitus, quæve reparatio in divisione, atque defectu partium omnium in adultis sit speranda, manifestum est. In pueris verò secus res se habet, eorum enim innatus calor, quia generationis principio sunt proximi, est plurimus, ac robustissimus, & seminales partes adhuc materiam seminalem in seipsis continent ab utero acceptam, ut facilius augeri possint, & partes omnes sunt mollissimæ, ut ossa ipsa caseo nuper coagulato sint similia, & propterea coalescere possunt omnes medio homogeneo, & juxta primum scopum, unde Gal. lib. Art. Med. c. 91. Molle vero, & puerile os coalescere potest, & 6. Met. 5. Potest certè illud tantum unionem recipere, quod abundè molle est, cujusmodi conspicitur in puerulis. At si os in pueris coalescit, tanto magis coalescent reliquæ seminales partes. Avic. quoque prima 1. Doct. 5. c. 1. & quarta 4. Tract. 1. c. 1. spermaticas partes, tradens, vera unione non coalescere, excipit infantes, & pueros. Hoc tamen intelligendum est, nisi quid aliud obstat, ut labiorum distantia, superveniens pravus affectus, & hujusmodi. Pari ratione si deficiat portio alicujus seminalis partis, præsertim quando defectus non est multus, & pars non est ex durioribus, regenerari potest, si enim insignis portio earum, quæ duriores sunt, defecerit, & secundum totam partis substantiam, non est expectanda reparatio. Sæpius observavi in valdè pueris, immo in lactentibus ob ulcus gangrænosum gingivarum os mandibulæ corruptum discessisse, dentem vero ex ea parte nunquam erupisse.

## CAPUT XVI.

*Unde elicienda sint presagia in vulneribus, & num ex parvo vulnere mors possit subsequi.*

**Q**uid autem de vulnerato sperandum, magnitudo vulneris indicabit; propter magnitudinem enim periculosum est vulnus, & lethale, & quo majus est, eo magis augetur periculum, eo quod natura majores defectus cum difficultate corrigat, & non raro etiam corrigere nequeat; sicuti quod parvum est periculo vacat, & quo levius est, eo facilius sanatur, quia natura exiguos lapsus



lapsus non ægrè corrigit. Quod in morbis omnibus apertè conspicitur, nullus enim inferre mortem potest, nisi corporis vires excefferit, & eas, nisi fuerit magnus, dubio procul nunquam exuperabit.

Hæc tamen veritas à nonnullis fuit in dubium revocata, qui & propria, & aliorum observatione ducti, posse ex parvo vulnere mortem evenire profitentur: Nemo est, dicunt, qui diu curandis vulneribus operam dederit, à quo id non fuerit aliquando observatum, unde Hip. 2. Proreth. Evenit autem non rarò vulnera quædam locis vilibus, & non malis esse, ac nulla in re gravia videri, sic tamen dolorem affligere plagam, ut respirare ægri nequeant. Quidam in vulnere, quod grave nulla in re erat, dolore, & febre affecti, mortui sunt. Hinc 7. Epid. nonnullos recenset, qui ex parvis vulneribus mortui sunt. Namque Theodori filius ex denudatione juxtà os nullius momenti 23. obiit. & Philles filio ex denudatione in fronte facta contingit nona die febris, deindè livefactum est os, & mortuus est; Atque ut asserit quoque Hip. 1. de Vul. c. Sæpè cutis capitis sola contusa ferro, aut aliqua alia re, si non diligenter, & cum quadam cautione cureretur, ulcus in crudefcens non parum molestiæ exhibet, & aliquando etiam febrem inducit, & Medico quidem negotia, ægroto verò non minùs periculum affert. Refert Augen. 1. tom. suar. Epist. 1. 9. Ep. 2. plures historias eorum, qui ex parvo vulnere perierunt, inquit enim se audisse Ludov. Vivem ex vulnere exiguo, & planè despicabili accepto in vola sinistræ manus, quod vix subditam cuti carnem contigerat, convulsione derepente oborta interiisse. Et Marc. Sobrirantium ex plaga in calcaneo admodum exigua inflicta præter omnium spem decima quarta mortuum. Et Marcum Anton. de Luna Bonon ex levissimo vulnere cubiti periisse. Inquit etiam se observasse ex vulnere minimi digiti Io. Baptist. Argentin. decessisse. Et Petrum quendam futorem ex acus punctura inter unguem, & carnem pollicis dextræ manus inflicta obiisse. Vidi, & ego Bononiæ Scholarem quemdam Brixienf. ex levi incisione in majori articulo minimi digiti dextræ manus septima die convulsus periisse. Et Scandiani quemdam ex levi acus punctura in domestica parte indicis inter primum, & alterum articu-



lum vix evasisse. Et Ferrariæ plures ex levi capitis vulnere in manibus primarii Urbis Chirurghi delirantes, & convulsos animam egisse. Petiit à me quidam Chirurgus Ferrariens. cum levissimè vulneratum in manus digito procurasset, qui delirans, atque convulsus circa undecimam obiit, num ex illo vulnere mortuus fuerit. Videtur itaque haud negandam esse casus veritatem.

Nonnulli igitur existimant re vera hujusmodi vulnera parva esse, sed nihilominus mortem contingere ob malam corporis dispositionem, malam videlicet temperaturam, vel totius, vel saltem partis, & vitiosorum succorum exuberantiam. Nec posse aliter statui Senis auctoritate confirmant, qui lib. de Coac. Prænot. vulnera, quæ carnem dumtaxat efficiunt, carere omni periculo affirmaverit: quare si ad carnis vulnera mors sequatur, non ob id dicendum est vulnus magnum; siquidem non sequitur mors, quia natura vulneris sit talis sed ob solam corporis dispositionem. Hæc fuit sententia doctissimi Augen. 1. tom. suar. Ep. 1. 9. Ep. 2.

*Duplex mors in vulneribus.*

*Vulnus parvum non potest ex se mortem inferre.*

*Triplex magnitudo vulneris.*

Idem sensit Manard. 6. lib. suar. Epist. Ep. 1. Attamen distinguendum censeo de morte vulneribus iis, quæ parva judicantur, superveniente; namque aut occasione ipsius vulneris per se provenit, ut puta, quando vulnere succedit putredo, seu corruptio, gangræna, inflammatio, convulsio, & hujusmodi, aut ex accidenti, ut si contingat vulneratum febre ardente, aut mali moris corripi, seu quia, etiam si non fuisset vulneratus, in ipsam tamen incidisset, aut quia morbificus apparatus ob causas vulneris, & vulnus ipsum tanquam quidpiam affectus etiam animi movens, & hac præterea ratione succos exagitans, ac spiritus, putredinem malam concipit, ad quam erat proclivis. Si prima de causa mors accadat, vulnus illud parvum esse non potest, & quomodo parvum esse potest, si corporis naturam superat? apparet quidem parvum, sed re vera est magnum; sicuti enim cæterorum morborum non una est magnitudo, sed triplex, alia videlicet, quæ ex læsæ actionis præstantia, seu præstantia affectæ partis, alia quæ ex propria affectus essentia, & tertia quæ ex facultate, quæ læsum corpus gubernat, æstimatur, quemadmodum licet colligere ex Gal. 4. Meth. 6. 7. Meth. 12. & com. 1. in lib. de Hum. tex. 12. ita, & vulneris.

Delitescit igitur quandoque magnitudo aliqua, & ita parvum judica-



judicatur. Cum cute quandoque punctus est nervus, & vulnus videtur parvum, quia re vera parvum est ratione propriæ essentiae, parvum etiam à principio non rarò est ratione facultatis, sed ratione dignitatis magnum est, cum adsit nervi punctura, & facili negotio sibi insuper associat aliam magnitudinem majorem, dignitatis scilicet, cum in consensum trahatur cerebrum, & tandem magnitudinem ratione facultatis, unde mirum non est, si mortem inferat. Quandoque non adest magnitudo ratione propriæ essentiae, parvum est etiam vulnus ratione dignitatis, quia nulla præcipua pars afficitur, sed ratione facultatis magnum est, quamvis id lateat, & hujus ratione mortis est causa, non enim existimandum est vulnus parvum ratione propriæ essentiae, & ratione etiam dignitatis non posse esse magnum ratione facultatis, cum id non rarò accidat, quod ostendo; Vulneratus quandoque est valdè cacoehymus, & vitiosis succis, ac ferè malignis refertus, saltem putredini valde obnoxius, puta quia in pravo aere diutius moram traxerit, & omninò pravæ victus rationi per longum tempus se dederit, quod solet belli tempore, & in maximis penuriis evenire; repletum igitur corpus tam pravæ succis, & malo nutrimento alitur, quo fit, ut naturalis calor in omnibus partibus langueat, & quamvis vulnus sit parvum, si essentiam spectes vulneris, & partis præstanciam, nihilominus calor naturalis languidus regere ipsum nequit, hinc pravorum succorum affluxus, inflammatio, corruptio, & mors; quod suis temporibus evenisse tradit Paræus in Rothomagensi expeditione sub Carolo nono; licet enim vulnera non admodum magna viderentur, nihilque quod ex arte esset vocati Chirurghi omitterent, attamen plerique, vel interibant, vel vix, & multo labore ex vulneribus resurgebant. Quis negabit hæc vulnera, etsi ratione essentiae, & dignitatis sint parva, facta tamen collatione ad virtutem esse dicenda magna, cum naturæ illius subiecti vires exuperent? pondus, quod alicui leve, alteri grave nimis ob virium imbecillitatem videbitur: febris, quam robustus vir sperneret, senem tollit: ob id ne ergo exigua, levique febre senem laborare dixerimus? à levi, & contemnendo morbo tollitur homo? Quando igitur Hip. 2. Proreth. dicebat, ab omnibus cujusvis generis vulneribus mortem homini contingere, quem

*Vulnera  
que videntur  
parva, & interfi-  
ciunt, sunt  
magna ratione  
facultatis.*



locum adducit Augenius in propriæ sententiæ confirmationem, non significavit à parvis vulneribus posse mortem contingere, sed admonere nos voluit, fieri posse, ut omnibus vulneribus insit talis magnitudo, quamvis lateat, quæ mortem inferre possit: ut nunquam eo simus contenti, quod sensui apparet. Hinc subjungebat Hip. loc. cit. multæ enim venæ sunt, & ténues, & crassæ, quæ sanguinem fundentes occidunt, si gliscere, ac eò ferri ipsas contigerit, quas alia temporis occasione si quis pertundet, corporibus prodesse sentiat.

En detecta magnitudo ratione partis affectæ, cui tandem associatur magnitudo ratione facultatis. Non est ergo dicendum, vulnus, quod videtur exiguum, & aliàs exiguum foret, parvum esse, & prava sequi symptomata ob corporis dispositionem; cum enim symptomata ex eis sint, quæ vulneris naturam consequuntur, cur in corporis dispositionem sunt referenda? nisi ea ratione referantur, quòd propter corporis dispositionem vulnus illud, quod parvum foret in alio subjecto, in proposito magnum est, ut non possint nisi magna symptomata subsequi. Quòd etiam subjungit Augenius, corpora malè disposita, & quæ vires habent imbecillas, ex quavis levissima causa concidere, ac ob id ab exiguis vulneribus ob malam corporis dispositionem, & vires imbecillas mori quotidie quamplures, nihil aliud probat, nisi quod causa illa secundum suam essentiam est levissima, sed facta ad illud subjectum collatione, evadit maxima, & ita vulnus illud saltem eam habebit magnitudinem, quæ ratione facultatis æstimatur. Namque, ut dictum est, magnitudo ratione affectæ partis, non raro delitescit sicuti rarissimè, quæ penes essentiam spectatur, occulta manet. Filii ergo Theodori, & Philes ab Hippocrate enarrata vulnera magna erant ratione facultatis, & fortassis etiam ratione dignitatis, ideòque mors sequuta est, quibus convulsio supervenit, eorum vulnera magna erant ratione dignitatis partis affectæ nervus enim, aut nervosa pars erat affecta; sæpè etiam ratione facultatis, cum naturæ vires dejicerent. quæ etiam recenset Manardus 6. Epist. Epist. prima, nequaquam parva extitisse perspicuum est, sed magna fuere si non propriæ essentiae ratione, aut dignitatis, saltem ratione facultatis, qua de causa mortem subsequutam esse dicendum.



dum est: quamvis mortis causam referat non in magnitudinem vulneris, sed in malitiam humorum, & capitis imbecillitatem.

Sed & magnitudinem, quæ ex præstantia, partis affectæ judicatur, illis vulneribus arbitror fuisse adnexam, delituisseque; accidentia enim, quæ supervenerunt, videlicet erysipelas in facie, febris, paralytis dextræ manus, & linguæ, id evidenter demonstrant. Nec obstat, quod ab ictu non supervenire prava illa symptomata, quæ læsionem membranarum, & cerebri sequi consuevere, videlicet casus, obcæcatio, vomitus, delirium, & hujusmodi, quod enim semper non superveniant, experientia me docuit, licet aliqui id fieri non posse existiment. sed de hoc aliàs.

Valdè differt ictus ab ictu, & corporis natura una ab alia. Forsan aderat in osse contusio absque rima, aut aliqua cæca rimula in ipsa futura: nam duo erant vulnera duobus catenæ ferreæ annulis inflicta in caput, alterum supra supercilium sinistrum, aliud in eodem latere parum infra angulum, ubi futura sagittalis dicta coronali jungitur, quæ duo, vel oculatissimis medicis solent imponere. Forsan etiam disrupta fuit, aut adaperata parva aliqua venula sub osse, ex qua paulatim resudans sanguis colligitur, & putrefactus febrem accendit, & alia demum symptomata inducit.

Quod sanguis, aut pus in modica quantitate possit sub cranio contineri aliquo tempore, licet prava illa symptomata non concitet, eventus comprobavit: possemque in hujus rei confirmationem multas adducere historias, sed hoc sit satis, quod quis capite vulneratus citra febrem omninò decumbens, usque ad quartam, vel septimam, vel undecimam repente febre corripitur, eique si statim terebratio adhibeatur, sæpè sub cranio pus graveolens reperitur; num ergo à febris principio collecta fuit materia illa, an potius dicendum, paulatim exudasse ab aliqua venula sanguinem, qui ubi ad sufficientem quantitatem collectus est, putrefactus prava illa symptomata intulit? At si loquamur de morte, quæ ex accidenti vulneratis supervenit, potest dubio procul, vel levissimè vulneratis accidere: sicuti sanus corripitur febre, eaque mali moris, & lethali; ita & vulneratus, & sic de aliis lethalius morbis, & eò magis, quoniam ira, timor, & alii immodici

*Potest sanguis, & pus aliquo tempore sub cranio contineri absque pravis symptomatibus.*



animi affectus vulneratos torquent, spiritusque ac humores exagitant, & maximè in imbecilibus, & quibus debilis suaptè natura animula est; undè si succi fuerint pravi, & putredini obnoxii, putredinem contrahunt, ex qua febris mala, & mors, vel ex diuturniore, & perseverante affectu pravi fiunt, aut etiam dejiciuntur adeò vires, ut neque probos succos possint regere, hinc putredines, quia humor, quem proprius calor non obtinet, nihil haber reliquum, dicebat Gal. 2. de dif. feb. capitulo ultimo, nisi ut ad putredinem convertatur.

Sed & ipsi animi affectus per se inducere mortem possunt, quibus enim vitale robur infirmum est, ut dicebat Gal. primo loco af. capitulo primo: Animi vero affectiones ob imperitiam fortes, his animæ essentia facilè dissolvi potest, & in dies observamus, aliquos proprii, vel etiam alterius sanguinis guttam conspicientes, statim in animi deliquium, & syncopem incidere. Hisce de causis Hippoc. secundo Proreth. dicebat: Sed neque mirari oportet (loquebatur de vulneribus ad sensum parvis, à quibus mors sequitur) neque formidare, illud expendendo, quod & animæ, & corpora hominum plurimum differunt, & vim maximam habent.

*Tota ars  
præfagiendi  
in vulneri-  
bus consistit  
in cognitione  
magnitudi-  
nis eorum.*

Concludamus igitur, ex solo vulnere magno mortem contingere, & proinde totam artem præfagiendi futurum eventum in vulneribus, in cognitione eorum magnitudinis consistere.

## CAPUT XVII.

*In quibus consistat Vulneris magnitudo, & quæplex ea sit.*

*Triples magnitudo vulnerum.*

*Unica est magnitudo*

Cum igitur ex magnitudine vulneris futurum eventum conjectari oporteat, videndum est, quæplex sit hæc magnitudo, & penes quæ sit attendenda. Ut autem superius dictum est, sicuti in reliquis morbis, ita quoque in vulneribus triplex est, una quæ ex præstantia læsæ actionis, seu partis dignitate spectatur, alia quæ ex propria vulneris essentia, tertia quæ ex facultate, quæ læsum corpus gubernat, æstimatur. Liceat enim nobis facilioris doctrinæ gratia triplici hac magnitudine uti, quod etiam facit Gal.



Gal. locis supra citatis, & alibi pluries, quamvis unica sit magnitudo affectuum omnium, quæ attenditur penes quantitatem declinationis à statu naturali, cum tantus sit affectus, quantus est recessus à naturali statu, qua ratione Gal. septima Aph. 63. dicebat: Unumquodque eorum, quod est præter naturam, quantum recessit ab eo, quod est secundum naturam, tantum habent prævitatis. Et Hip. lib. Prænot. in principio: Itaque nosse oportet talium affectionum naturas, quantum corporis vires excedunt, quantitas enim hujusmodi recessus aliquando magis innotescit, si consideretur propria affectus essentia, aliquando verò magis, si dignitas partis perpendatur, nonnunquam etiam magis considerando ipsius facultatis robur, aut imbecillitatem.

Ut autem notum fiat, penes quid attendenda sit vulneris magnitudo, animadvertere oportet, vulnera non inferre mortem, veluti solent plerique morborum, per se videlicet corporis vires demoliendo; sed quia ad ipsa alius affectus sequatur, qui vel mediatè, vel immediatè facultatem prosternit; alia enim mortem inferunt, quia partem ad vitam necessariam tollunt, vel actionem ejus, aut usum, sive mediatè, sive immediatè; alia propter sanguinis effusionem, & spirituum evacuationem, alia propter supervenientem inflammationem, quod plerumque contingit, modò vulnus statim non interimat; alia quoniam occasio sit intemperantiæ præcipuarum partium; alia propter supervenientem convulsionem: alia propter supervenientem febrem, vel putridam, vel hecticam, vel aliquem alium immedicabilem affectum, qui ad rem vulneris non pertinet, sicuti ureterum vulnus: si enim dissecantur, aut lacerentur ureteres, hydrops insanabilis succedit: alia denique propter putredinem, & corruptionem, quamvis neque sine febre hæc interimant, aliqua enim pluribus rationibus interficiunt. Et propterea vulneris magnitudo, quæ ratione facultatis æstimatur, penes ea, quæ superveniunt, attendi debet, ut vulnus magnum ratione facultatis dicatur, quando adjunctum est aliquid ex eis, quæ facultatem prosternunt, sive mediatè, sive immediatè, ut capitis vulnus, cui supervenit inflammatio, & convulsio, capitis vulnus cum ossis introessione membranas, & cerebri comprimantis, vel impediri non potest, quin aliquid superveniat

*omnium  
affectuum,  
sed facilio-  
ris doctrinæ  
gratia tri-  
plicem ex-  
cogitarunt  
medici.*

*Ut inferant  
mortem  
vulnera.*

*Magnitudo  
vulneris ra-  
tione facul-  
tatis penes  
quæ atten-  
datur.*



perveniat ex eis, quæ facultatem dejiciunt, ut vulnus in substantia cordis, quod ab inflammatione funesta, & spirituum dissipatione præservari non potest, aut saltem cum difficultate, & labore, ne superveniat malum, obtineri potest, ut vulnus etiam leve in parte carnosâ, sed in corpore valde cacochoymo à facultate regi nequit, & propterea nec præservari facile potest à lethifera calamitate.

*Plures sunt  
gradus magnitudinis  
vulneris ratione facultatis.*

Et quoniam ex eis, quæ vulneri accidunt, alia auferri nullo modo possunt, ut quando cordi supervenit inflammatio; alia verò aliquando auferuntur, rarò tamen, & summa cum difficultate, ut quando capitis vulneri supervenit membranarum, & cerebri inflammatio; alia verò, licet multo adhibito studio, non rarò tolluntur, patet non unicum esse gradum magnitudinis vulneris, quæ ratione facultatis judicatur, sed plures, desumptos à vario excessu eorum, quæ sunt præter naturam supra naturæ vires; in omnibus enim minatur vulnus vires demoliri, illas tamen non destruit, nisi ad supremum magnitudinis gradum perveniat, quem ubi acquisierit, artem, & naturam deludit. Nil mirum igitur si ex vulneribus, quæ facultatis ratione magna existunt, alia penitus sint lethalia, alia verò plerumque, alia verò ad utrumlibet se habeant: unde & vulnus, cui magis imminet ultimus ille magnitudinis gradus, eo periculosius judicari debet: & ad hunc gradum perveniunt vulnera, aut quia sunt magna ratione propriæ essentiae, aut ratione partis affectæ, aut quia facultas sit imbecilla, vel propter horum plura.

*Magnitudo  
propriæ essentiae penes  
quid attendatur.*

Magnitudo ratione propriæ essentiae penes profunditatem potissimum attenditur; vulnus enim superficiale, sive longum sit, sive latum, non meretur dici magnum vulnus ratione propriæ essentiae, at si profunditati addatur longitudo, & latitudo, eò majus extiterit.

Profunditas autem judicari debet habito respectu ad vulneratam partem; quod enim in carne superficiale foret, in hepate, aut cerebro profundum erit: idem de longitudine, & latitudine dicendum est, non adnectitur huic vulneri, vel rarò magnitudo ratione facultatis, nisi propter facultatis imbecillitatem, aut dignitatem affectæ partis; quamvis si vulnus magnum ratione dignita-

tis,



tis, aut facultatis fuerit etiam magnum ratione propriæ essentiæ, longè majoris momenti sit æstimandum.

Dignitas partis, quæ constituit magnitudinem vulneris ratione partis affectæ, judicanda est, aut penes principalitatem membrorum, & nobilitatem, vel penes eorum ad vitam necessitatem, *Dignitas partis in quo consistat.* vel penes actionem eorum, aut usum, aut situm, aut substantiæ modum, qui sanationi repugnat, ut ob id necessarium sit tandem adnecti magnitudinem ratione facultatis, vel penes comitantia symptomata, vel propinquitatem, aut consensum alicujus partis præcipuæ: atque hisce de causis facilè adnectitur vulneri magnitudo ratione facultatis. Propter principalitatem membrorum vulnera cordis, cerebri, & hepatis sunt magna, quamvis in essentia sint parva: propter necessitatem partis ad vitam, vulnera etiam cordis sunt maxima, quia maximè omnium ad vitam est necessarium. Propter tertium propositorum vulnera pulmonis sunt magna, continuus enim ipsius motus sanationi repugnat, & promptè sequuntur putredines, ac tabes. Ob irrequietum etiam cordis motum, & si nihil aliud obstaret, ejusdem vulnera sanari non possunt. Ratione comitantium symptomatum vulnera cum læsione venarum jugalium sunt magna valdè, supervenit enim incompe- scibilis sanguinis fluxus: pariter & nervorum, ac nervosarum partium, quia supervenire solet convulsio, & articulorum, quia facilè admodum recipiunt superfluitates omnes, ac fluxiones, ob quas pravi affectus subsequuntur, magna sunt judicanda. Sæpiùs autem plura ex his conjuncta vulnus reddunt magnum ratione dignitatis. Videns igitur Hip. non satis esse ad futurum eventum prænosendum, si quantitas ratione propriæ essentiæ vulnerum consideretur, verùm, & maximè necessarium esse perspectam habere etiam magnitudinem, quæ dignitatis ratione spectatur, nec non etiam, quæ penes facultatem æstimatur, secundò Præd. num. 17. hæc protulit: Qui porrò de ulceribus cognoscere volet, quomodo singula finient, eum primùm hominum species, id est, diversas hominum naturas, perscrutari oportet, tum eas quæ meliores sunt ad ulcera, tum quæ deteriores: deindè ætates nosse, in quibus singula ulcera curatu difficilia existunt, (quæ omnia qualis sit facultas docent) locos item in corporibus perspectos habere,



quantum alii ab aliis differant (quibus magnitudo ratione dignitatis partis tangitur) sed & alia, qualia in singulis accidunt tum bona, tum mala nosse oporteat (hæc peculiarem cuiusque naturam ostendunt, quæ à Gal. 3. Meth. septimo, cuiusque naturæ proprietas ineffabilis appellatur, & propterea etiam significant quantum sit vulnus ratione facultatis) si quis enim, subjungit, omnia hæc noverit, is sanè sciet etiam, quomodo singulorum eventus contingent.

## CAPUT XVIII.

*Ex varia magnitudine vulneris eliciuntur varii eventus.*

**Q**Uàm necessaria sit ad præfagiendum cognitio magnitudinis vulneris, manifestum est; reliquum est, ut videamus, quomodo uti oporteat hac magnitudine ad ferenda prognostica, & quomodo ea, ut decet, intellecta, faciles sint captu omnes antiquorum sententiæ de futuro vulnerum eventu prolatae. Ad magnitudinem enim ratione affectæ partis respiciens Hip. 6. Aph. 18. dicebat: Vesica discissa, aut cerebro, aut corde, aut septo, aut aliquo ex tenuioribus intestinis, aut ventriculo, aut jecore, lethale est. Quamvis, & magnitudo hujusmodi vulnerum ratione propriæ essentiae faciat, ut aliqua, aut pleraque sint lethalia; solum enim cor vulneratum, ut dicebat Gal. in com. ejus Aph. mortem affert necessariò, reliqua verò non item, sed tunc solum, quando etiam ratione propriæ essentiae sunt magna, quam quidem magnitudinem significavit Hip. verbo illo, discissa, ut enim Gal. notat, consuevit Hippoc. magna vulnera discissiones, διακόπας Græcè nominare, unde, & in com. Aph. 19. sextæ sectionis, discissa, dicebat, habere divisionem usque ad finem penetrantem, immò, & propter facultatis robur aliqui ex magnis vulneribus istarum partium evadunt, præsertim cerebri, & hepatis etiam; unde & Gal. 6. Aph. 19. Cerebrum autem vulneratum sæpiùs sanatum vidimus, & semel in Smyrne Ioniæ, vivente adhuc præceptore Pelope, & erat vulnus satis effatu dignum, & 8. de Usu partium, Nam admirabile illud spectaculum, atque incredibile, quod



quod Smyrne in Ionia accidit, aliquando sumus conspicati, adolescentem, vulnere in alterum anteriorum Ventriculorum accepto, superstitem fuisse, Dei, ut plerisque videbatur, voluntate: sed ne temporis quidem momento vivere potuisset, si utrumque simul vulnus violasset. Avic. & ipse leviora vulnera harum partium sanari posse profitetur, ideoque quarta quarti tract. 1. cap. 2. Membra, in quibus, cum cadit vulnus, magnificatur ejus nocumentum, & interficit secundum plurimum, & non interficit rarò, sunt sicut vesica, renes, cerebrum, intestina minuta, & hepar, quamvis sit possibile, ut salvetur super ea, quando est leve, in corde autem non superatur salus. Hinc clariùs rem proponens Hipp. lib. de Coac. Prænot. tex. 3. Moriuntur maximè ex vulneribus, dicebat, si quis in cerebrum faciat, aut spinalem medullam, aut hepar, aut septum transversum, aut cor, aut vesicam, aut venam crassam. Moriuntur autem etiam, si in arteriam, & pulmonem valdè magnæ plagæ fiant, ita ut pulmone percusso paucior spiritus per os procedat, quàm is est qui ex vulnere illabatur. Moriuntur autem qui in intestina vulnerati sunt, sive ex tenuibus aliquod, sive ex crassis fuerit vulneratum, si per transversum fiat plaga, & magna, si verò parva, & recta quidam evadunt. Minimè verò moriuntur, subjungebat, vulnerati in partibus corporis, ubi hæc non sunt, aut ab his quàm longissimè absunt. Idem proposuit 2. Proreth. 19. dicens: Vulnera magis lethalia sunt, quæ in venas crassas in collo, ac inguinibus infliguntur, deinde quæ in cerebrum, & hepar, postea quæ in intestinum & vesicam. Sunt autem hæc omnia perniciofa valdè, non tamen ita, ut nemo ex his evadat, velut putatur, nam & loci, qui hæc nomina habent, multum inter se differunt, & itidem modi. Multum etiam differt corporis ipsius hominis structura; aliquando enim neque febricitat, neque inflammatur fauciatus, aliquando etiam citra causam febricitat, & aliqua corporis pars omninò inflammatur.

Dignitatis quoque magnitudo, quæ sibi facilè magnitudinem ratione facultatis associat, facit, ut periculosa sint vulnera nervorum *Vulnera nervosarum* & nervosarum partium, quando non sunt penitus præcisi nervi, prom- *partium cum periculosa.*ptè siquidem superveniunt prava symptomata vires prostermentia, do-



lores videlicet, vigiliæ, convulsiones, neque vulneratæ partis tantum, sed & totius unà cum delirio, eò quòd affecto cerebro, cui continuatur, tandem communicetur. Unde Gal. 4. Meth. 6. Ubi tendines, nervi, carne vacua, & ossea loca sunt, hic doloris, vigiliarum, convulsionis, & delirii periculum instat. Idem est de articulorum vulneribus, qua ratione ibidem dicebat, Cacoethe statim fiunt vulnera in articulis accepta.

*Vulnera penetrantia  
cavitatem  
thoracis, &  
abdominis  
eius periculosa.*

Periculosa etiã sunt vulnera cavitatem abdominis, aut thoracis penetrantia, quia habent dignitatis magnitudinem, non quidem quòd aliqua pars præstans sit vulnerata, sed quoniam contentæ partes, & malè affici ambientis ingressu, & in consensum trahi possunt: ideò Gal. 4. Meth. 6. Vulnus, quod intra thoracem, aut peritonæum penetravit, non parvum periculum affert, quamvis magis si quid interiorum unà sit vulneratum. Celsus l. 5. suæ Medic. c. 26. magnitudinem hanc ad gradus quosdam redegit, ideòque dicebat, servari non potest, cui basis cerebri, cui cor, cui stomachus, cui jecinoris portæ, cui spinalis medulla percussa est, cuique aut pulmo medius, aut jejunum, aut tenuius intestinum, aut ventriculus, aut renes vulnerati sunt, cuive circa fauces grandes venæ, vel arteriæ præcisæ sunt. Vix autem ad sanitatem perveniunt, quibus ulla parte pulmo, aut jecinoris crassum, aut membrana, quæ continet cerebrum aut lien, aut vulva, aut vesica, aut ullum intestinum, aut septum transversum vulneratum est. Hi quoque in præcipiti sunt, in quibus usque ad grandes, intusque conditas venas in alis, vel poplitibus mucro descendit. Periculosa etiã vulnera sunt, ubicunque venæ majores sunt, quoniam exhaurire hominem profusione sanguinis possunt, idque evenit non in alis tantum, atque poplitibus, sed etiã in his venis, quæ ad anum, testiculosque perveniunt. Præter hæc malum vulnus est, quodcumque in alis, vel femoribus, vel inanibus locis, vel in articulis, vel inter digitos est. Item quodcumque musculum, aut nervum, aut arteriam, aut membranam, aut os, aut cartilaginem læsit. Tutissimum verò omnium, quod in carne est, & hæc quidem loco vel pejora, vel meliora sunt, modo verò periculum facit, quodcumque magnum est.

Propter



Propter magnitudinem ratione facultatis, quæ novam magnitudinem ratione dignitatis inducit, a qua rursus, & ipsæ vires *Vulnera magna ratione facul-* malè afficiuntur, Hippocrates quinta Aph. 66. & 2. Epid. sec. 3. *tatis periculosa.* Si in vulneribus fortibus, & pravis tumor non appareat, ingens malum, vulnera enim prava sunt, ut notat Gal. in com. ejus Aph. quæ sunt in capitibus, & finibus musculorum, præcipuè nervorum, & in aliis etiam nervosis, & dolorosis partibus, & propter ipsum dolorem rationi consonum est, attrahi materiam ad locum vulneris, ex quo deberet pars elevari in tumorem, quòd si tumor non appareat, signum est naturam deficere, & ob defectum irregulariter operari, non enim ad extimam, partem eam expellit, quia tumor esset, apparens, sed vel ad penitiores, & nobiliores partes loci vulnerati, nervosas scilicet, unde convulsiones, tunc enim tumor non apparet, sed delitescit in intima parte, vel non ad vulneratam partem, sed ad aliam quampiam ex præcipuis, in qua inflammationem efficit, & ea symptomata excitat, quæ naturæ partis proportionem respondent. Quam materiæ transmissionem notavit Gal. 5. Aph. 66. his verbis: Sicut igitur priùs damnabat omnes tumores de repente evanescentes, ita nunc illos, qui neque *Explicatio Aph. 66. quintæ partis.* omninò adveniunt vulneribus pravis; nam & in his suspicandum est, ne humores ad vulnera fluentes ad partes principales transmittantur, & ab eo desumens Avic. 4. quarti tract. 1. cap. 2. dicebat: Et quando vulnus est in loco, in quo oportet, ut vehemens fiat dolor, & apostema, sicut sunt capita lacertorum, & posteriora eorum, & propriè illorum, qui sunt nervosi, & non accidit apostema, significat illud nocumentum intrinsecum, ad quod convertuntur materiæ, & non perveniunt ad vulnus.

Retrocedit etiam materia, quæ ad vulneratam partem potius, quàm ad aliam fluere deberet, quoniam extincta est facultas vulneratæ partis, quo fit, ut nec admittat alimentum, quod ad ipsam transmittitur. Præterea cum non amplius sit in potestate naturæ, sed ut destituta, nec ad ipsum subsidium quidpiam mitteretur. Quia ergo in vulneribus pravis tumor non apparens est signum magnitudinis ratione facultatis, si tumor in eisdem apparuerit, procul dubio signum erit roboris ipsius facultatis, & quòd regulariter operetur, & proindè bonus eventus est sperandus:



*Explicatio  
Aph. 65.  
quintæ par-  
tic.*

nec rarum est, à superveniente morbo vitæ periculum tolli. Hac ergo de causa Hip. 5. Aph. 65. & 2. Epid. sec. tertia: Quibus tumores in ulceribus apparent, non convelluntur maximè, neque insaniunt, quod quidem cum ratione accidit, materia enim, ex qua per decubitum ad nobiliores partes inflammatio cerebri, vel nervosarum partium subsequitur, extra propellitur ad summas partes: de tumore enim, qui summas tantum partes, & vulneri circumstantes occupat, dictum Hip. est intelligendum, non de eo, qui simul etiam penitiores occupat; hic enim maximè periculosus existit, quia non solum extrinsecus partes tument, sed & intimæ, & in nervis imbibitur materia, quæ eosdem distendens, vel mala qualitate afficiens convulsionem excitat. Celsus lib. 5. cap. 26. brevibus quidem, sed aureis planè verbis rem hanc explicavit, dicens: Nimis intumescere vulnus periculosum, nihil intumescere periculosissimum. Illud est magnæ inflammationis indicium, hoc emortui corporis. & Gal. in com. ejusdem Aph. Nonnulli quidem ex ipsis convelluntur, & insaniunt (ex iis videlicet, quibus tumores in ulceribus apparent) sed rarò hoc patiuntur, quando videlicet magnitudinem effatu dignam, vel malignitatem assumpserint; magnitudo enim effatu digna est, quæ intimas quoque corripit partes. Et quoniam materia quandoque sola quantitate distendens nervosas partes, convulsionem efficit, quandoque verò in pauca quantitate existens, ut tumorem effatu dignum nequeat excitare, mala tamen qualitate nervosas partes infestat adeò, ut convulsionem pariat, idcirco Gal. & tumorem effatu dignum, & materiæ malignitatem adduxit.

De hujusmodi igitur tumore intelligendum est, quando dicitur, malum esse, si vulnera inflammentur, & propter inflammationem pleraque vulnera interficere, & ob id laborandum præsertim medico, ut inflammationem prohibeat, cum ea præsentem nunquam sanetur vulnus, eademque prava symptomata concitans mortis sit causa. Cujus etiam ratione dicebat Gal. lib. Art. Med. cap. 90. Opus medici esse, ipsam partis substantiam salubrem conservare. & 3. Meth. 4. Si phlegmone, cavitas, & ulcus, & fordes in eadem sint particula, primum phlegmone, secundo loco fordes; tertio cavitas, quarto ulcus esse curandum: & Avic. quarta



ta quarti tract. primo capitulo tertio : De melioribus , cum quibus intendimus in vulneribus est , ut prohibeamus eorum apostemationem ; quoniam , quando non accidit apostema , possibile est , ut vulneris fiat curatio ; verum cum illic est apostema , aut attritio , aut contusio , aggregatur in vacuitate ejus cum vulnere sanguis , qui vult fieri apostema , aut pus , & non est possibilis curatio vulneris , dum non regitur res illa , & curetur apostema. Et Celsus loco citato : Ubi aliquis ictus est , qui servari potest , protinus prospicienda duo esse , ne sanguinis profusio , neve inflammatio interimat. Idem periculum , quod à vulneribus pravis imminet , quando tumor non apparet , propter eandem magnitudinem ratione facultatis subest , si tumor apparere incipiat , & postea de repente delitescat ; signum est enim naturam deficere à recta operatione , quam inceperat , & propterea materia , quam caperat ad summas , & circumjacentes vulneris partes propellere , in penitioribus partibus vulnerati membri absorberetur , unde in nervis , & nervosis partibus imbibita eos replens distendit , aut mala qualitate afficit , & sic convulsionem facit ; vel in præstantiores partes decumbens in maxima discrimina vulneratum adducit. Observamus enim , quando derepente delitescunt tumores in pravis vulneribus , aliis supervenire delirium aliis convulsionem , aliis lateris dolorem , aliis hepatis inflammationem , aliis dysenteriam sanguinolentam , prout in hanc , vel in illam partem ferri materiam contigerit , ac diversa fuerit materię fors , atque conditio. Idcirco Hippocrates cum in principio 65. Aph. sextæ sectionis , sperari posse bonum eventum in pravis vulneribus proposuisset , quando tumor apparet , subjungebat : Verum his evanescentibus de repente , quibusdam à tergo convulsiones , & distensiones fiunt , quibusdam ante insania , vel dolor lateris acutus , vel suppuratio , vel difficultas intestinorum , si tumores sint rubicundi & Gal. in com. ejus Aph. Quando igitur ab ulceratis partibus humor , qui fecit tumorem ad aliquam principem partem se contulit , in partibus quidem retrò nervosis convulsiones fiunt , ac distensiones , in anterioribus autem insania , si feratur ad caput , lateris autem dolor , si ad thoracem humor convertatur. Sæpius verò , & hi suppurantur , si humor non dissolvatur. Difficultatem verò intesti-

norum



norum fieri inquit, si tumoribus rubentibus conversio repente fiat, illam quidem intestinorum difficultatem, quam sanguineam nominant, quæ est sanguinis evacuatio per intestina absque exulceratione. Nonnunquam tamen, quemadmodum experientia docuit, etiam propriè dicta intestinorum difficultas sequitur, corpore acribus, & mordacibus succis referto. Non est autem universaliter verum, quod dicitur in Aph. si à tergo vulnus constiterit; sequi convulsiones, & distensiones; si verò in anterioribus; reliquos affectus; contrarium enim interdum accidit, ut Gal. animadvertit in com. ejus Aph. Posset tamen aliter interpretari Aphorismus, ut illæ duæ dictiones ante, & retro, non ad locum, in quo vulnus consistit, sed ad eum, in quem materia decumbit, referatur, & ita erit universaliter verum, quod dicitur.

Unum tamen animadvertendum est, non semper malum esse, quando in vulneribus pravis non supervenit conspicuus tumor, nec quando apparens de repente delitescit, quando enim justa de causa tumor non supervenit, vel apparens evanescit, profectò non est malum, ut quando per evacuationes, & alia auxilia tumoris causa tollitur. Curavi ego sæpissimè vulnera gravia, quibus nullus omninò supervenit tumor, aliquando etiam, quibus conspiciui tumores derepentè evanuerunt, neque tamen pravum aliquod symptoma sequutum est, sed fœliciter, & brevi tempore ad sanitatem pervenere, eo quia congruis auxiliis omnis tumoris causa sublata fuerat. Ideò divinus Senex volens hoc nobis significare, mira brevitate id fecit, cum dixit: Si in vulneribus fortibus, & pravis tumor non appareat. dicens enim tumor non appareat, supponit adesse tumoris causam, licet tumor non sit conspicuus, quo loquendi modo usus est etiam 2. Aph. 6. dicens: Quicumque dolentes aliqua corporis parte dolorem non sentiunt, his mens ægrotat; per dolentes enim, dolorem autem non sentientes, eos intelligit, qui habentes dolorificam aliquam causam, dolorem tamen non sentiunt, quod ægræ mentis est signum. Quando igitur non supervenit tumor, non est simpliciter malum signum, sed tunc tantum, quando non apparet, hoc est quando præsens est tumoris causa, & nullus apparet tumor. Sicuti nec quando qui supervenit, simpliciter evanescit, sed quando delitescit, hoc est, quando manet causa.

Sed



Sed neque semper, cum repenti evanescit tumor vulneratæ partis, sequuntur prava symptomata, quamvis ope medica non fuerit sublata tumoris causa; fieri enim potest, ut materia retrocedens feratur non in digniores partes, sed in aliquam aliam externam, & ignobiliorem, quod erit omnino sine periculo, quantum est ex parte ipsius transmissionis, neque prava illa symptomata subsequuntur. Quare concludendum erit, ingens malum esse, quando tumores apparere cœperint, & postea derepenti delituerint, nisi iusta de causa id contingat, hoc est, quia omnis tumoris causa medicis auxiliis tollatur, aut quia materia in aliam partem externam, & ignobiliorem feratur.

*Non semper  
retrocessus  
tumoris ma-  
lum porten-  
dit.*

Sed non immerito dubitabit aliquis, quomodo, si quis sanus existens vulneretur, fieri in eo possit materiæ transmissio ad partem aliquam principem, potius quam ad vulneratam, cum semper ad imbecilliores partes consueverit natura superflua, & noxia propellere, & tunc temporis rationi consonum sit, partem pravè vulneratam reliquis esse debiliorem: & cur magis tunc materia moveatur, quam prius, & quid ipsum ad motum concitet, quod enim à seipsa moveatur absurdum est dicere, sicuti nec dici potest, calore exagitatam, & veluti ebullientem huc, & illuc ferri, cum febris hoc potens nondum supervenerit, à natura ergo moveatur necesse est, sed cur ad nobiliores partes eam transmittit, & non ad vulneratam infirmiore? In hac difficultate dicendum est, evenire procul dubio, quod ait Hippocrates, & motorem esse ipsam naturam, quæ tamen perperam, & contra proprium institutum operatur propter imbecillitatem; imbecillis est enim facta collatione ad materiam, quæ vel quantitate, vel prava aliqua qualitate naturæ vires exuperat: verum sanitatis tempore, cum quiesceret, minus erat naturæ infensa; vulneris postea occasione fit humorum unà cum spiritibus exagitatio, & quoniam causa mota quiescente est deterior, materia illa naturæ molesta esse incipit, quapropter natura irritata ad expulsionem insurgit, sed impar existens perperam ob imbecillitatem operatur, & materiam, ut contingit, expellit. Non raro etiam ad quamcunque partem potius fertur materia, quam ad vulneratam, quoniam facultas, quæ regit vulneratam, ferè sit demortua; & ideo neque attrahit conveniens ali-

*Quomodo  
& cur per  
vulnera  
transmitta-  
tur materia  
ad partes  
nobiliores.*



mentum, neque quod ad eam transmittitur, admittit, non admissum autem aliò propellitur, & quando ad nobiliorem fit transmissio, totum est quod expellit, totum enim vincit potentia singulas partes. Sed de his hæctenus.

*Explicatio* Propter magnitudinem etiam ratione facultatis 6. Aph. 4. dicebat Hippocrates: Vulnere circumglabra prava esse; natura enim  
*4. Aph. 6. partic.* nequit humorum malitiam corrigere, & 5. Aph. 68. Crudos tumores, hoc est, rebelles, & contumaces, supervenientes pravorum esse, signum est enim naturam imbecillam esse; nec posse ob imbecillitatem materiam concoquere, quemadmodum contrariis de causis ait eodem loco, molles tumores esse bonos, & libro de loc. in hom. 44. Vomitus atræ bilis in vulnere lethalis & 4. Aph. 23. Quibuscunque ex morbis acutis, aut diuturnis, vel ex vulneribus, aut quovis alio modo extenuatis nigra bilis, sive ut sanguis niger de subter exierit, postridie moriuntur, si enim hic vomitus sit illius atræ bilis, quam succum melancholicum, seu fæcem sanguinis dicunt, exolutum robur hepatis, & lienis causam habet; unde accidit, ut non fiat separatio, & expurgatio ipsius sanguinis, quæ antea consueverat, sed hepar perperam operans coacervatum succum ad ventriculum, nonnunquam etiam ad intestina demittit. Si verò atræ bilis propriè dictæ, quæ ex sanguine, vel succo melancholico, vel bile flava assatis gignitur, exustiones viscerum, & prostratæ ob id facultatis est comes. Patet igitur fundamentum artis prælagendi in re vulnerum esse cognitionem eorum magnitudinis, & quoniam, quæ ratione propriæ essentiæ spectatur, facilis est cognitu, nec admodum difficilis, quæ penes dignitatem partis attenditur, nam licet oculis intueri, & specillo explorare, quousque pervenit telum, & illud idem ex iis, quæ supervenerunt colligere, sineque oculis, neque immisione specilli rem assequamur, difficillima autem, quæ ratione facultatis æstimatur, & tamen omninò ad prælagendum necessaria, propterea nullius consideratio est prætermittenda, quod ad ejus cognitionem possit nos ducere. Itaque & magnitudo vulneris ratione propriæ essentiæ, & quæ etiam penes dignitatem partis æstimatur, exactè perpendenda; quò enim majus est vulnus ratione propriæ essentiæ, ceteris paribus existentibus, eò etiam magis afficitur facultas, & quò nobilior



nobilior est pars, quæ vulneratur, eò etiam majorem aleam ipsa subit facultas.

Sed & quæ supervenerunt symptomata considerare oportet, eorum enim alia facultatis imbecillitatem consequuntur, ut est nigrorum dejectio, pravus vulneris color, & hujusmodi; alia verò etiam facultatem prosternunt, ut est convulsio, & insuper omnia diligenter perpendere, quæ in cognitionem status naturæ nos ducant, cujusmodi sunt ætas, temperatura, sexus, consuetudo, regio, tempus anni, aërisque constitutio, præcedens victus ratio, & similia. Si quis enim, dicebat Gal. primo ad Clauc. primo, primùm distinxerit eam, quæ secundùm ætates differentiam, postea eam, quæ secundùm temperaturas, atque potentias, & cætera, quæ hominibus insunt, colores dico, atque calores, habitudinesque, & pulsuum motus, & assuetudines, atque industrias, & animi mores, his quoque adjunxerit eam, quæ maris à fœmina differentiam, & quæcunque ad regiones, & temporum pertinent status aliasque ejus, qui nobis circumfunditur, aëris temperies recto modo consideravit, hic ad propriam laborantis naturam agnoscendam proximè accedet.

Sicuti autem magnitudo simpliciter vulneris, quam respectu *Magnitudo* facultatis totum corpus gubernantis dijudicamus, quid de vulne- *secundum* rato futurum sit, ostendit, ita magnitudo secundùm quid, quid *quid vul-* de vulnerata parte, hanc enim respectu facultatis affectæ partis *neris osten-* æstimamus, vulnus illud magnum dicentes, quod partis interi- *dit quid de* tum minatur, aut ejus functionis abolitionem, vel insignem sal- *vulnerata* tem læsionem, & quod à facultate non nisi ægre corrigi potest, *parte sit fu-* aut omninò etiam illam despicit. Patet enim hujusmodi vulnera *turum.* vires affectarum partium excedere. Quòd si inde proveniret læsio facultatis totum corpus gubernantis, non esset secundùm quid vulnus magnum, sed simpliciter. Hujus magnitudinis consideratio non est præsentis loci, mox tamen considerabitur; inquirendum enim est, quæ sanitas sit expectanda, ubi non sit intereundum vulnerato, & hujusmodi magnitudine ad id indigemus.



## CAPUT XIX.

*Num integra sanitas sit expectanda, an vitiata, quando ex vulnere non sit intereundum.*

**S**Icuti ex magnitudine ratione facultatis totum corpus gubernantis, quando tanta fuerit, ut necessarium sit virtutem succumbere, vulnus mortem allaturum judicamus, ita ex particulari magnitudine, quæ videlicet æstimatur facta collatione ad facultatem affectæ partis, conjicimus, num integra sanitas sit expectanda. Interdum enim accidit, ut evadat quidem vulneratus, sed cum alicujus partis, vel portionis ejusdem amissione, vel læsione cujuspiam actionis semper duratura, vel etiam cum ulcere incurabili, aut difficilis, & longæ curationis, vel cum atrophia alicujus partis, vel alio quodam vitio; neque alia de causa, nisi quia facultas est imbecillior, quam ut corrigere vulnus possit.

*In quo sita sit partis imbecillitas ob quam non, est secutura integra sanitas.*

In eo autem sita est hæc imbecillitas, quod non potest partes divisas per ejusdem naturæ medium copulare, quod tamen ad actionis integritatem, & partis conservationem est necessarium, vel loco deperditæ substantiæ alteram generare, quæ tantumdem valeat, vel in proprium locum reducere partem, quæ ab eo recessit, prout requirit ejusdem actio, & naturalis ejus status, aut pati, ut ab ipso medico reducatur, vel etiam nullo modo possit divisas partes agglutinare, aut substantiam generare, quæ vacuum repleat, eò quod impedimenta remove nequeat. Etenim ratione primi si ob dissectum nervum pereat voluntarius motus alicujus partis, non potest sperari nisi vitiata sanitas cum jactura videlicet illius actionis, cum non possit natura, ut superius explicatum est, nervum dissectum agglutinare, nisi per heterogeneum medium, quod irradiationem qualitatis animalis, qua pars redditur idoneum subjectum sensus, & motus, non admittit; unde sicuti in posterum pars, ad quam fertur dissectus nervus, qualitate hac privabitur, ita & actione, ad quam necessaria est illa qualitas. Ratione verò secundi, si vulneretur oculus, ita ut effluat, exempli gratia, humor albugineus, quia hunc in adultis natura regenerare



nerare non potest, nec aliud substituere, quod officium ejus suppleat, non sequitur integra sanitas, sed visione in posterum carebit oculus. Propter tertium autem, si fuerit luxatio cum vulnere, mancus erit ex illa parte vulneratus, licet sanetur vulnus, quoniam nec per se potest natura os, quod à proprio loco recessit, in eundem reducere, nec pati, ut à medico reducatur, quemadmodum suo loco explicabitur. Et propter quartum, si vulnus in substantia vesicæ contingat, ita ut ad cavitatem penetret, etiam si tale non sit, ut ratione facultatis totum corpus gubernantis magnum dici possit, aut etiam magnitudo hæc recesserit, attamen ulcus omne genus auxilii conamens remanebit, eo quod natura nequeat vulnus vesicæ conglutinare, non solum quia exanguis est, & paucò calore prædita, & quod propter situm, & substantiæ tenuitatem adduci labia ad mutuum contactum nequeunt verum etiam, quia urina per vulnus assidue percolans, coalitum impedit. Sic si cariem os contraxerit, nunquam vulnus carne replebitur, nisi, quod cariosum est, cesserit, & propterea periculum est, ne remaneat ulcus diuturnum, fistulosum scilicet: rarò siquidem natura sua spontè cariosum os expellit, nisi à prudente medico succurratur. Quocirca si manualet operam subterfugiat, actum est.

Ex his tamen manifestum est, impotentiam hanc facultatis partis non semper pendere ab essentielle ejus imbecillitate, verum & non rarò ab accidentali: nervum enim dissectum propter essentialem imbecillitatem per medium homogeneum agglutinare non potest, at vesicam dissectam propter accidentalem, propter situm scilicet, substantiæ tenuitatem, ac usum ipsius. Similiter, & incisam arteriam, motus enim ipsius efficit, ut naturæ frustretur actio, unde remanere solet aneurisma agglutinata cute, non autem arteria.

Magnitudinem hanc particularem vulneris ostendunt substantia partis, substantiæ modus, actio ejusdem, & usus, ac situs, necnon & superveniens affectus: eam quidem, quæ pendet ab essentiali imbecillitate, substantia partis, & superveniens affectus; eam verò, quæ ab accidentali, substantiæ modus, tenuitas scilicet, actio partis, situs, & usus: Quia enim substantia partis est

*Quæ significent particularem imbecillitatem partis.*



exanguis, & paucō calore prædita, imbecillium quoque est virium, unde vel nequit necessarium coalitum efficere, aut deperditam substantiam, ut decet, reparare, vel finit, ut quid superfluum colligatur, quod actioni partis impedimentum est allaturum, ut in articulorum vulneribus accidit, in quibus quandoque generatur tophus. Pariter superveniens gangræna essentialē imbecillitatem facultatis significat cum temperamentum partis destruat.

*Signa futuri interitus partis.*

Quomodo actio, usus, & situs partis accidentalem imbecillitatem facultatis ostendant, ex his, quæ in superiori capite dicta sunt, satis patere potest. Futurum partis, vel portionis ejusdem interitum superveniens affectus demonstrabit, ut corruptio, & gangræna, quæ compesci nequit, destruitur enim naturalis partis calor, cujus destructio est partis interitus.

*Signa læsionis actionis incorrigibilis.*

Actionis læsionem, & ex vulnere contingentem, & ob supervenientem affectum remansuram, differentia vulneris ostendet, & natura supervenientis affectus, namque si ob vulnus, vel quid ei adnexum deficiat, quod ad actionem sit necessarium, & ejus restitutio sit impossibilis ob jam allatas causas, actionis vitium vulnere sanato remanebit. Si ob nervi dissectionem amittat pars aliqua sensum, vel motum, vel utrumque, quoniam per medium homogeneum agglutinari nequit, quod tamen necessarium est, ut pars recuperet deperditam actionem, non est sperandus pristinus partis status. Similiter, si affectus superveniens, qui actionem vitiat, fuerit incorrigibilis, vanum est, sperare partis reditum ad

*Signa ulceris remanentis.*

naturalem statum. Ulcus remansurum, vel incurabile, vel difficile, & longæ curationis, & substantia vulneratæ partis ostendet, & ejus actio, ac usus, & situs, necnon & quæ superveniunt, quando enim hæc sanationi reluctantur, & sola ad est magnitudo particularis, ratione scilicet facultatis partem gubernantis, ulcus remanebit: quod alius affectus consequi potest pro natura partis affectæ; ad incisionem enim arteriæ in adultis effatu dignam, quæ unionem non admittit, sequitur aneurisma. Hæc à magnitudine vulneris ratione facultatis partem gubernantis expectare oportet. Quod si hujusmodi magnitudinem non habeat vulnus, integra sanitas expectetur.



## CAPUT XX.

*De tempore salutis & mortis.*

**Q**Uando autem futura sit sanitas, si servandus sit vulneratus, differentia vulneris ostendet, & quæ cum vulnere complicantur. Quibus addere debemus ex Celsi præscripto libro 5. capit. 26. considerationem corporis, ætatis, temporis, regionis, consuetudinis, & huiusmodi: sicuti enim ad faciliorem, & difficiliorem sanationem faciunt; ita ad citiùs, vel tardiùs consequendam sanitatem conferunt.

Quoad ad vulneris differentiam, vulnus in carnosâ parte existens, cæteris paribus citiùs sanatur, quàm in spermaticis, facillimum enim est, ut superius dicebatur, ex sanguine carnem fieri. Et omnino sanatur tardiùs vulnus, quod est in parte, cuius substantia, vel actio, vel usus, vel situs sanationi repugnat, si tamen cætera sint paria, quod semper subintelligi debet. Quò majus etiam extiterit vulnus secundum propriam essentiam, & pro sanatione pluribus operibus indiguerit, eò tardiùs sanari solet, citiùs verò, quò fuerit minus, & paucioribus indiguerit: vulnus enim carnosæ partis, quod solum agglutinationem requirit, brevi sanatur, & eò citius, quò minus fuerit; ut aliqua viginti quatuor horarum spatio, & citius etiam fuerint agglutinata; plurima autem intra quartam; perpaucorum sanatio ad septimam extenditur si ut decet, tractentur. At vulnus, pro quo sanando necessaria est carnis non exiguæ generatio, tardius sanatur, unde Celsus loco citato: Pejus etiam vulnus, ex quo aliquid excisum est; nisi tamen quid aliud obstiterit, intra decimam quartam, ut plurimum sanantur; pauca ad vigesimam perveniunt. Vulnus verò contusum tardiùs sanatur, quàm incisum tantum, quoniam contusam carnem suppurare necesse est, antequam nova regeneretur. Unde pejus est, quod etiam collisum est, dicebat Celsus, quàm quod tantum discissum est, adeò ut acuto quoque quam retuso telo vulnerari sit commodius. Tardiùs quoque sanatur vulnus, ex quo portio aliqua partis abscissa, aut lacerata fuerit, vel ita excisa,



cisa, ut etiam ex parte pendeat, quàm si sola adesset sectio cum substantiæ defectu; hinc Celsus loco citato: Pejus etiam vulnus est, ex quo aliquid excisum est, ex quoque caro alia parte abscissa, alia dependet. Vulnera item orbicularia, ut ibidem Celsus dicebat, tardiùs sanantur, cum enim angulis careat circulus, undique labia circularis plagæ à se invicem distant; quare quò propinquius fuerit vulnus orbiculari figuræ, eò tardiùs sanabitur. Vulnus item, quod difficulter expurgatur, tardiùs sanari solet, quoniam sanationis impedimentum non æque promptè tollitur, & ob id, quod inæquale est, tardiùs sanari solet, quam æquale. Vulnus etiam in parte existens, quæ facilè superfluitates recipit, tardiùs sanatur: qua de causa articulorum, & vulvæ vulnera, tardè sanantur. Vulnera pariter omnia, quæ præstantem aliquam partem lædunt, & sunt cum periculo vitæ, tardè sanitati restituuntur, nec solùm quia pejus afficiunt, verùm etiam quia cogimur, ut futura mala arceamus, tenui victu, & evacuationibus uti, unde penuria alimentì inducitur, & virtus imbecillis evadit, & ex consequenti partim materiæ, partim agentis defectu deperdita substantia, vel quid aliud ejus loco regenerari citò non potest.

Quomodo autem, quæ cum vulnere complicantur, sanationem protrahant, facilè est videre; Natura enim faciliùs, & citiùs unicum affectum corrigit, quàm plures, & à pluribus pejus habet, quàm ab unico, & Medicus ab iis, quæ accidunt, cogitur non rarò posthabito vulnere aliorum habere rationem. Hinc videmus, ubi inflammatio supervenit, vel corruptio, vel gangræna, non parum remorari sanationem. Et quantò magis, quod supervenit, partis temperamentum malè afficit, & magis fuerit rebelle, eò etiam tardiùs subsequuturam sanitatem non est dubitandum: qua de causa Hippocrates 5. Aph. 68. dicebat, tumores laxos esse bonos, crudos verò malos; sub his enim malè disponitur natura partis, unde Gal. in com. ejusd. Aph. Neque enim fieri potest, ut sit tumor renitens benè concoquente membri natura humores ad ipsum fluentes. Ossis fractura vulneri annexa sanationem valdè protrahit, & si recedere os oporteat, longius etiam protrahitur, ut ad quadragesimum, & sexagesimum, immo



immo & ad menses, & annos quandoque producat integrā vulneris sanatio. Sed de hoc aliās.

Extranea intra vulnus contenta, quæcunque ea fuerint, si educi à principio nequeant, aut incuria non fuerint extracta, sanationem & ipsa impediunt, potissimum, quæ non citò putrescunt; tarde enim expelluntur à natura, & symptomata invehunt: quòd si quid insuper ossi infixum fuerit, longè admodum protrahetur sanatio, imbecillima enim est expultrix ossis. Plumbum tamen quamdam habet affinitatem cum ipsa natura, & propterea coalitum vulneris non impedit. *Plumbum affinitatem quamdam habet cum humano corpore.* Aetas, & ipsa non parum facit ad citam, vel tardam curationem; nam pueri, ut dicebat Celsus, & adolescentes citius, & facilius curantur, ob virtutis robur, tardius, & difficilius senes ob innati caloris penuriam. Similiter & corporis status; nam, ut dicebat Celsus, citius, & facilius sanatur valens, quàm infirmus, & neque nimis tenuis, neque nimis plenus, quàm si alterum ex his est, integri habitus, quàm corrupti. Aliquid etiam facere videtur consuetudo, nam facilius sanatur exercitatus, quam iners; sobrius, & temperans, quam vino, Venerique deditus; quamvis id contingat potiùs, quoniam consuetudo integrum, & vitiatum reddere habitum corporis potest, sicuti & præcedens victus ratio, ideoque consuetudo considerata nobis est, ut quæ ad statum corporis cognoscendum non parum conducat, quod etiam de ætate dicendum est. Aëris temperatura & ipsa non parum habet momenti ad citam, & tardam curationem, tardius enim sanantur hiberno tempore, & in frigido aere, quàm in calido, & temperato. Inæqualis constitutio aeris malè vulnera afficit; repentinas enim mutationes non fert natura. Calida, & humida constitutio pessima est, in ea siquidem fiunt putredines, quæ primo pericula afferunt, deinde etiam curationem protrahunt. Idem est de regione.

Quò tamen determinatum magis tempus futuræ salutis prævideri, & prædici possit, vellem, qui curam habet vulnere, *Ad præcognoscendum* eum in operibus naturæ non mediocriter versatum esse. Hinc *determinatum tempus futuræ salutis,* etenim, quanto indigeat tempore natura sic se habens, ut agglutinationem talem faciat, vel tantam carnem generet, vel tantam suppurationem moliatur, intelligens; dein eorum vim, quæ



ad citam, vel tardam sanationem faciunt, secum perpendens, quando expectanda sit sanitas ad amissum cognoscet. Ex iisdem ferè cognoscitur, nuum citius, an tardius futura sit mors, quando intereundum sit vulnerato; namque cum vulnera interficiant, quia ad ultimum illum magnitudinis gradum facultatis ratione perveniunt, ea vulnera celerius interiment, quæ celerius magnitudinem hanc sibi asciscent, tardius verò, quæ longiori tem-

*Quæ signi-  
ficent, quan-  
do vulnus  
ad summum  
magnitudi-  
nis gradum  
sit perven-  
turum,*

pore; at quibus citius, aut tardius accidat hæc magnitudo, differentia vulneris ostendet, quæ connectuntur, status corporis, ætas, consuetudo, aëris temperies, regio, & huiusmodi; vulnus enim, quod principem afficit partem, aut ea, quæ principem trahit in consensum, citius sibi hanc magnitudinem associat, & eo etiam citius, quo in sui essentia fuerit majus. Similiter & vulnus, cui associatur convulsio, gangræna, sphacelus, immoderata sanguinis profusio, Syncope, nigrorum dejectio, celeriter sibi hunc magnitudinis gradum adnectit. Sed de supervenientibus affectibus deinceps pertractabitur. Citiùs etiam moritur infirmus, quàm valens, & cacochymus, quàm bonis succis præditus, & omninò mali habitus, quàm boni, & tempore calido, quàm frigido, & prava aeris constitutione, quàm salubri, in regione calida, quàm frigida. Citiùs etiam moritur senex, quàm juvenis, nisi ex fluxione, aut putredine mors accidat: horum enim occasiones in juvenibus sunt fortiores; calidiores enim sunt, & calidis succis abundat, quibus de causis dicebat Hip. lib. de Vuln. cap. Et si aliàs ex vulnere moriturus est, junior seniore citiùs perit. Attamen si diligenter intueamur, quoniam vulnera per se non interficiunt, sed solùm ob supervenientem, aut connexum affectum, ut superiùs dictum est, sufficeret ad præcognoscendum tempus mortis adnexi affectus magnitudinem considerare, quantum videlicet corporis vires exuperet; sed quoniam magnitudo hæc non potest & ipsa nisi ex aliis fieri manifesta, cogimur & reliqua considerare, quæ non solùm essentialem affectus magnitudinem ostendunt, verùm etiam ipsius virtutis statum: unde non ignoranda erunt, quæ ab Hip. lib. Præfagiorum, & alibi de futurorum præfagatione traduntur. Ad pulsus quoque, & ad excreta attentos esse oportebit. Hæc tamen ab aliis Medicinæ partibus sunt petenda.

Ex



Ex quibus luce clariùs apparet, simplicem Chirurgum non posse esse perfectum vulnerum curatorem. Plurimum etiam confert ad futurum eventum præcognoscendum tempus, & eventus dierum criticorum consideratio, de quibus, quoniam in re vulnerum multas continent difficultates, & plerique difficultatem videntes subterfugerunt, aliquid omninò dicendum est.

## CAPUT XXI.

*Quomodo computandi sint dies critici in vulneribus, & qua ratione natura in vulneribus moveat.*

**N**ihil magis vulgatum est in vulneribus, quàm computatio dierum, adeò ut etiam barbitonfores frequentissimè quartæ, septimæ, decimæquartæ, & aliorum criticorum dierum sermonem habeant; Verùm cui fundamento innitatur hæc dierum computatio in vulneribus, paucos reperias, qui id determinent, vel quia, qui de ipsis tractatus instituerunt, id non animadverterint, vel quia rei difficultas eos deterruerit; A ratione siquidem aliena videtur hæc dierum observatio in vulneribus, quoniam morbi non sunt, qui crisi terminentur, si crisis, ut communiter statuitur, est subita alteratio ad salutem, aut mortem, vel dispositionem, cum qua accidit salus, vel mors, per materiæ expulsionem, aut permutationem: & ideò in solis materialibus morbis contingit, atqui vulnera immateriales sunt morbi.

*A ratione videtur aliena computatio dierum in vulneribus, ut quæ non sunt materiales morbi.*

Altera ex parte docet experientia, quantumtribuendum sit criticis diebus in re vulnerum, cum insignes permutationes in ipsis contingant, & certa signa appareant tum ad bonum, tum ad malum, & ideò etiam Hip. eos observasse visus est, nam lib. de Coacis Prænot. dicebat: Incipere febrem in capitis vulnere quarta die, aut septima, aut undecima, valde lethale: judicatur autem plerumque si quarta vulneris die incæperit, ad undecimam; si septima, ad decimamquartam, aut decimamseptimam; si undecima ad vigesimam. Et lib. de cap. Vuln. Ubi commissum fuerit erratum in curatione, ut plurimum in hieme febrem supervenire ante decimam quartam asserit, æstate verò post septimam: item aliquos

*Experientia comprobat observationem dierum in vulneribus.*



perire aut æstate ante septimam, hieme verò ante decimam quartam. 4. Popul. refert, filio Metrophanti capite vulnerato duodecima febrem supervenisse, & circa vigesimam quartam mortuum esse. Et 5. Pop. refert, Autonomum ex capitis vulnere mortuum decima sexta die: & famulam in Omila decima quarta, cui febris octava die supervenerat: & filiam Nerei ab amica ludente percussam lata manu in sinciput, quæ tunc vertigine capta est, & sine spiritu erat, & cum domum venisset, statim vehementi febre correpta est, & capitis dolore, ac rubore circa faciem, nona periisse, cum septima die circa aurem dextram pus processisset graveolens subrubrum amplius cyatho ex qua evacuatione videbatur sibi melius habere, & allevatam esse, sed paulò post aucta est febris, & alia symptomata supervenerunt: & filio Philes ex vulnere capitis nona die febrem supervenisse, & dein mortuum esse: & Aristippum in supernum ventrem violenter, & graviter sagittæ ictu percussum septem diebus mortuum. Multos alios casus recenset in lib. Epid. quibus apertè colligitur, ab ipso hujusmodi dies fuisse observatos. Idem 4. de Morb. elici potest, tex. enim 22. dicebat: Liberantur autem ulcera ab inflammatione quinta die, & juxtà horum dierum rationem, prout etiam vulnera fuerint magna, & tertia, & quinta, & septima, & nona, & undecima, deinde absoluto primo circuitu rursus secundi principium tertia sequens hinc est, quæ à prima decimaquarta est. Maxima verò ulcera decimaquarta die ab inflammatione liberantur. Libro etiam de fracturis ejusdem sententiæ deprehenditur; inquit enim text. 33. com. 3. Qui verò prima, aut altera die lana deligandum censent, tertia verò, & quarta lineis deligantes adstringunt, at tunc maximè extendunt, loquebatur de ulceribus cum ossis fractura, hi in arte medica, atque in re magni momenti ingens peccatum committunt, nunquam enim vulnera tertia, vel quarta die sunt vexanda, ita ut in universum cavendum sit etiam ab admotione scalpelli his ipsis diebus, & ab omnibus prætereà aliis, quibus vulnera irritantur; plerumque enim in tertia, & quarta die vulnera solent recrudesce, in quibus tum inflammationes, tum sordes excitantur, quæque febres afferunt. Libro etiam de carnibus horum dierum meminit, dicebat enim: Ulcera magna in capite, aut reliquo corpore quarta die



die incipere inflammari, & septima die sedari, sin aliter, homines eo tempore mori.

Neque tollere difficultatem videtur, quod aliqui dicunt, observandos criticos dies in vulneribus propter confluentes humores, si enim ita res se habet, cur fit dierum computatio etiam in vulneribus, quibus nulla supervenit fluxio? aut cur incipienda potius computatio à die vulneris, quod Hippocratem voluisse, ex supra allatis patet, quàm à fluxionis principio?

Pro hujus difficultatis solutione supponendum in primis est, *Primum* Crisim esse subitam alterationem ad salutem, vel mortem, vel ad *suppositum.* dispositionem, cum qua accidit sanitas, aut mors: qua ratione *Crisis quid.* dicebat Gal. 2. Aph. 13. Judicatio est subita in morbo vel ad sanitatem, vel ad mortem permutatio. Et Hip. 1. Epid. sec. tertia, cum dies decretorios enumerasset, subjungebat: Oportet autem advertere, ac nosse in his temporibus judicationes futuras esse ad salutem, vel perniciem, aut inclinationem ad melius, aut deterius: quamvis Gal. 3. Cris. 1. strictius sumens crisis nomen, & per excellentiam, veram crism tantum appellet subitam ad sanitatem *Crisis per* mutationem. Quoque hujusmodi alteratio præsupponit naturæ *excellen-* actionem in materiam morbificam, & materiæ evasuationem, *tiam.* aut saltem permutationem, unde Gal. 2. Aph. 13. Fit autem, de *Crisis præ-* alteratione hac loquebatur, natura separante à bonis mala, & ad *supponit a-* excernendum præparante. Per hoc autem, quod ait natura se- *ctionem na-* parante à bonis mala, non est intelligenda actualis separatio, sed *turæ in cau-* *sam morbi-* conatus ad separandum; non enim semper separationem assequitur, *ficam.* ut patet in crisi mala. Quoniam ergo separationem boni à malo, & mali expulsionem quandoque integrè assequitur, quandoque verò imperfectè, & ex parte tantum, aliquando etiam unà cum malo bonum evacuat, vel pro malo id, quod bonum est, nil *Crisis disse-* mirum, si sint crises perfectæ, imperfectæ, & bonæ, & malæ, *rentiæ.* semper tamen perturbatio præcedit propter pugnam, & expulsio subsequitur, inde alteratio, quæ omnia quandoque crisis nomine appellantur. In solis itaque materialibus morbis crisis est expectanda, ideoque ad coctionis signa respicimus, qua ratione dicebat Gal. 3. Cris. 4. Si effatu dignæ transmutationes in coctionibus



fiant in diebus indicatoriis, indicia sunt, quòd sequentes indicatorii dies ægrotum à morbo liberabunt.

*Secundum  
fundamen-  
tum.*

*Dies con-  
templabiles.*

*Radicales  
indicantes.*

*Interciden-  
tes.*

*Dies verè  
decretorii.*

*Natura or-  
dinatè agit.*

*Unde vim  
recipiant  
dies critici.*

Sit secundum fundamentum, quòd quamvis decretorii dies dividi soleant in principes, & radicales, cujusmodi sunt septimus, decimusquartus, vigesimus, vigesimus septimus, trigesimus quartus, & quadragesimus, & indicantes, qui & contemplabiles dicuntur, cujusmodi sunt quartus, qui septimi est index, & undecimus, qui est index decimi quarti, & decimus septimus, qui vigesimi, & vigesimus quartus, qui vigesimi septimi, & trigesimus primus, qui trigesimi quarti, & trigesimus septimus, qui quadragesimi: nec non & in intercidentes, seu intercalares, cujusmodi sunt, tertius, quintus, sextus, octavus, nonus, decimus tertius, decimus nonus, vigesimus primus, & trigesimus, verè tamen decretorii illi tantum sunt habendi, veluti dicebat Gal. lib. de Hum. com. 2. tex. 20. in quibus frequenter solent contingere veræ, securæ, & perfectæ vires, cujusmodi sunt, qui radicales appellantur, inter quos etiam perfectissimi sunt, qui vigesimam non excedunt, & radicalibus proximi sunt indices: licet enim sui naturæ futuræ crisis in proxima radicali sint prænuntii, quandoque tamen, & perfectè indicant, Intercidentes appellati, quamvis in eis nunquam fiant crises, quia tamen rarissimè fiunt veræ, securæ, & perfectæ, sed ut plurimum imperfectæ, infidæ, & malæ, verè decretorii non sunt dicendi; non potest enim mors, & ejus signa dies verè decretorios statuere, ut quæ ex actione materiæ morbificæ in naturam proveniant, ad quam quidem statum tempus haud requiritur, cum inordinatè agat materia morbifica. At natura in suis operibus ordinatè procedit, & ideò non quocumque tempore ad expellendum insurgit, sed diebus statutis, qui ob id critici appellantur. Parum postea refert quantum ad præsentem tractatum attinet, sive statuatur, idcirco hosce dies decernendi vim habere, quia corpora cœlestia, potissimum autem Luna, (nam Sol illis solummodò decretoriis diebus vim tribuere videtur, qui mensibus, & annis procedunt) quæ his inferioribus proximior est, & humida gubernare videtur, ita materiam disponat illis diebus ob certam dispositionem, quam recipit ob varium situm, quem tunc habet in Zodiaco ab eo, in quo reperiabatur à principio morbi,



morbi, ut illis diebus naturam ad expellendum maximè pròriter, pariterque ita naturam afficiat, ut illis diebus maximè insurgat ad expellendum, unde necessariò magnæ tunc temporis contigunt in morbis mutationes, & modò ad bonum, modò ad malum, prout benevolos planetas, aut malignos aspexerit, sive ob certam dispositionem materiæ morbificæ, & ipsius naturæ, seclusa cælesti radice, eò quòd natura morbificam causam nitatur expellere, ipsa verò modò magis, modò minus reluctetur; ad unamquamque autem actionem statutum tempus requiratur, quod est critica dies; nam in morbo peracutissimo tempus requisitum est quartus dies, in simpliciter peracuto est septimus, in acuto exquisitè decimus quartus, & sic de reliquis; posteaquàm non expellit natura statim ac adest materia offendens, sed quando ipsa cedit, non semper autem cedit, ideoque natura priùs materiam vincit, concoquit, & ad expulsionem præparat, inde expellit; Parum inquam refert, sive hoc, sive illud accipiatur, hoc tamen verissimum est, & longa experientia confirmatum, naturæ tantopere amicam esse hanc motionem in decretoriis diebus, ut in illis non solum veras crises moliatur, verùm etiam alias motiones, & operationes tentet; ut se à re molestante liberet; nam modò coquere, & suppurare conspicitur, modò discutere, aut alio aliquo pacto infestantem materiam expellere, etiamsi veram crìsim non faciat. Sic apoplexia terminari solet, sic angina, & convulsio, sic tumores ad suppurationem, & ruptionem terminos habent, & his Hippocrates decretorios dies assignavit, ut in Prælagiis, & Aph. videre licet. 6. enim Aph. § 1. dicebat: Quicumque sani dolore capitis repentè capiuntur, & statim muti fiunt, & stertunt, in septem diebus pereunt, nisi febris apprehenderit. Et 5. Aph. 6. Tetano correpti in quatuor diebus pereunt, si verò hos effugerint, salvi fiunt. Et lib. Prælag. de angina loquens; Si verò neque in diebus indicatoriis dissipetur erysipelas, neque tuberculum ad externam partem convertatur, neque pus tussiendo ejiciat, facileque ac sine dolore degere videatur, mortem significat, aut ruboris recidivam. Et eod. At verò aliæ suppurationes rumpuntur plurimæ quidem vigesimo die, aliæ vero trigesimo, aliæ quadragesimo, aliquæ vero ad sexaginta dies perveniunt. Considerare verò futuræ suppurationis



*Cur confi-  
derentur  
dies critici  
in morbis.*

tionis principium oportet suppuratione facta ab ea die, qua primum homo febricitavit, aut si fortè ipsum primum rigor apprehenderit, & si pro dolore gravitatem sibi esse factam dixerit in eo loco, in quo dolebat, hæc enim in principiis suppurationum fiunt. Ut concludere liceat considerandos esse criticos dies in morbis, non solum gratia veræ crisis, verum etiam, ut omnes naturæ actiones perpendi possint; & à malis bonæ sejungi, nam, si quid boni apparuerit in die critica, majorem fidem à die accipit; propter diei enim virtutem, sperandum est, id esse naturæ opus non coactæ, & à materia tumultuante irritatæ, sed vincentis. At si in ea præexistens malum non minuatur, aut etiam quid mali superveniat, à die majorem malitiæ suspicionem recipit, posteaquam natura non potuit ea die, qua ab astris solet beneficium, & gratiam suscipere, utilem actionem præstare: Et si quo tempore maximè solet eniti, ut se à re molestiam inferente liberet, id non facit, aut etiam perperam operatur, ut malum adveniens prohibere nequeat, magnum profectò est mali argumentum, naturamque defecturam vereri oportet.

*Tertium  
fundamen-  
tum,*

*Superve-  
nientia vul-  
neribus.*

Sit tertium fundamentum, quòd ex vulneribus quædam ad sanitatem foeliciter perveniunt, nullo etiam superveniente symptomate, quædam verò ad sanitatem tendunt satis aptè, sed cum interventu alicujus symptomatis à principio, quædam etiam tandem ad sanitatem perveniunt, sed per multos casus: alia verò in mortem terminantur, atque vel cito, puta inter primos tres dies, vel pluribus interpositis diebus. Quæ verò superveniunt vulneribus, alia vi vulneris superveniunt, & in parte vulnerata, vel in alia, sed ejus causa, alia verò alibi ob apparatus morbificum; Si enim vulnere superveniat inflammatio, putredo, gangræna, &c. Similiter si consentiente nervorum principio, convulsio vulnere manus, aut pedis superveniat, vi vulneris hæc supervenisse non est dubitandum. At si corpore existente cacochymo, aut plethorico, occasione vulneris, commotis succis, concitetur in venis putredo, febris hæc ad rem vulneris non attinet, sed est affectus separatus.

*Quartum  
fundamen-  
tum.*

Sit quartum fundamentum, quòd in iis vulneribus, quæ foeliciter ad sanitatem perveniunt, non interrupta naturæ actione



ne ab ullo superveniente symptomate malo, ut plurimum nulla *De termi-* apparet in quovis die mutatio, sed omnes dies sunt æquales, ut *natione vul-* plurimum dixi, quoniam observavi quandoque in vulneratis die *nerum.* critica sudorem copiosum erupisse, quandoque etiam alvi fluorem contigisse cum infirmi alleviatione, ita ut diceret vulneratus, se veluti à sarcina, & pondere levatum, etiamsi nihil mali accidisset vulnerato. In iis quoque, quibus supervenit aliquod malum, sed eo non obstante ad sanitatem tendunt, ut plurimum nulla alia apparet in diebus decretoriis immutatio, nisi cessatio, & alleviatio illius mali absque conspicua evacuatione, modò, quod supervenit, vi vulneris supervenerit, & omninò fuerit accidens vulneris. Sic dolor, sic inflammatio cessare, aut levare videtur, & febris eorum occasione suborta, & etiam generationis puris. Similiter in vulneribus, quæ per varios casus ad sanitatem tendunt, in diebus decretoriis apparere solet immutatio aliqua ad malum, puta supervenit febris in quarta, septima, undecima, decima quarta, vigesima &c. Et sic de inflammatione, & reliquis, sed semper absque sensibili evacuatione, quando tamen quod supervenit, vi vulneris accidat. Idem evenit in iis, quæ ad mortem terminantur, apparet enim in diebus decretoriis immutatio manifesta ad malum, ut plurimum absque evacuatione, si vi vulneris, non apparatus morbifici mors sit sequutura. At, quando morbifici apparatus causa succedunt mala, in diebus decretoriis apparent sensibiles immutationes cum evacuatione, & motu materiæ peccantis, & terminatio modò fit ad bonum, modò ad malum, sicuti fit communiter per putridas febres. Neminem esse credo, qui curans vulnera non observaverit, quandoque putridam febrem supervenisse, quæ conspicua aliqua evacuatione fuerit iudicata, modo perfectè, modo imperfectè.

Sit quintum fundamentum, quòd occasione vulneris accidit *Quintum* in corpore vulnerati turbamentum quoddam, humorumque agi- *fundamentum* ratio, quæ natura sedat, si valens fuerit, & turbamentum, ac *Ex vulnere* exagitatio non nimis excedens; aliquando etiam ab iisdem irrita- *accidit tur-* bamentum tur ad cujuscunque noxii expulsionem; atque si corpus pravis sca- *in corpore* teat succis, qui tamen rebelles non sint neque qualitate, neque *vulnerati,*



quantitate, sed sequaces & natura fuerit robusta, evacuationes in vulnerato contingere solent, quas observamus non rarò in sanis, ut quando natura per sudorem, aut vomitum, aut alvi fluxum, aut fluxum sanguinis narium vitiosos succos propellit: & ob id hujusmodi motiones in vulnerato non sunt dicendæ symptomata, sed opera naturæ potiùs, cum id, quod molestum est, ob naturæ robur expurgetur, tantùm abest, ut aliqua adsit in actionibus noxa. Aliquando etiam irritatur, & quodammodo opprimitur ab illo turbamento, sive ob sui imbecillitatem, sive ob turbamenti vehementiam, & propterea perperam expellens operatur, transmittitque quodlibet obvium in vulneratam partem, vel alias, sive ut ab eo turbamento liberetur, eò transmittat, tanquam ad imbecilliorē partem, sive ut opem ferat afflictæ parti, quasi ab ea turbamenti causam agnoscat, posteaquam consuevit natura ad partem laborantem transmittere spiritus copiosiores unà cum sanguine, ut fortiùs fiat expulsio infestantis causæ, quando in primis conatibus nihil profecit, ut dicebat Gal. 13. Meth. 3. Hinc varia superveniunt vulneribus, cum natura vulneratæ partis nequeat, quod sibi transmittitur, moderari, vel ob sui imbecillitatem, vel ob nimiam copiam materiæ transmissæ, aut ejusdem pravam qualitatem; ideoque modò inflammatio, modò erysipelas, putredo, gangræna, sphacelus, convulsio &c. vulnere superveniunt pro qualitate & quantitate materiæ, ac partis robore. Quandoque etiam natura non expellit, sed in turbatis humoribus ob dispositionem putredo accenditur. Quod non minus evenire consuevit, quando expellit, sed tamen adhuc apparatus morbificus in venis remanet. Hujus turbamenti meminit Hipp. lib. de Mor. tex. 22. cum dicebat: Quin & ulcera si curentur, maximè in his diebus inflammantur, venit humor ad omnes venas, cum turbatur, easque replet.

*Non fit crisis in vulneribus.*

Ex his elicio primò, in vulneribus, ut vulnera sunt, non fieri crisin, siquidem vulnus est immaterialis morbus. Si verò contingat ipsi adnecti materiale morbum, eatenus vera crisis fieri potest, quatenus talis morbus aptus est per crisin terminari: si enim ob apparatus morbificum putrida febris succendatur, crisi terminari poterit, non secus ac reliquæ febres.

Elicio



Elicio secundò , quamvis in vulneribus non fiat vera crisis, *Cur obser-*  
 nihilominus observandos semper esse dies decretorios , primò qui-*vandi dies*  
 dem ob turbamentum à vulneratione contingens; ipsum enim non *critici in*  
 utcumque semper sedat natura , sed sicuti per putridas febres sta-*vulneribus.*  
 tutis diebus ad expulsionem materiæ peccantis insurgit , ita in  
 vulneribus non statim semper ipsum sedat , aut movetur ejus ra-  
 tione ad expellendum , sed statutis diebus, & modo citius, modo  
 tardius pro ipsius naturæ robore, ac imbecillitate, & pro turba-  
 menti vehementia. Et certis diebus hæc contingunt , vel ob lu-  
 næ , cœlestiumque corporum dispositionem, vel quia in hoc vul-  
 nere , turbamentum contingens hoc tempus requirit, ut sedetur,  
 aut, ut naturam cogat, vel vincat. Ubi ergo in istis diebus nulla  
 appareat immutatio ad malum , sed potius , quæ prius aderant  
 symptomata sedantur , signum est à natura turbamentum sedatum,  
 ideoque negotium ad salutem fœliciter tendere judicandum. Hoc  
 est, quod dicebat Hipp. 4. de Mor. tex. 22. Liberantur autem ul-  
 cera ab inflammatione quinta die , & juxta horum dierum ratio-  
 nem, prout etiam ulcera fuerunt magna, & tertia, & quinta, &  
 septima, & nona : deinde absoluto primo circuitu rursus secundi  
 principium tertia sequens hinc est : maxima verò ulcera decima  
 quarta die ab inflammatione liberantur. E converso ubi hisce die-  
 bus aliquod malum supervenerit, puta dolor, inflammatio, febris, &c.  
 vel præexistens non sedatur, aut minuitur, signum est à natura  
 non potuisse turbamentum sedari, ideoque vel difficiliorem, &  
 diuturniorem fore curationem, vel sequuturam etiam mortem pro  
 ratione partis, ad quam facta fuit transmissio, & ipsius vulneratæ  
 partis, & illius, quod supervenit, mali. Certum est, rarò con-  
 tingere motum naturæ ad bonum, posteaquam omnis ejus motus  
 procedit ex hoc, quòd non potuit turbamentum sedare, vel irri-  
 tatur ad expellendum, itaque ut plurimum errans expellit, aut ad  
 principem partem, aut ad vulneratam, vel ei proximam. Ideò,  
 ubi motum aliquem naturæ conspiciamus, potissimum si febris unà  
 accesserit, malum prælagire possumus. Idem est judicium de quo-  
 cunque malo superveniente absque motu, & evacuatione, ut  
 quando putredinis signa iisdem diebus apparent. Secundò ob-  
 servandi sunt dies, ut si fortè putrida febris occasione vulneris su-



pervenerit propter apparatus morbificum, veram dierum computationem habere valeamus, ac præterea certum iudicium de aliis supervenientibus malis elicere; namque diebus decretoriis terminari, aut minui consuevere, quod si non, aut mors, aut diuturnitas, & difficultas curationis pro qualitate vulneris, & eorum, quæ supervenere prædici potest. Amplius, si tumor supervenerit, observandi sunt dies, ut habeatur suppurationis, & eruptionis tempus, aut resudationis, si ea fortè sit terminandus, aut corruptionis; ob has enim causas tumores habent proprios dies decretorios, ut ex Hipp. colligitur lib. Prælag. natura enim materiam tumorem efficientem elaborare nititur, atque evincere, non secus, ac eam, quæ febres putridas efficit. At si resolutione terminandus sit tumor, quoniam lentè, & paulatim fit, rarò opus est decretoriis diebus, licet imminutio tumoris hisce diebus apparere soleat, qua ratione dicebat Hipp. lib. Prælag. tex. 31. com. 1. Si trigesimum transcendit diem, de tumore iliorum duro, & dolente loquebatur, febrisque detinet, & tumor non desistit, fore suppurationem hoc loco, & reliquo ventre, significat: quamvis enim de iliorum tumore loquatur, eadem tamen ratio in omnibus militat, modò ab humoralis materia ortum habeant. Tandem gratia curationis sunt observandi critici dies in vulneribus, per illos enim maximè cognoscimus veras, & utiles naturæ actiones, unde non erit difficile videre, qui motus sint cohibendi, qui sinendi, quique adjuvandi. Præterea hisce diebus ab omnibus his, quæ irritant, & provocant, abstinendum censebimus, ne ex hoc, quod nos ipsi concitamus, & ex eo, quod à vulnere contingit, fiat tantum irri-  
ramentum, ut ad ipsum sedandum natura sit impotens.

*Similis est  
observatio  
dierum in  
vulneribus,  
& in puer-  
perio.*

Ex quibus colligo eadem ferè ratione computari criticos dies in vulneribus, ac in partu computentur; nulla enim alia ratione videntur observandi critici dies in puerperio, nisi propterurbationem illam, ac motum, qui in partu accidit, posteaquam nec puerperium materialis est morbus, qui crisi terminetur, ac proinde, ut perspicuum fiat, num commotionem illam natura sedaverit, & omninò actiones naturæ adverti possint, observamus hosce dies, quibus adversus noxia consuevit insurgere, Hinc Hipp. à die partus computationem exorditur, quamvis & interdum



dum à febrè, quando videlicet occasione partus non supervenerit: quod & in vulneribus perpetuò est observandum. Apparet igitur, quid in hac difficultate sit sentiendum, & quid rationibus, quæ criticos dies à vulneribus ablegant, sit respondendum. Apparet etiam, quàm ad præfagiendum conferat horum dierum observatio, ut in vulneribus artis prognosticæ fundamentum non immeritò constitutur.

Animadvertendum autem aliquos voluisse, non semper computandos esse simpliciter dies criticos in vulneribus, sed quando-*Num dies dupliciter interdum sint computandi.* que dupliciter; Ubi etenim necessaria est aliqua operatio, ex qua inferatur turbamentum naturæ, atque irritamenti occasio, ut sectio insignis, atque terebratio in capitis vulneribus, necessarium est, dicunt, aliam computationem facere à die illius operationis: cum non sit major ratio de primo vulnere, quàm de secundo: nam sicuti si quis hodie vulneratur cras iterum vulneretur, necessarium esset duplicem facere computationem; ita si quis hodie vulneretur, & cras aliqua in eodem vulnere fiat operatio, necessarium quoque erit duplicem facere computationem posteaquam est novum vulnus manu medici factum, neque aliud est discrimen, nisi quod primum solam perniciem, aut læsionem respicit, hoc autem salutem per accidens: Sed hoc non facit, quin per se hoc non sit malum, cum sit continui solutio, substantiæ detractio, & huiusmodi, cujus ratione turbamentum inferatur naturæ. At mihi videtur hæc duplex computandi ratio dies decretorios confundere, quæ enim erit septima respectu primi vulneris, exempli gratia, quinta erit, vel sexta respectu secundi, quare nihil certi ex die colligere poterimus. Nec video, quomodo duo distincta turbamenta simul, & semel reperiantur in corpore. Existimo igitur à secundo vulnere non turbamentum novum, & à priori distinctum inferri, sed solum præexistens augeri, & ideò satis erit computatio, à primo vulnere incipiens. Si tamen primum vulnus esset exiguum, & nullo modo lethale, & sequenti die, vel deinceps aliud vulnus infligeretur, quod lethale esset, suppurandi principium à die, quo inflictum fuit secundum vulnus, esset accipiendum, cum majus turbamentum à secundo vulnere proveniens, quod minus est obscuret.



## CAPUT XXII.

*Quomodo præcognoscantur futura permutationes in vulneribus.*

**N**on solum quid de vulnerato futurum sit, præcognoscendum dicebamus, verum & futuras permutationes tam ad bonum, quam ad malum, posteaquam vulnera per multos casus ut plurimum tum ad salutem, tum ad mortem tendunt. Quoniam ergo de futuro eventu satis pertractavimus, videamus modò, quomodo futuræ permutationes sint præcognoscendæ.

*Ex quibus præcognoscantur futura permutationes in vulneribus.*

*Prima via.*

Ex observatione autem dierum criticorum, & consideratione qualitatis primò apparentis immutationis, ejusque causæ, nec non & affectæ partis, non erit arduum venari futuras permutationes ad bonum, atque ad malum, & futura symptomata. Illud enim pro comperto habere debemus, non posse quidpiam mali supervenire, cujus non sint quædam præludia, siquidem causa innotescit, antequam malum effecerit. Sic futuram ex inanitione convulsionem ex immoderato admodum sanguinis profluvio conjicimus. Pariter si febris in capitis vulnere citra manifestam causam post septimam superveniat, & bilis vomitus, pro certo habemus principium inflammationis esse in cerebro aut membranis, & ventriculum in consensum trahi. Et quoniam ejusmodi inflammationes dolores capitis insignes afferunt, deliria, atque convulsionem, hæc propterea ex vomitu illo, & febre prædicere possumus. Non aliter si vulnus in parte nervosa fuerit inflictum, & tumor, qui apparuerat, delitescat subito citra manifestam causam, propter retrocessum materiæ id factum judicamus, & proinde aliò converti materiam illam; hinc aut futuram convulsionem prædicimus, & hoc plerumque si præsertim vulnus acuto telo fuerit inflictum, & stricti orificii extiterit, aut inflammationem, & abscessum in opposita parte, vel in aliquo viscere, aut alia parte; quovis autem transferatur materia, se prodent semper futuri affectus præludia in ea parte, puta dolor, gravitas, tensio, & hujusmodi. Ita etiam si febris à principio ex generatione puris acciderit, intra septimam diem terminandam prævidemus.

*Sed*



## CAPUT XXIII.

127

Sed & alia ratione ad eandem cognitionem pervenire poterimus. Jam tradita est methodus futurum eventum præcognoscendi, *Secundæ via.* si consideretur, & ut decet perpendatur via, qua ad præcognitum terminum sit deveniendum, nulla latebit intermedia permutatio. Supponamus futuram mortem, cum habeamus, unde nam mors sit expectanda, facile erit prævidere quascunque intermedias mutationes, & tempus etiam, quo mutationes contingant, habita consideratione status vulneratæ partis, & dierum criticorum, & qualitatis affectus, qui mortem est allaturus, nam via ad mortem effugere non poterit. Video capitis vulnus mali coloris, aridum, & carnis salitæ instar, nulla prægressa manifesta causa, immò & os lividum, nulla adest febris, nihilominus ex vulneris statu futuram mortem conjicio, quæ quidem proculdubio inflammationem membranarum cerebri consequitur, & hæc citra febrem, exempli gratia, capitis dolorem, delirium, & convulsionem non interficit, ista igitur futura præfagia, neque futura tantum, sed & quæ prius, & quæ posterius invadent, cum alia sint symptomata principii morborum, alia augmenti, & vigoris, & tempus etiam apparitionis, namque inflammationem brevi futuram video, & forsan in sequenti decretoria ejus signa elucebunt: cum verò sit morbus acutissimus, quando hæc, aut illa supervenient, non ægre conjectabor. Sic si servandus sit vulneratus, quamvis mala nunc urgeant, malorum cessatio, cessationisque tempus non minus erunt manifesta, via enim ad salutem certa est. Habenda autem semper est consideratio ætatis, temperamenti, regionis, temporis, & consuetudinis.

## CAPUT XXIII.

### *De Curatione Vulnerum in genere.*

**Q**Uoniam nihil aliud est, quod curandi rationem præscribit, ut dicebat Gal. 3. Meth. 1. quàm illud idem, quod curatur, quandoquidem quicquid magis potest de se indicare, quàm de alio, quod autem curatur est morbus, necesse profectò fuerit, si methodica, & rationalis instituenda sit vulnorum curatio, invenien-



veniendorum remediorum initium ex ipsorum natura desumi, si quidem auspicari perpetuò oportet, dicebat Gal. 4. Meth. 4. ab indicatione, quæ ab effectu, cui mederi paramus, accipitur. Cum itaq; vulnus sit continui solutio, utique unionem vulnus indicabit. Sed nimis communis est hæc indicatio, ut ob id etiam parum sit artificiosa, immò & plebejis cognita, nec ullam, aut parvam afferat utilitatem; quilibet è plebe novit, vulnus mediante unione sanari, at quibus rationibus unio hæc habeatur, non est cuilibet notum, sed soli artifici, non enim scire quid fieri oporteat, dicebat Gal. 6. Meth. 2. id magna res est, ut quod omnibus hominibus natura insit, sed quibus rationibus illud efficias, id scire artificum est, unde subponebat eodem loco: Nosse quid fieri oporteat, esse operum, quæ ex artibus expectantur, veluti principium quoddam, nondum aliquam eorum propriam partem, sed quæ etiam sit cuivis è plebe communis, cum primæ in omni arte faciendorum indicationes omnibus hominibus natura sint præsto. Ob id igitur, ut ibidem concludebat Gal. nec qui vulneratæ parti naturalem unionem esse moliendam novit, is medicus est, sed qui, quibus id rebus perficiat, intelligit, & quo pacto etiam his sit utendum, non ignorat; & denique qui viam omnem curationis eò usque percalluit, ut ipsum consequi destinatum finem queat, is demum est, qui mederi novit. Ut ergo illa adinveniamus, quibus perficiatur id, quod à prima indicatione suggeritur, per minus communes differentias ad proprias, & específicas transeundum; sic demùm facillè erit materiam invenire, qua consequi propositum finem valeamus. Quare propria vulneris natura, & ejus differentiarum considerandæ sunt, à quibus utiles eliciuntur indicationes, quamvis non ab omni vulneris differentia desumatur indicatio, siquidem tempus, ut dicebat Gal. 3. Med. ult. nullam suppeditat indicationem, sed in considerationem venit solummodo tanquam signum alicujus indicantis.

In primis autem videndum est, an vulnus sit affectus simplex, an compositus, simplex enim affectus quatenus talis, unum tantum indicat, eò quòd unam tantum habet naturam, at compositus tot requirit, quot ea, quæ in compositionem veniunt, quæ qui-



quidem in vulneribus multa esse possunt, nam & telum, & ejus portio, aut aliquod aliud extraneum corpusculum à telo ductum potest intra vulnus contineri: quandoque deficit substantia cutis, & carnis, quandoque ossis fractura adnectitur, & punctio ab ossis spiculo, quandoque contusio molliorum partium; & etiam duriorum, & hujusmodi: nonnumquam supervenit sanguinis profluvium; sordes interdum negotium faciunt, pariter inflammatio, erysipelas, dolor, convulsio, putredo, gangræna, & similia.

Ubi ergo vulnus est simplex nihil aliud indicat, quàm agglutinationem; cum nec caro, nec cutis, nec os deficiat, nec quidpiam aliud, nec etiam sit, quod removeri postulet, sed simplex divisio, nihil aliud relinquitur, posteaquam divisum est, quod prius erat unitum, nisi ut eidem ad pristinam unitatem restitatur, atque ita disjunctorum fiat agglutinatio. Unde Gal. lib. Art. Med. c. 90. Continuitatis solutionis curatio intentionem quidem habent unionem. Et 3. Meth. ult. Quod ulcus tantum est, nec quicquam aliud, ipsam tantum ulceris sanationem desiderat, cujus utique propositus finis vel unitio, vel agglutinatio, vel coitio, vel continuatio est. Et 3. Meth. 4. Ulcus simplex agglutinari tantum postulat.

At si substantia carnis deficiat, cum duplex sit affectus, continuitatis videlicet solutio, & carnis defectus, duplex etiam originatur indicatio, uniendi scilicet, & regenerandi carnem. Verum repleto jam vulnere, adhuc labia dissident, & fieri nequit ob interpositam carnem, ut ad mutuam contactum adducantur, & agglutinentur: & propterea, ut pristinae unitati restituatur particula, opus est, interpositam illam carnem cute, vel alia re simili obducere, nam cooperimentum desideratur, per quod fiat dissidentium labiorum unio. Unde Gal. lib. Art. Med. c. 90. In compositis verò complicatur ulceribus prima quidem cavitas, quam non alterum affectum, sed ulceris differentiam esse arbitrantur; est autem non differentia hujusmodi res, sed alterum aliquod ægritudinis genus, in quo ipsius substantiæ jactura facta est. Et quidem curatio in duplici morbo duplicem exigit intentionem; nam continuitatis solutio unitate, substantiæ autem jactura gene-



ratione indiget. Et paulò post, cum itaque repletum fuerit cavum, ulcus verò ad æqualitatem perductum, alteram intentionem aboleri contingit, nam media existente inter labia ulceris carne, quæ nuper genita est, partes quidem distantes uniri impossibile est, unde fit, ut alia sit intentio perquirenda. Intentionem autem consequemur ex eo, quod est secundum naturam, ipsi parti comparando; erat autem eidem cute obduci naturale: quare hoc ipsum à nobis procurandum, aut si hæc intentio effectum fortiri non potest, simile aliquid cuti, caro scilicet, quæ cutis naturæ vicina sit, instaurandum. Hoc autem nihil aliud est, quam cicatrice vulnus obducere.

*Peregrina  
corpora quæ  
causæ sint.*

Si peregrinum aliquod corpusculum intra vulnus contineatur sanationem remorans, aut etiam impediens, sui amotionem indicat; non enim tunc habet rationem externæ causæ, à qua nulla sumitur indicatio, sed internæ, & propterea indicat: quamvis nonnulli sint, qui telum, & corpus quodvis à telo ductum intra vulnus existens inter externas causas connumerandum censeant, nequaquam inter antecedentes appellatas, seu internas, eò quòd externæ causæ proprium esse dicant extrinsecus advenire, at cui proprium convenit, & id, cujus est proprium, ex quo sequitur ipsum non indicare sui extractionem, sicuti neque ambiens calidus in febre indicat sui alterationem ad contrarium, sed id habetur ex altera curatricis medicinæ parte, qua ea, quæ adversa sunt, præcaventur.

In curando dupliciter medicum se habere compertum est, nam vel remedia adhibet, & hæc per indicationes invenit, quando methodicam instituit curationem, vel ab adversis præcaver, & hoc directè non elicit per indicationes, sed tamen, & illud ad indicationes consequitur; in morbo enim calido frigida adhibet, quia talia indicat morbus calidus, ac calida removet, quia hoc consequitur ad frigidi indicationem; si refrigerans indicatur manifestum est; calefacienda arceri, ac removeri debere. Sic, si excite-  
tur dolor capitis ex mora in sole ob caliditatem à sole inductam, profectò indicantur refrigerantia caput ob intemperiem calidam ipsius, & ex consequenti etiam fit notum, patienti non esse morandum in sole, non quia sol ablationem sui indicet. Idem esse  
de



de telo intra vulnus existente profitentur; non enim telum indicat sui extractionem, sed quod extrahendum sit consequitur vulneris indicationem: vulnus unionem indicat, quam cum impediat telum manifestum est, necessariam esse ejus extractionem. Hujus signum est, quod si nihil remoraretur, aut impediret sanationem, & omninò nihil efficeret, neque nos illius curam haberemus, unde pila plumbea non rarò à nobis spernitur, ut quæ vulneris unionem, & curationem rarò impediat.

Extrahendum insuper esse telum, ex eo quoque deduci dicunt, quòd facillimè sit morbifica causa, dum partibus incumbit, easque comprimit, aut distendit, vel etiam rursus exulcerat, namque si pungens sit, & secans, dum movetur ægrotans, & vulneratam partem ad alium locum transfert, facili negotio continuum solvit, & ideò ex universali providentia telum extrahimus, non quia telum hoc indicet, sed quia id colligitur ex universali providentia: sicuti enim quilibet cavere debet à morbificis causis, & sicuti quilibet spontè etiam à dentibus feræ, & aliis externis injuriis cavet, ne sibi sint morbificæ causæ, ita etiam, ne telum illud fiat morbifica causa, extrahendum est. Hinc ulterius inferunt, teli extractionem non esse remedium, nisi sicuti si remedium diceremus, ubi quis contra se ipsum vibratum telum alio telo retorqueat, & ictum irritum faciat; est enim remedium futuri vulneris, ut ita dicam. Sic ergo extractio teli, dicunt, est præservatio à futuro vulnere, & ab ulteriori continui solutione, quandoque etiam extrahendum esse dicunt, quoniam actu solvit continuum, doloremque concitat, ut noxia removeamus, interdum etiam, quia prohibet remediorum applicationem; nunquam tamen, ajunt, vim habet per se indicandi, cum sit extrinsecus adveniens causa, & à causa externa nulla sumatur indicatio, teste ipso Galeno, neque curationis, neque providentiæ. Hæc quæstio logica est, & ad curationem parum facit, satis est medico nosse, extrahendum esse telum, si sanationem impediat; sive postea telum sit, quod hoc indicet, sive ad aliam indicationem consequatur, parum refert.

Videtur tamen ad internas causas magis attinere; quis venenum ingestum inter externas causas poneret? & tamen extrinse-



cus advenit. Quis rabiem canini morsus occasione subortam, causam externam diceret? Sed his omissis, statuamus, peregrinum corpus sanationem impediens, aut etiam novi mali causa existens extrahendum esse.

*Vulnus con-  
usum, quid  
indicat,*

Non minus auferri postulant alia mala, quæ cum vulnere complicata morbi, aut morbificæ causæ habent rationem. Si cutis, & caro fuerit contusa, quod contusum est, abscedere debet in pus conversum. Unde Hip. lib. de Ulc. Si qua caro telo contusa, aut dissecta est, eam curare oportet, quo quàm celerrimè suppuretur, nam & minùs inflammatur, & necesse est carnes contusas, ac dissectas putrescere, ac pus fieri, & eliquari, ac consumi & Gal. 4. Meth. 5. Si caro aliqua telo tùm contusa, tùm cæsa sit, huic ita medendum est, ut quàm celerrimè suppuret, Hippocratis locum referebat, qui lib. etiam de Vuln. cap. hæc habet: Necesse est carnes contusas, & concisas pus fieri, & consumi.

*Ossis fra-  
ctura,*

Si fractura ossis fuerit adnexa, ossis quoque agglutinandi indicatio suboritur. Si sordes, abstergendæ. Si sanguinis immoderatum profluvium, cohibendum. Si dolor accesserit, sedandus, & sic de aliis vitiis, quæ cum ulcere complicantur; unumquodque enim propriam indicat curationem, veluti suo loco explicabitur.

*Methodus  
tractandi  
complicatos  
affectus.*

Non est autem oblivioni tradendum, quod circa complicatos affectus præcepit Gal. 7. Meth. 12. & 3. Meth. 9. & 5. de san. tuen. 5. & aliis in locis: Aliquando enim ex iis, quæ complicantur, affectibus unus, vel plures urgent, aliquando unus est aliorum causa, aliquando etiam unus, vel plures aliorum respectu obtinent rationem causæ sine qua non, ut nisi ipsi sanentur, sanari alii non possint, & proindè, ut dicebat Gal. triplex in huiusmodi complexionibus propositus est finis: unus veluti à causis sumptus ejus, quod post futurum est: alter, ut quod rationem obtinet ejus, sine quo non: tertius ejus, quod veluti accelerantium, vel urgentium nominatur. Urgens affectus is appellatur, unde primum, maximumque homini imminet periculum. Ubi ergo adfuerit urgens, ad id dirigi primum curantis consilium debet, cæteris, si fieri potest, non neglectis, interim tamen non primus modo curari debet, verùm etiam solus; quippè tanta est quandoque urgentia,



ut reliqui affectus, etiam si insanabiles sint futuri, sint posthabendi, & quandoque etiam necessarium sit novum, & ipsum insanabilem inducere; Sic puncto musculi capite, si convulsio, quæ nulla convenientium medicamentorum vi remittatur, superveniat, præcidimus per transversum totum muscolum, ut convulsionem sanemus, sed aliquem ex particulæ motibus vitiamus. Jam nervum punctum sæpè cogimur transversum præcidere, quoties vel convulsiones, vel deliria, vel ambo magna, ægreque sanabilia supervenire vulnerationi cernimus. Pari modo ubi luxatio cum ulcere in aliquo majorum articulorum incidit, ulcus sanamus, luxationem autem insanatam relinquimus; quando, si hanc quoque sanare conemur, convulsiones omninò sequerentur. In consilio, quod ex causæ ratione initur, animadvertendum est, quidnam eorum, quæ inter se conjuncta sunt augere, aut gignere reliqua possit, quæ rursus ab eo vel gignantur, vel incrementum accipiant: Ubi enim aliud est efficiens, aliud quod efficitur, ipsa causa spectanda est; procomperto enim habemus non posse ullum affectum sanari, manente adhuc ipsa, unde natus est, causa; idcirco si adesset urgens, & affectus, qui alios gignerent vel augerent, primum id agendum esset, ut ei, qui maximus est, propria medicamentorum materia accommodaretur, deinde pro causarum ordine reliqui essent curandi.

Ubi aliquis affectus alterius respectu habet rationem causæ, sine qua non, quia videlicet hunc sanari aut illum non liceat, ad id, quod ordo dicitur, respiciendum est; in quo quidem consilio quid ante quod, vel quid cum quo, vel quid post quod sanari possit, animadvertendum est. Si enim ulcus simul cavum sit, & admodum sordidum, affectus præter naturam in hoc triplex est, scilicet ulcus, cavitas, & fordes; at ordo sanationis à forde expurganda ordietur, quod videlicet nec glutinari quicquam, nec carne impleri potest, priusquam purum fuerit. Secundum locum exigit cavitatis sanatio, quando nisi cavitas impleta sit, induci cicatrice ulcus non potest.

Cum autem dignius sit, & longè magis expetendum futura mala avertere, quam ubi invaserunt, in eorum propulsatione vehementer insudare, & vulnera omnia, ut suo loco diffusè explicatum est, fluxioni sint obnoxia, à qua inflammatio, & plurima



*Fluxionis  
semper ha-  
benda ratio.* alia mala ortum habent, statim ac vulneratus offertur, de prohibenda fluxione cogitandum est, unde si adhuc humores quiescant, ne iter arripiant ad vulneratam partem, curandum: At si jam moveri cæperint, cohibendus, & aliò avertendus est ipsorum motus.

Sed cum omnes istæ indicationes sint communissimæ, & ad minus communes, & específicas, ac determinatas sit descendendum, ut has inveniamus, operæ pretium est de unoquoque propositorum sigillatim verba facere. Primum ergo de necessariò requisitis ad vulnerum sanationem, quando nullus supervenit affectus, sed sola adest noxa telo illata, pertractabimus. At de agendis ratione eorum, quæ complicantur, supervenientia, vel ob vulneris magnitudinem, vel ob malam curationem, vel ob errata vulnerati, aut simili alia de causa, posterius determinabitur. Quæ necessaria sunt pro vulnerum sanatione, quando nihil aliud mali supervenit, ut ad pauca capita ea reducamus, hæc sunt, agglutinatione in simplici vulnere, carnis generatio in cavo, cutis reparatio, seu cicatricis inductio in cutis defectu; quæ ubi assequuti fuerimus, nihil ampliùs desiderabitur pro perfecta vulnerum sanatione.

## CAPUT XXIV.

*De Agglutinatione, & agglutinantibus medicamentis.*

*Agglutina-  
tio est opus  
naturæ.*

**A**gglutinatione igitur est opus, quo divisæ partes ad pristinam continuitatem, seu unitatem reducuntur. Est autem opus non præsidii cujuscumque medici, sed ipsius naturæ, sicuti & carnis generatio, qua ratione dicebat Gal. lib. Art. Med. cap. 90. Coalescere autem facit ea, quæ invicem distant, ac pristinam restituit unitatem ipsa natura. Et 3. Meth. 4. Sicut natura in causa est, ut caro in vulnere cavo generetur, ita in simplici vulnere, ut oræ ipsæ secum coalescant, adeò ut si quæ dissideant, ad amissim componas, citra omnem reliquam extrinsecus molitionem coalescant. Idem pluribus aliis in locis repetit. Immò adeo sollicita est natura de unionem solutarum partium, ut ejus gratia non raro de proprio partis alimento subtrahat: Quòd si ita est, ipsa continui solu-



solutio, ut talis, specificas indicationes non subministrabit: si agglutinationem solam indicat, quæ naturæ est opus, quid agendum specificum, & determinatum ab ea deduci non potest.

Ut ergo appareat, undenam hoc sit eliciendum, videre oportet, qua ratione fiat agglutinatio. Quod quidem alicujus glutinis *Agglutinatio quomodo fiat.* interventu fiat, non est dubitandum. Quomodo enim duo in unum coirent, nisi quod esset, per quod unum fierent? Hujus glutinis materia nulla alia esse potest, quàm eadem, ex qua nutriuntur ipsæ partes, sanguis videlicet probus. Hic ergo ad partem nutritionis gratia attractus à finibus vasorum in parietibus vuneris existentibus, nec non & porositatibus hinc inde roris instar resudans, à naturali calore partis elaboratur, & excoquitur, viscidiorque redditur, ac densatur, ut necessariò per eum coeant, quæ dissidebant partes. Et si diligenter inspiciamus, hujusmodi gluten non est nisi exigua quædam carnis portio: posteaquam sanguis concretus, & densatus à carnosa parte non potest esse nisi caro, & nisi esset caro, labia ad veram continuitatem non redirent; medietatem enim quoddam extraneum, unde non essent unum, nisi sicuti duæ leves tabulæ artificiali glutine conjunctæ. Hujus etiam signum esse potest cicatrix, quæ post agglutinationem remanet; est enim cicatrix caro exsiccata, & solidior facta, ut inferius determinabitur; igitur interventu carnis facta fuit agglutinatio. Quia tamen exigua admodum est carnis portio, per quam fit iste coalitatus, ut potius videatur vicem glutinis sortiri, idcirco Gal. eam glutinis nomine appellare maluit. Hinc etiam est, quod 3. Med. 4. dicebat: Agglutinatio aut omninò carnis generatione non eget, aut planè exigua.

Dubitabit fortasse junior, quomodo agglutinatio possit esse *Agglutinatio naturæ opus, cum naturæ opera præcipua sint nutritio, augmentum, & generatio, quibus famulantur attractio, retentio, coctio, & expulsio, ad quarum nullam videtur posse reduci agglutinatio.* naturæ opus, cum naturæ opera præcipua sint nutritio, augmentum, & generatio, quibus famulantur attractio, retentio, coctio, & expulsio, ad quarum nullam videtur posse reduci agglutinatio. Sed hæc dubitatio facilè solvitur; quamvis enim ad nullam dictarum operationum propriè reduci possit, aliquas tamen earum necessariò consequitur, videlicet coctionem, & assimilationem, si alimentum, quod ad partes divisas pro earum nutritione transmittitur, aut attrahitur, concoqui debet, & in earum substantiam



stantiam converti, sejunctæ partes coalescant, necesse est; nam, quod hinc inde resudat, commiscetur, & fit unum corpus, itaque concoctum, & assimilatum partes ad unitatem necessario reducit.

*Medici  
partes, ut  
prosperè ce-  
dat agglu-  
tinatio: ex  
Gal.*

Cum ergo natura partis sit ea, quæ discissas partes agglutinat, parans gluten ex sanguine, dum videlicet ipsum elaborat, concoquit, & assimilat, patebit quid agendum specificum, ac determinatum ex consideratione eorum, quæ naturæ opus impediunt, aut irritum faciunt, aut sine quibus ejusmodi opus nullo modo, vel ægrè admodum perficeretur. Et proprerea, quæ à Medico sunt agenda, ut prosperè succedat agglutinatio, ad quatuor capita reduxit Gal. libro Art. Med. cap. 90. his verbis: Coalescere autem facit ea, quæ invicem distant, ac pristinam unitatem restituit ipsa natura, nostrum verò opus est applicare extrema distantium partium, atque in unum coacta conservare, & tertio loco cavere, ne quid labiis ulceris intercitat, & quarto ipsam partis substantiam salubrem conservare.

Necessitas ejus, quod primo loco à Galeno proponitur, & ex Celso quoque libro 5. suæ Medicinæ cap. 26. est manifesta; quomodo enim coire possunt, quæ distant? adduci ergo ad mutuum contactum dissidentia labia vulneris, necesse est, si debet fieri agglutinatio.

Sed neque hoc sufficit; eadem enim ratione adducta maneant oportet, convenienti tempore, posteaquam non in instanti agit natura, ex quo patet etiam necessitas secundi propositorum, unde & tertio Meth. 4. Quoniam in ulcere simplici sola divisio proponitur, divisorum oras unà conjunctas esse oportet, & conjunctas manere. Et Celsus pariter loco citato varia proponit, per quæ istud assequamur. Quid extranei intra vulnus existens, palam est, agglutinationem prohibere. Quomodo illa fient unum, inter quæ mediat aliquid, diversi generis? Et propterea etiam 4. Meth. primò: Omne ulcus, dicebat, postulare, ne quid inter oras agglutinandas intersit. Antequam ergo adducantur labia, quodlibet extraneum diligenter auferendum est, quemadmodum etiam jubet Celsus loco citato, qui cum duo proposuisset per quæ labia vulneris adducuntur adductaque conservantur, hæc subjun-

git,



git, ex quibus neutra ante debet imponi, quam intus vulnus purgatum sit, ne quid ibi concreti sanguinis relinquatur, id enim & in pus convertitur, & inflammationem mover, & glutinari vulnus prohibet, ne linamentum quidem, quod supprimendi sanguinis causa inditum est, inibi relinquendum est, nam id quoque inflamat. Postquam etiam adducta fuerunt labia, videndum erit, ne quid interponatur alieni; solent enim in vulnere ob naturalis caloris imbecillitatem excrementa generari, quæ si intra conglutinanda labia colligerentur, profectò agglutinationem impedirent, & propterea curandum est, ne si qua generentur excrementa, retineantur, sed exitum habeant; itaque parandus effluxus. Hinc Gal. lib. Art. Med. cap. 90.

Tertium verò in cogendo in unum partes distantes exequemur, si nihil intrinsecus incidere permittamus; quoniam sapius usu evenit, ut pilus, aut oleum, aut alia aliqua humiditas interveniens earum, quæ copulandæ sunt, partium, unitatem impediat. In eo autem, quod sequitur tempore per suffluxiones tertia intentio retinetur; Ipsa verò suffluxio ex ejusdem, & contrarii loci divisione, & figura opportuna comparanda.

Non minus necessarium est partis substantiam salubrem conservare, posteaquam natura partis ea est, quæ vulnera conglutinat: ut ergo naturaliter se habeat pars, oportet, qua ratione dicebat Gal. quarto, Meth. 1. temperatam esse subjectam carnem ad ulcera tum conglutinanda, tum carne implenda prorsus oportere. Et, quoniam humiditas, quæ in vulnere generatur, ob naturalis caloris imbecillitatem, posset esse causa inflammationis, & putredinis, quibus pars propriam amitteret temperiem, eademque velut extraneum quoddam interpositum agglutinationem impediret, propterea Gal. loco citato, partis substantiam salubrem cum mediocriter exsiccantibus conservari asserit. Inquit autem mediocriter exsiccantibus, quoniam exsiccantia ad glutinandum necessaria medium locum tenent inter ea, quæ carnem generant, & cicatricem inducunt, quæ enim carnem generant, excrementitiam tantum humiditatem debent absumere, at quæ cicatricem inducunt, *Sarcotica.* ut suo loco patebit, non solum debent humiditatem superfluum *Epulotica.* absumere, verum etiam ipsam carnis substantiam exsiccare, & indurare,



durare, propriam ipsius humiditatem absumendo, ut caro vicem, *Glutinantia*, & naturam cutis subeat: Medium verò locum obtinent glutinantia, ut & asserit Galenus 3. Meth. 4. & 2. de comp. med. per gen. cap. 21. ut quæ non solum superfluum humiditatem absument, verum etiam fluentem in majori quantitate sanguinem; at propriam carnis humiditatem intactam relinquunt. Merito itaque videtur dixisse Gal. mediocriter exsiccantibus conservari partis substantiam salubrem.

*Glutinantia  
revera non  
agglutinant.* Glutinantia igitur appellata medicamenta improprie glutinantia dici manifestum est, cum re vera non glutinent, sed solum impedimenta removeant, absumentia omnem humiditatem, quæ inter agglutinanda ora posset colligi, & esse impedimento agglutinationi, unde Gal. 2. de Comp. med. cap. 21. Non enim tanquam ipsum sarcoticum, aut uniens, neque tanquam hæc naturæ solius opera non sint, sed, quod talibus impositis medicamentis ulcera carne replentur, ac coeunt, appellationem hanc sortita sunt, & huc respexit Gal. loco citato, quando dicebat: Opus agglutinantium est conjungere, & divisas partes conglutinare, ut in pristinam unitatem particula reducatur. Unde loco citato subjungebat: Finis glutinantium medicamentorum est nullam inter partes jungendas nasci humiditatem permittere. Et Avic. lib. 2. tract. 2. cap. 4. Consolidativa medicina est, quæ exsiccet, & inspissat humiditatem stantem inter duas vulneris superficies propinquas, ita ut convertantur ad glutinationem, & viscositatem, & adhæreat una earum alteri. Quod si medicamentum hoc simul fuerit adstringens, tantò efficacius glutinationem adjuvabit, sive adstringens fuerit per se, sive ex accidenti, nam sua adstrictione prohibebit, ne plus sanguinis, quam oporteat, aut superflua alia humiditas ad vulnus confluat: prætereà partes coget, atque constringet, ac in unum continebit, unde Gal. 3. Meth. 4. Glutinatorium plus ficcet, oportet, quàm quod carnem producit, ac prætereà substantiam omnem in idem cogat. Hanc adstrictionem tetigit etiam Avic. loco citato, quando dicebat: Et adhæreat una earum alteri. Dictum est autem, sive adstringens fuerit per se, sive ex accidenti, quoniam aliqua sunt, quæ per se adstringendi vim non habent, sed per accidens



dens eam acquirunt, veluti farina volatilis, quæ si aqua in formam pultis reducatur, & parti apponatur, dum postea siccatur, partes in unum cogit.

Neque tamen existimanda est necessaria adstrictio in glutinantibus medicamentis, multa enim sunt, quæ glutinant, & tamen adstrictione carent, & sola siccitas ad glutinandum satis est, modò partes divisæ ad amussim sint compositæ, & ad earum exactam commissionem, quam non adeò facile assequi licet, adstrictio facit, quamvis & illa altera ratione admodum conducat, quòd prohibet confluxum superflue humiditatis ad partem: quo etiam nomine frigidum tanquam repellens adjuvabit, ut patet de albuminibus ovorum, quæ tamen & per accidens adstringunt. Verùm non ob id necessarium est glutinatorium esse frigidum, & repellens, neque etiam existimandum est adstringentia omnia glutinare, sicuti neque omnia frigida; non enim glutinant, quæ detergant vehementer, & expurgant, unde Gal. 3. Met. 4. Glutinatorium verò neque detergat, neque expurget, sed contra potius substantiam omnem in idem cogat. Hinc Gal. 1. de simp. med. fac. cap. 32. Neutra igitur oratio vera est, si simpliciter, & indistinctè proferatur, tum ea, cum dicunt adstringentia omnia ulceris glutinatoria, tum ea, cum ajunt, quæcunque glutinantur, adstringentium beneficio glutinari.

Non immeritò igitur ab iis, qui simplicium medicamento-  
rum vires diligenter sunt indagati, inter ea, quæ vulnera glu-  
tinant, recensentur abietina lachrima, resina pinea, terebinthi-  
na, resina laricis, ulmi folliculorum conclusus liquor, pix arida,  
sarcocolla, mastix, thus, & cortex thuris, myrrha, gummi juni-  
perinum, Arabicum, hederæ, tragacantha, balsamum naturale,  
Tacahamacha, Carranna, bitumen, aloë, gypsum, lapis Gagates,  
& Motochtus, lachrima sanguinis draconis, bol. Arm. orientalis,  
terra Lemnia, terra Samia, terra Eretria, lapis Thracius, lapis hæ-  
matites, amylum, farina volatilis, utrumque centaurium, hyperi-  
cum, ophioglossum, equisetum, trinitas, consolida omnis, bursa  
pastoris, alchimilla, potentilla, pyrola, virga aurea, sanicula, auri-  
cula urfi, pilosella, bistorta, tormentilla, balsamina, & ejus fructus,  
gratiola, fragaria, plantago, quinque folium, millefolium, ver-  
bascum,



balsum, verbenæ, flos Solis, veronica mas, isatis, brassica rubra, clymenum scordium, utrunque polygonum, polium, ulmi folia, querna folia, mespili folia, cupressi folia, & nuces, balauſtia, malicorium, hypocistis, tiliæ cortex, coccum infectorium, vinum adstringens, mel coctum, tela aranea, & alia multa, cum una, vel plures qualitates ex dictis in unoquoque eorum reperiantur. Eliciunt etiam ex resinis, & gummi propositis per artem chymicam olea, quæ mirificè ad glutinationem vulnerum facere profitentur, potissimum autem ex terebinthina, & abietina lachrima, nec non & thure, myrrha, Peruniano balsamo, liquore in folliculis ulmi contento, resina pinea, gummi juniperino, imò & ex cera, ac melle.

*Composita.* Ex dictis etiam simplicibus, innumera in eundem usum componunt. In officinis autem præparata habentur ceratum Barbarum, ceratum palmeum, unguentum ex resinis, ceratum de betonica, emplastrum de centaurea, oleum de hyperico, oleum Hispanæ appellatum, balsama arte facta, emplastrum ex radicibus consolidæ, & melle cocto. Accipiunt etiam thuris, myrrhæ, sarcocollæ, gummi juniperini, gummi Arabici, mastiches, gummi hederæ, gummi ellemi, lachrimæ sanguinis draconis, balsami Peruniani, Tacahamachæ, Cerannæ an. un. j. s. abietinæ lachrimæ, liquoris in folliculis ulmi conclusi an. lib. i. resinæ pineæ lib. f. radicum tormentillæ, bistortæ, iridis, aristolochiæ rot. consolidæ, dictamni albi an. unc. s. baccarum juniperi, lauri an. dra. 6. aquæ ardentis optimæ lib. 3. & curiosè mixta destillationi subjiciunt, tresque eliciunt liquores, quorum primus aquæ speciem refert, omnes tamen ad glutinanda vulnera, plusquam credi possit, facere prædicant. Sed nihil est, quod multa composita referamus, qui enim callet, artem componendi medicamenta, ex propositis simplicibus innumera

*Non omnia* conficiet. Quæ ex Galeni mente requiruntur, ut prosperè succedat agglutinatio, explicata sunt. Addit tamen 3. Meth. 7. non omnia corpora eadem glutinantia requirere, sed quæ sicciora sunt, & valentiora, sicciora quoque, & valentiora requirere, quæ verò humidiora sunt, & infirmiora, mitiora. Quod & de partibus

*Alia requi-* vult esse intelligendum.

*sita ad ag-*  
*glutinatio-*  
*nem.*

Verum cum ad vulnera glutinanda, ut superius dicebatur ex Galeno 4. Meth. i. temperatam esse subjectam carnem oporteat, & præ-



prætereà sanguinem esse probum, & quantitate mediocrem, ut ibidem dicebat Gal. nemini dubium est, avertenda ea esse, quæ possunt partis temperiem corrumpere, sanguinem augere, aut mala qualitate inficere, & ad putredinem etiam trahere. Et quoniam succorum fluxio, quæ in omnibus vulneribus est timenda, temperaturam partis vitiat, & ipsum sanguinem, qui futurus est gluten, indecens autem victus sanguinem aut auget, aut aliter malè disponit, idcirco, inhibenda erit fluxio, & probus victus instituentus, ut optimus sanguis generetur, & qui secundum quantitatem modum non excedat. Quod si nimia subsit sanguinis copia, constat eam esse minuendam, aut si vitium aliud contraxerit, illud esse corrigendum. Potuisset quidem totum hoc ad quatuor à Galeno allata redigi, nisi Gal. ubi illa proposuit, ita se explicasset, ut facilè sit intelligere, non posse inter quatuor dicta comprehendere. Re vera tamen dum succorum affluxum prohibemus, & sanguinis inutilem copiam detrahimus, atque congruam victus rationem præscribimus, negari non potest, quin & substantia partis salubris conservetur, & præcaveatur ex parte, ne putredo inter glutinanda labia interponatur. Sed forsan Gal. simplicem simplicis morbi curationem proponere voluit; quæ enim fluxionem respicit, ad complicatum affectum pertinere videtur: & propterea dicebat ad eam partem spectare, quæ de meditatione succorum præcipit. Quia tamen in omni glutinando vulnere habenda est horum ratio, eadem nobis liceat illis quatuor addere, quæ Galenus adduxit, vel inter illa complecti.

## CAPUT XXV.

*De carnis regeneratione, & sarcoticis.*

Quod, & carnis regeneratio sit naturæ opus, non est dubitan- *Carnis gene-*  
 dum; fit enim caro ex sanguine, at medicamenta sangui- *ratio est na-*  
 nem coquere, & in carnis naturam vertere non possunt, sed hoc *turæ opus.*  
 est naturæ munus, ideò Gal. 3. Meth. 3. & 4. & 5. Meth. 3. &  
 pluribus aliis in locis productionem carnis naturæ opus vocat.  
 Ex sanguine igitur, qui ad partem pro nutritione transmittitur,



*Quæ requirantur, ut caro generetur.* natura partis vulneratæ carnem generat, sicque cavitatem replet, unde probus sanguis sit oportet, aliter non esset idonea carnis materia, quin potius malum aliquem affectum concitaret; & in convenienti quantitate, ita ut nec deficiat, quo sufficiens caro pro replenda cavitare possit generari, nec exuperet; sic enim potentiam opprimeret, undè putredines, & inflammationes pro carnis generatione; sanguis etenim, quem proprius calor non obtinet, dicebat Gal. 2. de dif. feb. capitulo ultimo, nihil habet reliquum, nisi ad putredinem convertatur, vel saltem vulnus excrementis scatens redderet, quod sanationem remoratur. Cùm etiam natura partis vulneratæ sit, quæ carnem generat, temperata quoque debet esse pars vulnerata, unde Galen. quarto: Meth. primo. Itaque temperatam esse subjectam carnem ad ulcera tum conglutinanda, tum carne implenda prorsus oportet. Numquid igitur hoc tantum satis est? An etiam sanguinem, qui affluit, bonum esse & mediocrem quantitate oportet? mihi id quoque multò maxime verum esse videtur, nam & qui corruptus est sanguis, tantum abest, ut ad glutinandum, & carne implendum sit utilis, ut etiam ipse nonnunquam erodat, atque exulceret. Multus humor, cum in ulceribus excrementa creet, sanationem moratur. Temperiem carnis proposuit Gal. 3. Meth. 9. dicebat enim: Justa substantiæ partis temperies causæ rationem habet, ut quæ concrefcere secum, quod ulceratum est, faciat, & cavitatem impleat. Idem 4. Meth. primo, & aliis in locis.

*Ad quam facultatem spectet carnis generatio.*

Quoniam autem non unica est naturalis facultas, sed multiplex, ad quam opus hoc spectet, dubitari non injuria posset; prima quidem facie videtur esse augmentativæ opus, cùm augeatur quantitas carnis secundum omnem dimensionem, quod est augmenti proprium; ab augmentativa ergo facultate prodeat, necesse est. Altera verò ex parte illud obstare videtur, quòd in augmento præexistens caro illa est, quæ augetur secundum omnem dimensionem extensione mediante, at in carnis productione non est præexistens caro, quæ in majorem molem crescat. verum nova caro eidem adnascitur, & novæ dimensiones, quare non videtur hoc augmentum, sed nova generatio; nec propriè dici potest carnem in vulnere augeri, quamvis vulgo dicatur, in vulnere, dum caro generatur



neratur carnem crescere; transmittitur enim sanguis, & attrahitur ad partem pro sui nutritione, unde portio ipsius à finibus vasorum in superficie vulneris existentibus, & à poris exudat, & à natura partis elaboratur, condensatur, atque assimilatur, & sic fit vivens caro, extensa ad eandem anima. Nisi quis ex eo verum augmentum esse contenderet, propterea quòd si nova esset caro, quæ generaretur, & adderetur præexistenti, non apparet, quomodo possit vivere; posteaquam unaquæque pars vivit proprio, & innato calore à principiis generationis contracto, quem predictæ illi additæ inesse non posse certum est. Hæc quæstio nimis excedit Medicinæ limites, & parum etiam ad rem facit, breviter tamen dicimus, sicuti extenditur anima ad aggeneratam substantiam per augmenta, ita & innatum calidum, & eodem modo res se habet in generatione novæ carnis; vivit ergo nova illa caro innato calore, quem tamen non à principiis generationis contrahit, sed à proximis partibus mutuatur. Hoc declarant nattæ, & tumores illi carnosî, quos non auctam carnem licet dicere, sed novam additam fateri oportet, & tamen vivit hujusmodi caro, & omnia naturalia opera exercet. Sed quomodocunque res se habeat, pro comperto habere possumus ad operationem nutritivæ facultatis consequi vulneris cavi repletionem; nutritivâ siquidem facultas in parte vulnerata existens sanguinem in substantiam partis loco deperditæ convertens, etiam quod ex substantia carnis in ipsa deficit, reparat sanguinem conficiendo, & assimilando, cum maximè unionem diligat, solutionem verò continui abhorreat.

Quoniam ergo medica auxilia ad carnis productionem primario non conferunt, ut quæ solius naturæ sit opus, medici officium *Medici partes.* circa impedimentorum remotionem solummodò versabitur, & ab iis quid agendum specificum, & determinatum desumet. Ut ergo invenire possimus, quæ nobis pro generanda carne sint agenda, Galenus tertio Meth. tertio huic innixus fundamento, quòd materia generandæ carnis est sanguis bonus, opifex verò, & auctor natura subjectorum corporum, quibus superinduci caro debet, quæ quidem natura ex calidi, frigidi, humidi, & sicci temperatura consistit, & proinde quod justum horum temperamentum in subjectis particulis, quibus restitutori deficientem carnem sumus, opificis



opificis rationem habet, duo nobis in omni vulnere cavo proponit consideranda: unum est, num, quod subjectum est, iusta sit temperie, hoc est secundum naturam se habeat: alterum, sit ne sanguis, qui influit, bonus, ac mediocris, horum enim alterutro vitioso existente multi affectus præter naturam existunt, qui removeri postulant, & de iis aliàs pertractat. Una ergò cavitate in parte carnosâ proposita, si sana esset pars, & sanguinis confluxus citrà ullum, vel in qualitate, vel in quantitate vitium, nihil præterà obstare posse concludit, quò minus prima carnis generatio prosperè succedat, idque nullius externi medicamenti ope.

*Impedimen-  
ta.*

Atqui in ipsa prima carnis generatione, duplex provenire excrementum, necesse est profiteretur; sicuti in qualibet coctione, & alimenti mutatione, unum videlicet tenuius, alterum crassius, & quamvis tenuius, quod in tertia coctione generatur, cum sana est caro, per insensibilem halitum dissolvatur, unde dicebat, his excrementis etiam per universum corpus semper provenientiibus, quod tenuius est, ipsa invisibilis est perspiratio, in ulceribus tamen ob naturalis caloris imbecillitatem, qua etiam de causa, sicuti, & nonnunquam quoniam corpus utitur nutrimento, quàm iustum sit, ampliore, vel motus quispiam vehementior animali contingit, aliàs fieri solet, subindè fieri visibile, asserit, cum fiat tenuis quædam sanies, ichor Græcè dicta, ex qua ulcus redditur humidum; crassum verò excrementum, quod quidem sana existente carne, est sordes, quæ in summo corpore nostro colligitur, & subuculas inficit, & pilorum est materia, in ulceribus esse ait sordem, ex qua ulcus redditur sordidum, & hæc excrementa cum generationi carnis sint impedimento, ulteriùs infert; duplicibus propterea medicamentis ulcus egere, utique ut humidum est, siccantibus; ut sordidum, quæ ipsum expurgent, & quoniam nullo unquam tempore natura cessat, & proindè nec tempus ullum est, in quo non ambo hæc in cavo ulcere colligantur, concludit etiam, nec tempus ullum esse, in quo non utrumque medicamentorum genus desideretur ab ulcere, utique, & quod siccet, & quod expurget.

*Medica-  
menta, quæ*

Quoniam autem ipsorum siccantium quædam magis exsiccant, quædam minùs, immo quatuor ordines siccantium statuuntur,



tur, & in unoquoque etiam siccante tres mansiones notantur, ut *carnem generant, siccant, & detergentia.* quàm siccans medicamentum esse debeat, noscamus, finem, quo tendunt, respiciendum jubet, quippè superfluum humiditatem tantum absumere debent, nequaquam affluentem sanguinem; si enim non modò humoris, qui influit, redundantiam consumerent, verum etiam affluentem sanguinem depopularentur, ea refici carnem, ceu materiam ejus absumentia, prohiberent. His ergo de causis vult, ut modicè tum siccent, tum detergant, ita ut primi sint ordinis.

Verum quoniam non unica est omnium corporum natura, sed varia admodum, & propterea, quòd medicamentum in uno siccabit ut duo, in alio ut tria id præstabit, in alio verò ut unum tantum, & productam carnem ei, quæ antè erat, similem esse oportet, ulceraque ipsa in humiditate non sunt æqualia, nam alia *Ex quibus habetur* magis, alia minus humida sunt, ut distinctius habeamus, quam *quam siccans esse debeat sarcoticum.* siccans esse medicamentum conveniat, ægri naturam, & ulcerum diversitatem, inquit, esse considerandam: id enim nobis proponentes, quod secundum naturam se habet, custodiam sui indicare, & propterea, quæ similia sui sunt, postulare; quòd verò præter naturam est, sublationem sui, eoque contraria requirere, proculdubio comperiemus, inquit, ulcus, quòd est humidius, eò sanè medicamento, quòd magis siccet, indigere, corporis verò naturam, quanto est humidior, tanto quòd minus siccet, medicamentum postulare: idemque esse de parte asserit tertio Meth. septimo: Siccior quidem sicciora postulante, humidior verò humidiora; unde si qua sint vulnera, quibus par est humiditas, quod in siccior corporis temperamento consistet, utique magis siccari postulat, quod in humidior, hoc sanè minus, quo natura naturæ interest, & sic novella caro erit præexistenti similis. Itaque colligit inveniri non posse unum pharmacum, quod omne ulcus cavum sanet, immò pro modo humoris, sordisque, atque ipso laborantis, temperamento immutandum medicamentum, quandoquidem quod in uno carnem generat in alio forsan sordem, & saniem producet & in alio etiam ultra modum siccabit, & deterget: ideòque nos admonet, si quando aliquo appposito sarcotico nihil proficiamus, ut sordem, & saniem consideremus, quo possimus cognoscere,



noscere, num medicamentum parcius siccavarit, an uberius; nam si plusculum fordis sit, totumque ulcus humidius, intra modum siccavit, sin purum, & absque humore cernitur, ultra: statim quoque mensuram excessus, defectusque subjungit, ex ipso notarum modo intelligemus, tantòque pharmacum, quod deinceps applicabitur, vel siccius, vel non tale admovebimus. In quo tamen de alio nos admonet tertio Meth. 6. ne videlicet copia fordis nobis imponat, quæ interdum provenit, quia medicamentum sit valentius, quàm pro corporis natura, & propterea de subjecta carne nonnihil una detrahat, & colliquet: quod quidem evenisse, ait, cuidam Medico, qui curabat ulcus sordidum citra rationem viridi medicamento, mel ei admiscens, multis autem diebus æquè sordidum reperiens, deindè inops consilii, nec habens, quò se verteret (accidebat enim, ut non modò non purgarentur sordes, sed etiam ut de subjecta quoque carne nonnihil una detraheretur, & colliquaretur, propterea quòd medicamentum valentius, quàm pro laborantis natura erat) plus deindè (ut erat egregius Medicus) mellis assiduè medicamento adjiciebat, quò videlicet adhuc valentius purgaret, ceu non satis medicamentum prius adhibitum fecisset: eveniebat autem contra quippe quantum ille intendebat medicamentum, tantum subjecta caro colliquabatur. Quod verò in ulcere ex liquata carne fordis apparuit, id Medico, ceu medicamentum nihil efficeret, imposuit. Ideoque ibidem notas tradit, ex quibus cognoscamus, quando fordis copia ex valentiori medicamento provenit, & quando ex imbecilliori, dicens: Etenim si quàm maximè similiter sordidum ex utroque medicamento ulcus apprehenditur, at certè cavitas major ex valente, & quod colliquat, medicamento efficitur. Quin etiam labiis præaltis, rubrumque, & phlegmone quodammodò affectum ulcus cernitur: aliquando verò rosionem quoque manifestam ex hujusmodi medicamento æger sentit. Quod verò minus, quàm par est, siccet, non quidem mordet, neque quicquam efficit eorum, quæ retuli. Ut concludere liceat in Galeni doctrina, quemadmodum etiam videre est 3. Meth. 4. & 2. de Comp. med. per gen. c. 1. & 20. & pluribus aliis in locis, ad vulnera carne implenda requiri medicamentum exsicicans, & detergens, mediocriter sine morfu, æstimata facultate

*Signa, ex quibus cognoscitur, num medicamentum parcius, vel plusquam par sit siccaverit.*

*Sarcotica qualia.*



cultate in respectu ad excrementorum copiam, & qualitatem, corporisque, & partis affectæ naturam; hujusmodi enim quemadmodum refert 2. de Comp. med. per gen. cap. 20. sanguinem ad refectionem idoneum tum pro qualitate, tum pro quantitate tuetur, ac tantum, talemque quanto natura, & quali ad carnis generationem indiget. At quæ mordent, etsi detergeant, non tamen cavitatem replent, nisi iis permisceantur, quæ morsum obtundunt, immò subjectam carnem potius colliquant, unde & Gal. 2. de Comp. med. per gen. c. 20. Cæterum quod nullius sit mordicationis particeps medicamen purum ulcus servat, siquidem tale acceperit. Sordidum verò necesse est illud tantum pro sua ipsius potestate detergere, quantum crassitudinis sordes habuerit; quin etiam carnem recens junctam mordere, & exedere debet. Undè palam colligitur, id, cum tale existat, ulceri carnem non esse inducturum, nec cavitatem carne repleturum, sed quod potius ipsam colliquabit, imminuetque, atque hujus rei causa medicamentum, quod sordibus copiosis repurgandis est, non semper carnem potest gignere, nisi vel uberiore oleo, vel rosaceo liquatum deterfionis vehementiam remittat, vel ex cerati mixtura rosionem deponat.

Ex his licet colligere non parum inter se differre glutinantia, *Differentia* & sarcotica, ut etiam notat Gal. 3. Meth. 4. Namque glutina-*inter glutin-* torium plus siccet oportet, quàm quod carnem producit; præterea *nantia, &* quod carnem producit, statim etiam detergendi vim obtineat, oportet. *sarcotica-* quo non modò redundantiam humoris siccet, sed etiam sordem auferat: glutinatorium verò neque detergeat, neque expurget, sed contra potius substantiam omnem in idem cogat. Quam facultatem habere, ait, medicamenta ea, quæ austera, & adstringentia vocantur, à quibus, dum carni producendæ studemus, maximè cavendum monet, ut quæ sordem ulceribus arctius affigant, quam ut facile possit absolvi, ut proprium opus glutinantium, & sarcoticorum, seu carnem generantium sit, quod ipse fatetur 2. de Comp. med. per gen. cap. 20. affectam partem recrementis vacuare, ne videlicet sanies carnis generationem, glutinationemque impediat, qua ratione hæc glutinantia, illa verò sarcotica vocantur, non autem, quia primò faciant ad glutinationem, & carnis generationem, & ideò neque omnis natura, ut docet 3. Meth. 7. ea-



dem glutinantia, & sarcotica requirit, sed siccior, & valentior valentiora, humidior, & infirmior mitiora. Hanc Galeni doctrinam posteriores ferè omnes sequuti sunt, unde Paulus lib. 4. c. 40. Cavum ulcus carnem, quæ periit, restitui postulabat, cujus generandæ materies sanguis moderatus est, & probus, opifex verò natura. At ex recremento tenui humidum ulcus redditur, ex crasso fordes coalescunt, eoque medicamentis eget, quæ modicè siccant, purgantque. Quòd si nihil medicamentum ad creandam carnem inductum profecit, ad aliud sic digrediendum est; si plusculum fordis sit, humidiusque ulcus, sciendum venit medicamentum intra modum sicasse, intendendumque esse ipsum mellis mixtura: sin purum, & absque humore cernitur, ultra, ac remittere convenit. Accidit etiam nonnunquam carnem à valentiori medicamento consumi, ut sordidum, humidumque ulcus appareat, quemadmodum ex iis, quæ minus, ac par est, siccant; verùm hoc ulcus, dum consumitur, cavum magis evadit, labris prætumidum, rubens præterea, & inflammationis particeps: sæpè verò æger manifestam erosionem percipit. Alterum illud, quod à parum siccantibus remediis humescet, nihil horum succidaneum habet, & Avic. quarta quarti, tract. I. capitulo quarto: Medicamen faciens nasci carnem est illud, quod coagulat sanguinem sanum in carnem. Quòd si fuerit ei exsiccatio vehemens, prohibet venientem sanguinem, quare non habebit materiam caro; Et si est abstersio ei vehemens, removet eam, & facit eum currere, quare consumit materiam inventam carni, ergo oportet, ut non sit ei plurima exsiccatio, immò usque ad terminum, neque abstersio fortis valdè, immò abstersio pauca in tanta quantitate, ut abstergat sorditiem absque mordicatione, & non indiget stipticitate, de qua est curandum. Et capitulo undecimo. Et scias, quòd quandoque est medicina faciens nasci carnem in corpore, aut membro, & non est faciens nasci in alio, & illud ideò, quoniam fortasse exsiccet in corpore, & non exsiccet in corpore secundum complexionem duorum corporum, & secundum quod scivisti fortasse superfluit abstersio in corpore, & non superfluit in corpore, neque est abstersio omninò, cum hæc medicina indigeat exsiccatione quadam, & abstersione quadam mensuratis secundum corpus, & non absolutis, & res mensurata est.



est diversa cum impressione sua in rebus, quæ non sunt convenientis quantitatis in passione. Et omne exsiccativum quidem, cujus siccitas est minor siccitate corporis, quod cum eo curatur, est iterum abbreviatum ab hoc, ut faciat nasci carnem ejus, immò oportet, ut sit siccior eo, & propter illud fit, quod olibanum non facit nasci carnem in corporibus siccis, quæ pertranseunt æqualitatem in siccitate, & experimentum quidem est illud, quo scitur illud, quod est ex exsiccatione, & statione, scilicet, quod non ultra operatur, & quod facit nasci carnem secundum processionem, vel continuatim successivè, & quod sordidat, seu quod sorditiem generat. Quòd si videris exsiccationem, cum qua fortasse non nascitur caro, tunc humecta parumper medicamina sicca, & si sit sordes, tunc adde in siccitate, & dimitte illud, quod vadit secundum virtutem suam. Et inferius, quòd si corpus fuerit siccum, & ulcus humidum valdè, tunc necessariæ sunt medicinæ vehementis exsiccationis cum comparatione ad medicinas facientes nasci carnem & in residuo sunt necessariæ medicinæ, quæ sunt mediæ, & quarta primi, doct. quinta, cap. 28. Si autem illud, quod perditum fuerit, fuerit caro, sicut est in ulceribus profundis, non erit festinandum in cicatrizando ea, immo primò erit studendum, ut caro in eis nascatur. Et caro quidem non generatur nisi ex eo, cujus siccitas non multum primum gradum transcendit.

Verumtamen hic considerationes attenduntur, de quibus cura est habenda. Et ex eis est consideratio dispositionis complexionis membri principalis, & complexionis ulceris, quoniam si membrum in sui complexione fuerit multæ humiditatis, sufficit siccitas pauca in primo gradu, quoniam ægritudo non multum fuit elongata à natura membri: sed si membrum fuerit siccum, & ulcus humiditatis multæ, erit necessarium illud, quod exsiccet in secundo gradu, & tertio, ut reducat ipsum ad suam naturalem complexionem, & in temperatis quidem dispositio erit æquanda. Et ex eis est complexionis totius corporis consideratio, nam cum corpus fuerit multæ siccitatis, & membrum augmentatum in humiditate, fuerit in humiditate temperatum, secundum corpus æquale cum temperamento erit exsiccandum. Et similiter si corpus fuerit in humiditate augmentatum, & mem-



brum in siccitate. Et si ambo ad augmentum deveniunt, tunc si egressus fuerit ad humiditatem, minori exsiccabitur siccitate, & si fuerit ad siccitatem, majori siccitate exsiccabitur. Et ex eis est consideratio virtutis siccantium; quoniam licet exsiccantibus carnem nasci facientibus exsiccatio fortis non quærat, qualis est illa, quæ prohibet materiam, quæ descendit ad membrum, quod sit aptum ad hoc, ut carnis generatio sit ex ea, sicut quæritur in exsiccantibus, quæ non administrantur propter generationem carnis, sed propter cicatrizationem; tamen ex eis quæritur, ut sint ipsa abstergentia, & lavantia saniem, magis quam exsiccantia cicatrizantia, ex quibus non quæritur, nisi cicatrizatio, & consolidatio, & continuatio. Et omnes quidem medicinæ, quæ sine mordicatione desiccant, sunt ingredientes in genus earum, quæ carnem nasci faciunt. Quamvis autem Avic. quarta quarti, tract. primo, capitulo quarto, videatur referre carnis generationem in ipsa medicamenta, dum inquit: Medicamen faciens nasci carnem esse illud, quod coagulat sanguinem bonum in carnem, vel saltem statuere actionem medicamenti sarcotici in ipsum sanguinem, cum in Doctrina Galeni excrementa tantum respiciat; quia tamen in aliis ne latum quidem unguem à Galeno recedit, existimo illis verbis nihil aliud voluisse Avicennam, nisi medicamen faciens nasci carnem esse illud, quod naturam adjuvat, ut coagulet sanguinem sanum in carnem, absumendo videlicet excrementa, aut mendum esse in codice Avicennæ.

*Sarcotica  
simplicia.*

Eodem modo à reliquis ferè omnibus, qui post Galeni tempora fuere, de sarcoticis, quibus cavitas vulneris replenda est, determinatum comperies, ideoque passim inter sarcotica recensentur thus, hordeacea, fabacea, & erui farina, iris, aristolochia, Cadmia, panax, pompholix, aloë, myrrha, scordium, hypericum, pix arida, pix liquida, lignorum caries, ex quibus alia valentiora sunt, & ob id siccioribus, & valentioribus naturis convenientia, ut aristolochia, & panax; alia verò minimum siccant, & proindè mollioribus, & infirmioribus naturis convenientia, ut farina hordei, fabarumque, & thus; alia verò inter hæc media sunt, ut erui farina, & iris, quæ idcirco mediis naturis convenire dicunt.



dicunt. Habentur etiam multa composita in eandem rem, cuiusmodi est pulvis sarcoticus appellatus, pulvis ex æquis portionibus myrrhæ, thuris, & aloës confectus, qui est in frequenti usu apud Bononienſes, unguentum basilicon majus, unguentum fuscum, unguentum de betonica, de gummi Ellemi, oleum de hyperico, oleum Hispanæ appellatum, Balsamum arte confectum, & ejus aqua, & alia multa. *Composita.*

Aliam tamen considerationem addit doctissimus Mercatus lib. 2. de præsid. Art. Med. usu cap. 13. parum à Galeno, & reliquis defleſcens, duplici enim ratione siccandum in vulneribus cavis animadvertit, ut caro generari possit, prima quidem ob tenuem illam saniem, à qua ulcus redditur madidum, sed tamen non medicamentis, quæ potestate siccant, qualia sunt ea omnia, quæ à Galeno proponuntur, & ejus sectatoribus; verum iis tantum, quæ ebibendo, & sugendo hujusmodi saniem, ulcus ab illo madore liberent, qualia sunt linea filamenta, aut canabina, spongia, & extersio crebra lineis, & mollibus linteis, vel gossipio, aut lana. Quod enim huic saniei nihil prosint medicamenta potestate sicca, ex eo colligit, quod sanies in carnis generatione prodiens tanquam excrementum à carne ipsa ad ulceris cavitatem pellitur, quemadmodum quotidiana experientia demonstrat, palam est autem, saniei intra vulneris cavitatem contentæ nulla lege proficua esse medicamenta, quæ potestate sunt sicca, sed ea tantum, quæ actu siccant, ut dictum est. Altera ratio, propter quam siccandum esse existimat, est ut caro generetur similis præexistenti, ob idque medicamenta potestate sicca à Galeno relata convenire profitetur. Cum enim calor naturalis ob cutis defectum facile evanescat, non valet, veluti cum sana pars erat, sua munia prosperè perficere, unde licet carnem generet, non tamen præexistenti similem generat, hoc est æque solidam, & densam, sed molliorem, cum non possit pusillus calor ad unguem discutere, quod alimenti superest. Ut ergo genita caro robur, firmitatem, soliditatem, & consistentiam habeat, necessaria semper esse medicamenta, quæ potestate siccant, concludit. Cujus etiam evidentissimum argumentum illud esse asserit, quod diversi gradus exsiccantium statuuntur, indicatione sumpta à partis vulneratæ natura, propter aliud enim id fieri non potest,



potest, nisi ut caro, quæ refici debet, parti similis evadat, & ejusdem sit compagis, & naturæ cum ea, quæ in parte præest; quod si solis saniosis humoribus hujusmodi medicamenta deberentur, non esset opus diversos illos siccantium gradus constituere, indicatione sumpta à partis natura, sed ratione petita à majori, aut minori copia humiditatum, quæ non intensiora, aut remissiora exsiccantia exoptant, sed majorem diligentiam in artifice, hoc est, detergendi, & repurgandi frequenter, & ut convenit, ulcus ipsum linteis, & penicillis. Idem ex eo posse colligi, ait, quod si leviora exsiccantia, quam par est, adhibeamus, caro mollis supercrescit, unde Hippocratem adducit libro de Ulceribus dicentem: Ubique in ulceribus, quæ neque rectè, neque ut res postulat, assidue purgata prius fuerint, produci caro cœperit, solet plurimum supercrescere; in his verò, quæ rectè, atque ut res postulat, assidue purgentur, & nisi collisum aliquid accesserit: siccis præfidiis nutriantur, plerumque caro non supercrescit. Ex quibus infert in ulceribus, quæ prius probè à recrementis coctionis purgantur, sicca medicamenta superfluum alimentum depopulari, ac consumere, ne caro mollior fiat. Addit ulterius calidiora paulò ipsa carne oportere esse sarcotica, quo sanguinem attrahant, neque ullo modo adstringere, ne, quod influit, repellant, sordemque ulceribus arctius affigant. Concludamus igitur in Galeni doctrina, & juxta etiam posteriorum placita, quò prosperè succedat carnis generatio in vulnere cavo, necessarium esse usum moderatè siccantium, & abstergentium sine morfu citra adstrictionem, quæ etiam videtur fuisse Hippocratis sententia; dum enim libro de Ulceribus inquit: Quæcunque ulcera non probè, & ut convenit, expurgata, semper prius pullulare incipiunt, iis maximè caro supercrescit, quæ verò probe, & ut decet, expurgata semper ad siccius promoventur, iis, nisi sint contusa, caro ut plurimum non supercrescit; necessitatem purgantium, seu abstergentium, & exsiccantium videtur proponere.

*Alia requisita ad carnis generationem.*

Non minus necessaria est peregrinorum corporum intra vulnus existentium detractio, nec non & præcautio, ne quid hujusmodi intra vulnus decidat, ac delirescat, si carne replenda sit cavitas: repleti enim cavitas carne non potest, quandiu aliquid natura

turæ



turæ infensum intra vulnus contineatur; unde si substantia contenti corporis nullum faceſſat negotium naturæ, vel si contentum corpus in tali reperiretur loco, ut nullam molestiam naturæ inferret, forſan eo non obſtante reliquam cavitatem impleret natura, & vulnus ad ſanitatem perduceret. Primum contingere experientia quotidiana oſtendit, videmus enim vulnera bellico fulmine illata nihil refragante contenta pila plumbea, non rarò carne repleti, & ad ſanitatem perducunt. Alterum evenire poſſe teſtatur Hippocrates, quinto enim Morb. pop. hæc refert. Qui juxta inguen ſagitta percuſſus eſt, quem nos vidimus, maximè præter omnium ſpem ſervatus eſt, neque enim cuſpis exempta eſt; erat enim valde in profundo, neque ſanguinis eruptio ulla memorabilis fiebat, neque inflammatio, neque claudicavit; cæterum cuſpidem invenimus nos, ipſamque exemimus, cum ſex jam eſſent anni, ex quo ſauciatus erat, ſuſpicio autem erat hæc inter medios nervos cuſpidem occultatam fuiſſe, nullamque venam, aut arteriam diſſectam eſſe.

Ampliùs, ſi vulnus fuerit contuſum, quoniam non niſi ex ſana carne nova caro naſci poteſt, & omninò ad carnis generationem ulcus purum requiritur, neceſſarium erit, ut cavitas repleti carne poſſit, contuſam carnem abſcedere, & propterea ejus ſuppurationem procurare medicus debet; unde Hippocrates libro de Ulceribus: Quodcunque ulcus caſim, percuiſſimve acuto telo eſt diviſum, medicamentum enæmon, & ſiccans, & quod ſuppurare vetet, admittit. Sin caro aliqua telo tum contuſa, tum caſa ſit, huic ita medendum eſt, ut quàm celerrimè ſuppuret; nam & minus phlegmone urgebitur, & neceſſe eſt, carnes, quæ contuſæ caſæque ſunt, putrefactas, & in pus verſas liquari, poſtea novam carnem naſci.

Tandem quoniam temperatam eſſe ſubjectam carnem oportet, ad vulnera carne implenda, & ſanguinem eſſe probum, & quantitate mediocrem, ut dicebat Gal. 4. Meth. primo, videndum erit ne quid accidat quod partis temperamentum poſſit evertere, & ſi ſanguis redundet, minuendus; ſi vitium aliud contraxerit, corrigendum erit hoc vitium. Et quoniam ab influentibus ſuccis tem-



peramentum partis evertitur, & vitiatur sanguis, qui deberet esse carnis materia, fluxionem inhibere oportebit.

Recta quoque victus ratio erit instituenda, ne sanguis in majori copia generetur, quàm par sit, aut pravis genitis succis inficiatur, vel ob pravam ingestorum qualitatem aliter vitietur.

## CAPUT XXVI.

*De abstersione, & abstergentibus.*

Cum abstersio ex Galeni mente sit actio necessariò requisita ad carnis generationem, antequam ulteriùs progrediamur, consideranda est ejus natura, ut postea quanta sit ejus necessitas, elicere valeamus. Abstergendum esse in cavis vulneribus inferebat Gal. quia in ipsis ob innati caloris imbecillitatem necesse est, dum alimentum coquitur, pro partis nutritione duo excrementorum genera suboriri, unum tenue, & alterum crassum: illud quidem ichor, hoc sordes appellatum, unde sicuti tenuioris ratione exsiccare convenit, ita ratione crassioris abstergere; ea enim est sordium natura, ut propter visciditatem vulneris affixæ parietibus contumaciter hæreant, & ob id per abstersionem auferri postulent. Addiderunt recentiores alia quoque ratione abstergendum esse in vulneribus, gratia videlicet puris, quod in vulnere cavo necessariò generatur, modò ex carne contusa, modò ex supercrescente carne eliquata, semper autem ex superfluo sanguine ad vulneratam partem pro ejus nutritione transmissio; cum enim par sanguinis quantitas ad partem pro ejus nutritione transmittatur, ac sanitatis tempore, & fortassis etiam major, tantaque sanguinis quantitas ab imbecilla parte non possit confici, & in substantiam partis verti, quod superfluit suppurat, & fit pus, a parietibus vulneris abstergendum.

*Abstersio  
quid.  
Duplex ab-  
stergendi  
ratio.*

Propterea abstersio erit opus, quo quæ vulnerum parietibus hærent defixa, aut impacta abraduntur quodammodo, & amoventur. Quod duplici ratione fieri posse certum est, aut videlicet manuum opera, dum gossipio, vel molli lana, aut alia re simili specillo obvoluta, vel linteo, aut spongia vulnus emundamus, aut medicamentis, quæ abstergendi vim habeant; abstergere enim

non



non esse naturæ opus accipiunt omnes. Unde Gal. 3. Meth. 8. Purgari sordida possunt, etiam carne naturalem statum non servante, propterea quod medicamentorum tantum est opus.

Quæ ergo abstergunt medicamenta, duorum generum statuuntur, alia siquidem per se abstergunt, alia verò ex accidenti, *Abstergenda duplicia.* & hæc appellantur abluentia; fluxibilia enim sunt, & hac fluxibilitate pertranseundo sordes leniunt, liquant, & abluunt, non aliter ac aqua projecta, aut aliter fluens soleat sordes à terra, aut alio corpore secum trahendo abluere, ex quo abluentia fuere appellata, unde Avic. lib. 2. tract. 1. c. 4. Lavativa verò est omnis medicina, cujus proprietas est, ut abstergat, non virtute agente in ipsa, sed virtute patiente, quam juvat motus, & significo per virtutem patientem, humiditatem, & per motum significo cursum; currens enim subtile cum vadit super orificia venarum, lenit humiditate sua superfluitates, & remover eas suo cursu, sicut aqua hordei, & aqua cucurbitæ.

Quæ per se abstergunt, ea sunt, quæ vi sua deterforia abradunt à parietibus vulneris, seu ulceris excrementa crassa, à Græcisque rhyptica appellantur, & genere non differunt ab iis, quæ *Abstergentia per se quæ.* poros, & meatus expurgant, & farctum liberant, dicta ob id à Græcis pororum ecphractica, & eccathartica, sed solum secundum magis, & minus, unde Gal. quinto, de Simp. med. fac. capitulo 12. Nam in ratione majoris, & minoris differunt substantiæ genere minimè diversa tum emplastica ab iis, quæ sordem nutriunt, tum repurgantia ab extergentibus. Nam quæ in superficie sordem auferunt, sive in cute sive in ulceribus, ea extergentia, seu rhyptica nominantur, quæ verò poros etiam expurgant, ea subtiliorum his partium sunt, & emplasticis contraria, proinde pororum ecphractica, & eccathartica, quasi expurgantia, & farctum liberantia dicas, appellantur. Nitrosa quidem, & amara sunt, quæ poros expurgant, ut ibidem dicit Galenus, quòd si intra corpus assumenda sint, etiamsi quædam adstrictio illis sit adjuncta, non minus expurgant, immo & fortasse magis, impellente veluti manu adstrictoria facultate expurgatorias partes, ut alibi docuit Gal. Saltem non obest adstringens facultas expurgationi propter meatuum amplitudinem, & præterea viscera corroborant: at si



extrinsecus cuti sint apponenda, ut monet Gal. 5. simp. cap. 12. solam nitrosam qualitatem possideant exactam est opus ad ea peragenda, quæ dicta sunt. Nam foris meatuum exiguitas pejus ab adstrictione occlusa, quàm probè queat expurgari, non etiam inde in altum abstergentem substantiam recipit, nec expurgatur. Non solum autem nitrosa, & amara sordes ulcerum possunt abstergere, verum & viribus minora, ut sunt dulcia, & tenuium partium; immo nitrosis, & amaris in contumacioribus tantum sordibus utimur, vel si ad minus contumaces sordes iis uti volumus, quæ ex eis sunt imbecilliora deligimus, & cum aliis etiam permiscemus.

Inter simplicia igitur, quæ abstergunt, connumerantur saccharum, mel, farina fabarum, hordei, erui, lupinorum, lentium, cicerum, item serum, aquæ thermales salæ, & nitrosæ, veluti est aqua Teruciana, semen lini torrefactum, & hæc sunt leviora. Fortiora his sunt iridis radix, panacis, aristolochiæ utriusque, semen ormini, apium, marrubium; absinthium, herba regina appellata, terebinthina, pix utraque, fel, & hujusmodi, fortissima verò sunt utrumque veratrum, hermodactili, cinis tartari, & hujusmodi, ex quibus varia componi possunt. Habentur autem in officinis præparata mel rosaceum, oxymel, & mundificatorium appellatum ex apio, quibus fortius est unguentum ceratinum appellatum. Egregium mundificativum evadit digestivum lotum, si ei præcipitati tantillum admisceatur. Cum eodem permisceri solet mel rosaceum, & oxymel, & pulvis myrrhæ, & aloes. Sed alias uberior silva hujusmodi medicamentorum proponitur.

## CAPUT XXVII.

*De suppuratione, & suppurantibus.*

**Q**Uoniam quod suppurationem postulat in vulnere cavo existens generationi carnis obsistit idcirco videre oportet, quæ ratione promovenda sit ejus suppuratio, & quæ sint Medici partes seu unde nam hauriendæ sint utiles indicationes. Id autem non aliunde melius, quàm ex ipsius suppurationis natura fiet conspicuum.

Suppu-



Suppurare quidem illud dicitur, quod in pus vertitur, unde Gal. 5. de simp. med. fac. cap. 2, Suppuratio, dicebat, est in pus *Suppuratio quid.* mutatio. Hæc alio modo appellari solet maturatio, quamvis metaphorice: perficitur enim coctione quadam à naturali calore, ut primò animadvertit Aristoteles 4. Meteorologicorum, deinde Gal. & eam proinde inter opera naturalia connumerat; Unum, dicebat 5. de simp. med. fac. capit. 90. ex naturalibus operibus est ea, quæ in pus fit conversio; nam & illic perficitur quædam coctio. Eandem appellat Gal. 1. de dif. feb. cap. 6. putredinem aliquid co- *Tres alterationes in humano corpore.* ctionis in se continentem, sed talis putredo, dicebat loquens de pure, aliquid in se continet coctionis; nam adhuc vi concoquente in vasis remanente, qui interim putrescit humor ad talem pervenit alterationem: unde ut magis pateat suppurationis natura, animadvertendæ sunt tres illæ alterationes, quæ in corpore animalium sunt, à Galeno propositæ quinto de simp. med. fac. capit. 6. quarum una omninò est secundum naturam, altera omninò præter naturam, tertia media, & ex utraque mixta. Prima in alimento attenditur, cum videlicet à calore naturali coquitur, ut ex eo nutriatur corpus, & triplex est; una siquidem fit in ventriculo, in qua ex assumptis generatur chylus; altera fit in hepate, & venis, cum videlicet ex chylo, vel pituita fit sanguis: tertia in omnibus partibus, cum in earum substantiam sanguis convertitur. Quæ est omnino præter naturam, ea in omnibus putrescentibus attenditur, cum enim hujus alterationis finis sit putredo, planè constat esse omninò præter naturam. Media, & mixta ex utraque ea est, de qua in præsentì est sermo, videlicet suppuratio.

Quòd verò media sit inter alterationem omninò secundum naturam, & eam, quæ omnino est præter naturam, hinc colligi potest, quæ secundum naturam existit fit ex familiari animantis natura, ut inquit Gal. loco citato, & ab ingenito calore eam planè *Suppuratio est alteratio media inter secundum naturam, & præter naturam.* superante, ejusque finis est corporis nutritio: at quæ præter naturam ab aliena caliditate perficitur, & ad nihil est utilis; illa enim est, quam Galenus primo, de dif. feb. capitulo 6. appellat putredinem, quæ fit natura superata, quando scilicet vis concoquendi imbecillis facta est, ut nullam amplius facere possit in putrescente superfluitate ad optimum transmutationem, vel quia hu-



mor putrescens est maximè vitiatus, etiamsi vis ipsa non fit omninò imbecillis; vel quia vis ad ultimum imbecillitatis pervenit, etiamsi humor non sit maximè vitiatus, quo fit, ut solo præternaturali calore alteretur humor, & proinde in ejus putredinem alteratio terminetur.

*Augens in  
suppuratio-  
ne.*

At suppuratio fit quidem à naturali calore, verùm non planè vincente, neque enim ex materia fit, quæ prorsus sit benigna, ut dicebat Galenus 5. de simp. med. fac. capitulo sexto, neque tamen ex omnino aliena, & propterea quòd alteratur neque putrescit, neque etiam nutriendo corpori est idoneum, sed pus evadit, conspectui album, ut notat Gal. primo de dif. feb. c. 6. & crassum, & quaque versum sibi simile, læve autem tangenti, & minimè fœtidum.

*Quomodo  
suppuratio  
fit media  
transmuta-  
tio.*

Quomodo etiam suppuratio fit media illa transmutatio, pulcherrimè docet Galenus 2. Aph. 47. his verbis: Pus ex sanguine ortum habet, qui semè malam, ut quispiam dixerit, habet transmutationem, nam mala simpliciter cum putrefactione fit olida, sicuti quæ simpliciter optima; est ipsa nutritio partium animalis: at quæ pus generat, medium inter has obtinet locum, neque à solo calore extra naturam, neque à solo secundùm naturam facta; mixtus enim quodammodo ex utrisque est calor inflammationis.

*Contradictio  
in Galeno  
tollitur.*

Neque huic repugnat, quod Galenus profitetur primo de dif. feb. capitulo sexto, pus scilicet fieri superante natura, qua ratione dicebat: Superante verò integrè ipsa natura, optimum fit pus, conspectui album, & crassum, &c. per integram enim victoriam naturæ hìc intelligit Gal. naturæ victoriam supra calidum extraneum; quamvis enim ab utroque calore fiat alteratio, superatur tamen calor præter naturalis. At quando 5. de simp. med. fac. capitulo sexto, asserit alterationem hanc fieri à calore non prorsus vincente, victoriam caloris naturalis supra materiam, quæ alteratur, intelligit, quam profectò non habet calor, cum non possit materiam assimilare. Unde dicebat loco citato: Siquidem alterationi secundùm naturam duo hæc insunt, ut ex familiari animantis natura fiat alteratio, & ab ingenito calore planè superetur. Quòd etiam primo de dif. feb. intelligat de victoria caloris naturalis supra extraneum, ex eo non minus colligi potest, quod eodem loco multas constituit alterationes medias inter putrefactionem & suppuratio-  
nem



nem ex eo ortas, quòd neuter calor integram habet victoriam super alterum, in quo quidem multi sunt differentiarum modi, & ideò ibidem: Ex duorum autem generum miscella (eorum unum fieri dicebat superante natura, alterum verò superata) alia tertia secundum speciem evariat, quoniam & innumerabiles miscellæ modi in eo, quòd magis, & minus superare, vel superari alterum generum reperiuntur. Hinc postea de hac tertia loquens subjun- gebat: Sæpius enim cum calore album factum sit pus, videlicet vel fœtidum odorem, vel tenuem substantiam obtinet, sæpius verò non album apparet, sed lividum, atque in his omnibus magis, ac minùs infinitis modis evariat.

Sed nec videtur penitus sublata difficultas, cum Gal. dicat secunda Aph. 47. Suppurationem fieri neque à solo calore præter naturam, neque à solo secundum naturam, posteaquam mixtus est quodammodo ex utrisque calor inflammationis; Si enim ab utroque fit calore, quomodo dici potest, à naturali calore integrè superari præternaturalem? propterea sciendum est præternaturalem calorem locum habere in suppuratione, trahit enim materiam ad putredinem; contra naturalis calor materiam ad benignum conatur reducere, & partibus assimilare, atque cum vel ob propriam imbecillitatem, vel ob materiæ vitium hoc assequi nequeat, facit, quod potest, prohibet enim putrefactionem, devicto præternaturali calore, & materiam in pus convertit, quod in calore saltem spermaticis partibus est simile, quamvis habeat aliquid putrescentiæ, ut notavit Gal. 4. Meth. 5. ob actionem præternaturalis caloris, qua ratione ea appellavit 1. de dif. feb. 6. putrefactionem habentem aliquid coctionis. Patitur ergo materia ab utroque calore, sed tandem à naturali vincitur præternaturalis calor, pusque conficitur habens supra enarratas condiciones; quando autem integrè non vincitur, una, vel plures ex conditionibus optimi puris deficiunt, ut ibidem dicebat Galenus.

Cum igitur suppuratio fiat ab ingenito calore, qui talis, & Suppuratio tantus esse debet, ut præternaturalem, qui materiam suppurandam trahit ad putredinem, possit superare, idcirco procurandum erit, ut calor ingenitus prorsus secundum naturam se habeat, quod ad ejus temperiem attinet, in qua robur ejus est constitutum; hinc fovere



fovere atque conservare insitum calidum oportebit, ut ad unguem sit symmetrum. Et quoniam in majori quanto major est virtus, idem quam plurimum esse conveniet. Cum verò materia interdum ob pravam adnexam qualitatem naturali calori rebellis sit, & contumax, & ob id ægrè suppurabilis, prava illa qualitas suo contrario erit expugnanda. Pari ratione, si naturalis calor igneus evasisset, contrariis remittendus esset caloris excessus, ut ad suam symmetriam reduceretur; sicuti excitandus esset calor, si hebetata esset ejus qualitas.

*Quot modis  
medicamen-  
ta suppurati-  
onem ad-  
juvent.*

*Suppuran-  
tia duplicia.*

Ex quibus patet, varia esse, quæ ad promovendam suppurationem faciunt, alia enim id præstant fovendo naturalem calorem, & ejus symmetriam ad unguem conservando, nec non & quantitatem ejus adaugendo, alia verò impedimentum aliquod removendo, ut hoc per accidens, illa verò per se ad suppurationem facere sint dicenda; hinc alia propriè suppurantia dicuntur, alia verò per accidens, & impropriè: licet neque pus moventia propriè dicta ob id talia appellentur, quia revera pus generent, sed quia suppurationem adjuvant opem ferendo naturali calori; sicuti enim alterationes naturales auxilium ab iis recipiunt, quæ calorem naturalem adjuvant, ut patet de ventriculi coctione, cui maximè confert, quod extrinsecus admovetur, vim habens calorem naturalem ventriculi fovendi, & roborandi, ita & de hac media alteratione existimandum est, cum & ipsa à naturali calore perficiatur. Hinc qualia esse oporteat hæc medicamenta, ex eorum natura; quæ alterationes naturales adjuvant, deprompsit Galenus. 5 de simp. med. fac. c. 6. Hæc enim similia sunt naturali calori, & propterea alia quoque esse debere, quæ pus movent, concludit unde dicebat: Quemadmodum naturales alterationes, quæ ab innato calore proveniunt à simili extrinsecus juvantur, pari modo & quæ in movendo pure conspiciuntur: nam quid æque coctioni naturali conferre novimus, atque corpus humanum illi impositum, & paulò post: Tale esse debet, quod ad movendum pus adhibetur, qualis est in naturis temperatis calor natus. At, si justo calidior natura fuerit in eo corpore, quod pus movebit, medicamen calidius sit oportet, quantò & natura ejus temperata in caliditate exuperat, ex quo ulterius infert cujusque sigillatim ho-

mini



minis suum, ac proprium esse puris movendi medicamentum. Idem colligit 5. de sim. med. fac. cap. 9. ex eo quod ab illis postulat naturalis calor, ut melius suppurationem perficiat: postulat autem, quemadmodum etiam superius dicebamus, ut ejus substantia augeatur absque qualitatis intensiōe, aut imminutione; etenim oportet ipsum esse quamplurimum, & ad unguem caliditate symmetrum; quippe cum hic in pueris copiosissimus omnes actiones naturales adaugeat: debent itaque ipsi naturali calori esse similia, sic enim ipsius caliditatis symmetriam conservabunt. Quod si ipso insito calido forent calidiora, non solum intenderetur nativi caloris qualitas, unde intemperatus redditus minus prosperè quoque propria munia obiret, verum etiam substantia diminuere-  
tur, nam ab admodum excalescentibus illius substantiæ vacua-  
tur non parum. Quare cum nativus calor sit calidus, calida quo-  
que necesse est esse medicamenta, verum in eo caliditatis gradu,  
in quo est ipse insitus calor, cumque humidus etiam existat, &  
ipsa humida esse convenit; namque ab exsiccantibus non solum  
non conservaretur ejus symmetria, verum, & de ejus substantia  
absumeretur. Quod si una calidiora forent, & resiccandi vim  
haberent, multò magis insiti caloris substantiam digererent.

Statuendum est igitur, talia medicamenta calida esse, atque *Qualitas*  
humida, verum modicè; hujusmodi enim caliditas, & humidi-*suppuran-*  
tas non dicit excessum supra naturam nostram, sed similitudinem, *tium.*  
& ideò sicuti natura nostra modò calida, & humida appellatur,  
modò temperata, qua etiam ratione dicebat Gal. 1. Aph. 14. Be-  
nè temperata est innati caloris substantia, cum tamen eadem qua-  
litas semper significetur, ita hujusmodi medicamenta modò tem-  
perata, modò calida, & humida dicuntur, & semper eadem  
qualitas designatur, & ideò Gal. 5. de Simp. med. fac. 9. Dictum  
verò est, quòd modicè pus moventium naturam humectantem,  
& excalescentem esse oporteat, quod aliis verbis est, ut ne-  
que excellat, neque inferius sit temperatura corporis ipsum im-  
mutantis, sed quoad fieri potest, simillimum, & cap. 6. ajus-  
dem: Rursum ergo proposito tanquam scopo quodam in hoc  
sermone optimè temperato homine, ejus respectu aliud dicimus  
esse medicamentum pus movens, quàm quod indurata emollit,



esseque eorum temperaturas , quas superius esse posuimus , ejus quidem , quod naturæ in movendo pure auxilio est , commoderatam, & similem ei corpori, cui admoveatur, ac proindè, quòd natura nostra humida sit , & calida, humida, calidaque medicamenta hujusmodi frequenter appellari ; ejus verò , quod indurata emollit , temperata natura multò calidiorē , non tamen jam valdè calidam , & prius cap. 4. dixerat : Id genus medicamenta humida , calidaque dicimus non ceu calidiora , & humidiora, quam nostra sit substantia , sed similem habentia nobis temperiem , quæ calida , & humida est juxta veterum sermonem.

*Mercatus.* Ex quibus infero, vanam, & inutilem esse distinctionem, quam excogitavit quidam vir doctissimus, ut loca Galeni, quæ sibi adversari videntur, conciliaret, cum aliquando suppuratoria medicamenta calida , & humida appellet, aliquando verò temperata esse asserat ; inquit enim duo in pure conficiendo spectari , primum, ut optimum sit ; secundum, ut quam celerrimè fiat : illudque à medicamentis fieri temperatis, hoc verò à calidis, & humidis. At qui attentè Galen. legerit, manifestè deprehendet, idem prorsus voluisse, quando asseruit, suppurantia calida esse, & humida, & quando temperata. Et quomodo potest diversas qualitates intelligere, ac diversa suppurantium genera, si hoc dato, statim necessariò consequitur, ut aliqua suppurantia minimè sint similia insito calori, sed aut excedant, aut excedantur,

*Suppurantia neque intendunt calorem, neque augent humiditatem partium.* quod est naturam suppuratorii evertere. Sicuti autem suppuratoria etiam si calida sint, non ob id tamen possunt calorem intendere, ita si sint humida, non ob id tamen augere possunt similarium partium humiditatem, eò quòd sicuti ipsorum calor similis est naturali calori, ita etiam humiditas nativæ humiditati assimilatur : quamvis ut calida, & humida superfluum quamdam humiditatem in spatiis vacuis contentam attenuare possint, atque digerere, unde Gal. 5. simp. cap. 6. Pus moventia superfluum in spatiis vacuis contentum humorem per halitum digerunt, ipsis tamen similaribus partibus secundum naturam affectis humiditatis nihil neque adjiciunt, neque adimunt, quod manifestum sit, & sentiri queat, quippe cum temperaturam possideant æqualem, & simi-



& similem, earum substantiam tueri potius, quàm alterare possunt. Ex eo etiam, quod hujusmodi medicamenta debent augere nativi caloris substantiam infert Gal. 5. simp. 9. emplastica quoque esse debere, ut poros corporis obstruant, & spirituum distillationem prohibeant, hoc enim faciunt emplastica, idcirco dicebat: Quin etiam quod emplasticum esse debeat ejus generis medicamentum, ut exactè puris generativum sit, & ipsum liquidò mihi apparere videtur: nam si substantiam innati caloris augere, non intendere qualitatem ipsam conveniat, poros corporis obstructos esse necesse est, quo videlicet halituosos transpiratus includant.

Est autem emplasticum medicamentum, ut 5. simp. 10. asserit Galen. quod tenaciter corporis poris, seu meatibus illitum inhæret, qua ratione mordacitate vacare omninò debere concludit, veluti etiam docuerat 4. simp. 4. & 5. nam si qua illi inesset mordacitas, hære in poris non posset, sed omninò facilè exerneretur, aut partium aliquam liquando, aut certè humorem ex alto trahendo; necnon & terrenæ esse consistentiæ, ac viscosum, quamvis, ut docuerat loco mox citato, ex eis nonnulla non terrena solùm, sed aquea natura sint, quin etiam quædam non parum aëris in se contineant, omnia quidem glutinosa, & proindè emplastica. Sicuti ex accidenti emplastica fiunt emollientia, & laxantia omnia, quando crassioris sunt substantiæ; illinendo enim poros obstruunt & ita fiunt emplastica. Quòd verò poros obstruendo nativi caloris substantiam augeant, non est difficile ostendere; cùm enim semper diffletur naturalis calor, si pori obstruantur, profectò ejus diffusio, quæ per poros fit, prohibebitur, quare cum nunquam deficiat ejus generatio, necessariò augebitur ejus substantia. Non enim existimo, veluti quidam ex recentioribus censuit, idcirco suppurantia substantiam nativi caloris augere, quia substantiam habeant vaporosam similem substantiæ innati calidi, quæ admixta ipsi innato calido ejus substantiam augeat, siquidem substantiam caloris innati augeri non posse certum est, nisi quid ei addatur, quod in eandem substantiam convertatur, at in substantiam illius solam tenuiorem alimenti partem verti adeò notum est, ut demonstratione non



egeat. Et quando Galenus tradit suppurantia insiti calidi substantiam augere, id ea ratione vult contingere, qua poros obstruendo ejusmodi medicamenta transpiratus halituosos includunt, ideoque cap. 9. dicebat, verum halituosum, & calidum spiritum contineri quamplurimum expedit. Et superius dixerat: Nam si substantiam calidi innati augere, non intendere qualitatem ipsam conveniat poros corporis obstructos esse necesse est, quo videlicet halituosos transpiratus includant.

Itaque in Galeni doctrina suppurantia calida esse debent, & humida, sed modicè, seu calori nativo quàm simillima, nec non & emplastica. Quam doctrinam acceperunt posteriores omnes. Hinc Avicen. lib. 2. tract. 1. cap. 4. Maturativa est medicina, cujus proprietas est, ut acquirat humidi digestionem, quoniam calefacit cum æqualitate, & in ipsa est virtus stiptica, retinens humorem usquequò digeratur, & non resolvatur laboriose, & separetur humidum ejus à sicco, & est adustio, quia facit adustio, ut separetur. Et Serapio lib. de simp. med. serm. quarto: Oportet, quòd medicina maturativa sit proportionalis calori naturali corporis, itaque si calor naturalis corporis est amplior, medicina, quæ debetur illi, oportet, quòd sit calidior in illo, quàm in alio corpore, & oportet, quòd quantitas additionis caliditatis suæ super æqualitatem sit secundum quantitatem additionis caliditatis illius corporis super corpus æquale, & secundum hanc formam est necessaria medicina cuilibet corpori conveniens, qua operetur in eo. Et complexio medicinarum, quæ juvant ad generandam sanie, & pus est complexio æqualis similis in natura sua corporis hominis, & natura quidem corporis hominis est calida, & humida, & ideò natura medicinæ, quæ generat sanie, est calida, & humida, & ipsa non habet facere istam operationem cum qualitate sui corporis, sed potius cum quantitate ejus. Itaque si possibile esset, quod manus non separaretur ab applicatione continua membri, in quo necessaria est generatio saniei, vel aliquod aliud membrum applicaretur, eò citius generaretur in eo sanies; quàm alio modo: igitur talis medicina erit in ultimo assimilationis complexioni corporis hominis illius, in quo necessaria est generatio saniei citò: & paulo post.



post. Et oportet, quod medicina hujusmodi sit glutinosa, donec sit in fine convenientiæ faciendæ sanem, videlicet faciendo appositionem, & additionem substantiarum caloris innati, claudendo poros corporis, & includendo vapores interiùs, quia conversio, quæ fit ad sanem, est una ex operationibus naturalibus, quia est conversio, & alteratio, cum qua est etiam parum digestionis, & necesse est, quando volumus, quòd aliquid digeratur, quòd custodiamus interiùs multitudinem spirituum. Quibus verbis videtur maximè Galeni mentem affecutus. Paucissimis verbis idem explicavit Avic. 3. 4. tract. 1. cap. 24. dicens: Medicinarum maturativarum caliditas oportet, ut sit proxima caliditati corporis, & sit eis inviscatio quædam.

Juxta placitum igitur omnium propemodum medicorum *Suppurantia* suppurantia sunt butyrum, adeps recens suillus, & humanus, & *simplicia* aliorum animalium, quæ non multum remota sunt ab hominis temperamento, oleum olivarum, oleum amygd. dulcium, semen lini, & ejus oleum, vitelli ovorum, & eorum oleum, malva, althea, & præsertim radix ejus, & semen, violaria, farina tritici, ficus sicca, passulæ, thus pingue, terebinthina lota, cera, pix, resina lentiscina, resina pinea, capæ liliorum alborum, capæ, & allia sub cineribus cocta, radix, & folia lapatii cocta, caulium folia, brachia ursina, aqua tepida, & hujusmodi. Inter composita verò, *Composita* quæ suppurationem adjuvant, recensentur Tetrapharmacum, digestivum lotum appellatum; digestivum aliud confectum ex terebinthina lota, & ovi vitello, addito etiam rosaceo, & farina tritici, & modico croco, digestivum aliud ex terebinthina lota, oleo amygd. dulcium, & cera, digestivum aliud ex æquis portionibus butyrî recentis, terebinthinæ lotæ, & olei communis, vel rosacei, vel amygd. dulcium, vel seminum lini, item aliud ex terebinthina lota, oleo vitellorum ovorum, rosaceo, & cera, oleum commune, aut rosaceum, vel violaceum, in quo catelli nuper nati bullierint ad carniū consumptionem, nec non & lumbrici terrestres, hydrælaeum, unguentum ex mucilaginis, diachylon cum axungia suilla, vel butyro recenti. His addi possunt innumera emplastra, & cataplasmata, quæ parantur ex malvis, violariis, caulium foliis, radicibus althææ, capis liliorum alborum, cari-



cis, seminibus lini, aqua, aut lacte decoctis, addito oleo communi, rosaceo, violaceo, amygd. dulcium, seminum lini, lumbricorum terrestrium, adipe suillo, butyro recenti, necnon & farina tritici, aut pane eraso, ut decentem consistentiam recipiant.

*Suppurantia per acci-  
dens quæ.*

Hæc per se dicuntur suppurationem promovere. Quæ verò per accidens eidem conferunt, non sunt, ut superius dictum est, naturali calori similia, sed vel ejus qualitatem excedunt calidiora existentia, vel minùs calida sunt insito calore, immo, & aliquando frigida, quibus quidem qualitatibus aliquod impedimentum suppurationis removeant; in materia enim nimis calida, quæ refrigerant, suppurationi conferunt, propterea quòd ad symmetriam reducant nativum calorem, ac nimium materiæ fervorem, quo suppurationi reluctabatur, compescunt. In materia verò nimis frigida, quæ calidiora sunt, suppurationem adjuvant, reddendo materiam naturæ magis obsequentem, quæ ob nimiam frigiditatem maturationi erat rebellis. Eadem, si fortè qualitas caloris sit hebetata, ad symmetriam reducant. Possunt & aliis qualitatibus esse prædita, nam varia admodum esse possunt, quæ suppurationem impediunt, & ita etiam varia admodum sunt, quæ per accidens suppurationem juvant.

## CAPUT XXVIII.

### *De Peregrinorum Corporum extractione.*

**P**OSTEAQUAM peregrina corpora intra vulnus existentia ejus repletionem & agglutinationem impediunt, & propterea removeri postulant, videamus, quænam sit removendi ratio. Sanguis quidem concretus, pili, & alia corpuscula casu quodam in vulnus illapsa facili negotio auferuntur, nam & digitis licet ea detrahare, & vossellis; interdum etiam ab hujusmodi extraneis gossipio, aut molli lana specillo obvoluta vulnus emundamus, interdum parata ex vino calente lotionem. At si tela fuerint, sive telorum portiones, sive alia corpora ab ipsis telis intrusa, aut ossis frustula, operosa est eorum ablatio, & præsertim si in penitioribus partibus & angustis locis extiterint. Multipliciter tamen ab iis vindicari vulnus



vulnus contingit; quandoque enim medici manu operatio perficitur, attrahentis ab ea parte, qua venerunt, vel impellentis in partem, in quam tetenderunt, parata illis scalpello congrua via, prout magis expedire visum fuerit, & minùs detrimenti ex hoc quam ex illo extrahendi modo impendent, aut exprimentis ad hanc, vel illam partem; quandoque medicamentorum attrahentium ope, nonnunquam etiam ab ipsa expultrice facultate.

Manualem operationem proposuit Cels. l. 7. c. 5. dicens: *Manualis* Omne autem telum extrahitur, vel ab ipsa parte, qua venit, aut *operatio.* ab ea, in quam tetendit: Illic viam, qua redeat, ipsum tibi fecit, hìc à scalpello accipit. Eandem, & medicamenta quoque attrahentia proposuit Avic. 4. 4. trac. 2. c. 10. his verbis: Et hæc extractio quandoque fit cum instrumentis continentibus rem, quam trahit, quandoque fit cum expressione, & quæ ei assimilatur, & quandoque fit cum proprietatibus medicinarum trahentium, quæ extrahunt illud, à quo deficiunt forcipes, vel, ut alia lectio habet, tenalæ habentes caput asperum, sicut est asperitas limæ, & reliqua instrumenta.

Porro attrahentium medicamentorum essentia calida est tenuium partium, & hanc habent alia spontè, & natura sua, alia verò *Attrahentia* *qua, & qua-* *lia.* eam ex putrefactione acquisiverunt, unde Gal. 2. de simp. med. fac. cap. 16. Attrahentes sunt, quæ ex alto vehementiùs attrahunt, ac essentia illis quidem calida est, & tenuium partium; attrahit enim perpetuò calidum, verùm, quod cum caliditate conjunctam habet partium tenuitatem, trahit vehementiùs. Et inferiùs: Attrahentium autem essentia alia spontè nata est, alia verò ex putrefacente, arescenteque generationem sortita. Inter illa ergo, quæ nativa facultate attrahunt, connumerari solent anagallis utraque, *Attrahentia* *duplicita.* *Simplicia* *attrahentia.* aristoloch. rotunda, anemone, dictamnium Creticum, tragii folia, semen, & liquor, verbasci semen, & folia, calamintha montana, radix narcissi, gladioli, xiridis, acutæ spinæ, arundinis, pectinis Veneris, cucumeris agrestis: item propolis, thapsia, euphorbium, sagapenum, galbanum, ammoniacum, gummi Ellemi, pix, resina pini. Inter ea verò, quæ ascititia facultate id faciunt, fermentum, *Attrahentia* *ascititia si-* *cultate.* fimus columbinus, & anserinus, & quilibet alius, qui in calore, & tenuitate partium his sit similis. Sed & dantur attrahentia medicamenta,



*Attrahentia à proprietate totius substantiæ.* medicamenta, ut animadvertit Gal. loc. cit. quæ à totius substantiæ proprietate attrahunt, cujuscumque sunt cochleæ terrestres cum suo tegumento tulsæ, lacertæ caput, immo tota lacerta, cancri fluviales, & eorum cinis, rana excoriata summis partibus resectis, lingua vulpis, magnes quando ferreum est quod continetur, & hujuscumque, in quorum numero collocari non ab re solet dictamnium Creticum ob excellentem attrahendi proprietatem, quamvis & in eo manifesta qualitas adjuvans conspiciatur, calor videlicet cum tenuitate partium, quod est in causa, ut fortius attrahat, ut enim dicebat Gal. loco citato, fortius semper fit attractio, quando duabus causis attrahit medicamentum.

*Composita attrahentia.*

Inter composita verò attrahentia habentur emplastrum apostolicum, stolicon, unguentum fuscum Nicolai; radix arundinis, vel narcissi cum melle contusa, additaque lolii farina, ceratum, quod conficitur ex resinæ pinæ unc. 2. picis aridæ unc. 1. ammoniaci, sagapeni, gummi Ellemi ana unc. s. Rad. aristoloch. rot. dictamni albi ana drach. 1. s. dictamni Cretic. drach. 3. olei veteris, vel facis olei liliorum q. s. simul secundum artem mixtis. Item emplastrum, quod conficitur ex cæpa narcissi numero 1. rad. arundinum unc. 2. nodorum arundinum, fermenti acris ana unc. 1. s. propoleos unc. 1. sulphuris drach. 2. stercoris columbini putrefacti drach. 6. euphorbii drach. s. & s. q. mellis simul s. a. commixtis. Et quod R. terrestres cochleas cum suo tegumento num. 3. capita lacertarum num. 6. cæpam narcissi numero 1. cineris cancrorum fluvialium, dictamni Cretici, seminum verbasci ana unc. s. farinæ lolii unc. 3. mellis modicum s. a. commixta. Et quod R. cæpas narcissi numero 2. rad. arundinis unc. 1. rad. gladioli unc. s. fol. verbasci, tragii ana M. 1. stercoris columbini putrefacti unc. j. rad. cucumeris agrestis, aristoloch. rot. dictamni albi ana drach. 3. dictamni Cretici unc. s. farinæ erui modicum, & s. q. mellis. Pariter ceratum, quod conficitur ex olei veteris præparati unc. 8. propoleos un. 1. resinæ pini, picis aridæ, colophonix ana unc. s. ammoniaci, galbani, sagapeni, gummi Ellemi ana drach. 3. visci quercini drach. 4. euphorbii, sulphuris ignem non experti, stercoris columbini ana drach. 2. cineris tartari ex aceto cremati, croci ana drach. 1. cancrorum fluvialium ustorum, capitum lacertarum ustorum,



ustorum, ranæ summis partibus resectis combustæ, dictamni Cretici ana drach. 1. s. simul s. a. mixtis. Oleum verus sic præparant, R. olei veteris lib. 3. succi verbasci, tragii, anagallidis, calaminthæ montanæ, herbæ reginæ, rad. narcissi ana unc. 5. rad. Aristoloch. rotundæ, dictamni albi ana unc. 1. rad. gentianæ, pectinis Veneris, cucumeris agrestis, gladioli, valerianæ ana drach. 3. M. confusus contundendis, & bul. ad succorum consumptionem, deinde facta expressione, & colatura addatur olei fol. verbasci, tragii, anagallidis, calaminthæ montanæ, herbæ reginæ, dictamni Cretici ana p. 1. rad. dictamni albi, arundinum, cucumeris agrestis, gladioli, xiridis ana unc. s. M. & f. inf. duplici vase s. a. per 24. horas, postea facta expressione, & colatura, sumatur par quantitas rerum dictarum, & fiat altera infusio, & sic tertio, facta postrema expressione, & colatum addatur oleo, rad. dictamni albi, aristoloch. rotundæ, centaurii majoris, arundinum, gladioli, cucumeris agrestis ana unc. s. sem. verbasci, tragii, myrrhæ, castorei ana drach. 2. dictamni Cretici, nodorum arundinum ana drach. 6. M. f. infusio s. a. in balneo calentis aquæ per tres dies, postea, facta modica ebullitione f. expressio, & colatura, dein coque in oleo capita lacertarum num. 10. ranas excoriatas summis partibus resectis num. 4. linguam vulpis num. 1. terrestres cochleas cum suo tegumento tufas num. 6. cancos fluviales totidem ad carniū dissolutionem, postea fiat diligens colatura.

A natura expelli contenta extranea unà cum pure modò citius, modò tardius non rarò observamus; sed & quandoque post vulneris sanationem longo temporis tractu modo per eandem, facta videlicet plerumque abscessu, modo per aliam, quemadmodum, & ab Hip. proditum est, idque aliàs notavimus: quòd contingere existimandum est, quando parvam ex contento corpore molestiam percipit, vel propter illius situm, vel propter ejus substantiam, quæ aliquam videtur habere cum corpore sympathiam, ut est de plumbo; ideoque etiam si globulus plumbeus non extrahatur, modò præstantem aliquam partem non comprimat, aut distendat, vulnera fœliciter sanari videmus.

Verum, quamvis peregrina corpora, & à natura expelli con-  
fueverint, & medicamentis non rarò attrahantur, nihilominus  
Y  
prin-

*A natura  
expelluntur  
interdum  
contenta cor-  
pora.*

*Melior ex-  
trahendi  
modus.*



principem locum ipsi manuali operationi deberi sancitum est. Quamprimùm enim educi postulat contentum corpus, præsertim si partes distendat, comprimat, pungat, aut veneno fuerit infectum, at sola manualis operatio id quamprimùm potest præstare; nam manu, vel instrumentis attrahendo, aut impellendo, prout magis opportunum visum fuerit, & sectionibus congruis, si opus sit, faciliorem egressum reddendo, poterit peritus Chirurgus extranea quamprimùm remove quæcunque ea fuerint, nisi loci profunditas, & partis conditio nimis periculosam manuali operatione extractionem faciant. Medicamentis verò sola ea videntur cedere, quæ minùs resistunt, ut quæ minùs sunt infixa, minùs densa, minora, & leviora, ut spinæ, lapilli, ossium frustula. Præterquàm quod neque citò opus suum absolvant medicamenta, & cùm calida sint, si à principio admoveantur fluxionem advocare facilè possunt: & ipsa natura, ut dictum est, non nisi longo temporis tractu solet expellere. Quocirca si contenta corpora magna sint, solida, ac densa, & omninò talia, ut curationem impediant, vel molestiam aliquam inferant non contemnendam, aut paulò post sint allatura, quamprimùm, apparatu videlicet primo, ipsa manuali operatione procurare extractionem jubemur; neque enim medicamentis fidendum, aut naturæ committendum negotium existimarunt sapientes, nisi majus sit damnum, quod ex operatione imminet, quàm id, quod à relicto corpore potest provenire.

*Quæ consideranda, ut eligatur melior modus.* Et primùm considerandam proponunt, ac perpendendam utilitatem ab extractione futuram, & cum jactura, ac damno, quod in opere ipso infertur, conferendam, atque si major sit utilitas, extractionem procurandam censent, si verò damnum sit majus, ab omni conatu abstinendum. Et quoniam non multò post vulnerationem ob affluxum succorum partes vulneratæ distenduntur, & quodam modo tument, & dolori sunt magis expositæ nisi à principio peractum opus fuerit, differendum monent, donec pus prodiens faciliorem extractionem fecerit, nisi urgeat magis periculum, quod à relicto corpore imminet. Monent etiam, si quando contingat, contenta corpora friabilia esse, ut potius opus naturæ permittamus, aut medicamentis agamus, nisi valdè sint ad manus, & sese obsequentia offerant, solent enim in manuali conatu comminui, & longè majus negotium postmodum facessere.



## CAPUT XXIX.

*De præcavenda, & inhibenda fluxione.*

**I**N vulneribus urgere fluxionis periculum, superius ostensum est, eamque agglutinationi, & carnis generationi obstare sæpius dictum est, ac proindè à vulnerata parte omni studio arcendam, & propulsandam.

Cum verò ex fluxionis causis aliæ præsentēs jam sint, aliæ *Duplex inhibenda fluxionis ratio.* verò nequaquam, sed tamen possint supervenire, duplici ratione consequemur, ne moveantur succi ad vulneratam partem, prima quidem præcavendo, ne superveniant novæ fluxionis occasiones, & causæ, vel jam existentes fortiores fiant: altera verò, quæ præsentēs sunt, auferendo, aut saltem earum vires imminuendo, & si fieri possit, frustrando. Propter primam vitanda est omnis dolorifica causa, & quæcunque possunt partem, plusquam par sit, excalfacere, quæque eandem valent relaxare, ac infirmare, nec non & confertim exhaustire. Præterea, quæ humores calefacere, fundere, attenuare, & ad motum proclives reddere, atque acriores possunt, & aliqua alia mala qualitate eosdem inficere: pariter & quæ extrinsecus accidentia ad affectam partem succos attrahendi vim habent. Et quæ sunt in causa, ut multi, ac pravi succi generentur. *Cavenda.* Cavenda non minùs erunt, quæ vias, per quas fluxurus est humor, aperiendi, ac laxandi vim habent: & incongruus partis situs, declivis videlicet.

Ut verò præsentibus occasionibus consulamus, imbecillitati *Facienda.* partis occurrendum erit; corroboranda enim est pars, & ad temperiei mediocritatem reducenda, nè promptè recipiat, ut docet Gal. 7. Meth. 11. Et si dolor erit molestus, hic erit sedandus, si calor, extinguendus. Ampliùs quia partes quandoque sanguinem ad vulneratam transmittunt, quoniam non multùm eò indigent, tantum sanguinis erit evacuandum, quantum sat est, ut partes avaræ reddantur, & alimenti indigentes; sic enim, quod in se ipsis habent sanguinis, anxie retinebunt; Tandiuque conservanda erit hæc indigentia, quandiu fluxionis urgebit periculum. Cùm etiam



transmittant partes, vel copia oppressæ, vel qualitate irritatæ, totum evacuandum, si in toto fuerit redundantia, si verò in aliquibus tantum partibus, illæ erunt evacuandæ, quæ abundaverint succis. Similiter si pravi succi in toto, vel parte aliqua fuerint, expurgandi hi erunt. Unde Gal. 4. Meth. 2. Sin propter sanguinis copiam, vitiosumve succum, vel corporis totius, vel alicujus suprapositarum partium, illa scilicet prius sunt corrigenda; Amplius, quoniam aptiores ad motum sunt humores ob caliditatem, ac tenuitatem, propterea qui relinquuntur post evacuationem, refrigerandi sunt, & incrassandi: pravaque omnis qualitas, quæ partes ad expellendum irritant, corrigenda. Intercipiendæ pariter erunt viæ, per quas ad vulneratam partem confluunt, si fieri id possit, aut saltem angustiores reddendæ. Tandem, quoniam succi propensionem quandam habent ad vulneratam partem, aut etiam ad eandem cæperunt moveri una, vel pluribus ex superius allatis causis, non solum roborare partem oportebit, ne promptè recipiat, verum etiam repellendi erunt a parte. qua ratione dicebat Gal. 7. Meth. 11. De parte recipiente tantoperè sollicitos esse oportet, ne, quæ confluunt, promptè recipiat; promptè autem non recipiet, si fluxiones repercutiantur, & ipsa ad temperiei mediocritatem reducatur, & aliò convertendus est humorum motus. Cumque futurum sit, ut pars à fluxione sit tutior, si humorum motus ad loca contraria, & longinqua convertatur, id faciendum. Appellatur autem hujusmodi actio revulsio, seu diversio, Græcè ἀντισπασίς, ab ἀντί, quod est contra, & σπᾶσις, quod est traho, seu evello, quasi ad contrarium tractio, seu avulsio, unde & apud Latinos revulsionis nomen nihil aliud significare videtur, quàm alicujus, rei retractionem ab aliquo loco, & quasi retrorsum avulsionem, ut supponere videatur motum, seu propensionem rei nocivæ in aliquam partem, à qua revulsio eandem avertit ad alias, & contrarias, hinc habita est semper præstantissimum in fluxionibus auxilium, & ea potissimum à metu fluxionis liberari partes judicatum est, undè Hip. 6. morb. vulg. sec. 2. tex. 29. & lib. de hum. com. 1. tex. 13. Revellere, si, quò non oportet, ferantur. Et Gal. com. 1. in lib. de hum. tex. 13. Revulsione prohibemus, ne vehementissimi humorum confluxus confertim in partem

*Revulsio  
quid.*



partem decumbant. Et 2. ad Glauc. 2. fluentium humorum *ἀντίσπασις*, seu revulsio medela est. Et com. 1. in lib. de hum. tex. 16. Si inclinatio humorum in loca minùs opportuna fiat, tantùm abest, ut educere, & naturam adjuvare debeamus, ut etiam prohibere, ac revellere debeamus.

Diximus autem revulsionem esse tractionem quandam, respicientes potiùs ad id, quod prima facie apparet, quàm ad proprietatem sermonis. Sicuti enim non omne remedium revellens est attrahens, ut patet de dolore promoventibus, ita neque omnis revulsio fit per attractionem, ac proindè neque per attractionem definienda. Quia tamen ab usu revellentium videntur attrahi humores ad locum, qui revellentibus tractatur, idcirco, & revulsio communiter attractio dicitur. Quòd si vellemus exactè revulsionem definire, oporteret, quoniam nullus humor spontè confluit, sed ea tantùm de causa, quia vel attrahitur, ut fit à purgantibus; vel à natura irritata, atque oppressa transmittitur, aut consecutione quadam, & vi vacui: & ita revellentia, aut idcirco revellunt, quia attrahunt, aut quia naturam irritant, & inducunt, ut prioris motionis oblita, aliò transmittat succos, aut laxando etiam, aut imbecillam reddendo partem, eam invitant, ut eò expellat, ut calefacientia, & dolorem promoventia, aut quia evacuant, ut venæ sectio, dicendum esset revulsionem esse aversionem confluentis, aut confluxuri humoris ad contraria, & remota.

Diximus autem confluentis, aut confluxuri humoris, quia his solis debetur revulsio, confluxis verò, & jam in parte receptis evacuatio. Et si doctissimus Sanctorius etiam confluxos revelli asserat, idque 14. suæ Meth. cap. tert. pluribus rationibus nitatur comprobare & ipsius Gal. auctoritate, quem tamen, si omnia loca perpendamus, quibus de hac materia pertractat, facile apparebit, voluisse revulsionem esse confluentium succorum, aut eorum, qui confluxuri sunt, remedium, non confluxorum: his verò evacuationem deberi semper statuisse, quod videre est lib. Art. med. cap. 95. 13. Meth. 8. 9. & ii. 2. ad Glauc. 2. Com. 1. in lib. de hum. tex. 13. & pluribus aliis in locis. Hinc, quando jam cessavit fluxio, nullam facit revulsionis mentionem. Nec



aliter sentit Hipp. & ideò dicebat 6. morb. vulg. sec. 2. tex. 29. & lib. de hum. tex. 13. com. 1. Revellere, si, quo non oportet, ferantur. Sed, & significatio nominis idem ostendit, aversionis enim nomen præcautionem videtur præferre. Et vulgò etiam malum averti dicitur, quando prohibemus, ne imminens malum accadat: quod si malum acciderit, non amplius avertimus malum, sed à malo eripimus. Nec valet, quod ipse primo loco affert in suæ sententiæ comprobationem, posse scilicet in contrarium moveri, qui confluerunt, humores; in hoc siquidem non est sita revulsionis ratio. Non omnis humor, qui in contrarium movetur ope præsidii medici revelli dicitur, sed is tantum, qui movetur versus partem aliquam, vel in eam conflurus est, aliter omne remedium evacuatorium per partem esset revulsorium, immo & ipsa repulsio esset revulsio.

Quo ad pleuritidem vero, concedimus quidem per sectam in cubito venam evacuari posse conflurum sanguinem, & unà revulsionem fieri, sed negamus, eatenus revellere illam venæ sectionem, quatenus evacuat sanguinem conflum, solum enim revellit, quatenus respicit confluentem, aut conflurum humorem. Non est remedium merè revulsorium, sed mixtum ex revulsorio, & evacuatorio partis: Et respectu conflui sanguinis est locale auxilium, non revulsorium, sed merè evacuatorium. Quam veritatem ipsemet confessus est eod. lib. cap. ult. dum admittit, talem venæ sectionem esse remedium mixtum, revulsorium scilicet, & derivatorium; revulsorium quidem respectu fluentis, & fluxi humoris; respectu vero conflui, qui non resistit, sed sequitur eundem motum, derivatorium: Et si postea aliam materiam, quæ non cedit, in inflammatione commentus sit, quæ cum resistat, vult eam revelli. Sed quomodo hanc materiam talis venæ sectio evacuet, cum non possit esse nisi impacta, ipse videat. Libenter etiam ab ipso peterem, cur non sit potius dicendus revelli, quàm derivari confluxus ille humor, cum attrahatur ad contrarium, quod juxta ipsum est de revulsionis natura, & etiam videtur admittere cap. 3. Nec valet ejus commentum, quod scilicet non resistat, sed sit pronus ad eundem locum, in quo fit revulsio, quam enim propen-



pensionem possit habere in inflammatione lateris existens humor ad cubitum, non video, sed cum cap. 3. manifestè admittat eam venæ sectionem esse quoque revulsoriam respectu istius confluxi succi, manifestum est, ipsum parum sibi met constare. Si Gal. 4. de ra. vic. in acu. tex. 30. inquit: In Angina oportere ad exteriorem superficiem revellere circumpositis collo, quæ attractoria polleant facultate, medicamentis non, propriè usus est nomine, sed attractionem intellexit. Quod affert 2. loco de sectione jecinoris in jecinoris inflammatione, nihil est: concedimus per eam venæ sectionem posse evacuari sanguinem in inflammatione contentum, sed respectu hujus sanguinis non erit remedium revulsorium, sed evacuatorium. Quando verò Gal. in catarrho falso, quod 3. loco afferebat, applicat ceratum de thapsia, non confluxum humorem respicit, sed confluentem, & confluxurum ad thoracem.

Quo ad materiam confluxam ad orificium ventriculi, negamus, eam posse revelli, sed evacuatur à medicamento, aut à natura irritata expellitur. Argumentum ex Naturali Philosophia depromptum non aliud probat, quàm posse revulsionem competere quiescentibus humoribus, quod nos non negamus, atqui ad eos, qui jam recepti sunt in parte, vis rationis non pervenit. Quod affert ex Gal. 4. Meth. 6. nihil urget, inquit enim Gal. Si jam fluxio restitit, atque in membro inhæsit, derivare per vicina magis expedit, non quod etiam velit, posse revelli eundem humorum, sed quoniam & à magis longinqua parte, & ab ea, in qua revulsionem molimur, potest interdum evacuari confluxus humor, ut patet, quando venam cubiti ejusdem lateris secamus in pleuritide. Verùm longè facilius evacuatur pars per proxima, idcirco dixit magis. Quandoque tamen non habemus proximam partem, per quam receptum in parte humorem evacuemus, & tunc facimus, quod possumus, & naturam imitamur, quæ sanguinem in jecinoris inflammatione contentum per nares evacuat. Sic nos in uteri inflammatione venas in talo, aut in malleolo incidimus. Puer liberatus fuit à comitiali morbo ex aura frigida à crure ascendente medicamine ex thapsia, aut sinapi tibiæ admoto, quoniam dissipata fuit aura illa venenata, & si fuit revulsa, non erat materia fluxa, sed fluxura, licet quiescens.

Quo-



*Revulsio  
fit ad con-  
traria, &  
remota.*

Quoniam verò tuta maximè redditur pars à fluxione, ut mox dicebamus, quando ad contraria, & remota humorum impetus convertitur, propterea ad contraria, & remota fieri revulsio; dicitur & propriè revelli dicuntur, quæ ad remota, & contraria trahuntur, sicuti derivari, quæ ad vicina. Ut illæ duæ conditiones necessariò ad revulsionem requirantur, & ex solæ eandem constituent. Unde Hip. libro de hum. tex. 13. com. primi: Derivatio in caput, in latera, qua maximè vergit: at revulsio in supernis deorsum, in infernis sursum. Et 6. Epid. sec. secunda tex. 9. Dissimilia si sursum repant, deorsum detracta solvere, & contraria ipsa, ut capitis purgatio, venæ sectio, ubi non spontè detrahitur. Et Gal. libro de hum. com. primo tex. 13. Revulsio, & derivatio sunt ab Hip. reperta, cujusque immodicæ evacuationis remedia, fit autem derivatio ad vicina, revulsio ad contraria. Et eodem: Revelluntur, quæ supra sunt, deorsum sicuti in iis omnibus, quæ infra sunt, sursum fit revulsio, prætereà a dextris ad sinistram, & à sinistris ad dextra, & ab internis ad externa, & vicissim ab his ad illa. & rursus: Cum humores intro vergunt, sunt extra revellendi; cum in posteriores partes se recipiunt, tu eos in anteriores attrahes: cum huc tu contra in contrariam partem adduces. & secundo ad Glauc. secundo: Semper fluxionis motum ad contrarium trahere expedit. & 13. Meth. xi. Longissimè à tentata fluxione parte, quod redundat, revellere, nequaquam ad eam trahere convenit. & eodem: Ad partes, quæ maximè longinquæ sunt, semper revulsionem facies, æstimata phlegmonis magnitudine, tum corporis totius statu. Et libro Art. med. capit. 99. At ἀντισπασίς communis indicatio est, ad quam maximè distantia; derivatio verò ad vicina. Et 6. Epid. sec. secunda, tex. 9. Humores etenim, qui sursum feruntur, hoc est, in sublime, deorsum revellendi sunt, si perperam sit eorum motus, contra verò agendum est in his, qui in contrarium feruntur. Ad remotas igitur, & contrarias partes ei, ad quam fluunt, vel fluxuri sunt, attrahuntur revulsione humores: quæ quidem contrariæ partes aliquando sunt fluxionis origines, ut, quando Gal. 5. Meth. 14. capiti applicabat ceratum de thapsia, quo prohiberet, & averteret destillationem à capite in pulmones, aliquando verò nequaquam, sed



sed simpliciter contrariæ recipienti parti, ut, quando in angina ex fluxu sanguinis à capite venam in pede, vel cubito secamus, & propterea non ab re actionem hanc appellarunt Græci antispasmi, & eam perfectè compleri aversione ad contraria, & remota judicatum est, nec aliud prætereà requiri: unde si revellendæ materiæ gratia à capite uti volumus frictionibus, aut vinculis, hæc inferioribus partibus adhibemus, sive ad dextram capitis partem fluat materia, sive ad sinistram: si ad cor pravi eleventur vapores, deorsum conamur attrahere, & ad dextram, & ad sinistram partem cucurbitulis, frictionibus, vinculis, & aliis attrahentibus præfidiis, atque ut ad remotiores partes fiat attractio, curamus, illud pro comperto habentes, quò longius materia distrahitur, eò securiorem à fluxione partem reddi: & hoc solùm nobis proponimus. Negari quidem non potest, quin prius, & facilius irruat fluxio ad aliquam partem ex iis, quæ illi sunt è directo, præsertim si per venas fiat fluxio, & ita etiam facilius retrahi; & averti fluentem materiam si per directum fiat revulsio, sed tamen & à partibus dextris ad sinistras, & ab his ad illas fit fluxio, ideoque, & ad sinistras retrahendum, ubi ad dexteram ingruit fluxio, & ad dexteram, ubi ad sinistras. Nonne observamus pleuritidem à dextra in sinistram partem permutari, & è converso, potissimum, si quis ad pauca respiciens, in opposito brachio venam secet? In capitis quoque vulneribus sæpè fit materiæ transitus à dextra in sinistram partem, & è converso, ex quo & partis appositæ paralyxis, aut convulsio accidit, quemadmodum in lib. de vuln. cap. scriptum reliquit Hip. In acutis pariter, in quibus materia turget, videmus hanc moveri maximo impetu à dextris ad sinistras partes, & vicissim ab his ad illas.

Si ergo tota inflammationis materia quandoque spontè, quandoque revulsa à dextra ad sinistram, & è converso à sinistra fertur ad dextram, & omninò si confluunt succi à dextris ad sinistras, & ab his ad illas, profectò non erit absurdum, si ad dexteram quoque vel sinistras partes fiat revulsio. Sunt tamen revellentia quædam præsidia, quæ ob peculiarem revellendi modum rectitudinem exposcunt, cujusmodi est venæ sectio, quæ cum sanguinem evacuet, vitæ thesaurum, & propterea viribus dispendium afferat, ita fieri



debet, ut, quæ major potest utilitas ex illa habeatur, minùs verò percipiatur detrimenti. Ideoque si affectus sit inflammatorius, ut aliquid ejus jam factum sit, aliquid autem etiamnum fiat; non rarò, quod factum est, urget nos ad sui evacuationem, quod cum præstare ab eadem parte non valeamus, eò quòd major concitaretur fluxio, secamus venam in longinquiori parte, sed rectitudine servata, eam videlicet venam eligentes, cum qua etiam aperiuntur venæ lanæ laborantis partis, quemadmodum interpretatus est Gal. 13. Meth. 11. ut in pleuritide dextri lateris secando venam internam dextri cubiti, per quam, licet exquisitam revulsionem non præstemus, aliquam tamen, & insignem facimus, & præterea à parte evacuamus. Hoc igitur facimus, quando, quod est in parte, magis urget, quàm id, quod à contrario latere potest fluere, & vires non ferunt, ut priùs à contrario, deindè ab affecto statim secetur vena; nam si utrumque fieri posset, nihil esset magis eligendum. Sed quoniam interim, dum moram interponimus, ut sectio venæ ad contrarium latus attrahat, nolentes id impedire per venæ sectionem ejusdem lateris, vel ut vires recreentur, & alteram evacuationem possint perferre, ex sanguine in eodem latere existente, & circa affectam partem augeri nimis posset inflammatio, stante præsertim dolore, & calore partis, sæpè cogimur, omissa sectione venæ oppositi lateris, secare, quæ in latere affecto simul potest revellere, & à parte evacuare. Et hoc est, quod dicebat Gal. lib. de cur. ra. per sang. mis. c. 15. & 16. venæ sectionem in opposito latere in pleuritide vel nullam, vel paucam, & obscuram, & non nisi tardè utilitatem præstare. Ampliùs, quoniam venæ sectio non revellit, nisi quatenùs sanguinem evacuat, à qua evacuatione motum suscipit sanguis ad aliam partem, manifestum est, eam parùm ex usu futuram ad revellendum, nisi vena, quæ secatur, communionem proximam cum mittentibus partibus habuerit, qua de causa non quamcunque venam revellendi gratia secamus, sed delectum habemus, & hæc est ea rectitudo, quæ in mera, & exquisita revulsione servanda proponitur. Verùm de sectione venæ aliàs. Patet igitur, modum, quo fit revulsio, esse in causa, ne semper ad maximè longinqua, & contraria revellamus.



Est etiam particularis revulsio, quæ particularem fluxionem *De particu-* respicit. Hanc vix in alia parte observaveris, quàm in capite: *lari revul-* fitque quando ab una capitis parte, ad aliam, ut a cerebro ad *sione.* oculos humor confluit. Sicuti ergo revulsio hæc est particularis, ita in ea non servatur simplex distantia, sed secundùm quid, hoc est, respectu ad talem fluxionem, quæ non est à valdè longinquis partibus, retrahitur enim humor ad contrariam, & remotam partem in capite, sic in fluxionibus oculorum à cerebro, cucurbitulas occipiti admovemus, setonemque affigimus, acribus palatum illinimus, masticatoria præscribimus, & alia id genus. Hac ratione dicebat Hip. 6. Epid. sec. 2. tex. 30. In oculorum fluxu ad fauces revellere oportet. Eandem revulsionem significavit 5. Aph. 68. & 6. morb. pop. sec. 2. dicens: Dolenti partem capitis posteriorem recta vena in fronte secta juvat, in his enim doloribus, inquit Gal. in com. illius Aph. cum aversione evacuatio ex fronte fiet. & 6. morb. pop. sec. 2. tex. 27. hanc appellat localem revulsionem.

Undè nec penitus approbanda videtur Sanctorii sententia, qui existimavit, convenire per se revulsioni, ut fiat ad proxima, ut citò fiat, namque per se si fieret ad proxima, semoto prohibente semper, & in omni casu ita esset revellendum. Utemur eodem argumento, quo ipse usus est, ad comprobandum, non convenire per se revulsioni, ut fiat ad remotissima; quod enim per se competit alicui, competit omni, & semper, at saltèm in sanis, semoto etiam prohibente, non fit revulsio ad proxima, igitur talis conditio non competit per se revulsioni: probatur, quod assumptum est, ex Hip. lib. de nat. hum. tex. 9. com. 2. ubi ait: Procurandum autem est, ut sectiones quàm maximè procul ab illis locis faciamus, ubi dolores excitari, sanguinemque colligi noverimus, quem locum interpretatur Gal. de revulsione facienda sanitatis tempore, tunc siquidem etiamsi nulla adsit repletio in corpore, nihilominus stat Hip. sententia, nec fieri debet venæ sectio ad proxima: aliter non interciperetur consuetudo, ne amplius in eundem locum confluant, seu non assuefierent humores redundantes in alias ferri partes. Rectè quidem sensit dum asseruit, non omnem revulsionem fieri ad distantissima, verùm non ob id erat inferendum, per se fieri ad



proxima. Non omnis revulsio fit ad quàm maximè longinquà, sed alia fit ad remotissima, alia verò ad minùs remota. Finis quidem revulsionis est, ut tuta reddatur pars à succorum affluxu, & cum maximè tuta reddatur, dum ad remotissima avertuntur succi, idcirco respectu hujus finis omnis revulsio deberet fieri longissimè à parte affecta, hoc est, procurandum esset, ut ad quàm maximè longinqua moverentur Succi, sed cum opportuna media interdum imbecilliora sint, quàm conveniret, vel citra maximum virium detrimentum id præstare nequeant, idcirco non ad maximè longinqua semper revellimus, semper tamen ad aliquàliter remota. Longinquitatem igitur meretur locus, unde fluit materia, & modus, quo debet fieri revulsio. Quò à remotioribus partibus fluit materia, eò longiùs convertendus est humorum impetus, quò verò à vicinioribus, eò etiam à minùs remotis: satis est, ut citrà periculum repletionis affectæ mittentem exhauriamus partem. Si à cerebro ad oculus materia flueret, maximè tuti redderentur ab hoc influxu oculi, si materia fluens e. g. ad brachia, & pedes converteretur; Verùm quodnam remedium absque majori detrimento idem præstaret? hac ergo de causa ad occiput, & ad fauces eam revellimus, eligentes longinquiorem partem à parte affecta. Quòd verò revulsio per se fiat ad remota, non ad proxima, cogerentur etiam fateri contrariam tuentes sententiam, si ab iis quæres; eorum utemur telis, cur non fiat revulsio per proxima, siquidem una voce responderent, ne humores ad locum affectum trahantur, & sic revulsio hac de causa non fit ad proxima; igitur conditio illa potius destruit, quàm constituat revulsionis naturam.

Argumenta ab eo adducta nihil me movent. De ratione revulsionis esse, ut citò, & non tardè fiat, admittimus, igitur per proxima erit revellendum, sequelam negamus: non solum enim non fit citiùs revulsio per proxima, verùm nec fit revulsio, sed potiùs attractio ad partem. Reliqua argumenta nullam vim habere comperientur, si consideraverimus longè à tentata fluxione parte avertendos esse succos, non autem longè à mittentibus partibus, seu à partibus, unde humor profluit, nec deberi revulsionem fluxis humoribus, sed solummodò fluentibus, aut fluxuris. Ad remotas igitur, & contrarias partes ei, ad quam fluunt, vel flu-



xuri sunt, attrahuntur revulsione humores: quæ quidem contrariæ partes aliquando sunt fluxionis origines, ut quando Gal. 5. Meth. 14. capiti applicabat ceratum de thapsia, quo prohiberet, & averteret destillationem à capite in pulmones, aliquando verò nequaquam, sed simpliciter contrariæ recipienti parti, ut quando in angina ex fluxu sanguinis a capite venam in pede, vel cubito secamus, & propterea non ab re actionem hanc appellarunt Græci antispasin, & eam perfectè compleri conversione ad contraria, & remota, nec aliud prætereà requiro. Hanc revellendi rationem docuit Medicos ipsa natura. Videntes enim Medici, quomodo natura morbos sedat, materiam ad loca contraria, & remota transmittens, nam vomitus sanguinis supervenientibus mensibus sedatur, collegerunt, optimum esse consilium in morbis a fluxione fluentem materiam ad contraria loca attrahere, & ideò Gal. lib. de hum. com. 1. tex. 13. dicebat; Medicus debet naturam imitari, id ipsum verò ipsa facit persæpè, ut est, in Aphorismis conscriptum: Si, inquit, mulier sanguinem vomat, menstruæque purgationes superveniant, morbus solvitur, quocircà nos cum menstruæ purgationes vehementius, & confertim evacuantur, & cum sanguis ex utero fluit, sursum revellere consuevimus. Cum autem ad loca contraria patienti particulæ semper fiat revulsio, nemini *A quo præscribatur* dubium est, ab ipsius patientis particulæ positu contrarietatem hanc *contrarietas* præscribi, haberique quibus partibus revellentia præsidia sint ad *servanda* hibenda, unde Gal. 14. Meth. 8. Quod autem in priapismo vo- *in revul-*mitoriis medicamentis potius, quàm subducentibus utendum, in *sione.* linguæ vitio contra, id ex partium situ indicari manifestum est, nam aversionis in contrarium, quæ ab Hip. antispasis dicitur, non à substantia, sed à membri curandi positu inventio præstat. *Præsidia*

Ex his colligi potest, non immeritò inter revellentia præsidia à priscis fuisse collocata & venæ sectionem, & cucurbitulas tùm *revellentia.* scarificatas, tùm citra scarificationem, & hirudines, & scarificationes, & vomitoria, & subducentia alvum, & frictiones, præsertim asperas, & vincula, & sinapismos, & vesicantia, & inustiones, & balnea calidioris aquæ, & omnia præsidia, quæ dolorem cient, si remotis, & contrariis partibus adhibeantur. In quorum *Non est per-*tamen usu, quando aliquid in particula receptum est, quod nego- *petuò in-* *stendum re-* *tium*



*vulseriis  
præfidiis,  
etiamsi hu-  
mor influat.*

tium faciat, non est perpetuò insistendum, etiamsi humor influat, sed quandoque eorum usum intermittere oportet, ut interim excerni permittamus humorem, qui ad partem jam influxit, sic enim dolore minùs confluetur particula extrusis, qui illam distendebant sua multitudine, succis, quique eidem sua qualitate molestiam inferebant, & ex consequenti magis proficient revulsoria præfidia, reddentur enim fluentes succi magis obsequentes. Hac de causa Gal. Epid. sec. 2. tex. 8. Noscant oportet, qui sunt humores perperam in aliquod membrum procumbentes revulsuri, revulsoriis præfidiis perpetuò non esse incumbendum, sed tempus aliquod intermittendum esse ab huiusmodi revellentibus vacuum, ut interim humorem, qui jam laboranti particulæ infederit, excerni permittamus, is enim si in membro persistit, duplici ratione illud offendet, multitudine videlicet illud distendens, atque sua illi qualitate molestiam afferens. Quòd si humores in particulam jam delatos extrudi sciveris, illam à dolore vindicabis, faciliusque revellentibus medicamentis aliquid promovebis, cum non ampliùs affecta pars dolore in seipsam humores secundùm id momentum, quod inter initia acceperant, concitet. Tanti hoc fecit, Hip. ut reluctantis succis ab iis, quæ revellunt, abstinendum esse voverit, ideò 6. Epid. sec. 2. tex. 8. dicebat: Cedentem revellere statim, reluctantem dimittere.

*Non sunt  
cogenda re-  
vellentibus  
contumaces  
fluxiones.*

Quocirca quando in ipsa parte affecta reperitur valida quæpiam fluxionis causa, hanc præstat submovere, aut saltem mitiorem reddere, antequam insigni aliquo præsidio revellamus, nisi revellenti præsidio cessuram conjectemus, ne remedio, quod aliis profuit, frustra, & cum virium dispendio manus admoveamus. Sed illud quoque timendum est, ne vim inferendo fluxionem magis adaugeamus: propter conatum enim calefit non raro, atque attenuatur materia, & magis fluxilis redditur, ut majori impetu in affectam irruat: & hac prætereà ratione quod majorem noxam persentientes partes magis etiam enituntur, ut, quod molestum est, expellant, atque ita sanguinem, & spiritum vehementiùs exprimunt; neque vero ad partem, ad quam conamur revellere, sed ad affectam, ut in qua fluxionis occasiones sunt potentiores. Idem accidit, quando propter transmit-

tentium



tentium partium robur, & recipientium imbecillitatem, materia fluens sistentibus remediis est rebellis, ut in hoc casu cautè admodum revellere oporteat. Quod etiam respexisse divini sensus oraculum, quando dicebat, reluctantem dimittere, non est dubitandum. Hinc & Avic. 4. 1. cap. 3. Cumque materiam ad longinquum trahere volueris, loci dolorem priùs sedabis, ut ipsius minuatur coarctatio per attractionem, quoniam dolor est trahens: Cumque ad locum non obedit, ad quem ipsam trahis, non violenter agas, quoniam quandoque violentia illa ipsam movebit, & subtiliabit, & non trahetur, & fiet velociùs declinans ad dolentem locum.

Illud quoque animadversione dignum est, quòd non sunt usurpanda revellentia sine discrimine in fluxionibus, verum cum ex iis alia sint fortiora, alia imbecilliora, in fortioribus fluxionis causis, & in fluxionibus, quæ majora minantur pericula, fortiora quoque revellentia sunt ex usu, in contrariis leviora sufficiunt. Quod si in levioribus fluxionibus iis, quæ fortiora sunt, quis uteretur, nulla cogente necessitate laborantem affligeret.

## CAPUT XXX.

*De cicatricis inductione, & cicatrizantibus, seu epuloticis.*

**C**icatricis inductio est opus, quo paratur aliquid loco deperditæ cutis, ipsi cuti simile, & quod ejus officium suppleat: vulnus enim carne repletum tegumentum postulat, proprium verò, & naturale carnis tegumentum est cutis, quæ deperdita, quoniam est pars seminalis, reparari non potest, veluti caro deperdita, ideoque generatur aliquid cuti simile, quod cicatrix appellatur, quæ nihil aliud est, quàm caro exsiccata, condensata, & indurata, ob idque naturam cutis, quæ carne ficior, ac densior est, referens. Quare sicuti carnis materia est sanguis, ita cicatricis materia est ipsa caro. Hinc Gal. 3. Meth. 5. Quod *Cicatrix quid.* cavum est impletur ex gignenda carne, quæ ex sanguine ortum habet, at ad cicatricem perducitur, quod jam repletum est ex gignenda cute, quæ ex subjecta creatur carne, cæterum cutis eadem



eadem specie cum ea , quæ periit , prorsus restitui non potest , sed simile quiddam cuti , & quod ejus officium suppleat , potest , non tamen planè cutis . Et inferiùs . Quoniam tegere carnem naturali aliquo tegumento propositum est , quippe id est , ad cicatricem ducere ulcus , aut cutis nobis generanda est , aut summa caro cuti similis est efficienda : verùm , ut cutis regeneretur , fieri omninò nequit . Quod superest igitur , efficere est tentandum . Et inferiùs : Quoniam cutis carne ipsa tùm siccior est , tùm etiam densior , si carnem siccabimus , & adstringemus , cuti eam persimilem reddemus .

*Cicatricis  
obductio  
utrum na-  
turæ an me-  
dicamento-  
rum sit  
opus.*

Sed , quamvis satis constet , materiam cicatricis esse summam carnem , attamen num cicatrizare sit opus naturæ , an medicamentorum , non usquequaque facilè est determinare , Galen. enim opus hoc naturæ tribuere videtur unà cum agglutinatione , & carnis generatione , unde 3. Meth. 8. dicebat : Fieri non potest , ut in ulcere vel carnis productio , vel sinus impletio , vel agglutinatio , vel cicatricis inductio rectè unquam cedat , nisi subjecta caro pro naturali modo se habeat ; sunt enim omnia hæc naturæ opera . Et com. in librum de artic. scribit , in utero materno abscessus contingere posse , qui sua spontè aperta vomica pus effundunt , & cicatricem solo naturæ beneficio contrahunt . Et quidem , si medicamentorum esset opus , nihil obstare videretur , quo minus induci posset , etiam carne intemperata , at hoc fieri non potest , docet enim experientia , ut & Gal. animadvertit , induci non posse cicatricem , nisi caro pro naturali modo se habeat , evidentissimum argumentum , quod sit naturæ opus . Prætereà si esset medicamentorum opus , induci posset cicatrix ad libitum in vulnere cavo ante carnis generationem , quia caro etiam in fundo vulneris siccari , & adstringi potest , at hoc est absurdum , ut omnibus notum est : generabitur quidem callus , ut in fistulis , non autem cicatrix . Ampliùs si esset medicamentorum opus , absque medicamentis apposis induci cicatrix non posset , at hoc est falsum ; sæpe enim observatum est , iisdem prorsus medicamentis , quibus regenerata fuit caro , inductam fuisse cicatricem , immò non rarò absque ullius medicamenti ope . Neminem esse arbitror , qui aliquando non viderit , in sponte genitis



genitis ulceribus iisque etiam satis magnis, atque manantibus super ortam crustam decidisse, ulcusque cicatrice obductum reliquisse, cum tamen patiens nullo fuerit medicamento usus.

Altera verò ex parte videtur id esse medicamentorum opus, cum enim cicatrix sit caro exsiccata, adstricta, & indurata, hæc autem medicamentorum sint opera, non naturæ, asserendum videtur, cicatricis inductionem à medicamentis fieri, nequaquam a natura, unde & Gal. 3. Meth. 5. eam medicamentis tribuere visus est; dicebat enim: Si carnem siccabimus, & adstringemus, cuti eam persimilem reddemus, & 5. de simp. med. fac. cap. 15. Id est in planis ulceribus ad cicatricem ducendis consilium, ut caro alteretur, fiatque cutis, idque perficitur per ea, quæ illam contrahere, constringere, constipare, densare præterea siccare, & calli instar indurare valeant, quippe cum cutis velut in callum durata caro sit. Ea igitur medicamenta, quæ sic agere possunt (ecce quomodo opus illud medicamentis tribuit) primariò, proprièque dicuntur epulotica, sive ad cicatricem perducentia.

Admodum urgent utrinque allatæ rationes, ut uni parti magis, quàm alteri hære, haud tutum consilium existimem: Sed *Cicatricis* fateri cogimur & naturam, & medicamenta proprias habere par-*obductio est* tes in hoc opere. Duo namque licet in cicatrice considerare, for-*opus tum* mam videlicet cicatricis, & qualitatem, seu temperamentum carnis, *medicamen-* quæ sit cicatrix, formam natura præstat, medicamenta tempera-*torum tum* mentum, quamvis & natura aliquid conferat ad temperamentum; *naturæ.* exsiccatur enim naturalis calor, & hinc est, quod juxta sanas partes primò oritur cicatrix. Id tamen & hac altera ratione potest contingere, quod caro juxta veram cutem existens, quæ sicca sua natura est, siccior est ob cutis siccitatem, promptiusque siccatur, Quod verò natura sit ea, quæ dat formam cicatrici, ex eo licet *Natura dat* colligere, quòd quantumvis siccetur, & adstringatur caro, nun-*formam ci-* quam tamen sit cicatrix, nisi pars pro naturali modo se habeat, *cicatricis.* fiet quidem callus, sed non cicatrix. Quia tamen humiditas, & laxitas, ac mollities carnis impedit, ne inducatur cicatricis forma, idcirco siccari, & adstringi, atque indurari caro debet; sic enim præparatur caro ad receptionem formæ cicatricis: atque si humiditas, & laxitas, ac mollities sint exigua, & calor naturalis



robustus, nec affluat humiditas ad partem, & modica cutis portio deficiat, non rarò naturalis calor absque medicamentorum ope cicatricem inducit. Hinc observavi sub medicamento non solum sarcotico, verum etiam suppurante inductam fuisse cicatricem. Aer ambiens & ipse, temporibus præsertim calidis, nisi multa sit humiditas carnis, & laxitas, solet siccare, quantum satis est, atque indurare carnem; hinc observamus in quibusdam ulceribus superoriri crustam, qua decidente ulcus cicatrice obductum conspicitur, idque nullo appposito medicamento.

At, ubi humiditas carnis, & laxitas est multa, necessarius est medicamentorum usus, quæ siccant, & adstringant, & indurent carnem, quæ Gal. appellat epulotica, seu ad cicatricem perducuntia 5. de simp. med. fac. cap. 15. non quia formam cicatricis inducant, sed quia carnem disponant ad recipiendam cicatricis formam. Non solum igitur superfluum humiditatem consumant oportet, verum etiam & propriam carnem, ac præterea adstringant, & indurent; ideò Gal. 2. de comp. med. per gen. capit. XX. Finis glutinantium, dicebat, est, nullam inter coitura subnasci humiditatem permittere, cicatricem verò inducentia non hanc tantum impedire, sed etiam nunc consistentem in iis, quæ mox cicatricem ducent, consumere; adhuc callo obducere, & adstringendo indurare: Unde & ibidem cicatricem ducentia pharmaca multò glutinantibus sicciora statuit. idem asserit 3. Meth. 5. ubi tradens discrimen inter glutinantia, & cicatricem ducentia, hæc habet: Ergo quo hæc ab illis distent, id si ipsam rerum substantiam inspicias, invenies: nam quoniam in glutinatione ulcerum siccandum, quod affluit, est, quo videlicet pars affecta superfluis vacet, in cicatrice ducenda, non modò quod affluit, verum etiam humor qui in ipsa carne continetur, est consumendus, multò profectò siccior, quod cicatricem inducat, quam quod agglutinet, esse conveniet: quando glutinatio solum id propositum est, ut ejus, quod secundum naturam est, redundantiam consumat; quod cicatricem inducit, non hoc modo; verum etiam, ut ei, quod secundum naturam se habet, aliquid deradat. Animadvertit talia per se men Gal. 5. simp. capit. 15. Ex medicamentis, quæ id præstant; sunt talia, alia id facere per se, & primariò, alia verò per accidens, & secundum-



cundariò, & hæc quidem sunt ea medicamenta, quæ cathæretica *alia per ac-*  
 appellantur, hoc est, quæ carnem detrahere, & colliquare sunt *cidens.*  
 nata: ejusmodi medicamenta nonnunquam evadunt epulotica, quando  
 videlicet in tenuissimum pulverem redacta in modica admodum  
 quantitate insperguntur. unde Gal. loco citato: Cæterum con-  
 fusa est apud plerosque medicorum non solum appellatio, verùm  
 etiam omnium id genus medicaminum facultatis cognitio: siqui-  
 dem, quæ carnem detrahere, & colliquare sunt nata, ea nonnun-  
 quam vocant epulotica, hoc est; cicatricem inducentia, scilicet  
 quod horum sæpe usu ulcera ad cicatricem perveniant; sed id ne-  
 que primariò, atque peculiari ipsorum facultate, neque in omni  
 usu sequitur, siquidem ad exactum pulveris lævorem redacta id  
 genus medicamenta per specilli cuspidem carnem leviter contin-  
 gentia ulcera ad cicatricem perducunt, at si paulò largius utare,  
 mordicant, colliquantque carnem, & ulcus cavum efficiunt, con-  
 tra quam in iis, quæ re vera sunt epulotica, siquidem nisi satis  
 magnam eorum quantitatem imponas, nihil proficies. idem statuit  
 Avic. 4. primi cap. 28. unde dicebat: Si ergo illud, quod per-  
 ditum est, tantum fuerit cutis, necessarium erit quod cicatricem  
 inducit: & hoc quidem per essentiam cum stipticis, & per acci-  
 dens cum acutis, cum ex eis administratur notum, vel limitatum,  
 sicut misy, & chalcantum, quoniam magis juvant in exsiccando,  
 & magis producunt crustam: nam, si multum fuerit, corrodet,  
 & in ulceribus augmentum faciet. & ideo libro 2. trac. 1. cap. 4.  
 cicatricem inducens medicamen appellat, quod in activis est tem-  
 peratum, exsiccatur verò sine mordicatione. Quæ igitur per acci-  
 dens cicatricem inducunt, sunt veluti æris squama, ærugo, æs  
 ustum, alumen ustum, fex vini usta, misy, chalcitis, præcipita-  
 tum, & hujusmodi.

At quæ propriè sunt epulotica expertia sunt mordicationis, *Verè epulo-*  
 & facultatem habent, ut superius dicebamus, exsiccandi, adstrin- *tica.*  
 gendi, & indurandi carnem, quibus qualitatibus prædita vicem  
 cutis gerit, nam si carnem siccabimus, & adstringemus, veluti  
 dicebat 3. Meth. 5. cuti eam persimilem reddemus, unde & lib.  
 Art. med. cap. 92. Ad cicatricem igitur obducendam necessaria  
 erunt exsiccantia, & sine mordacitate adstringentia medicamen-



*Epulotica  
simplicia.*

*composita.*

ta. Cujus quidem facultatis censentur galla immatura, malicorium, balaustia, Ægyptiæ spinæ fructus, calx curiosè lota, cerussa, corallia, mirobalanorum cortex, myrti baccae, ostreorum putamina, pompholyx, Cadmia, plumbum elotum, scoria plumbi, spodium, stibium, sanguis draconis, rubrica, minium, seu sandix, bolus Armena, terra Lemnia, terra Samia, & alia id genus Inter composita verò habentur Unguentum, & ceratum de tutia, unguentum, & ceratum de cerussa, unguentum & ceratum de minio, unguentum de plumbo loto, ceratum Barbarum, ceratum, seu emplastrum diachalcitidis, seu Phænicinum, vulgò diapalma appellatum, emplastrum de lithargyro, unguentum de calce, unguentum album Pauli, vinum rubrum adstringens, in quo bullierint cortices, & flores granatorum, alumen, baccae myrti, rosæ rubræ siccae, & folia plantaginis. Aqua plantaginis, vel myrti, in qua alumen, & sal bullierint. Pulvis ex aluminis combusti, & loti, corallorum rubeorum ana unc. f. Boli Arm. or. terræ sigillatæ ana drach. ii. corticum granatorum, corticum mirobalanorum citrinorum ana drach. ii. f. Tutiae præparatæ drach. iij. item pulvis ex æquis portionibus aluminis combusti, & loti, calcis decies lotæ, cornu cervi usti, & loti, tutiæ præparatæ, & terræ sigillatæ: quamvis, non in omni natura possint idem omnia præstare, alia enim ex ipsis aliis sunt sicciora, & valentiora, & ob id aliqua in una natura cicatricem inducent, quæ in altera in sicciore videlicet, & valentiori tantummodo glutinabunt. Sicuti enim de sarcoticis dictum est, quòd infirmiores, mollioresque naturæ, quæ ex iis mitiora sunt, postulant, validiores vero, & sicciore valentiora, ita etiam de epuloticis, ac de glutinantibus est intelligendum: quod quidem Gal. docuit 3. Meth. 6. dicens: Ergo illud non ratione modo, verum etiam experientia considerantibus apparuit, non omnem naturam eadem medicamenta requirere (de sarcoticis loquebatur,) sed infirmiores, mollioresque mitiora, validiores, siccioreque valentiora. Ita vero tum in iis quibus cicatrix inducebatur, se habebat, tum etiam, quæ glutinatione egebant. Et 2. de comp. med. per Gen. cap. XX. At primum in eo meminisse oportet, quemadmodum mulierum, eunuchorum, & qui muliebriter degunt, imbecilioribus



lioribus medicamentis indigent, virorum corpora, potissimum qui ex virilibus muniis, & sole durum corporis habitum conciliarunt, ab imbecillioribus nihil præsidii sentiunt. Quod de naturis dictum est, intelligendum de partibus, ut iisdem locis monebat Galen. nam sicciore siccoribus indigent, molliore vero mitioribus.

Alia etiam medicamenta recenset Gal. 5. de simp. med. fac. capit. 15. quæ per accidens cicatricem inducunt, à cathæreticis diversa, sunt autem ea, quæ absque adstrictione exsiccandi vim habent mordacitatis expertia, cujusmodi est myrrha, litgargyrus, ostreum & diphryges combusta; talia enim sæpe quidem cicatricem inducunt illita, sed nec primario, nec sua facultate id efficiunt, unde aliquando promissa frustrantur, ut quæ adstrictione careant. Monet autem Gal. 5. de comp. med. per gen. cap. 7. ut in usu medicamentorum, quæ cicatricem inducunt, ea præcaveantur, quæ ad tactum aspera sunt, ut quæ callum potius, quàm cicatricem efficiant, sed eligantur ea, quæ multam ad tactum lævitatem inducant.

*Alia epulotica.*

*Notandum.*

## CAPUT XXXI.

*Prætermisam fuisse à Galeno indicationem maximi momenti in curatione vulnerum, ideoque ad inutiles, & superfluas confugere fuisse coactum, atque minus probe succorum fluxioni consuluisse.*

**Q**uisquis condere medendi methodum ad unguem parat, dicebat Gal. 2. Meth. 7. huic à primis indicationibus auspiciandum, atque hinc ad eas, quæ deinceps sunt, transeundum, rursusque ab his ad proximas, itaque pergenti non prius est desistendum, quàm ipsius sit compos finis. Quapropter cum germanam medendi vulneribus methodum condere proposuerimus, non alia nobis est incedendum via.

Cum ergo à primis indicationibus fuerimus auspicati, atque hinc ad eas, quæ deinceps sunt, transferimus, & ab his ad proximiores, vestigiis clarissimorum virorum inhærentes, si nullum in eliciendis indicationibus commissum fuisset erratum, ita ut



nulla inutilis fuisset accepta, aut utilis, & necessaria prætermissa, & omninò si præfata doctrina ab antiquorum placitis deprompta certa esset, nullusque remaneret scrupulus, nihil aliud relinqueretur, nisi ut, si quæ adhuc allatis posteriores sint indicationes, eas prosequeremur; & si quæ materiæ medicæ fuerint prætermissæ, eas expenderemus, tandemque ad rectum usum cujuslibet inventæ materiæ progredieremur. Sed, quoniam ab iis, qui interiùs rem perscrutantur, defectus non leves continere, quamvis Galeni fuerit, & passim à posterioribus accepta sit, existimatur, antequam ulteriùs procedamus, ut certa jiciamus fundamenta, operæ pretium est videre, an re vera deficiat, & in quibus defectus hic consistat, ut, si in aliquibus manca deprehendatur, quod deest, addi possit, si vero in aliquibus superflua, quod superest, possit demi.

*Indicatio  
in hæcenus  
traditis fuit  
prætermissa.*

*Probatur  
læsio natu-  
ralis caloris  
in vulneri-  
bus.*

Videtur quidem Galenus indicationem maximi momenti prætermisisse, ex quo postea coactus fuerit ad inutiles, & minimè necessarias confugere; idque, si ejus etiam principiis insistamus, videre non est difficile. Profectò vulneratæ partis calorem naturalem imbecillum redditum ex vulnere fuisse, in ejus doctrina negari non potest: hoc superiùs ostensum est, sed & nunc, ne cogaris, Lector, aliud caput adire ex hoc uno colligas. Inquit Gal. 3. Meth. 3. Tenue excrementum consequens ad alimenti mutationem, quod est ipsa invisibilis perspiratio, subinde fieri visibile, quoties vel naturalis calor languet, vel nutrimento utitur, quàm justum sit, ampliore, vel motus quispiam vehementior animali contigerit, idemque fatetur, in vulneribus fieri visibile, cum fiat ichor, seu sanies, ex qua ulcus redditur humidum, ob idque exsiccantibus, concludebat, semper indigens, eò quòd nunquam intermittatur hujusmodi excrementi generatio, igitur langueat; necesse est, naturalis partis calor: semper enim generari hujusmodi excrementum, scribit Gal. etiamsi vulneratus nutrimento non utatur, quàm justum sit, ampliore, nec motus quispiam vehementior eidem contingat, quibus etiam de causis invisibilis perspiratio fieri solet visibilis. Nam procul dubio supponit Gal. servari à vulnerato idoneam vivendi rationem, quam semper eidem præscribere consuevimus, aliter semper generari excrementum illud, & ejus ratione semper convenire exsiccantia, non assereret. Si



Si ergo hoc verum est, & ejus est vulnera ad sanitatem perducere, nam & divisa labia agglutinat, & cava vulnera carne replet, & si quid suppurandum est, in pus convertit, cur non est indicatio sumenda ab ipso naturali calore? nonne conservandus est naturalis calor partis? & si imbecillis factus est, sive quia ejus substantia fuerit dissipata, seu qualitas occursum ambientis, quem antea non fuerat expertus, hebetata, nonne est roborandus, & ad pristinam naturam reducendus; nonne sunt fugienda, quæ illius symmetriam corrumpere? Admiratione dignum est, quomodo Gal. de iis, quæ ab imbecillitate caloris proveniunt, adeo fuerit sollicitus, remedia excogitans, quæ genita excrementa absumerent, causam verò despexerit. Absumptionem excrementorum desiderat, sed eorum generationem inhibere contemnit, nec quæ sit potior via consulendi excrementis, quæ necessario generantur, vires partis parvifaciens invenire potuit. Hinc factum est, quoniam uno inconvenienti dato multa contingunt, ut absque usu siccantium, & abstergentium non posse negotium transigi professus fuerit, immò nullum esse tempus, in quo hæc non requirantur: & eò etiam devenerit ut 3. Meth. 4. asseruerit, debere hujusmodi medicamenta undique vulneris partes tangere. Si enim imbecillis sit calor, & excrementa, quæ propter ejus imbecillitatem generantur, vulnerum sanationi officiant, & proinde absumi postulent, spretis naturalis caloris viribus, nulla remanebit via expurgandi ab iis vulnus præter eam, quæ ope siccantium & abstergentium perficitur, dum qualibet die omnibus vulneris partibus admoventur. Quòd si temperamento, & robori partis fuerit consultum, proculdubio comperiemus non ea posse colligi excrementa in vulnere, quæ curiosam hanc diligentiam, immò potius nocuam curiositatem exposcant; nocuam dico, quoniam dum volumus quotidie vulnus procurare, naturali tegumento exutas partes ambienti exponimus: ex quo nativi caloris substantia dispendium patitur, & qualitatis efficacitas dejicitur. Sed quid referat partes proprio, & naturali tegumento destitutas ambienti exponere, aliàs ostensum est. Quis negaret, si restitui naturalis calor in pristinum statum posset, & in eodem conservari, nihil esse præterea, quod pro vulnerum sanatione desideretur. Nonne & ipse Gal. 3. Meth. 3. scriptum

*Calor naturalis conservandus, & roborandus.*

*Damna provenientia ex quotidiana solutione.*



scriptum reliquit : Si sana foret pars , & sanguinis confluxus citra ullum vel in qualitate , vel in quantitate vitium , nihil esse prætereà , quod obstet , quò minus prima carnis generatio prosperè contingat , idque nullius externi medicamenti ope . Non est autem existimandum , quando Gal. salubrem partis substantiam conservandam proposuit , ad conservationem naturalis caloris respexisse . Mediocriter enim siccantibus id nos assequuturos contendit , quæ cum excrementa respiciant , palam est non ea ratione salubrem substantiam partis conservare , quia naturali calori prospiciant .

*Alter defec-  
tus.*

Sed & minùs probè videtur consuluisse Gal. fluxioni succorum , cujus tamen in omni vulnere maxima habenda est ratio , ut superiùs patuit , cum omne vulnus periculo fluxionis sit expositum . Videtur enim in hoc defecisse crebram solutionem diligens , nam cum in vulneribus propter partis imbecillitatem , quæ robustiores sunt , ad eandem propria excrementa , ut ea , à quibus irritantur , promptè transmittant , & ex dolore quoque ad eandem fiat succorum attractio , dum crebrò deteguntur vulnera , imbecillitas partis fit major ( novimus , quid sit partes proprio tegmine carentes denudare ) & in contrectatione partis non potest ferè non concitari aliquis dolor : hæc autem , ut ad fluxionem arcendam faciant , nemo non videt : Inter prima siquidem arcendæ fluxionis capita ea sunt , ut omnis causa , quæ dolorem inferendi vim habet , devitetur , & pars recipiens ad temperiei mediocritatem reducatur . Quod ex ipsomet Gal. superiùs fuit traditum . Ne igitur idem nobis eveniat , expendamus , quid pro conservatione , & robore naturalis caloris sit agendum , & quomodo tractandum vulnus , utque minima præstetur fluxionis occasio .

*Quid agendum pro  
conservatione & ro-  
bore natura-  
lis caloris.*

Quas indicationes præbeat naturalis vulneratæ partis calor , facile erit invenire , si consideraverimus , quidnam ratione vulneris fuerit perpeffus . Duo autem ei contigerunt mala , ut suo loco explicatum est , quia & ejus substantiæ non minima portio in auras abiit , & ejusdem vivifica qualitas perfracta est , quapropter & reparare illius substantiam oportebit , & qualitatem ad pristinam commodationem reducere , ac proinde cavenda omnia erunt , quæ substantiam dissipare valent , & qualitatem labefactare .

Reparationem substantiæ caloris procurabimus , difflationem  
ejus



ejus prohibentes; cum enim nunquam deficiat naturalis caloris generatio, si difflatio prohibeatur, ejus substantiam augeri necesse est. Quomodo verò prohiberi difflatio debeat, ex illius consideratione fiet manifestum, quod in causa fuit, ut evanesceret: id autem fuit naturalis tegumenti defectus, quare, quoniam in nostra manu non est, naturale illud tegumentum nudatis partibus superponere, aliud arte parandum erit, quod ejus vicem suppleat. Qualitatem caloris conservabimus, & in pristinum vindicabimus statum, illum foventes, focus enim calor vegetior evadet, ac eidem amica qualitate subvenientes. Calorem fovebimus congruo tegumento: qualitas naturali calori amica erit caliditas nativæ similis. Tegumentum igitur, quod caliditatem habeat nativæ propinquam, laudatur. Si verò daretur medicamentum, quod à totius substantiæ proprietate naturalem partis calorem roboraret, nihil melius desiderari posset.

Hæc si vera sunt, quæ tamen esse verissima rei natura demonstrat, si sumenda sit indicatio à temperamento, seu naturali calore, tantum abest, ut necessarium sit quotidie vulnus detegere, ac procurare, ut potius, quò longius fieri possit, protrahenda sit solutio. Si enim detectio est in causa, ut naturalis calor evanescat, & ejus qualitas minùs efficax fiat, sub tegumento autem substantia caloris augetur, & roboratur qualitas, cur solvendum est vulnus, nisi necessitas urgeat? Eodem modo tractato vulnere longè meliùs fluxioni consulatur, ut enim dicebat Gal. Pars promptè non recipiet, si ad temperiei mediocritatem reducatur, at ea cunctandi ratione constat partem ad temperiei mediocritatem redigi, cum nativus calor roboretur. Præterea dum vulnus tegitur, præcavetur is dolor, qui crebræ illius contrectationis est comes. Quocirca si hac curandi via naturalis calidi jactura tam probè resarcitur, & fluxio, quæ omnibus naturalibus operibus ita officit, præcavetur, concludendum est, non solum nullam necessitatem nos cogere, ut crebrò vulnus solvamus, verùm potius quàm rarissimè detegendum. Et hac ratione meliùs, ac faciliùs sanari vulnera non est dubitandum. Hoc tamen, ut clariùs appareat, in præcipuis operibus, quæ ad vulnera sananda requiruntur, ostendamus.

*Necessitas  
tegumenti.*

*Sub tegu-  
mento vul-  
nus non est  
ita fluxioni  
obnoxium.*



## CAPUT XXXII.

*Quòd melius est vulnera quàm rarissimè solvere, atque detegere, quàm quotidie id facere, ad extrahenda peregrina corpora, quæ primis diebus extractionem refugerunt, ad agglutinandum, ad carnem generandam, ad suppurationem promovendam, nec non & ad præcavendam fluxionem.*

**Q**uomodo ad sananda vulnera necessarium sit peregrina corpora, si quæ intra vulnus contineantur remove, labia divisa agglutinare, dum vulnus est simplex, cavitatem verò carne replere, contusam carnem, aut si quid aliud sit, quod suppurationem postulet, in pus convertere, semperque fluxionem avertere, ac inhibere, superius constitutum est. Hæc omnia plerique censent facilius, ac tutius consequuturos, si quotidie, nec semel tantum, sed bis multoties, & ter etiam quandoque vulnera solvant, detegant, abstergant, eademque medicamentis recentibus, ut ajunt, nutriant. Nos contra asserimus longè foelicius hosce scopos attingi, si quàm rarissimè vulnera solvantur, ac detegantur, nisi superveniens aliquod malum ad solutionem nos cogat. Et quantum illi à vero aberrant, nostra verò sententiâ rationi, ac veritati sit consona, in unoquoque prædictorum expendamus.

*Facilius expelluntur contenta peregrina corpora si raro vulnus solvatur.*

Quòd igitur peregrina corpora, quæ à Chirurgo in principio educi non potuerunt, & naturæ opus desiderant, à natura facilius propellantur, si vulnera tecta asserventur, hinc licet colligere. Natura profecto melius opera sua perficit, ubi robustior est, atqui est robustior, quando vulnera cooperta servantur, & rarissimè solvuntur, ac deteguntur, ergo sub artificiali tegumento melius opera sua perficiet, & ex consequenti, quæ nocua sunt, facilius propellet. Quòd verò natura sub artificiali tegumento robustior reddatur, ex superius dictis nullo negotio probatur; Cum enim vulneratæ partis natura imbecillior reddatur, tum quia naturalis calor occursum ambientis obtunditur, tum etiam quia ejusdem substantiâ defectu naturalis tegimenti dissolvitur, dum vulnera tecta servamus, utrique huic incommodo confu-



consulimus ; non solum enim ambientis ad penitiores partes ingressus prohibetur, ex quo qualitas nativi caloris non hebetatur, verum etiam tegumento fovetur calor, ut ob id fortior fiat, ac propterea præcavetur, ne illius substantia ulterius dissipetur, unde incrementum substantiæ caloris sequatur necesse est. E converso autem quò sæpius solvimus, eo etiam magis partem prædictis incommodis exponimus, unde quamvis postea quoque expellat, id tamen tardiùs peragit, & majori negotio. Neque medicamentum recens impositum jacturam hanc refarcit penitus, cum sit in substantia, & qualitate caloris, ut majus sit damnum, quod ex detectione proficiscitur, quàm utilitas quæ medicamenti impositionem consequitur. Id etiam experientia demonstrat, observamus enim in dies expellenda citiùs expelli, si vulnera diutius tecta servantur, quàm si quotidie nova medicamenta admoveantur. Quòd non solum veritatem propositæ conclusionis arguit, verum etiam robustiorem ex tegumento reddi partis naturam.

Quod si Chirurgi manu, non ope naturæ removenda sint extranea corpora post primos dies censendum est pariter, melius esse, si tegumento curentur, cum enim ex eo robustior fiat natura, citiùs pus generabitur, ac tensio, si qua in parte fuerit, & inflammatio citiùs sedabitur: qua de re patebit magis via, & ita faciliùs, ac citiùs contenta corpora extrahi manuali operatione poterunt.

De agglutinatione nulla est dubitatio, cum enim sit naturæ opus, & hæc tegumento roboretur, constat longè melius perficiendam, si artificiale hoc tegumentum præparetur, quàm si quotidie immutentur medicamenta, cum fieri nequeat, quin calor naturalis in detectione aliquod detrimentum experiatur. Sed præterea & à medicamentis primo apparatu adhibitis præclare adjuvari potest opus naturæ; citò siquidem fit agglutinatio, & vis medicamenti usque ad perfectam agglutinationem optimè perdurat, quando præsertim ejus essentiæ fuerit medicamentum quæ non promptè dissipetur. Neque enim excrementorum miscella vim medicamenti frangere, aut corrumpere poterit, cum effatu digna excrementa in vulneribus, quæ agglutinari solummodo po-

*Agglutina-  
tio melius  
perficitur  
rarò solutis  
vulneribus.*



stulant, non generentur. Hinc & multi ex iis, qui reliqua vulnera quotidie detegunt, ubi agglutinandum est, prima medicamenti impositione sunt contenti.

*Suppuratio, & carnis generatione melius absol- vitur si raro solvantur vulnera.* Sed & suppurationem, & carnis generationem longè melius absolvi asservatis sub artificiali tegumento vulneribus non est difficile ostendere, quod enim ad suppurationem attinet, hæc naturæ est opus, ut superius vidimus, & suppurantia ea solam ratione suppurationem promovent, qua naturalem calorem foveant: igitur quò melius naturali calori fuerit consultum, eò foelicius procul dubio continget suppuratio. At quis non videt, quòd melius ei consulatur, si tecta servantur vulnera? Non enim aëris occurfus actionem naturalis caloris interpellat, neque in auras dissipatur caloris substantia, quæ in solutione eveniant, necesse est. Huic attestatur experientia, quàm facile enim & quàm brevi tempore sub hac curandi ratione promoveantur suppurationes, vix credi potest. Quod etiam non leve argumentum est, longè majorem esse jacturam, quam ex crebra solutione calor experitur, quàm sit utilitas ex recentis medicamenti applicatione proveniens, ac præterea sub artificiali tegumento ad propriam commodationem redire naturalem calorem. Idem prorsus de carnis generatione dicendum est, quoniam & ipsa naturæ est opus, quare cum sub tegumento robustior reddatur, & minus interturbetur, quò & facilius succedat carnis generatio, fateri oportet, & rem non aliter se habere ipsa experientia est testis.

*Fluxio facilius prohibetur raro solutis vulneribus.* Ad Affluxum succorum transeamus, & quomodo longè minus commoveantur succi ad vulneratam partem, si vulnus tectum diutius maneat, videamus; licet de hoc etiam superius actum sit. Profectò inter fluxionis occasiones est partis imbecillitas, nec non & dolor; hoc enim pars attrahit, & propterea ob condolentiam aliæ partes, quod in ipsis redundat, aut irritat, aut faciem habet irritantis ad eam facile transmittunt, propter imbecillitatem verò promptè fluxionem admittit, diffusius hæc fuere superius exposita: atqui si rarò detegantur vulnera, & pars minùs dolore conflictabitur, & fiet robustior & ita minùs timenda erit fluxio. Robur quidem parti additur, quoniam proprium illi temperamentum restituitur, siquidem naturalis calor ad pristinam



stinam naturam redit, latio autem temperamenti in vulnere erat ob damnum calori nativo illatum. Quod si vulnera quotidie detegamus, quotidie quoque calorem naturalem offendimus, unde fit, ut pars fluxionem promptius admittat. Dolore autem minus conflictabitur, quoniam roboratus sub tegumento calor, si quis flatus, aut humor eam distendat, ac dolore afficiat, celeriter discutit, & partem æquabilem reddit. Insuper quia dolor ex contrectatione partis, dum illi medicamentum admoveere volumus, excitari consuevit, omnis evitatur. Fieri enim minimè potest, quin dum partem tractamus, aliquis non excitetur dolor, & eò major; quo majus fuerit vulnus, & in exquisitiori sensu prædita parte, & quæ non nisi cum difficultate tractatur. Plerumque enim à convenienti situ, & figuratione partem; quò illi medicamenta apponere, & prius imposita jam pure conspurcata ab eadem auferre valeamus, dimovere cogimur: solvimus postea partem, medicamenta detrahimus, vulnus spongia, aut lana, vel gossipio, vel aridis filamentis, aut linteo exsiccamus, & à pure ac sordibus abstergimus; circumjacentes quoque partes ab excrementis; quæ extra vulnus fuere propulsa linteis emundamus; tandem nova medicamenta imponimus, & rursus deligamus, quas quidem operationes citra dolorem absolvi non posse certum est, & proinde neque citra periculum advocandæ fluxionis ad partem eoque magis; cum frictio, etiamsi dolorem non inferat, aliquid tamen ad attrahendum faciat, ut hic curandi modus recto tramite opponi videatur scopis, quos habere in præcavendis fluxionibus ob oculos debemus. Hæc omnia incommoda partem tectam servant, perbellè effugimus, partem enim à convenienti situ nisi rarissimè removemus, sed in quiete continemus, non solvimus nisi rarò, neque deligamus, & circumjacentes partes haud tangimus: Quapropter ex hoc modo nullus infertur dolor, neque alia fluxionis occasio præstatur, verum potius multæ arcentur. Quo fit ut reliqua opera ad vulnerum sanationem necessaria fœlicius perficiantur: Ubi enim ad partem succi non confluunt, ipsa magis proprium temperamentum servat, minusque à propriis operibus distrahitur, nec vitatur materia carnis, aut glutinis.



## CAPUT XXXIII.

*Excrementa, quæ in Vulneribus generantur, non cogere, ut quotidie vulnera detegamus; immò ab ipsis melius expurgari vulnus, si sub artificiali tegumento foveatur.*

**Q**ui hætenus necessariam existimaverunt quotidianam vulnorum solutionem, forsan allatis rationibus acquiescerent, in aliamque irent sententiam, nisi eos deterreret excrementorum proventus; quod enim potissimum eos adducit, ut id necessarium judicent, sunt excrementa, quæ in vulneribus cavis generari solent, tum tenuia, tum crassa, siquidem tenuiorum ratione à Gal. accipientes, siccantia medicamenta semper esse necessaria contendunt, crassiorum verò absterfionem convenire, tum quæ manuali fit operatione, tum quæ applicatione medicamentorum perficitur, de qua præcipuè sunt solliciti, quoniam non naturæ, sed medicamentorum est opus: ideoque cum citra ipsam sanari vulnus nequeat, obtinet enim puritas ulceris rationem ejus, sine quo non, unde hanc sordes interpellans curationem moratur, quemadmodum dicebat Gal. 3. Meth. 9. quis non videt necessariò nos devenire debere ad crebram vulneris solutionem, & detectionem, ut & manuali operatione, quam & ipse Gal. proposuit 6. Meth. 3. docens lana specillo obvoluta vulnera abstergere, & appositis medicamentis congrua fiat absterfio. Non minorem tamen solutionis necessitatem iisdem asferre videntur tenuia excrementa, dicente Hip. lib. de frac. sec. 3. tex. 1. Sæpius ergo ob redundantem humorem religare oportet, alioquin enim & febres concitantur, per humores enim non solum ibi intelligit Hip. crassos, verum etiam tenues, ut in com. ejusdem loci animadvertit Gal. & in lib. de Ulceribus, ulcera omnia siccanda esse præter contusa: quam doctrinam passim proficitur Gal. Si enim siccarum ulcus postulat, profectò sæpè applicanda erunt siccantia, vanumque est existimare posse aliquod medicamentum vulnere admotum pluribus diebus vim propriam retinere, propterea quod partim calore affectæ partis exsiccat, & ejus virtus exolvitur partim verò ob affluen-

*Medicamenta applicata vulneribus non possunt diutius proprias vires retinere.*



tia excrementa inficitur, & corrumpitur: necessaria igitur erit crebra medicamenti admotio.

His tamen non obstantibus excrementa ad crebram solutionem nequaquam cogere non multò negotio probabimus. Priùs autem, quanam excrementa in vulneribus generentur, videre oportet, cognita namque excrementorum natura, non erit difficile assequi, quid pro eorum ablatione sit necessarium. Gal. ut superiùs vidimus, duplicis excrementi meminit ex coctione resultantis, tenuis videlicet, à quo ulcus redditur humidum, & crassi, à quo sordidum, unde & fordes dicitur. Nihilominus alterius etiam fortis excrementa præter ea, quæ in transmutatione alimenti pro nutritione vulneratæ partis prodeunt, in vulneribus cognoscimus. Celsus lib. 5. cap. 26. tria excrementorum genera recenset, sanguinem videlicet, sanies, & pus, & horum plures species enumerat. Ex his autem, dicebat, exit sanguis, sanies, & pus: Sanguis omnibus notus est. Sanies est tenuior hoc, variè crassa, & glutinosa, & colorata. Pus crassissimum, albissimumque glutinosius, & sanguine, & sanie. Exit autem sanguis ex vulnere recenti, aut jam sanescente: sanies est inter utrumque tempus: pus ex vulnere jam ad sanitatem spectante. Rursus & sanies, & pus quasdam species Græcis nominibus distinctas habent; est enim quædam sanies, quæ vel ἰχὼρ, vel μελίχρησι nominatur, est pus, quod ἐλαιώδες appellatur ichor tenuis, subalbidus ex malo ulcere exit, maximeque ubi nervo læso inflammatio sequuta est. Meliceris crassior, & glutinosior, subalbida, mellique albo sublimilis fertur, hæc quoque, ex malis ulceribus, ubi nervi circa articulos læsi sunt, & inter hæc loca maximè ex genibus. Elæodes tenue subalbidum, quasi unctum colore, atque pinguedine, oleo albo non dissimile, apparet in magnis ulceribus sanescentibus.

Verùm Celsus ulcerum quoque excrementa comprehendere voluit, & ideò dicebat: His cognitis, etiam nunc quædam alia noscenda sunt ad omnia vulnera, ulceraque de quibus dicturi sumus, pertinentia. Ex his autem exit sanguis, &c. præterea sanguinem inter excrementa recensuit, cum tamen non sit proprium vulneris excrementum, at nobis, quæ vulnerum sint propria, inquirendum est, propria autem vulnerum excrementa appello, quæ vul-



*Propria ex-  
crementa  
vulneris.  
quæ.*

*Obiectio.*

vulnerum occasione generantur, quandoque enim talia ab ipsis emanant, qualia in venis, aut carnosis partibus consistunt, nullam, aut levem, neque effatu dignam alterationem passa, quod tamen rarissimum est, priusquam vulnera in ulcerea abierint. Itaque propria vulnerum excrementa erunt, quæ in ipso vulnere generantur, vel ex sanguine in ipsis partibus contento, cujus pars, aut etiam major pars non rarò aliunde profluxit, vel ex ipsamet partium substantia putrescente. Quæ ex sanguine in partibus contento ortum habent, duplicis sortis existunt, alia siquidem generantur ex ea sanguinis portione, quam natura assumit ad nutritionem partis; alia verò ex eo, quod superfluit, cum enim non minor sanguinis quantitas ad vulneratam partem feratur, quàm sanitatis tempore pro ejus nutritione consueverit, immò fortasse major aliàs allatis de causis, & tamen calor ejus naturalis propter imbecillitatem nequeat tantam sanguinis copiam conficere, atque assimilare, quantam antea, ideoque portionem tantum pro nutritione partis assumat, quod superest, excrementum evadat, est necesse. Prioris sortis sunt illa duo excrementa à Gal. proposita, quibus nihil est apud Chirurgos magis tritum, tenue videlicet, quod ichor dicitur, & vulnus reddit humidum; & crassum, quod fordes appellatur, & vulnus efficit sordidum, suntque excrementa tertiarum coctionis, nutritionis videlicet vulneratæ partis; quamvis non desint, qui horum excrementorum generationem in vulneribus negent, & figmentum existiment. Si enim forent excrementa coctionis, dicunt, quò plus coquitur vulnus, eò majori in quantitate conspicerentur, quoniam tunc majorem alimenti copiam conficit, & ex consequenti copiosiora excrementa debent generari, & tamen quò plus coquitur vulnus, eò minùs apparent hujusmodi excrementa, immò pus tantum conspicitur, non sunt ergo excrementa nutritionis vulneratæ partis. Quare concludunt, quamdiù vulnus crudum est, ad esse solummodo ichores, & saniem absque sordibus, postea verò pus solum.

Addunt alii, non esse majorem rationem, quòd hujusmodi excrementa generentur potius in uno vulnere, quàm in alio, in omnibus enim eadem militant causæ, in omnibus partes nutriuntur. Si ergo in vulneribus cavis generarentur, etiam in simplicibus;

at



at non generantur in simplicibus, ergo neque etiam in cavis. Non generari quidem in simplicibus ex eo, quod de ipsorum curatione tradit Gal. colligunt; siccantia enim, & adstringentia illis convenire professus est, nequaquam abstergentia, quæ in cavis locum habent, qua de causa dicebat Gal. 3. Meth. 4. Omne ulcus tum siccare, tum adstringi debet, non tamen detergeri; contra cavitas in carne siccare quidem postulat, & abstergeri, minimè autem adstringi. Si ergo abstergentia simplicibus vulneribus non conveniunt, sed potius quæ contrarium præstant, scilicet adstringentia, neque in ipsis generantur, fordes, quarum, ratione abstergendum est, & ex consequenti neque in aliis.

Verum si in omnibus animalis partibus ex tertia coctione gignuntur semper talia excrementa, veluti est omnium Medicorum sententia, cum pars vulnerata nutriatur, quomodo eorum generatio in vulnere negari possit, non video. Quin in vulnere præsertim cavo propter caloris naturalis imbecillitatem, rationi consonum est, ut magis sensibilia evadant, & quod tenue sanitatis tempore in auras dissolutum expirabat, sub ichoris, & saniei specie prorumpat; ab imbecillo enim calore adeò attenuari non potest, ut halitus fiat, quod vero crassum, & in summo corpore colligebatur, fiat fordes, neque omnino extrinsecus propellatur, sed & parietibus vulneris hæreat, vulnusque sordidum efficiat. Quapropter tantum abest, ut sententia Gal. reprehensionem mereatur, ut potius sit laudanda, & penitus accipienda. A principio quidem sensu ipso deprehenduntur hujusmodi excrementa, sed postea quò plus coquitur vulnus, eò minùs apparent, quoniam ex superfluo alimenti pus generatur, & cum eo mixta, atque confusa delitescunt. Neque etiam credendum est, quo plus coquitur vulnus, eo copiosius generari, quia plus alimenti conficiatur, & consequenter plura debeant oriri excrementa; verum quidem est, plus alimenti pro nutritione assumi, & pro carnis generatione, sed & exactius conficitur, & idcirco neque adeo copiosa succrescunt excrementa. In vulneribus autem simplicibus generantur profecto, sed in ipsis naturalis calor robustior est, tum quia minus dispendium passus est, tum etiam quia redditus labiis ad mutuum contactum, una pars fovet alteram, ut

*Crassa & tenuia excrementa necessario generantur in vulneribus.*

*Cur in simplicibus minus excre-*



*mentorum  
copia gene-  
retur.*

prius, & aëris ingressus prohibetur, & restituitur ferè naturale tegumentum; quo fit, ut tenue excrementum majori ex parte insensibiliter perspiret, crassum verò, ut antea, in summo corpore colligatur, & propterea in ipsis non est necessarius, neque etiam opportunus abstergentium usus.

Ex residuo succorum, quod natura pro nutrienda parte non assumpsit, in primis fit in vulnere crudum excrementum tum tenue, tum crassum, tenue quidem ex tenuiori, atque serosiori humorum parte, crassum vero ex crassiori. Quare hæc est alia fors excrementi tenuis, & crassi, quæ necessario admittenda est, quoniam veri speciem non habet, tantam copiam excrementi crassi, tenuisque humiditatis, quantam in vulnere, dum adhuc crudum est, conspiciamus, ex nutritione exigui adeò momenti provenire: aliunde autem provenire non potest, quam à residuo

*Ratio pro-  
ventus ex-  
cremento-  
rum in vul-  
neribus.*

alimenti, quod coqui, & assimilari non potuit. Etenim cum nullus humor in corpore talis, qualis erat ab initio, permanere possit, sed, ut dicebat Gal. 2. de dif. feb. cap. 5. necesse sit, ut aut coquatur, apponatur, atque assimiletur solidis animalis partibus aut corrumpatur, & putrefiat, quia humor, quem proprius calor non obtinet, nihil habet reliquum, nisi, ut ad putredinem convertatur, illud sanguinis, quod à nutritione remanet, licet à calore naturali alteretur, quia tamen non obtinetur, ad putredinem convertitur, & ita præternaturalem calorem concipit: unde simul, & semel alteratur sanguis ille & à calore præternaturali, & ab ipso naturali calore; & cum à principio neuter

*Crudum ex-  
crementum  
unde.*

prævaleat, fit crudum illud excrementum, quod dictum est; paulatim tamen in pus bonum mutatur, dum paulatim naturalis calor robur acquirit, & ad pristinam naturam propius accedit, tunc enim magis convincit ea, quæ in parte continebantur. Sic ergo excrementum crudum prius meliorem consistentiam consequitur, deinde adhuc meliorem dispositionem acquirendo tandem eo per-

*Pus lauda-  
bile.*

venit, ut fiat pus illud laudabile, album videlicet, læve, æquale, ac minimè fœtidum, superante quidem ipso naturali calore, ac non penitus materiam obtinente; si enim hoc esset, non in pus eam converteret, sed perfecte coqueret & assimilaret. Sane consistentia puris media esse consuevit inter sordem, & saniem, ut dicebat



dicebat Celsus, sed quandoque evenit, ut crassum admodum sit, & viscidum, atque ita sordis naturam adipiscatur, eo quia longiori tempore in aliquo loco contentum, ac conclusum siccetur, aut quod à medicamento, vel ab aëre ambiente idem patiatur, aut quia pars, in qua generatur ex sui natura sit satis sicca. At si *Pus prae-* superetur naturalis calor, vel sua ipsius ratione, cum scilicet ad *vum.* tantam imbecillitatem pervenit, ut nullam possit facere optimam *Pus media* transmutationem in humore ad putredinem urgente, vel humo- *naturæ.* ris vitio, etiam si ipse non sit valde debilitatus; tunc excrementum crudeum in putridum omnino humorem degenerat, fitque sordes nigra, pallida, lutea, & aliorum colorum, viscida, foetens, & aliis pravis qualitatibus infecta pro varietate excessus præternaturalis caloris, & varia dispositione materiæ, quæ alteratur: sicuti quando partim superat, partim vero superatur naturalis calor, hoc est, secundum quædam vincit, secundum quædam autem vincitur, medium quoddam excrementum inter illa duo succrescit, non enim fit pus illud laudabile, sed modo deficit calor, modo odor, modo consistentia, & æqualitas. Ex partibus, quæ ad putredinem convertuntur, veluti ex carne contusa pus generatur, si naturalis calor superet, at si vincatur, oritur potius putrescentia quædam. Quamvis autem tot excrementorum sortes in vulneribus oriri consueverint, non tamen censenda sunt omnia vulnerum propria, sed ea tantum, quæ naturaliter in ipsis generantur: nam quæ à nativo calore superato, & præternaturali vincente ortum habent, ut quæ præternaturalia sunt vulneribus nec propria vulnerum dici merentur. Quare his interim omis- sis, de propriis sermonem habebimus.

Ista non solum ad quotidianam solutionem non cogunt, *Excrementa* verum etiam longè excellentiùs expurgantur, & absumuntur, *vulnerum* si vulnera decenti tegumento foveantur, neque nisi per rara in- *ad crebram* tervalla fiat solutio, & eo tempore solum, quo eam convenire *solutionem* posterius trademus. Neque hoc paradoxum censendum est, *non cogunt.* licet paradoxo speciem habeat. Cumque excrementa alia tenuia sint, alia crassa, primò de crassis, quæ majorem faciunt difficultatem, id ostendam, postea etiam de tenuibus. Dicebatur ratione excrementorum crassorum abstergendum esse, quod cum



medicamentorum sit opus, non naturæ, sequebatur, quotidie solvendum esse vulnus, ut quotidie possent quæ abstergunt, admo-  
veri. Sed hujus argumenti efficaciam conjice; nonne observamus  
suppuratas inflammationes, & non parvam materiæ purulentæ  
copiam continentes, ope discutientium pharmacorum evaporata  
materia, perducì ad sanitatem? Si quis fortasse id numquam ob-  
servaverit, is Galenum adeat. 13. Meth. capitulo 5. ubi hæc ha-  
bet: Quin si pus aliquod notabile in suppurante particula sit con-  
tentum, non expedit, quod nonnulli faciunt, protinus incidere,  
immò exhalationem moliri medicamenti ad id valentibus, quorum  
usus ex affectu sit conjectatus. Quid ergo abstergit crassa excre-  
menta in hujusmodi suppurationibus? quis non videt, si necessaria  
forent abstergentia pro absumentis sordibus suppuratæ inflamma-  
tionis sanationem ope discutientium haud posse perfici; Acce-  
damus ad abscessus disruptos; nonne sæpissimè observamus, sinus  
notabiles & copiosum pus emittentes carne repleti, etiam nullo  
abstergente in cavitate immisso, sed soli osculo admoto medica-  
mento, ex quo nihil ejus ad fundum potest pervenire? Interna  
pariter vulnera sanari videmus non rarò, cum tamen non liceat  
gossipio, aut lana specillo obvoluta sordes detergere, nec abster-  
gens medicamentum apponere. Quin & profunda admodum  
vulnera in externis partibus sanari conspiciamus ab iis etiam, qui  
vulgarem curandi modum sequuntur, etiamsi nullum medicamen-  
tum ad remotiorem cavitationem perveniat, sed soli osculo appposito  
pharmaco. Internos quoque abscessus disruptos copiosissimam,  
atque crassissimam materiam fundentes absque ullius medicamenti  
usu, de iis loquor quæ ad excrementa diriguntur, sanatos vidi.  
Innumera sanantur putredines, quibus nullum medicamenti genus  
admoverti potest.

*Non est ab-  
solute ne-  
cessarius ab-  
stergentium  
usus ad re-  
movenda  
crassa ex-  
crementa.*

Hæc si, ut decet, perpendamus, facilè apparebit, haud ne-  
cessarium esse abstergentium usum ad hoc, ut removeantur crassa  
utcumque excrementa: si enim hoc esset, quomodo sanarentur  
dicti affectus? quid est, quod eos ad sanitatem ducit? Tunc tan-  
tùm necessaria sunt abstergentia, quando sordities ob visciditatem  
valdè affixa est parti. Et hanc veritatem credo tandem vidisse  
Galenum? nam lib. Art. med. c. 92. prosequens indicationes cu-  
rativas



rativas in vulneribus cavis, ubi ad sorditiem devenit, non ait absolute indicari abstersionem, verum sub conditione loquitur. Hæc ejus sunt verba: Ita & si sordities aliqua fuerit adnata, intentio quidem erit abstergendi, & erit medicamen salubre abstersivum; quasi velit tunc tantum indicari medicamen abstersivum, quando sordities adeo parti fuerit affixa, ut ferè adnata videatur. in aliis enim sordibus alii sunt removendi modi.

Hæc eadem non minùs demonstrant ad removenda tenuia, *Non est ne-* & aquea excrementa non esse omninò necessarium siccantium usum, *cessarius ex-* quandoquidem absque cujusvis medicamenti appositione in allatis *siccantium* casibus carnem generari, & cavitatem repleri cernimus, quod non *usus ad re-* contingeret, nisi à tenuibus etiam excrementis expurgaretur vul- *movenda te-* nus, ut quæ sanationi obstent, si enim ulcus coire nequit, dicebat *nua excre-* Gal. humecta caro est in causa. Quare nulla alia hujus expurgationis causa potest afferri, præter naturam ipsam partium, seu naturalem earum calorem. Hunc dicendum est habere excrementorum rationem, partemque ipsorum per halitum insensibilem digerere, partem verò sensibilibiter per vulneris orificium expellere. Quam quidem sensibilem expulsionem experiuntur & ii, qui bis, & ter etiam qualibet die vulnera solvunt, atque detergunt, & nihil, aut parum, & per accidens robori naturalis caloris intendunt: non parvam enim materiæ copiam à natura extra vulnus propulsam ferè semper observant. Neque existimandum est excrementa hæc spontè ob gravitatem à vulnere decidere, posteaquam idem observatur, etiamsi vulneris orificium sursum spectet. Quòd si naturalis caloris habeatur ratio, cureturque, ut pristinum robur recuperet, quam efficacior, credendum est, futuram esse expulsionem? Sed & ea ratione meliùs procedet vulneris expurgatio, atque excrementorum remotio, quod roborato naturali calore longè minor, si tamen cætera sint paria, est excrementorum proventus, & quæ generantur minùs crassa sunt, & viscida. Hoc nisi receperimus, nulla ampliùs remanebit viâ, qua sanari possit internus abscessus disruptus, & interna vulnera, & ea denique ad quorum fundum medicamenta pertingere nequeunt. Si robur expultricis nihil possit in eorum excrementa, & calor naturalis nihil eorum per halitum insensibilem resolveret, dubio procul



non sequeretur sanitas; ut enim aliàs dictum est ex Gal. mente, puritas ulceris rationem obrinet ejus, sine quo non potest cavitas repleri.

*Objectio.* Sed non est existimandum hac in re expultricem deficere, à qua quotidie cujuslibet coctionis excrementa propelli cernimus.

*Solutio.* Obstat, dicit fortassè quispiam excrementorum quantitatem; cum enim in majori quantitate generentur quàm sanitatis tempore, minùs profectò expultrici cedent, quæ etiam, quod difficultatem auget, ex vulnere facta est imbecillior. At neque ob id sequitur, quod ab expultrice non possint expelli, quia expultrix non finit tantam excrementorum copiam colligi, ut ipsa postea propellere nequeat, immò sicuti generantur, ita tanquam superflua excernuntur: Neque ociatur natura. Præterea dato, quod expultrix sit imbecillior, non ob id multò imbecillior censenda est ad propriam functionem, posteaquam habet patentiores vias, per quas faciliori negotio, quod superfluum est potest detrudere, orificium videlicet vulneris: atque arte etiam licet viam expeditam præparare, si vulneris orificium minùs sit idoneum, ac figura, seu positus expulsionis minimè faveat. Addamus, quod imbecillitas expultricis provenit ex defectu naturalis caloris, si ergo jactura hæc resarciatur, quod fieri præclarè ope artificialis tegumenti superius ostensum est, citò pristinum robur, aut ei proximum recuperabit facultas expellens.

*Objectio  
alia.*

Sed adhuc duo obstat videntur, ne remotionem excrementorum ipsi naturæ committamus, qualitas scilicet quam à tenui excremento caro contrahit, & sordis visciditas: tenuis enim humiditas, nisi medicamentis exsicceetur, subjectam carnem humectat, & in ea imbibitur, ob idque humidior caro, quam par sit generatur, & priori nequaquam similis, quod est in causa, ut & hanc supercrescentiæ carnis causam agnoscamus. Et ejus forsan ratione dicebat Hip. lib. de ulc. Quæcunque ulcera non probè, & ut convenit, purgata; semper priùs pullulare incipiunt, iis maximè caro supercrescit: quæ verò probè, & ut decet, expurgata semper ad siccius promoventur, iis, nisi contusa sint, caro ut plurimum non supercrescit: ob visciditatem verò sordes parietibus hærent vulneris, tollere autem vinculum, quo alligantur quodammodo,

non



non est naturæ, sed medicamentorum opus, ut dicebat Gal. aut alterius præsidii: quæ tamen nullum negotium facere comperientur, supposito artificiali tegumento, quod naturalem calorem foveat, tueatur, & roboret, namque tenuis humiditas, quemadmodum dictum est, partim extra vulnus propellitur, partim à naturali calore, qui robustior factus est, in auras dissolvitur: quæ propter etiam si, quod medicamentum extrinsecus apponimus, nullam exsiccanti vim haberet, nihilominus nullum incommodum ab hoc excremento timendum esset. Sed concedamus, humidiores carnem generari, nonne tandem naturalis calor, quidquid superflui humidi in ipsa reperitur, tandem absorbet? Inspiciamus callum quo fracta ossa conglutinantur, ita loqui liceat, qui à principio valde mollis est, sed processu temporis naturali calore superfluam humiditatem consumente redditur siccissimus, atque durissimus. Pariter à sordium visciditate nihil est, quod timeamus, primò quidem, quia robustiori reddito calore neque tantæ neque tam viscidæ generantur, deinde quia à tenui excremento, tandemque à pure ipso cum quo miscentur, & confunduntur, eas ablui, atque detergi contingit, unàque cum his extra vulnus pelli; nec, si quæ sordes ex nutritione partis primis diebus suboriantur, intra vulnus permanerent, usque ad puris confectionem, aliquod afferent incommodum, dictum est enim exiguam admodum esse illarum quantitatem; neque statim succrescit caro, sed prius coquitur vulnus. Sordes verò, quæ crassior est pars crudi excrementi, mediante suppuratione potius auferri postulat, quam manuali operatione, ac detergentibus auxiliis, quibus magis irritaretur, & inrudesceret vulnus, detecto enim vulnere naturalis caloris substantia exsolvitur, & qualitas obtuditur ob frigidioris aeris contactum, ipsa verò abstergentia medicamenta semper aliquid habent mordacitatis, qua vulneratam partem irritant: quod Gal. animadvertit com. 3. in lib. de frac. tex. 43. nec pus ipsum absterfione indiget, posteaquam dum robori caloris consulimus, & quæ ad partis salubritatem, faciunt, non prætermittimus, non generatur adeò crassum, & viscidum, ut hæreat partibus, sed ad cavitatem vulneris pulsum foras detruditur: eoque facilius, quod tenuiori humiditate admixta attenuatur & ipsum,



ut ob id facilius profluat, & si quid inesset visciditatis reluctantis, omninò tollitur.

*Non requiruntur siccantia, & abstergentia pro absumentis excrementis nisi propter imbecillitatem caloris naturalis.* Hæc ita experientia confirmantur, ut nullus sit dubitandi locus, propterea adducor in eam sententiam, nulla alia ratione requiri siccantia, & abstergentia pro excrementorum absumptione nisi propter naturalis caloris imbecillitatem, quando enim insignis est ejus imbecillitas, longè copiosiora generantur, ob copiam verò expultrici non cedunt, & viscidiora, quare nec possunt à natura separari, nec tenuis humiditas permixta potest visciditatem tollere. Præterea expultrix ipsa longè est imbecillior. Quando autem robustus est calor, contrarium prorsus accidit; nam nec tanta generantur, quoniam major pars alimenti conficitur, & assimilatur, & minus sanguinis ad partem confluit, & ejus insuper non exigua portio, antequam excrementum fiat, insensibiliter dissolvitur, itaque minor materiæ portio relinquitur pro generatione excrementorum, nec adeò crassa, & viscida, quoniam magis elaboratur materia: hinc est, quod pars excrementorum tenuior sufficit ad eorum abluionem, præterea fortior est expultrix, idcirco absque quotidiana illa manuali detersione, ac medicamentorum iteratione facilè vulnus expurgatur, & ab ipso removentur excrementa, partem enim eorum robustus calor per insensibilem halitum digerendo absument, partem verò per vulneris orificium sensibiliter expellit. Quod si ita res se habet, si robustus calor satis est ad vulnerum expurgationem, artificiali vero tegumento roboratur naturalis calor, cur detegenda, ac refrigeranda sunt quotidie vulnera, unde tot mala consequuntur? profecto tanto melior, ac præstantior erit expurgatio illa, quæ ope tegumenti perficitur, altera, quæ per quotidianam detectionem vulnerum, manualementque absterfionem, & medicamentorum abstergerendi facultate præditorum impositionem habetur, quanto melius est, ac præstantius illud præsidium, quo citra ullam noxam propositum scopum assequemur; altero, quod prodest quidem, verum nec leviter officit? Et si experientiam consuluerimus, non aliter rem se habere liquido constabit; quando enim vulnus detegimus, quod longiori tempore tectum permansit, exactissimè purum comperimus, neque facilè esset usu abster-



abstergentis pharmaci tantam puritatem illi comparare. At quando propter naturalis caloris impotentiam accidit in vulnerata parte putrefactio potius, & corruptio quam coctio, aut bona suppuratio (hoc potissimum solet contingere in corporibus caco-chymicis, & plethoricis, namque ob nimiam succorum copiam, licet probi sint, opprimitur, & suffocatur naturalis calor, sicuti & in magnis inflammationibus prohibita propter obstructionem evacuatione, in quibus etiam propter maximum fervorem à naturali statu nimis recedens, proprii muneris ferè obliviscitur; in caco-chymiis verò insuper languet alimenti probi defectu) utique opus hoc naturæ non committerem, naturæ enim impotenti nulum opus alicujus momenti committi debet, sed arte succurre-rem. Verum talis curatio non est propria vulneris, sed corrup-tionis, & excellentis putredinis. Et in his casibus curatio, quæ vulneri convenit, intermittitur, & illi, quod magis urget, atten-ditur. Hujus generis arbitror extitisse vulnera à Pareo relata; sed nec mirum videri debet, si in ipsis oriebantur vermes, quo-niam turundis curabant vulnera, & pravos halitus, excrementa-que mali moris suppressibant.

Ex his igitur manifestè apparet, superfluum esse Galeni stu-  
dium circa medicamentorum admotionem, ut iis removeantur *Defectus*  
excrementa dum videlicet curandum præcipit; ut medicamentum *methodi an-*  
siccans, & abstergens undique tangat vulnus: superfluum item, *tiquorum.*  
quod de metiendo convenienti siccitatis gradu adeò anxie protu-  
lit: superfluam item. Mercati sollicitudinem, ut aliquid impo-  
natur, quod expulsum humiditatem ad cavitatem vulneris quo-  
dammodo imbibat, & absorbeat, cum hæc impedimenta à na-  
tura roborata longè majori cum fructu removeantur, posteaquam  
non detegitur vulnus, unde tot sequuntur incommoda; nam, si  
citra detectionem apponi possent, utique frequentiore eorum  
admotionem laudarem: sicuti neque sæpè admoveri vellem, cum  
in iis expellendis semper laboret natura. Voluerunt omnes me-  
thodum curativam condere, quæ communis foret tum vulneri-  
bus, tum propriè dictis ulceribus, cum tamen alia sit imbecilli-  
tas partis in vulneribus, alia vero in ulceribus, & proinde aliter  
removenda sint excrementa in vulneribus, aliter vero in ulceribus.

*Quomodo*  
*Medicus*  
*naturæ opem*  
*ferat in re*  
*excremento-*  
*rum.*



*Impedimen-  
ta, quæ de-  
bet Medi-  
cus tollere.*

Quoniam autem Medicus est naturæ minister, & adiutor, ideoque eidem egenti præsto esse debet, in hac quoque actione, quæ tanti est momenti, in quibus poterit, egenti naturæ opitulari. Interdum enim adsunt impedimenta, quæ difficilem, interdumque impossibilem reddunt excrementorum expulsionem, & propterea, ut natura facilius ea propellere valeat, in his removendis laborabit diligens Medicus. Impedimenta hæc ad vias spectant, per quas fieri debet expulsio; Etenim si nulla adsit via, per quam jam existens, aut, quæ mox colligetur, materia possit expelli, quia videlicet aut nulla fuerit à telo parata, aut quæ facta est, ab aliquo corpore, puta à telo sit obturata, vel adsit quidem, verum minus proba, utpote quæ angusta est, aut talis futura, inæqualis, & tortuosa, sursumque spectans, nemini dubium est, impediri expulsionem. Itaque in id elaborandum est, ut materia convenientem habeat effluxum, hoc est, ut adsit recta via, & patens, per quam fiat expulsio, &, si fieri possit, ut deorsum vergat, quamvis enim, & sursum expellat natura, rationi tamen consonum est, à superioribus ad inferiora facilius expelli materiam, ut quæ deorsum ob innatam gravitatem spontè feratur. Si igitur corpus aliquod viam occluserit, illud auferendum est, si nullam viam præparaverit telum, aliquam arte machinari oportebit, congruis nimirum sectionibus, & ossium quoque excisionibus, si opus sit: si minus probam, arte reddatur idonea, vel nova paretur.

*Judicium  
exactum in  
Medico de-  
sideratur.*

Hic autem exactum iudicium in Medico desidero, ut oblato, atque inspecto vulnere, statim prospiciat, num per viam, quam sibi fecit vulnerans causa, satis expurgari possit vulnus, nec ne; an aliquid addendum sit, vel etiam novam machinari conveniat, & qua ratione hoc, vel illud sit agendum, ne in necessariis deficiens, mortis, vel alicujus magni mali sit in causa; quæ verò minimè necessaria sunt, aut nequaquam conveniunt, adjiciens, absque ratione ægrum torqueat, sanationem differat, & fortassis in discrimen vulnerati salutem adducat. In quo quidem non pauci delinquant tractantes vulnera capitis, dum passim aliqua apparente in osse læsione ad terebrationem deveniunt. Quæ ergo præsentia sunt accuratè perpendat, quæ futura sunt, cautus prospiciat,



spiciat, & habebit, an sibi addendum sit aliquod, vel non. Sed nec parum conferet, vim expultricem vulneratæ partis expendere, cum non omnes partes æquali expultrice sint donatæ, quæ enim minùs pollent expultrice, patientiorem exposcunt viam, & quæ deorsum magis vergat. Necessitatem parandi effluxum excrementitiæ materiæ optimè cognovit Gal. unde lib. Art. med. cap. 90. tradens, quomodo præcaveamus, ne quid labiis vulneris intercitat, quod erat tertium ex quatuor, quæ à Medico erant agenda, ut agglutinatio perficeretur, dicebat: In eo autem, quod sequitur, tempore, per suffluxiones tertia intentio retinetur. Ipsam verò suffluxionem ex ejusdem, & contrarii loci divisione, & figura opportuna comparare oportebit. Quamvis autem suffluxionis necessitatem viderit, & modum, quo comparatur, tradiderit, non omnem tamen utilitatem ex illa provenientem satis est assecutus.

## CAPUT XXXIV.

*Quòd pro inducenda cicatrice non sit necessaria crebra solutio.*

**Q**Uando vulnus carne, ut convenit, repletum est, nihil est amplius, quod ab eo timeamus, & propterea sive crebrò solvatur, sive rarò, parùm referre putaverim; neque enim crebra solutio malum quodpiam effatu dignum asferre potest, neque diuturnior restio. Sed quoniam posset aliquis dubitare, quisnam modus magis sit rationi, & veræ methodo consentaneus, idcirco aliquid etiam de inducenda cicatrice subungere volui.

Aliàs dictum est cicatricis inductionem partim naturæ, partim medicamentorum esse opus, cum medicamenta siccent, & adstringant carnem, quæ vicem cutis debet gerere, natura verò formam cicatricis inducat: licet interdum absque medicamentorum ope cicatrix obducatur: neminem quoque existimo esse, qui ignoret, ubi carne, ut decet, repletum est vulnus, pauca admodum generari excrementa, quamvis plura, si multum cutis deficiat, & corpus sit sui natura cacochymum, neque decentes factæ fuerint purgationes, pauciora verò, ubi dicta contrario modo se habue- *Quando raro solven-*  
rint, unde si pauca emanent excrementa, & medicamentum pa- *dum est vul-*  
retur,



*mus, ut fa-* retur, quod diutiùs vim suam retineat, procul dubio meliùs in-  
*tilius indu-* ducetur cicatrix, si tecta servantur. Imò etiamsi medicamentum  
*catur cica-* citò propriam vim amittat; nihilominus sub tegumento meliùs  
*trix.* propositum consequemur; eo quòd pauca illa excrementa à na-  
 turali calore, qui ex tegumento fit rubustior, absumuntur, siccatur-  
 que medicamentum appositum qua actuali siccitate fit non impor-  
 tunum epuloticum. Quòd si medicamentum ex eis sit; quæ  
 cum humida sint, siccata confici, & evanescere consueverunt,  
 lintea remanent, quæ & ipsa siccando cicatricis inductionem ad-  
 juvant.

*Quando* Verùm si excrementa profluant in effatu digna quantitate;  
*crebrius sol-* & quæ possint medicamentum, qualecumque illud sit, inficere,  
*vendum est* atque corrumpere, & apposita lintea large madefacere, meliùs  
*vulnus.* erit, si tunc solvatur, cum eo devenisse medicamentum judicamus,  
 ut ob excrementa non solùm proprias amiserit vires, verùm etiam  
 contrarias acquisiverit, superpositaque lintea tanta humiditate fue-  
 rint perfusa, ut subjectam carnem possint madefacere: nam, si  
 in hisce casibus differatur solutio, caro ut plurimum supercrescit.  
 Hinc observamus in aliquibus unica medicamnti appositione non  
 solùm repleri cava vulnera, verùm & cicatrice obduci; in aliis  
 verò, si diutiùs protrahatur solutio, carnem, quæ detrahi postulet,  
 supercrescere. Raro autem in vulneribus hoc accidit, si vul-  
 neratus methodicè fuerit tractatus, imò & in propriè dictis ulceri-  
 bus sæpius observavi, citius induci cicatricem, si per aliquot dies  
 tegumento foverentur.

*Historia.*

Cum hæc scriberem, brevi obductam vidi cicatricem in ul-  
 cere cruris cujusdam adolescentulæ, quæ semestri spatio, dum  
 quotidie solvebatur, induci non potuit, quamvis nihil, quod ex  
 arte esset, prætermitteretur, solius artificialis tegumenti ope. Ab  
 hoc quidem ulcere, dum quotidie modò bis, modò semel pro  
 excrementorum copia illi medicamenta admoverem, semper satis  
 copiosa materia excernebatur: quare longæ curationis fastidio  
 capi alternis tantum diebus vulnus detegere. In prima quidem,  
 & secunda detectione pauciora excrementa deprehendi, quàm an-  
 tea duodecim tantum horarum spatio observabantur, & ulcus me-  
 liùs coloratum. Ratus itaque me veram viam adinvenisse, ad  
 quar-



quartam diem solutionem distuli, res fœliciter succedebat, & ita deinceps quarto quoque die ulcus procurans brevi ad sanitatem perduxit. Idem postea in aliis fœlicissimo cum successu sæpissimè sum expertus: & ita comperi, crebram illam, qua nunc uti communiter consueverunt, solutionem quantum facit ad ostentandam diligentiam, tantum, & amplius, rebus ægrotantis officere.

Nonnunquam accidit, subjectam carnem ineptam esse ad recipiendam cicatricis formam, temperata enim sit, oportet, ut aliàs dictum est; quæ ineptitudo tegumento tollitur, dum roboratur naturalis calor. Aliquando etiam ineptitudinem hanc contrahit ob aeris contactum, unde & tegumento huic incommodo confluitur. Opus est igitur diligenter perpendere, qua de causa copiosus fiat excrementorum proventus, nam quandoque ob injurias ambientis, & vulneris crebriorem contrectationem accidit, & tunc quo sæpius detegitur vulnus, seu ulcus, & abstergitur, eo copiosius prodeunt. Plerumque autem in crebra solutione medicamentum aufertur, priusquam operationem perfecerit, imò sæpe ubi vix ad actum à natura deductum fuerit; unde est, ut naturæ fere semper laborandum sit in reducendo ad actum recens appositum medicamentum, & propterea mirum non est, si parum videantur medicamenta, proficere, sanatioque tardius sequatur. Hoc Gal. animadvertit 4. de comp. med. per gen. cap. 4. in explicatione medicamenti ab Asclepiade propositi ad Chironia, & curatu difficilia ulcera, ideo dicebat: Rectè, me hercules, ad finem superioris medicamenti scripti hæc verba adjecit: Et hæc triduo soluito, fomentisque mitigato, ipsumque emplastrum ablutum emollito, rursusque apponito, nisi enim diutius cuti pharmacum adhæserit, nihil efficiet, quod plerosque Medicos latuit, arbitantes, si ter die saniem ab ulcere detergerent, meliùs se facturos iis, qui bis idem faciunt, qui verò semel solvunt, ab ipsis quoque ægris tamquam negligentes male audiunt. Et 1. de comp. med. per gen. c. 6. jam dixerat: At verò ulceribus, quæ ad cicatricem veniunt, multis diebus subsequentibus pharmacum immanere expedit, quo meliùs, & citius ita cicatrix inducatur, quod & pluribus aliis in locis repetit. Et Avic. 4. 4. trac. 3. cap. 2. Et de illis; quæ sunt

*Quæ consideranda, ut habeamus an hoc vel illo modo incedere oporteat.*

*Rara solutio probatur ex Galeno.*



necessaria, est, ut dimittatur medicamentum super ulcus tribus diebus, deinde dissolvatur, nam, si prius curaveris, vel si ante tres dies solveris, non faciet suam operationem. Undenam ergo venerit prava illa medendi consuetudo, jure dubitari potest, posteaquam medicæ artis Procères aliter statuisse, luce clariùs apparet. Sed, ut nullum fraudis genus, prætermittatur, docet insatiabilis auri cupiditas.

## CAPUT XXXV.

*Concluditur officium Medici in curatione vulnerum, & de qualitate tegumenti.*

*Duo Medico propo-  
sita.*

**E**X his summatim colligere possumus, quæ sint partes Medici, qui vulnera sit curaturus, in duos namque scopos dirigi omnem ejus conatum manifestum est, in conservationem videlicet, ac robur naturalis caloris, cujus est agglutinare, suppurare carnem gignere, excrementa partim digerere, partim sensibilibiter expellere, & non rarò etiam peregrina corpora ejicere, atque in remotiorem eorum, quæ impedire, ac irritum facere opus ejus possunt, quamvis tunc quoque naturali calori consulatur, cum pleraque impedimenta eidem sint infensa, & illius prosternant robur, quare si diligenter intueamur, comperiemus, Medicum longè minorem partem habere in curatione vulnerum, quàm cujusvis fere alius morbi: Nam si quis febricitet, medicamenta, & alia auxilia administrat, quæ febrem tollunt, absque natura non dixerim, sed tamen tollunt, refrigerantia enim calorem febrilem obtundunt, evacuantia febris causam demoliuntur, quamvis non sine natura; verùm solutam unitatem nullum tollit medicamentum, sive ea simplex sit, sive cum cavitate, sed, quicquid necessarium est, natura perficit, nisi impediatur, & propterea Gal. 4. Meth. 3. dicebat: Sive ulcera simpliciter sint, sive cum cavitate, si quis diligenter æstimet, ex fugiendis, prospiciendisque iis, quæ naturæ officiunt, sanatio perficitur. Nihilominus & alter scopus spectandus est, quippe conservandus, fovendus, atque roborandus est naturalis calor, tanquam primus opifex.

Hujus



Hujus rei necessitatem vidit Josephus Quercetanus, & proinde radicale Balsamum (hoc modo appellavit insitum calidum) tueri nos debere curantes vulnera professus est in suo Scloperario; dicebat enim: Secunda remedia, quæ ad generaliore indicationem usui sunt, pertinent ad disjunctas partes invicem consolidandas: quod fit potissimum opera Balsami radicalis, & naturalis, quod in quaque parte continetur, tanquam principalis agentis, & virtute sua operantis cum alimento consentaneo, & congruenti, cujus magna vis est in efficienda agglutinatione, & earundem partium consolidatione: quod Balsamum tuendum est à Medico accommodanti se illi tanquam efficienti, & principali causæ, & providente, ne vis ejus, & efficientia impedimento aliquo retardetur: tollentique externas causas illi noxias, & adversarias, & quæ irritandi vulneris, & impediendæ consolidationis vim habent.

Sed Quercetano prior Theophrastus Paracelsus eandem veritatem cognovit, & propterea omnem conatum in suæ Mumia conservationem, & propugnationem dirigit, ut videre est in ejus minori Chirurgia lib. I. Mumia enim nomine nihil aliud intellexit, nisi insitum calidum, ut, & si ab aliis dissentire velit, non possit tamen nisi verbis. Quod verò Mumia illa apud eum nihil aliud sit, quàm insitum calidum, aperte declarant, quæ ipse de hac Mumia his verbis prodidit: Primum igitur Mumiam fore scito, quæ cuncta vulnera curat. Et inferius: Ad ea, quæ de Mumia dicta sunt, curare vulnera scilicet, animadvertite hanc fore liquorem per totum corpus diffusum in omnia membra potentissime, prout decet, atque in modum hunc dividitur, in carne juxta carnis conditionem, in ossibus, arteriis, & ligamentis, in medullis, in pelle &c. secundum cujusque horum, & suæ naturæ conditionem, ac requisitam in eis necessitatem. Inde sequitur: Mumiam carnis, hujus, etiam, nempe carnis curate vulnera, Mumiam ligamentorum sua curare, sic membri cujusque vulnus propriam exigit Mumiam, ut sibi convenientem. Et inferius: Dico naturam corporis offensam, aut læsam propriam in se continere sanationem, prout in arbore tenella videmus fieri, quæ faucia per se, Mumiaque propria curatur, & concluditur, ut alnus &c. Hoc ipsum



ipsum etiam accidit in hominibus. Et postea : Quicquid igitur latius de vulneribus hoc loco habebitur , volo curam eorum per naturæ Mumiam fieri , tum quod superponetur medicamentum incarnativum nullo modo vocari , sed benè conservativum , &c. Quis non videt quæcumque ipse suæ Mumiae tribuit , ea omnia calido innato convenire secundum Gal. & Hipp. doctrinam ? Totum id clarius expressit in altera sua Chirurgia cap. 2. calidum insitum Balsami naturalis nomine designans , his verbis : Ignorari minimè debet , omnibus corporis membris inesse Balsamum naturale , carnis , venarum , nervorum , ossium &c. quod ipsis innatum ab initio per naturam vulnera quævis illata sanat , hoc est naturale Balsamum in carne situm naturaliter carnem , & quod in ossibus , fracturas eorum , & sic de reliquis membris intelligendum erit , ut pote quodvis proprium in se continere medicamentum , quod ipsum quoquomodo læsum per sanat.

Est igitur natura sibi met proprius medicus , qui , quod in ipsa deficit , optimè reparat. Et paucis interjectis : Medicæ manus in læsionibus curandis hoc solum est officium , ut naturam eo loci defendat ab accidentibus , & inimicis externis intrinseci Balsami , ne per eos inficiatur , aut impediatur , quo minus vires suas valeat exercere naturales , at potius in illis auxilio Chirurghi corroboretur. Et paulo post : Quapropter is , qui hoc loco defendere , tuerique noverit , Chirurgus erit optimus , eaque ratione protector naturæ nominandus , quod ab externis elementis contrariis , atque reluctantis illum vindicare novit &c. quomodo igitur artificiali tegumento primum scopum assequamur , superius explicatum est. Et si ratione , atque experientia compertum sit , medicamenta reperiri ; quæ ingesta naturalem calorem in operibus ad vulnera sananda requisitis mirificè adjuvant.

*Dantur medicamenta, quæ ingesta naturalem calorem in suis operibus adjuvant.*

Quæ naturæ opus impediunt , etiamsi alioqui valens foret , hæc esse conclusum est , peregrina corpora intra vulnus contenta , quæ manuali operatione , quando fieri possit , sunt auferenda , aliàs opus hoc naturæ committendum , aut medicamenti perficiendum , ut superius dictum est ; distantiam labiorum , quando agglutinare oporteat , ad mutuum enim contactum reducenda sunt



sunt Medico, quæ dissident labia, & ut adducta permaneant, curandum: Quæ propulsionem excrementorum, impossibilem aut saltem difficilem efficiunt, & propterea parandus est effluxus expellendæ materiæ. Tandemque humorum decubitum in partem vulneratam, quorum ratione revellentia, derivantiaque præsidia convenire demonstratum est, nec non & repercutientia, atque intercipientia, & quæ succos ineptos ad motum reddunt, pravamque illorum qualitatem corrigunt, & quæ fluxionis materiam demunt: quæ verò occasio fluxioni esse possunt, procul arcenda, atque fugienda. Sed & materiæ, ex qua parari gluten, & generari caro debet, pravitas impedimento esse consuevit opifici, imò & ipsum potest prave disponere, proinde danda est opera, ut proba materia generetur. Quare concludere possumus nullius vulneris tanquam simplicis cuiuspiam affectus instituendam esse *Nullum vulnus est simplex affectus.* curationem; neque latet affectuum complicatio, posteaquam in primis adest continui solutio, dein temperamenti vitium, tertio fluxionis non contemnenda principia, quorum omnium habenda est ratio.

Sed & virtus partis, cujus est vulnera sanitati restituere, conservanda sese offert. Nec vulnus illud, quod simplex communiter appellatur, revera simplex est affectus, quamvis Gal. simplicis vulneris passim meminerit, & ab omnibus accepta sit illa vulneris distinctio in simplex, & compositum; idque & ex ipsius Galeni & omnium posteriorum doctrina facile est demonstrare. Habemus ex Galenica curandi methodo, unum non nisi unum indicare, eo quod unum quatenus unum unam tantum habeat essentiam; quod vero indicat, per sui essentiam indicat. Quocirca si in morbis plura sint indicata, necessario dicendum est, plura quoque esse indicantia, & affectus plures. Modò in vulnere, quod simplex dicitur, non est unum, quod indicatur, *Compositio affectuum in simplici vulnere.* sed plura; nam primò indicatur uniens propter continui solutionem. Sed cum labia distent, neque uniri possint distantia, oritur altera indicatio, remedii videlicet labia ad mutuum contactum adducentis, & adducta conservantis, donec natura agglutinationem perfecerit.

Haftenus habemus duplicem affectum, scilicet continui solutionem,



tionem, & labiorum distantiam, quam morbum vel in figuratione, vel in positu licebit appellare, vulneratæ siquidem partes proprium locum non obtinent, ut quæ deberent se tangere ac inter se distant, ex quo & figura partis pervertitur, & ob id adduci postulant: hinc adductis labiis, adhuc remanet continui solutio. Amplius omne vulnus exficari postulat ex Hippocrate lib. de Ulceribus, & Gal. passim in sex prioribus Methodi libris, & aliis in locis; igitur & alia reperitur compositio in simplici appellato vulnere, videlicet superfluxæ humiditatis, quæ exficari desiderat, unde Gal. lib. Art. med. cap. 90. opus nostrum in simplici vulnere esse dicebat applicare extrema distantium partium, & ita ut in unum coacta sunt, conservare, & substantiam partis salubrem mediocriter exsiccantibus conservare. Et alias docuit agglutinantia siccandi, atque adstringendi vim habere, adstrictione distantiam labiorum respiciens, siccitate verò superfluam humiditatem. Secundum igitur Gal. doctrinam saltem sunt tres affectus in simplici vulnere, videlicet continui solutio, labiorum distantia, & superflua humiditas. Quibus temperamenti vitium addere possumus, atque fluxionis principium, quod vulnus omne comitatur. Sed & virtus partis in simplicibus est conservanda, utpote quæ unionem molitur. Verum quid sibi voluit Gal. quando vulneris divisionem proposuit in simplex, & compositum? profecto Gal. nihil aliud voluit nobis significare, quam distinctionem inter vulnus in quo nihil deest neque cutis, neque carnis, & illud, in quo aliquid deficit, & regenerandum est, & cavum ab illo dicitur; quamvis omnia vulnera sint cava; Etenim si telum ad penitiores partes habuit aditum, & omnino si etiam penitiores partes sint sejunctæ, fieri non potest, quin vulnus non sit cavum. Verum alia est ratio hujus, alia illius cavitatis, vulneris enim appellati simplicis cavitas per applicationem labiorum repletur, & nihil aliud remanet, nisi ut fiat agglutinatio; At cavitas vulneris, quod verè cavum est, non potest nisi per carnis regenerationem repleri; ut statuendum videatur, omnia vulnera esse cava, sed aliorum cavitas carnis indiget regeneratione, ut repleatur, & hoc est vulnus propriè cavum, aliorum verò per juxta positionem labiorum repletur, & hoc est vulnus simplex. Cum ergo tot affectus sint vulneribus adnexi, mi-

*Cur quædam vulnera dicantur simplicia.*



rum non est, si pluribus quoque remediis sint tractanda.

Cæterum reliquis interim omiſſis de tegumento, quod naturalem calorem conſervat, & roborat, & in quo præcipuè conſiſtit noſter curandi modus, agamus. Non enim quodlibet tegumentum, & utcunque paratum aptum cenſendum eſt ad tuendum, & roborandum naturalem calorem, ſed quod partes proprio, & naturali tegmine deſtitutas, ab injuriis ambientis defendat, calorifque evaporationem, ac diſſolutionem prohibeat, ipſumque foveat neque noxam effatu dignam inferre poſſit. Quare ut habeamus, quale tegumentum parandum nobis ſit, aeris ſtatus erit conſiderandus, corporiſque & vulneratæ partis natura, & ipſius vulneris magnitudo: quod enim eſt in uno corpore, aut in una parte decens tegumentum, in altero, aut altera parte forſan non contemnendi mali erit in cauſa, non ſatis, aut pluſquam par ſit calefaciens: & quod in aere calido præclaram operam præſtat, in frigido non ſatis ab ejus injuriis partem tutabitur: quod verò in frigido egregie proprium munus explet, in calido nimis calefaciat, ponderoſumque comperietur. Et quod in carnoſa parte experitur præſtantiffimum, ſi viſcus aliquod, puta cerebrum fuerit convulneratum, aut detectum, ſæpius incommodum, & noxium, quin interdum lethale deprehendetur. Itaque ſi citra diſcrimen conſtruatur, turpes, & exitiales errores contingant neceſſe eſt. Ad hæc ergo reſpiciens elegans Medicus tegumentum aptum facile parabit ex duplicato, triplicato, aut quadruplicato, vel pluries etiam plicato linteo, vel pluribus linteis; modò etiam ex tenui ſtuppa, vel molli lana, aut goſſipio conſectis ſpleniis, vel pulvillis, ſi firmiori tegumento fuerit opus; tantæ verò latitudinis, ac longitudinis, ut de parte ſana non parum comprehendat. Et ne ab eo noxa contingat, curabit, ne ponderoſum nimis evadat, linteaque deliget non aſpera, & inæqualia, ac dura, ſed lævia, æqualia, & mollia. Præterea cavebit, ne ob arctam deligationem nimis hæreat parti, & eam comprimat, præterquam quod enim pars vulnerata majori fluxionis periculo eſſet expoſita, cum adſtrictione, atque compreſſione dolor inferatur, & ſanguis attrahatur, egreſſus inſuper excrementitiæ materiæ prohibetur, cujus ratione dicebat Hip. lib. de frac. tex. 20. com. 3. niſi quod fascia laxior injiciatur,

*Tegumentum ut parandum.*



ne pus retineatur, sed facilem exitum habeat; clauditur enim à comprimantibus, linteis vulneris osculum; & pravorum halituum, si qui generentur, impeditur dissolutio. Hæc igitur pericula, laxiori facta deligatione, vitabimus. Sed neque adeò sit laxa, ut à vulnere possit amoveri tegumentum, si fortè moveri partem contingat, utraque ergo extrema sunt fugienda.

*Medica-  
mentum  
vulnerum  
quale.*

Ad perfectionem quoque tegumenti requiritur, ut osculo vulneris apponatur linteolum medicamento aliquo illitum, quod possit dissolutionem caloris prohibere; ac impedire, ne ita madefiant effluentibus excrementis apposita pro tegumento linteæ seu splenia, cujusque substantia diutius perduret, nam quæ cito exsiccantur, & evanescunt, parum utilitatis afferunt, nec sit talis, quæ possit suffluxiones tollere. Hujusmodi erit, quod medium est inter molle, & durum, quodque emplasticum est, ac viscidum, nec non & oleosum, unctuositas enim citam exsiccationem & evaporationem prohibet. Palam autem est, nullam eidem inesse debere qualitatem, quæ ad ciendam fluxionem faciat, aut naturali calori sit adversa. Et si quæ illi inesse debeat evidens qualitas, sit exsiccans, nisi vulnus sit contusum, ut ad absorptionem excrementorum aliquid conferat, aut suppurans, si vulnus fuerit contusum, & omnino suppuratione indigeat; siccans verò, & adstringens sit, &, ut uno verbo dicam, agglutinans, si vulnus agglutinari postulet. Maximè autem probaverim, ut semper apponeretur medicamentum, quod qualitatem haberet naturali calori amicam, & qua naturalis calor robustior redderetur ad opera pro vulnere sanatione necessaria, amicam videlicet caliditatem, quod si eidem proprietate totius substantiæ prodesset, omnes profectò haberet numeros. Et ideò quando suppetit medicamentorum copia, & eorum delectus haberi potest, non est standum manifestæ qualitati medicamento, sed quod experientia efficacius comprobavit, illud eligendum. Hæc apud aliquos forsitan erunt difficilia, & propterea in iis paulisper immoremur.



C A P U T XXXVI.

*Cur aliis medicamentis citius , aliis tardius sanentur vulnera , & quod dentur medicamenta à totius substantiæ proprietate vulneribus conferentia.*

**Q**ui vulneribus curandis dant operam , quotidie observant ex usu unius , magis quàm alterius medicamenti , quamvis in manifestis qualitatibus sint similia , facilius ac citius vulnera ad sanitatem perducì ; est enim reperire quædam medicamenta , quorum usu unius diei spatio magna etiam vulnera agglutinantur. Hinc extolluntur balsama quædam arte facta , oleum magni Ducis Hetruriæ pro vulneribus , oleum Hispanæ appellatum , Aquæ balsami , & matres appellatæ balsami , & innumeri propemodum stillatitii liquores , balsama naturalia , & potissimum , quod nuper ex Indiis , advectum est , Peruvianum dictum , Tacahamacha Indæ , & alia id genus : quibus non pauca in manifestis qualitatibus similia reperies , sub quibus tamen non æquè fœliciter sanantur vulnera.

*Medicamenta effica ad vulnera.*

Quænam ergo est hujus diversitatis causa ? Jam ostensum est re vera non esse medicamenta , quæ vulnera ad sanitatem ducant , sed calorem naturalem , quare non aliter medicamenta vulneribus conferunt , quàm opitulando naturali calori , quod dupliciter contingit , uno quidem modo , quando impedimentum aliquod auferunt , aut ne quid accidat , quod naturæ opus impediat , aut remoretur , prohibent ; altero vero modo , quando agenti directè opem ferunt , hoc est , fovent , ac roborant naturalem calorem. Jam vero licet medicamenta quædam sint primis qualitatibus similia , alterum tamen altero potest efficacius aliquod ex dictis juvamentis præstare pluribus rationibus ; aut videlicet , quia prop-ter certum substantiæ modum diutius vim propriam conservat , unde longiori actione potentius aget , & magis conferet ; aut quia ipsius usus nullo , aut parvo sit labori ipsi naturæ , puta quia in ejus expulsionem nihil , aut parùm naturæ sit laborandum : cum enim omne medicamentum sit à natura alienum , necesse est , ut

*Quomodo medicamenta vulneribus conferant.*

*Cur alia aliis magis conferant.*



tandem expellatur, si intra vulnus fuerit, non secus, ac propria excrementa, at in quorundam medicamentorum expulsionem parum defatigatur natura, ut quæ calore attenuata in auras dissolvantur; aut quia ob peculiarem substantiæ modum, qui oritur ex certa quadam elementorum proportionem, magis sese in omnes vulneris partes insinuet, altiusque penetret; aut quia sit magis naturæ amicum: nihil enim prohibet ex duobus medicamentis in manifestis qualitatibus similibus alterum altero esse magis naturæ amicum, sicuti non pauca medicamenta reperies in caliditate, ac siccitate, adstrictioneque absynthio similia, quæ tamen non sunt æquè amica jecinori, ac absynthium ipsum: aut quia non manifestis tantum qualitatibus conferat, verum etiam à totius substantiæ proprietate.

*Dantur me-  
dicamenta  
à proprie-  
tate potius  
substantiæ  
vulneribus  
conferentia.*

Dari medicamenta, quæ à totius substantiæ proprietate partibus quibusdam conferant, & peculiare quosdam morbos, aut morbificas causas demoliantur, adeo in re medica est frequenti experientia confirmatum, ut nullus videatur relictus dubitandi locus, ideoque Gal. I. de comp. med. per gen. I. in illos invehitur, qui talem medicamentorum operationem negabant, imo eos irridebant, qui arbitrabantur, ex medicamentis alia jecur, alia lienem, alia renes, alia vesicam, alia cerebrum, vel pulmones, vel oculos juvare, dicentes: utrum præses quidam illis imperat quemadmodum in Tragœdia, Tu visse latas propere ripas Inachi, tu perge Thebas, modo quas Cadmus condidit. sic in his, tu ad hepatis portas, tu ad vesicam, vel renes duos proficiscere? An quod ingestum est in ventriculum, jecur quidem excipit, inde verò per universas corporis partes defertur? quos omnes imperitiæ arguit ibidem Gal. utpote minùs versatos in cognitione facultatum medicamentorum, & ad hujusmodi errorem confutandum experientiam adhibet, posteaquam talis proprietas sola experientia, neutiquam ratione innotescit, unde dicebat; At hoc scomma eos, qui hujusmodi cavillantur, tam esse medicamentorum facultatis imperitos arguit, ut à marino lepore pulmonem exulcerari ex omnibus corporis particulis penitus ignorent, vesicam solam à cantharidibus, ab aliis, renem lapides conteri, ab aliis rursus pulmonis, atque thoracis promptas fieri excretionem, quemadmodum

*Proprietas  
totius sub-  
stantiæ sola  
experientia  
innotescit.*



admodum ab aliis alia in una quadam particula peculiariter perfici. Eandem medicamentorum operationem agnoscit lib. de Theriaca ad Pisonem. Sicuti ergo in aliis morbis inventa sunt medicamenta à tota substantia conferentia, ita quoque in vulneribus rem se habere existimandum est; non quidem quod medicamenta sanent vulnera, jam enim dictum est, id esse naturæ opus, sed quod proprietate totius substantiæ innatum calorem ita roborent, ut omnia necessaria munia felicissimè obeat. Dari autem medicamenta alia aliis præstantiora, potentioraque ad vulnerum sanationem, experientia ipsa testatur. Sed ex his potentioribus aliqua reperiri, quæ totius substantiæ proprietate id præstent, hinc licet colligere, quòd operationis ipsorum nulla potest reddi ratio, hoc enim eorum est proprium, quæ à tota substantia operantur.

Quoniam verò nullum ferè ex talibus medicamentis reperitur, quod simul aliqua manifesta qualitate præditum non deprehendatur, propterea objicere quispiam posset, effectum à manifesta illa qualitate prodire, non à totius substantiæ proprietate, nam frustra ad abditas causas confugimus, quando manifestæ præsto sunt. Cur, si medicamenta, quibus ad curationem vulnerum utimur, omnia sunt sicca, & exsiccatio est maximè vulneribus conveniens, à tota substantia vulneribus conferre sunt æstimanda? Evidenti tamen ratione adducimur, ut statuamus, effectum præcipuum à totius substantiæ proprietate provenire: si enim effectus à manifesta qualitate prodiret, omnia medicamenta eandem qualitatem in eodem gradu participantia, & similem substantiæ modum, eundem ederent effectum, modò aliud quodpiam non obstaret, aut reluctaretur eorum operationi, vel ipsa medicamenta alienam simul non haberent qualitatem, quæ conferentis qualitatis effectum posset impedire, sicuti si prætereà medicamentum esset nimis calidum, & mordax, aut frigidum; at multa medicamenta comperiuntur eandem qualitatem in eodem gradu participantia cum simili substantiæ modo, quæ tamen non eundem effectum operantur, etiamsi contrariam qualitatem non obtineant, vel aliud quodpiam eorum actioni sit impedimento: igitur non à manifesta illa qualitate, sed à totius substantiæ proprietate

*Objeçtio.*

*Solutio.*



prietate talium medicamentorum effectus ortum ducit. Hujus etiam signum est, quod hujusmodi medicamenta & agglutinant, & carne replent, quæ diversis facultatibus peraguntur; imo adstrictio, qua prædita sunt agglutinantia, carnis generationi obest, teste ipso Gal. 3. Meth. 4. utpote quæ sordem ulceribus arctius affigat, quàm ut facile possit absolvi: non ergo manifestis qualitatibus utrumque præstant. Non ob id tamen assertum volo, qualitatem manifestam in eodem medicamento, quod à tota substantia operatur, esse prorsus inutilem, sed suo modo agere censeo, puta exsiccando humiditatem superfluum, at quod effectus adeo celeriter subsequatur, itaque facile, ac tuto in robur, quod à medicamento amico naturalis calor contraxit, referendum dico, quem tamen effectum faciliorem reddere manifesta qualitas potest.

Nec est, quòd quis objiciat, eorum medicamentorum, quæ à tota substantia operantur, nullam esse rationem, nos autem rationem attulisse cur vulnera sanent; diximus enim hoc præstare roborando naturalem calorem; nam si inspiciamus, effectum tantum medicamentorum, quo profunt, cognoscimus, actionis autem causam ignoramus. Scimus ea roborando naturalem calorem vulneribus conferre, verum qua ratione roorent, ignoramus, & hæc est operatio, quæ à proprietate totius substantiæ provenire dicitur. Jecur lupi præparatum à tota substantia hepaticis subvenire existimatur, quod non alia præstat ratione, quàm naturalem calorem jecinoris roborando; sed qua ratione tantum roboris naturali hepatis calori præstet, ignoramus, & hæc est operatio ipsius à tota substantia procedens. Semper autem manifesta qualitas eundem scopum respiciens, sive per se, sive ex accidenti, adhuc magis ad propositum finem consequendum conducit. Sicuti non raro in Gallica lue caliditas, & siccitas Guajaci adjuvat ejusdem operationem, quæ est à tota substantia in expellenda lue.

Hujusmodi sanè fuerint medicamenta, quæ à tota substantia vulneribus prodesse existimantur, veluti balsamum Peruvianum, Tachahamacha Inda, caranna, balsamina, symphitum, dictamnium Creticum, ophioglossum, balsamum arte confectum pro vulneribus,



bus, aqua, & mater balsami, nec non & olea multa, quæ ex multiplici maceratione, & fermentatione medicamentorum, quæ ad vulnera faciunt, præparantur: cujusmodi est oleum nostrum ex multiplici infusione hyperici, & aliorum multorum. Sicuti enim in Theriaca ex tanta mixtorum diversitate mediante fermentatione oritur tertia quædam forma venenis adversa, unde ipsa non agit quatenus calida, & sicca, neque in virtute alicujus simplicis medicamenti ejus compositionem ingredientis, sed à tota substantia; ita de compositis illis medicamentis ad vulnera censendum est. Neque solum est reperire pharmaca à tota substantia vulneribus communiter conferentia, verùm sicuti in aliis effectibus alia huic, alia illi parti conferunt, ita & in vulneribus partium evenire conspiciamus, alia siquidem observamus vulneribus capitis magis convenire, alia nervorum, & sic deinceps. Capitis enim vulneribus magis prodest gummi Ellemi, betonica, matrisilva, pimpinella, & quæ ex illis componuntur, nervorum autem hypericum, mormordica, vermes terrestres balsama factitia, & naturalia, & sic de reliquis, & si quæ reliquarum partium vulneribus peculiariter prosint, non adeò sint manifesta.

Illud prætereà in id genus medicamentis observamus, quod sunt nonnulla, quæ in uno quodam opere peculiariter naturalem calorem adjuvant, ut patet de dictamno Cretico, quod præcipuè calori suffragatur ad extranea corpora propellenda: nec mihi obijciat quispiam, id à vi attractoria dictamni proficisci, posteaquam & intus ingestum idem præstat. His igitur ita se habentibus, nullum erit absurdum, immò non leviter profuturum existimandum est, si medicamentorum, quando fieri possit, delectus habeatur, & quæ efficaciora sunt, amplectantur: neque tantùm extrinsecus apponantur, verùm etiam intra vulnus, si cavum fuerit, instillentur: quamvis quod extrinsecus apponitur, nisi decentem sui natura consistentiam habuerit, ut tegumentum sit utilius, & ipsum quoque medicamentum diutiùs vires proprias retineat, ad convenientem formam alterius miscella reduci postulet. Neque pauci momenti habenda est medicamenti instillatio, quod una tantùm, vel altera vice, aut saltem rarò instilletur, & ipse proprias vires intra vulnus conservare propter excrementorum permixtionem

*Dantur me-  
dicamenta  
quæ in quo-  
dam pecu-  
liari opere  
à proprietate  
totius  
substantie  
naturalem  
calorem ad-  
juvant.*



diutius nequeat, tantoque minùs, si ex illis fuerit, quæ promptè dissolvuntur, immo quando etiam tale non fuerit, quod à natura non multò post tanquam extraneum expellatur, posteaquam semel admotum non mediocriter potest naturalem calorem robore, & alias insuper utilitates afferre, & robur, quod ab una illa impositione recipit calor, deficiente medicamenti virtute non amittit, sed constanter retinet sub fido tegumento tutus: quæ de re, ut sæpè adhibeatur, non est auferendum tegumentum, & majus damnum procurandum, quàm commodum.

*Alia consideratio in delectum medicamentorum.*

In aptis quoque medicamentis deligendis, non erit spernenda consideratio naturæ ipsius vulnerari, & propriè illius curationis, & ejusdem naturæ proprietatis ineffabilis, siquidem non est existimandum, omnem naturam, ut dicebat Gal. 3. Meth. 7. eadem medicamenta requirere, sed infirmioribus, mollioribusque mitiora, validioribus, siccioribusque valentiora conveniunt. Et sunt quædam naturæ, quæ ab aliquibus benè habent, ab aliis verò licet qualitate similibus, insignem noxam percipiant. Novi ego quosdam, qui usum terebinthinæ peculiari quadam dote perferre non poterant, & hæc proprietas ad filios etiam transiit, & eandem fuisse avorum, & patrum naturam referebant. Et propterea non immeritò dicebat Gal. loco citato, perspicuum esse, tum ægri naturam esse considerandam, tum cujusque hominis esse propriam curationem, tum supra hæc illud tertium, nempe quoniam cujusque naturæ proprietas ineffabilis est, nec exactissima scientia comprehensibilis, hunc esse optimum cujusque particularis ægritudinis Medicum, qui jam methodum quandam comparavit, ex qua & dignoscere, naturas possit, & conjectura consequi, quæ sint propria cujusque remedia. Itaque & propter qualitates excrementa respicientes, si cui talibus uti placuerit, non erit ab re, si observentur, quæ superiùs ex Gal. mente proposita sunt prometiendo siccitatis gradu, quin transferenda hæc eadem erunt ad caliditatem, frigiditatemque medicamenti, sicuti enim, ut dicebat Gal. 3. Meth. 8. humidior natura humidiora, siccior sicciora medicamenta exigit, ita calidior calidiora, frigidior frigidiora requirit, contrariam scilicet semper iis, quæ præter naturam sunt, & iis, quæ secundum naturam indicationem præstantibus. Quippe quæ



quæ secundum naturam similium sibi sunt indicativa, quæ præter naturam contrariorum, si modò illa servari, hæc summoveri necesse est. Immo & illud addi ex Gal. poterit, quòd si temperamentum totius, & partis non convenerint, id autem nonnunquam evenit, particula ipsa, exempli gratia, sicciori existente, quando ægri temperamentum est humidius, vel è converso, & ideò contrariæ indicationes nobis sese offerant, diversa existente indicatione; quæ à patiente particula sumitur ab ea, quæ ex totius elicitur natura, si quantum ægri temperamentum ad unum extremorum lapsus est tantum ad alterum extremum lapsa sit particula, medicamentum tale esse oportebit, quale conveniret, si vulnus foret in temperata particula temperati corporis. Si verò lapsus particulæ versus suum extremum major sit, quàm temperamenti corporis ad alterum, in tantum oportebit medicamenti vires, quas affecta particula præscribit, intendere, quantum excessus particulæ est supra excessum corporis; nam si particulam tanto siccior sit temperato, quanto ægri temperamentum est humidius justo, tale profectò medicamentum convenit, quale in vulnere temperatæ particulæ temperati corporis. At si particula sit siccior temperato, quàm ægri temperamentum sit justo humidius, tantò siccius medicamentum conveniet, quantò magis particulæ siccitas corporis humiditatem exuperat. Quod & de caliditate, ac frigiditate intelligendum venit. Hinc Gal. 3. Meth. 9. Pone igitur totum laborantis corporis temperamentum humidius esse, eoque medicamenta desiderare, quæ minus siccent, ipsam verò ægram particulam ex eorum numero esse, quæ sicciores sunt, quales esse diximus, quæ minus sunt carnosæ, diversa in his est ea, quæ à patiente particula accipitur indicatio, ab ea, quæ ex ægri sumitur natura: quare si quanto ægri temperamentum justo est humidius, tanto particula justo sit siccior, nec adjiciendum, nec detrahendum pharmaco quidquam est, sed tale adhibendum, quale si ulcus in medii temperamenti particula corporis mediocriter temperati consisteret, adhiberemus. Sin siccior debito particula tantò fuerit, quantò corporis temperamentum justo est humidius, utique in tantum intendi siccitatem medicamenti conveniet, quantum particulæ temperamentum totius temperamentum excedit. Veluti



si quatuor numeris sit exulcerata pars medio temperamento siccior, ægri natura gradibus tribus humidior, manifestum est particulam, quæ nunc exulcerata est, siccius uno gradu desideraturam medicamentum, quàm quæ pars sit temperata.

*Notandum.*

Unum tamen noto propter eos, qui quotidie medicamenta imponunt, animadversione dignum, videlicet, nullum esse inconueniens, quando medicamentum, quod imponitur, ex iis est, quorum substantia, ac vis promptè evanescit, si illud siccitatem, caliditatemque particulæ excefferit, propter brevitatem enim actionis nihil officiet, immo efficacia agendi brevitatem actionis compensabit: error autem cum non levi ægrotantis damno committeretur, si diutius vim illam retineret medicamentum. Hinc videmus aliquos ex iis, qui veterem modum sequuntur, uti aqua ardenti fœlici cum successu; quod si substantia ejus, ac virtus perduraret, propter insignem caliditatem, ac siccitatem non posset læpè non obesse.

*Alia consideratio.*

Ad eligendam quoque manifestam medicamenti qualitatem necessaria est temperamenti aëris ambientis consideratio; cum enim & totum corpus, & particula ipsam afficiat, & propterea excedente qualitate possit non leviter molestum esse, ejus excessui medicamentis est occurrendum, ita ut calidioribus temporibus frigidiora, frigidioribus calidiora admoveantur, unde Gal. 3. Meth. 7. Si igitur hæc ita se habent, sicuti profectò habent, inspicere etiam convenit, & circundantis nos aëris temperies, siquidem est veluti medicamentum quoddam: is quoque corporibus nostris forinsecus incidens, ubi immodicus calore, vel frigore est, sanationem moratur. Danda igitur opera est, ut medicamenta ejus excessui occurrant, ideoque Hipp. in calidioribus anni temporibus iis, quibus frigidior facultas sit, medicamentis utitur, calidioribus per frigidiora.



C A P U T XXXVII.

*Non esse absurdum asserere unica medicina omnia simplicia vulnera posse agglutinari, & cava carne repleri, immò quolibet dato medicamento non corruptivo, neque mordaci, si decentis fuerit consistentia, vel ad eam reducatur, posse idem prestari ostenditur.*

**Q**Uamvis aliis medicamentis citius, aliis tardius, & minus feliciter sanentur vulnera, & ob id laudandum sit, si medicamentum, quod adhibetur, ex iis sit, quæ magis sunt efficacia; nihilominus, quoniam naturalis caloris est, qui sanat vulnera, etiamsi medicamentum tales vires non habuerit, posse omne vulnus simplex agglutinari, & cavum, quod sanari tamen possit, carne repleri non est dubitandum, posteaquam tegumentum supradicto modo paratum adeò fovet, ac roborat naturalem calorem ut citra opem medicamenti tali facultate præditi quæcunque necessaria sunt, præstare valeat. Immo tantam in eo vim, & energiam agnosco, ut asserere non dubitem, unica medicina posse omnia simplicia vulnera agglutinari, & cava, quæ sanationem haud respuant, carne repleri.

Jam non paradoxa docere, sed desipere videbor, dicente Gal. 3. Meth. 3. Nemo tamen eorum adeò fuit præceps, ut omni ulceri cavo unam se habere Medicinam, quæ carnem restituerit, profiteretur: non enim apud ullum invenies ejusmodi pharmacum, quod omne ulcus cavum sanet, immo pro modo humoris, sordisve, atque ipso laborantis temperamento immutandum medicamentum esse. Et eodem cap. 5. Porro existimare communem quandam esse omnium hominum curationem, sicuti stupidissimi Methodici putant, extremæ est dementiæ. Cæterum neque desipio, neque paradoxa afferro. Galenum, & antiquos non reprehendo. Consentanea jactis principiis protulit Gal. sed & assertum meum verum esse, nisi judicem agas, priusquam partes audieris, comperies. Quod Gal. docuit in sua doctrina, & juxta sua principia, suamque curandi methodum, verum est: quod ego asserui, si fundamentis adhuc jactis standum est, non minus



*Una, & eadem medicina potest in omnibus vulneribus rationem habere tegumenti.*

est verum; in Galeni tamen doctrina falsum esset, revera enim si excrementorum ablatio medicamentis sit committenda, quemadmodum sentit Gal. varianda utique erunt medicamenta pro varietate naturarum, & pro excrementorum modo. At nos non medicamentis, sed naturæ curam excrementorum committimus, & propterea satis nobis est, ut medicamentum vicem gerat tegumenti, & naturalem calorem foveat, ac tueatur, palam autem est, unam, & eandem medicinam posse in omnibus vulneribus talis tegumenti rationem subire. Sufficit, si naturalis calor, cuius est vulnera sanare, sit robustus, cujus ratione contingit, ut & ab iis, qui quotidie vulneribus medicamenta adhibent, sæpè sanentur vulnera, etiamsi perperam curentur. Quis non observat in dies curari vulnera ab imperitis, & à gregalibus Medicis absque ulla distinctione, immò absque ulla cognitione ipsorum medicamentorum, & corporum, quibus adhibentur, & omninò contra Gal. methodum, & rationem, unde abstergunt, & siccant, ubi est suppurandum, ubi vero abstergendum est, aut agglutinandum, suppurant, & in cavis vulneribus passim adstringunt, vulnera in partibus nervosis oleo ferventi comburunt, & tamen non rarò sanari hoc modo curata vulnera? Est ne levis error inutilibus linamentis partem vulneratam distendere, ac purulentam materiam suppressere, putredini, atque corruptioni, quæ imminet, non ire obviam, præsentem verò communibus sarcoticis, atque adstringentibus admixtis corrigere, subfluxiones spernere, vulnus ab injuriis ambientis non defendere? Et tamen quemdam novi, qui se etiam magni nominis virum existimabat, & ubique mirabilia de se prædicabat, atque se solum sapere profitebatur, aliisque omnibus sine circuitionibus detrahebat, in his, & aliis delinquere solitum, à quo tamen non pauca vulnera sanabantur. Fateor non paucos ab eodem me vidisse interfectos, vel, ut melius dicam, ejus culpa interiisse, sed & multi tali curatione sani evadebant. Quis adeò cæcus est, qui non videat sanitatis causam referendam esse in robur naturalis caloris, qui nocentia spernit, & nocumenta corrigit à prava curatione illata? Quod si imbecillis esset calor; aut vulnus in parte foret, in qua illatæ noxæ citò fiunt inemendabiles, profectò actum esset de vita ægro-

tantis,



tantis, in quo tam frequentes errores committuntur. Hinc vulnerati capite quamvis leviter, plerique in manibus eximii illius viri peribant, ut in gravibus casibus error ejusdem non possit delitescere: nam evenit propemodum Medicis, quod malis gubernatoribus, veluti Senex lib. de vet. Med. his verbis scriptum reliquit. Plerique, inquit, Medici eadem, quæ mali gubernatores in se admittere videntur, etenim illi, cum in tranquillitate navigantes delinquant, non sunt manifesti, cum autem eos deprehenderit ventus magnus, & tempestas, palam jam conspiciuntur omnibus hominibus, ignorantia, & culpa erroris sui navem perdidisse. Sic sanè etiam mali, & plurimi Medici cum curant homines nihil grave patientes, in quos si quis etiam maximè delinquat, nihil græve faciat. Sunt autem multi tales morbi, & multò sæpiùs quàm graves hominibus accidunt. In talibus sanè delinquentes non fiunt manifesti idiotis hominibus; Ubi vero contigerit magnus, & fortis, & periculosus morbus, tunc ipsorum delicta, & ars omnibus in conspicuo sunt: Neque enim longè absunt singulorum pœnæ, & cruces, sed brevi adsunt. Sanè vim naturæ in sanatione vulnerum quandoque veluti ludens, & per otium observare volui, communia vulnera medicamentis adversis curans in robustioribus, & usu medicamenti suppurantis agglutinata vidi vulnera, carne repleta, & cicatrice obducta. Medicamentum, quo utebar, erat id, quod digestivum lotum appellant. Quis diceret tale medicamentum posse vulnus simplex agglutinare, cavum autem carne replere, ac cicatricem inducere, cum hæc omnia in Galen. doctrina siccantibus perficiantur? Aliàs observavi ejusdem digestivi usu vulnera sclopo inflicta suppurata, expurgata, & carne repleta, & erant gravissima, sed postea ob nimiam humiditatem supercrevit caro, quæ erodentibus indiguit. Verè, ut reliqua omnia, ita ab Hippocrate dictum est, naturas esse morborum medicatrices. Quod in vulneribus potissimùm observamus. Et quicumque crediderit aliàs, ut rectè dicebat Paracelsus, aut sibi temerè sanationem vulnerum adscripserit, sese, nec non alios miserrimè seducet, cum artis propriæ, vel ejus, quod profitetur, nullam cognitionem habeat. Subfluxiones para, si desint, & calorem protege, ac fove, teque vel invito sanabuntur vulnera.

*Medici similes gubernatoribus.*

*Vis naturæ in curatione vulnerum.*



*Unica medicina pos-  
sunt sanari  
omnia vul-  
nera.*

Si ergo tanta est vis naturæ, ut nocumenta corrigat prava curatione illata, & illud asserere possumus, cum tegumento nostro naturam roboremus, unica medicina, quæ in omnibus vulneribus complere tegumentum potest, omnia simplicia vulnera posse agglutinari, & cava carne repleri. Quod verò unica medicina valeat tegumentum perficere in omnibus vulneribus, non est ut probemus, quoniam ad hoc sufficit, ut exhalationem caloris prohibeat, & ab injuriis externis una cum suprapositis linteis cum defendat, & cum iisdem foveat. Quæ omnia sola corpulentia præstabit medicina. Nemini autem dubium est, eandem corpulentiam omnibus vulneribus posse inservire.

*Obiectio.*

*Solutio.*

Obicies, talis medicina qualitatem aliquam habeat, necesse est, vel enim erit temperata, vel calida, aut frigida, aut humida, aut sicca, vel secundum horum combinationem, sed quamcunque habuerit qualitatem, cum naturæ hominum adeò sint diversæ, talis qualitas, licet forsan aliquibus naturis futura sit ex usu, aliis tamen fuerit necessario minus opportuna, siquidem quæ medicina unius naturæ respectu est modicè calida, alterius respectu, erit calidior, quàm par sit, alterius minùs calida, vel etiam frigida: igitur propter qualitatem corpulentiaæ adnexam fieri nequit, ut unica medicina omnibus vulneribus possit adaptari. Verùm hæc obiectio in nostro curandi modo nullius est momenti; etenim qualitati medicamenti non omnia tribuimus, tegumentum curamus, etiamsi qualitas adjuncta corpulentiaæ fuerit minùs conveniens naturæ, cui applicatur, numquam tamen adeò illi potest esse inconveniens, ut aliquid mali inferat: potissimum enim medicinam deligimus, quæ moderatum habeat calorem, at in omnibus naturalis calor moderatè calidus est, & calidis fovetur, nec esse potest alicujus momenti discrimen in diversitate naturarum. Deinde qualitas hæc medicina non multò post aliàs dictis de causis perit, unde in eo, quod sequitur, tempore apposita medicina solius tegumenti vicem habet, quo roboratur calor: & si a medicina qualitate, dum videlicet apponitur aliqua minùs convenienti qualitate prædita, quid nocui fuerit profectum, totum à roborato calore emendatur, &, ut uno verbo dicam, major est utilitas, quæ ex tegumento, quam jactura, quæ ex minùs convenienti qua;



qualitate provenit: neque enim vellem qualitatem hanc esse corruptivam, & deleteriam, aut mordacem, ut ob id fluxionem proritaret. Quare nec absurdum existimarem hoc assertum: Dato quolibet medicamento convenientis corpulentiae, quod corruptivum, & deleterium non existat, aut adeò acre, & mordax, ut fluxionem conciter, possunt omnia vulnera cava, quæ sanabilia sunt, carne repleri. Ratio est in promptu, qualitas talis medicamenti, quaecumque ea fuerit, tandem propter calorem partis, & affluentia excrementa perit, semper autem vim habet tegumenti ejus corpulentia. Immo si applicaretur medicina, quæ in auras dissiparetur, idem tamen effectus sequeretur, quia saltem remanet tegumentum linteis paratum: unde & absque ullius medicamenti ope ægrius forsan idem consequeremur. Hinc & Celsus lib. 5. cap. 26. dicebat. Licerque sine peregrinis, & conquisitis, & compositis medicamentis vulnus curare.

Ex his patet, mirum non esse, si medicamentis suppurantibus agglutinentur vulnera, expurgentur, carne repleantur, & quandoque etiam cicatrice obducantur: appositionemque medicamentorum non esse absolutè necessariam, sed ad benè esse tantum; sicuti coctioni, quæ fit in ventriculo, prodest fomentum, verum non est necessarium, namque & sine ipso celebratur coctio, ope tamen fomenti melius, & faciliiori negotio perficitur.

## CAPUT XXXVIII.

*Quando detegere vulnus oporteat.*

**I**N omnibus vulneribus idem esse solutionis tempus, nemo sanæ mentis judicabit; idque ex eo solo licet colligere, quòd ex vulneribus alia citius, alia tardius sanantur, clarum autem est, citius solvendum esse, quod citius sanatur. Accedit, quod & si temperamentum vulneratæ partis, & fluxionis periculum tegumentum postulent, non est tamen existimandum in omnibus vulneribus protrahi solutionem debere usque ad perfectam sanationem, interdum enim connectuntur affectus, qui majorem vim habent ad indicandam solutionem, quàm



temperamentum, & fluxionis metus ad indicandum tegumentum. Non erit autem difficile solutionis tempus invenire, si consideretur, cujus gratia tecta servantur vulnera: hoc facimus, quemadmodum superius dictum est, tum ut facilius fluxionis periculum evitemus, tum, ut calorem naturalem tueamur, foveamus, ac roboremus, quo possit facilius propria munia obire. Igitur quando nihil adsit, quod magis possit ad indicandam solutionem, & detectionem, quam fluxionis periculum, & naturalis calor ad indicandum tegumentum, semper tecta servanda sunt vulnera: At, quando aliquid tale adest, tunc solvendum est vulnus, ac detegendum.

*Unde habeatur tempus solutionis.*

*Quæ solutionem indicant.*

Quæ magis possunt ad indicandam solutionem ea sunt, quibus sine manuali operatione succurri non potest, aut quia, sic illis poscentibus, aliquid manu addendum sit, aut detrahendum, aut quia medicamentum aliquod apponendum, & tamen, nisi eis quamprimum succurratur, magnum quodpiam malum minantur. Ea pariter, quibus sine manuali operatione succurrere non possumus, quamvis nihil grave sint allatura, sed tantummodo nisi ipsis consulatur, impedimento sint, ne optatum finem consequamur, magis possunt ad indicandam solutionem, quando jam naturalis calor, quæ majoris sunt momenti, præstiterit, ut ob id cesset tegumenti necessitas. Hujusmodi est caro supercrescens; solvendum enim ejus causa vulnus est, ut medicamentum apponi possit, quod eam detrahat, alias numquam induceretur cicatrix. Similiter quando jam vulnus carne repletum est, cessat illa tegumenti necessitas, & propterea si ratione superfluæ humiditatis, quo inducatur cicatrix, necessaria fuerit exsiccatio vulneris, & appositio medicamenti, quod cicatricis inductionem adjuvet, siccando videlicet, & adstringendo carnem, profecto tunc magis potest humida, & laxa caro ad indicandam solutionem, quam naturalis calor tegumentum: hic enim quia, quæ majoris sunt momenti, perfecit, non multum indiget tegumento; at si perfecte sanandum sit vulnus, & cicatrice obducendum, propter humectam, & laxam carnem, solvere vulnus oportet. Prioris fortis sunt ea, quæ corruptionem, & internecionem naturalis caloris minantur, inflammationem, prostrationem virium, & hujusmodi.



di. Sanguinis igitur fluxus maximam habet vim ad indicandam *Sanguinis* solutionem, nisi enim supprimatur, virtutem prostermit; ut vero *profluvium* supprimatur, applicanda sunt medicamenta, quæ sanguinem si-*solutionem* stunt, osculo ipsius vasis, aut ligandum vas ipsum, aut ignito *exigit.* ferro, aut medicamento eschara inducenda, quæ osculum vasis occludat, aut vulnus suendum, aut denique aliquid agendum, quod manuum operam requirit, & ideo solvendum, & detegendum est vulnus, ut vulnere admoveri manus possint. Gangræna *Corruptio* quoque & sphacelus ad solutionem cogunt, nam minantur inte-*partis.* ritum non partis tantum, sed totius, & eorum ratione scarificare oportet, & quandoque etiam inurere, & portiones carnis ossiumque abscindere, immò integram partem, aut magnam ejus portionem non raro præsecare, & congrua medicamenta apponere. Ingens putredo, & sordities, quæ sæpius accidunt propter ma- *Ingens pu-* gnam cacochymiam, & pravam aëris constitutionem, ac ejus in-*trede, &* quinamentum solutionem postulant, suffocationem quippe, & *sordities.* corruptionem naturalis caloris, & partis minantur; itaque manualis deterfio est necessaria, & quæ per fortiter abstergentia perficitur, & congruis etiam medicamentis inhibenda est putredo, propterea solvendum est vulnus, ut ei manus admoveantur, congruaque medicamenta applicentur, ac etiam ut pravis vaporibus, quos à putrida illa materia elevari est necesse, detur liber exitus. Ob id forsitan vulnera à Pareo relata quotidianam solutionem ex- postulabant, & si qua die prætermissa fuisset solutio, & medica- mentorum applicatio, oriebantur in ipsis vermes. Purulentæ ma- *Excremen-* teriæ suppressio, nisi supprimatur à suprapositis linteis, quia ni- *torum sup-* mis comprimant, quo in casu satis est deligationem laxiorem red- *pressio.* dere, compressionemque tollere, ac lintea forcipe usque ad vulnus incidere, una vel altera parte, dein exteriora suere, ut per incisionem fluere possit materia, seu potius erratum in paranda *Erratum in* subfluxione commissum, cujus causa materia non habet exitum: *paranda* ad idem nos cogit, ut idoneum effluxum paremus, & purulen- *subfluxione.* tam materiam suppressam evacuemus: & ideo, quando suspica- mur materiam retineri propter suffluxionis vitium, quia videli- cet prorsus non est nobis exploratum; convenientem effluxum nos præparasse cogimur ad solutionem, ut si quid delictum sit com-



*Subfluxio  
prætermis-  
sa, seu im-  
perfecta.*

*Inflamma-  
tio partis.*

*Retentum  
peregrinum  
corpus.*

*Abscessus.*

*Dolor ve-  
hemens.*

*Imbecillitas  
caloris Pru-  
ritus.*

missum, totum corrigatur. Immo quando à principio vulneris curam suscipimus, quandoque cogimur bis, & ter vulnus solvere, ac detegere, ut subfluxionem, quam primo, vel secundo apparatu non licet, moliamur. Rarum autem est, ut quarta solutio sit necessaria, & has solutiones bis in die facimus, ut quamprimum fieri possit, exitus materiæ præparetur, ne importunè postea nos ad solutionem cogat. Et quò paucioribus detectionibus id præstiterimus, eo minorem futuram perfrigerationem, & ita minus damni sequuturum non est dubitandum. Inflammatio partis, cui non licet nisi per vulneris osculum subvenire, quando pars ex præstantioribus fuerit, solutionem postulat. Retentum corpusculum, quod primis diebus extrahi non potuit, & sine manuali operatione, aut medicamentorum ope extrahi non potest, quoniam expectandum non est, ut unà cum pure à natura propellatur, ut, quæ necessaria sunt, agamus, solutionem requirit. Idem dicendum est de ossè à natura separato, non tamen extra pulso, ob idque pungente carnosas partes, vel osculum vulneris occludente. Abscessus superveniens, quando natura per se nequeat purulentam materiam expellere, eo quod non adsit patens ad exitum via, manuum admotionem poscit, & solutionem. Dolor vehemens ad idem cogit, ut anodyna apponantur. Evenit tamen, interdum magnum adesse dolorem, eo quia vulnus fuerit diutiùs injuriis ambientis expositum, qui tamen ope tegumenti brevi restinguitur. Tanta quoque caloris imbecillitas, ut ad expulsionem excrementorum sit impotens, detectionem suadet, ut aliter auferantur excrementa.

Sed fortasse quispiam absurdum judicabit, & minimè principiis nostris jam constitutis consentiens, indicari à caloris imbecillitate solutionem, cum inventum sit tegumentum, veluti superius dicebamus, ut eo robur accipiat naturalis calor, quandoquidem fovet, & auget ipsum; aut ergo falsum est quòd ope tegumenti roboretur calor naturalis; aut si hoc est verum, quò imbecillior fuerit calor, eò magis tegumento erit utendum; atque ita ob caloris imbecillitatem non erit ad solutionem deveniendum.

At si rectè perpendantur, quæ superius dicta sunt, nulla suberit difficultas, nec illa invicem pugnare comperientur; Diximus enim



enim imbecillitatem illam quæ proportionem responderet vulnere, seu quæ secundum rationem vulneris accedit, tegumento tolli; at si alia accidentalis imbecillitas effatu digna accedat, hæc solutionem exposcit, non quidem qua imbecillitas est, hac enim ratione melius tegumento curatur, sed qua excrementorum ferax, eorum enim magnam copiam generat, & ad eorum propulsationem est impotens; quare tegumentum talis imbecillitatis non est sufficiens remedium. Hoc aperte conspiciamus in valde imbecilibus, & cacochymis, atque iis, qui diu pravo vivendi modo sunt usi; in quibus languens calor, si vulnus accidat, requirit ut excrementa, quibus opprimeretur, detergantur, & aliquid apponatur, quod quietatem ejus vegetam reddat.

Erosio, & ingens pruritus, qui à molli vulnerati natura perferri nequeat, ad detectionem cogit, vel saltem ad solutionem, & detractionem linteorum pure madentium, & circumsitaram partium absterfionem. Namque illi sæpè licet consulere, etiam si ipsum vulneris osculum non detegatur. Si tamen magna esset tegumenti necessitas, & vulneratus posset molestiam ex pruritu contingentem perpeti, spernendus esset pruritus, quia revera ex pruritu nihil gravis consuevit accidere. Cumque pruritui aliquid concedimus, id potius in ægrotantis gratiam facimus. Pruritus conditionem subit fœtor ex multitudine purulentæ materiæ extra vulnus pulsæ, ac retentæ, & conclusæ proveniens, non solum enim molestus est vulnerato fœtor, verum etiam interdum vermes generantur, qui subjectam carnem depascunt: In manibus tamen oculati Medici rarò colligetur sub linteis ea purulentæ materiæ copia, sed extra paulatim profluet. Ossâ fracta, quæ probè non sunt coaptata, solutionem volunt, ut rectè componantur. Quo-  
*fœtor.*  
*Ossâ à sede sua emota.*  
circa si qua oboriatur suspicio, ne sint pravè composita, solvendus est vulneratus, aliter actio membri periclitatur. Hac pariter de causa, & Hip. lib. de frac. sec. 1. tex. 43. in fracturis ossium solvendum esse statuit. Hæc, & hujusmodi vulneribus accidentia solutionem requirunt.

Ex quibus patet, quando vulnus solvimus, ac detegimus, hoc esse propter alicujus affectus complicationem: totiesque sol-  
*Tempus pri-  
mæ solutio-  
nis in cas-  
vis.*  
verè vulnus oportebit, quoties aliquid ex prædictis urgebit. Pa-  
*tet.*



ret insuper tempus primæ solutionis in vulneribus cavis, quibus nihil ex supradictis accidit, esse, quando vulnus carne repletum est, & cicatrice obduci postulat, si conjectemur humectam esse carnem, cui obducenda est cicatrix, ut ob id epulotico medicamento indigeat. Hoc dico, quoniam observatur non raro, cava vulnera prima medicamenti impositione carne repleri, atque etiam cicatrice obduci, cum scilicet sunt hujusmodi, vel ob vulneris qualitatem, vel ægrotantis naturam, ut pauca excrementa in ipsis generentur. Quia tamen transacto inflammationis periculo, non est tanta tegumenti necessitas, si quis vellet eo tempore in ægrotantis, vel assistentium gratiam, vel quoniam non esset in hoc curandi modo admodum versatus, semel, aut bis vulnus solvere, ac abstergere, novumque tegumentum apponere (ad hoc potissimum inducimur propter pruritus, & fœtorem in vulneribus, quæ tardiùs carne replentur, veluti sunt ea, quæ complicata sunt cum ossis fractura, & os est abscessurum) nihil inde mali timerem, præsertim si dum vulnus tractat, diligenter ab injuriis ambientis ipsum protegeret. Hoc solutionis tempus timidis magis placebit, illud cordati magis deligent. At si vulnus fuerit simplex, modò nihil mali accesserit, non est auferendum tegumentum ante perfectam agglutinationem.

## CAPUT XXXIX.

*Quomodo cognoscamus vulneris statum, dum linteis tegitur.*

**N**ON deerunt fortasse, qui repugnantia, & quæ obtineri nequeant, præcipere nos suspicentur: Siquidem solutionis necessitatem ex iis, quæ vulneribus accidunt, & ex certo quodam vulneris statu, oriri statuimus, sed altera ex parte volumus, ut vulnus linteis coopertum asservetur. Hæc profectò videntur implicare. Quomodo vulneris statum cognovero, si sub conspectum meum non cadit? Et si vulneris statum non agnoscam, quomodo solutionis necessitatem perspectam habuero? Divinare igitur oportebit, quando vulnere aliquid adnectitur, quod solutionem postulet. In cavis pariter vulneribus primæ solutionis tempus ut plurimum esse



esse diximus, quando vulnus carne repletum est, at si vulnus inspicere non datur, quomodo exploratum nobis erit, quando jam carne repletum est.

Hæc tanti sunt momenti apud aliquos, ut vanum omninò, & absurdum censeant, alium invehere curandi modum ab eo, quo vulnera qualibet die non semel tantum, sed & bis solvuntur, ac tractantur, utpotè quo solo exactè vulneris status innotescat, dum qualitas, quantitasque excrementorum, vulneris color, & hujusmodi oculis conspiciuntur. Quibus tamen persuasum est, in latentibus sedibus contingentes affectus à perito Medico intellectus oculis deprehendi, & cum ratione curari, non ita difficilè indicabunt vulneris recti statum cognoscere: nam quæ mala superveniunt, aut symptomata sunt, quæ per se manifesta esse nemo ignorat, aut sine symptomatis non accidunt, à quibus produntur. Dolor, pruritus, erosio, & fœtor latere non possunt, neque sanguinis fluxus.

Abscessus ex præcedenti inflammatione, quam tumor, dolor, calor, & febris patefacit, cognoscitur, quando non fuerit resoluta inflammatio, sed suppurata: suppurare verò inflammationem significant perseverans tumor cum dolore, ac pulsus: dein pure confecto solent copiosa excrementa è vulnere profluere, febrisque remittit, quæ sæpè horrida est, dum pus conficitur; sed & inflammationem quæ suppuravit tactu dignoscimus lintea forcipe incidentes ea in parte, in qua magis viguit inflammatio, non solum enim partem inspicere dabitur, verum etiam tangere, & inundantem materiam tactu percipere. Semper autem tumore in parte perseverante, & majore puris copia prodeunte, quam natura vulneris requirat, ac febre præter naturam vulneris persistente, suppuratam inflammationem suspicari oportet.

Puris suppressionem ex gravitate, dolore, tensione, ac febre colligimus, & sæpè ob id pars inflammatur, nec iusta puris quantitas extra vulnus propellitur. Ad hujus quoque, sicuti & ad inflammationis cognitionem faciunt symptomata propria partis, in qua pus retinetur, vel ei consentientis, veluti in detectione membranæ cerebrum ambientis, ac in ejusdem, & cerebri vulneribus delirium, & in nervosarum partium vulneribus dolor, & convulsio.



fio. Neque parum conducet recolere, qualemnam effluxum paraverimus, conditionemque partis excutere.

*Signa putredinis, & corruptionis.*

Innotescit putredo, atque corruptio ex natura corporis, & partis affectæ, cœli statu, præcedenti victus ratione, vulneris qualitate, substantia, quantitate, colore, ac fœtore eorum excrementorum, quæ extra vulnus effluunt, non enim pus bonum conspicitur, sed virulentia, & mala fors puris, & omninò fœtet pars vulnerata, & febris malè habet vulneratum, Gangræna, & sphacelus ex deficiente partis sensu fit conspicuus. Et si, cum prius ingens adesset dolor, postea derepente sine manifesta causa obscuratur, de hujusmodi malis affectibus suspicari oportet, potissimum si accesserint alia, quæ sequi eosdem consuevere, ut si à vulnere qua virulentia pravi caloris, atque fœtens loco boni puris emanet, & pars vulnerata fœteat, & febris malè morata, cujus nulla est manifesta causa, sollicitè. Sæpè etiam cordis morsus, & animi deliquia, singultus, delirique accidunt ob pravyos halitus ab affecta parte elevatos. Ut plurimum tamen vehementes inflammationes sequuntur hi affectus propter naturalis caloris suffocationem: unde si inflammatio vehemens acciderit, & aliquod ex prædictis signis apparuerit, vereri oportet, ne partis internecionem inflammatio attulerit. Aliquando & absque inflammatione contingunt propter naturalis caloris penuriam, & imbecillitatem, ut fieri solet in corporibus valdè cacochymis, & qui diutiùs prava victus ratione usi fuere, in his enim facilè extinguitur, & à pravis succis suffocatur calor, & ideò tunc ad alia signa confugere oportebit. Ferè autem in his à principio fiunt, in aliis potius in progressu. Cæterum, quando aliquid tale suspicamur, semper considerandus nobis est adjacentium partium color, & incidenda in aliqua parte lintea ferè usque ad vulnus, ut meliùs animadvertatur color.

*Signa mollioris, & laxæ carnis.*

*Signa ossis, quod abscesserit.*

Carnem, qua vulnus repletum est, humidam, ac laxam esse ex magnitudine vulneris, natura, & statu corporis, & ex copia excrementorum arguere licebit. Retentum peregrinum corpus extrinsecus adveniens intra vulnus contineri à principio est cognitum. Os verò, quod abscesserit ex punctione suborta, ex tempore abscessus ossis, de quo suo loco, & quod primò etiam confi-



considerandum est, ex qualitate fracturæ ipsius ossis, sit manifestum, & quando valdè laborat nativus calor, aut malum pus apparet, aut pauca, & tenuis quædam sanies, & virulentia. Natura quoque vulnerati, & vulneratæ partis, nec non & vulneris qualitas, erit inspicienda. Denique nihil mali unquam vulnere superveniet, quod peritum, & oculatum Medicum lateat. Et si anceps fueris, quia nondum artem hanc probè sis assequutus, vulnus detege, unica enim detectione cautus existens, parum oberis.

Quando autem à vulnere bonum pus emanat, & pro ratione vulneris, nullusque, aut parvus adest dolor, gravitas, ac tensio nulla aut pauca, & proximæ partes molles sunt, & boni coloris, neque vulneratus febricitat, saltem febre, quæ animadversionem requirat, quis non intelliget, rectè se habere, quæ ad vulnus attinent? Non est igitur tam arduum vulneris tecti statum assequi. Qui etiam opera naturæ observare consuevit, haud multo negotio quando vulnus carne repletum est, percipiet. Ego quidem longa experientia didici, quando nihil mali vulnere superveniat, mediocria vulnera septem circiter dierum spatio carne repleri, leviora unius diei spatio, aut bidui indigere: majora, quæ tamen carnosam tantum partem attigerint, & contusa non sint, intra decimam quartam repleri; quæ contusionem habent adnexam intra vigesimam, ad quod tempus etiam pervenient maxima vulnera carnosarum partium citra contusionem. Quibus accessit ossis læsio, nisi ossis abscessus sit expectandus, circa vigesimam quartam repleri consueverunt. Quando tamen tota ossis substantia perfracta est, pro magnitudine, qualitateve ossis, modo ad trigessimam, modo ad trigessimam quintam, & quadragessimam protrahetur repletio. At si ossis abscessus sit futurus, repletionis tempus ex ossis recessus tempore conjectare oportebit, non ignorantes, vulnus nunquam perfectè carne repleri, nisi os, quod periit, recedat. De tempore verò recessus alibi pertractabitur.

*Signa boni  
status vul-  
neris.*

*Quando  
censendum  
est vulnus  
esse carne  
repletum.*

Illud insuper animadvertendum est, multum differre tempus à tempore, ætatem ab ætate, naturam à natura, & læsionem à læsione. In pueris, & temperatis longè citiùs vulnera replen-

*Alia consi-  
deranda.*



tur carne: vidi contusum vulnus in capite pueri cum ossis intro-  
 cessione, ut comprimeret, & pungeret duram meningem, de-  
 cem, & octo dierum spatio perfectè sanatum. Os, quod à telo  
 initium separationis accepit, citiùs recedit, & quo magis à sano  
 osse est separatum eo etiam citius. Vulnus pariter, quod melio-  
 rem habet subfluxionem, citius repletur. Hæc fusiùs in præsa-  
 giis fuere pertractata. Sed neque multùm refert, si quandoque  
 vulnus detexeris nondum prorsus repletum carne; satis erit, si  
 ferè sit repletum; ne existimes, me solutionis terminum in indi-  
 visibili, & puncto statuere. Immò & si non statim, ac reple-  
 tum est, solvas, verum ulteriùs dissolutionem differas, non erit  
 error consideratione dignus. Neminem latet, ultimum instans,  
 quo vulnus carne repletum est, comprehendi non posse.

## CAPUT XL.

*Colligitur præstantia novi modi, cumque communi præponendum  
 esse, ostenditur.*

**E**X his, quæ hætenus tractata sunt, liquido constat, quid  
 nova hæc methodus, quæ tegumentum probat, à commu-  
 ni, quæ crebram vult solutionem, differat, & huic multis nume-  
 ris illam esse præferendam. Hoc tamen summatim colligamus.  
 Constitutum est, quod vulnera curat, naturam esse, non Medi-  
 cum, aut medicamenta; namque si pus movere oporteat, hoc  
 à natura perficitur, si caro sit generanda, & callo ossa fracta fir-  
 manda, hæc ejus sunt opera, si agglutinandum, id ea præstat,  
 si excrementa expellenda, hoc est ejus munus, & propterea me-  
 thodus curandorum vulnerum, quemadmodum superiùs diceba-  
 mus, huc spectare debet, ut natura probè munia sua exerceat,  
 & ita cum Medicus sit tantummodò minister illius, erunt partes,  
 ut naturæ languetis robur adaugeat, & quæ ipsam offendere, aut  
 impedire possunt, avertat, ac removeat. Quare in hoc sita est  
 artis perfectio, ut optimè, seu quàm melius fieri possit, egenti  
 naturæ succurratur, & qui curandi modus fœliciùs hoc præstat,  
 proculdubio potior est judicandus. Videamus itaque, an modo  
 nostro,

*In quo con-  
 sistat per-  
 fectio artis  
 curativæ  
 vulnerum.*



nostro, an communi illo perfectiùs hoc assequamur, & utriusque præstantiam habebimus.

Illum medendi modum meliùs adjuvare naturam censendum est, qui ipsam robustiorem reddit, & à pluribus, quæ illi officere, & impedimento esse possunt, securiorem; at modus curandi, qui tegumento innititur, naturam robustiorem efficit, & à pluribus, quæ illi officere, & impedimento esse possunt, securiorem, quam is faciat, qui crebram solutionem requirit; igitur & naturam meliùs adjuvat, & perfectiùs illi succurrit, & ex consequenti perfectior est, & alteri præponendus. Minor ex antea traditis est manifesta; nam in communi modo quotidie solvuntur vulnera, deterguntur, eisdemque medicamenta linamentis, seu penicillis excepta imponuntur: unde necesse est, dum vulnus crebrò denudatur, & ambienti exponitur, calorem naturalem vulneratæ partis non leviter offendi, tum quia ob naturalis tegumenti defectum *Defectus communis modi.* ejus substantia dissipatur, tum etiam, quia propter ambientis qualitatem illius symmetria pervertitur, cum semper ambiens sit latentibus nostri corporis partibus, & naturali nostro calore frigidior. Quod igitur ad hanc partem, communi modo natura potius offenditur, quam roboretur: & hinc fiet, ut minùs prosperè, quod suum est, peragat, & copiosiora excrementa impedimento ipsi naturæ futura, generentur. Prætereà ex naturalis caloris offensione pars imbecillior facta, periculo etiam fluxionis est magis obnoxia. Ex solutione postea vulneris, tractatione, ac motu partis, nec non & ex deterfione, penicillorumque, aut linamentorum impositione, quæ insuper non rarò materiam supprimunt, & pressu quandoque, dum ad pus eliciendum partes circumpositas premunt, & nova deligatione, semper aliquis dolor, & interdum etiam vehementis infertur, non levis profectò est fluxionis occasio. Amplius quoties vulnus solvitur, ac detegitur, toties interturbatur, & à proprio munere distrahitur natura. Id genus incommoda à tali curandi ratione proveniunt; utilitates verò majoris momenti duæ sunt, una est recentis medicamenti, quod naturam modò ad pus movendum, modò ad generandam carnem adjuvet, quotidiana applicatio; altera est crebra vulneris ab omnibus excrementis absterfio. At modus noster, dum tegumento vulnus fovet, *Perfectio nostri modi.* caloris



caloris quoque naturalis dissolutionem prohibet, & ab actione ambientis partes, quæ nunquam antea ipsum fuerunt expertæ, defendit, unde est, ut ab hac curandi ratione non solum non offendatur naturalis calor, verum potius vegetior, ac robustior fiat, & ex consequenti ad propria munia magis potens, ut ad robustiorem reddendam ipsam naturam videatur inventus hic modus. Præterea ob robur nativi caloris pauciora excrementa generantur, & pars robustior effecta non ita promptè fluxiones admittit, & quia pars non tractatur, multæ præcaventur doloris, & fluxionis causæ; Neque enim crebra solutio, & religatio, motioque partis, deterfio, ac linamentorum turundarumque impositio dolorem promovent, quapropter, & hac curandi via fit natura securior à pluribus, quæ ipsam læderent, & in suis operibus interpellarent. Neque à crebra solutione interturbatur natura, aut à proprio munere distrahitur: Ut necessarium sit concludere novo hoc modo longè melius naturæ succurri. Nec illud obstat, quod vulnera quotidiana deterfione careant; jam enim ostensum est, non esse necessariam quotidianam illam abstersionem, quæ fit manuali operatione, seu per medicamenta detergentia verum ex accidenti tantum requiri, ob defectum videlicet caloris naturalis, & intemperiem vulneratæ partis. Quod etiam medicamenta quotidie non imponantur, negligendum est, alias enim vidimus naturam perficere, quod à medicamentis expectari solet, majusque damnum ex quotidiana medicamentorum impositione proficisci, quam utilitatem. Sed præterea neque omnino medicamentorum ope destituuntur vulnera nostro modo curata, satis tamen est rara ipsorum appositio.

*Præponenda  
est nova me-  
thodus.*

Communi ergo curandi via methodum nostram potiore esse, ac præstantiorem, non est dubitandum, & proinde primas mereri partes nemo ambiget, posteaquam longè melius egenti naturæ consulit, & impedimentorum habet rationem. Ut inferre liceat, virissimum esse, quod a Gal. 6. Meth. 2. dicebatur, videlicet methodum non solum meliora medicamenta, quam prius, verum etiam universum curationis modum invenire posse. Ad certiore tamen fidem testimonium addamus ab eventu desumptum, ut enim dicebat Hip. lib. de decenti ornatu: Quicquid artificiosè dictum est, non autem factum, methodi inartificialis

de-



demonstrativum existit, nam putare, & non facere, ignorantiae, & inartificialitatis signum est. Et Gal. 5. de san. tu. cap. XI. & alibi pluries fidem ejus, quod ratione inventum est, experientia comprobatur: qua de causa 6. Meth. 2. assererat, praecedere debere, quæ à vera methodo proficiscitur, remediorum inventionem, huic verò experientiam ad certiore[m] etiam fidem subscribere.

Si ergo ab effectu velimus utriusque modi præstantiam judicare, facile apparebit nostri modi super alterum excellentia: experientia siquidem ostendit, nostro hoc modo facilius, citiusque, ac totius, & minori cum laborantis incommodo vulnera curari, quam communi illo; Quando enim contusa capitis vulnera cum ossis introessione viginti dierum spatio modo illo communi sanabuntur, veluti nostro modo sanata sunt? Quando eodem temporis spatio, & minori, vulnus capitis cum membranarum sectione modo illo communi carne replebitur? id tamen præstat sæpe noster modus. Vulnus pila plumbea fulmine bellico explosa capiti inflictum, sic ut ad penitiores anteriores cerebri partes globulus pervenerit, nec inveniri, & educi potuerit, triginta diebus duabus, aut tribus solutionibus integrè sanatum est: num communis modus hoc possit, ejus fautores aperiant. Capitis vulnera sint vulnerum in aliis corporis partibus existentium norma, ut quæ magis negotii, quam reliqua curantibus afferant. Et quidem quanta facilitate, ac celeritate externarum partium vulnera hoc modo sanentur, dici nunquam posset.

Ad facilitatem verò, & celeritatem curationis non parum facit, quod sub hoc curationis modo communis respectum pauca admodum generantur excrementa, ut nec vigesima pars puris excernatur, quæ sub communi curatione observatur, unde natura leviora habet impedimenta, & quod non abscedit os, quod aliàs solet abscedere (experientia hoc assequeris) cum enim nonnisi longo temporis spatio os recedat, curatio evadat longa, necesse est, ubi sine ossis recessu sanitas advenire non potest. Et hæc res est maximi momenti si inspicias. Quod si omninò sanari non possit vulnus absque ossis abscessu, longè citius comperies os abscedere nostro hoc modo, quam communi, & sæpius in minori

*Ab effectu  
colligitur  
præstantia  
nostri modi.*



longè quantitate. Si faciliùs, ac citiùs curantur vulnera hoc modo, quod etiam tutius absque dubio inferendum est; cum enim natura sit, quæ vulnera sanat, ubi citiùs advenit sanitas, inditio est, adversus impedimenta prævalere magis naturam: at quò magis natura prævalet, eò tutiùs fieri curationem, nemo, arbitror, inficiabitur.

Sed illius securitatem nihil magis ostendit, quam observatio modi, quo sub ea curatione inducitur sanitas. Observabis vulnera, quæ aliàs negotia non parva Medico, ægro verò non leves molestias inferrent, nostro modo curata foeliciſſimè ad sanitatem pervenire, rarissimè verò symptoma effatu dignum, modò non erres, consequi videbis: nec pauca vulnera sanabis, quæ sub alia curatione hominem tollerent. Quid pulchrius excogitari potest, quam hominem cernere perfectè sanum, quo tempore, aliter instituta curatione, adhuc in discrimine versaretur ejus salus? Vulnera capitis vigesima quarta die sanata conspicias, quæ communi modo curata usque ad quadragesimam diem Medici animum sollicitant, & dubiam spem exhibent salutis. Tantùm abest postea, ut aliquid in commodum vulnerato afferat hæc curatio, ut potiùs eidem sit maximè grata, utpotè qui horret semper, dum accedit Medicus ad solutionem vulneris, importunamque illam deſersionem, & medicamentorum impositionem, & ab opere ipso non leviter discruciat. Liberatur ergo per hunc nostrum modum vulneratus, & ab animi angore, atque corporis molestia. Omitto, quod expensæ sunt multò leviores. Quare si optimæ curandi rationes, quemadmodum dicebat Gal. 14. Meth. 13. tripliciter judicantur, videlicet ex temporis curandi brevitate, tum ex maximè tutè curando, tum ex curando citra dolorem, qua ratione communiter dici solet, citò, tutò, & jucundè, cum hæc tria magis reperiantur in hoc nostro curandi modo, quam in communi, & ei præferendum esse, nemo ambiget. Et ratio igitur, & experientia nostro modo primas dant partes.

*Colligitur  
præstantia  
novi modi.*

*De vulneris  
expurgatio-  
ne.*

Verùm illud mihi videtur maximum præstantiæ argumentum, quod sub eo multo pauciora excrementa generantur, quam sub communi. Absurda namque est quorundam opinio de vulnerum expurgatione, nisi enim multam puris copiam observent, dicunt, vulnus



vulnus non esse expurgatum, & propterea in hoc improbant nostrum modum, quod non satis expurgentur vulnera, videntes, minorem longè puris copiam à vulneribus effluere, quam dum quotidie solvuntur: Absurda, inquam, & irrisione digna est hæc opinio, & qui sic sentiunt, declarant, se non intelligere, quid sit vulneris expurgatio. Tunc vulnus censendum est expurgatum, quando excernuntur excrementa, quæ necessario suboriuntur tum in alimenti transmutatione ob naturalis caloris imbecillitatem, tum ex residuo alimenti, sive sit bonus sanguis, sive pravis succis permixtus, quod assumi pro nutritione ob nimiam ejus quantitatem, vel malam qualitatem, aut ob caloris imbecillitatem non potuit. Et omninò quæ ratione vulneris ex iis, quæ præter naturam in parte continentur apta ad talium excrementorum generationem, proveniunt. Neque ut isti censent, totius excrementa debent per vulnus expurgari, quam ob causam opportunam vulneris repletionem turundis, ac linamentis violenter prohibentes, in longius tempus curationem protrahunt; dicunt enim prius expurgandum esse vulnus, quod non nisi longiori tempore fieri potest: quæ tamen expurgatio, si consideretur, est loculi, ut dicebat vir præstantissimus, non vulneris. Si nullum non movemus lapidem, ut à parte vulnerata avertatur fluxio, & salubris conservetur partis substantia, cur amandum erit, ut corpus totum per vulnus expurgetur? Erit ergo perfectionis signum paucorum excrementorum generatio, quoniam significat minùs inutilis materiæ ad partem vulneratam confluere, & quæ in ipsa reperitur, magis elaborari à naturali calore, & omninò longè majus esse robur naturalis caloris in parte, ob idque ad propria munia obeunda magis posse. Non minorem arguit excellentiam, os non abscedere, quod in aliter curatis vulneribus abscederet, vel in minori quantitate, ac citiùs, evidentissimum signum roboris naturalis caloris, & absolutæ curationis, ut quæ magnificè prodest, nullum detrimentum inferens.

Asseremus ne igitur, modum hunc novum esse omnibus numeris absolutum? Nequaquam, meo quidem judicio, nihil re-<sup>Quæ obijci-  
possunt no-  
stro modo.</sup>peritur in hoc nostro orbe, cui nihil desit. Eo minus autem id concederem, quòd cum sæpiùs mecummet, quid in ipso esset boni, quidve mali cogitarem, duos maximi momenti defectus animad-



animadverti, quos ut veritatis amator non possum, posteaquam sese occasio obtulit, silentio involvere: & adhuc libentius ipsos detegam, quod eosdem observarunt adversarii, sed modestiæ gratia, quæ ipsorum est humanitas, quid tale modo nostro noluerunt opponere. Et quia ambo hi defectus in maximum damnum curantis Medici vertuntur, propterea etiam magis sunt consideratione digni. Primus defectus est, quod nimis citò sanantur vulnera, quæ hoc modo curantur; alter est, quod nimis facilè, & parvo, ut apparet, Medici labore, vulneratique molestia. Quàm hæc obsint Medicis, non est, quod explicem. Longa curatio, & cum multo labore instituta multam pecuniam reponat. Si vulnus brevi sanatur, dies recipiendæ mercedis sunt pauci. Dum ita facilè sanitas inducitur, & absque Medici labore, vulneratique molestia, nihil magni videtur Medicus præstitisse, etiamsi sit ex gravissimis, & qui à principio gravissimum judicaverant, videntes curationis facilitatem, perperam se judicasse existimant; quare & hac ratione, & quod parum pro vulnerati salute laborare videtur, pauca mercede dignus habitus, paucam pecuniam recipit. Sic in nostro modo quæstus est longè minor, quam in communi, in quo curatio longiùs producit, & quotidiana solutione, ac deterfione, & novi medicamenti applicatione nulli labori pro vulnerati salute parcere videtur Medicus, & semper quid magnum præstare, etiamsi ex levioribus sit vulnus; eoque magis, cum sæpè difficilia, & angusta loca pertransire vulneratum oporteat, quibus de causis majori mercede dignus judicatur. Hujus rei oculatus sum testis, qui ex curatione gravissimorum vulnerum sæpè longè minus pecuniæ recepi, quàm alii, qui communem modum sequebantur, ex iis, quæ parvi erant momenti, nec alia ratione, nisi quia brevi sanabantur, & cum parvo, ut videbatur, labore meo, ac studio, parvaque ipsius vulnerati molestia. Idem ab aliis audiui. Quid in hac re dicam, ferè non habeo, hominum stupiditatem miror, qui ex multo labore, quem artifex ad opus perficiendum adhibet, ejusdem peritiam in rebus artis, meritaque metiuntur. Quia ergo Petrus multo labore, atque sudore aliquod opus confecit, habendus est Paulo peritior, ac dignior, qui sine ullo incommodo, nulla vi adhi-

*Ex labore  
artificis non  
est judican-  
da ipsius  
peritia.*



adhibita, sed mira facilitate idem opus complet? Mihi quidem videtur potius contrarium esse statuendum, dato enim eodem opere, si quispiam illud facilè, & absque labore perficiat, alter vero in eo absolvendo vehementer infudet priorem tanquam peritiorum alteri esse anteponendum, non video, quomodo quis possit in dubium revocare. Imperitiam labor compensat. Scientia est, quæ opus facilè reddit, ignorantia verò difficile: hinc videmus imperitos artifices sæpè in parvis magis laborare, quam peritos in maximis. Si ergo idem vulnus nos facile, & quasi negligendo curamus, quod alii difficillimè, multoque adhibito labore, studium nostrum profectò, atque ingenium magis, quam aliorum probandum erit, posteaquam id ea sola ratione potest contingere, quod rem vulnorum magis cognoscamus, quam alii. Hoc quidem plebem latebit, ac indoctos, verùm sapientes, & qui majus bonum ab eo, quod est minus bonum distinguere noverunt, nequaquam. Et ideò sapientiores semper audiivi modum nostrum miris laudibus extollentes. Et hoc Medico satis esse deberet, qui magis gloriæ, quam pecuniæ est cupidus. Illa est excelsa laus, quæ à viro laudato provenit.

Caterum non ea nunc sunt tempora, in quibus habeat Medicina, quæ recenset Hipp. lib. de decenti ornatu, nam omnia, dicebat, quæ ad sapientiam, insunt in Medicina, argenti contemptus, reverentia, verecundia, habitus submissus, auctoritas, judicium, quies, obviam itio, munditia, doctrina, cognitio ad vitam utilium, ac necessariarum purificationum, alienitas à mercimoniis, alienitas à superstitione, præeminentia divina. Habent enim quæcunque habent ad coercendam intemperantiam, inscitiam, avaritiam, concupiscentiam, rapinasque, ac impudentiam: non, inquam, modo ea sunt tempora: ad omnia cogit auri sacra fames. Non ad honorem, & existimationem comparandam, sed ad quæstum est Medicina: & à præceptis Medicinæ discedere quæstus gratia in medicina facienda non erubescunt. Et quid mirum, si & non pauci lenociniis, atque assentationibus, ut potentium gratia uti ad quæstum possint, sacram Medicinam fœdare, & sibi ipsis æternas infamiæ notas inurere nihili faciunt. Si ergo plerique propter avaritiam adeò congerendæ pecuniæ stu-

Ii

dent,



dent, ut propriæ existimationis obliviscantur, quam de nostro curandi modo opinionem concipere poterunt, qui minus lucrosus ab ipsis creditur, quàm is, cui jampridem sunt addicti? Uti-que paucis ipsum extollent laudibus. Quamvis si interiùs rem considerarent, non minùs lucrosus deprehenderent hunc modum, quam alium quemvis. Demus enim, quod ex una curatione pauciores coronati reportentur, quando tamen elegans Medicus excellentiam modi operibus egregiis notam fecerit, multa necessariò ad ejus existimationem fiet accessio, ejusque nomen fama circumferet: hinc accidet, ut ad plures ægrotos advocetur, neque ad vulneratos tantùm, verum & aliis morbis afflictos, posteaquam mos est ferè omnium, ut, quos in aliqua re peculiari excellere cognoscunt, in reliquis etiam, quæ ad rem illam quoquo pacto pertinent, tales judicant. Deindè non semper nobis est res cum gregariis militibus, & infimæ fortis hominibus, atque ignaris, sed non rarò cum iis, qui res intelligunt, aurumque ab auricalcho discernere noverunt, ac debitam mercedem liberaliter persolvunt.

Itaque hortor vos, ô tyrones, (illis enim, qui in aliis hæresibus consenuerunt, & nolunt quidpiam esse aliis notum, quod ipsi non cognoverint, ideoque diligunt potiùs malè sentire, & in erroribus, & usque ad ultimum diem persistere, quàm à veteri instituto ne latum unguem recedere, ne tempus conteram, non loquor) ut omne studium adhibeatis, quo vobis perspecta reddatur hæc curandi via, à levioribus, & facilioribus inchoando, atque ab his sensim ad graviora, & difficiliora progrediendo, donec opera naturæ probè teneatis. Ad hoc enim si perveneritis, dubio procul comperietis, vos usque ad id temporis in tenebris fuisse versatos, tuncque primum vobis patefactas esse curationis vulnerum januas. Nec minorem fructum experiemini, verùm multò majorem, quam ex quovis alio curandi modo. In quo unus deficiet, plures abundabunt. Sepulchriarii forsan erunt vobis infensi, ut qui sub tali modo non multum lucrentur. Probi non ægrè ferent, mali sunt spernendi. Prudentia denique omnia moderatur.

Nolim tamen oblivioni à vobis tradi, & contemni communem



nem modum; ne forsan existimetis dum illum extollo, hunc me damnare penitus; ejus enim cognitio perquam necessaria est & in nostro modo propter ea quæ vulneribus accidunt solutionem postulantia medicamentorum operam; cum enim in cura appellata sumus, ad communem modum confugimus, donec cedat qui accessit affectus solutionem postulans; In quo tamen modus quidam tenendus est, non enim semper bis in die vulnus solvere utile est, sed sæpius semel solvisse satis est; & multoties etiam si tertia quaque die solverimus, abundè sufficiet. Si quis hac ratione communi modo palmam dare vellet, quòd ipse cuilibet vulnere aptari potest, nec altero indigeat; cum noster sine communi consistere nequeat, hoc est, cum necessarium sit interdum ad crebram solutionem devenire, non refragarer; scio enim ab Arist. in Rhetor. illud melius dici, quo aliud indiget, cum ipsum eo non egeat; dummodo consideret longè sælicius sanari vulnera, quibus modus noster adhiberi potest. Cum autem non raro accidat vulnere quod ad crebriorem solutionem nos cogit, perfectum curatorem vulnerum eum appellabimus qui utrumque tenens modum curandi, utroque cum oportuerit uti noverit. Nisi velimus dicere unam tantum esse curatricem vulnerum methodum, quæ interdum raro solvit vulnus, quando videlicet non est complicatus affectus qui solutionem desideret; interdum crebrius ob complicatum affectum; sicut una est methodus universalis curatrix morborum, quæ interdum jubet ut primò tollamus causam, deindè morbum; & symptoma contemnamus; interdum verò præcipit ut primo occurramus morbo, vel symptomati, quia hæc urgeant, vel rationem habeant causæ sine qua non.

## CAPUT XLI.

*Ut reddatur manifestum, quid in hac re senserint Hipp. & Gal. adducuntur loca, ex quibus nonnulli colligunt, hoc modo utrumque vulnera curasse.*

**Q**ui olim Romæ hanc curandi viam invenere, ut eidem quoque in eo principio auctoritatem quandam compararent,



non seipfos auctores fecerunt, sed primum artis Medicæ parentem Hippocratem, qui nunquam aliter vulnera curaverit, & ab eo se talem modum didicisse palam profitebantur. Unde & Hip. modum appellabant. Ut vero huic invento major fides adhiberetur, multa collegerunt loca, ex quibus videtur elici posse, non aliam fuisse Hip. sententiam. Galenum quoque modum hunc novisse, atque comprobasse, nonnulli ex multis ejus locis ostendere conati sunt. Propterea expendere constitui, num re vera talis modus alicui ex antiquioribus fuerit cognitus, præcipuè verò Hip. & Gal. cujus ratione aliquot eorum loca examinare oportebit, quæ afferri ab iis audiui, qui primos inventores sectati sunt, & huic modo favere videntur, & alia insuper non pauca, ex quibus, & quænam fuerit ipsorum sententia, aut quomodo ipsi vulnera curaverint, non erit difficile percipere.

*Quod Hipp.  
fuerit cogni-  
tus hic mo-  
dus.*

Quod igitur voluerit Hip. ut tecta serventur vulnera in primis colligunt ex tex. 2. com. 3. lib. 3. de frac. ubi inquit Hip. ossium fracturam cum ulcere, modò ossa fracta non extent, neque talis sit fracturæ modus, ut timendum videatur, ne ab osse aliquod fragmentum separetur, simplici modo esse curandam, hæc ejus sunt verba: Quibus etiam ulcus quidem accesserit, (de fractis ossibus loquebatur) fracta tamen ossa extra non extant, neque talis est fracturæ modus, ut timendum videatur, ne ab osse aliquod fragmentum separetur, simplex his adhibendus est curandi modus. Ex hoc enim facile propositum deducunt, siquidem simplex modus is est, quem in principio lib. de frac. tradidit Hipp. conveniens videlicet fracturis sine ulcere existentibus, ut notat Gal. in com. 3. ejusdem lib. ad tex. 2. & ipse Hipp. explicat tex. 8. com. 3. At hoc modo pars fracta rarissimè solvitur, nisi quodpiam superveniens malum ad id cogat, jubet enim Hip. ut quarta tantum die ab ea, qua ossa fracta fuere composita, necnon & septima fiat solutio, ut videre est tex. 39. & 40. com. 1. & inde usque ad vigesimam non solvit partem, nisi quid supervenerit, quod solutionem postulet, ut patet eodem tex. 40. quocirca & ubi ulcus ad fracturam talem accesserit, quarta tantum die, ac septima, à qua fracta ossa fuere composita, viginti dierum spatium solvenda pars erit, nisi quid aliud molestiam afferat, & ita



& ita longo tempore ulcus coopertum permanebit.

Et quoniam solutio illa partis fit solummodo propter deligationem, hoc est, ut aptius pars deligetur, veluti manifestè colligitur ex ipso Hipp. eodem libro tex. 39. com. primi, nam verba faciens de solutione facienda quarta die ab ea, qua membrum distentum, ac directum fuit, dicebat: Et si primis illis diebus moderatè devinxisti, hæc tibi deligatio paulo priore magis erit adstringenda, & tex. 40. ejusdem com. in quo de ea solutione loquens, quæ fieri debet die 7. dicebat: Atque si hæc omnia rectè cesserint, mox dirigere, & appositè ad ferulas deligare opus erit. evidentissimum argumentum desumitur, quod ipse voluerit, ulcus tectum manere debere, non enim propter ulcus, sed propter fracturam solvit. Hoc idem confirmant ex tex. 5. com. 3. ubi eos reprehendit, qui in talibus fracturis cum ulcere ulcus sine vinculo relinquunt, ac refrigerari sinunt, dicebat enim? Item & alii sunt, qui statim ab initio ejusmodi fracturas linteis curare aggrediuntur, quibus linteis hinc, & inde deligant, ipsum autem ulcus sine vinculo relinquunt, ac refrigerari sinunt, deinde medicamentum aliquod, quod purgando sit ulceri, imponunt, atque id pannis vino madefactis, & succida lana curant; Prævus sanè est is modus rationique consentaneum est, eos, qui his, vel aliis etiam fracturis in hunc modum medentur, quam maximè à recta via aberrare. & ex tex. 8. in quo maximè damnat hanc perfrigerationem, cum enim mala enumerasset ex tali prava curatione provenientia, quæ tamen ipsi in aliud infortunium referunt, & quomodo eisdem succurrant, explicasset, subjungit: Cum minimè adduci possint, ut credant, deligationem, quæ hinc, atque illinc injicitur, atque ulcus ipsum nudum relictum (nudum non relinquebant semper, nam purgatorium medicamentum adhibebant, & ideò nudum relictum dicere Hippocratem asserunt, quia ipsum tectum non asservabant, sed quotidie ipsum detegabant, ut medicamentum apponerent, & sic refrigerabant, unde & altera lectio habet, non ulcus nudum relictum, sed ulceris perfrigerationem) istorum esse in causa, sed potius quodpiam aliud infortunium, & in sui excusationem, qui diffusè nimis hunc modum reprobaverit, cum in aliis brevitatè studere consueverit,



addit: Non equidem ita in iis scribendis multus fuisset, nisi planè scivissem, inutilem omnino esse hunc deligandi modum (quia ulcus non tegat, dicunt, cum supra ipsum non ducatur deligatio, ob idque perfrigerari, & recrudescere ulcus sinat) & multos præterea reperiri, qui illum in medendo sequantur, atque admodum opportunum esse, ut is dediscatur; ut tandem concludat oportere, in quibuscumque nulla ossium abscessio futura expectatur, eandem curationem institui, quæ illis adhiberetur, si sine ullo ulcere essent fracta ossa. Cujus quidem curationis commoda recenset Hip. tex. 10. his verbis: Et si prout ratio requirit omnia agantur, pars, quæ ad ulcus pertinet, semper gracilior reperietur: cæteræque omnes, quæ sub deligatione fuerint, graciliores erunt, atque ad suppurationem hæc aliis citius devenient, quæ alia via curantur: nec non & carunculæ quæcumque in ulcere denigratæ, aut emortuæ sunt, sub hoc curationis modo abrumpuntur citius, & decidunt, quam in aliis. Cicatricem quoque velocius hoc modo tractatum ulcus contrahit, quàm alio.

Et ne quispiam existimaret, aut objiceret curationem hanc iis tantum ulceribus convenire, quæ cum ossis fractura contingunt, adducunt tex. 13. ejusdem com. 3. in quo Hipp. ait: Eodem etiam modo curanda sunt ulcera, quæ ab initio, quando fractum fuit os, nulla erant, contracta vero fuere vel ex nimia linreorum adstrictione, vel ex inhærentia ferularum, vel ex quapiam alia occasione, unde subjungebat tex. 14. Sed si horum nihil adsit, ulcus verò irritatum, & nigrum valdè, vel impurum, carnesque suppurari reperiantur, ac nervi excisuri videantur, hos nudos nullo pacto relinquere oportet, neque hujusmodi suppurationes sunt pertimescendæ, sed curandæ in reliquis juxta, ac ubi ulcus à principio fracturæ contingit. & tex. 16. hanc curationem multo utiliorem asserit ea, qua purgatoria medicamenta ulceri admoventur, dicebat enim: Oportet autem, & id agnoscere, caro ne an nervus sit casurus, ita enim fiet, ut & minùs serpat, ac ut citiùs decidat: & erunt partes, quæ circumcirca sunt, longè graciliores, quàm si quis detractis linteis aliquod expurgans medicamentum supra ulcus imponat. At verò ubi citiùs



tiùs suppurans decidat, citiùs quoque caro gignetur, citiùsque cicatrix inducetur, quàm si illo, vel alio modo curetur.

Secundò idem colligunt ex 4. morb. pop. tex. 4. sic enim loquitur Hip. de quodam capitis vulnere: Circa Plejadum occasus Metrophonti filius caput percussus ab alio puero per testam, cum pervenisset ad duodecimam diem febricitavit. Occasio autem erat, quòd cum detergeret partes circa ulcus, perfricuit, & perfrigeratus est, & labia statim sunt elevata. Attenuata est autem cutis multis in locis ulterius ab ulcere. Quibus verbis videtur Hip. causam subsecutorum malorum referre in perfrigationem, dum in detergendis partibus circa ulcus, datus est ingressus ambienti aëri. Quare apparet, ipsum voluisse, ut tecta serventur, & eo magis, cum ex ipsius verbis eam solutionem, qua perfrigeratum fuisse tradit, fuisse primam colligatur, & tamen erat circa duodecimam diem, inquit enim: Cum detergeret partes circa ulcus, perfricuit, & perfrigeratus est, & statim labia sunt elevata; illud verbum, statim, indicat eam fuisse primam solutionem, symptomata namque secuta sunt in duodecima, & statim post deterfionem, & perfrigationem; signum ergo est, non fuisse priùs deferrum ulcus.

Tertiò in ejusdem comprobationem adducunt locum desumptum ex 4. de morb. inquit enim Hipp. tex. 22. Quin & ulcera, si curentur, maximè in his diebus, scilicet, imparibus, inflammantur, venit enim humor ad omnes venas, cum turbatur, easque replet, & ubi ad ulcus pervenit, siquidem non curetur, & pus exitum habeat, expellitur ab humore, qui in turbatione accedit, & ulcus foras expurgatur. Si verò curetur, pus exitum non habens, & isthic unà cum eo, qui accessit, permanens, dolorem inducit, & carnem circa ulcus attollit; his profectò verbis, si ulcera curentur, nihil aliud significare videtur Hip. quam vulneris deterfionem, quæ manuali fit opere, medicamentorumque applicationem, quam puris retentio, & inflammatio sequitur, eò quòd propter deterfionem ulcera perfrigerantur, & ex perfrigatione imbecillis factus calor nequit propria munia, ut antea, obire: illis verò, siquidem non curetur, tegumentum describere palàm est, dum enim non curantur vulnera, tecta manere notum est: quasi velit



velit dicere, si ulcera non curentur, sed tecta servantur, modò pus liberum exitum habeat, foras expellitur unà cum humore, qui accessit, hoc est, unà cum excremento, quod generatur ex superfluo succo, qui ad vulneratam partem defluxit, eò quòd ob tegumentum roboratur naturalis calor; constatque, non de propriè dictis ulceribus intelligendum esse Hip. sermonem, sed de vulneribus, quippè hæc sunt, quæ maximè inflammantur, & ex quibus turbamentum humorum accedit, quod repentina fiat immutatio.

Adducunt quartò casum Billi ab Hipp. narratum quinto pop. textu trigesimoquarto, & septimo pop. textu decimo octavo, his verbis: Billo percussio in dorsum spiritus multus per vulnus cum strepitu processit, & sanguis erumpebat: Ubi verò medicamentum cruentis vulneribus destinatum, adhibitum, ac deligatum esset, sanatus est. Videtur hic, me hercule fuisse unica medicamenti impositione sanitati restitutus.

Quintò afferunt locum ex secundo de morb. sumptum, ubi textu decimooctavo frontem sectam curandi gratia morbum quemdam capitis, imposito splenio cera, ac pice illito usque ad septimam non solvit, sic scribens: Cùm igitur sic habuerit, derafo capite, si non calefactoriis cesserit, frontem ea parte, qua capillus desinet, à capite findito, ubi verò secueris disparata, ac diducta cute, cum sanguis defluxerit, salem tenuissimum inspergito, & postquam effluxerit sanguis, fixuram componito, & duplici filo totam ipsam includito, deinde splenium cera, ac pice illitum ulceri imposito, & lana sordida super imposita deligato, & ad dies septem resolvito, si non dolor vexet: si verò dolor adsit, exsolvito. Quomodo etiam quotidianam illam solutionem non amaverit Hipp. ostendunt ex textu trigesimo tertio, commentarii tertii, libri de frac. quo in loco præcipit Hip. ne tertia, aut quarta die ulceribus manus admoveantur. Ita ut etiam specilli admotio his diebus ex ejus decreto sit cavenda, eo quod iis diebus vulnera soleant recrudescere. Unde maximè damnat, qui illis diebus vulneribus manus adhibent, dicens: Qui verò prima, aut altera die lana deligandum censent, de fracturis cum ulcere loquebatur, tertia verò, & quarta linteis deligantes adstringunt, at tunc maximè ex-



tendunt, hi in arte medica, atque in re magni momenti ingens peccatum committunt, nunquam enim vulnera tertia, vel quarta die sunt vexanda, ita ut in universum cavendum sit etiam ab admotione scalpelli, (alia lectio habet, specilli) his ipsis diebus, & ab omnibus præterea aliis, quibus vulnera irritantur; plerumque enim in tertia, & quarta die vulnera solent recrudesce. Ea nimirum, in quibus tum inflammationes, tum sordes excitantur, quæque febres afferunt. Hoc præceptum, si quodpiam aliud, plurimi faciendum est, nihil enim est adeo in Medicina opportunum, cui id non communicet, nec in ulceribus tantum, verum & in aliis morbis.

Tandem adducunt Hipp. libro de artic. textu vigesimo sexto, & vigesimo septimo commentarii quarti, quibus in locis Hippoc. ulceribus luxationi adjunctis adhibenda præcipit medicamenta plurium dierum, hoc est, quæ pluribus diebus perdurant, & quæ paucorum sunt dierum, hoc est, quæ paucis diebus resolvuntur, reprobat, neque alia ratione, nisi quia vult, ut pluribus diebus relinquantur, inquit enim textu vigesimosexto: His etiam conferunt aliqua ex illis medicamentis, quibus in cruentis vulneribus uti solemus, quæcumque videlicet ipsis idonea magis sunt: lanæque vino perfusæ imponendæ, ac multo tempore relinquendæ. Quæ autem ex medicamentis, quibus incruentis vulneribus uti consuevimus, sint magis idonea, textu vigesimoseptimo, explicat, dicens: Quæcumque verò ex medicamentis, quæ cruentis vulneribus adhibentur, paucorum dierum sunt, quæque resinam recipiunt, non ut illa sunt idonea, cum ulcerum purgatio his longiori tempore fiat, multo enim tempore madent. Unde Galenus in commentario textus vigesimisepti dicebat: Tam in his libris, quam in libro de ulceribus *ἐναιμα* medicamenta ea vocat, quæ statim recentibus vulneribus apponuntur. Ex his ergo ea maximè deligenda esse censet, quæ post longum tempus resolvuntur. Ac interim dum solvuntur, hoc est eo tempore, quod inter unam, & alteram impositionem, seu solutionem intercedit, perfundi possunt. Instituit enim, ut quemadmodum omnia in universa curatione eò spectare debent, ut vim leniendi habeant, ita & hoc, ut non sæpè deligetur, & sæpè solvatur ipse ægrotans. Ex his autem medica-



mentis ea ad longius tempus dissolvi possunt, quæ vim majorem exsiccandi habent. Id tamen cavendum est, ne ob vehementem eorum vim contrahant; & textu vigesimo septimo: Non est admodum difficile invenire, quænam ipse ex medicamentis, quæ cruentis vulneribus imponuntur, paucorum dierum appellet, si eorum memor es, quæ in explicatione præcedentis orationis dicta sunt, palàm enim est, quòd sic ipse vocaverit ea, quæ post paucos dies solvuntur. Quæ autem ex ipsis imbecilliora sunt, ea interjecto paucorum dierum intervallo solvenda sunt, cum enim non exsiccent, quantum satis sit, saniem copiosiore in ulceribus contrahi permittunt. Ex his igitur apparet, non solum modum hunc fuisse Hip. cognitum, verum etiam ipsum Hippocratem hac curandi via usum fuisse, posterisque eandem tradidisse.

*Quod Gal.  
cognoverit  
hunc mo-  
dum.*

Quòd verò Galenus modum hunc cognoverit, & probaverit, ac etiam tractaverit primò ex iis colligunt, quæ Galenus ait quinto Meth. septimo, de illo agresti juvene, cui Medicus juvenis arteriam pro vena, sanguinem ei missurus, divisit, cum enim medicamentum apposuisset, ad quartum solutionem distulit, & tunc denuo appposito medicamento jussit, ne solveretur, nisi multis post diebus, ejus hæc sunt verba: Cum enim Medicus, qui venam erat incisurus, brachium hominis deligasset, contigit attolli veluti in globum arteriam, itaque hanc pro vena Medicus divisit. Exigua sanè incisio erat, sanguis autem flavus, ac tenuis, & fervidus statim ejaculabatur, idque cum quodam veluti saltu. At Medicus quidem ut erat admodum juvenis, & operum artis parum peritus, venam se incidisse putabat. Ego verò cum quodam alio ex his, qui aderant Medicis, utique saniore, ubi quod accidit, animadverti, præparato ex emplastrorum genere, quod sanguinem suppressit, medicamento, tum incisionem curiosè conjunxi, tum super medicamentum illicò imposui, ac spongiam mollissimam extrinsecus super hoc deligavi: mirante verò, qui arteriam inciderat, insolitam nostram in hoc casu providentiam, indicavimus hominem factam. Sed posteaquam incisi hominis diversorium exiissemus, jussimusque ne vel solveret nobis absentibus, vel ante quartam diem id aggrederetur, sed ita, ut deligatum erat, haberet, spongiam dumtaxat desuper madefaciens. Postea verò quam in

quarto



quarto solventes planè conglutinatum incisuram invenimus, rursus idem medicamen imponere jussimus, tum simili modo deligare, nec multis postea diebus solvere. Atque ita procurata est hujus hominis incisa arteria, sola omnium, quas in cubito incisas vidi. Secundò idem ostendunt ex commentario textus vigesimisepti, & vigesimiseptimi, commentarii quarti, ad librum de artic. Cùm enim eo in loco approbet Galenus curationem Hippoc. in luxatione tibiæ cum ulcere, in qua curatione rarò pars solvitur, non solum videtur hunc curandi modum cognovisse, verùm etiam approbasse, inquit enim textu vigesimosexto: Tam in his libris, quam in libro de ulceribus *ἔραυμα* medicamenta ea vocat, quæ statim recentibus vulneribus apponuntur. Ex his ergo ea maximè eligenda esse censet, quæ post longum tempus resolvuntur (ecce tarda solutio) ac interim dum solvuntur perfundi possunt. Instituit enim, ut quemadmodum omnia in universa curatione eò spectare debent, ut vim leniendi habeant, ita & hoc, ut non sæpè deligetur, ac sæpè solvatur ipse ægrotans. In eandem sententiam multa scribit text. 27. Sed ejus verba superiùs retulimus.

Quòd etiam Gal. raram solutionem adamaverit, inferunt ex eo, quòd quarto, de compositione medicamentorum per genera, capit. quarto examinans medicamentum ab Asclepiade compositum ad Chironia, & curatu difficilia ulcera, laudat Asclepiadem, qui jusserit, ut tertio quoque die tantum fieret solutio, & eos reprehendit, qui sæpiùs qualibet die ulcus detergunt, inquit enim: Rectè, me hercules, ad finem superioris medicamenti scripti hæc verba adjecit; Et hæc triduo soluto, fomentisque mitigato, ipsumque emplastrum ablutum emollito, rursusque apponito, nisi enim diutius cuti pharmacum adhæserit, nihil efficiet: quod plerosque Medicos latuit arbitantes, si ter die saniem ab ulcere deterferint, meliùs se facturos iis, qui bis idem faciunt, qui verò semel solvunt, ab ipsis quoque ægris tanquam negligentes malè audiunt, & idem docet pluribus aliis in locis. Si ergo Galen. in ulceribus dysepuloticis raram solutionem laudat, in quibus virulentia, & malæ fortis sordes, eademque copiosæ generantur, & ob id maximè conveniret crebra deterfio, quantò magis raram solutionem credendum est, ab ipso probari in cruentis vulneribus in



quibus nec virulentia, nec sordes, quæ alicujus sint momenti, generantur? Argumentum insuper desumunt ex com. 3. in lib. de frac. tex. 43. ubi utilitates narrat, quas ex naturali tegumento ulceratæ partes experiuntur, qua de causa jubet, quando accidit ulcus cum fractura, ut cutis adducatur, quo subjectæ, denudatæque partes contegantur, veluti in textu monuerat Hip. dicens: Respicienda autem est, & ulceris figura, ne nimium hians, & varicarum, dum deligatur, fiat. Hæc sunt Gal. verba: Cavendum ergo esse ait, ne dum deligatur ulcus, labia expansa evadant, vult enim, ut illa adducantur mutuò, partibus videlicet cutis se in suam sedem recipientibus: inde enim fiet, si ita agatur, ut & minùs preman- tur, atque ut ulcus subjectum maximè in musculis contegatur. Idque sciendum est, omnes subjectas partes pelle sua maximè delectari; neque unquam partem aliquam subjectam citra noxam nudari posse: & quid mirum sit, si hæ partes, utpotè quæ naturale, & sibi familiare tegumentum ex cute habent, ea gaudeant, ab aliis verò omnibus malè, ac molestè habeant? Undè sæpè hoc observavi, quod cum non præcidissem cutis partes, sed potiùs ab aliis partibus, quod denudatum fuerat, adduxissem, immo, & quod mirabile visum est, aliquando statim ab ictu jam locus niger factus erat, tamen ea agglutinata statim est, sed his etiam non paucis; qui in senili ætate erant constituti, cutim detractam, & jam nigrescentem reducentes, eam adhærere, & agglutinari videmus. Quod si caro excoriata ita absque cute, nudaque relinquatur, præter id quòd ægrè cicatrix inducitur, morsionibus quoque, & sordibus obnoxia est. Nam medicamenta, quæ faciunt ad repellendam inflammationem, & sedandos dolores, quemadmodum illud est, quod *παρίγγον*, nec non & id, quod *τετραφάρμακον* appellatur, membrum quidem affectum ab inflammatione tuentur, verùm ulcus sordidum præstant, rursus verò quæ ulcera purgant, ob detergendi facultatem, qua prædita sunt, morsionis sensum incutiunt. Ab his autem incommodis libera est pars excoriata, si adducta cute contegatur. Huic etiam non dissimile est id, quod in pustulis facere consuevi, quæ ex variis occasionibus ortum habent, ac in tumorem attolluntur, interdumque insignem dolorem inurunt. Nostis autem me in hunc modum eas curare consuevisse, primùm

acuta



acuta acu illas aperio, ut humor exitum habeat, quem etiam leviter exprimo, ac cutem inhaerentem relinquo. Quod si eveniat, ut concluso foramine, rursus eadem repleatur, iterum pustula plena eodem modo aperitur, expressoque humore cutis reducitur, & servatur, quoad supposita illi caro ulcerata ad cicatricem deducatur.

Hæc à nobis relata sunt, quæ possunt esse evidentia argumenta indicantia expedire, ut omne ulcus cognata cute tegatur. Sicuti ergo arguunt, laudat Galenus ut omne ulcus cognata cute tegatur, tanquam naturali, & sibi familiari tegumento, profectò necesse est, ut etiam laudet artificiale tegumentum, quando cute regi non possunt denudatæ partes, ut contingit, quando vulnus est cavum, quoniam easdem ferè utilitates præstat factitium quas naturale tegumentum; etenim sicuti naturale tegumentum suo naturali calore subjectarum partium calorem fovet, & conservat, & eas ab injuriis ambientis defendit, ita etiam artificiosum tegumentum suo calore fovet subjectarum partium calorem, & easdem ab injuriis ambientis tutatur. Quare concludunt non fuisse Galeno incognitum modum hunc curandi.

## CAPUT XLII.

*Ostenditur hac via non fuisse curata vulnera ab Hipp. & Gal. & interpretantur loca, ex quibus contrarium colligebatur.*

**Q**UAMVIS hæc aliquam probabilitatis speciem habere videantur, horum tamen opinionem probare nunquam potui, considerans enim accuratè quæ ab Hipp. & Gal. dicuntur, dum res vulnerum tractant, cognovi certissima argumenta posse colligi ad comprobandum, quod utrique placuerit crebra solutio, & quod hoc modo, nequaquam autem novo jam descripto usi fuerint.

Et quod ad Hipp. attinet, in primis percurramus librum de ulceribus, & comperiemus ipsum uti medicamentis ad ea omnia peragenda, quæ pro sanandis vulneribus requiruntur, modò videlicet suppurantibus, modò detergentibus, modò sarcoticis, modò cicatricem inducentibus, & pro vario vulneris statu hu-

*Hippocrati  
non fuit no-  
tus hic mo-  
dus.*



jusmodi medicamenta applicat, quocirca saltem postquam suppuratum est vulnus solvet ipsum, ut deterforium apponat, & post absterfionem solvet, ut medicamentum sarcoticum adhibeat, & tandem ut cicatricem inducat, iterum solvet vulnus. Sed neque unica medicamenti impositione cujusvis fortis potest esse contentus, posteaquam plura scribit medicamenta, quorum vis citò exolvitur, unde cum virtuti medicamentorum totum tribuat, necesse est, ut sæpè vulnus resolvat, quo etiam sæpe immutet medicamentum, sic enim habet ad verbum tex. septimo: Cataplasmata tumorum, & inflammationis in circum sitis ulceris partibus sunt verbascum coctum, & trifolii folia cruda, & ligustri folia cruda, & polium. Si verò etiam purgari opus habuerit ulcus, omnia quidem etiam hæc purgant, sed & fici, & oleæ folia, & marrubium: coquere autem oportet hæc omnia, & maximè viticem, & fici, & oleæ folia, & mali punici folia similiter coquere oportet. Crudis verò his utendum est, maluæ folia terito cum vino, & rutæ folia, & origani viridis omnibus his lini semen torrefactum, & tusum quam levissimè admiscere oportet. Quis non videt, quàm brevi medicamenta hæc applicata exsiccentur, & proprias vires amittant, ut neque in eorum numero haberi possint, quæ paucorum dierum ab Hip. libro de artic. appellantur? Idem est de aliis, quæ ad conglutinandum adhibet, inquit enim tex. octavo: Et ubi committere, atque coalescere ulcus voles, rubi canini folia velut lentem præparato. Nasturcium item sauridion appellatum à lacerti similitudine, vinum, & lini semen tenuiter tritum commiscentur. Nec diuturniora comperies tria suppurantia textu nono, his verbis descripta; Aliud, fannas succidas paucissima aqua tingito, deinde vini tertiam partem aliquam misceto, ac coquito, donec bona provenerit crassitudo. Ex his recentia vulnera quam citissime suppurari possunt. Aliud, aron siccum inspergito, ac adaptato. Aliud, fici corticem viridem cum succo ex vino tritum immittito. plurima alia hujusmodi in eo libello reperies. Eo magis autem asserendum est, Hip. crebro vulnera detexisse, quod etiam arida inspergi posse tradit: Et si sicco, inquit tex. undecimo, carico uti voles, liquida removere oportet, & pharmacum inspergere, & in eo libro plura  
ficca



ficca inspergenda proponuntur, quid autem prodesse sicca hæc medicamenta semel, aut bis insperfa? Sed & ipsum voluisse crebram solutionem apertissimè cognosces ex iis, quæ ait tex. vigesimo secundo, inquit enim: Sicca ad vulnera hæc faciunt, veratrum nigrum tenuissimè tritum inspergetur, quamdiu aliquid humoris inerit, ac depascentis; deligatio vero eadem, est quæ in emplastris. Aliud, salis grana siccissima in æneam ollam, aut fictilem novam immittito, magnitudine maximè æqualia, non magna, & mel optimum dupla salis mensura pro conjectura facta ad salem affundito, deinde ollam prunis imponito, & dum totum combustum fuerit, finito. Postea exterso, & expurgato per spongiam ulcere inspergito, & velut prius deligato, & paulo magis comprimito. Postridiè vero qua parte non adhæserit, pharmacum inspergito, comprimito, & deligato. Ubi verò pharmacum discedere voles, acetum calidum affundito, donec discedat, & rursus eadem facito, si opus fuerit extersione per spongiam facta. Hic expressam vides quotidianam solutionem non in ulceribus propriè dictis, sed in cruentis vulneribus. Idem colligēs eodem libro textu quarto, ubi inquit: At ubi deligare voles, pharmaca non prius imponere oportet, quàm ubi siccum valdè feceris ulcus. Tunc vero apponere oportet, ulcus autem sæpe spongia detergere, & rursus linteum siccum, ac purum sæpe adhibere, atque sic imposito medicamento, quod conferre videtur, deligare, aut non deligare. dum enim ait, ulcus sæpe spongia detergere, & rursus linteum sæpè adhibere, necessitatem crebræ solutionis explicare videtur. Libro etiam de vulneribus capitis eandem insinuat curandi rationem, hæc enim habet textu decimo nono: Si vero os quidem carne fuerit denudatum, sub cava vero fuerint ulcera in obliquum, cavitatem quam plurimam resiccare oportet, ubi non facilè est medicamento quocumque pervenire. Quibus patet, ipsum non tegumento, sed medicamentis curam facere, quæ prætereà intra vulnus immittit. unde & propter excrementorum permixtionem, & quia una cum ipsis à natura extra propelluntur, tanquam extranea, brevi tempore vulnus eorum virtute destituitur, & ex consequenti necesse erit crebro vulnus detegere, ac adhibere medicamenta: textu quoque



que vigesimo septimo, colorem vulneris, & ossis observat, inquit enim: Et postquam hoc factum fuerit, ulcus colorem amittit, & ex ipso sanies pauca effluit, & quod inflammatum est ex ipso, emoritur, & viscosum fit, & apparet veluti falsamentum, colore fulvum, subfluidum: & os tunc corrumpi incipit, & fit valdè nigrum, postremo pallidum, aut valdè album evadens. Non posset profecto Hipp. hæc ita observare, nisi crebro vulnera solveret. Item textu vigesimo tertio, ex mollitie, ac humiditate carnis instituit prælagium, dicens: Malum est etiam humidam esse carnem in ulcere, & putrescentem, & ad multum tempus purgari, quæ non cognoscuntur nisi in detectione vulneris. Igitur crebrò solvere, ac detergere dicendum est. Insuper libro de fract. & libro de offic. Med. vult, ut lintea sint munda, at, quæ vulneribus apponuntur, citò fluentibus excrementis conspurcantur. Crebrò igitur ab ipso immutantur. Jubet pariter libro de fract. textu vigesimo commentarii tertii, ut crebrò pars solvatur, si fractura fuerit cum ulcere, & tenuium ossium abscessio expectetur: Cum ergo tenuiorum ossium, dicebat, abscessio expectatur, nulla insigni mutatione opus est, nisi quod fascia laxior injicienda, ne pus retineatur, sed facilem exitum habeat; sæpiusque, quo ad os recedat, solvendum, ac deligandum est. Et superiùs textu videlicet 19. dixerat: Sæpiùs ergo propter redundantem humorem religare oportet; alioquin enim & febres concitantur. Quòd si crebram vult solutionem, quando adest ulcus cum fractura, cum tamen fractura desideret, ut pars deligata serveretur, tanto magis solutionem crebram expetet, quando adest ulcus sine fractura. Sed nolo orationem longius protrahere, ex allatis enim satis evidenter apparet, mentem Hipp. fuisse, ut vulnera crebrò solverentur.

*Neque Gal.  
cognitus fuit  
hic modus.*

Ad Galenum deveniam, quem ejusdem fuisse sententiæ non dubito: cum enim 3. Meth. 3. asserat, nullum esse tempus, in quo illa duo excrementa, tenue videlicet, & crassum in vulneribus non generentur, & propterea etiam nullum esse tempus; in quo medicamenta siccantia, & abstergentia non sint necessaria, non possumus non admittere, eam fuisse Gal. mentem, posteaquam, ut aliàs dictum est, non possunt medicamenta vulneribus appli-



applicata diutius vires suas retinere, unde, qui medicamentis curam faciunt, necesse est, ut ea sæpè immutent. Præterea 3. Meth. 3. jubet, ut observetur effectus siccantis medicamenti, quod vulneri applicavimus, ut cognoscamus, num satis siccaverit, an minus, & sic medicamenta convenientem siccitatis gradum habentia deligere valeamus. Hinc dicebat: Esto namque notum sit hoc, vel illud pharmacum ad cavum ulcus implendum facultatem habere in iis, qui, ut nos loquimur, humidiores sunt temperamento, ut autem observator, & Empyricus, iis, qui molli sunt carne, ac mulieribus, & pueris, deinde nunc tali admotum nihil profit: nos igitur cujus causa nihil profuit, investigabimus, atque hanc in duo æstimanda reducemus; nam aut parcius siccavit medicamentum, aut nimium, horumque notas habebimus sordem, & saniem, nam si plusculum sordis, totumque ulcus humidius, intra modum siccavit: sin purum, & absque humore cernitur, ultra. Statim igitur mensuram quoque excessus, & defectus ex ipso notatum modo intelligemus; &c. nemini dubium est, observationem hanc crebram vulneris detectionem requirere: sicuti & observare effectum detregentis medicamenti, ut cognoscamus, num validius sit, an imbecillius, quod applicavimus, medicamentum, quod proposuit 3. Meth. 6. his verbis: Etenim si quàm maximè sordidum ex utroque medicamento, valido scilicet, & imbecillo ulcus deprehenditur, at certè cavitas major ex valenti, & quod colliquat medicamento efficitur. Quin etiam labiis præaltis, rubrumque, ac phlegmone quodammodo affectum ulcus cernitur. Aliquando verò rosionem quoque manifestam ex hujusmodi medicamento æger sentit. Quod verò minus, quàm par est, siccet, non quidem mordet, nec quicquam efficit eorum, quæ retuli. Idem confirmari potest ex eo, quod velit, ut omnem vulneris partem tangat medicamentum, tractans enim tertio Meth. quarto de præparatione sarcotici dicebat. Siquidem cavo ulceri, quicquid volumus, statim applicamus, sive siccum id, sive humidum medicamentum sit, licet enim omni parti ulceris ea tum inspergere, tum illinire: At in vulneribus quorum major est profunditas, id non licet: quippè ubi semel labia junxeris, contingere, quæ in imo sunt divisa, non possis. Considerandum est igitur non modò an siccans, abstergensque modicè



medicamentum sit, verum etiam an pervenire ad imum valeat. nam & cerussa, & lithargyrus siccant, adstringuntque modicè, sed si ea cineris ritu circa vulnus inspergas, nihil proficies, neque enim ad fundum pervenit medicamenti vis, quod ita sit siccum; humiditatem igitur quandam desiderat, quo simile emplastici sit, vel etiam humidioris cujuscumque medicaminis. Si ab intromissis medicamenti aliquid fructus exoptat, necesse est, ut ea sæpè immutet, nam brevi quæ immittuntur, partim expelluntur, partim ob excrementorum miscellam corrumpuntur. Sexto, etiam Meth. secundo, crebræ solutionis non obscurè meminit agens de nervi punctura ab alio Medico perperam curata, sic enim habet: Ipse verò oleum fabinum utique subantiquum modicè calefaciens fovi vulneratam partem, resectoque leviter puncturæ, quod connivebat, foramine, imposui medicamen, injunxique homini inediam. Medico verò præcepi, ut vesperi rursus eum solveret, ac simili modo, quo me viderat, oleo uteretur. Similiter & lib. de fract. com. tertio. tex. vigesimotertio, dicebat enim agens de fractura cum vulnere: Quando abscessio alicujus fragmenti grandioris expectatur, præcipuam in hac curatione vim primis diebus habet perfusio, quando videlicet expedit ab ulceris partibus quidquid humoris supervacui in eis jam receptum est, elidere, quodque ex superioribus partibus eò defluit, reprimere. A tertio autem die ceratum picatum administratur, utpote quod ea concoquere valeat, quæ in ulcere sunt. Eandem curandi rationem insinuat libro de fract. tex. decimoquarto, com. tertii, his verbis: Verum, dum ait, nudos nullo modo relinquere oportet, insinuat mediam quandam medendi diligentiam, quæ sanè erit, si apparente quopiam ex prædictis signis jubeat deligationem ad fracturas appositam statim solvi, uno autem, atque altero die ulceris curam habeat. Quam enim aliam curam habere poterit Medicus ipsius ulceris uno, atque altero die, quam solvendi, detergendi, atque medicamentum ulceri conveniens apponendi? Si tegumentum pro ulceris curatione probasset, non erat, cur solveretur pars fracta, & ulceris haberetur ratio. Sed superfluum est alia Gal. loca adducere, cum ex allatis perspicuè appareat, Gal. sæpè solvendo potius, quam diutius tegendo vulnera curasse.



L12



habet : Verum, dum ait nudos nullo modo relinquere oportet, insinuat mediam quandam medendi diligentiam, quæ sanè erit, si apparente quopiam ex prædictis signis, jubeat deligationem ad fracturas appositam statim solvi, uno autem, atque altero die ulceris curam habeat. Si pars solvitur, & uno, atque altero die habeatur ulceris ratio, profecto dum deligata pars manebat, non habebatur ulceris ratio, quæ haberi poterat, sed potius fracturæ. Et propterea tex. 3. eos, qui purgatorium aliquod ulceri adhibentes, deligationemque à principio negligentes, quod ad ulcus attinet, non male curare dicebat, fracturæ tamen inter initia nullam habere rationem, posterius eam adhibentes deligationem, quæ à principio erat adhibenda.

Incommoda vero, quæ recenset Hipp. provenientia ex prava eorum curatione, qui purgatorium ulceribus adhibent, non idcirco sequuntur, quia ulcus tegumento privetur, namque etiam si vinculo, quod adhibetur in fracturæ gratiam, non tegatur, potest tamen aliter contegi, & Medicos ea medendi ratione utentes convenientibus linteis tegere ulcus consuevisse existimandum est, sed quia mala fit deligatio non solum pro fractura, verum & pro ulcere, & longe majus damnum affert ulceri talis deligatio, quam sit utilitas, quæ ex adhibito purgatorio medicamento proficiscitur. Hoc ex Hipp. manifeste colligitur, nam tex. 3. Qui purgans aliquod medicamentum ulceri adhibent, neque ullam deligationem à principio moliuntur, eos, dicebat, neque magnum aliquod bonum, neque magnum aliquod malum committere, ut enim notat Gal. in com. ejusdem tex. Quod ad ulcus attinet, non male curant, fracturæ tamen inter initia nullam habent rationem, posterius eam adhibentes deligationem, quam à principio esse adhibendam diximus. Hinc & Hipp. eodem tex. Non tamen hoc modo ossa in sua sede constituuntur, corpora enim ea parte aliquanto turgidiora redduntur quàm opportunum sit. Et tex. 4. Sed & breviora evadunt, quàm quibus ossa aut cubiti aut tibiæ infracta fuerint, & Gal. in ejus com. Unde qui hæc negligentes, debitam videlicet extensionem, & accuratam deligationem, soli attendunt ulceri, non modo ad majorem, quàm naturaliter ei conveniat, tumorem membrum perducunt, verum & id brevius reddunt. At qui purgans medicamentum adhibent,

& hinc



& hinc inde deligant, ulcus verò sine vinculo relinquunt, hos magnum erratum, malumque committere asserit, ex talique curatione ulcus, quod ferè non erat consideratione dignum, inflammatur, & fit pravum, & os abscedit, quod abscedere non deberet, ex deligatione enim, quam adhibebant, hinc inde ulcus sine vinculo relinquentes exprimuntur succi, tumorisque materia ad ipsum ulcus; nam, & si pars sana hinc inde deligetur, à deligatis partibus ad intermediam sine vinculo relictam exprimetur sanguis, eaque in tumorem attolletur. Quod si ulcerata sit pars illa, fieri non poterit, quin ulcus inflammetur, & pravum fiat. Audiamus Hipp. 3. de fract. perspicua oratione hoc tradentem, dicebat enim tex. 5. Item & alii sunt, qui statim ab initio ejusmodi fracturas linteis curare aggrediuntur, quibus linteis hinc, & inde deligant, ipsum autem ulcus sine vinculo relinquunt, ac refrigerari sinunt; deinde medicamentum aliquod, quod purgando sit ulceri imponunt, neque id pannis vino madefactis, vel succida lana curant. Prævus sane est is curandi modus, rationique consentaneum est, eos, qui vel his, vel aliis etiam fracturis in hunc modum medentur, quàm maximè à recta via aberrare; In hoc etenim negotio id maximum est, ut cognoscamus, quomodo initia linteorum sint injicienda, & qua maximè parte adstringere expediat &c. inferiùs. Testatur autem hoc medicatio, necesse enim est, ut cum sic deligatur, ulcus intumescat unde tex. 16. subjungebat: Si enim hinc, & inde pars sana deligetur, media vero nullo vinculo comprehendatur, pars illa, quæ intermissa est, plurimum intumescet, ac decolor reddetur, quid ergo fieri poterit, ut hæc ulcus non contrahat? & tex. 7. Quare necesse est, ut ulcus decoloratum reddatur, ad quod exprimitur materia, lacrymosumque, & quod minimè suppuret, & tex. 8. Pulsus etiam, ac igneus calor cum hoc ulcere conjungitur. Quis non videt omnia mala ex prava deligatione provenire, non autem ex eo, quod ulcus non tegatur? unde & Gal. in com. tex. 7. in hac parte, quæ symptomata ex prava illorum deligatione consequantur, enarravit, & in com. tex. 8. In his, qui sic deligantur, tumor, ut paulo antea dixi, ad ipsa ulcera elidetur. Quamvis nec parùm illud obsit in prava illa deligatione quod dum hinc,



& inde deligant, ulcus detectum servant, & ambientis injuriis exponunt, itaque refrigerari sinunt. Et detectionem, quam sæpe nostro modo curantes tegumento corrigimus, non intelligit Hip. quando inquit, nudare, & perfrigerare, sed per perfrigerare nudare intelligit, ut notat Gal. in com. tex. 14. quod est, ut ibidem dicebat, detracta deligatione, quæ fracturis convenit, tanquam ulcus curare, nam dicebat Hipp. eo contextu, hos nudos, nullo pacto relinquere oportere; quasi vellet dicere, quamvis ulcus sit irritatum, & nigrum valdè, vel impurum, & carnes suppurare reperiantur, & nervi excisuri videantur, non ob id detrahenda est deligatio, seu discedendum est à convenienti deligatione, ut ulceri medeamur, neque hujusmodi suppurationes sunt pertimescendæ, sed curandæ in reliquis juxta ac ubi ulcus à principio fracturæ contingit. Similiter utilitates ex deligatione, quæ una ulcus comprehendit, provenientes, non idcirco consequi censet Hipp. quia vulnus tectum fervetur, sed quia ex decenti deligatione, cujus formam ibi tradit, ab ipso ulcere ad partes extra deligationem existentes materia tumoris exprimitur, & affluxus succorum prohibetur, qua de causa tex. 10. subjungebat: Et si, prout ratio requirit, omnia agantur, pars, quæ ad ulcus pertinet, semper gracilior reperietur; cæteræque omnes, quæ sub deligatione fuerint, graciliores erunt, atque ad suppurationem ulcera hæc aliis citius devenient, quæ alia via curantur: nec non & carunculæ quæcunque in ulcere denigratæ, aut emortuæ sunt, sub hoc curationis modo abrumpuntur citius, & decidunt, quam in aliis. Cicatricem quoque velocius hoc modo tractatum ulcus contrahit, quàm alio: quorum omnium causa est (hæc omisere, qui locum hunc adduxerunt) quod tum ulcus ipsum, tum aliæ partes, quæ illi in orbem adjacent, graciliores evadunt.

Patet igitur ex hoc quod Hip. velit fracturas cum ulcere curari, ac si sine ulcere forent, nullo modo elici posse quod voverit ut vulnera tegumento curentur. Neque etiam ex causa filii Metrophonti 4. Popul. relati, dato quod liber ille sit Hip. de quo rationabiliter dubitatur; symptomata enim ad duodecimam supervenerunt propter deterfionem, & fricationem, non quia tunc solum à Medico fuerit deterfum ulcus, sed quia tunc solum



solùm deterfio fuerit talis, ut perfrigerationem induceret. Neque deterfio illa, & perfricatio manu Medici fuit facta, verùm ipsius vulnerati; cum enim propria manu partes ulceri adjacentes detergeret, ac perfricaret, ut nonnunquam accidere videmus, lintea detraxit, vulnusque nudavit, atque ita perfrigeratio contingit, & allata mala subsequuta sunt.

Ad locum desumptum ex 4. de morb. dicere possumus, eos libros non esse Hip. veros legitimos, quod & Gal. fatetur, posteaquam in illis multa reperiuntur, quæ doctrinam Hip. non sapiunt. Cæterùm neque ex eo loco potest colligi, quod ipsi intendunt; nihil aliud ibi vult auctor, nisi hoc, ne imparibus diebus curentur vulnera, eo quod in imparibus diebus magis turbetur humor, cujus signum esse dicebat tex. 12. quod quicumque jam à febre continua correpti, pharmaco usi sunt in diebus paribus, hi nimium purgati nunquam sunt. Qui vero in diebus imparibus medicamento forti usi sunt, nimium purgati sunt; quare illis diebus non est addenda alia turbationis causa, cujusmodi est vulneris medicatio in vulnerato, & medicamenti purgantis exhibitio in febricitante. unde tex. 21. subjungebat: Et si quis jam turbatur, adhuc magis perturbet medicamento immisso, nihil mirum est, ex talibus hominem perire.

Ad casum Billi desumptum ex 5. & 7. morb. pop. pariter dicere possumus, libros illos non esse Hipp. germanos, sed dato, quod sint Hipp. nihil concludit casus ille, aliud enim est dicere, Billum in dorso percussum adhibito medicamento cruentis vulneribus destinato, atque deligato, sanatum esse; aliud unica medicamenti impositione sanitati fuisse restitutum. Consuevimus enim dicere, Petrum ob exhibitionem talis medicamenti fuisse sanatum, cum tamen pluries fuerit exhibitum.

Locus ex 2. de morb. allatus nihil facit ad ejus rei probationem, Hipp. non differt solutionem sectionis in fronte factæ ad septimam, ut vulnus curet, sed ut curet affectionem capitis, cujus causa sectionem illam molitus fuerat, cujus signum est, quod facta sectione salem tenuissimum inspergit. Quod afferebatur ex Hipp. lib. de fract. tex. 33. com. 3. nihil est, ibi enim Hipp. ut notat Gal. in com. ejusdem tex. depravatam quorundam medicorum



rum consuetudinem reprehendit, & corrigit, qui præstare putabant, ut confractum membrum non statim à principio extenderetur, sed potius prima, & altera die dolor leniretur, mox verò tertia, aut quarta ab ipso initio extensio fieret, cum vice versa sit faciendum, postquam tertia, & quarta die maximum est inflammationis, & recrudescentiæ periculum; unde tunc maximè cavendum est ab omnibus irritantibus, & quæ inflammationem possunt concitare, ideo dicebat: Qui verò prima, aut altera die lana deligandum censent, tertia vero, & quarta linteis deligantes adstringunt, ac tunc maximè extendunt, hi in arte medica, atque in re magni momenti ingens peccatum committunt; numquam enim vulnera tertia, vel quarta die sunt vexanda; ita ut in universum cavendum sit etiam ab admotione scalpelli his ipsis diebus, & ab omnibus prætereà aliis, quibus vulnera irritantur, plerumque enim in tertia, & quarta die vulnera solent recrudescere. Itaque adductus locus ad rem non facit.

Tandem nec ex lib. de artic. quidquam licet colligere, posteaquam ibi Hipp. non curat ulcus solum, sed ulcus luxationi junctum, quod facilè admodum convulsionem invehit propter tensionem nervosarum partium ab osse extra proprium locum existente inductam, atque eorundem nudationem, ac etiam vulnerationem, & contusionem, nam semper, ut dicebat Gal. 4. Meth. 6. ubi tendines, nervi, & carne vacua, atque ossea loca sunt, hic doloris, vigiliarum, convulsionis, & delirii periculum instat. Qua de causa Hip. compositam, & mixtam quandam curationem instituit, qualis convenit compositis, & mixtis affectibus, ut animadvertit Gal. in com. 4. tex. 24. Quæ tamen eò maximè spectat, ut omnia leniendi vim habeant, ut inquit Gal. tex. 26. inungens ulcus tepido cerato lanasque sordidas ex vino, & oleo tepido madefactas imponens, desuperque vino irrigans, ut apparet tex. 23. & 24. Neque enim, ut ait Gal. in com. tex. 24. tepida adhiberet medicamenta, neque oleum ullo pacto admisceret, si loco, quatenus ulceratus est, mederetur. Sed quoniam, ut antea dixi, convulsionem timet, oleum immiscet, & omnia tepida apponit. Quocirca neque quasi solam convulsionem spectet, omninò curationem ulceris deserit, neque etiam ad hoc solummodò respi-



respicit. In affectibus compositis, & mixtis oportet, ut composita, & mixta sit curationis ratio. Et si præcipit, ut medicamentis utamur, quæ sint plurium dierum, id facit propter metum convulsionis; nam, si medicamenta essent paucorum dierum, sæpè cogeremur partem solvere, ac deligare, & omninò contrectare, ex quo non posset non concitari dolor, & pars irritari, & majori inflammationis, atque convulsionis periculo exponi. Sed & propter crebram solutionem denudatæ nervosæ partes perfrigerantur; itaque ad convulsionem redduntur paratæ. Quare manifestum est, adducta Hipp. loca ad rem non facere.

Nec magis, quæ ex Gal. adducta sunt, talem fuisse Gal. *Exponuntur mentem ostendunt. Casus incisæ arteriæ rara solutione curatæ Galeni loca.* agresti juvene, à Gal. 5. Meth. cap. 7. relatus, parùm cogit: jam dictum est, vulnera simplicia, quæ tantum agglutinari postulant, nullam facere difficultatem; cum enim in his excrementorum copia non generetur, potest medicamentum adhibitum diutiùs proprias vires retinere, atque ita non erit necessaria crebra solutio, eoque minus, cum brevi tempore agglutinatio perficiatur, quo accidit, ut plerique eorum, qui quotidie vulnera curare consueverunt, quando iis offertur vulnus simplex, una vel altera medicamenti impositione ipsum agglutinent, communiterque medicamentum primò impositum usque ad quartam relinquunt. Tanto magis autem arteria incisa rara solutione opus habet, quoniam est in continuo motu, & propterea, quantum fieri potest, curandum, ut in quiete detineatur. Sed & sanguis ad exitum paratus, ut rara, & tarda fieret solutio, postulabat. Ad iocum adductum ex com. 4. in lib. de artic. patet responsio ex iis, quæ superius diximus explicantes Hipp. mentem in ea parte lib. de artic. in qua tractat de ratione curandi luxationes cum ulcere: non est ergo, quod de hoc plura verba faciamus. Curatio ulcerum curatu difficilium ab eo relata 4. de com. med. per gen. valde differt à nostra curandi via; ibi enim triduanam solutionem probat, nos vero in gravioribus vulneribus sæpè ad decimam quartam, & vigesimam, & ulterius solutionem differimus. Præterea in iis ulceribus medicamentum totum ulcus tangit, quare si ex iis fuerit, quæ plurium dierum appellantur, quale est ibidem de-



scriptum medicamentum, rectè juxta Gal. decreta triduo tantum solvetur; at hoc non est de cavis vulneribus, in quæ quodvis medicamentum instilletur, brevi proprias vires amittit, & extrinsecus propellitur. Et cum Gal. medicamentis curationem vulnorum faciat, non potest in iis tam raram solutionem desiderare. Quod affertur ex tex. 43. com. 3. lib. de fract. potius spectat ad labiorum adjunctionem, quàm ad nostrum artificiosum tegumentum: ibi enim solius cutis meminit, quæ est naturale, & familiare tegumentum partium ab ipsa contentarum, & ideo curandum est, ut denudatæ partes, quantum fieri potest, propria cute tegantur. Et cum aliàs Gal. artificiosi tegumenti non meminerit, perspicuum est, non posse argui à simili, cum de similibus idem sit judicium; & quomodo quis cognoscat duo esse similia, si alterum ipsorum penitus ignoret? Fateri igitur oportet, neque Galeno cognitam fuisse hanc curandi viam, tantum abest, ut ipsa fuerit usus.

## CAPUT XLIII.

*Quid in hac re senserint Cornelius Celsus, & Avicennas, & quomodo primi auctores hanc curandi viam invenerint.*

**C**ornelius Celsus Latinorum Medicorum Princeps, ut Latinus Hippocrates dici mereatur, modum hunc nostrum olfecisse visus est; nam tertio quoque die tantum vulnus solvit, ac curat, ut videre est lib. 5. cap. 26. Primo enim apparatu instituto, dicebat, biduo sic vulnere habito tertio die id aperiendum, detergendaque sanies ex aqua frigida est, eademque rursus injicienda sunt. Quinto jam die, quanta inflammatio futura sit, se ostendit. Quo die rursus deterfo vulnere, considerandus est color, &c. rariorem tamen detectionem ea, quæ tertio quoque die fit, non probasse certum est, unde & linamentis per ulcus dispositis utitur: Post id fomentum, dicebat, si lata plaga non patet, imponi protinus emplastrum debet, & si latius hiat, illud emplastrum liquari ex irino unguento oportet, eoque illita linamenta disponi per plagam, &c. & inferius: Inflammatione finita vulnus purgandum est.

*Celsus non  
pervenit ad  
hunc modum*



est. Id optimè faciunt tincta in melle linamenta, &c. cum tamen modus hic noster linamenta arceat. Denique medicamentis curationem facit, nam ubi glutinandi non est spes, primò iis, quæ pus movent, utitur, deinde vulnus purgat, eoque purgato carne implet, congruis apposis medicamentis, & postremò ea admovet, quæ cicatricem inducunt. Quare multis numeris differt curatio Celsi ab hoc modo.

Avicennas 4. 5. tract. 3. cap. 2. tractans de cura ulcerum, *De Avic.* laudabat, immò necessarium judicabat, ut vulneris solutio, & novi medicamenti appositio usque ad quartam diem protraheretur, quare videtur & ipse vaticinatus fuisse nostrum hunc modum; Et de illis, quæ sunt necessaria, dicebat. Est, ut dimittatur medicamentum super ulcus tribus diebus, deinde dissolvatur, nam si ipsum prius curaveris, vel si ante tres dies solveris, non faciet suam operationem.

Nicolaus Nicolus sermone 7. trac. 4. summa 1. cap. 19. *Nicolus.* quamvis admittat ex Gal. posse interdum differri solutionem ad quartam, nihilominus negat, mentem Avic. fuisse, ut ulcus eodem medicamento tribus diebus nutriretur, cum sæpius multorum malorum id possit esse in causa, sed cum ex medicamenti effectû metiri convenientem ejus qualitatem oporteat, quemadmodum etiam docuit Gal. ad hoc dignoscendum terminum statuit tres dies, cui, ut sibi videtur, favet antiqua lectio, quæ sic habet: Et de illis, quæ sunt necessaria, est, ut dimittatur medicamentum super ulcus tribus diebus, deinde dissolvatur, nam, si ipsum tunc operationem suam non fecerit, non operabitur postea. Dicebat ergo Nicolus: Super quo canone notant, quod, licet superiùs dictum sit de cognitione medicaminis convenientis, & inconvenientis per viam ratiocinationis, tamen quia cognitio ejus certa per ratiocinationem haberi non potest, ideò positus est ab Avicenna hic canon, ut per experientiam habeatur: & non intellexit Avicennas, ut medicamen per triduum ulceri applicetur absque dissolutione ejus, & innovatio, quoniam quamvis istud in quibusdam casibus concedatur, possit tamen esse vehementer nocivum, aut in multiplicando sordes, aut in corrodendo, vel aliâ læsionem faciendo; sed intellexit, & voluit, ut Medicus cum medicamine experiatur curando cum eo



tribus diebus, ut possit experiri, & cognoscere operationem ejus, an sit excedens, aut diminuta, in minori enim tempore, id est, maximè de multis fortassis non posset cognosci de sufficienti, aut insufficienti, sive de juvativa, aut nociva operatione ejus, nisi medicamen fuerit ultimæ qualitatis: Expositionem tamen hanc Nicoli non posse Avicennæ verbis adaptari, qui attentè Avicennam legerit, apertè conjiciet, etiamsi antiquam lectionem magis probet, cui tamen præponendam esse novam nemo dubitat, inquit, enim: Necessarium est, ut medicamen dimittatur super ulcus tribus diebus, deinde dissolvatur; his verbis manifestè patet, ipsum voluisse, ut ulcus eodem medicamento tribus diebus tegeretur, & postea solveretur. Et cum in omnibus Gal. sectetur, & sectari profiteatur, procul dubio nihil aliud significare voluit, quàm illud idem, quod Gal. nos docuit 4. de comp. med. per gen. & alibi pluribus in locis. Quibus in locis Gal. tam apertè loquitur, ut nullam relinquat dubitationem.

*Non fuit  
cognitus  
Avicennæ  
hic modus.*

Sed tamen neque ob id concludendum est, Avicennæ cognitum fuisse hunc modum, posteaquam medicamentis curam facit, & dum peculiariter de vulneribus tractat, ut videre est 4. 4. tractat. 1. à doctrina Gal. & ea curandi ratione, quam Gal. in lib. præcipuè Meth. tradidit, nunquam discessit, ideoque varia adhibet medicamenta, prout modò suppurare contendit, modò purgare, modò carnem generare, modò cicatricem inducere: vultque, ut medicamentum omnibus vulneris partibus admoveatur, unde cap. 9. agens de medicinis sarcoticis, dicebat: Et non dubitamus, quin sit necessarium, ut pulvis earum sit minoris virtutis, quàm illud, quod eis fit cum oleis, & ceratis. Et necessitas quidem perducens ad olea, & cerata est, propterea quod medicinæ siccae, & propriè quæ sunt sicut lithargyrus, & reliquæ minerales, ex Gal. hæc desumpsit 3. Meth. 4. non submerguntur usque ad profundum, & non penetrant in poros. Cum ergo ex eis fit ceratum, ad ultimum facit pervenire eas cursus olei ad locum, quem volumus. Sed 5. 4. tract. 2. cap. 9. quotidianam solutionem probasse liquidò constat, tractans enim curationem fracturæ cum vulnere ab Hip. doctrina recedit, præcipiens, ut ulcus sine vinculo relinquatur, quo possit ei propria adhiberi curatio; immò hastellas



hastellas è directo ulceris collocans, vult eas è regione vulneris esse perforatas ut sanies possit effluere, & congrua medicamenta applicari mane, & vespere: Et hoc ingenium est, dicebat, ut ponatur extremitas ligamenti super labium vulneris, deinde trahatur, vel involvatur transversaliter ad posteriora, ita ut remaneat vulnus ipsum apertum, &, quod est præter ipsum, sit firmum ex eo, ita quod jam ascendit ligamentum, & descendit ligamentum, ut cadat supra fracturam strictura vehemens, & remaneat vulnus apertum, ut discooperias ipsum, quando volueris, & tibi inest, ut facias super hastellas foramen oppositum illi vulneri, ut perveniat, vel applicetur medicina vulneris super ipsum, & sit possibilis egressio virus ab eo. Et paulò post: Et cum voluntas fuerit solvere illud, quod tegit vulnus, mane, & vespere, est magis possibile propter curationem ejus propriam. Clara igitur est mens Avicennæ.

A posterioribus non habemus, nisi quod ab istis traditum est. Rhasis 2. parte Continentis lib. 28. tract. 1. c. 2. pluries Gal. sententiam de rara ulcerum solutione repetit, sed nihil ulterius addit. *Rhasis quid senserit.*

Ex recentioribus Theopraustus Paracelsus unica medicamenti impositione posse vulnus sanari cognovit, etiamsi ex iis fuerit, quæ tardè sanantur, sed totum medicamenti viribus, quæ tanto tempore perdurent,tribuendum esse existimavit. Hinc in sua minori Chirurgia cap.... Cura postmodum sequitur in hanc sententiam, ut hoc medicamentum, quod vulneri superponis, applicare probè notum habeas. Quod quidem experientia Mumia conditionum acquiritur, ut in emplastris, nonnulla manent ab exordio primæ deligationis ad finem usque sanationis, ut unico sub emplastro curetur vulnus: talia sunt ex Mumiis fixis emplastra. Quæ tamen reverberatæ Mumia sunt, viginti quatuor horis dumtaxat relinquuntur, & quæ sunt attractivis commixtæ, duodecim, & hoc omne cum permutatione. Sunt & aliæ Mumia quædam ex balsamali Mumia, quæ semel adligatæ vulneribus per tres, vel quatuor septimanas suas retinent vires. Pannis etiam mundissimis ligationes cum fiunt, quodque vulnus curari, sanarique potest. Aliqui pulveres habentur, qui singulis octonis renovari volunt horis, quod ad suppositionem attinet. Similiter aliæ Mumia sunt, qua-



rum superius multarum est facta mentio, quæ multò citius curant, quàm futura fieri queat. Itidem nonnullæ vulnerariæ portiones existunt, quarum haustus unus in tertiam, aut quartam septimanam operatur, donec sanetur vulnus, uti Mercurialis fert conditio. Mumiales hujusmodi conditiones ex Mercurio possunt intelligi, qui postquam semel cœpit mundificare, per mensem integrum absque motu supplet. Ab experientia proprietates istas depromere debes, quod scriptis perfectè nequeant exponi. Sicuti autem verum est, posse quorundam vulnorum solutionem ad trigesimum differri, ita vanum prorsus existimandum est, hoc evenire, quia vis medicamenti toto illo tempore integra fervetur. Effectum vidit, & confessus est, sed causam ignoravit, distinguere nesciens, in tegumento vis consistit, non in medicamento. Vaticinatus est igitur quodammodo Paracelsus hunc modum non assequutus. Parum tamen abfuit, ne ad eum perveniret.

*Unde desumpserint & quomodo invenerint primi auctores hunc modum.*

Quare novus omninò statui debet hic curandi modus. Cujus tamen inventioni occasionem existimo dedisse Hip. ipsum, atque Gal. sed Hip. præcipuè in supra allatis locis. Cum enim Hippocratem cernerent fracturas cum ulcere curantem, ac si sine ulcere essent, & nihilominus non solùm nihil mali accidere ipsi vulneri, verùm potius ea fœliciter curari, naturæ vires cæperunt considerare, & admirari, atque tegumentum illud, quo vulnera foventur, non leve adjumentum præstare suspicati sunt: & adhuc magis tegumento tribuerunt, videntes, quàm improbet Gal. 3. de frac. tex. 43. partes esse destitutas naturali, familiarique earum tegumento, scilicet cute, qua maximè delectantur, amet verò, ut eadem contegantur: cur enim naturale tegumentum adeò profit, considerantes, viderunt, non dissimiles utilitates ab artificioso posse provenire. Sed maximè eos confirmavit Hipp. lib. de artic. com. 4. raram solutionem præcipiens in ulceribus cum luxatione, etiamsi multum puris emittant, quamvis non ulceris gratia id fecerit, sed convulsionis metu: id enim evidentissimum est signum, subjectas partes à tegumento illo solatium percipere, ac roborari. Eosdem naturæ vires, ac tegumenti in plantarum insitionibus fuisse contemplatos conjicio, observantes, quo-



quomodo prudens agricola, ubi fructiferam aliquam plantam inferverit, vulnus & insito, & agresti plantæ illatum non aliter, quàm tegumento curet, & in eo tantummodo laboret, ne detur ambienti ad plagam ingressus, cera, & resina tegumentum parans, & de cætero naturæ curam reliquens, & quomodo si forte fortuna, aut præ incuria exiguum aliquod foramen fuerit relictum, pervadente aëre tabescat insitum. Si enim arbor fauciata, quæ impatibilis est, ac densissimæ substantiæ adeò aeris occursum offenditur, tegumentoque parato illatum vulnus corrigit, videtur quàm optimè posse transferri casus ad ipsum humanum corpus. Itaque omnibus his diligenter perpensis arbitror eos, sicuti Hip. curabat fracturas cum ulcere, ac si sine ulcere forent, ita ulcera sine fractura existentia, ac si cum fractura essent, quantum scilicet spectat ad solutionem, curare cœpissè: solutionem quoque adhuc magis differentes, quod deligationis gratia solutione non erat opus, cum satis sit in vulneribus, si deligatio medicamentum, & apposita lintea contineat. In levioribus tamen casibus hanc curandi rationem primùm expertos fuisse verisimile est; experientia verò confirmante, quod ratio invenerat, ad majora, & graviora vulnera paulatim fuisse progressos, donec voti facti fuerint compotes. Forsan etiam impulsæ sunt, ut id experirentur, quod Romano xenodochio præerant, & propter languentium multitudinem optimè illis cessisset, si à quotidiana illa, & operosa vulneratorum medicatione potuissent discedere.

Qui hos sequuti sunt, plerique in medendi methodo parùm versati; ut qui Empyricam potiùs, quàm Rationalem Medicinam excoluerunt, conspicientes Gal. loca, quæ superius adduximus, nescientesque sese explicare, ad id venerunt, ut existimarent, viam hanc curandi non posse in doctrina Gal. defendi, & proinde soli experientiæ standum esse. Sæpiùs disceptavi ego Romæ de hac re cum iis, qui maximè modum hunc observabant, & nefas existimabant aliter curare vulnera; & cum eos urgerem rationibus ex Gal. doctrina depromptis, aperte fatebantur, non convenire hunc modum cum doctrina Gal. adesseque contra eum rationes insolubiles, quæ tamen erant parvifaciendæ,

ut



ut quæ contra sensum militarent. Jam autem ostendi, eum non solum esse rationi consentaneum, & veræ methodo, verum etiam principiis Hip. & Gal. nec est inconueniens, quod Hip. & Gal. doctrinæ consentiat, & quod ipsi eum non viderint, non enim necessarium est, ut omnia, quæ in principiis nostris continentur, videamus.

## CAPUT XLIV.

*Solvuntur argumenta, quibus ab initio probabatur, ad curationem vulnorum necessariam esse crebram solutionem.*

**Q**UAMVIS ex jam dictis pateat, quid ad argumenta crebram solutionem probantia, & raram tollentia, sit respondendum, nihilominus propter juniores non gravabor ea repetere, ex quibus uniuscujusque sigillatim solutio deduci possit.

*Ad primum  
argumen-  
tum Re-  
sponso.*

Quod igitur ad primum attinet, admittimus generari in vulnere cavo duo illa excrementa, tenue videlicet, & crassum, sed ob id crebram solutionem, & detectionem requiri prorsus negamus, neque necessaria est crebra illa medicamentorum appositio: quod enim ad tenue excrementum attinet, partim per insensibilem halitum digeritur, partim à calore robusto extra vulnus propellitur: crassum verò à principio est adeò exiguum ut medicamentis, quæ ipsum detergeant, non indigeat; immò à detergentibus medicamentis à principio adhibitis vulnus potius incrudesceret, & irritaretur, cum aliquam mordendi vim habeant, & ex consequenti fieret sordidius. Licet autem à principio crassum hoc excrementum non auferatur, ob modicam tamen quantitatem nullum negotium potest facessere: procedente verò tempore cum pure confunditur, & unà cum eo à roborata natura, modò adsit idoneus effluxus, extra pellitur. Inde est, quod quando post aliquod tempus vulnus solvimus, ipsum adeò purum comperimus, ut æquè purum quovis medicamenti genere ipsum reddere non esset facile, quare in hoc curandi modo excrementa intra vulnus nequaquam detinentur, ut ab iis quidpiam mali sit timendum. Quod si ita est, cur voluerimus periclitari crebro vulnus solventes, injuriisque externi aeris exponentes, ut

medi-



medicamenta quotidie applicemus, & vulnus emundemus? Non quidem adeò abhorrerem à quotidiano medicamentorum usu, quotidianaque vulneris absterfione, si citra detectionem transigi negotium posset. Modò cum id non liceat, non est, cur aliquam utilitatem procuremus, & majus damnum negligamus: nam, ut aliàs dictum est, damnum, quod ex crebra detectione vulneris oritur, est majus, quam utilitas ex quotidiano medicamentorum usu, & vulneris contrectatione proveniens.

Ad secundum dicimus, excrementa in vulnere genita partim per halitum insensibilem digeri, partim sensibilibus à natura extra vulnus expelli, quando idoneus adest effluxus, non autem in cavitate vulneris detineri, & propterea, ut emundetur vulnus, non est necessaria quotidiana procuratio.

Ad tertium dicimus, etsi pus generetur in vulnere, non ob id tamen solvendum esse quotidie vulnus, posteaquam non intus detinetur, quo in casu in argumento enarrata mala sequerentur, sed extra vulnus à robusta natura propellitur, modò suffusiones adsint, eoque facilius id contingit, quod sub nostro curandi modo non generatur pus illud viscidum, quod absterfionem manualementem, & perennem medicamentorum praesentiam requirat. Quid ad Galenum, & Hippocratem dicendum sit, patet ex iis, quae superius, utriusque mentem investigantes attulimus.

Ad quartam respondetur, pro vario ipsorum vulnerum statu immutanda esse medicamenta, quando medicamentis fit curatio, & excrementorum cura ipsis medicamentis committitur. Et ideò qui communi modo curationem instituunt, id religiosè observant: at in nostro curandi modo excrementorum cura pro majori parte ipsi naturae committitur, unde & id propositum habemus, ut naturam adjuvemus, ac roboremus. Et jam ostensum est, longè majorem esse utilitatem, quae à tegumento provenit, quàm illa sit, quae à medicamentis praestatur propter robur, quod inde recipit naturalis calor.

Ad quintum similiter dicitur, quanto magis vulnera sunt humida, tanto sicciora adhibenda esse medicamenta, quando medicamentis fit curatio, & excrementorum cura medicamentis



committitur: & ex consequenti, ut innotescat vulneris status, & quàm humidum sit, crebrò solvi debet. At jam declaravimus in nostro curandi modo excrementorum curam non medicamentis, sed naturæ demandari; & propterea in eo potissimum laboramus, ut naturam in suis operibus adjuvemus. Si humida excrementa medicamentis essent absumenda, profectò necessaria esset crebra vulneris detectio, ut posset inspicere, quàm humidum esset vulnus, & pro humiditatis ratione possent exsiccantia medicamenta apponi. Verùm medicamentis solummodo humida hæc excrementa non tollimus, sed præcipuè caloris naturalis ope, & ideo in nostro curandi modo non est necessaria crebra illa solutio.

Ad sextum ex dictis patet responsio, cum medicamentis curationem non faciamus, neque est, ut appositi medicamenti effectum observemus, quo nobis reddatur manifestum, an satis siccaverit, an potius ultra, vel citra, quàm par sit. Gal. hoc necessarium judicavit, quia medicamenti curationem absolvit.

Quo ad septimum, admittimus, imò fatemur, curanti Medico necessariam esse cognitionem status vulneris, tum, ut quid futurum sit, prævideat, tum, ut si quæ mala supervenerint, ea tollere, si verò futura sint, prohibere opportunis præsidiis possit: verùm negamus necessariam esse crebram solutionem, atque detectionem ad cognoscendum vulneris statum: & jam demonstrata est via, qua in cognitionem status vulneris, dum tegitur, pervenimus. Oculi mentis acutiùs intuentur, quàm corporis oculi, & sine instrumento corporeo videnda vident: At corporis oculi sine mentis oculis nihil intuentur, & in errores ducunt. Præterea & quando opus est, vulnus detegitur.

Ad octavum dicimus, & nos à principio linthea munda eligere, tum ut melius percipiamus, qualem excrementum ex vulnere profluat, tum etiam ad ornatum, quamvis neque hoc sit absolutè necessarium. In posterum verò non curamus, si pure conspurcentur: neque enim ea liquore aliquo perfundere volumus, ut erat mos Hipp. in fracturis, ad quam perfusionem necessarium est, ut munda sint, & ut liquorem admittant, & ne liquor à sordibus inficiatur, alienamque, & adversam qualitatem inde



inde contrahat. Et si quis etiam vellet perfundere, posset conspurcata lintea detrahare, mundaque apponere citra vulneris detectionem.

Ad nonum respondetur, quod neque tot, ac talibus linteis deligamus, neque adeo deligantes partem constringimus, ut supprimi pravi, ac tetri vapores possint. Si pus exitum habeat, tantò magis vaporosa excrementa diffilari poterunt, & si quæ forsan retineantur, nunquam tantum inferunt damni, quantum ex vulneris detectione proveniret, posteaquam non intra vulnus, sed ad circumfisas partes detinentur. In fracturis contingere facilius potest vaporum suppressio, propterea quod pluribus linteis partem deligamus, & magis adstringimus. Si tamen in vulnere ex prava putredine elevarentur vapores, utilis esset, imò necessaria detectio, sed hæc erit non vulneris, verùm conjuncti affectus curatio.

Ad decimum dicitur, nos plerumque multum deficere in cognitione internorum affectuum, & propterea amaremus, ut sensibus essent conspicui, quò melius, & facilius, assequi eorum naturam nobis liceret, sic enim & melius institueretur curatio, cum prima via, ut dicebat Gal. sit cognitio morbi. Quandoque etiam vellemus eosdem sensibus subjici, ut in iis curandis eo modo uti medicamentis possemus, quo magis efficaciter agunt, nam quæ ingeruntur, sæpè nimis refracta, & exoluta ad affectam partem perveniunt. Quod si affecta pars externa foret, opportunis medicamentis tota die regi posset. At de vulneribus alia est ratio. Optimè, & omninò quantum ad curationem satis est, innotescit vulnerum status, etiamsi oculis quotidie non conspiciantur, ut superius ostensum est, & in eorum curatione parùm actione medicamentorum indigemus. Ut ea igitur inspiciamus, iisdemque congrua medicamenta applicemus, non est. quod malum concitemus utilitatem longe excedens, quam ex inspectione, & applicatione medicamentorum expectamus. Itaque neganda est similitudo.

Ad undecimum patet responsio ex dictis: Præfagia in re vulnerum sunt necessaria, & ideò statum vulneris notum esse oportet. At quod ad cognitionem status vulneris, & supervenientium malorum necessaria sit crebra detectio, negamus. Jam ostensum est,



quomodo absque illa detectione, ac inspectione satis hæc omnia cognoscamus.

Ad duodecesimum facilis est responsio. Rarò tantus pruritus, tantaque erosio vulneratam partem afficit, ut ad solutionem intempestivam cogat. Quod si perferri non posset, neque displiceret solutio, si consuli aliter non posset. Patet autem talem solutionem vulneris curationem non respicere, sed adnexum symptoma, & de hoc etiam plura diximus superius, enarrantes casus, in quibus solvere oporteat.

Ad decimum tertium respondemus, negando majorem, quandoque enim ob urgentem affectum à regulari curatione discedere cogimur, ut illi consulamus, & quandoque morbum quempiam nec levis momenti spernere, imò & novum, eumque insanabilem etiam introducere. Quoniam ergo, cum urgente mala, ad talem curationem tanquam ad sacram anchoram confugimus, semper ne eodem prorsus modo erit agendum? Interdum sævitia symptomatis coacti posthabito morbo, & primaria causa symptomati occurrimus, dicendum ne est, ergo hanc curationem meliorem esse absolutè, ac præstantiorem ea, quæ præcipuæ causæ primò occurrit, & symptoma per ablationem morbi conatur tollere? nemo sanæ mentis profectò id assereret. Non igitur quia urgente quandoque conjuncto aliquo affectu cogimur crebrò vulnus solvere, dicenda est melior, ac præstantior curatio, quæ quotidie vulnus procurat, sed tanquam irregularis, & coacta proponitur, illa verò, quæ rarò solvit tanquam regularis, & præcipua.

Ad postremum respondetur, Hipp. dictum intelligendum esse de aliqua particulari curatione, qua sensibiliter imminui affectum videmus, & naturam affectus, ac præstantiam auxilii, quod primo posthabito deligere decernimus, omninò exploratam non habemus. Hoc enim in casu quando sub aliqua curatione sanatur morbus, non est tutum ad alia auxilia confugere, seu ad alium curationis modum. Nemo tamen sanæ mentis inficias ibit, ex arte esse, curandi modum immutare, quando melior haberi potest. Quamvis igitur sub communi modo sanentur vulnera, quia tamen tutius, & facilius sub hoc nostro modo, quàm sub illo



illo sanantur, ille pro hoc dimitti potest, & debet. Sicuti multa medicamenta ab antiquis, & ab Hipp. ipso, atque Gal. excogitata, & approbata hodie reprobantur, cum nostris temporibus meliora fuerint adinventata. Medicina, dicebat Hipp. lib. de vet. Med. jam ab antiquo existit, & principium, & via inventa, per quam inventa & multa, & probe habentia comperta sunt, per multum adeò tempus, & reliqua deinceps invenientur, si quis idoneus sit, & jam inventorum gnarus ex his ad perquirendum accedat.

Ad ea pariter, quibus probabatur, esse contra methodum rarò solvere vulnera, non est difficile etiam constitutis respondere. Ad primum quidem patet responsio ex iis, quæ dicta sunt in eo capite, in quo explicatum est, quando detegere vulnus oporteat. Dictum est enim, adjuncti affectus ratione cogi nos ad solutionem, & detectionem vulneris. Sed cum ea sit curatio adjuncti affectus, non vulneris, non est judicandus ob id fallax noster curandi modus. Juxta artis præcepta facimus, quando ei, quod magis urget, occurrimus, reliquis, si fieri possit, non neglectis, quamvis talis curatio sit coacta. Quid magis in arte medica tritum, quam in accessionibus abstinendum esse ab alimonia, & tamen non rarò in accessione ipsa nutrire cogimur? Non est ergo vitio vertendum nostro curandi modo, si quid interdum accidat, & adnectatur vulnere, quod majorem vim habens ad indicandam solutionem, quam vulnus ad indicandum tegumentum, ad crebriorem solutionem nos cogat. Nonne & qui crebriorem solutionem amant, si fluxus sanguinis urgeat, rarius vulnus solvere consueverunt? Nihil est adeo firmum, quod varietas casuum non immutet. Jubeat Hipp. lib. de fract. post appositionem ferularum, ne solvatur vulnus usque ad vigesimam diem, attamen Gal. eodem loco com. 1. tex. 43. inquit: Semper Medicus attendere debet ei quod magis urget, nec hujusmodi præcepta perinde atque lex habenda sunt, quam violare nefas sit, ubi omnia secundum rationem non succedant, & ideo etiam Hipp. ipse dicebat: Si autem ferulis alligatis aliqua, ne ossa probè se habeant, suboriat suspicio, aut quid aliud sit, quod laborantem hominem infestet, circa dimidium illius temporis, aut etiam



parum antea solvendus est, ac deligandus. Ad confirmationem dicitur, ob tegumentum, modo ut decet paretur, non supprimi fuliginosa excrementa, & pravos halitus, ut possint effatu dignam noxam inferre, ut superius dictum est. Quare non debet ex hoc incertus judicari noster modus.

Ad secundum negatur, sub nostro curandi modo congruis auxiliis destitui vulnera, etsi vis medicamenti appositi brevi dissolvatur; permanet enim vis tegumenti, quæ magis potest, quam virtus illorum medicamentorum. Quod ex Gal. de vulneribus intestinorum objiciebatur, quæ hac etiam de causa, imo ea potissimum difficulter sanantur, quia non possunt illis apponi pharmaca, sicuti externarum partium vulneribus, quemadmodum in Gal. modo, qui medicamentis curam facit, id verum est respectu medicamentorum, ita & in nostro respectu tegumenti; licet intra peritonæum contineantur intestina, & in loco calido maneant, adhuc tamen necessarium esset tegumentum, quod partis vulneratæ naturalem calorem foveret, ejusque distensionem prohiberet, cum propter vulnus promptè dissipetur ejus substantia, & obtundatur qualitas, posteaquam is caloris gradus, qui intra peritonæum reperitur, non sufficit ad conservationem qualitatis caloris, partibus intimis ob vulnus proprio, & naturali tegumento destitutis. Destituuntur ergo intestinorum vulnera non solum medicamentis, verum etiam congruis auxiliis. Et si reliquis vulneribus adhiberi possent congrua auxilia, idque non fieret, id esset profecto contra methodum. In nostro autem curandi modo, quando ad manus sunt vulnera, possunt quidem medicamentis privari, non tamen congruis auxiliis, ut jam satis explicatum est: nisi omnia auxilia medicamenta dicamus.

Ad tertium negatur consequentia, non valet: talis curandi modus non potest aptari omnibus ejusmodi morbis, ergo non est methodicus, quamvis enim morbus requirat ex sui natura talem curandi modum, quandoque tamen conformatio vel situs partis eum non admittit. Qui quotidie curant vulnera, apponentes elychnia, seu tentas unguentis illitas, & extrinsecus linthea, quæ unguenta, seu aliud medicamenti genus receperint, quomodo idem præstabunt in linguæ, hepatis, aut pulmonis, & aliarum



aliarum internarum partium vulneribus? In principiis inflammationum repellendum esse methodus curativa præcipit, quoniam ergo in pulmonum, & pleuræ inflammatione adhibere repellentia non possumus, quia omnibus inflammationibus aptari nequit talis curandi ratio, dicendane est prava, & rejicienda? Sed argumenti levitas adeo patet, ut opus non sit longiori explanatione.

Ad quartum facilis est responsio; locus ab auctoritate negativè nihil probat: non sequitur, de hac curandi ratione non pertractarunt Hipp. & Gal. ergo non est bona. Artes enim per additamenta fiunt, nec primi inventores omnia videre potuerunt, quamvis principia posuerint, ex quibus potuissent colligi, & colligantur in dies plura, quæ ipsi non cognoverunt. Imo adhuc multa latere in artium principiis credendum est, quæ temporis progressu forsan elucescent, sicuti nunc inveniuntur multa, quæ priscis nostris fuere incognita. Principium est viribus maximum, & quæ in principio latent, sunt propemodum infinita. Hippocrates artem medicam tradidit, verum de pulsibus non meminit. Galenus multo post tempore partem hanc excoluit, ac literis tradidit, reprobanda ne ergo pulsum doctrina, quia eam ab Hip. traditam non habemus? Quando Hipp. aut Gal. usi fuere Rhabbaro, Guajaco, Sarsa, China, Sassafras, & aliis permultis, quibus nunc passim utimur? nemo tamen sanæ mentis ob id errare nos existimabit.

Ad quintum ex dictis patet responsio. Nostrum tegumentum non adeo perspirationem tollit, ut inde possit effatu digna noxa contingere. Neque par ratio est de calce, & de vulnerata parte, ibi enim calx supponitur male affectus ex casu in ipsum, ex quo ossa fuere disjuncta, & attritæ venæ, ideoque si nulla adhibita diligentia collocetur, ut si supra rem aliquam duriores jaceat, veluti ibidem dicebat Gal. nec sæpius attollatur, verum subinde à substratis stragulis calefiat, & prematur, periculum est siderationis. Unde ad rem non erit hic casus, nisi statuatur eodem modo tolli perspirationem ex tegumento, & eandem compressionem suboriri, quod tamen est falsum.

Primum quoque argumentum, quo evertebatur fundamentum



tum nostri modi, facilè solvitur. Modus noster solam naturam sanationis vulnerum auctorem agnoscit, sed & eam auxilio nostro indigere accipit, sive in externis, sive in internis partibus fuerit vulnus, neque eam deserit, sed congruis auxiliis eidem opem ferre nititur. Quod si crebram medicamentorum appositionem non probat, hoc est, quoniam, ut apponantur medicamenta, fieri debet solutio, atque detectio vulneratarum partium, & ita exponuntur ambienti aëri partes, quæ ipsam nunquam antea fuerunt expertæ, quod majus detrimentum afferre potest, quàm medicamenta utilitatem. Neque adeò improbaremus crebriorem medicamentorum impositionem in vulneribus externarum partium, si citra solutionem, & detectionem imponi possent. Nec minus medicamenta reprobaremus in vulneribus internarum partium, si vulneratæ partes, dum adhibentur, semper essent detegendæ, ac perfrigerandæ; sed citra hoc incommodum usurpantur, nam aut per os assumuntur, aut per sedem injiciuntur; & propterea iis utimur, & eo etiam sæpius, quoniam vis medicamenti per os assumpti, vel per sedem injecti brevi dissolvitur, adhuc magis in id genus vulneribus necessarius est creber medicamentorum usus, quoniam idoneum tegumentum renuunt. Ad Galeni loca patet, quid sit dicendum, omnia enim admittimus, neque nobis quidquam officiant, posteaquam non est par ratio de externis, ac de internis vulneribus.

Ad secundum jam diximus, non eas congregari sordes in vulneribus, quæ non aliter, quàm medicamentis tolli possint. Ostendimus tenue, ac serosum excrementum unà cum pure satis esse ad ablutionem, ac deterfionem sordium, quæ in vulneribus generantur, modò nihil mali supervenerit.

## CAPUT XLV.

*De turundarum, & penicillorum usu in vulneribus.*

**A**D alteram difficultatem accedamus, quæ ad usum turundarum, & penicillorum attinet, videamusque num in vulnerum curatione his uti oporteat, nec ne. Hujus quidem nodi dissolutio



ratio maximè necessaria est ad confirmationem traditæ methodi, nam si horum usus sit necessarius, si turundas & penicillos ablegare sit contra methodum, protinus corrumpit noster curandi modus. Nemo esset adeò insipiens, qui ad decimam quartam, aut vigesimam, & ulterius etiam differret solutionem vulneris, intra quod turundæ, & linamenta continerentur. Pendet autem questionis solutio ex cognitione finis, propter quem hæc fuere inventa, necnon & effectuum ab eorum usu provenientium.

Finis autem, cujus gratia fuere inventa, non est unus, nam & ut alicujus ulceris orificium hians conservent, quo pus liberum habeat exitum, ne fiat ulcus illud ferinum ab Hip. relatum lib. de loc. in hom. & ut os magis amplum reddatur, vel in amplitudine, quam habet, servetur, ut, si qua manualis operatio in osse sit necessaria, quod non rarò contingit in vulneribus cum ossis læsione, vel aliquod in vulnere contentum corpus extrahi debeat, id fieri commodè possit, utque illorum ope idoneum medicamentum parietibus vulneris melius hæreat. Guido Cauliacensis in octo casibus convenire turundam affirmabat. Primo in vulneribus, quæ volumus ampla reddere, abstergere, aut aliquid à fundo extrahere; ut sunt vulnera profunda, quæ habent necessitatem, ejus sunt verba, contra aperiendi, propter ichorem, qui congregatur in fundo, & in spatiositate sua. Secundò in vulneribus concavis, in quibus debemus carnem generare. Tertiò in vulneribus ab aere alteratis, quæ oportet mundificare. Quartò in vulneribus contusis. Quintò in apostemosis. Sextò in morsivis. Septimò in vulneribus, in quibus circa ossa est operandum. Octavò in vulneribus ulceratis. Sed esto plures sint casus, illud certum est, propter supradicta tria tantum linamenta in usum revocari. Quæ quidem pro varietate figuræ varias recipiunt nomenclaturas.

Turundæ oblongæ sunt, ac teretes, & aliquando clavo similes, & hæc propriè turundæ dicuntur. Quæ verò æquales sunt elychnia seu licinia, & peniculi, seu penicilli, atque hastellæ dici solent à barbaris, omnes communi nomine tentæ appellantur. Quæ non alia ratione imponuntur, quàm ut apertum servant vulneris orificium, ex filamentis evulsis plerumque, non rarò ex tenui, & veteri linteo; quandoque ex stupa optimè pexa, vel cotone conficiuntur.

*Cujus gratia inventa fuere linamenta.*

*Tres usus linamentorum.*

*Turunda.*

*Elychnia, & penicilli.*



ciuntur. Eadem quandoque cannulatæ fiunt, ut pus statim per foramen expurgetur: talesque parantur vel ex tela cerata, vel argento, vel plumbo, aut alia simili materia. Quæ imponuntur, ut vulnus dilatent, ex spongia compressa diligenter, & contorta sæpè machinantur, non rarò ex medulla cannæ surgæ, & sambuci, & interdum ex gentianæ radice. Hujusmodi enim turundæ, dum excrementis ulcerum imbibuntur, tumescunt, & ampliorem locum requirunt, unde necesse est, ut vulnus fiat magis amplum. Quæ immittuntur, ut medicamentum ulceris parietibus hæreat, ex molli materia conficiuntur, filamentis videlicet evulsis, gossipio, stupa tenui benè pexa, linteo tenui, ac veteri, & hujusmodi: quamvis quacunque ex causa illis utamur, rarò absque congruis medicamentis immittamus.

*Parvasplenia vulgo faldelle.*

Sunt alia linamenta lata, quorum usus est in amplioribus ulceribus, quæ ob id parva splenia dici solent ad magnorum differentiam, quorum usus præcipuus est in fracturis ad æquandam partem, ut conveniens possit fieri deligatio. Conficiuntur plerumque ex filamentis evulsis, interdum ex tenui stupa, rarius ex gossipio, aut lana, & idoneis medicamentis illita per ulcus, quod amplum sit, disponuntur. Si periculum igitur immaturi coalitus labiorum vulneris citra linamentorum opem evitari nequeat, ut crebra medicamentorum impositio sit necessaria, ita ut aliquo etiam tempore intra vulnus pemaneant, & aliqua manualis operatio conveniat, quæ amplitudinem, quam modo habet vulnus, aut etiam majorem, requirat, utique necessarius erit turundarum, & spleniorum usus, & sine ipsis vanum est sperare, posse curationem transigi. Sed absque turundis, & spleniis evitari potest immaturus labiorum vulneris coalitus, neque necessaria, imò minus utilis est crebra illa medicamentorum immissio, igitur tunc tantum erunt hæc necessaria, quando convenit Chirurgica operatio, quæ vulneris amplitudinem requirat. De medicamentorum necessitate, & congruentia satis, superque actum est superius.

*Tunc tantum conveniunt linamenta quando necessaria est aliqua manualis operatio.*

Possè verò absque turundis, & penicillis præpediri, ne vulneris labia immaturè jungantur, non est difficile ostendere; vulnus enim cavum, de quo solo potest esse quæstio, nam ejus, quod simplex est, nihil, omnium consensu, inter oras agglutinandas



das interponi debet, aut est latum, & amplum, aut angustum, & stricti, ut ajunt, orificii, & utrumque vel est profundum, vel potius superficiale. Si vulnus latum sit, ac superficiale, nemini dubium est vanum esse inter labia ipsius aliquid ponere, ut immaturus coalitus impediatur, atque puri liber servetur exitus, siquidem quod generabitur, delitescere in tali vulnere, ac retineri non poterit, labia verò cum distent, quomodo coibunt? Aliàs dictum est, & in eo omnes consentiunt, ut labia vel simplicis vulneris agglutinentur, requirit, ut ad mutuum, contactum adducantur, & adducta conserventur. De labiorum igitur coalitu ante reparationem deperditæ substantiæ, cujus interventu ad pristinam continuitatem redire debent solutæ partes, non est dubitandum. Pariter si vulnus profundum sit, verum amplum, & satis patentis orificii, quamvis citra multi puris generationem non possit res transigi, neque necessarius est turundarum, & penicillorum usus, ut vulneris orificium apertum servetur; nam cum labia satis distent, agglutinari non poterunt, sed expectanda est ipsorum unio ab interventu novæ carnis, quæ non statim generatur, sed tunc tantum, quando subjecta caro convenientem habuerit dispositionem, unde generatio puris præcedat, oportet, ac ipsius expurgatio, qua ratione dicebat Hip. l. de ulceribus: Ulcera non purgata non committi solent, etiamsi adducantur, neque sua sponte coeunt: si adducta non committuntur, scirem ego libenter, quonam medicamento uterentur, qui turundas ita complectuntur, ut sic distantia coirent? Neque etiam post vulneris expurgationem credendum est, claudi posse vulneris orificium, antequam cavitatis profunditas si repleta, citius enim semper generatur caro in fundo, ubi naturalis calor est robustior. Continuis quoque excrementorum affluxus ad vulneris orificium in causa est, ne labia coeant ante cavitatis repletionem, humecta enim caro, dicebat Gal. coire nequit, & hoc in dies, experimur. Licet autem his de causis non coeant vulneris labia ante cavitatis repletionem, mirum tamen apparet naturæ artificium in curatione vulnerum, quandiu regulariter operatur, quæ paulatim cavitatem repleat, & uniat, orificium servans ad excrementorum expurgationem, donec cavitas sit repleta, & nihil sit amplius, quod expurgari postulet.

*Artificium  
naturæ.*



Admittunt aliqui probam carnem adnasci non posse vulneris orificio ante ipsius expurgationem, mollem tamen quamdam carnem succrescere dicunt non rarò, quæ nisi turunda immittatur, si vulnus fuerit punctum inflictum, ejus orificium clauderet, ac puris expurgationem prohiberet. In nostro tamen curandi modo, quoniam robori naturalis caloris consulitur, non succrescit mollis hæc caro, priusquam proba in cavitate sit genita, in ea saltem quantitate, quæ vulneris expurgationem possit prohibere. Non ergo, ut servetur patens ampli, & profundi vulneris orificium, conveniunt linamenta.

Sed neque propter usum medicamentorum, præterquam enim quod plus affert damni, quam utilitatis crebra illa medicamentorum impositio, si quandoque necessaria fuerit vis alicujus medicamenti, non erit machinari difficile, etiamsi linamentis non excipiat medicamentum, ut vis ipsius ad fundum vulneris penetret? hoc enim à congrua medicamenti forma habetur. Et ideo Gal. 3. Meth. 4. ut hoc consequatur, turundis, aut penicillis non excipit medicamentum, sed liquat. Semper autem supponimus, idoneum effluxum adesse pro expurgatione materiæ. Si verò angustum sit vulnus, cum vel sectione, vel unica, aut altera turundæ immissione ad tantam amplitudinem reduci possit ejus orificium, quanta satis est ad ejus expurgationem neque hic necessarius erit linamentorum usus, ut vulnus hians servetur, modò cuncta observentur, quæ ad subfluxiones attinent. Neque hæc sibi adversari existimes, semel, aut bis in tali casu turundam imponere, & usum turundarum ablegare, ut illis servetur reclusum orificium vulneris: quando enim semel in casu proposito adhibetur turunda, non id fit ea ratione, ut conservetur apertum osculum vulneris, nam in hoc casu non semel esset imponenda, sed ut paretur effluxus. Sed quid, si loca periculosam sectionem faciant? rarum est admodum nullam prorsus posse fieri sectionem, & quando hoc contingit, non minus periculosus esset turundarum usus, ut quæ partem nervosam distendant, & sævos dolores concitent, quod nisi esset, semel, aut bis immitti turunda posset. Quando tamen aditum turunda habuerit, egredi non minus poterit materia, si cætera ritè peragantur. Hæc grano salis, ut ajunt, intelligi volumus; neque enim, si cu-



si cujuscumque vulneris sanationem propter complicationem alterius affectus, vel in gratiam alterius vulneris, remorari oporteret, linamenta reprobarem: imò necessaria prorsus essent. Defecisse neque me iudices, qui fines explicans, propter quos linamentis in curatione vulnerum utimur, istius non meminerim, nam quæ ad vulneris curationem faciunt, intentio erat proponere, non quæ illam impediunt.

*Conveniunt  
linamenta  
quando re-  
moranda est  
sanatio vul-  
neris in gra-  
tiam alterius af-  
fectus.*

Quòd verò quandoque oporteat vulneris sanationem impedire, patet in vulneribus thoracis, & abdominis, cum unà aliquod viscerum est læsum, cujus curatio longiori tempore absoluitur, quàm externi vulneris, quod si carnosam tantum partem habeat, ex se non est magnum, & ut reliqua vulnera in carnosa parte existentia, non multum profunda, brevi sanari potest. Ut ergo ab interno vulnere pus emanans expurgetur, cum alia non adit via, externi vulneris sanationem prohibere oportet, quamdiu internum vulnus expurgatione indiget, quo purulenta materia per ipsum effluat. Atque ita tunc necessaria est turundæ impositio, cujus verò sortis suo loco explicabitur. Idem est, si vulnerato thorace, multus sanguis intra ejus capacitatem fuerit effusus.

Si ergo non sunt necessariae turundæ in vulneribus, nisi in supradictis casibus, neque conveniens earum usus censei debet, si quæ bona, vel mala afferant, consideremus: partem enim comprimunt, ac distendunt, eidemque sunt oneri, unde & ad commovendam fluxionem non parvam vim habent. Præternaturale etiam est, ac molestum parti vulneratæ à re extranea tangi, cum prius non alia nisi naturalis partis communione frueretur. Addamus, quod turundæ, ac penicilli, & omnia denique linamenta brevi purulenta materia imbibuntur, & inde malam qualitatem naturalibus partibus adversam acquirunt. Habent hoc insuper, quod pus supprimunt potius, quàm evacuent, nisi fenestratæ sint, seu cannulatæ. Hinc Hipp. earum usum damnat 5. morb. pop. text. 13. loquens enim de Massiliensi, cui currus onustus inductus est supra costas, ut costas confregerit, & per tempus substiterit ipsi pus infra costas, hæc habet: Ultus sub splenem penicillis, & linamentis utebatur, & pervenit ad decem menses. Refecta vero cute caverna apparuit ad tenue intestinum utrinque procedens,

*Damna ex  
usu turun-  
darum pro-  
venientia.*

*Damnatus  
usus turun-  
darum ab  
Hipp.*



& ad renem, & ad ossa procedebat putrida. In hoc non animadvertum est, quod & corporis habitus biliosus erat, & in corpore putredo sicca tenuis intestini multa, & aliarum carnum, quas statim ejicere oportebat, si quis potuisset, sicco pharmaco, dum robur aliquod homo habebat, nam ab humidis nihil remittebatur, sed putrescebat, à linamentis verò inditis, cum humor sisteretur, rigor corripiebat, & febris, & magis putrescebat.

Dicet quipiam, librum hunc non esse Hipp. sed librum de Ulceribus adeamus Hipp. omnium consensu legitimum, ubi tex. 2. sic loquitur: At vero recentia vulnera omnia tum ipsa, tum circumsitæ partes minimè inflammationem incurrent, si quis quàm citissimè suppuret, & pus ab osculo ulceris non interceptum supprimatur; quibus verbis procul dubio suppressionem puris denotat à turunda factam: in hoc forsan carpens Medicos sui temporis turundis utentes. Unde apud ipsum legimus, quod in vulnera instillet, illiniatque vulneribus, & inspergat, non autem quod turundas, aut penicillos imponat. Ita esse comperies, si libellum de Ulceribus percurras. Nec est, quod aliquis dicat, hoc ab Hipp. supponi, nam ubi de fistulis pertractat, expressam facit turundarum, & penicillorum mentionem lib. quoque de vuln. cap. apertè linamenta reprobant, nisi ad amplum reddendum vulnus, quando in osse operari oporteat; necessarius sit eorum usus, tex. enim 18. dicebat: Ulcus in capite nullo humore humectare convenit, ac ne vino quidem, neque cataplasmate contegere, neque linamento curationem facere. Et inferius. At in reliquo capite ulcus neque linamentis, neque cataplasmatibus, neque deligatione curare oportet, si non & sectione opus habet. Quod & ex tex. 20. colligi potest. lib. de fract. quando agit de fract. cum ulcere nullam facit linamentorum mentionem, neque lib. de artic. agens de luxatione cum ulcere.

Galenus in hac re varius videtur, nam lib. de fract. com. 3. tex. 21. vulnera absque linamentis curat, inquit, enim: Ego plures gravissimè vulneratos curavi apposis super ipsum vulnus (ecce neque turundas, neque alia linamenta adhibet) linteis multiplicibus ejusmodi vino madentibus, superadditaque superius molli



molli spongia , quæ diem , ac noctem totam subindè perfunde-  
batur : supposito tamen ipsi membro vulnerato , ad pedes vide-  
licet , corio leviter concavo , ut per id affusum vinum , quasi per  
canalem , deflueret , quod deinde pelvi vacua exceptum denuo  
possit affundi. At §. de com. med. per gen. cap. 10. in descrip-  
tione unguenti Isidis ex Critone usum linamentorum probare vi-  
detur , quatenus admittit , quæ de Isidis usu à Critone dicuntur ,  
sic enim ait Crito : Isis , quam nonnulli Epigoni vocant , per se  
ad squamarum abscessus facit , item crassorum ossium fracturas  
innatantes juvat , linamento , vel splenii modo imposita. Et infe-  
rius : Ipsa temperata ad omne vulnus linamento , & splenii instar  
adhibita valet. Idem habetur pluribus aliis in locis ejusdem li-  
bri. Iisdem usum fuisse Galenum colligitur. 6. Meth. 3. inquit  
enim , de curatione vulnerum nervorum cum eorum denudatio-  
ne loquens : Si vero robustus sit , qui vulnus accepit , & cui cor-  
pus sit à supervacuis humoribus mundum , in his fas est valen-  
tioribus remediis nonnullis uti , veluti ipse aliquando , cum id  
genus vulneris in carpo accepisset juvenis quidam Philosophiæ stu-  
diosus , alioqui corpore bene habito , & tunc æstivo tempore  
perusto , ex Polyidæ pastillis sapa solutis , postea super calida  
aqua tepefactis linamenta imbuta imposui. Et si percurramus  
Galenilibros de com. med. per gen. comperiemus usum linamen-  
torum esse valde antiquum.

Argumentis , quæ necessitatem usus turundarum , & peni-  
cillorum , seu linamentorum probabant , non est difficile ex di-  
ctis satisfacere. Ad primum enim dicimus , ex usu potius , quàm  
ex ablegatione turundarum , & linamentorem generari posse ul-  
cus illud ferinum Hipp. posteaquam osculum vulneris occludunt ,  
& pus supprimunt , & præterea fluxionem advocant : & quidem  
non mediocria mala ex eorum usu subsequuta frequenter obser-  
vavi , nam pus suppressum malam qualitatem acquirit , in angu-  
sto , & calido loco detentum , partem distendit , & propria mole ,  
& vaporibus , quos mittit , & hi halitus , cum pravi sint , maxi-  
meque ob tenuitatem penetrent , partem male admodum affici-  
unt : non mirum igitur , si inflammationes , abscessus , putredines ,  
& corruptiones partis adveniant : quorum tamen causam , adeo

excitati



excæcati sunt, non in pravam curationem, sed in aliud quoddam infortunium referunt, veluti faciebant illi Chirurgi Hipp. tempore, qui male fracturas cum ulcere deligabant, cum enim inde multa mala sequerentur, non tamen, ut refert Hipp. lib. de fract. deligationem hinc inde factam, sed aliud quoddam infortunium causam dicebant. Quidam amicus meus, in hoc maximè delinquere solitus, ad astra confugiebat. Profecto si astra valent hominibus malum afferre, inimicum aliquod astrum illis esse censendum est, quibus talis curandi modus adhibetur: unde non male omnino astrorum aspectus damnabat. Omitto, quod turundæ, ac linamenta curationem protrahunt, quoniam hoc aliquibus placet. Mira turundarum virtus, vulnus replent, cui adhibentur, & crumenam exhaustiunt, quam nec tangunt. Sed hæc missa faciamus. Imponere igitur turundas, & linamenta id est, quod pus suppressit, & ulcus ferinum facit, non autem citra usum ipsorum curationem facere. Nam quando non immittuntur, os vulneris manet patens, & continuo purulenta materia potest excerni absque ullo impedimento, nullaque fluxioni præstatur occasio. Neque est, quod vereamur de immatura labiorum agglutinatione, siquidem, ut coalescant, necessarium est, ea ad mutuum contactum adduci, at nos potius curamus, ut distent, cum absque generatione carnis uniri nequeant, quæ tamen ante vulneris ex purgationem generari non potest: atque ne prius generetur in labiis, quam in profundo, in causa, est quod calor magis viget in fundo, quàm in labiis, & quod materia indesinenter affluens eadem humectat, & ita generationem carnis remoratur, sicut & ipsorum agglutinationem prohibet: quam etiam à principio impedit medicamentum, quod labiis vulneris admoveamus, quandoquidem, ut coalitus fiat, nihil inter oras agglutinandas contineri debet. Sed instabit aliquis, si turundarum usus malus est, quomodo ex ipsarum usu tot vulnerati sanitati restituuntur? Hujus argumenti solutio peti potest ab eo capite, in quo explicavimus, cur vulnera sanentur, etiamsi male curentur. Natura robusta sæpè errata contemnit, ut dicebat Hip. lib. de vet. Med. non semper uti turundis est maximum, & incorrigibile damnum.



Ad secundum facilis est responsio, quando medicamentis indigeremus ad curationem vulnerum, tali forma parari possent medicamenta, per quam absque turundarum, & linamentorum ope vis ipsorum ad unamquamque vulneris partem perveniret, immo longe melius; nam quando vulnus est valdè profundum, & angustum, non possunt admoveri linamenta omnibus vulneris partibus. Quod si liquabile medicamentum eliquemus, facile erit usque ad ima vulneris illud injicere. Et Galenus ipse liquabat medicamenta. Sed instabit aliquis, non satis est, si medicamentum perveniat ad unamquamque vulneris partem, sed insuper requiritur, ut vis ipsius perduret; laudanda igitur sunt linamenta, quæ longiori tempore medicamenta servant vulneris partibus hærentia: quæ enim instillantur, cito exeunt, vel ad unam tantum vulneris partem se recipiunt, & nunquam omnes tangunt, cito etiam cum excrementis confunduntur. At jam diximus, nos medicamentis curationem non facere, paucisque tempore ipsorum virtute nos indigere.

## CAPUT XLVI.

*De erratis, quæ in hoc curandi modo committi solent.*

**D**UO potissimum errata committi solent in hoc curandi modo, unum est nimis arcta deligatio, cujus ratione continetur *Primum error. raturum est nimis arcta deligatio.* git, ut pars notabiliter vulnerata, dum in tumorem attollitur, quod fit crebro in magnis vulneribus, juxta illud Hipp. Si in vulneribus fortibus, & pravis tumor non appareat, ingens malum. non leviter comprimatur à deligatione, etiam si à principio non videretur nimis arcta, unde dolores, ac fluxiones.

Secundus error plerumque parum, vel nihil curationi officit, sed turpem semper reddit cicatricem, interdum etiam sanitatem remoratur. *2. error.* Consistit hic error in mala labiorum compositione, malè autem potissimum committuntur labia, quando multipliciter secta, & lacerata est pars carnosæ, & præsertim si in penitioribus partibus substantia carnis, vel ossis deficiat, ex hoc enim facile accidet, ut labia vulneris inæqualiter commit-



tantur, & unum altero sit depressius, & non è directo sibi invicem respondeant, ob idque sanato vulnere turpis cicatrix remanet. In capite præsertim talis labiorum inæqualitas sanitatem remoratur, eo quod pili depressionis labii inter oras agglutinandas interponantur, & quamvis eos scindas, & auferas, nihilominus renascuntur.

*Quomodo  
evitetur, &  
emendetur  
primus error*

Primum errorem devitabimus, cavendo maxime à principio ab arcta deligatione, nihil aliud à deligatione quærentes præter retentionem appositorum, nisi vulnus sit simplex, cui agglutinativam deligationem diximus convenire. At hujusmodi vulneribus non superveniunt effatu digni tumores. Quod si à principio laxa facta fuerit deligatio, sed superveniens tumor fecerit, ut pars vulnerata comprimatur à deligatione, quod ex majore partis mole, dolore, tactuque ipso cognoscitur, tunc neque opus erit vulnus solvere, sed erit satis fasciam aliquibus in locis scindere, donec tollatur compressio. Et si postea subsidente tumore laxior, quàm oportet, conspiciatur, ut ob id periculum sit, ne superposita vulnere contineri ab ipsa possint, incisæ partes consui poterunt. Quin superinjecta alia tenui fasciâ, licebit arctius deligare. Non aliter consulitur, quando à principio nimis arctè deligatum est. Omne studium adhibendum, ne in hujusmodi errorem incidamus, quoniam una hac ratione contingunt sæva symptomata in vulneribus, & præsertim capitis cum detectione membranæ: ut in decima nona in quodam orta fuerit universalis convulsio, quam Chirurgus, qui curam vulnerati habebat, propter contentam in vulnere saniem provenisse existimans, ut saniei daret exitum, fasciam aliquibus in locis secuit, sed tamen pus non apparuit tunc temporis, neque etiam altera die. Cum autem symptoma illud exinde fuerit sedatum, compertum est, arctam deligationem totius mali fuisse causam, & eo magis id creditum est, quòd cum postea detegeretur vulnus, quod maximum erat, factum videlicet à telo secante cum deperditione tantæ substantiæ totius ossis, & cutis, quanta est latitudo panis sacrificiorum, nec non & subjæctæ membranæ offensa, tumefactam fuisse membranam deprehensum est, & substantiam quandam ferè ad ovi gallinacei magnitudinem separatam.

Secundo



Secundo errori occurrimus, si aut futura, laxa tamen, aut glutine nostro supraposito labium illud, quod non probè suum *Quomodo* locum obtinere cernimus, cum sibi opposito diligenter conne- *secundo er-* ctamus, ita tamen, ne fiat talis adductio, ut impediatur effluxus. *ratur.* Modum tamen hunc praxis clarius ostendet, quàm scriptura, & ob id satis esse est admonitum.

Solet etiam error non contemnendus in applicatione medi- *Tertius* camenti committi: existimant enim nonnulli si linteum terebin- *error.* thina illitum extrinsecus vulneri apponatur, satis esse ad fovendum calorem, non animadvertentes magnum discrimen esse inter vulneratas partes, cum aliæ sint carnosæ, multoque calore præditæ, aliæ vero excarnes, & exangues, paucique caloris; quo fit, ut illæ robustas habeant naturales facultates, istæ vero debiles: neque eandem esse noxam, quam inferunt hæc, & illa vulnera, alia siquidem fiunt à telo secante, alia à telo contundente, & lacerante, & in aliis multa deficit cutis portio, ac etiam carnis; vel saltem contusa est, & malè habet ferè demortua, in aliis verò exigua: & ideo non æqua est naturalis caloris jactura, & ex consequenti, neque medicamentum quoquo modo applicatum poterit naturalem calorem tueri, ac fovere.

Quando igitur pars vulnerata est exanguis, & paucò calore *Quomodo* prædita, aut non levem jacturam passus est naturalis calor, non *evitetur ter-* satis est linteum medicamento illitum extrinsecus apponere, sed *tius error.* priùs vulneri admovenda sunt parva splenia ex filis evulsis eodem medicamento illita, dein superponendum linteum; sic enim perbellè fovebitur naturalis calor. Quin si valdè langueat naturalis calor, cum maximo fructu admovetur emplastrum, quod vim habeat naturalem calorem fovendi, ac roborandi, nec non & succos reprimendi, diutiusque vires suas possit retinere.

## CAPUT XLVII.

*De venæ sectione in vulneribus.*

**U**T vulneratis particulis deperdita restituatur unitas, nec sit quodpiam, quod naturam propria exercentem munia in-  
 Pp 2 ter-



terturbet, aut remoretur, non solum de procuratione vulneris, atque de localibus auxiliis sollicitos nos esse debere dicebamus, verum & de succis, ac toto corpore, ex his enim, ut superius vidimus, non mediocria mala vulneribus supervenire consueverunt. Immo propter succos ex ipsa vulnerata parte aliquid non raro accidit toti, quod non leve facessit negotium, siquidem in plethoricis. & cacochymis, vulnerum etiam parvorum occasione febres pravæ accendi solent. Cum igitur jam explicaverimus, quæ ad procurationem ipsius vulneratæ partis attinent, reliquum est, ut quæ cura succorum, ac totius sit habenda, consideremus.

*Quid præ-  
stet victus  
ratio.*

Tribus igitur illis artis Medicæ instrumentis, Diæta scilicet, seu ratione victus, Pharmacia, & Chirurgia, succis, ac toti consulimus. Victus enim ratio non solum fluxionem inhibere potest, & materiam fluxionis subtrahendo, & occasionibus ejusdem occurrendo, verum etiam congruam materiam pro carnis generatione, & glutine subministrare, ac vires roborare. Phar-

*Quid phar-  
macia.*

macia verò & subtrahere materiam fluxionis, & excrementorum potest, & revellere, & ineptos reddere succos ad motum, eisdemque corrigere, vias angustas reddere, influentes succos repellere, & tandem præparare sanguinem, ut sit congrua mate-

*Quid Chi-  
rurgia.*

ria glutinis, & carnis, & naturalem calorem roborare. Sicuti & ipsa Chirurgia & evacuare, & revellere potest. Quare de unoquoque istorum instrumentorum seorsum agendum est. Principium vero ab ipsis præsidiis Chirurgicis sumemus, ut quæ ad inhibendam fluxionem omnium maximè valent.

*Venæ sectio  
principatum  
obtinere in-  
ter remedia  
fluxionis.*

Inter omnia verò præsidia, quæ ad id conducunt, & ad prohibendam inflammationem, principem locum omnium consensu obtinet venæ sectio, cujus quidem rei ratio, ut innorescat, supponere oportet, quod aliàs ostensum est, vulneratam scilicet partem inflammationis periculo esse expositam pluribus de causis, primò quidem, quoniam & ob dolorem, & vulnus evadit imbecillior, ut etiam dicebat Gal. 3. Meth. 4. namque, ut aliàs dictum est, ob evacuationem sanguinis, & spirituum dissipationem, & detractionem partium, quæ nunquam antea fuerunt ambientem expertæ, & disjunctionem partium, quæ se mutuò fovebant, fieri non potest, quin calor naturalis illius partis imbecillitatem con-

trahat,



trahat, & ex consequenti tota pars, qua ratione redditur facilis ad recipiendum, quod ad eam aliunde transmittitur.

Secundò quoniam propter evacuationem sanguinis è vulnere movetur sanguis ad vulneratam partem successione quadam, quasi vi vacui, & attractus etiam, veluti contingit per venarum sectiones in humorum fluxionibus; videmus enim, quomodo venæ sectio sanguinem aliò fluentem retrahat. Tertiò quoniam natura quod molestum est expellere desiderans, cum primis conatibus nihil profecit, vehementius aggressa, quod infestat, expellere, sanguinem, & Spiritum ad effectam exprimit, ut etiam fortius fiat expulsio, unde cum pars vulnerata jam sit imbecillior, & nequeat tantam sanguinis copiam conficere, & regere, necesse est, ut ibi manens ad putredinem convertatur, hinc inflammatio. Immò etiam si natura copiosorem sanguinem ad partem vulneratam non transmittat, sed solum quod illius tempore antea consueverat, attamen & hic quandoque ad concitandam inflammationem sufficit, posteaquam ob imbecillitatem nequit eam alimenti copiam conficere, quam antea, & ideo quod relinquitur, ad putredinem convertatur necesse est, & sic inflammatio facile evenit, qua de causa Gal. 3. Meth. 4. Atque etiam si quod affluit pro naturæ modo se habeat, attamen vires ipsæ partium, quæ tum propter dolorem, tum etiam ex vulnere sunt imbecillæ, ne quod justum est ferent, sed veluti ab injusto gravabuntur: atque hinc omninò superfacua sanies proveniet: mirum etiam nisi & phlegmone.

Tandem quoniam ob vulnus tota sanguinea massa commovetur, & rationem irritantis subit. Ut igitur periculum inflammationis eviretur, necesse est, ut superius dicebamus, & indigentiam alimenti inducere, quo natura sanguinem sibi necessarium pro alimento retineat, non alio transmittat, nec non & studere, ut longè à parte vulnerata revellatur. Indigentia alimenti pluribus quidem modis induci solet, nam & inedia, & tenui victu, & frictionibus, & balneis, exercitatione, & hujusmodi aliis præsidiiis inducitur, quibus etiam præsidiiis levioram plethoram auferri Gal. pluries docuit: sed quoniam urget periculum fluxionis in vulnerato, & periculum est in mora, hujusmodi autem præsidia non nisi longiorii



*Venæ sectio  
optimum  
omnium re-  
medium ad  
tollendam  
copiam, &  
indigentiam  
inducen-  
dam.*

tempore operam suam præstant, idcirco talibus non debemus esse contenti, immò aliqua ex iis omninò sunt prætermittenda, tanquam maximè noxia, videlicet frictiones universales, & balnea, quia humores attenuant, & fluxiles reddunt, & ipsum balneum insuper, si qua pars est in corpore imbecillior, ad ipsam humores commovet. Exercitatio quoque ipsa nemini dubium est, futurum, ut obsit potiùs commovendo ad partem vulneratam succos, quam evacuando proffit. Cogimur ergo adinvenire præsidium, quod celeriter, & efficaciter scopum hunc adimpleat, & nocu-mento careat; hujusmodi est ipsa venæ sectio, hæc enim sangui-nem confertim evacuans, confertim etiam inducit hanc indigen-tiam. Huic igitur primo scopo apprimè satisfaciemus venæ se-ctione.

Prætereà sanguis minùs influit, dum minùs abundat, sub-trahitur enim materia fluxionis; at minor redditur celeriter ipsa venæ sectione, igitur & hæc vulnerato competit, tanquam ea, quæ materiam subtrahit, quæ aliàs influere posset.

*Venæ sectio  
optimum re-  
medium ad  
inhibendum  
sanguis mo-  
tum.*

Denique cum sanguis inflammationem concitet, motus ad partem vulneratam, aliquo opus erit præsidio, quod ipsum cele-riter retrahat, si moveatur; vel si adhuc non moveatur, con-trarium motum concitet, & aliò convertat, quod quidem multa præstare solent, nam & frictiones, & vincula, & sinapismi, & alia multa ad id faciunt, at omnium maximè, & celerrimè præstat venæ sectio, ut quæ immediatè sanguinis impetum convertat ad partem, in qua secatur vena. Contrarius siquidem motus excita-tus in sanguine in causa est, ut si nondum influat sanguis ad par-tem vulneratam, prohibeatur talis fluxus, quia aliò retrahitur san-guis, & si influit, ut sistatur talis motus, contrario motu excitato. Quocirca pluribus nominibus manifestum est competere venæ se-ctionem in vulneratis, ut inflammatio prohibeatur, & ut eva-cuatorium, & ut aliò convertens præsidium. Hinc Galenus 4. Meth. 6. convenire detractionem sanguinis in vulneribus Hippo-cratis etiam testimonio comprobatur, idque perbellè deducitur ex textu 3. libri de ulceribus, inquit enim ibidem Hippocrat. Omni recenti ulcere præterquam in ventre expedit ex ipso statim sangui-nem plus minus effluere; (sic Galen. legit loco citato. Unde er-  
rorem



rorem noto in codice, qui vulgariter habetur, in quo sic legitur; Omni recenti vulnere præterquam in ventre conducit frequenter sanguinem defluere, prout opportunum esse visum fuerit; nisi sic intelligatur, frequenter conducit, ut sanguis defluat) quippe phlegmone minus tentabitur tum ulcus ipsum, tum quæ circumposita sunt loca.

Si igitur hoc ita se habet, quæro ab Hipp. cur conducit ex vulnere sanguinem fluere? hoc non alia de causa profectò potest contingere, nisi quia aufertur inflammationis, & putredinis materia, unde subjungit: Quippe phlegmone minus tentabitur tum ulcus ipsum, tum quæ circumposita sunt loca. Si ergo à vulnere non fluat quantum sanguinis expediat, quid agendum? profectò arte supplere oportebit ei, quod deficiet: Num igitur irritabimus vulnus, ut ex eo fluat sanguis? nemo sanæ mentis id faceret. Necessè ergo erit aliunde mittere sanguinem, quo non solum sufficiens sanguinis quantitas evacuetur, sed & aliò transmittatur sanguinis motus, & ideò Gal. loco citato postquam sententiam Hip. lib. de ulceribus proposuit, subjungit: Post hæc autem si verba, quæ in libro de ulceribus ab eo sunt scripta, tum quæ in aliis omnibus sæpè proposuit, recorderis, debere scilicet imitatore esse Medicum non tantum naturæ, sed etiam eorum, quæ cum sua sponte veniunt, conferunt, clarè jam Senis mentem intelliges, de sanguine, cum magna sunt vulnera, detrahendo. Si namque expedit in talibus fluere sanguinem, non autem effluxit, quod deest, ipse adjicias oportet. Hinc com. 1. in lib. de hum. tex. 12. & libro de cur. ra. per sang. mis. dicebat: Jam verò non solum incidenda vena est, cum subest plenitudo, sed etiam sine plenitudine in principio inflammationis, quæ sit vel ex ictu, vel ex dolore, vel ex partium exorta imbecillitate, unde 6. Meth. 2. in punctura nervi sanguinem detrahi jubet. Sed quod universaliter protulit, non est, quod ex particularibus colligamus.

Si verò tantum sanguinis effluxisset è vulnere, ut sublata esset ab eo fluxionis, & inflammationis materia, non oporteret sanguinem mittere, sublata enim fluxionis materia, levioribus præidiis aliò facilè verti poterit sanguinis impetus. Neque tunc adest, quod sanguinis missionem per venæ sectionem indicet, etenim venæ se-

*Quando  
non conve-  
niat venæ*



*sectio in vul-  
neribus.*

ctio est materia remedii, exempli gratia revellentis quidem, sed per evacuationem, seu evacuationis revulsivæ, vel derivativæ; at in proposito casu adest quidem indicans auxilium aliò avertens, sed nequaquam per evacuationem sanguinis confertim factam, ideoque Gal. loco citato dicebat: Si namque expedit in talibus sanguinem effluere, non autem effluxit, quod deest, & ipse adjicias, oportet, quasi velit dicere Gal. non est, cur sanguinem mittas, ubi effluxit, quantum est satis, seu, tunc tibi mittendus est sanguis, quando spontè non effluxit.

*A quo indi-  
cetur venæ  
sectio in vul-  
neribus.*

Verùm quoniam non licet ad alicujus præsidii usum devenire, nisi adsit, quod indicet, jure merito dubitabit aliquis, quid sit, quod in vulneribus indicet sanguinis missionem, non est enim dicendum, quamvis aliqui id fateantur, eam indicari à magno vulnere tanquam à magno morbo, si enim à vulnere indicaretur, esset vulneris remedium, quippe absurdum est dicere, aliud esse, quod curandi rationem præscribat, aliud, quod curetur, at sanguinis missio non est vulneris remedium, siquidem solutam unitatem in pristinum non restituit, sed agglutinans, exempli gratia, vel carnem generans, &c. Sed neque dicendum est, à futuro magno morbo, exempli gratia, inflammatione, eam indicari, id enim, quod nondum est, vim habere indicandi non potest, sed quicquid indicat, præsens est, nam indicat quicquid indicat, vel sui conservationem, vel sui ablationem, at quod nondum est, nihil est, quod conservetur, vel auferatur, unde dicebat Gal. 4. Meth. 3. Absurdum est id, quod non est, indicare. Quid ergo indicat venæ sectionem? profectò quando in vulnerato sanguis ad vulneratam partem movetur, dici posset, motum sanguinis eam indicare, siquidem tunc sanguis peccat motu. At si nondum moveatur, sed quiescat? si consideremus, non tantum causam, quæ morbum actu facit, vim habere indicandi, sed & quæ morbum factura est, cujus ratione dicebat Hip. 1. Aph. 3. Habitus exercitatorum, qui ad summum bonitatis attingunt, periculosi, si in extremo constiterint, neque enim possunt in eodem permanere, neque quiescere, cum verò non quiescant, neque possunt proficere in melius. Reliquum est igitur, ut incidant in deterius. His de causis bonum habitum statim solvere expedit, &c. protinus



nus tollitur omnis quæstio, quandoquidem sanguis in vulnerato, quamvis actu non faciat morbum, habet tamen rationem causæ morbificæ, quia facturus est morbum, eumque magnum, & propterea providere oportet, ne ipsum faciat; non faciet autem, si ad partem non feratur, hoc non contingit, si partim evacuetur, partim verò aliò convertatur: quare oritur indicatio venæ sectionis, & ut evacuatorium, & ut revulsorium auxilium. Quoniam enim morbus, qui timeretur, magnus est, idcirco etiam magno auxilio auferenda ejus causa, quare & hic pro scopo habemus modi magnitudinem, ut Galenus nullibi sit mendax. Alia quoque ratione mittitur sanguis in vulneratis, ne videlicet ob apparatus morbificum accendatur putredo in venis, vel si jam fuerit accensa, & facta febris putrida, eadem removeatur, sicuti in curatione febrium vulneribus supervenientium explicabitur, de hac enim venæ sectione hic non loquemur, ut quæ non conveniat vulnerato, ut vulneratus est. Mittitur tertio sanguis in vulnerato ad cohibendum sanguinis profluvium, sistitur enim impetus sanguinis ad vulneratam partem contrario impetu, mediante venæ sectione, concitato, sed & de hac venæ sectione suo loco. Convenire igitur in vulneribus magnis, quando non satis sanguinis ab ipsis effluxit, venæ sectionem, pluribus nominibus manifestum est.

Verum, quoniam non satis est, ut ad usum alicujus præsidii deveniamus, adesse id, quod præsidium illud indicat, sed insuper requiritur, ut nihil prohibeat antequam vena secetur, videre oportebit, atque perpendere, num quodpiam adsit, quod eam prohibeat. Hoc quidem potest esse virtus imbecilla, cum enim venæ sectio sanguinem evacuet, vitæ thesaurum, & cum eo etiam evacuentur spiritus, vires validas requirit, quæ eam possint perferre: Atqui plerumque in vulnerato vires sunt imbecilliores, vel ob ætatem, vel ob boni sanguinis penuriam, namque ut plurimum sanis hominibus infliguntur vulnera, eisdemque ictus alii, & casus ab alto contingunt, rarò ægrotantibus imbecillibus, unde fit, ut in vulnerato, aut propter ætatem, vel boni sanguinis penuriam abstinendum sit à venæ sectione.

*Prohibitio  
& permissio  
venæ  
sectionem.*

Et quod ad ætatem attinet, jam apud omnes receptum est,

Qq

neque



*Potest se-  
cari vena  
pueris ex  
Galeno.*

neque pueris, neque decrepitis mittendum esse sanguinem per venam sectam, quamvis pueris, ubi septimum annum attigerint, & boni sint habitus, tuto secari possit vena. Neque Gal. in pueris eam semper prohibuit, sed valdè parvos lib. de sec. excepit, vel integram tantummodo evacuationem inter dicit, dicebat enim primo ad Glauc. 14. His etiam & ætas annumeranda est, veluti accidens quoddam, quod probibendi integram evacuationem vim habet omnibus, neque enim pueri, neque seniores hanc sine noxa tolerant; quare manifestum est, ipsum non de omni evacuatione loqui, sed de integra, unde ex hoc loco multa alia Gal. loca interpretari possunt. Neque verendum est pueris secare venam, cum sanguinis profusiones non leves facilè, & sine noxa perferre quotidie observemus, sicuti & senem robustum sanguine refertum talem evacuationem posse perferre non est negandum. Et ideo Galenus septuagenario venam secuit. Propter penuriam boni sanguinis vires in uterum gerente solent esse imbecilliores, indigent enim sanguine, & ut eo alantur ipsæ, & ad sustentandum fœtum, ideoque Hip. 5. Aph. 31. Mulier uterum gerens secta vena abortit, & magis, si major fuerit fœtus. Sed neque id perpetuum est, nam sicuti eas purgat Hip. à quarto usque ad septimum, ita eo tempore posse sanguinis missionem perferre non est negandum, quando boni habitus fuerint, & naturæ robustæ, immo & reliquis mensibus, licet minus. Unde Celsus lib. 2. cap. 9. dicebat: Sanguinem incisa vena mitti novum non est, sed nullum penè morbum esse, in quo non mittatur, novum est: Item mitti junioribus, & fœminis uterum non gerentibus, vetus est. In pueris verò idem experiri, & in senioribus, & in gravidis quoque mulieribus vetus non est, siquidem antiqui primam, ultimamque ætatem sustinere non posse hoc auxilii genus judicabant, persuaferantque sibi, mulierem gravidam, quæ ita curata esset, abortum esse facturam; postea verò usus ostendit, nihil ex his esse perpetuum, aliasque potiores observationes adhibendas esse, ad quas dirigi curantis consilium debeat. Interest enim non quæ ætas sit, neque quid in corpore intus geratur, sed quæ vires sint. Ergo si juvenis imbecillus est, aut si mulier, quæ gravis non est, parum valet, male sanguis emittitur, emoritur enim vis, si quæ his supererat, & hoc modo erepta est.

At



## C A P U T XLVII.

307

At firmus puer, & robustus senex, & gravida mulier valens tutò *Sola virtus imbecilla* curantur.

Insignis quoque cacochymia huic auxilio reluctatur, nisi & *vena sectio-* unà sanguis abundaverit, quoniam in talibus adest penurîa boni *nem probi-* succi, qui tamen evacuetur per venæ sectionem, sed neque in *bet.* his adest indicans, ideoque Gal.6. Meth.2. in punctura nervorum, corpore existente cacochymo, non venæ sectione, sed purgatione utebatur.

Sed ne in iis, quæ præsentis loci non sunt, tempus contera- *Vires con-* mus, oblato vulnerato, si venæ sectione is indigere visus fuerit, *sideranda* illius vires diligenter perpendendæ, an scilicet hanc evacuationem *antequam* perferre possint, non solum quales in præsentia sint, considerando, *secetur vena* sed & quales sint futuræ: atque ut exactius perpendi possint, ætate *et quales* tem vulnerati considerare oportet, naturam & habitum ejusdem, *sint, et qua-* consuetudinem, præcedentem victus rationem, insuper, & re- *les futurae.* gionem, & anni tempus, ac cœli statum quibus semper aliquid est condonandum, ut quæ significant, vel vires esse adeo robu- stas, ut possint citra offensam perferre evacuationem, vel imbe- cillas ita, ut nullam utilem missionem sanguinis tolerare possint, vel medio modo se habere, ut neque omninò prohibeant hanc evacuationem, neque etiam justam admittant, sed tamen ali- qualem, & utilem: nam, exempli gratia, fervor æstatis, ut qui vires dissolvit, signum est imbecillioris virtutis, idcirco hoc tem- pore cautiùs agendum; frigus hiemis est signum, naturam indi- gere sanguine, & spiritibus, ut se ab ambiente tutetur, ideoque etiam tunc temporis cautiùs agendum; sicuti, & autumnò, quo tempore vires esse imbecilliores solent, & ob præcedentem æstum, & ob pravam victus rationem, idem est de regione calida: vere è converso vires sunt robustiores, idcirco tunc temporis audaciùs licebit sanguinem mittere. Et sic in reliquis est procedendum.

## C A P U T XLVIII.

*Quantum sanguinis sit extrahendum.*

**Q**uantitatem sanguinis extrahendi, id, cujus gratia venam se- camus, facilè demonstrabit; secamus autem venam in vul-

Qq 2

nera-



neratis, antequam genita sit inflammatio, ut materiam fluxionis subtrahamus, & ut indigentiam in corpore inducamus quo natura alimenti, egens, sanguinem contineat pro nutritione, non autem aliò transmittat, inflammationem facturum, & ut sanguinis motum aliò convertamus: at si inflammatio jam ceperit, ut etiam aliquid ab affecta evacuemus.

*Quando plus, & quando minus sanguinis sit extrahendum.*

Igitur quantò major, & majoris momenti adest fluxio, aut imminet, & quantò urgentius est periculum fluxionis, & quantò magis ob id subtrahenda est fluxionis materia, & major indigentia in corpore est inducenda, tantò major copia sanguinis est extrahenda. At in minori fluxionis periculo, & in minoris momenti fluxione, parcius quoque mittendus est sanguis, non enim existimandum est, eandem sanguinis quantitatem mitti debere, ubi cerebrum, vel ejus involucra sunt vulnerata, & ubi ad cranium tantum læsio pertingit, & ubi pars nervosa, atque carnosa vulneratur, & in corpore repleto, & paucò sanguine prædito, quandoquidem, ut in corpore plethorico subtrahatur fluxionis materia, & inducatur indigentia, ac sanguis aliò convertatur, longè major copia sanguinis detrahenda, quam in paucò sanguine prædito, vel eusarco; & parvum motum parva sanguinis quantitas detracta cohibet. Aliqua sanguinis quantitas in levioribus vulneribus superfluere dici non poterit, quæ in gravioribus erit abundans fluxionis materia, & à natura nequaquam detinebitur. Consideranda itaque erit quantitas vulneris, & vulnerati natura, ac status, & ex consequenti, quæ ad naturam, & statum ejus cognoscendum faciunt, cujusmodi est ætas, tempus anni, regio, consuetudo, habitus corporis, præcedens victus ratio, quantitas sanguinis ex vulnere fluxi, & hujusmodi, ex quibus quantum superfluat sanguis, conjectura quadam assequi licebit, & quantum sit fluxionis periculum, & ita quantum sanguinis mitti debeat.

*Conjectura quadam cognoscimus quantitatem sanguinis evacuandi.*

Dixi conjectura quadam, quoniam certo hæc sciri non possunt, sicuti nullius indicantis specifici, & determinati natura sciri ad unguem potest: unde nec certo metiri possumus quantitatem sanguinis evacuandi, sed conjectura conamur saltem accedere ad hanc quantitatem determinandam.

Cum autem evacuantia omnia præsidia viribus officiant, sed præci-



præcipuè , quæ sanguinem evacuant , ipsius naturæ thesaurum , idcirco vires considerandæ , ac videndum , an justæ quantitatis detractionem possint perferre , quod contra indicare appellant , tantum enim sanguinis extrahendum , quantum vires possunt perferre , unde & ipsæ vires sanguinis detrahendi mensuram quodammodo determinant. Quando autem vires dicimus , non tantum præsentis intelligimus , sed futuras , considerare enim diligenter oportebit , quales futuræ sint vires post evacuationem , ideoque , si quodpiam symptoma adfuerit , quod vires prosternat , neque sanguinis missione tolli possit , cujusmodi est convulsio , dolor immanis &c. non tantum sanguinis extrahendum , quantum extra heretur , si hæc non adesset , nam postea perseverante symptomate , vires concidunt , propterea Gal. primo ad Glauc. 14. Si quis simul distensione nervorum laboraverit , & sanguinis eguerit missione , neque huic tantum semel mittere oportet , quantum exigit morbus , sed aliquid etiam accidenti est relinquendum. Similiter si valentibus viribus ad aliquod opus eguerimus , exempli gratia , dum vulneratus est thorax , & necesse est , materiam contentam per sputum vacuari , ad quod opus valida expultrix requiritur , parcius mittendus erit sanguis , ne vires , quibus ad illud opus expulsionis egemus , ante operis perfectionem deficient.

Quod si insignis inflammatio in aliqua parte cœperit , venamque secuerimus è directo , cum qua aperiantur venæ partis , satis sanguinis extractum fuisse , indicabit coloris , & substantiæ immutatio , significat id enim sanguinem in partem jam fluxum deturbari ab illa parte : namque sanguis in phlegmone affecta particula , utpotè calidiori , ob fervorem alium colorem , & aliam consistentiam necessario acquirit , ac sit color , & consistentia sanguinis in toto existentis , unde Gal. lib. de cur. ra. per sang. mis. cap. 14. In quibus juxta venam sectam phlegmone est ingens , optimum est sanguinis , & in colore , & in consistentia mutationem expectare. Et secundo de ra. vic. in acu. tex. 10. Quicquid ergo sanguinis in phlegmone continetur , id caloris abundantia colore permutatur , reliquum autem in partibus omnibus simile manet. Eam ob causam sanguine , qui in totum spargitur corpus , pituitosiore existente , rubicundior sanè erit , qui in eo ,

*In inflam-  
matione im-  
mutatio co-  
loris sangui-  
nis præscri-  
bit quanti-  
tatem.*



quod phlegmone obsidetur, latere continetur. Quod si sanguis in corpus totum diffusus rubidus fuerit, is proculdubio, qui ad phlegmonem est, adustus, assatusque, in nigrum permutabitur. Lividus autem in ea, quæ fit à rubido ad nigrum, transmutatione, medium obtinet. Coloris igitur mutatio sanguinis ex particula inflammata translationem sufficienter commonstrat. Hoc etiam est Hipp. præceptum libro de ra. vic. in acu. loco citato, ubi rationem docet secandæ venæ in pleuritide. Neque tamen statim, ac apparet immutatio sanguinis, & pro rubicundiori, & tenuiori, exempli gratia, nigrior, & crassior exit, vel pro albidiori rubicundior, flaviorve, supprimenda est evacuatio, sed ulterius permittendum, si vires ferant, ut aliquid corrupti illius sanguinis educatur, ne, quod in venis est sanguinis, coinquinet. Vanum autem esset, coloris mutationem expectare, quando secatur vena remotior, cum qua non aperiuntur venæ partis, licet in eodem latere secetur, ut interdum contingit; non enim existimandum est, venæ sectionem, quæ ab eodem fit latere revellendi gratia, ab eo latere fieri semper, ut fiat etiam evacuatio à parte, namque in genuum inflammatione Gal. secandam ait in cubito ejusdem lateris venam, cujus tamen sectio nihil potest ab ipso genu educere. Præterea in fluxu sanguinis è naribus applicat cucurbitulam regioni hepatis, si à dextra nare fluat sanguis, lienis vero, si è sinistra, cum illis cucurbitulis nihil evacuetur. Dicendum est ergo fieri in eodem latere venæ sectionem, non ea tantum de causa, ut à parte inflammata fiat evacuatio, verum etiam, quoniam sanguis in latere, in quo est pars inflammata, maximè, & promptè admodum fluit in partem affectam ob maximam communicantiam, sive sensibilem, sive insensibilem, maximè enim sibi mutuò communicant partes ejusdem lateris: Quod si vena secetur in eodem latere, maximè revelletur ille sanguis, & insuper inanità venæ ab ipsa inflammata parte attrahent.

*Quando non sit expectanda coloris immutatio.* Neque etiam expectanda est coloris immutatio, si vires sint imbecillæ, aut non tantam sanguinis detractionem tolerant. Unde Galen. libro de cur. ra. per sang. mis. quando dicebat: In quibus juxta venam sectam phlegmone est ingens, optimum est sanguinis,



guinis, & in colore, & in consistentia mutationem expectare, subjungebat: Non tamen omni ex parte hæc expectanda est, sed est etiam quando antequam mutatio fiat, cessare conveniat: idque duplici nomine, ob infirmas videlicet vires, aut phlegmonis pravitatem: interdum enim nihil ab ea emittitur, sed inibi fortiter constrictus est. Si tamen vires exolui evacuatione nondum videantur (quod ex pulsu scies) &, si cui sanguis mittitur, ætare ut florenti, expectanda est mutatio, potissimum si ambiens sit temperatus. Non ignorandum tamen, ut animadvertit Gal. 2. de ra. vic. in acu. tex. 10. quando non possumus ob virium imbecillitatem, sanguinis mutationem expectare, minus utile futurum auxilium inflammatae parti. Præstat tamen minorem hanc utilitatem eligere cum virium constantia, quam cum insigni earum jactura redundantem sanguinem evacuare.

## CAPUT XLIX.

*Quo in loco secanda sit vena.*

**Q**Uando ergo in vulnerato secanda sit vena, & quando à venæ sectione sit abstinendum, & quantum sanguinis extrahendum sit manifestum, remanet, ut videamus, quæ ad rectum usum hujus præsidii pertinent. In primis considerandus occurrit locus, in quo secare venam oporteat. Cum autem illam præcidamus, *In remota, non ut evacuet tantum, sed ut simul revellat, quoniam revulsio & contraria fit ad remota, & contraria, idcirco remotus locus, atque vulne-* *parte secanda est vena.* ratae parti contrarius erit eligendus. Sicuti proximus, si derivandi gratia conveniret, cum derivatio fiat ad proxima.

Verum quoniam multi materiam hanc revulsione, & derivationis per sectam venam adeo confuse tradiderunt, immo tot difficultatibus involuerunt, & quæ ab antiquis sapientibus de hac re dicta sunt adeo obscurè, & perperam etiam sunt interpretati, ut haud facile sit unicuique intelligere, quomodo, & ubi pro sistenda humorum fluxione venam secare expediat, & multi, nec parvi momenti errores in dies committuntur, ut ipsi quoque tirones rem hanc cognoscant, & ne oblato vulnere cum laborantis periculo



periculo hæsitent, decrevi non per conclusiones rem proponere, sed ex propria rei natura demonstrare.

Supponendum igitur nobis est in vulneratis, aut nondum humores fluere, sed quiescere, quamvis propensionem habeant ad fluxum versus vulneratam partem, ut ferè possimus dicere, eos esse fluxuros, aut jam cœpisse confluere, atque vel nondum quodpiam effatu dignum in parte affecta receptum esse, vel jam aliquid collectum esse, quod negotium faceßat.

Prætereà materiam, quæ ad partem confluit, aut nondum esse parti impactam, sed adhuc intra vasa existere, aut parti esse infixam, & impactam. Amplius supponendum nobis est, materiam fluentem, aut paulatim fluere, ac modicè, aut confertim, & cum impetu.

Tertio supponendum, nos secare venam, quando revellendi gratia id facimus, ut impetum sanguinis coerceamus, ne videlicet partem vulneratam petat, mediante altero motu, quem ipsi sanguini tribuimus. Quapropter venæ sectio erit materia remediæ sanguinis impetum ad aliam partem à vulnerata convertentis. Ille verò sanguinis motus proximum erit fluxionis remedium: nobis enim propositum est motum excitare in sanguine, quo vel prohibeatur ad affectam partem confluere, si nondum cæpit moveri, vel si jam moveri cæperit, ab ipsa retrahatur.

Cum autem hunc motum inducat venæ sectio, proptereà quod, dum vena secta inanitur, consecutione quadam movetur sanguis in proximis venis existens ad ipsum sectionis locum, & dein etiam à remotioribus, & ita impetum quendam suscipit sanguis ad partem, in qua secatur vena, & aliis prætereà de causis, quæ aliàs explicatæ sunt, si invenerimus, versus quam partem convertendus sit sanguinis motus, ut à vulnerata parte arceatur, jam erit manifestum, quo in loco secanda sit vena.

*Non debet  
secari vena  
in parte pro-  
xima revul-  
sionis gra-  
tia.*

Primò quidem illud est perspicuum, quando adhuc non in-  
fluat humor, vel si jam ad partem vehementiori impetu confluere  
cœperit, & motum hunc proeuremus versus partem vulneratam  
proximam, non tantum attracturos ad partem illam sanguinem,  
quàm ad vulneratam ipsam, non enim sanguinis motum ita mo-  
derare possumus, ne terminum, ac metas propositas excedat, sed

attra-



attrahemus ad partem, ad quam primo intendimus, & simul ad proximas. Quod si in proxima aliqua insuper extiterit fluxionis causa, vel eadem fluxionis occasionem in se habuerit, certum est, fore, ut multo magis ad ipsam motum arripiat. Non ergo versus proximam partem concitandus est sanguinis motus, sed potius versus contrariam, & remotam. Nam si longius à parte affecta impetum suscipiat sanguis, & in contraria, longè faciliùs liberatam iri fluxione partem, non est dubitandum. Quare ad contrariam partem, & remotam movendus erit sanguis.

Verùm non satis est motum sanguinis ad partem remotam, & contrariam concitare, sed insuper necessarium est, ut hic motus sit talis, ut vis ejus opportunè ad eam partem perveniat, à qua timebamus motum sanguinis ad affectum locum, ac talis sit, ut sufficiat ad prohibendum ad eam motum, unde nisi in convenienti tempore ad eam perveniret, facilè contingeret, ut id postea esset frustra, vel neque etiam illuc pertingeret, eo quod interea ob moram sanguis ad affectam partem iter capiat: quapropter cum vehementiori impetu ad eam ferri cæperit, auxilium spernet tardè ad eam perveniens. Hinc colligo ad eam partem remotam, & contrariam attrahendum sanguinem, ad quam si *Ad quam partem re-* moveatur sanguis celeriter, & citra insignem jacturam virium ad *motam, & contrariam* mittentem partem (sic appellemus locum, unde sanguinem flu- *moveris* xurum timemus) possit motus consecutio pervenire. Et sic oportet, ut sit inter eas proxima venarum communio, seu consensus, quem alio nomine rectitudinem dicunt. Sed hanc doctrinam in tironum gratiam exemplo illustremus. Sit vulneratum brachium dextrum, remotissima pars à dextro brachio erit crus sinistrum, seu pes sinister, parùm refert, & hæc eadem pars ipsi brachio est opposita, & secundum dextrum, & sinistrum, & secundum sursum, & deorsum; si tamen secemus venam in sinistro crure, quoniam illa non habet communionem proximam cum majoribus venis, quæ sunt supra regionem renum, & cum venis præcipuè dextræ partis, à quibus maximè timetur fluxus, idcirco licet sanguis moveatur ad illam partem, antequam tamen vis hujus motus ad eas venas perveniat, necesse est, ut venæ omnes intermediae inaniantur, quæ cum sint multæ, nisi valdè copiosa

R r

fiat



fiat sanguinis missio, non perveniet vis motus ad venas illas majores: vel si fiat copiosa illa sanguinis missio, aut periclitabuntur vires, si tanta fuerit, quanta requiritur, ut sanguis in dextra parte existens versus crus sinistrum moveatur, vel parciore existente, tardè perveniet vis motus ad eam partem, & hebetata, atque obscura, aut nullo modo, & ita parum proficiet: nam primo inanità venæ tot intermediæ sanguinem suppeditant, ut antequam ad partem dextram sit perventum, ferè sedata sit illa consecutio, & continuatio motus. Non ergo vim habebit revellendi talis venæ sectio, aut obscuram, & cum insigni dispendio virium.

Verùm si quæ secatur vena non solùm fuerit in parte remota, & contraria, sed prætereà cum mittente ipsa communionem habuerit, si nondum cæperit sanguis fluere, arripiet motum partem illam versus, ut etiam qui in proximis affectæ parti continetur venis, retrahatur sæpè versus partem, in qua secta fuit vena, subiens locum ejus, qui priùs ad eandem latus est. Si verò cæpit fluere, retrocedet, si sufficiens fuerit motus in opposita parte concitatus. Quocirca vulnerato dextro brachio, si in sinistro cubito, vel in crure dextro secetur vena, quoniam & in hac, & in illa parte reperitur vena, quæ communionem proximam habet cum partibus, quæ transmittere maximè possunt ad partem affectam, celeriter exinanientur partes illæ, & ex consequenti sanguis in proximis affectæ partibus existens consecutione quadam movebitur ad contrariam partem in qua secta fuit vena, & ita peroptimè fiet revulsio. Hinc Hip. secundo de nat. hum. tex. 9. Procurandum autem est ut sectionem quam maximè procul ab illis locis faciamus, ubi dolores excitari, sanguinemque colligi noverimus, sic enim nulla magna permutatio repentè fiet, consuetudoque intercipietur, ne amplius ad eundem locum confluat.

*Explicatur  
locus ex 2.  
de natura  
hum.*

At si materia partim jam fluxit ad partem vulneratam, partim verò adhuc influit, utique hoc duobus modis potest contingere: uno quidem, ut simus adhuc in ipso fluxionis principio, & materia, quæ influxit, parvum faceßat negotium; alio verò, ut simus in ulteriori fluxionis progressu, ita ut effatu digna materiæ portio sese in partem receperit, quæ ob id magnum negotium faceßit, in parte eadem dolorem, atque calorem insignem, & jam



evidenter phlegmonem concitando. In hisce ergo casibus complicatae sunt indicationes, siquidem habenda est ratio non solum fluxuræ materiæ, & ejus, quæ actu movetur ad vulneratam partem, sed & ejus, quæ in parte continetur: quare, sicuti in complicatis indicationibus fieri consuevit, ad id, quod magis urget, erit attendendum, cæteris tamen, si fieri possit, non neglectis. Si ergo, quæ influxit materia, parum, aut nihil urgeat, & omninò ad se curam non trahat, non aliter rem tractare oportebit à principio, ac si nihil ad affectam partem confluxisset, curandum enim est, ut ad contrariam, & remotam partem concitetur motus sanguinis, ideoque secanda erit vena in parte contraria, & remota, quæ communionem proximam habeat cum mittente parte; deinde ut habeatur ratio fluxuræ materiæ, ejus evacuationem quoque moliri conveniet, antequam in parte impingatur, aut per eandem partem, aut per proximam, & eas, cum quarum venis simul aperiantur venæ partis affectæ. Duplici hac ratione vacuari potest, si pars sit externa, si interna unica tantum, videlicet per eas, quibus cum simul aperitur affecta pars. At si externa, & hoc modo, & etiam per ipsam partem, puta scarificationibus, hirudinibus venis illius partis applicatis, quæ locum non habent in partium internarum affectibus.

Ad aliam verò partem constat, nequaquam trahi posse materiam contentam, & evacuari, nisi vena secetur, quæ proximam communionem habeat cum affecta parte, per quam promptè sanguis in affecta existens feratur. *Altera re-*  
*similitudo.* Accidit enim, ut aperta hac vena, simul & affectæ partis venæ aperiantur, & ita innaniantur. Verùm si nondum quieverit fluxio, nec dempta sit fluxionis materia, nec per affectam partem, neque per proximam licebit materiam in parte existentem evacuare, plus enim erit, quod ad ipsam attrahetur, quam quod ex ipsa evacuabitur, nisi hoc fiat, ut melius revulsio peragatur, ut ipse Galenus monet sexto morb. pop. sec. secunda, textu nono, quamvis neque in hoc casu totius materiæ evacuationem tentare permittatur, sed alicujus portionis tantum. In hoc igitur casu ad hæc duo respiciendum erit, ut ad contrariam, & remotam partem vertatur fluxus sanguinis, & unà quoque id evacuetur, quod in affecta parte continetur.



Itaque si omnino contraria, & remota pars non detur, in qua sit vena utrique parti communicans, aliququaliter tamen sit remota, & contraria, quo utrumque munus expleat. Sic dextra thoracis parte inflammata, aut hepate ipso, interna vena dextri cubiti secta utrumque munus probè perficit, nam & communicat mittenti parti, & ei, quæ recipit, & inter eam insuper, & eam recipientem partem est contrarietas, si non exquisita, & exacta, saltem aliqualis, neque parum à se invicem distant, & ideo quatenus mittentem partem exhaurit, & recipienti est contraria, & in longinquo satis loco, revellit; quatenus verò recipienti communicat, evacuat, ut hanc propriè appellare liceat revulsionem evacuatoriam, seu evacuationem revulsoriam. Et hoc est, quod dicebat Galenus com. primo in libro de hum. textu decimo tertio. Atque Hip. quidem jubet revulsionem esse ad contraria faciendam, evacuationis verò gratia, è directo, unde subjungebat: Et quæcumque sanguinis profluvia è directo fiunt, ea maximam afferre ægrotantibus utilitatem affirmat, quæ verò contrario modo fiunt, tantum abesse, ut prosint, ut etiam interdum lædant, quod vires dissolvant, nec ulla morbi afferatur levatio, siquidem neque liene turgente sanguis ex dextra nare profluens, neque in jecinore, si à sinistra erumpat ullum usum parit. Ecce quomodo Galenus per è directo, κατ' ἑξιν Græcè, hic intelligit venam, quæ cum parte affecta communicat, in gratiam evacuationis ab ipsa parte. Si verò in parte jam fluxa materia negotium facessat, distendendo, doloresque concitando, & calorem accendendo, ut periculum sit in mora, hoc est, ne dum ad omninò contraria volumus fluxionem convertere, phlegmone in particula mirum in modum augeatur, maximèque, si alicujus momenti fuerit pars, cogimur statim evacuationem illam revulsoriam, seu revulsionem evacuatoriam moliri, venam eligentes, quæ sit in parte, si non omnino remota, & contraria, quæ saltem habeat aliquam contrarietatem, & majorem, quæ dari possit, modò communicet non solum cum mittente, sed etiam cum recipiente parte, ut evacuata parte, imminuatur quamprimum phlegmone, & dolor, atque calor majoris fluxionis causæ, eoque magis id agere oportebit, si phlegmone minetur periculum. Nec est, cur vereamur, ne ad partem affectam fiat



fiat attractio, propterea quod longè à parte illa fit evacuatio. Hinc Galenus ubi jam phlegmone partem occupavit, ab eodem latere revellendi gratia, venam secat in contraria parte, sic enim dicebat commentario primo in libro de hum. textu decimotertio: Itaque si dextra uteri pars malè affecta sit, è dextro brachio dextroque crure mittendus est sanguis (hinc derivationis, illinc revulsio- nis gratia) si sinistra, tum è membris illis detrahes, quæ illi recto tramite corresponsdeant. Si verò in supernis partibus quid inflammatione tentetur, ut in angina, inflammatione oculorum, & iis omnibus, quæ in capite sunt, usu venit, venas exteriores, & quæ ad rectitudinem sitæ sunt, incides: liene autem inflammatio- nem patiente, venam sinistræ manus internam secabis: si jecur, internam dextræ: artubus verò patientibus, evacuationem, sive revellere, sive derivare volueris, à conjugibus faciendam scito, nisi morbus sit diuturnus, &c. Hac etiam ratione libro de cur. ra. per sang. mis. dicebat: Revulsio quibus in directum adhibetur, evidentem utilitatem celeriter ostendit, quibus contra, haud etiam, & secundo ad Glauc. secundo, eadem propemodum profert, & pluribus aliis in locis. Nec mirum, si materiæ in parte contentæ habenda sit ratio, cum & ipsa nonnunquam nos cogat, ut dis- cussionem ejus interdum moliamur, etiam si adhuc materia fluat, ut causæ fluxionis, quæ ab ipsa prodeunt particula recipiente, re- moveantur, vel saltem minores reddantur, quæ in causa sunt, ut revellentia præsidia parum prosint, ut alias dictum est ex Galeno 6. morb. pop. sec. secunda, textu octavo.

Verum quidem est, plenitudinem in toto existentem quando- que prohibere, quo minus venam in latere affecto primitus sece- mus, & hoc, ne motum sanguinis, quo nimis repleta sunt vasa, versus latus affectum advocemus, unde periculum esset ne simul ad partem affectam moveretur, nedum ad eam, in qua secatur vena, cum pars illa exactam contrarietatem non habeat cum affecta. In tali igitur casu in parte exactè contraria, & quæ solummodo com- munionem cum mittente habeat, prius vena secanda, & minuenda plenitudo, dein pauca interposita mora, ad secandam venam, quæ parti quoque recipienti communicet, accedendum. Dixi verò quandoque, quoniam aliquando in eodem latere reperitur exacta



contrarietas, & cum hoc communio venarum, & inter mittentem, & recipientem partem, atque eam, in qua secatur vena, ideoque talis vena secta licet evacuet, ab affecta attamen etiam exquisitè revellit. Hoc accidit, quando fluxio in hepar procubuit, quamvis enim in latere dextro sit situm, interna tamen vena dextri cubiti, vel dextræ manus est eidem exquisitè contraria, cum ab eadem sit valdè remota, & hepar sit in intimis, vena verò in externis, & prætereà eidem maximè communicat, cum sit proximè emergens à vena cava, & parti mittenti insuper, namque transmissio ad hepar profectò fiet à majoribus venis ab illo exortum habentibus, & ideo eademmet vena partem mittentem, & recipientem evacuat, & ad remota, & contraria attrahet. Hinc Gal. 13. Meth. ij. in inflammatione hepatis cum totius plenitudine secat internam dextri brachii, ibidem namque dicebat: Supponamus, quod alicui nunc incipiat jecur inflammari, ante omnia considerare oportet, utrum sit in toto corpore plenitudo, & si hæc adfuerit, & æger nec fuerit puer, nec senex, & virtus valida, debemus secare venam internam dextri brachii, quæ per amplam viam societatem habet cum vena cava, & sic simul fiet evacuatio, & revulsio sanguinis fluentis ad ipsum jecur.

*Duplex venarum communio.*

Itaque duplicem communionem venarum considerare debemus, una quidem est partium mittentium, & venæ, quæ secatur, altera verò venæ, quæ secatur & affectæ partis, & mittentium partium. Prima tantum servanda, quando revulsioni solæ incumbimus, altera verò, ubi non tantum revellere, sed & à parte evacuare volumus, quam venæ sectionem Gal. propriè appellat per directum factam, seu κατ' ἵξιν, quemadmodum eam vocat Hip. Nec obstat, quòd toties clamet Gal. secandam esse venam κατ' ἵξιν, seu per directum, hoc est venam, ut ipsemet interpretatur 13. Meth. 9. cum qua venæ affectæ partis aperiuntur, certum est enim, Gal. semper supponere theoremata universalis. Loquitur ergo in iis locis Gal. de materia, quæ partim influxit, partim etiam nunc influit, & quæ influxit, negotium facessit, ut ob id in gratiam affectæ partis necessarium sit è directo venam secare, ut fieri simul possit evacuatio à parte, & revulsio, quamvis non exquisita fiat revulsio, unde tunc venæ sectio est materia duplicis indicati.

At



At si quid adesset prohibens venæ sectionem in eodem latere, cuiusmodi est plenitudo totius, vel magis posset plenitudo in toto ad indicandam sui evacuationem, nemini dubium est, si Gal. propriis decretis stare velit, à contrario, priusquam ab affecto latere sanguinem missurum, posteaquam com. 1. in lib. de hum. tex. 13. asserit, per directum secandam esse venam in gratiam partis, hoc est, evacuationis gratia. Ubi ergo hæc non urget, cur non exquisitæ revulsioni operam dabimus? vel cum aliquid sit in corpore, quod suadeat, magis huic indicationi attendendum, quam ei, quæ à parte desumitur, seu à materia in parte contenta? Habemus siquidem ab ipso, ubi plures adsint indicationes, semper eam esse præponendam, quæ cæteras vincit. Quod verò de materia in parte contenta, & negotium facessente dictum est, intelligendum quoque de materia prope affectam partem existente, & omnino in latere affecto, quæ mox præcipitatura est lethali incommodo in affectum locum. Hic enim, quando vires non perferrent, ut prius in opposito latere, deinde in affecto secaretur vena, statim in eodem latere secanda esset.

Et quod attinet ad rectitudinem, quæ est inter partem affectam, & secandam venam, seu communionem, quæ est inter *Duplex* *communio* *inter affectam partem & secandam venam.* utramque partem, animadvertendum est, interdum hanc communionem esse ita proximam, ut vena, quæ secatur, possit partem affectam exhaustire, eo quòd unà ipsius venæ aperiantur. Aliquando verò non aperiuntur simul, & semel affectæ partis venæ, sed exhauriuntur venæ, quæ proximè mittunt, ad affectam, & hæ inanitæ ab ipsa affecta attrahunt, & eam inaniunt. Hoc nisi admiserimus, defendi non poterit à Gal. servatam fuisse rectitudinem, quod tamen ipse profitetur, quando inflammata dextra uteri parte, revulsione gratia secat venam in cubito dextro, & inflammato uno crure, secat venam in altero, nam venæ sectio in cubito non potest exhaustire utrum, neque sectio venæ in crure potest quidpiam ab altero crure educere, sed utraque venæ sectio proximè mittentes partes evacuat, & ipsæ evacuatae ab ipsa affecta sede attrahunt. Sed distinctius hæc indicationes contemplemur.

Si nondum humores cæperunt confluere, sed tantum periculum est, ne in partem aliquam confluant, quia in ipsa parte adsint



adsint principia fluxionis, quæ aliàs determinavimus, puta imbecillitas, dolor, inanitiò, &c. ut in vulneratis à principio, profectò cum hìc immineat fluxio morbum factura, aliò avertendi sunt humores, ut pars reddatur ab ipsis tuta. Tuta autem maximè reddetur, si ad longinquas partes, & contrarias attrahantur. Hìc ergo sanguis est quietus, timemus tamen, ne iter arripiat ad partem vulneratam; ut hoc præpediamus, curamus, ut moveatur sanguis ad alias partes, ad quod præstandum, eligimus venæ sectionem, unde hìc una tantum est indicatio, ut videlicet sanguis quiescens motum arripiat ad longinquam, & contrariam partem vulneratæ, ex quo ipsa vulnerata reddetur tuta à fluxione. Indicans ergo est sanguis, quatenus habet propensionem, ut moveatur ad partem vulneratam, id, quod indicatur, est motus sanguinis ad partem contrariam, seu remedium movens sanguinem ad partem vulneratæ contrariam, materia hujus remedii est venæ sectio in contraria, & longinqua parte facta.

Nec objiciendum, quod citiùs, & promptius influat sanguis proximus parti vulneratæ, quoniam influat sanguis proximus parti vulneratæ, quoniam influit etiam propulsus à superveniente sanguine: quod si quis in aliis partibus continetur, à quibus poterit provenire sanguis propellens eum, qui proximus est vulneratæ parti, aliò convertatur, non solùm auferetur id, quod eum propulsare poterat, verum etiam consecutione quadam, & qui in proximis partibus continetur, iter arripiet ad eundem locum, & sic pars reddetur tuta ab influxu. Hoc est, quod dicebat Hip. 2. de nat. hum. tex. 9. Procurandum autem est, ut sectiones quam maximè procul ab illis locis faciamus, ubi dolores excitari, & sanguinem colligi noverimus, sic enim nulla magna permutatio repentè fiet, consuetudoque intercipientur, ne amplius in eundem locum confluat; quem locum Gal. explicat de sanis, in quibus timetur motus humorum in aliquam partem, dicebat enim: Quippe quod voluerit auctor assuefacere humores redundantes in alias ferri partes. Atqui vulneratus, in quo nondum succi moventur, est veluti sanus, & eadem omnino ratio ubique militat; neque est, cur quispiam dicat, hunc casum non dari in vulneratis, ut videlicet succi sint quieti, namque cum non paucos videamus vul-

neratos



neratos absque ulla omnino fluxione ad pristinam sanitatem reduci, etiam si nulla revulsoria præsidia administrentur, certum esse potest, in quibusdam vulneratis dari casum, in quo succi quiescant.

Neque turberis, quod dixerimus, indicans revulsorium præ-*Quid indi-*  
sidium esse sanguinem ipsum, cum aliter videatur statuere Gal.*et revulso-*  
qui 2. ad Glauc. 2. à positu affectæ partis hoc indicari tradit, ibi *rium præ-*  
enim non propriè sumpsit indicationis nomen, sed largo modo, *sidium.*  
pro eo, quod confert aliquo modo ad remediõrum inventionem, quemadmodum eam usurpat passim in lib. Methodi; positus tamen partis, si propriè loqui volumus, indicat, quoniam est signum indicantis, signum videlicet propensionis ipsius sanguinis; ab ipsa enim parte cognoscimus, in quam periculum instet, ne sanguis procumbat, & ita ipse sanguis est, qui indicat.

At si sanguis jam incipiat moveri ad partem, plures oriuntur indicationes, namque nemini dubium est, & primam illam indicationem locum habere, cum non totus influat sanguis, sed portio tantum, propterea, ne sanguis, qui etiamnum quiescit, excitetur ad motum versus partem vulneratam, oritur indicatio, ut ad maximè remota, & contraria attrahatur; qui vero jam ad partem influxit, si impactus sit, indicat, ut evacuetur per ipsam partem, si nondum sit impactus, ut evacuetur simpliciter à parte, qui vero influit, indicat & ipse, ut retrahatur ad longinqua, & remota. Si omnibus hisce scopis, remota venæ sectione, possemus satisfacere, hoc esset maximè eligendum, verum, quamvis qui nondum movetur sanguis, possit per venæ sectionem in longinqua parte prohiberi, ne confluat ad partem, attamen qui jam in parte continetur, ægrè admodum, & non nisi longo temporis spatio aliquid ipsius evacuari poterit. Hoc est, quod dicebat Gal. lib. de cur. ra. per san. mis. Revulsio, quibus in directum adhibetur, evidentem celeriter utilitatem ostendit, quibus contra, haud etiam. Et rursus: Revulsione causa si venam seces, in directo quidem appositis sanguinis eruptionibus citissimè conspicuam videbis utilitatem, at si contra, nihil profuerit. Non ergo illa vena, quæ primo illi scopo satisfacit, hunc alterum potest adimplere. Similiter, qui jam influit sanguis, & remotus est à



parte, retrahi quidem poterit facile per primam illam venæ sectionem, at qui proximus est vulneratæ parti, ægrè admodum aliquid ejus retrahetur, & nonnisi longo temporis spatio, ut superius explicatum est; unde antequam vis missionis sanguinis in valdè longinqua parte ad partem affectam, & ei proximas perveniat, nisi frequens, & copiosa fuerit sanguinis missio, vires prosterbens, jam qui proximus erat vulneratæ parti, in ipsam erit delatus, opus est ergo, ut eligatur vena, quæ celeriter evacuet, & revellat id sanguinis, quod propè affectam continetur, hæc autem erit vena in eodem latere existens, quæ tamen communionem habeat cum partibus, à quibus provenit fluxio. In materia igitur partim fluente, partim quiescente, & partim fluxa, tria adsunt indicantia, quibus venæ sectione volumus satisfacere: primum est materia quiescens, vel etiam quæ fluere cæpit, sed longinqua est à parte affecta: secundum materia fluens proxima parti vulneratæ, & in eodem latere existens: tertium quæ in parte affecta continetur, nondum tamen impacta.

Sed quoniam in priori casu oportet venam secare in parte maximè longinqua, & opposita; in secundo casu in eodem latere, ut tamen secetur vena, quæ communionem habeat cum partibus mittentibus, & longinqua etiam ab ipsa affecta, ut ab eadem revellet, non autem ad illam attrahat, in tertio vero in parte proxima affectæ sedi, ut derivetur, seu evacuetur materia in parte contenta, quid agendum? Num semper tribus in locis necessarium erit venam secare, ut omnes hosce scopos impleamus? Profecto si sanguinis missio nullum dispendium virtuti inferret, & quælibet sectio venæ statim suam gratiam præstaret, neque opus esset temporis mora, quo posset statim una post alteram fieri, neque una esset alteri impedimento, nemo est, qui primo à longinqua, & opposita parte non mitteret sanguinem, dein ab eodem latere, & postremo à parte proxima; prima enim venæ sectione fieret attractio in maximè longinqua, & contraria, secunda quod in eodem latere est non obediens huic primæ sectioni revelleretur, atque educeretur, tertia quod in affecta sede continetur, nondum impactum evacuetur.

Verùm quoniam sanguinis missio dispendium affert viribus,  
& una



& una venæ sectio, quod ab altera desideratur, potest impedire, nam sectio venæ propè partem affectam ad ipsam attrahit, neque etiam confertim præstant, quod promittunt, sed aliquo indigent tempore, unde neque statim una venæ sectio debet aliam consequi, & hac, quæ interponitur, mora periculum, quod ab una ex dictis materiis imminet, locum habere potest, idcirco ita res moderanda, ut quam minimum detrimentum, & plurimum utilitatis ex nostra actione proveniat. Vehementia ergo trium illorum indicantium perpendenda, & invicem conferenda, & pro legibus methodi ei, quod magis urget, attendendum, cæteris, si fieri possit, non neglectis.

Si quod igitur in parte affecta continetur, maximum facessat negotium, eo quod gravissimum concitet affectum, & fluxionem etiam continuo augeat propter dolorem, & calorem, parte existente ex præcipuis, necessario maximè urget quod in proximis continetur partibus, hoc enim in eandem præcipitabit celeriter, nisi fuerit consultum, &, ut ipsum revellatur, & quod in parte affecta continetur, tensionem, doloremque concitans, atque calorem accendens, evacuetur; sed evacuationem hujus per partem proximam prohibet materia influens, quæ magis per eam attrahetur ad partem, ideo quærendum, an aliqua adsit vena, quæ utrumque possit celeriter præstare, per quam videlicet & evacuetur, quod in parte continetur, & revellatur quod in eodem latere influit. Si ergo fuerit aliqua vena, quæ in eodem latere existens plurimum distet à parte affecta, & communionem habeat non solum cum mittentibus partibus, verum etiam cum recipiente, ita ut cum ipsa aperiatur pars affecta, hæc erit, quæ utrique scopo satisfaciet. Sed per talem venæ sectionem non fit mera, & exquisita revulsio, cum maxima tamen utilitate revellit talis venæ sectio, cum similiter & parti affectæ consular, & occasionem fluxionis, quæ ex ipsa est, si non penitus tollat, saltem imminuat. Hoc est, quod Galen. ubique clamat, revulsionem fieri debere κατὰ τὸν ὅρον, hoc est per directum, quia hæc celeriter suam gratiam præstat, ut libro de cur. ra. per sang. mis. 15. Revulsio quibus in directum adhibetur, evidentem celeriter utilitatem ostendit, quibus contra, haud etiam. Et 2. ad Glau. 2. nec non & lib. de hum.



com. primo tex. 13. Fluentium ergo humorum antispasis, sic enim Hipp. nominat, retractio medela est, eorum verò, quæ jam membrum obsederunt, derivatio; utrumque autem evacuationis genus per communes venas fieri præcipit, veluti eas, quæ matricibus in contrarium trahes, si eam, quæ in cubito est, fecueris venam, & paulò inferius. Derivabis, si eas, quæ in poplitibus sunt, & talis, & postea. Et siquidem in dextra matricis parte passio fuerit à dextra manu, aut crure, detraxeris sanguinem, si verò in sinistra, à membris, quæ illi è directo sunt, quod enim ab ipso κατ' ἴξιν dicitur, hoc ipsum est secundum rectitudinem. Profectò existimandum est hanc venæ sectionem in eodem latere factam aliquid attrahere ejus sanguinis, qui in opposita parte continetur, ad latus affectum. Sed tamen, quoniam non adest plenitudo in toto, non potest esse effatu dignum quod attrahitur; & quoniam fit evacuatio sanguinis in eodem latere existentis, censendum est, sanguinem attractum ab opposita parte distribui per illas venas, ut neque perveniat ad partem affectam, præsertim cum evacuatio fiat à longinqua parte.

Verùm si plenitudo totius adnectatur, periculo plenum videtur, per idem latus totum evacuare, copiosior enim erit sanguis attractus ad latus affectum à latere opposito, ut periculum sit, ne ex eo magis repleatur pars affecta, ideoque cum maximè urgeat indicatio evacuationis, periculosumque sit ab eodem latere evacuare, oportebit primò motum ad contrariam partem procurare, simulque plenitudinem demere, venam in opposita parte secando; dein & ab eodem latere, ut utrique indicationi satisfiat, nisi in eodem latere adsit vena, quæ secta exquisitè revellat, & simul à parte evacuet, ut de hepatica in hepatis affectibus dictum est; immo si vires ferrent, neque periculum esset in mora, semper esset magis tutum ab opposita parte venam incidere, exquisitæ revulsionis gratia, dein, & ab eodem latere per directum, videlicet gratia evacuandi, & revellendi simul, namque non tantum quod ab opposita parte in affectam confluit, aut confluere potest, avertitur, verùm etiam quod in affecto latere. Sicuti quando id, quod in affecta parte continetur, parum, vel nihil urget, eo quod sit parum, ut quando fluxio incipit, videtur ma-



gis posse indicationem, quæ suadet in opposita parte secandam esse venam. Frictionibus, vinculis, cucurbitulis, & aliis hujusmodi perbelle revellimus, namque non solum partibus per directum positis adhibentur, verum etiam contrariis secundum dextrum, & sinistrum, unde utrique indicationi satisfacerent: at sanguinis missio cum semper fieri non possit utraque ex parte. quoniam evacuat sanguinem, fieri debet in parte, in qua majorem utilitatem, & minus damnum sequuturum cognoscamus. Res itaque ita moderanda est, ne revulsioni exquisitæ adeò intendentes, permittamus partem ex ingruente fluxione nimis repleti, ut postea magis ipsa possit præ imbecillitate, calore, & dolore ad concitandam fluxionem, quàm remedia ad eandem arcendam; aut nimis de parte affecta solliciti, ob idque nimis ejus evacuationi studentes, ipsam magis repleamus. Et hæc sint dicta de universali revulsione.

Datur enim, & particularis revulsio, ut quando ab una parte alicujus membri in alteram sanguis influit tunc talis materia *Revulsio particularis* revellitur ad opposita in eandem secta vena, ut quando Hipp. 5. Aph. 68. & 6. morb. pop. sec. 2. tex. 27. dicebat: Dolentem capitis posteriorem partem recta vena in fronte secta juvat, revellitur enim, dicebat ibidem Gal. materia, nedum evacuat, ut etiam lib. de hum. loco toties citato ostendit, quamvis aliquibus dicenda videatur potius derivatio, quam revulsio, derivationem appellantes non solum quando evacuatnr sanguis in inflammatione existens, sed & quando id, quod in parte affecta continetur evacuat, mox in ipsum inflammationis locum, seu vulneris fluxurum, adducuntque Galen. 6. morb. pop. se. 2. t. 9. dicentem: Sursum elati, & geniti affectus statim inter initia deorsum revellere, mox verò & contraria horum præstare, quod est localiter evacuare, quemadmodum in his, quæ ad caput attinent, si posteriora capitis doleant, recta vena in fronte secta juvat, quod locale tamen remedium est. Qua ergo in parte secanda sit vena revellendi gratia humorum influxum, manifestum est, quando videlicet sanguinis vehemens est motus, aut timetur. At quando derivationis gratia, & evacuationis illius partis, quæ in affecta sede continetur, vel propè ipsam, secanda est vena,



per quam possit evacuari sanguis in parte contentus, nondum impactus, vel leniter ad eam confluens, ideò talis vena eligenda erit, cum qua apperiantur venæ partis. & hæc est communitas venarum, quam servandam profitetur Gal. cum com. 1. in lib. de hum. tex. 13. dicebat, utrumque evacuationis genus, videlicet revulsionem, & derivationem fieri debere per communes venas. & 2. ad Glauco. quando dicebat, à conjunctis faciendam evacuationem sive revellere, sive derivare volueris.

*Derivatio  
competit,  
& fluxo, &  
leniter con-  
fluenti hu-  
mori.*

Dixi autem secandam esse venam, per quam sanguis in parte contentus, vel leniter confluens evacuari possit, quoniam non tantum derivandus est humor in parte affecta contentus, sed etiam qui leniter, & parcè ad ipsam fertur, si enim vehementiori impetu, & copiosè confluat, revulsio conveniet: quam semper ad vehementiores impetus Gal. adhibet, usum enim revulsionis, dicebat com. 1. in lib. de hum. tex. 13. prohibemus, ne vehementissimi humorum confluxus in partem confertim decumbant. Si ergo humores leniter confluant, hic etiam derivatio locum habebit. Unde Gal. com. 1. in lib. de hum. tex. 7. & 6. morb. pop. sec. 2. tex. 7. Derivationem appellare Hipp. consuevit, quando humor quispiam, quem evacuari expedit, non per commodam ferri regionem cœperit, non tamen ab ea procul admodum, neque in adversissimum locum fertur: quemadmodum si in vesicæ, renumve affectibus per lotium ille evacuari incipiat, tunc enim præstat, ut inde ad alvum derivetur. Ita etiam si intestinis malè habentibus per alvum feratur, contra siquidem in his humorem evacuandum ad urinæ vias convertimus: In mulieribus verò interdum, ut per uterum feratur, promovemus, vel etiam, è contrario uteri profluvium ad urinaria loca, vel ventrem derivabimus. Etsi non revulsio tantum, verum etiam derivatio est immodicæ evacuationis remedium, qua ratione dicebat Galen. lib. de hum. loco pluries citato, & 5. Meth. Hæcque sunt ab Hipp. reperta communia cujusque immodicæ evacuationis remedia, videlicet revulsio, & derivatio, quomodo conveniet derivatio ei tantum, quod in affecta sede continetur, non fluenti? Sed clarissimè hoc docet Gal. 9. Meth. 11. dicens: At in iis venæ sectio utilis est, ceu vacuantium præsidiorum unum, in aliis, seu quorum



quorum vehementiorem impetum ad diversam partem revocet, vel ad propinqua derivet. En quomodo fluentibus humoribus derivationem adhibet. Appellat autem vehementiorem impetum, morbificum humorum motum, non maximum, quia huic revulsio tantum convenit.

Duplicem ergo derivationem admittere cogimur, unam, qua quod in parte affecta continetur mobile tamen, hoc est non impactum, evacuatur, qua ratione dicebat Gal. 2. ad Glauc. 2. & 13. Meth. 11. Fluentium adhuc humorum revulsio, eorum verò, qui jam particulam obsederunt, derivatio medela est. Et Hip. 6. morb. pop. In doloribus proximum ventrem esse tundendum, unde & in angina venas, quæ sub lingua sunt, secamus. Alteram verò, qua id, quod ad affectam partem confluit, leniter tamen, ac paulatim attrahitur, ac derivatur. Huc igitur spectare volunt, quod ab Hip. dicitur in Aph. & 6. morb. pop. sec. 2. tex. 27. Posteriora capitis dolenti secta vena recta in fronte juvat. Quæ quidem evacuatio localis revulsio interdum dicitur à Gal. 6. morb. pop. sect. 2. tex. 27. & localis hæc revulsio a Gal. 6. morb. pop. sec. 2. tex. 9. localis evacuatio appellatur. Certum est autem eam derivationem, quæ fit per evacuationem materiæ in parte ipsa phlegmone affecta contentæ, non posse dici localem revulsionem quia nihil materiæ fluentis retrahit, quatenus talis, sed respicit tantummodo, quod in inflammata parte reperitur, non tamen impactum, ob idque fit per proxima, quod de locali revulsione absolutè affirmare non possumus; etenim cum in hac retrahatur non solum quod in inflammata particula continetur, verum & id, quod mox in ipsammet conflueret, sive propè ipsam existat, sive à remotis magis influat, oportebit quoque servare localem distantiam, & contrarietatem, ita ut incidantur venæ, per quas exinaniantur etiam venæ, à quibus in partem sit fluxio, non eæ tantum, quæ sunt in parte, qua ratione dicebat Hipp. Posteriora capitis dolenti recta vena in fronte secta juvat, non solum enim per eam venam evacuatur, quod in posterioribus capitis partibus continetur, verum etiam revellitur, quod ab aliis partibus capitis in posteriora influit: manifestum est autem servari in hac sectione venæ singularem, quandam oppositionem, & etiam longinquitatem,



tem, namque à remotiori parte in capite fit evacuatio, & à contraria secundum ante, & post, servaturque rectitudo venarum, atque consensus.

Non semper tamen in eadem parte hujus gratia venam secamus, sed quandoque in aliqua proxima, ut quando ano applicamus hirudines in affectibus uteri. At quando mera derivatione ejus quod in inflammatione continetur, venam secamus, hoc tantum respicimus, ut vena secetur proxima, quæ possit partem affectam, hoc est materiam nondum impactam evacuare, sicuti in angina, dum venas, quæ sub lingua sunt, incidimus, & in affectibus uteri, cum venam in poplite. Neque existimandum est, in omnibus partibus promptas esse venas proximas, quæ secari possint derivationis gratia, postquam non omnes partes eas possunt habere, unde nec semper natura per proximas venas adaperatas evacuat, quod in particula phlegmone affecta continetur, sed quandoque his deficientibus, per quas possit eam evacuare, eligit longinquiores consentientes cum ipsa parte, ut quando inflammato jecinore, sanguinis à nare dextra profluvium concitat, & liene inflammato à nare sinistra. Sic ergo & nos imitari debemus naturam rectè operantem, quando non datur proximas venas eligere, ubi enim hoc liceat id faciendum semper, cum sanguis in inflammato loco contentus promptius, & facilius per eas evacuetur.

*Num vena  
magnæ an  
parvæ sint  
secandæ.*

Verum quoniam & magnæ, & parvæ venæ incidi consueverunt, dubitaret quispiam, num magnæ, & parvæ venæ pro revulsione secandæ sint. Animadvertendum ergo, quando periculum est urgens fluxionis, & alicujus momenti, viresque permittunt, venas majores esse secandas, nam sectio harum venarum celeriter, & efficaciter periculo succurrit. Quod si fluxio fuerit minoris momenti, & vires fuerint imbecilliores, ut contingit, quando à principio factis evacuationibus, & ægro inedia macerato, supervenit deindè fluxio ad partem, cujus gratia egemus sanguinis missione, venæ minores erunt incidendæ, quæ minori cum dispendio virium sanguinem evacuant, minor enim fit per ipsas spirituum dissipatio.



C A P U T L.

*De tempore, quo debet secari vena, & de modo utendi hoc auxilio.*

**Q**Uoniam venam secamus in vulneribus, non ut vacuemus tantum, sed etiam ut inflammationem prohibeamus, vel ejus saltem augmentum, & omnino fluxionem tollamus, vel fluxionis periculum, manifestum est, cum statim inflictio vulnere adsint fluxionis, & inflammationis præludia si vulnus sit insigne, ut superius expositum est, quamprimum mittendum sanguinem, nisi quid impediat, ut mox ingestus cibus retentio fæcum; quamvis hæc minus impediat, cum à misso sanguine liceat clystere fæces educere, si urgeat periculum fluxionis, ob idque non sit proroganda venæ sectio. Quinimo in maxima urgentia spernendus est mox ingestus cibus, ut monebat Celsus. Si nullum esset in mora periculum, peracta cibi coctione detrahendus esset sanguis, sicuti, & in retentione fæcum satius esset, præmittere clysterem, quo educerentur fæces.

Quod si tum venæ sectio, tum pharmacum fuerit necessarium, *Num venæ* nihilominus venæ sectionem ut plurimum præmittendam esse, tan- *sectio sem-* quam universalius præsidium, censendum est, eoque magis, quod *per sit præ-* periculum à motu ipsius sanguinis plerumque est urgentius, cum *mittenda* statim à vulnere sanguis incipiat exagitari, & ob effusionem san- *pharmaco.* guinis à parte quodammodo ad ipsam feratur consecutione quadam, & etiam attrahatur. Quod si evenerit, urgentius esse periculum, quod a pravis succis imminet, ut quando ob pravam vitæ rationem præcedentem, ventriculus, & primæ venæ pravis scætant succis, ex quibus retractis ad venas facile fit febris prava, profectò præmittendum esset ipsum pharmacum purgans, modò id non fuerit ex validis, quibus præponenda semper est venæ sectio, sed quod primas tantum vias evacuet, unde & Galen. 6. morb. pop. sec. 1. tex. 5. Ubi helleboro, & venæ sectione opus est, venæ sectionem præmittendam dicit. Quòd si à principio non fuerimus vocati, nihilominus sive fluxio, & inflammatio cœperit, sive non, modò periculum sit fluxionis, secanda erit vena. Ubi flu-



xio prohibetur, nihil est, quod derivationis gratia venam secemus, cum nihil in parte contineatur. Verum si genita fuerit inflammatio, sedata fluxione, vel paucò existente eo, quod influit, derivationis gratia secanda erit, modò adsint venæ proximæ, quæ secari possint, & inflammatio genita fuerit effatu digna, vel quid adhuc influit inflammationem augens.

*Revulsio  
præmittenda  
derivationi.*

Itaque primo revellendum, deinde derivandum; quidquid dicat Marthæus Curtius, qui derivationem præponendam revulsioni contendit, quo nihil periculosius, tantum enim abest, ut adhuc urgente fluxione, aliquid utilitatis derivatione ipsa sincera præstemus, ut potius majorem efficiamus fluxionem, & magis ad partem advocemus, unde & Gal. loquens de sectione venæ frontis in dolore posterioris partis capitis, dicebat: Præevacuatum totum corpus sit, oportet. Sed & Gal. inveteratis ob id affectibus dicebat competere derivationem 2. ad Glauc. 7. & 6. morb. vulg. sec. 2. tex. 9. dicebat: Sursum elati, & geniti affectus statim inter initia deorsum revellere oportet, mox verò & contraria horum præstare, quod est localiter evacuare, quemadmodum in his, quæ ad caput attinent, si posteriora capitis doleant, recta vena in fronte secta juvat, quod locale tamen remedium est. Sed non est in rebus claris immorandum.

*Quando  
revulsione  
gratia mit-  
titur san-  
guis par-  
tienda est  
sanguinis  
missio.*

Quoniam autem quò frequentius commovetur sanguis ad contrariam partem, verisimile est, ejus motum ad partem vulneratam facilius inhiberi, cum ipsum vel invitum aliò convertamus, & natura etiam assuescat ad eam sanguinem transmittere, si pluries mittatur sanguis, efficaciorē futuram revulsionem existimandum est, sic enim pluries sanguinem ad contraria, & remota movemus. Quæ ergo sanguinis quantitas pro evacuatione, & revulsione erit mittenda, eam in plures vices parti satius erit. Hinc Gal. lib. de cur. ra. per sang. mis. cap. 12. Revulsionem, quæ sæpe adhibetur vena secta, quantò majorem in numero particulares auxeris detractiones, tanto efficaciorē efficies. Sicuti & parti sanguinis detractionem necesse est, quando vires imbecillæ tantam evacuationem non perferunt.

*Dubitatio.*

Aliqui iterationem hanc venæ sectionis ad quantum agendum reducunt, duplicemque in venæ sectione quantitatem considerant,



siderant, alteram continuam, alteram discretam. Ad discretam pertinere dicunt, quòd sanguis ter, aut quater mittatur, continuam verò quantitatem appellant, e. g. libram unam, aut duas sanguinis. Sed in hac doctrina, mea quidem sententia, duo sunt manifesti errores. Unus quidem, quod libram unam, aut duas, & omnino sanguinis quantitatem ad quantitatem remedii sanguinem evacuantis referunt, cum potius sit ipsum indicans specificum, & determinatum, valde autem interest inter indicans, & materiam remedii. Non magis profecto sanguinis libra evacuanda est quantitas materiæ medicæ, quàm libra bilis evacuanda ope medicamenti bilem expurgantis. Constat autem libram illam bilis non esse remedii materiam, sed indicans medicamentum, & illud quidem specificum, & determinatum. Quare sicuti in evacuatione bilis quantitas materiæ medicæ est quantitas medicamenti, quod bilem evacuat, ita in evacuatione sanguinis quantitas materiæ medicæ erit quantitas remedii, quo evacuatur libra sanguinis. Hinc magnam sanguinis missionem dicere solemus, qua multa sanguinis quantitas evacuatur, parvam, in qua modica, mediocrem, qua mediocris. Comparative tamen hæc omnia intelligendo, ut ad quantitatem venæ sectionis non solùm attinere videatur quantitas foraminis, quod fit in vena, verùm & temporis, quo foramen hians servatur, non enim videtur foramen illud venæ tantum sanguinis evacuassee, nisi quia tamdiu apertum servatum est. Sic in rebus, quæ ponderi, aut mensuræ non subjiciuntur, quantitatem accipere consuevimus. Unde & in frictionibus quantitatem hoc modo metimur, ex temporis videlicet diuturnitate, frictionis enim vehementia non magis ad quantitatem ipsius attinet, quam vehementia pharmaci bilem exolventis, puta scammonii ad quantitatem ejusdem.

Alter error est, quod iterationem venæ sectionis ad quantum agendum reducunt, cum tamen ad agendi modum pertineat, quod quidem exemplo ab aliis remediis desumpto facile est intelligere. Indicatur e. g. in febre remedium refrigerans ut tria, verum quoniam sæpè fallax est multum, & repente evacuare, vel calefacere, vel refrigerare, & omnino corpus movere, ut monebat Hip. in Aph. propterea non semper ad remedium refrigerans,



ut tria, confugimus, puta ad frigidæ potionem, sed syrupos quotidie exhibemus, quorum decem, aut viginti refrigerabunt ut tria. Quis non videt unumquemque syrupum per se esse portionem remedii refrigerantis ut tria. Quod si ita est, manifestum quoque est, exhibitionem illam plurium syruporum non spectare ad quantum agendum, sed ad modum agendi, eo enim modo cogimur uti materia illa, quoniam aliter usurpatæ non cedit affectus, cum à natura regulari nequeat. Idem procul dubio est de iteratis venæ sectionibus; quinquies secetur vena pro revellenda humorum fluxione, quælibet earum sectionum erit portio materiæ unius remedii revellentis, non integra materia, sed integra materia erunt omnes illæ sectiones simul. Etenim materiæ medicæ debent habere vim remedii specifici, & determinati, affectui scilicet proportionati, ut si refrigerandum sit ut tria, materia hujus remedii non erit quælibet materia, quæ aliquo pacto possit refrigerare, sed quæ possit refrigerare ut tria; quare si pro revellendis succis mittendus sit sanguis, materia hujus remedii non erit quælibet venæ sectio, sed illa tantum, quæ potest contrarium motum in sanguine concitare: constat autem, unam ex illis quinque venæ sectionibus per se non posse motum hunc in sanguine inducere, sed omnes simul hoc solummodo poterunt, igitur una sectio erit portio tantum materiæ, & ex consequenti iteratio hæc venæ sectionis non ad quantum agendum, sed ad modum agendi spectabit. Quare & talis iteratio non ab activitate indicantis præscribitur, sicuti medicæ materiæ quantitas, sed à passione sanguinis, veluti utendi modus ipsius materiæ; quia enim sanguis non satis patitur ab una venæ sectione, cogimur vices multiplicare; & quamvis non major quantitas extrahatur iteratis venæ sectionibus, quàm una sectione, magis tamen patitur sanguis ab iteratis venæ sectionibus, quàm ab unica, quia magis commovetur, & magis assuescit ad sectionis locum. Sed hæc obiter sint dicta.

*A quo indicetur iteratio venæ sectionis.*

*In quot vices partienda sit missio sanguinis.*

In quot autem vices partiri oporteat detractionem sanguinis, certò describi non potest, sed judicio prudentis Medici est relinquendum. Attamen non ignorare oportet, quanto majus fuerit fluxionis periculum, & quanto major, & majoris momenti extiterit fluxio, quæ timetur, tanto plures detractiones esse debere,



bere, modò tamen quælibet ipsarum aliquid possit facere. Hinc Gal. 5. Meth. 13. in adolescente, cui rupta fuit vena in thorace, quater misit sanguinem. Sed experientia docuit & sexies, & septies in gravissimis casibus utiliter admodum mitti sanguinem revulsionis gratia. In vulneribus, in quibus non adeò timetur fluxio, satis erit bis sanguinem mittere. Nonnihil tamen & ipsæ vires interdum faciunt ad augendum numerum detractionum, quando enim vires imbecilliores sunt, in plures vices partiri missionem sanguinis oportet, ut minore cum virium dispendio fiat evacuatio. Unde sanguinis libram tribus, aut quatuor detractionibus educimus in imbecillioribus viribus, quàm in ipsarum constantia duabus tantum vicibus evacuaremus. Quando vero facienda sit iteratio, periculum pariter commonebit, quo enim majus est periculum fluxionis, & quo major imminet fluxio, eo citius iteranda est venæ sectio juxta illud Hipp. In acutis medicari eodem die, si expediat, tardare enim in talibus malum. Hoc enim non tantum de pharmaco existimandum est ab Hip. dictum fuisse, sed & de aliis præsiidiis, quæ vehementiam affectus obtundere statim possunt. Hinc Gal. 1. Meth. 13. in illo juvene, qui ex refrigeratione instrumentorum respirationi deservientium in sputum sanguinis inciderat, duobus subsequenter diebus quater misit sanguinem. Et lib. de cur. ra. per sang. mis. cap. 17. in vehemente fluxione ad oculos hora quinta secuit venam, & iterum hora nona. Sed & ter, & quater, si periculum fuerit admodum præceps, eadem die poterit secari vena, & sequenti etiam die iterari sectio venæ; ut bis, & ter etiam mittatur, si oportuerit, & vires permiserint. In minori fluxione, vel minori ejus periculo differri iteratio poterit ad secundam, vel etiam ad tertiam diem. Hoc est, quod dicebat Gal. lib. de cur. ra. per sang. mis. cap. 16. Conari autem in omnibus affectibus præstat post modicam sanguinis missionem iteratò mittere, interdum eadem die, si expedire videbitur, interim postridie: Intra quartam autem diem iterationes omnes fieri debent, quemadmodum comperimus observasse antiquos sapientes, sic enim perfectè complebunt materiam unius revellentis auxilii.

Quod vero attinet ad quantitatem sanguinis qualibet vice *Prima vice*



*nis est ex-  
trahendum,  
& sic sub-  
sequenter.*

extrahendi, scire oportet, prima vice plus sanguinis extrahendum esse, quàm secunda, aut tertia, & secunda, quàm tertia, & sic deinceps. Unde Gal. lib. de cur. ra. per sang. mis. cap. 17. primo misit sanguinem ad libras tres, hora videlicet quinta, dein hora nona unicam extraxit. Neque solum, quia vires in principio sint robustiores, verùm etiam quia tum revellere, tum evacuare volumus, imminuta enim plenitudine à prima sectione, qua copiosior sanguis educitur, periculum redditur minus, & impetu sanguinis ad alias partes convocato, subsequenter par-  
cioribus detractionibus licebit facilius motum sanguinis ad contraria penitus avertere. Quando tamen laborantis vires non essent penitus nobis exploratæ, satius esset, prima vice parce mittere sanguinem, ut nobis innotesceret, quo se extenderent ejus vires.

## CAPUT LI.

*De hirudinibus, cucurbitulis, & scarificationibus.*

**Q**Uando imbecillitas virium sectionem venæ, magnum quippe remedium, haud permittit, & tamen evacuationis, vel revulsionis gratia mittendus est sanguis, sive antea missus sit, sive non; ad hirudines, & cucurbitulas scarificatas confugimus, quæ sanguinem citra virium dispendium evacuant, unaque ad partem, cui applicantur, revellunt. Hirudines quidem venis applicantur, & propterea quæ de venæ sectione dicta sunt, ad ipsas sunt transferenda, cum earum applicatio nihil aliud sit, quam venæ sectio quædam, seu modus quidam venam aperienti. Applicantur tamen hirudines venis hæmorrhoidalibus, quas scalpello secare non licet. Non solum autem sanguinis evacuatione applicatio hirudinum revellit, sed & peculiari quadam attractione, namque sugendo attrahunt, & ita impetum quendam induunt sanguini ad apertam venam; cum hoc tamen, quoniam evacuatio fit paulatim, minus revellunt, quàm venæ sectio.

*Quomodo  
revellant  
hirudines.*

*Cucurbitulæ  
scarificatæ*

Cucurbitulæ scarificatæ à venis majoribus immediatè non evacuant, nisi longæ, ac profundæ fiant scarificationes, sed à capilla-



capillaribus venis, nihilominus fortius revellunt ipsis hirudinibus *an fortius*  
ob violentam cucurbitulæ attractionem vi vacui, unde Gal. 4. *revellant.*

Meth. ult. dicebat: Cucurbita est instrumentum ad violentum attractum à Medicis exagitatum, quapropter quamvis immediatè à venis majoribus non evacuent, à profundo tamen attrahunt. Hinc Galen. 3. loc. af. cap. 4. Cucurbitulæ attrahunt humores ad sese ex imo, ideoque illis in validissimis fluxionibus sæpissimè utitur, namque in sanguinis narium fluxu regioni hepatis easdem applicat lib. de hum. com. 1. text. 13. si à dextra nare fluat sanguis; in fluxu sanguinis ex utero easdem sub mammis. Tribus ergo ra-

tionibus potissimum revellunt cucurbitulæ, evacuando scilicet, *Tribus rationibus re-*  
(nam loquimur de scarificatis) attrahendo ob vacuum, & dolo- *vellunt cu-*  
rem inferendo; neque tamen existimandæ sunt tantum valere, *curbitulæ.*  
quantum venæ sectio, quæ immediatè sanguinem à venis majoribus evacuat, & retrahit. Quæ autem de contrarietate, & re-  
ctitudine dicta sunt in venæ sectione, huc quoque sunt transfe-  
renda; nam & maximum momentum habet in admovendis cu-  
curbitulis rectitudo, unde Gal. Si à dextra nare fluebat san-  
guis, regioni hepatis magnam cucurbitam applicabat; si à si-  
nistra, lienis regioni, ut videre est lib. de hum. cap. 1. text. 13.

Quamvis hoc peculiare habeant cucurbitulæ, ut utriusque *Utilitas cu-*  
partibus possint applicari, unde non solum consulitur sanguini, *curbitula-*  
qui in latere affecto contentus ad partem affectam fluere potest, *rum.*  
vel fluit, sed etiam ei, qui in altero latere contentus ad affectum  
locum potest confluere: Aliud habent peculiare cucurbitulæ,  
quod non unam applicamus, sed duas, tres, quatuor, & plures,  
prout necessitas postulat, non enim est quidam peculiaris locus,  
cui applicentur, sicuti in quibusdam particularibus locis venæ se-  
cari solent; namque occipiti, & humeris, & dorso, & brachiis  
tam à parte domestica, quàm à parte silvestri, & natibus, &  
coxis, & à posteriori parte, & in domestica earum parte, ac  
silvestri; pariter quoque, & cruribus applicantur, juxta indigen-  
tiam. Quocirca maximi momenti existimanda est revulsio, quæ  
earum fit auxilio.

Cum autem cucurbitulæ revellant attrahendo vi vacui, & *Cucurbitulæ*  
ratione doloris, & ratione evacuationis sanguinis, manifestum *quando for-*  
est



*tius revel-  
lant.*

est quo major erit vis vacui, & dolor major, atque copiosior evacuatio, vehementiorem quoque futuram revulsionem, unde quò copiosiori igne admovebuntur, eò magis revellent, posteaquam vis vacui redditur major, & major concitatur dolor. Similiter quo plures, & profundiores fient scarificationes, quoniam & dolor fit major, & copiosior evacuatio sanguinis, & à majoribus venis, eò etiam fortior erit attractio, & ex consequenti major revulsio. Quando etiam majores erunt cucurbitulæ magis attrahent, nam vis vacui major redditur. Quocirca indigentia revulsionis erit perpendenda, ut, quando hoc, vel illud agendum sit, innotescat; vanum est enim, quando levis est indigentia, cucurbitulas admoveere, quæ vehementissimè attrahunt. Derivationis gratia rarò cucurbitulis utimur in vulneribus, frequentius hirudinibus, eas proximæ parti affigendo, venæ videlicet, quæ cum parte affecta communicet, ut sanguis per apertam venam possit evacuari.

*De scarifi-  
cationibus.*

Scarificationibus simplicibus absque cucurbitulis utebantur antiqui, sed nostris temporibus ferè earum usus exolevit. Illud tamen non ignorandum eas levius revellere, quàm ubi facta scarificatione affigitur cucurbita. Si cui placuerit scarificationes revellendi gratia in usum revocare, posteaquam eadem Hippocrati placuerunt, & ipsas summopere comprobavit Galen. animadvertat leves quidem, & superficiales nullam præstare revulsionem, sed tantùm à summa cute impactum humorem elicere; longas vera, & profundas, quæ cutim videlicet pertranseunt sicuti copiosè sanguinem evacuant, ita quoque vehementer revellere, cum præsertim non levis adnectatur dolor. Galen. hisce scarificationibus ad crura adhibitis, ut videre est lib. præsagium experientia confirmatum penultimo capite. Et lib. de cucurbitarum scarificatione cap. 20. sibi met detrahit duas libras sanguinis, quo remedio liber à pestilentia evasit. Mediocres verò quæ cutem videlicet non pertranseunt inter utrasque medias esse, & propterea pro majoris, vel minoris revulsionis indigentia longioribus, & profundioribus, vel minus longis, ac profundis scarificationibus uti oportebit. Loca verò, quibus potissimum adhibentur scarificationes sunt crura, femora, nates, scapulæ, ac brachia. Re-

motas



motas verò, & contrarias partes semper scarificandas esse, ut possint revellere, cuilibet notum est.

## CAPUT LII.

*De cucurbitulis non scarificatis, & nonnullis aliis revellentibus auxiliis.*

**I**Nter revellentia præsidia sunt etiam cucurbitulæ citra scarificationem, frictiones, asperæ præsertim, vincula, sinapismi, vesicantia, inustiones, & hujusmodi. Cucurbitularum sæpè meminit Galen. ut lib. de hum. com. 1. text. 13. 2. ad Glauç. cap. 7. & pluribus aliis in locis, ibi enim dicebat: Quocirca nos cum menstruæ purgationes vehementius, & confertim evacuantur, & cum sanguis ex utero fluit, sursum revellere consuevimus, quod cucurbitula maxima sub mammis affixa facimus. Sanguinis verò ex naribus profluvium inita ratione contraria, hoc est, cucurbitulas præcordiis adhibentes, cohibemus. Sic & cucurbitula defigenda occipiti est, ut materiam quæ in posteriori est parte, & ad oculos comportatur, revellamus. Revellendi autem vim habent ratione attractionis violentæ, quæ ab ipsis fit, ut vacuum prohibeatur, & etiam doloris ratione, dum violenter caro ad interiorem earum partem attrahitur. Et ut dictum est de scarificatis, quo cucurbitula est major, & quo pluri igne adhibetur, eo major ab ipsa fit attractio, & major concitatur dolor, & ex consequenti major etiam fit revulsio. Cum autem paucum, vel nullum afferant virtuti dispendium, idcirco non solum pluribus in locis, & plures numero uno, & eodem tempore possunt affigi, verum & pluries in die, prout necessitas revellendi postulavit. Quare ipsarum utilitas est maximi facienda. Videntur tamen plus conferre revellendo deorsum, quæ sursum confluunt, quàm sursum ea, quæ deorsum, præcipuè si ad artus fiat fluxio; quando enim ad artus non pervenit fluxio, etiam optimè sursum revellunt, ideoque Galen. in fluxu sanguinis ab utero eas applicabat sub mammis.

Frictiones, & ipsæ revellendi vim habent, earumque pro  
Uu revul-<sup>De frictio-  
nibus.</sup>



revulsione facienda meminit Gal. lib. de hum. cap. 1. tex. 13. & 2. ad Glauc. 7. ubi dicebat: Veluti in utero revulsio erit, si venam cubiti secueris, aut cucurbitam prope mammas affixeris, aut manus calefeceris, & fricueris. Idem pluribus aliis in locis. Revellunt autem frictiones, & ob calorem inductum, & rarefactionem, & resolutionem ejus, quod in parte continetur, sic consecutione quadam sequitur sanguis, tum verò, & maxime, quoniam sanguis attrahitur versus partem, in quam ducitur frictio, inde consequitur alius, & sic contrarius inditur sanguini motus. Quod si dolor frictionibus inducatur, hac etiam ratione revellent. Et ideo quo asperiores erunt, eo fortius revellent; namque & vehementius attrahent, & major concitabitur tum calor, tum dolor, quo vero erunt leviores, eo minorem revellendi vim habebunt. Multa quoque frictio fortius revellit pauca.

*De vinculis.* Vincula, & ipsa doloris ratione revellunt, & eorum meminit Gal. citatis locis, & calidi lavacri, dicebat enim: Aut manus calefeceris, & fricueris, & deligaveris. Et com. 1. in lib. de hum. tex. 13. Cumque morbus thoracem, & stomachum petit, tunc manus, ac pedes adhibita vi, sunt vinculis excipiendi, ut quod molestum est, illuc revellatur. Cum ergo dolorem inferendo revellant, manifestum, quo arctiora erunt vincula, eo fortius revulsura: sed cavere oportet, ne adeo constringantur, ut parti necem afferant, ideoque ne pars ob vinculum vitalibus spiritibus privetur, curandum erit, ne æqualiter partem comprimat, & adstringat: quod assequemur supposito ipsi vinculo duobus, aut pluribus locis aliquo corpore, quo vinculum aliquibus in locis à parte arceatur, cujusmodi esset lignum ad digiti crassitiem circiter, quando videlicet vinculis fortissimè volumus adstringere.

*Sinapismi, & vesicantia, ut revellant.* Sinapismi, & vesicantia revellunt, & attrahunt calefaciendo, doloremque inferendo, eorum meminit Gal. lib. de hum. loco citato, dicebat enim, si redundantia ad caput, aut ventrem feratur, medicamenta mordacia manibus, pedibusque admota revellere contrariam in partem solent; verum ex vesicantibus duplici ratione fit revulsio, & vi scilicet ipsius medicamenti vesicantis, & post remotionem medicamenti ab inducto ulcere. Quod si acris irritetur medicamenti, & quodammodo inflammetur,

ratione



ratione doloris, & inflammationis fiet major revulsio, inflammatio enim veluti cucurbitula attrahit, ut dicebat Galen. pulvis autem euphorbii est maximè ex usu, item pyrethri, sinapis, piperis, & hujusmodi. Sinapismi parantur ex sinapi, pipere, nitro, nasturtio, pyrethro, staphisagria, & hujusmodi ad unguenti, vel emplastri, vel cerati formam cum idonea materia reductis. Materiam pro unguento præstabit cera, & oleum aliquod calefaciens, vel unguentum ejusdem qualitatis; pro emplastro caricæ, emplastrum apostolicon, & hujusmodi. Pro cerato oleum calefaciens, cum cera, & resina, vel cerato quopiam. Solent parari frictiones asperis linteis acribus liquoribus madefactis, cujusmodi est acetum, quod sal, piper, pyrethrum, sinapi, euphorbium, & hujusmodi acria receperit, & fit fortissima revulsio. Vesicantia parantur ex flammula Jovis, radice tanunculi tufis; item ex cantharidibus additis etiam rubificantibus, & fermento, ac caricis, nec non & aceto, vel melle scyllitico, vel anacardino melle, quæ, præter id, quod adjuvant, formam emplastri præstant. Verùm quoniam talibus revellentibus potissimùm utimur in gravibus vulneribus capitis, idcirco eo in loco diffusius de iis pertractabimus.

Quamvis autem dixerimus calorem, & dolorem attrahere, & ex consequenti revellere, non est existimandum fieri hanc attractionem per se, sed per accidens; cum enim ignis hic noster suo calore, quem in summo obtinet, non attrahat, neque de aliis caloribus existimandum est, quod trahant: sed hæc fuere explicata, cum de causis fluxionis pertractaremus. Pariter neque vacuum attrahit, neque enim datur. Sed ne detur vacuum, necessariò egrediente uno corpore ab aliquo loco, aliud succedit, & propterea abusivè dicitur vacuum attrahere.

In his autem revellentibus præsidiiis quæ de revulsione in universali dicta sunt, considerare oportet, ut videlicet quando jam inflammatio cœpit, non solùm ad contraria applicentur revellentia, & ad oppositum latus; verum etiam fervetur altera rectitudo. Modo autem uno horum revellentium præsidiorum, modo altero uti oportebit, prout ægrotus permittet, & necessitas postulabit. Et tandiu in usu revellentium persistere oportebit,



quamdiu perdurabit fluxio, vel fluxionis periculum, & vires perferent. Licet enim ea revellentia, quæ citra evacuationem sensibilem operam suam præstant, minus viribus officiant, non est tamen negandum, quin & aliquid detrimenti inferant, cum & insensibiliter evacuent, & plura dolorem inferant, dolor autem vires fatigat. Reliqua in usu revellentium observanda peti debent à capite : De sistenda fluxione.

## CAPUT LIII.

*De purgatione in vulneratis instituenda.*

**Q**Uamvis communiter connumeretur purgatio inter ea præsidia, quæ affluxum humorum ad vulneratam partem prohibent, tam eorum, qui inflammationem efficiunt, quam eorum, qui excrementis scatentia faciunt ulcera, atque putredinosa, utpote quæ quod influere deberet, à corpore educat, & avertat, nihilominus non desunt, qui cane pejus, & angue eam in vulneratis fugiunt, hac potissimum nixi ratione, quod humores commovet, & ad fluendum paratos reddit.

*Hippocrates  
purgatio-  
nem præci-  
pit in vul-  
neribus, &  
explicatur  
locus ex li-  
de affec. tex.  
27.*

Verùm, si hujusce quæstionis voluerimus arbitros Hippocratem, & Galenum, tollitur protinus omnis ambiguitas namque Hipp. lib. de aff. tex. 37. hæc habet : Vulneratos fame affligito, & ex alvo, quæ insunt, subducito, aut per clysterem, aut phar-  
maco infra purgante exhibito : quibus quidem verbis duo præcepta proponit, unum est, ut prohibeamus, ne generetur materia fluxionis, qua ratione jubet, ut vulneratos tenuiter victitemus, ne succorum copia generetur, qui sive boni sint, sive mali, valent negotium faceßere : de malis quidem manifestum est, at bonos quoque noxam interdum inferre, si quæ antea diximus in memoriam revocentur, erit perspicuum ; generato enim ampliori sanguine, is fertur in eadem quantitate, qua antea sanitatis tempore, ad vulneratam partem, & forsan etiam majori, posteaquam natura, ut quod noxium est, fortius expellat, assollet sanguinem copiosorem, & spiritum in afflictam partem exprimere, natura verò partis imbecillis nequit tantam sanguinis copiam



piam conficere, quam antea, unde inflammationes, & putredines. Alterum præceptum est, ut quæ materia adest jam in corpore fluxionis, ea tollatur, & etiam revellatur, & propterea purgationem per alvum præcipit, quotiescunque clyster non sufficiat: sufficit enim vel ob parvam quantitatem existentis succi, ut quando corpus est eucratum, vel ob minus urgens periculum, ut quando vulnus non est ex magnis, non enim ibi intelligit Hipp. quod semper sufficiat alterum duorum, ut libuerit, præstare, vel scilicet clysterem injicere, vel purgans pharmacum exhibere, sed in leviori periculo vult clysterem adhiberi, in fortiori verò, & urgentiori ad purgationem se transfert. Sicuti & ipse quandoque non solum purgationis vice, verum etiam loco missionis sanguinis utitur clystere acuto. lib. quoque de ulceribus Hipp. purgationem in cura vulnerum proponit, dicebat enim text. 4. Depurgatio ventris deorsum plurimis ulceribus confert, & in vulneribus, quæ sunt in capite, & in ventre, & in articulis, & in quibus corruptionis periculum est, & in his, quæ contusa sunt.

Galen. non minus in vulneribus purgatione nos uti oportere censet; dicebat enim 4. Meth. 6. Ulceribus omnibus, & vulneribus, quoties prævalida sunt, purgatio est utilis, unde ibidem subjungebat: Ubi tendines, nervi, & carne vacua, atque ossea loca sunt, hic doloris, vigiliarum, convulsionis, & delirii periculum instat. Hæc ergo omnia, & quæ futuris, vel deligatura indigent, alvi purgationem desiderant, & quæ vitiosi succi sunt soboles.

*Galenus  
laudat pur-  
gationem in  
vulneribus.*

Alii non quæcumque purgantia reprobant, sed valida tantum; levioribus enim, quæ lenientia appellantur, utendum censent. Fortiora siquidem ajunt humores exagitare, & ad fluxionem commovere. Quapropter & in articularibus fluxionibus, urgente ipsa fluxione, quamvis humor influens sit bilis unà cum pituita, attamen à purgatione abstinemus, dicunt, quia magis præcipitat humores ad articulos. Quod si Hipp. & Gal. decreto stare vo-

*De qua  
purgatione  
intelligen-  
dus sit Hip.  
& Gal.*

luerimus, isti quoque redarguendi videntur, posteaquam dum Hipp. & Gal. loquuntur de purgatione, intelligunt semper de ea, quæ verè purgatio est, qua scilicet selectivè educuntur succi, ut om-



nibus patere arbitror qui in Hipp. & Gal. doctrina sunt versati. Et quod ad hanc rem attinet, certum est eos intelligere de ea purgatione, quæ ad propositum finem assequendum facit, at hæc est purgatio selectiva, non levis illa; purgant enim Hipp. & Gal. in magnis vulneribus, ut inflammationem, & affluxum succorum prohibeant, quod fiet, si calidi, & tenues succi, ex quibus totus sanguis ad motum proclivis redditur, evacuentur, & etiam revulsio fiat ope attractricis facultatis medicamenti purgantis, palam autem, hoc præstari posse ab iis tantummodo, quæ verè evacuant. Hæc manifesta videtur sententia Hipp. nam lib. de frac. text. 48. com. 3. in fracturis ossium cum ulcere maximi momenti, veratrum exhibet; non ergo intelligendus venit Hipp. de leniente purgatione. Idem sentire videtur Gal. 4. Meth. 6. ubi expresse meminuit de purgatione hujus, vel illius succi pro ratione redundantia; dicit enim. Quin etiam si iis, quæ jam dixi, illud quoque adjicias, nempe quod ipsum, qui redundat, succum vacuandum esse Hipp. suadet, aliàs sanguinis detractionem adhibebis, cum videlicet is vincit, alias pharmacum, quod ad bilem flavam, vel atram, vel pituitam educendam vim habet, dabis. Neque aliter intelligi potest Gal. namque eo capite propter magnitudinem morbi vult adhibendam esse purgationem, hanc statuendam esse pro indicatrice quadam sanguinis detrahendi, vel purgationis adhibendæ profitetur: si ergo purgationem consulit Gal. propter magnitudinem morbi, utique remedium aliquod magnum sit id oportet, siquidem remedia debent esse morbis proportionata; at non erit magnum remedium, si leniens fuerit, sed tantum, si fuerit seligens. Sed quoniam isti doctrinæ Hipp. & Gal. parum videntur addicti, rationibus rem agamus. Videndum igitur, an in vulnerato reperiatur quod indicet hujus præsidii genus, numque adsit quidpiam, quod prohibeat; etenim si quodpiam præsidium in usum sit revocandum, adesse oportet, quod illud indicet, abesse verò, quod prohibeat; & hac nulla est potior via investigandi, an conveniat aliquod remedium propositum, nec ne.

Supponendum igitur nobis est ex Gal. 1. Aph. 2. & com. 1. in lib. de hum. tex. 12. Purgationem esse evacuationem humorum à sanguine diversorum qualitate peccantium, seu nocentium, quæ quidem



quidem ope pharmacorum attrahentium sibi proprios, & peculiares succos perficitur. Si more Medicorum loquamur, qui communiter statuunt, & hoc Hipp. & Gal. sæpè docuerunt, purgantia pharmaca evacuare attrahendo à proprietate totius substantiæ proprios, & peculiares succos. Quod tamen in dubium forsitan posset *Num revo-* revocari, cum videamus vim purgativam ipsas venas petere, ut *ra purgan-* apparet in iis, quæ infantes ablactant, nam si pharmacum sumpse- *tia attra-* rint, lac earum vim purgandi infantem acquirit, quod aliunde *hant pro-* provenire non potest, quam ex vi purgativa pharmaci, quæ venas *prios, & si-* adierit, & cum sanguine permixta, atque ad mamillas lata lac ip- *bi familia-* sum ita affecerit. Constat autem, si vis expurgativa esset facultas *res succos.* quædam attrahens, lata illa vi ad venas, & ad vacuandos succos, impeditum iri potius expurgationem, ut proinde non ab re suspi- centur nonnulli medicamenta purgantia potius expellendo pur- gare, quàm attrahendo.

Sed hæc obiter, nec multum refert, quantum ad rem præ- *Quomodo* sentem attinet, sive expellendo, sive attrahendo purgent pharmaca. *revellant* Communem tamen loquendi usum servabimus. Manifestum est *purgantia,* ergo, dum ope medicamenti fit purgatio, fieri motum succorum ad intestina ipsa, neque solum eorum, qui evacuantur, sed & aliorum succedentium, vel vi vacui, vel ab iis, quæ peculiariter attrahuntur, raptorum; quamvis enim scammonium evacuet bilem, nihilominus in hoc motu & ipse sanguis, & alii succi impetum quendam assumunt ad intestina, & ideò si ad aliam partem qua de causa vergant succi, vi purgationis retrahuntur. Hæc est ratio, quod antiqui sapientes non solum evacuationis gratia purgationem instituendam dixerunt, sed & revellendi. Unde Gal. 4. Meth. 6. Desiderant ægri purgationem non modò ut quod noxium supervacuum, quo urgentur, educat, sed etiam ut quod tum ad diversum trahat, tum vacuet. Et 1. com. in lib. de hum. tex. 12. Purgatione opus habent ægroti non modò quia humorum redundantia, quæ noxia est, expurgetur, sed etiam ut avertatur, & evacuetur. Et lib. de cur. ra. per. sang. mis. 8. In iis quibus pars quæpiam graviter iccta est, aut utcunque aliter incipientem habet phlegmonem, curationem ab inanitione auspicamur, si eam fore magnam suspicamur, aut purgante exhibito, aut vena incisa, prout



prout alterum altero magis convenire videbitur. Et 6. de comp. med. secundum loc. At verò venam secare eis, qui suffocantur, & eluere forti, atque acri clystere, & purgatoria exhibere gratia evacuandi totum corpus, & transferendi infra humorum momentum, qui ad affectas partes feruntur, rationabile est, & multa experientia indicatum, ac cognitum. Et 3. Meth. cap. 2. loquens de revulsione peragenda in phlegmone, dicebat: At vomitu uti pudibundis laborantibus in diversa revellens auxilium est. Eadem ratione in omnibus, quæ circa caput accidunt, purgatio ad contrarium avertit. Unde & paulo superius una die sanatos testatur sola purgatione per alvum nonnullos ex iis, quibus oculi tentari phlegmone cœperunt. Et lib. de hum. sec. 1. com. 13. In omni, inquit, ulcere, cui ignis sacer supervenit, purgandum corpus est, quia ulceri maximè prodest, sive id per superna, sive per inferna fiat. At nobis eandem observandam esse distinctionem tradit, ut sciamus ad ea loca materiam esse revellendam, ad quæ maximè vergit, quare si fluxio vehementer feratur, eam ad contraria revellemus, ut si in superioribus ulcus sit, per inferna purgemus, si in inferioribus consistat, superiorem ventrem vacuemus. Eadem fere habet 4. Meth. 6. & com. 2. in lib. de frac. tex. 27. dicebat: Non solum ea ratione, ut excrementa expurgentur, veratrum bibendum tradi jubet, sed etiam ut revellantur. Multa alia Gal. loca possent adduci, quibus revellendi gratia purgationem adhibet, sed cum unusquisque ea facile possit per se invenire, non ero in hac re longior.

*Hip. pur-  
gatione uti-  
tur revel-  
lendi gratia.*

Non minus Hip. revellendi gratia purgationem adhibuit, ut passim apud ipsum licet observare. Cur enim 6. Aph. 31. dolores oculorum medicamento potione solvi affirmat, nisi quia revelluntur succi ad oculos influentes? cur lib. de frac. com. 3. tex. 48. in curatione fracturæ femoris cum ulcere veratrum, & illud album ex mente Gal. exhibet, nisi ut revellat? cur lib. de art. tex. 76. in luxatione cum ulcere digitorum pedis proponit pharmacum fursum purgans, nisi ut revellat? cur lib. de vul. cap. si erysipelas vulnere capitis supervenit, præcipit, ut detur medicamentum bilem evacuans? Quare firmum sit hoc fundamentum, purgationem evacuare aut per superiorem, aut per inferiorem ventrem vitio-



vitiosos succos à sanguine diversos, & ad naturales partes revellere.

Supponendum secundò, quod in vulnerato, quamvis prius *Secundum* succi à sanguine diversi nullam sensibilem inferrent molestiam, *suppositum.* atque re vera non essent vitiosi, nihilominus possunt fieri noxii, & facile in magnis vulneribus impetum accipiunt ad vulneratam partem, cujus potentiam opprimunt sua quantitate, eoque magis cum jam pars facta sit ob vulnus imbecillior, unde cum non possint ab ipsa regi, inflammationem, & putredines concitant. Feruntur autem ad vulneratam partem iis de causis, quas capite de vulneris effectibus in vulnerata parte sumus diligenter persecuti, in quibus recensendis nunc non est conterendum tempus. Si verò in vulnerato præexistant vitiosi succi, ut, quando corpus est cacochymum, longè facilius etiam ad vulneratam partem conflunt, tum quia ipsa est imbecillior in cacochymo, tum quia natura, quod supervacuum est, solet semper ad imbecilliores partem propellere; quæ cum sit tunc temporis, quæ vulnerata est, vitiosos succos ad ipsam facili negotio transmittit, hinc putredines & inflammationes, & alia mala. Ex quibus elici potest non in omnibus vulneratis æquale esse inflammationis, aut putredinis, aut alterius mali periculum, quamvis vulnera & ratione propriæ essentiae, & ratione dignitatis sint æqualia, sed in iis, qui pluribus, ac pravioribus succis scatent, longe majus est periculum, ratio est in promptu; nam quò major adest materia fluxionis, eò pars sui natura est ad accersendam fluxionem paratior, & quò natura promptius transmittit humores ad partem vulneratam, eò facilius existimandum est dicta mala posse evenire: quæ omnes conditiones magis reperiuntur in iis, qui pluribus, & magis pravis succis scatent, namque plethorico existente corpore, præterquam quod copiosa adest fluxionis materia, natura etiam non egens alimenti minimè retinebit, sed promptè ad partem vulneratam sanguinem copiosorem transmittet. Quod si pravis succis sit refertum corpus, sumpta à vulnere occasione, conabitur sarcinam, qua premebatur, & infestantes succos in ipsam vulneratam partem, ut imbecilliores, deponere, & eò magis id accider, si vulneratus acris fuerit sensus, aut ipsa vulnerata pars ex iis fuerit, quæ exquisito



sensu sunt præditæ. Hinc Gal. 6. Meth. 2. Fingamus quempiam ad nos venire, cui tantum cutis acu sit puncta. Hunc hominem, si is sit, cui facile ulcera sanescunt, etiam si citra medicamentum, nudove membro ad opera consueta dimittas, nihil sentiet mali: sin cui difficulter sanantur, primum quidem dolebit, post etiam tum pulsu particula infestabitur, tum phlegmone. Et paulò post: Non ignari quod qui vel plethoricus est, vel vitiosis succis premitur, vel acris est sensus, vel horum quibusdam, omnibusve premitur, phlegmone tentabitur, qui contra est affectus, nihil mali sentiet, &c.

3. *Suppositum.*

Tertiò supponendum, quod præsidia debent esse morbis æqualia, & ideo magnus morbus magno indiget præsidio. Hoc nulla videtur egere probatione, cum sit axioma in arte medica, qua ratione dicebat Hip. 1. Aph. 5. Extremis morbis extrema remedia optima sunt.

*In vulneratis adest indicans purgationem.* Conclusio 1. In magnis vulneribus, pravis succis in corpore existentibus, ne ii ad vulneratam partem confluant, necesse est ipsos & evacuare, & revellere; quatenus enim vitiosi sunt, evacuari postulant, quatenus verò ad vulneratam partem confluant, revelli, quod cum purgatio sola præstet, ut supra ostensum est, nam purgantia pharmaca & evacuant, & vim ipsis inferunt, necesse quoque est fateri in talibus vulneratis adesse indicans purgationem, & quatenus est remedium evacuativum, & quatenus est revulsivum præsidium.

*Vulneratis possunt convenire fortia purgantia.* Conclusio 2. Ubi majus est inflammationis, seu fluxionis periculum cum remedia debeant esse affectibus proportionata juxta tertium suppositum, validiori remedio ipsi occurrendum, sicuti quando levius est periculum; leviora satis sunt præsidia. Ob id si maximum fuerit vulnus, & præceps fuerit fluxionis periculum, ejusque lethalis, ut quando corpus est validum, cacochymum, vulnus dolorosum, &c. sicuti indicabitur valdè præsidium tum evacuans, tum revellens, ita conveniet medicamentum fortiter purgans. Hinc Hip. lib. de frac. text. 48. com. 3. Ubi verò reponis, veratrum molle bibendum dare oportet eadem die, si eadem die reposita fuerint. Et inferiùs tex. videlicet. 50. Et quibus ossa reposita non fuerint, his eadem exhibenda purgatio. Agebat enim



enim Hipp. de fracturis cum ulcere femoris, & brachii in quo os extra eminet, ideoque maximum, & præceps imminet inflammationis, & corruptionis periculum, cujus gratia dicebat: Hi non valde superstites evadunt; nam & ossa magna sunt, & multum medullæ habent, &, quæ simul vulnerantur, multa sunt, & magni momenti, & nervi, & muscoli, & venæ. Et siquidem reposeris convulsiones accidere solent, si vero non reposita sint, febres acutæ, & biliosæ, & singultosæ oboriuntur, & denigantur: non minus autem superstites evadunt hi, quibus reposita non sunt, neque tentatum est, ut reponerentur: En quàm præceps immineat fluxio? Quam ut prohibeat Hipp. non blandum medicamentum exhibet, nec tamen omnia blanda deerant tunc temporis, namque lib. de nat. mulieb. nec non 7. epid. in historia filii Cidis, & Andreæ. Et 1. acut. text. 45. de Mercuriali meminit. Non deerat ipsi lac asininum, quo sæpè utitur ad subducendam alvum, sed veratrum ipsum medicamentum validissimum exhibet; extremis enim morbis extrema remedia sunt optima. Similiter lib. de frac. tex. 27. com. 2. in calcis luxatione veratrum ad revellendum, ut testatur Gal. in com. illius loci, illudque album exhibet. E converso in leviori periculo, ut, quando vulnus non est adeo fluxioni expositum, neque corpus vitiosis succis adeo scatet, leviora conveniunt. Unde Hipp. agens de luxatione digitorum pedis cum ulcere tex. 76. dicebat: Postea quiescere quàm maximè convenit, & decumbere, ac pauco cibo uti. Melius etiam pharmaco sursum purgante levi aliquo uti. Ecce quomodo ubi levius est periculum, levius etiam proponit medicamentum?

Conclusio 3. Si daretur corpus, in quo non adessent vitiosi *Corporibus* succi, huic non conveniret purgatio, etiamsi vulnera essent magna, hinc Gal. 6. Meth. 2. Fingamus quempiam ad nos venire, *puris non* cui tantum cutis acu sit puncta: hunc hominem, si is sit, cui facile vulnera sanescant, etiamsi citra medicamentum, nudoque *conveniunt* membro dimittas ad opera consueta, nihil mali sentiet, sin cui *purgantia.* difficulter sanentur, primum quidem dolebit, postea etiam tum pulsu particula infestabitur, tum phlegmone. per eum enim, cui facile vulnera sanescunt, eum intelligit, qui neque plethoricus est,



neque succis vitiosis refertus; namque inferius modum tradens cognoscendi eum, cui facile vulnera sanescunt, & cui difficulter, subjungit: At Empyricus examinando, percunctandoque hominis naturam discit, nos verò tum ex hujusmodi examinatione omnibus his usi, quæ per experientiam inveniuntur, tum nihilominus ex iis notis, quas de boni succi, malique natura habemus, præterea de iis, qui acris, hebetisque sunt sensus, tum plenitudine gravatis, modiceque se in succis habentibus, non ignari, quod qui vel plethoricus est, vel vitiosis succis premitur, vel acris est sensus, vel horum quibusdam vel omnibus premitur, phlegmone tentabitur, qui contra est affectus nihil mali sentiet. En quomodo ei qui probe est affectus, nec ullo vitioso succo premitur, non est opus purgatione? Idem clarius ex eodem Gal. colligi potest eodem loco, nam de nervi punctura pertractans, dicebat: Adverti namque ubi punctus nervus esset, ei ex sentiendi, quod obtinet, acumine necesse esse tum dolorem incidere quam reliquis partibus majorem, tum ex necessitate phlegmonem consequi, nisi quis & medelam dolori inveniret, & phlegmonis generationem prohiberet. Rationabile igitur mihi visum est, cutis quidem vulnus apertum, inglutinatumque custodire, quo per id ex nervo vulnerato sanies efflueret, totum verò corpus supervacuis humoribus liberare; At ne quis dolor vulneratam partem urgeret, in primis sollicitudinem habere. Quæ verò ratione à supervacuis humoribus liberandum sit corpus, inferius subjungit, dicens: Tutius verò fuerit etiam si quis cutem latius incidat, ac totum corpus sanguinis missione inaniat, utique si fortis sit virtus. Si verò vitiosis succis repletum corpus sit, protinus purget. Ecce quomodo non purgat in punctura nervi, nisi corpus vitiosis succis scateat? alias enim sibi satis est missio sanguinis. Unde & Gal. lib. de frac. com. 2. tex. 27. Porro quod excrementitios humores tum evacuare his, qui ita affecti sunt, tum etiam ad contraria loca averti summopere conducat, satis evidens est. Neque immerito, cum enim non adsit in corpore quidquam supervacui à sanguine diversum, quod à natura possit transmitti ad vulneratam partem, tanquam imbecillior, vanum est, pharmacis corpus exolvere juxta illud Hipp. 2. Aph. 36. Qui salubritatem habent corporis per medicamenta evacuati  
citò



citò exolvuntur. Et 37. ejusdem: Qui benè se habent corpore, difficulter ferunt medicationes. Unde Gal. in com. Aph. illius 37. dicebat: Hos, qui benè se habent corpore, inquit, difficulter ferre medicationes, nam & vertigines, & tormina patiuntur, & difficulter his purgatio procedit, & præterea celeriter exolvuntur. Fiunt autem hæc omnia purgante medicamento proprium quidem attrahere humorem appetente, flavam bilem videlicet, aut atram, aut pituitam, aut aquosam superfluitatem. Quia verò isti non adsunt, sanguinem colliquat, ac carnes, ut ex ipsis proprium attrahat humorem. Et com. 1. in lib. de hum. tex. 12. Sanos, & in quibus nihil redundat, purgare non oportet, quomodo enim decet accommodatam naturæ, & culpa vacantem materiam auferre? immò verò præterquam quod id cum molestia & labore facies, non mediocris noxa consequetur; quidquid enim per vim quidpiam facit, id dolores, labores, interdum etiam animi defectiones, & partium exolutiones, aliasque molestias invehere consuevit, evacuaris tu quidem, sed quidpiam naturæ accommodati, & quod rei essentiam attingat, detraxeris. Verùm, si in homine aut pituita, aut flava bilis, aut alius quispiam humor redundaret, tunc erit optima evacuatio. Denique non adest in corpore, quod purgationem indicet, ergo non est purgandum.

Sunt tamen quidam, qui contendunt omnibus vulneratis, vulnere tamen existente magno, competere purgationem, etiamsi omninò corpus sit mundum, dicunt enim bilem ob sui calorem, & tenuitatem facillimè ad vulneratam partem confluere, ut ergo motus hic præpediatur, purgandum esse ajunt, tum ut materia fluxionis auferatur, tum etiam ut revulsio fiat, immò ob solum motum dicunt competere purgationem revellendi gratia, cum purgatio contrarium motum moliatur, & ad contraria retrahat. Quæstio hæc logica omninò est, namque dari corpus à supervacuis penitus liberum, potius fingi potest, quàm quod censendum sit in rerum natura reperiri, sicuti neque datur summa sanitas ex Galeni decreto: attamen supposito ejuscemodi corpore, istud seligenti pharmaco purgandum non esse audacter assererem; id verò, ut omittam incommoda, quæ purgationem perfectè sa-



nis adhibitam comitantur, quoniam in tali corpore satis revellit à vulnerata parte detractio sanguinis. Cum enim tunc temporis non adsit nisi ea bilis copia, quæ requiritur, ut constituatur proportionata, & omnibus numeris absoluta sanguinis massa, neque etiam periculum est, ut sola influat, ut quæ nec calidior est, quàm par sit, nec tenuior. Retinebitur ergo à natura non aliter, ac sanguis, quia est de integritate massæ sanguinæ, quocirca si per sanguinis missionem fiat revulsio, neque verendum erit de bilioso sanguine, quod fluxurus sit. Aliter dicendum est, ubi in quopiam major bilis copia, & tenacior sanguis generatur, profectò necesse erit in hoc exuperantem bilem educere; nisi enim educatur, poterit facilè à natura expelli ad vulneratam partem, ut onus, quo premebatur, deponat, vel id, à quo molestia afficiebatur, expellat. Sed paulò interius rem consideremus.

Fluxionis causæ, & occasiones partim referuntur in partem recipientem, partim in transmittentem, & vias, per quas fit fluxus, ut superius explicavimus, si de iis videlicet loquamur, quæ ab ipso affecto corpore procedunt, modò in corpore temperato pars non est neque nimis calida, neque nimis dolens, quæ duo sunt principia attractionis, ut more medicorum loquar (ostensum enim est re vera neque dolorem, neque calorem attrahere, sed solummodo reddere partem dispositam ad recipiendum) non est enim nimis calida, quia talis redditur ob affluxum succorum calidorum in vulnerato: neque nimis dolens, quia neque est nimis exquisiti sensus, sed mediocris, neque dolent vulneratæ partes, nisi aut permaneat causa quædam externa continuum adhuc solvens, aut alteratio contingat ab aëre, ita ut partes internæ nondum aërem expertæ, eidem diutiùs exponantur, aut ab aliquo alio ambiente, vel ob affluxum succorum, quare parva est occasio principii fluxionis, quantum spectat ad partem recipientem ratione attractionis ex dolore, vel calore, major fortasse ea attractione, quæ fit vi vacuationis, cum enim sanguis è vulnerata parte effluat, consecutione quadam, ne vacuum detur, & alibi allatis de causis, sanguis ad vulneratam partem movetur, qua ratione fieri potest, ut major quantitas influat.



fluat, quam à parte regi possit, natura perperam operante ob affectionem. Sed quavis harum causarum fiat fluxio, non major est ratio, quod influat bilis, quam totus sanguis, sed totus sanguis movebitur, unde pro sui revulsione non opus erit expurgante pharmaco, sed venæ sectione. Quatenus verò ad eam fluxione quæ fit ob transmissionem à toto, vel parte aliqua ad imbecilliolem partem. utique hac ratione fluxio contingit, quando natura aut quantitate humorum premitur, aut qualitate irritatur, cum autem in temperatissimo corpore neque humores quantitate exuperent, neque qualitate sint infensi, neque in eodem erit hæc occasio fluxionis, bilis enim quamvis sit calidior, & tenuior, & ad fluxionem sui natura paratior, attamen cum non exuperet, sed in convenienti proportionem se habeat ad sanguinem, & ei sit commixta, & naturaliter se habeat, non est, quod natura eam à sanguine separet, ut solam expellat. Nisi quis velit à seipsis humores moveri, quod tamen falsum esse cuilibet in rebus philosophicis vel mediocriter erudito, patere potest, quidquid enim movetur à seipso, dividitur in partem moventem, & in partem motam, ut testatur Aristoteles in 8. Physic. Hoc quomodo an competat humoribus ipsi videant, & quamvis ubi humores ebulliunt, fluere consueverint, attamen neque tunc à seipsis moventur, sed non aliter ac aqua ebulliens vi ignis movetur: Verum in vulnerato, ut tale est, non adest hic in humoribus fervor, relinquatur ergo humores in ipso fluere, aut quia attrahantur à parte vulnerata, vel quia transmittantur ab aliis partibus ad ipsam, tanquam ad imbecilliolem.

Quamobrem concludamus, quod cum in vulnerato temperatissimo bilis ab aliis humoribus separata nequeat confluere, neque etiam pharmaco purganda est, eo siquidem exhibito, cum non adsit nisi bilis necessaria, non poterit fieri, nisi prava purgatio, ut superius dictum est. Idem profecto sentiendum est de ea plethoræ specie, in qua vel solus sanguis redundat, vel omnes humores ex æquo sunt adaucti; eadem enim est ratio. Quod si Gal. quandoque plethoricæ dispositioni purgatione succurrat, ut videre est 4. Meth. 6. intelligendum est Gal. decretum, non de vera, sed de spuria plethora. Quamvis ergo Hipp. lib. de frac.

vera-



veratrum purgandi gratia in vulneribus cum fractura proponat, non est existimandum in quovis corpore voluisse Hipp. exhiberi veratrum, sed in eo tantum, quod pravis succis scatet; absurdum enim est credere, eum præcepisse nos uti helleboro in puris corporibus, qui 4. Aph. 16. dicat, carnes sanas habentibus helleborum esse periculofum, eo quia convulsionem faciat, unde & Gal. in com. ejus Aph. dicebat: Habet namque helleborus istud præcipuum convulsionem facere propter operationis vehementiam. Supponit ergo Hipp. periculum ingens lethalis fluxionis ad partem ob pravorum succorum abundantiam, quos ut evacuet, & reve'llat forti remedio, veratrum vult exhibere.

Nec objiciat quispiam purgationem non solum convenire propter vitiosos succos sed etiam propter vim morbi ex Gal. decreto, qua ratione dicebat com. 1. in lib. de hum. tex. 12. & 4. Meth. 6. Quemadmodum sanguis & propter magnam ipsius copiam, & morbi magnitudinem mittitur, sic & purgatio propter alterius cujusdam humoris redundantiam, & morbi robur adhibebitur, & paulo post, purgationes sunt perutiles, & cum morbi magni sunt, & cum quibus permagna juncta est humorum redundantia, unde superius dixerat etiam ex Hippoc. sententia: Scopus, qui in omnibus morbis ad purgationem indicandam præstat cæteris, is est, qui ab affectus magnitudine sumendus est, non enim intelligendum est, Gal. velle in morbo magno, ut magnus est, purgandum esse, ita ut morbi magnitudo sit indicans purgationem, quippe hoc non esset propriis decretis congruens; cur 1. Aph. cap. 23. asserit in magnis doloribus nullum majus inveniri remedium, quam usque ad animi defectionem evacuare, adhibita distinctione, an mittere sanguinem, an purgare conveniat? Cur in synocho sanguinem mittendum ait, non purgandum? Denique cur in magnis morbis modo mittit sanguinem, modo purgat, & tamen, si morbus magnus, ut magnus est, indicaret purgationem, nulla esset habenda distinctio, sed omnibus æqualiter conveniret? An melius est dicere Gal. in magnis morbis modo mittere sanguinem, modo purgare pro ratione peccantis succi? Hoc enim sibi videtur velle illud, adhibita distinctione, an mittere sanguinem, aut purgare oporteat, & illud etiam,

*Morbi magnitudo non indicat purgationem.*



etiam, quod lib. de cur. ra. per sang. mis. dicebat: Incipiente videlicet phlegmone curationem ab inanitione auspicamur, si eam fore magnam suspicamur, aut vena incisa, aut purgante exhibito, prout alterum altero magis convenire videbitur.

Itaque sic censeo intelligendam Gal. sententiam, videlicet *Interpretatur Galeni sententia.* purgationem convenire & propter vitiosos succos, ut evacuentur, etiamsi morbum actu non faciant; vel, si adsit morbus quispian, non semper purgandum esse, sed tunc, quando ipse magnus est, quoniam ut magnum remedium non competit in quovis levi morbo, sed in magno, magnum enim remedium magnis competit morbis, ideoque volentes in morbis purgare proposito habeant magnitudinem morbi, ut quæ magnitudinem remedii indicet, quod remedium est purgatio, quando vitiosi succi à sanguine diversi morbum faciunt, vel etiam facturi sint, vel sanguinis missio, quando vitium se habeat ex parte sanguinis, & hæc est distinctio, quæ adhiberi debet, ut sciamus, quando purgare, & quando mittere sanguinem oporteat.

Et si interius rem perscrutemur, magnitudo morbi non erit verè *Morbi magnitudo non indicat præsidium, sed est signum indicantis.* indicans magnum remedium evacuans, sed potius signum morbi-  
ficæ materiæ vehementer peccantis, ob idque indicantis magnam  
evacuationem, atque aut per sanguinis missionem, aut per phar-  
macum purgans pro diversitate ipsius. Unde Gal. 4. Meth. 6.  
Quin & si iis, quæ jam dixi, illud quoque adjicias, quod ipsum;  
qui redundat succum, vacuandum esse suadet, aliàs sanguinis  
detractionem adhibebis, cum videlicet is vincit, aliàs pharmacum,  
quod ad bilem atram, vel flavam, vel pituitam educendam vim  
habeat, dabis: peterem enim à Gal. cur fecas venam in magno vul-  
nere? num quia est morbus magnus? Equidem sanguinis missio non  
est remedium vulneris magni; nemo enim compos mentis hoc di-  
ceret, necessarium est ergo, ut alia de causa feces venam: & quæ alia  
causa est, nisi vitiosus succus? immo ipse Gal. hoc expresse 4. Meth. 6.  
tradidit, ubi enim egisset de purgatione, & venæ sectione gratia  
derivationis, & revulsionis in ulceribus, subjungit; hanc verò  
rationem ad aliam quoque artis partem spectare, nempe quæ de  
succorum medicatione præcipit, neminem latere arbitror, est  
ergo purgatio remedium succorum, non autem vulneris. Et



paulò inferiùs ubi de eadem materia egisset, subjungit: Illius interim in omnibus his non immemor, non esse ulceris, qua ulcus est, ullam id genus curationem, sed vel vitiosi, qui conjunctus est, succi, vel redundantiaë, vel phlegmonis, vel herpetis, vel ejus generis alterius. Si ergo purgatio non est curatio ulceris magni, sed conjuncti affectus, ergo non indicatur ab ulcere magno, nisi ut dictum est.

Absurdum enim est dicere, aliud esse, quod curandi rationem præscribat, aliud, quod curetur, ut dicebat Gal. 3. Meth. 1. & indicare de se quodque magis potest, quam de alio. Quis enim vitiosos habens succos leviter vulneretur, ut nullum sit fluxionis alicujus momenti periculum, huic profectò nec sanguinem mittemus, nec purgans exhibebimus: Sed si vulnus sit magnum, modò hoc, modò illud adhibebimus, modò etiam utrumque propter fluxionis, & inflammationis periculum. En quomodo magnitudo morbi impellit nos ad exhibendum pharmacum, quod aliàs non exhiberemus, cum tamen sit remedium succorum, & hoc quia magnitudo morbi existentis nos docet, imminere aliquod aliud magnum malum ab ipsis succis, unde ut præservemus corpus à magno illo morbo, purgamus, indicationem tamen fumentes ab ipsis vitiosis succis, aliud enim est ipsorum vitium in magno vulnere, aliud autem in parvo. Quod igitur non purgandus sit is, qui omninò sanus, & nullo vitioso succo afficitur, quamvis sit graviter vulneratus, manifestum est. Quia tamen summa sanitas non datur, neque est invenire corpus exquisitissimè sanum, & ex consequenti, cujus omnes operationes sint perfectissimæ, & prætereà nostris tempestatibus maximè delinquitur in victus ratione, ut utraque ratione fieri non possit, quin in omnibus ferè corporibus adsint excrementitii humores, si vulnus ex maximis foret, & cum urgenti periculo lethalis inflammationis, non ab re existimarem, si exhiberetur aliquod levius pharmacum, ex quo non agitentur boni succi, sed tantùm supervacua excrementa clementer educerentur, ex quo istud insuper beneficium haberemus, quod aliqua fieret revulsio, sicuti enim clysteres faciunt ad revellendum, ita & clementia hæc pharmaca, non quidem sua ratione, sed consecutione quadam.



Conclusio quarta. In omnibus vulneribus purgatio non potest *In omnibus* esse remedium revellens, posteaquam revulsio fit ad contraria, *vulneribus* quare cum purgans medicamentum attrahat ad partes naturales, *non com-* videlicet ad ventriculum, hepar, & intestina, in vulneribus harum *petit purga-* partium non potest esse remedium revellens, immò esset potius *tio.* fluxionis causa, attrahendo ad partes; medicamentum enim, quod per alvum purgat, humores deorsum movet, quod verò per vomitum sursum; ideoque in partium infernarum vulneribus purgatio per alvum non est remedium verè revellens, nec vomitus in vulneribus superiorum partium, sed magis videtur competere vomitus in partium infernarum vulneribus, & alvi dejectio in partium superiorum. Hinc Hip. libro de frac. tex. 76. in luxatione digitorum pedis proponit medicamentum sursum purgans & tex. 39. in fractura femoris exhibet veratrum, album videlicet, si Galeno credimus, ut sursum fiat revulsio. At è converso in lib. de vul. cap. tex. 78. In capitis vulnere, quando supervenit erysipelas in facie, infernam alvum deorsum purgandam esse asserit medicamento, quod bilem ducat. Et Gal. 3. Meth. 2. in pudendorum phlegmone vomitum proponit, tanquam revellens remedium, purgationem verò in iis affectibus, qui circa caput sunt. Et libro de hum. sec. tertia com. 13. in ulceribus superiorum per inferna purgandum asserit ex Hip. revellendi gratia, per superiora verò in inferiorum ulceribus. Hac ratione 13. Meth. 2. In phlegmone jecinoris purgantia medicamenta prohibet, atque in ventriculi, & intestinorum phlegmone, & vomitum in partibus stomachi, & quarto Meth. 6. dicebat: Quare nunc quoque si etiamnum fluxio valenter irruat, revellere ad contraria studebimus, utique si in superioribus ulcus consistat per inferna purgantes, sin autem in inferioribus superiorem ventrem evacuantes. Attamen in vulneribus artuum non adeò necessarium est exquisitam habere rationem superioritatis, & inferioritatis, posteaquam si brachia sint vulnerata, purgans medicamentum per superiora vim habet revellendi, quatenus à remotis partibus externis ad centrum fit attractio, & in vulneribus crurum, & femorum pari ratione purgans per inferiorem alvum. Hoc colligitur ex ipsomet Hip. nam libro de frac. text. 39. In fracturis cum ulcere tum femorum,



tum brachiorum veratrum album exhibet, quod tum vomitum ciet validissimè, tum etiam per internam alvum purgat. Nihilominus, si vulneratus esset ad vomitum facilis, nihilque reluctaretur, præponendus esset in inferiorum partium vulneribus ipse vomitus, sicuti in brachiorum vulneribus alvi dejectio. At, quando in trunco vulnus adest, omninò servanda est superioritatis ratio, ita ut in pudendorum vulneribus vomitu utamur, in Thoracis vero, & capitis, & cervicis, alvi dejectione. Neque solum quia pharmacum sursum trahat, sed & propter violentiam motus, qua superiores agitantur partes. Pari ratione in uteri vulneribus, & renum cavenda est omninò alvi dejectio. In ventriculi verò, intestinorum, hepatis, lienis, mesenterii neque purgamus per inferiora; neque per superiora. Quando igitur vulneratae sunt partes, in quarum vulneribus non licet congruam curationem instituere, aliis revellentibus satisfacere oportebit huic scopo. Cum autem de vulneribus partium pertractabimus, & quid de purgatione in illis partibus instituenda censendum sit, explicabimus. Quod igitur in vulneratis ipsius vulneris gratia purgatio selectiva competat, tum pro revulsione, tum pro evacuatione succorum, qui confertim influentes inflammationem, corruptionemve aut aliud quidpiam grave malum minantur, & eorum etiam, qui paulatim transmitti possunt ad ipsam vulneratam partem tanquam imbecilliolem, unde vulnus excrementitium, & pars intemperata reddi solet, ac vitiari sanguis, ex quo generari caro deberet, satis, superque ostensum est.

*Competit purgatio in vulneratis ob apparatus morbosum.*

Sed & alia ratione in vulneratis purgationem competere certum est, ob apparatus videlicet morbosum, posteaquam non raro evenit ob pravitatem succorum, quibus totum corpus scatet, putridam aliquam febrem accendi, & mali moris interdum. Quod evenire sæpissimè observamus in calidis, & humidis aëris constitutionibus, & regionibus, & in iis, qui prava victus ratione utuntur, ut contingit tempore belli, & famis.

*Solvitur ratio, quæ purgationem prohibebat.*

Quare remanet, ut objectionem illam diluamus, quæ purgantia à vulneratis arcebat, quia videlicet purgans medicamentum humores exagitat, & ad motum concitat: & Galeno satisfaciamus, qui com. 2. in librum de frac. text. 29. cum in contextu

Hipp.



Hipp. per superiora purgandum dixisset, hoc est per album veratrum in luxatione, & contusione calcis ex casu ab alto, si febris absit, vel si parva febris, seu non acuta, in com. inquit Galenus: Nos tamen illud, neque etiamsi nulla adesset febris, tradere auderemus. Et ut ab hac posteriori initium sumamus, ipsemet Gal. ex text. 27. ejusdem com. dat modum solvendi difficultatem, dixerat enim Hipp. similiter veratrum exhibendum esse, unde Gal. in com. inquit: Quamvis evidens sit, excrementitios humores tum evacuari his, qui ita affecti sunt, tum etiam ad contraria loca averti, summopere esse conducibile, non tamen omniquaque tutum id albo veratro præstari, etiam si febris absit, eo quod si multos crassos, atque glutinosos humores in corpore reperiatur, soleat interdum homines strangulare, & idcirco antequam ipse exhibeat veratrum, prius corporis præparationi incumbit attenuantibus, alioqui fallax esse, dicens citra corporis præparationem ex victu attenuante ipsum exhibere, cum in plerisque minimè noverimus, quibus humoribus abundant. Ibidem tamen Hip. excusat, quod veratrum dandum dixerit, quoniam Hip. tempore forsitan, ait, tuto poterat exhiberi, quia tunc temporis non erant homines delitioso, atque otioso victui dediti, sed frugali, & laborioso, ut nulla inde humorum crassities contraheretur, & consequenter etiam homines tunc temporis erant robustiores, ut faciliè possent labores ex vomitu perferre. Non damnat ergo Gal. usum veratri, quoniam non conveniat purgare excrementitios succos, sed genus medicamenti reprobatur, quod suis temporibus erat fallax propter rationes ab ipso adductas eo in loco. Itaque cum nostris temporibus præsto sint medicamenta longè clementiora, poterunt tuto ea exhiberi.

Ad id verò, quod dicebatur in articularibus fluxionibus nos abstinere à purgatione, eo quod humores ad articulos magis præcipitent, unde & idem in vulneribus à purgatione timeri debet, quamvis prima facie multam facere difficultatem videatur, attamen Hip. ipse solutionem præstat. 6. de morb. vulg. sec. 2. tex. 8. ubi habet Hip. Cedentem revellere statim, reluctantem dimittere; Hip. enim vult docere, quibus humoribus competat revulsio, & quibus non, dicitque eam competere iis humoribus,



qui sunt obsequentes, qui enim reluctantur, & non sunt revellentibus præfidiis obsequentes, sunt dimittendi; etenim si in iis quoque fortioribus revellentibus uti voluerimus, magis eos attenuabimus, & fluxiles reddemus, atque ad motum concitabimus, & cum non obsequantur revellentibus præfidiis, necessario magis ad affectos locos præcipitabunt. Unde Avic. 4. 1. cap. 3. juxta hoc Hipp. decretum dicebat: Cumque materiam ad longinqua trahere volueris, loci dolorem prius sedabis, ut ipsius minuatur compressio, seu coarctatio per attractionem, quoniam est dolor trahens, & cum ad locum non obedit, ad quem ipsam trahis, non violenter agas, quoniam quandoque violentia illa ipsam movebit, & subtiliabit, & non trahetur, & fiet velocius declinans ad dolentem locum.

Ad rem veniamus. In fluxionibus articularibus solemus abstinere à purgatione, quoniam humor influens non cedit purgationi, & revellentibus præfidiis, ne igitur ob violentiam illi ab attrahente pharmaco inditam magis reddatur fluxilis, à purgatione abstinemus: quamvis ubi fluxio non est ita rebellis, non enim semper ita contingit, maximè ex usu sint pharmaca congrua statim à principio exhibita, ut omnino quandoque fluxionem finiant, veluti multoties experientia confirmatum est: modo in vulneribus humores sui natura sint obsequentes, ut à purgationibus haud timendum nobis sit, eos reddendos magis fluxiles.

## CAPUT LIV.

*De tempore exhibendi pharmacum purgans.*

**M**anifestum est ergo in vulnerato, in quo pravi sint succi, si vulnus sit magnum, & non in parte, per quam, vel ad quam sit attractio à medicamento, adesse indicans purgationem, & eam etiam feligentem, tanquam remedium tum evacuans, tum revellens, & nihil prohibens, qua vulneratus est. Dico autem qua vulneratus est, ne tiro existimet, me partes suas nolle dare ætati, tempori, regioni, consuetudini, naturæ laborantis, & omnino virtuti, hæc siquidem universalia supponimus. Quando

vero



vero est in parte, per quam, vel ad quam fieri debet attractio, corpore existente pravis succis referto, adesse quidem indicans purgationem, tanquam remedium evacuans, sed prohiberi à vulneratis partibus, & propensione, quam habent succi ad vulneratas partes, quatenus est remedium ad easdem attrahens.

Reliquum est, ut videamus, quando purgans pharmacum exhibendum sit illi, in quo nullum est prohibens; etenim neque ii, qui in vulneribus purgandum existimant, in hoc conveniunt, alii siquidem statim purgandum consent, alii vero magis diligunt, ut serapia quædam alterantia præmittantur, præparandi gratia corpus, & materiam evacuandam, deinde fiat expurgatio. Hinc multos videas, qui non nisi transacta septima purgans medicamentum exhibent; de leniente enim nulla est controversia. Sed in re clara nescio, quo modo cæcutiant. Rei veritas erit manifesta, si scopi considerentur, quos propositos habemus in purgantis pharmaci exhibitione.

Jam dictum est purgationem convenire in vulnerato evacuandi gratia, atque revellendi vitiosos succos, qui confertim ad partem vulneratam influentes inflammationem, atque corruptionem efficiunt, nec non & evacuandi eos, qui à natura sumpta occasione à debilitate vulneratæ partis, posteaquam consuevit semper ad imbecilliores partem supervacua transmittere, ad eam paulatim expelluntur, ex qua paulatim facta transmissione vulnera humidiora, & pluribus excrementis scatentia redduntur, temperiesque partis paulatim evertitur, & vitiatur etiam sanguis, ex quo generari deberet caro, & tandem in ulcera transeunt, & denique ob apparatus morbificum, cum non raro contingat ob pravos succos in corpore existentes malam putredinem concipi, febremque, & eam mali moris exoriri, unde & ut futuram putredinem prohibeamus, & febrem etiam curemus, vitiosos succos purgamus.

His ergo suppositis, non erit difficile tempus adinvenire, *Purgatio* in quo purgans sit exhibendum; quando enim purgamus, ut eva-*revulsionis* cuemus, atque revellamus succos, qui inflammationem faciunt, *gratia con-* & ita inflammationem prohibeamus, utique purgandum esse ma-*venit in* nifestum est, quando fluxionis imminet periculum; at statim im-*principio* minet



minet periculum fluxionis, ut alias explicatum est, igitur quam primum erit purgandum. Neque valet, quod ut rectè succedat purgatio, prius debeamus evacuandos succos præparare, præterquam quod enim humores, quos evacuare proponimus, majori ex parte calidi sunt, ac tenues, & ideo pauca indigent præparatione, & tanto magis cum non actu faciant morbum, majus etiam est damnum, quod imminet ex motu humorum prætermissa purgatione, quam illud sit, quod evenire potest exhibito purgante medicamento ante humorum præparationem, quod sanè in corpore non febricitante non potest esse, nisi exiguum. Et quid prodesset purgatio, si interim ac humores præparamus, irrueret fluxio?

*Galenus auctoritate comprobatur.*

Hæc est mens ipsius Gal. namque 6. Meth. 2. volens præcavere, ne puncto nervo succedat inflammatio, protinus purgandum præcipit, dicebat enim: Adverti namque ubi punctus nervus esset, ei ex sentiendi, quod obtinet, acumine, necesse esse dolorem incidere, quàm reliquis partibus majorem, tum ex necessitate phlegmonem consequi, nisi quis & medelam dolori inveniret, & phlegmonis generationem prohiberet. Rationabile igitur mihi est visum, cutis quidem vulnus apertum, inglutinatumque custodire, quo per id ex nervo vulnerato sanies efflueret, totum vero corpus supervacuis humoribus liberare; Ac ne quis dolor vulneratam partem urgeret, in primis sollicitudinem habere. Et paulo post: Tutius vero fuerit, etiam si quis cutem latius incidat, ac totum corpus sanguinis missione inaniat, utique si fortis sit virtus; si vero vitiosis succis repletum corpus sit, protinus purget. Ecce quomodo Gal. nullam expectandam coctionem, aut præparationem censet. 3. quoque Meth. cap. 9. dicebat: Quoties vidisti me una die curasse oculi inflammationem sola purgatione, facta scilicet revulsione ad partem oppositam, & ab affecta parte longinquam, & per eam evacuata bile, quæ fluendo cum sanguine inflammationem oculo concitabat? Libro quoque de curandi ratione per sanguinis missionem cap. 8. dicebat: Eadem ratione in his, quibus pars quæpiam graviter icta est, aut vulnerata, aut utcumque incipientem habet phlegmonem, curationem ab inanitione auspicamur, si eam fore magnam suspicamur,



mur, aut vena incisa, aut purgante exhibito &c. Ecce quomodo revulsionis gratia non secus à principio purgans exhibet, ac sanguinem mittat? Et 14. Meth. 8. cuidam linguam valde tumefactam habenti exhibuit statim pilulas ex aloë, scammonio, & colocynthide, hæc sunt verba: Sanè linguam ita tumefactam cuidam vidimus, ut ore hominis contineri non posset, is nec venam inciderat unquam, & sexagenarius jam erat, horaque diei ferè decima erat, cum ad eum primùm accessi, & vidi, at visus mihi est usitatis mihi pilulis, quæ aloë, scammonio, & colocynthide constant, vespere datis purgandus. Et paulo post: Pilulas quidem sumpsit, de locali tamen remedio (proposuerat enim Gal. locale aliquod refrigerans) deliberatio in posterum diem est delata. 5. etiam Meth. 14. purgationem statim à principio instituit, ut avertat acrem fluxionem à capite ad pulmones, erosionem venæ in pulmonibus minantem, dicebat enim: Oportet autem in principio nullius rei esse æquè sollicitum, quam ut neque tussiant, neque ex capite aliquid in pulmonem defluat. Cavetur autem id triplici præsidio, purgatione primùm, secundo medicamine, quod Diaspermaton dicitur, tertio ipsi capiti providendo. Quod purget, diversas facultates habeat oportet, cuius generis sunt nostræ pilulæ, quæ ex aloë, scammonio, colocynthide, Agarico, bdellio, & gummi Arabico conficiuntur, ad plures videlicet excrementorum purgandas species. Et paulo post: Capiti providebitur cerati usu, quod fit ex thapsia; atque hæc quidem in principio peragenda sunt.

Immo & ipse Hipp. idem sensit, nam lib. de frac. com. tertio textu 48. In fractura femoris, aut brachii cum vulnere, quando ossa extra exiere, statim à principio exhibet veratrum. At illis restitutis, dicebat: Eadem die molle veratrum potandum exhibeto, si eadem die fuerint restituta. Et com. 2. tex. 27. Melius autem etiam erit ut veratrum bibendum, aut eadem die, aut postridie exhibeatur, tertio vero die solvatur, ac rursus ligetur. Unde Gal. com. 2. tex. 29. censet veratrum dandum aut eodem, aut postero die, videlicet antequam partes affectæ inflammatione laborent, homoque febricitare incipiat. Quid clarius? Quin & 2. de ra. victus in acutis: In pleuritide statim à principio si non

*Idem sentit Hipp.*



revulsionis gratia, saltem subtrahendæ materiæ fluxionis causa, si dolor infestet partes, quæ sub septo transverso sunt, veratrum nigrum exhibet, vel peplium, dicebat enim: Si vero eas, quæ sub septo transverso sunt partes, dolor infestat, nullumque ad claviculam signum fuerit, ventrem vel nigro veratro, vel peplio mollire oportet. Neque hoc reprobatur Gal. in com. illius loci.

Sed in re manifestissima, cuique maximè ratio favet, plura loca illustriorum medicorum congerere supervacaneum existimo. Nemo est, qui non videat, magis posse humorum motum ad vulneratam partem ad indicandam purgationem; quam eorum modica præparatio, vel etiam cruditas possit ad eam prohibendam. Inflammatio enim vulneribus superveniens ob affluxum succorum non solum negotium facessit, verum multoties lethalis est: atqui damnum ex evacuatione crudæ materiæ, & non præparatæ emergens (concedamus à principio, & aliquam portionem non præparatæ vim pati à medicamento, posteaquam neque ulla purgatio absque alicujus utilis partis evacuatione succedit) paucum est, & solummodo ex hoc reddi potest evacuatio aliquantulum laboriosior, non enim sumus in casu, in quo natura retinet, ut concoquat. Ex duobus malis methodus suadet minus esse eligendum.

Sed quoniam, ut dictum est à principio, non procuramus, nisi purgationem tenuium succorum, atque calidorum, pauca admodum opus est præparatione, ut damnum ex tali evacuatione procedens pro nihilo habendum sit, cum tamen ommissa hac purgatione, malum maximi momenti immineat. Eo autem minus malum ex purgatione in principio facta nostris temporibus evenire censendum est, cum pharmaca habeamus valdè clementia, quæ licet selectivè humores ducant, nullam vim naturæ inferunt, quibus quidem destituta erat antiquitas. Neque semper unica medicamenti exhibitio satis est ad subtrahendam fluxionis materiam, atque ad revulsionem, sed bis, & ter exhibendum est pharmacum pro exuperantia succi, interpositis tamen aliquibus diebus inter unum, & alterum pharmacum, quo natura interim possit refici: unde consuevi ego statim à principio exhibere pharmacum, deinde tribus circiter diebus refrigerantibus,



bus, & incrassantibus uti, quo humores inepti ad motum reddantur, & iterum, si adhuc periculum sit fluxionis, ante, septimam aliud expurgans exhibeo: dein rursus ad alterantia me confero. Et si adhuc periculum fluxionis adesse videam, iterum decima, vel duodecima expurgo. Quandoque tamen urgentia periculi iterationem pharmaci accelerare cogit.

Sed post usum refrigerantium, & incrassantium, & omnino *Dubitatio.* humores ineptos ad motum reddentium videtur incongruus esse usus purgantium pharmacorum, posteaquam talia reddunt humores rebelles, & minimè obsequentes pharmacis purgantibus, eoque magis, cum etiam viæ, per quas deberet fieri attractio succorum, ope talium reddantur adstrictæ, quod est à doctrina Hipp. alienum 2. Aph. 9. dicentis: Corpora quæcumque quis voluerit purgare, fluida facere oportet. In cuius Aph. explicatione dicebat Gal. Si quis enim extenuet, atque incidat crassos, atque tenaces humores, qui in corpore sunt, & meatus aperiat, per quos isti transmittuntur, atque trahuntur à medicamentis, quæ vim purgativam habent, tunc purgatio in omnibus rectè procedit, qui vero istud neglexerint, & vomitus, atque alvi subductionem procuraverint, his difficiles veniunt purgationes non sine torminibus, & quadam vertigine, fastidioque multo, & malo pulsu, ac dissolutione, & difficultate. Et ibidem: Sive per vomitus, sive per alvi subductionem purgare velis, fluidum totum corpus efficies, sic purgabis optimè. Erit autem fluidum, ut diximus, omnibus meatibus reſeratis, humoribus vero incisis, absterſis, atque extenuatis, si quis fuerit humor in corpore crassus, & glutinosus. Omnino igitur videtur inconveniens exhibere ea, quæ humores incrassant, & ineptos ad motum reddunt, atque prætereà vias adstringunt, dein velle purgationem moliri.

Huic dubitationi dicimus, nos procurare incrassationem, & *Solutio.* refrigerationem tenuinum, & acrium succorum, qui superfluunt primæ purgationi. Verum quoniam non est verisimile omnes reddi posse in tam parvo tempore crassos, & ad motum ineptos, purgamus, ut, qui tenuiores actionem alterantium refugerunt, evacuentur. Requiritur autem attenuatio illa, & deterſio, quando humores sunt crassi, & tenaces, non autem, quando tenues



sunt evacuandi. Qua ratione dicebat Gal. com. 3. & in lib. de hum. Crassos humores attenuare, ac tenaces incidere plane decet, alii vero evacuandi, per alios tenues intelligens. Ubi vero crassos, ac tenaces vellemus evacuare, utique hi prius attenuandi essent, & incidendi. Verum transacto inflammationis periculo horum evacuatio tentanda, ne dum hos volumus attenuare, tenuiores ad motum concitemus. Et, quod de imminente fluxione dictum est, intelligendum est etiam, si supervenerit jam fluxio, quamvis non exhibeamus pharmacum ratione materiæ jam fluxæ, sed fluentis & fluxuræ.

*Purgatio  
quæ conve-  
nit ratione  
succorum,  
qui paula-  
tim influen-  
tes vulnus  
reddunt ex-  
crementiti-  
um, quan-  
do institu-  
enda.*

*Quando  
purgandum,  
si ob appa-  
ratur mor-  
bificum fe-  
bris immi-  
neat.*

Si vero loquamur de purgatione eorum succorum, qui paulatim à natura transmitti solent ad locum vulneris, atque vulnus humidum, & excrementitium reddunt, utique si crassi ii fuerint, præmittenda erit aliqua præparatio, tutoque fieri hoc poterit, posteaquam periculum non est in mora: at si succi tenues fuerint, purgatio, quæ materiam fluxionis subtrahit, fluentesque humores retrahit, eadem & hosce humores evacuabit. De purgatione autem, quæ fit ob apparatus morbificum, non est præsentis loci determinare. Sed tamen ad uberiolem doctrinam aliquid de hac summam afferemus, ne tiro in hujusmodi casibus hæsitet, & occasionem labi permittat. Quoniam propositum habere debemus, omni studio putredinem prohibere, quæ ob exuberantes pravos succos imminet; antequam putredo accendatur, necessarium erit quamprimum minorem reddere materiam morbificam purgante exhibito, & eo quidem validiori, si mali moris, vel etiam pestilentialis febris immineat. Quod enim præsentem febrem, conceditur, tanto magis ipsa absente, sed imminente exequendum: atqui, præsentem febrem, si pravorum succorum tanta sit copia, ut vereamur, ne succumbat, aut deficiat natura ante eorum coctionem, vel ea sit succorum malitia, ut naturæ gratiam recipere non possint, veluti quando materia est venenosa, purgante exhibito necessarium est minorem reddere materiam quo natura facilius possit, quod reliquum est, evincere, atque à putredine præservare, & præterea materiam illam adeo pravam expellere, ne dum coctionem expectamus, augeatur potius corruptio, aliter expectaretur quod nunquam ventu-

rum



rum esset, unde & Hipp. 2. Aph. 29. In principiis morborum si quid tibi videtur movendum, move, coque magis cum natura evacuationi non reluctetur; nam propter multitudinem, vel malitiam natura eam non retinet, & amplectitur, ut concoquat, igitur & antequam putredo accendatur, ut illa prohibeatur, necessarium erit purgante exhibito multitudinem tollere, ac malos, & incorrigibiles succos educere. Quæcunque enim morbis præsentibus rectè peraguntur, dicebat Gal. lib. de cur. ra. per sang. mis. ex Hip. cap. 9. aut incipientibus, aut imminetibus prævertenda. Quando unica medicamenti exhibitione non satis vacuatum corpus videtur, paucis interpositis diebus, quibus præparationi, & alterationi incumbendum est, iterum exhibendum pharmacum, & sic deinceps, donec periculum transierit. At tempus exhibendi pharmaci, si putrida febris ob appatum morbosum jam supervenerit, à doctrina febrium petendum est. Aliquid tamen de hoc etiam dicemus, quando de procuratione vulnerati in febribus pertractabimus.

An verò præmittenda sit venæ sectio, an expurgatio, quando utroque auxilio uti est opus, & ex natura pharmaci, quo usi sumus, & ex imminente periculo licebit intelligere, quando enim vehementi pharmaco uti propositum est, proculdubio præmittenda est venæ sectio unde Gal. 6. Epid. sec. prima tex. 5. Cum pro curatione nephritici doloris proposuisset tum venæ sectionem in poplite, tum expurgationem per veratrum, hæc habet: Veratro quidem purgare, cum affectus inveteraverit, & quasi vecte quodam, ut ita dixerim, quo exturbetur, eget; veratro enim ad ejusmodi affectus utimur. Venam autem secare his expedit, in quibus sanguis multus, aut crassus per venas redundaverit. Quod si utriusque auxilii idem homo egeat, satis constat, à venæ sectione esse auspiciandum. Hinc Avic. 4. primi doct. 5. cap. 4. Cum autem minutio necessaria fuerit, & ventris solutio ex aliquo, quod sit sicuti helleborus, & violentæ medicinæ, à minutione incipere debes, quoniam hoc est ex præceptis Hip. in lib. Epid. & hæc est veritas. Hujus autem rei ratio nulla alia est, nisi quod venæ sectio est universalius præsidium, cum ex æquo evacuet omnes humores, unde post venæ sectionem humores in venis re-



*Imminens  
periculum  
idem de-  
monstrat.*

manent in eadem proportionem, qua prius. At imminens periculum id clarius demonstrabit; nam si majus, & urgentius periculum ex motu sanguinis immineat ad vulneratam partem, quam ea succo à sanguine diverso, quod plerumque contingit in vulneratis, si periculum ex vulnere dimetiamur, prius secanda est vena, si vero à succo à sanguine diverso, à purgatione exordien- dum. Unde præclare admodum Celsus. lib. 2. cap. 12. dicebat: Cum si autem crudo minimè sanguis mittendus, tamen ne id quidem perpetuum est, neque enim semper coctionem res expectat. Ergo si ex superiori parte aliquis decedit, si contusus est, si ex aliquo subito casu sanguinem vomit, quamvis paulo ante sumpsit cibum, tamen protinùs ei demenda materia est, ne, si subsederit, corpus affligat. Ideoque etiam in aliis repentinis casibus, qui strangulabunt, dictum est. Quod vero in vulneratis plerumque majus sit, & urgentius periculum, quod ex motu totius sanguinis imminet, ex eo perspicuum est, quod ex dissectione, seu laceratione vasorum effluit, atque ita suscipit impetum quemdam ad vulneratam partem, qui protinus cohiberi desiderat, cohibetur autem dum per venæ sectionem alio avertitur. Plerumque igitur præmittenda est venæ sectio ipsi purganti pharmaco, neque solùm selective ducenti, verùm etiam ipsi lenienti, quo propositum est primas tantum vias expurgare, quoniam majus est plerumque, atque urgentius malum, quod ex motu sanguinis ad vulneratam partem imminet, quàm quod ex attractione eorum, quæ in primis viis sunt, ad venas, expectari possit, non enim timemus à substantia sanguinis, sed à motu. Neque poterit esse alicujus momenti, quod ad venas attrahitur, posteaquam non multo post licebit tum clysteres immittere, qui etiam sæpe præmitti possunt ipsi venæ sectioni, quando videlicet non eam remorantur, tum purgans exhibere: Itaque prudentissimè Celsus, ut in omnibus, dicebat: Quamvis paulo antea sumpserit cibum, tamen protinùs ei demenda materia est, ne si subsederit, corpus affligat. In urgenti periculo non solum non vult præmitti medicamentum, verùm neque clysterem, neque vomitum provocari, quæ pauciori tempore fieri possunt, nè differatur auxilium. Non est ergo audiendus senex, qui paucis ab hinc annis libellum



bellum quendam edidit : De vulneribus bellico fulmine illatis, dum præcipit, ut ante sanguinis missionem vel immittatur clyster, vel exhibeatur minorativum medicamentum, solvens dictum, hæc ejus sunt verba : cum sæpius non sit præmittendum medicamentum, & non raro, neque etiam clyster, consuevi ego in urgenti periculo statim venam secare, deinde clysterem immittere, aut vomitum provocare, si cibus sit in ventriculo, postridie autem medicamentum exhibere, nisi tunc etiam urgeat necessitas secandi venam.

Majus vero, & urgentius periculum esse potest à vitiosis succis, & à sanguine diversis, quando ob eorum exuperantiam, vel *Quando præmittenda dum purgans.* malitiam imminet putredo, & ex tali putredine febris quædam mala aut raptus eorum ad aliquod membrum princeps. In quo quidem casu saltem præmittendum est leniens medicamentum, si supervacua adsint in primis viis, ne ad venas attracta totum sanguinem magis conspurcent, semper enim ab eo exordiri oportet, ut dicebat Gal. 2. ad Glauc. ult. sine quo alterum tuto exequi non possumus. Sæpius etiam expurgans præmittendum, ut putredo prohibeatur, & raptus materiæ ad membrum princeps. Denique quando major est necessitas purgationis, ea præmittenda, nisi quid obstet. Sed hoc nimis propositos limites excedit. Quod vero dictum est, de venæ sectione est intelligendum, quæ universaliter totum evacuet; nam quæ in gratiam tantum evacuationis alicujus partis administratur, sæpe totius expurgationem præsupponit. Unde Gal. loquens de sectione venæ frontis in dolore posterioris partis capitis, dicebat, Præevacuatum totum corpus sit oportet.

## CAPUT LV.

*De electione purgantis pharmaci.*

**Q**Uamvis dictum sit valida etiam pharmaca locum habere posse *Quando validis, & quando imbecillioribus pharmacis non sit utendum.* in vulneratis, non ob id citra discrimen validis pharmacis utendum, sed in fortiori causa validioribus, modo vires ferant, in leviori imbecillioribus. Qui secus faciunt, aut indigentia non sit utendum.



non satisfaciunt, aut plus, quam par sit, evacuando vires prosternunt, subtrahunt alimentum vulneratæ parti, & calorem nativum ipsius dissipant, unde vulnus evadit decolor, ichorosum, & malæ naturæ. In valde salubribus igitur satis erunt lenientia, si supervacua fuerint in primis venis. Si vero in venis adsit cacochymia, secundi generis purgantia convenient, quæ videlicet à venis evacuent. At si cacochymia fuerit insignis, & causæ fluxionis valde fortes, validissima solventia sunt usurpanda, si ferant vires, unde Hipp. veratro utebatur. Gal. vero pilulas exhibebat ex aloë, colocynthide, & scammonio. Dandum tamen semper aliquid ætati, tempori, regioni, consuetudini, & reliquis. Quod vero pharmacum expurgando succo debeat esse proportionatum, notissimum est.

*Purgantia  
debent esse  
adstringen-  
tia.*

*Medica  
materia.*

Illud etiam in medicamentis alvum purgantibus desiderari debet, ut adstringentem habeant facultatem, quo peracto opere vestigium relinquunt in venis adstrictionis, quod solet impetum succorum obtundere. Lenientia igitur in tenuibus, & biliosis materiis (quoniam coguntur interdum, qui minùs versati sunt, Physici partes gerere, eis aliquo pacto subveniendum duxi) erunt syr. ros. sol. cum pulpa tamarindorum, diasebesten, manna cum tamarindis, flos cassiæ cum tamarindis, diaprunis lenitivum, & hujusmodi. In pituitosis, & crudis, excrementis mel ros. sol. manna, electuarium lenitivum, diacatholicon, confectio Hamech leniens. In melancholicis mel ros. sol. syr. de polypodio leniens, Diasene lenitivum, seu electuarium lenitivum, Confectio Hamech sine scammonio, & colocynthide, diacatholicon. Si vomitorio opus fuerit, aqua tepida est lenissimum vomitorium, item posca aquosa tepida, jus pingue copiosè exhibitum cum portiuncula etiam aceti, vel oxymelitis; aqua tepida, vel jus cum copioso oleo communi, vel amygd. dul. est accommodatum vomitorium lene. Ad evacuandas materias biliosas in venis existentes leviora, & clementiora sunt mirobalani citrini, & rhabarbarum, & pilulæ de tribus cum rhabarbaro. Fortiora sunt diaphanicon, electuarium ros. Mesue, electuarium de succo rosarum, diaprunis solutivum, pilulæ aureæ, sine quibus. Ad pituitosas vero inter clementiora, sunt agaricus, præsertim trochiscatus, polypodium, folli-



folliculi, & folia senæ. Fortiora sunt syr. de polypodio sol. diaphanicon, diacarthamum, hyera, diacolocynthidos, confectio Hamech, pilulæ Cochiae, Arabicae, de nitro. Ad humorem melancholicum, & exustos succos inter leviora sunt polypodium, & folia, & folliculi senæ. Fortiora vero sunt syr. de polypodio sol. diasenæ sol. confectio Hamech, electuarium Indum, pilulæ Cochiae cum helleboro, pilulæ Indæ, pilulæ de lapide lazuli, & de lapide Armeno, quibus imbecilliores sunt aggregativæ, quæ indifferenter expurgant omnes succos. Si varios humores propositum sit educere, commisceri poterunt medicamenta diversa, vel ea usurpanda, quæ sui natura valent ad diversas materias, sicuti confectio Hamech, & pilulæ aggregativæ, quæ valent ad omnes succos, & pilulæ Cochiae, atque diaphanicon, quæ valent ad bilem, & pituitam. Inter lenientia quoque ad omnes materias valent diacatholicon, electuarium lenitivum, confectio Hamech sine scammonio, & colocynthide, mel ros. sol. syr. de polypodio lenitivus. Ad biliosa verò supervacua, atque pituitosa, manna, immò pauca reperies medicamenta, quæ non ad plures succos valeant. Ex varia postea commixtione solventium, tum fortiorum, tum mitiorum, nec non & lenientium possunt constitui diversi medicamentorum gradus, prout necessarium fuerit.

Quoniam autem, ut dixi, maxime probandum est, ut pharmaca vim habeant adstringentem, si fortè aliquod pharmacum deligeremus, vel deligere coacti fuerimus, quod adstrictione careat, addendum erit aliud adstringens, quamvis non sit solutivum, quando parantur portiones, quod fiet, si in decoctione, qua pharmacum dissolvendum est, aliquid adstringens bullierit, aut ex aliqua adstringenti aqua paretur decoctio, puta ex aqua plantaginis, vel equiseti, aut substantia alicujus adstringentis addenda, ut si addantur semina plantaginis. Mirobalani modicè evacuant, sed cum valida adstrictione, idcirco decoctioni addentur cum maximo fructu. Quando tamen transactum est inflammationis periculum, & exhibetur pharmacum, ut tollatur paulatim illa transmissio ad vulnus, non adeo necessaria est hæc vis adstrictoria in pharmaco. Sicuti neque procuranda, immò effatu digna fugienda, quando ob apparatus morbificum evacua-



mus, ne fiant obstructions, unde tunc à mirobalanis cavere oportet; utor ergo libenter rhabarbaro tum propter sui clementiam, tum propter suam moderatam adstrictionem, & ideo sæpè ipsum basim mei pharmaci facio, & si fortiori opus sit eidem permisceo.

*Vomitoria.*

Vomitoria seligentia clementiora sunt flores & semina genistæ, unde & saccharum ex floribus genistæ paratum, & ipsorum aqua optima erit. Paratur etiam oxymel præstantissimum ex floribus, & seminibus ipsius genistæ. Fortissimum, & cum hoc, neque violentissimum est stibium decenter præparatum, quo in fortissimis causis uti possumus, sicuti Hipp. utebatur veratro, quod nostris temporibus ob maximam ejus violentiam exolevit, posteaquam & corpora sunt imbecilliora, quam essent Hip. tempore. Ut autem dictum est, in eligendo pharmaco dandum aliquid ætati, tempori, regioni, consuetudini & omnino ægrotanti naturæ, ac viribus. Hinc in tempore valde calido, & regione tali, nec non & in tempore valde frigido, & tali etiam regione, à calidioribus, & validioribus pharmacis abstinemus, pariter & pueros, & valde senes aut non purgamus, aut leniter, sicuti & cautè procedimus in iis, qui pharmacis minimè sunt assueti, & in imbecillioribus viribus. Eos verò, qui vomitui minimè sunt assueti, & ad vomitum difficiles sunt, non cogimus, ut enim dicebat Gal. primo loc. af. 4. Cogere eum, qui vomere non potest, absurdum est. Sed quæ ad universalialia attinent, non est, cur hic diffusius tractemus.

CAPUT LVI.

*De Clysteribus, & suppositoriis.*

*Tres clysterium utilitates.*

**C**lysteres tribus potissimum rationibus locum habent in vulneribus, prima quidem, ut eorum ope fæces diutius retentæ evacuentur, quod enim hoc possint clysteres norunt & ipsæ mulierculæ; secunda revulsionis gratia, tertia evacuationis, & subtractionis materiæ fluxionis. Has clysterium utilitates sæpius proponit Gal. unde dicebat 2. de comp. med. per loca cap. 1.

Lau-



Laudavi etiam evacuationem per clysterem, non solum propter evacuationem eorum, quæ intestinis continentur, sed etiam ob revulsionem eorum, quæ ad caput feruntur, atque ob id probè in his, quæ scripsit Archigenes, non simpliciter dixit evacuationem alvi per clysterem, sed addidit validam, multum enim in huiusmodi situm est, quantum ad revulsionem attinet, ultra hoc, quod non solum ea, quæ circa ventrem, & meseræum sunt evacuat, sed etiam quæ circa hepatis sima hærent. Quibus in verbis manifestè tres dictas clysterium utilitates proponit. Sed & alibi eodem in capite loquens de capitis vulneribus quòd non solum ut intestina evacuent, verum etiam, ut revellant, sint immittenda, apertè profitetur, dicens: Quod si quippiam horum, sive ætas, sive virium imbecillitas, aut etiam ambo simul, sanguinis detractionem fieri præpediant, alvum per clysterem evacuabimus, tum ut superflua in ipso excrementa extrahamus, tum ut humores, qui ad affectas partes inde ferri consueverunt, revellamus, & 2. pariter de Comp. med. per loc. cap. 2. dicens: Si vero velut debile caput existens ad se sublato humores, ac vapores susceperet, materiam revellere oportet in totum corpus, atque ita particulæ mederi per clysteres, itaque fit revulsio. Et 5. etiam Meth. 13. acri clystere usus est revellendi gratia in muliere, quæ ob catarrhum in sputum sanguinis inciderat. Unde libro de hum. com. 1. tex. xj. dicebat: Acribus clysteribus utimur ad lateris dolores, gingivarum defluxiones, capitis dolorem, pro-  
pensionem in somnum nimium, peripnevmoniam, anginam, rigorem, morbum comitiale, insaniam, coxendicis morbum, inflammationem oculorum, & cum homo non nisi recta cervice educere spiritum potest, denique ad veterum. Si vulneratus febricitaret, etiam refrigerandi gratia usurpari possent.

Porro adeo varia præstant propter diversitatem materiæ, ex *Clysteres* qua conficiuntur. Qui ad fæces excernendas faciunt, ex molli-*mollientes* bus parantur, & ex iis etiam, quæ aliquo modo irritare possunt, *irritantes*. atque detergere? mollia enim fæces duras molliendo, vias lubricando, atque laxando, fæcum expulsionem adjuvant. Leviter irritantia facultatem languidam, & pigram excitant, & ad excretionem provocant. Molles igitur clysteres parabat Gal. ut videre



est lib. de hum. com. i. tex. xj. ex aqua calida, & ex aqua, & oleo commixtis, & ex aqua, in qua alica, tragum, lini semen, malvaque efferbuerat. Addit aliquando adipem anserinum, suillum, caprinum, hircinum, gallinaceum, item butyrum, terebinthinam, & hujusmodi. Nostri temporibus conficiuntur molles clysteres ex decoctione blitti, malvæ, violariæ, oleo coi, butyrove recenti commixtis, additur etiam ovi vitellus. Loco olei communis quandoque accipitur oleum amygd. dul. sem. lini, sesaminum; quandoque etiam additur flos cassiæ. Conficiuntur etiam ex jure, pingui præsertim, oleo, vel butyro commixtis. Quandoque in jure emollientia decoquuntur, ut malva, violæ, Caricæ, & hujusmodi.

*Clysteres  
irritantes  
ex quibus  
conficiantur*

Irritantes conficiuntur ex acribus, modo magis, modo minus, prout opportunum visum fuerit. Parantur itaque hujusmodi clysteres ex decoctione mercurialis, atriplicis, parietariæ, brassicæ marinæ, & hujusmodi, additurque modicum salis, saccharum rubrum, mel rosatum colatum, & etiam solutivum, hyera simplex, diacatholicon, electuarium lenitivum, & hujusmodi. Omnia etiam purgantia facultatem irritant, sed si clysteribus permisceantur, alios quoque scopos respicient. Quandoque clysterem amamus emollientem, atque irritantem simul, & tunc emollientia, atque irritantia commiscemus, accipientes, exempli gratia, decoctum blitti, malvæ, violariæ, & etiam mercurialis, addentesque oleum commune, vel butyrum, mel rosaceum simplex, vel solutivum, ovi vitellum, atque salis modicum, quamvis oleosa, ac pingua valde obtundant acrimoniam irritantium. Irritantes clysteres nun solum ad fecum excretionem faciunt, verum etiam ad revellendum, advocantes enim naturam, & quodammodo ad infernam excretionem cogentes, quos ad superiores partes transmittibat, succos, efficiunt, ut ad infernam partem, saltem secundum aliquam portionem convertantur.

*Clysteres  
aeres.*

At fortius revellunt, quæ ex iis conficiuntur, quæ proprios humores attrahunt; dum enim vi sua attrahente proprios succos ab aliis sejunctos attrahunt, eos deorsum vel invitos moveri cogunt.

Scio aliquos negare, purgantia clysteribus injecta posse proprios



prios succos attrahare, existimantes ad id esse necessarium, ut medicamentum à calore ventriculi ad actum reducatur, ad quem clysteres non perveniunt. Verùm quod hoc non sit necessarium, demonstrant medicamenta, quæ umbilico admota efficaciter purgant, immo nonnulla plantis pedum illita. Satis est ad hoc, ut medicamentum proprias vires exerceat, ut à nostro calore alteretur, fundatur, & attenuetur. Verum quidem est, cum id melius fiat in ventriculo, efficacius purgare ingesta. Cum hoc tamen, & clysteribus indita satis efficaciter evacuant, ut testis est experientia, & ideo dicebat Gal. eos posse evacuare non solum mesaræum, verùm etiam sima hepatis. Sed hæc obiter.

Parantur itaque hujusmodi clysteres commixtis solventibus cum iis, quæ simpliciter irritant. Varia autem erunt solventia pro diversitate succorum, qui evacuari, & revelli postulant. Itaque in materiis biliosis optimum est diaphænicon, electuarium de succo rosarum, electuarium rosatum Mesue, diaprunis solutivum, diagridium. In pituitosis agaricus, turbith, colocynthis, polypodium, diaphænicon, diaturbith, diacarthamum, benedicta laxativa, hyera, diacolocynthidos, & hujusmodi. In melancholicis fena, polypodium, epithimum, confectio Hamech, diasene solutivum, &c. decoctis igitur addi possunt turbith, fena, polypodium, colocynthis, diagridium, rad. cucumeris agrestis & hujusmodi. Verùm nec est spernendum, si addantur aliqua alterantia, quæ respiciant purgandos succos, puta in biliosis materiis lactucam, hordeum, serum: in pituitosis betonicam, salviā, amaracum, origanum, thimum, faturejam. In melancholicis borraginem, buglossam, melissam, & hujusmodi. Non sunt autem permiscenda oleosa, & pingua, ne vim purgantium obtundant.

Utimur clysteribus simpliciter alvum subducentibus, quando *Quando* fæces diutius retinentur, cum enim natura non excernantur, arte *his, vel il-* excerni debent: revellentibus vero & evacuantibus utimur præ- *lis clyste-* sente, aut imminente fluxione, in leviori quidem fluxionis cau- *ribus sit* sa, & imbecillioribus viribus iis, quæ irritant quidem, verùm *utendum.* selectivè non evacuant. In fortiori verò, & valentiõribus viribus ad acuta, & acria clysteria confugimus, quando non licet



fortiora præsidia adhibere, qualia sunt venæ sectio, & purgatio per pharmacum devoratum, & tamen adhuc urget fluxio, aut ejus periculum, ut effatu digna revulsione opus sit, & subtractione aliqua materiæ ipsius fluxionis; non enim tantam vim naturæ inferunt clysteria, quantam ipsa purgantia assumpta; neque enim ita ad actum deducuntur, ut in ventriculo, cum nec etiam tamdiu morentur in corpore, natura namque irritata citius ad expulsionem insurgit, & crebrius immitti possunt clysteres, quàm exhiberi possit pharmacum. Illud etiam in usu horum clysterium animadvertendum, sicuti & de purgantibus dictum est, non in omnibus vulneribus rationem revellendi habere posse, cum ad partes naturales attrahant, unde in vulneribus harum partium cavenda sunt. In ipsorum vero intestinorum vulneribus, & emollientia, & irritantia, quod tum fieri potest, sunt fugienda. Cavenda etiam sunt evacuantia in vulnerato notabiliter febricitante, in imbecillioribus, ut in pueris, atque decrepitis, vel morbo confectis. Item non sunt immittenda calidissimis temporibus. Denique eadem ferè observanda, quæ in exhibitione pharmaci observari solent. In vulneribus intestinorum alio clysterium genere utimur, siccantibus videlicet, & omninò ad vulnus valentibus, sed hic solum de clysteribus agimus, quæ adhibentur, ut toti consulatur.

Glandibus in vulneratis utimur propter easdem causas, propter quas & clysteribus, valent enim tum ad evacuandas fæces, tum ad revellendum à remotissimis etiam partibus, atque evacuandum. Verùm non faciunt ad fæcum excretionem molliendo, & laxando, sicuti clysteres molles, propterea quod conficiuntur in forma solida, & vix pertranseunt recti intestini extremitatem, unde non possunt fæces mollire, neque intestina laxare, nisi fortè extremitatem intestini recti. Faciunt ergo ad fæcum excretionem solummodo irritando naturam, & ad excretionem laceffendo, non secus ac clysteres irritantes. Hinc ex acribus conficiuntur, nequaquam tamen selectivè ducentibus, quamvis & hæc naturam irritent. Verum, si ex purgantibus glandes conficiantur, & fortius revellunt, & peculiare succos attrahunt, pro qualitate videlicet purgantis. Simpliciter irritantes glandes, quamvis ex multis

*Glandes  
irritantes.*



multis confici possint, nostris tamen temporibus magis conficiuntur ex sapone, felle alicujus animalis exsiccato, suillo larido salito, caulis stipite; potissimum verò ex melle cocto cum sale communi, vel gemmeo; & hæ sunt simpliciores glandes. Adduntur aliquando hyeræ simplicis species, pyrethrum, sinapis, & *Glandes acres.* hujusmodi. At quando acriores glandes volumus, ut fortius revellant, & etiam evacuent, addenda sunt purgantia idonea. Adduntur autem præsertim species Elefscoph, diagridium, trochisci Allhandal, rad. cucumeris agrestis, turbith, elaterium, & similia. Omnes ergo glandes cum acres sunt, revellunt, verum acriores, & selectivè ducentes fortius revellunt, idcirco in fortiori causa fluxionis, & in robustioribus conveniunt. Temporibus etiam calidissimis cautè uti his debemus, & si vulneratus intensè febricitet: quamvis paulò liberalior possit esse eorum usus, quàm acutorum clysterium, cum eorum corpulentia non adeo penitiores partes penetret, ac ipsorum clysterium.

## CAPUT LVII.

*De alterantibus in vulneribus.*

**U**T melius impediatur fluxio, & quæ cæpit, sistatur, vidimus ineptos reddendos esse humores ad motum, arctandasque fluxionis vias. Illud quidem per ea, quæ infrigidant, & incraassant, hoc verò per ea, quæ adstringunt. Quocirca hæc alterantia in primis vulneratis conveniunt, videlicet refrigerantia, in-*Alterantia primæ sortis in vulneribus necessaria.* craassantiaque, necnon & adstringentia, non tamen ita valida, ut obstructions possint gignere. Et quando pro inhibenda fluxione usurpantur, factis evacuationibus, statim sunt in usum revocanda, ut qui relinquuntur succi minùs habiles ad motum fiant, minusque liberas habeant vias. Serapia igitur, vel decocta, vel etiam electuaria, quæ dictos scopos respiciant, exhibenda erunt. Serapia erunt ex acetosæ, cichorio, endivia, rosis siccis, ex myrto, & nenufare. Rosaceus recens, violaceus cum decoctis, vel stillatitiis aquis acetosæ, plantaginis, cicerbitæ, endiviæ, equiseti, lactucæ, cichorii. Quòd si humoribus acribus præditum sit corpus,



pus, iis potissimum infrigidantibus, & incrassantibus uti oportebit, quæ etiam vim habeant leniendi, & demulcendi acrimoniam humoris, quæ sæpè solet esse in causa, ut humores fluant, huiusmodi sunt portulaca, nymphaea, violæ, amyllum, papaver, tragacantha, buglossa, & similia. Ex dictis herbis quoque parari poterunt iura dicta alterata, quando à dulcibus abstinere oportuerit, vel quia corpus subjectum ex iis sit, in quibus dulcia facile bilefcunt, vel quia tempus sit calidius, ut ob id metuemus eorum transitum in bilem, vel quia ægrotus ea abhorreat. Conservæ refrigerantes non minus valebunt, ut quæ ex cichorii floribus parantur, & rubris rosis, & floribus nenufaris, & violarum. Quoniam autem quæ refrigerant, & adstringunt, sibi metipsis viam præcludunt, ideò permixtione alicujus calidi indigent, quod ea penetrare faciat, ut est aliquod ex aromatis, nisi ipsum adstringens suapte natura tale fuerit, quemadmodum consultit Galenus libro Art. med. cap. 95. & 7. de comp. med. secundum locos. Et quoniam aliqua ex dictis adstrictione carent, iis permisceri poterunt ea, quæ adstringunt.

Aliquando non tantum inflammationem timemus, sed & corruptionem partis, & malam putredinem in venis ob apparatus morbificum, & pravitatem succorum. Quo in casu putredini resistere oportebit, tam iis, quæ qualitatibus manifestis eam cohibent, quam iis, quæ à tota substantia eidem occurrunt. Unde hæc erunt alterantia secundæ sortis in vulneratis, in priori

*Altera fors  
alterantium.*

censu sunt refrigerantia, & exsiccantia, ut acetosa, & ejus syr. cicerbita, succus limonum, & ejus syr. Syr. de citri acido, de succo granatorum, oxysaccharum, acidum citri saccharo conditum, melissa, borrago. A tota vero substantia putredini adversantur, & ipsam inhibent citri succus, margaritæ, lapilli pretiosi, terra sigillata, bolus Arm. or. cornu monocerotis, cornu cervi ustum, coralli, scordium, carduus benedictus, scorzonera, aqua ejusdem stillatitia, & ejus radices saccharo conditæ. Sed terræ, & lapilli, & cornua etiam manifesta qualitate id faciunt, videlicet siccando, & plurima etiam refrigerando spiritus chacanthi utraque ratione confert. Inter composita sunt Diascordium, præclara illa confectio de hyacintho, & magnæ antidoti, potissi-

imum



mum Mithridatium, quod confectioni de hyacintho permixtum mirabilia præstat. Fiunt etiam confectiones de bolo, pulveres, aquæ theriacales, & alia præclara composita. Præstantissima est aqua theriacalis secundum infra scriptam descriptionem,

*Aqua the-  
riacalis.*

*Recipe aquæ florum citri*

*Florum borraginis*

*Scorzonera*

*Melissæ*

*Acetosæ*

*Rosarum rubearum*

*Rutæ caprariæ*

*Vincetoxici*

*Cicerbitæ*

*Aceti rosati ana lib. f.*

*Scordii*

*Vincetoxici*

*Pimpinellæ*

*Rutæ caprariæ*

*Cardui benedicti*

*Scabiosæ, ana m. f.*

*Florum borraginis*

*Buglossæ*

*Citri*

*Cariophyllorum*

*Liliorum convallium*

*Nenufaris*

*Rosarum rubearum ana p. i.*

*Santalorum citrinorum*

*Boli armeneæ orient.*

*Terræ sigillatæ*

*Terræ Melitensis*

*Zedoariæ*

*Ligni aloes*

*Sem. citri ana drach. i. f.*

*Acetosæ*

*Papaveris albi ana drach. j.*

Bbb

Radic.



*Radic. Carlinæ.*

*Tormentillæ*

*Bistortæ ana drach. ij.*

*Scorzoneræ*

*Vincetoxici ana drach. iij.*

Accipiantur herbæ, & flores virentes. verùm omnis humiditatis extraneæ expertes, & minutim incidantur. Herbæ tamen etiam contundi poterunt, & in aquas simul mixtas, aceto etiam addito unâ cum reliquis pariter contusis conjiciantur, priùs tamen omnia vino albo irrorentur, atque ita f. inf. f. a. balneo calentis aquæ 12. horarum spatio. Fideliter tamen obturatum sit os vasis, quod quidem vitreum esse debet, postea fiat col. & expressio diligens, & par pondus earundem rerum accipiatur, fiatque altera infusio eodem prorsus modo, & sic tertio; facta postrema expressione, & col. addatur duplicatum pondus earundem rerum, & sequentia, videlicet.

*Succi acidi citri lib. s.*

*Arantiorum*

*Vincetoxici*

*Rutæ caprariæ.*

*Acetosæ*

*Scabiosæ*

*Scordii*

*Quinque folii*

*Cardui benedicti*

*Granatorum acidorum ana unc. iij.*

*Radic. Angelicæ drach. iij.*

*Theriacæ*

*Mitridatii ana unc. j.*

*Confect. de hyacintho unc. i. s.*

*Spec. diamargarit. frigid.*

*Cordialium temperatarum*

*Trochisc. de camphora ana drach. iij.*

*Cortic. citri recent. minutim incisorum lib. s.*

*Cornu cervi usti unc. s.*



Electuariis addantur pulveres, & cum liquoribus paulatim dissolvantur, deinde addantur reliqua omnia contusa, cunctaque diligenter permisceantur & balneo calentis aquæ fiat inf. per 24. horas modo supradicto, quo tempore pluries manibus curiosè malaxentur, inde duplici vase destillentur f. a. datur à semiuncia ad unciam unam.

Infra scriptus etiam pulvis valdè est efficax, recipit autem.

*Smaragdi orient. preparati drach. j.*

*Fragmentorum hyacinthi scr. ij.*

*Granatorum drach. s.*

*Margaritarum preparatarum*

*Corallorum rubeorum preparatorum*

*Cornu cervi usti, & aqua rosacea loti ana scr. j.*

*Boli Armenæ orient.*

*Terræ sigillatæ*

*Bezoar ana scr. ij.*

*Radic. Scorzonera*

*Vincetoxici*

*Zedoariæ ana drach. i. s.*

*Cortic. citri*

*Cocci infectorii*

*Rosarum rubearum ana gr. xv.*

*Croci.*

*Cinnamomi ana scr. j.*

*Florum squinanthi*

*Melisse ana scr. iv.*

*Spicæ*

*Ligni aloes ana drach. j.*

Pulverizentur subtiliter, & misceantur, datur ad semidrachmam. Ab iis, quæ calefaciunt, maximè cavere oportebit in temporibus, & naturis calidis, & in quibus vehemens est fluxionis suspicio, namque si inflammatio cœperit, maximeque in aliquo interiori membro, nequaquam usum magnorum antidotorum concederem, sed in refrigerantium usu persisterem, vel eorum saltem, quæ non calefaciant.



*Linimenta.*

Extrinsecus etiam multa applicata regioni cordis, & arteriis manifestioribus, cor à putredine mala vindicant, ut est oleum Matthioli, Magni Ducis Heturriæ, oleum illud, quod pro peste Ferrariæ paratur. Oleum quoque citri florum, & ejusdem corticum, & seminum, linimentaue parata ex Theriaca, vel Mithridatio, unguento rosaceo, oleo nenufarino, oleo florum, aut corticum, vel seminum citri, speciebus cordialibus temperatis, camphora, croco, & hujusmodi.

Item epithemata regioni cordis adhibita ex aqua rosacea, borraginis, melissæ, florum citri, florum myrti, scorzonæræ, aqua theriacali, aceto rosato, vel ex citri, & cariophyllorum floribus, speciebus diamargarit. frigidis speciebus cordialibus temperatis, confectione de hyacintho, theriaca, mithridatio, camphora, croco pauco, vino aromatico, & hujusmodi, ex. gr.

*Recipe Aquæ rosarum*

*Borraginis.*

*Melissæ ana unc. jv.*

*Aceti rosati unc. i. s.*

*Spec. cordialium temperatarum drach. ij. s.*

*Camphoræ scr. i.*

*Croci gr. iij.*

*Vini aromatici modicum. Pro epithemate.*

*Aliud.*

*Recipe Aquæ rosarum unc. iij.*

*Melissæ unc. iv.*

*Florum citri*

*Mirti ana unc. ij.*

*Aceti rosati*

*Vini malvatici ana unc. i.*

*Spec. diamargarit. frigidi*

*Cordialium temperatarum ana drach. i. s.*

*Croci modicum. M. pro epithemate.*

*Aliud.*

*Recipe Aquæ rosatæ santalinæ unc. iv.*

*Florum myrti unc. iij.*

*Citri*

*Scar-*



*Scorzonera ana unc. ij.*

*Aqua theriacalis uncia i. s.*

*Confect. de hyacintho drach. iiij.*

*Mithridatii drach. j.*

*Aceti rosati, & vini malvatici modicum.*

*Misce, pro epithemate.*

Quæ quidem Bezoartica, atque facultatem vitalem roborantia erunt etiam ex usu; quando ob partis corruptionem, & gangrænam pravi halitus ad cor eleventur.

Aqua rosata santalina sic paratur,

*Recipe Rosarum rubearum recent. lib. vj.*

*Santalorum preparat. citrin. alb. ana unc. i. s.*

*Aqua ro-  
sacea san-  
talina.*

Rosæ incidantur minutim, & manibus cum santalis malaxentur, vel etiam simul contundantur, addendo aliquantulum aquæ rosaceæ inde in alembicum projiciantur, & destillentur duplici vase secundum artem, deinde

*Recipe Aquæ, quæ distillaverit lib. ij.*

*Rosarum rub. recent. lib. iiij.*

*Santalorum unc. jv.*

Misce & fac, ut supra dictum est, serveturque aqua quæ postremo destillavit ad usum.

Non ignorare autem oportet, quando adest malæ putredinis suspicio, vel cæpta est, cautè utendum adstringentibus, ne obstructions fiant, & sit major putredinis occasio, ad methodum recurrendum est, & ei, quod magis urget, incumbendum, cæteris, si fieri possit, non neglectis, qua de causa quandoque omninò ab adstringentibus cavebimus, quandoque parcè illis utemur, & solummodò nonnunquam ad prohibendam innati calidi dissolutionem, quandoque eiam uberior erit eorundem usus. Alterantibus etiam quandoque egemus ob supervenientem febrem, ut intemperiem febrilem obtundamus. Sed cum hæc indicatio coincidat cum illa, qua humorum caliditatem, & tenuitatem corrigere docemur, non est, quod de ea plura dicamus. Id solum adjungemus, quod si febris fuerit ob apparatus morbificum incrassantibus, & adstringentibus cum præmeditatione uti opus erit, in his enim potius moderatæ aperitioni attendendum. Sed & quod de



mala putredine dictum est, huc erit transferendum, ei namque quod magis urgebit, consulendum, cæteris non neglectis, quando fieri id possit. Alia quoque alterantia convenire possunt ratione supervenientis febris, sed hæc à tractatu de febribus sunt petenda.

*Potiones  
vulneraria.*

Cogimur quandoque aliam alterantium sortem vulneratis exhibere, exsiccantia videlicet; cogimur enim ad horum usum devenire, quando ob nimiam humiditatem ulcus ad sanitatem perducere non potest, defluente assidue humiditate quadam superflua ad vulnus, quod quidem potest contingere, vel totius humiditate, eo quia videlicet totum sit repletum crudis, & ferosis succis; sive ob pravam victum præcedentem, sive ob malam temperaturam earum partium, quæ coctionibus dicantur, unde fit, ut assidue generetur sanguis nimia præditus humiditate, vel aliqujus partis tantum, puta capitis superfluum humorem ad partem vulneratam tanquam ad imbecilliores transmittentis, vel totum etiam sanguinem coinquantis. Totum igitur exsiccare oportebit, quando totus sanguis est humidus, & partes etiam nimia humiditate flaccescunt, carnis enim generatio fit ex temperatura partis vulneratæ tanquam efficiente, & sanguine probo tanquam materia, & partem determinatam, si ab ea fuerit excrementorum proventus, ad naturalem statum reducere. Sed qua ratione consulatur affectibus determinatarum partium, non est præsentis loci. Pro absumentia tamen excrementitia totius materia, atque ad præparandam idoneam materiam pro carnis generatione, valida exsiccantia convenient, quæ & corroborent partes, & affluxum excrementorum ad partem moderata sua adstrictione compescant, nisi quidpiam adsit, quod adstringentium usum prohibeat, quo in casu sola exsiccantia convenient. Itaque ex usu erunt potiones ex pilosella, tormentilla, alchimilla, ophri, limonio, stellaria, serpentaria, trinitate, equisetum, cariophyllata, ophioglossa, fani-  
cula, auricula ursi; artemisia, agrimonia, dictamno Cretico, vincapervinca, persicaria, quinquefolium, veronica, potentilla, betonica, verbena, brassica, rubia, nepetha, lilio convallium, summitatibus rubi, & cannabis renatæ radicis consolidæ majoris, aristolochiæ utriusque dictamni albi, valerianæ, tormentillæ, bistorta,



stortæ, gentianæ, rhabarbari, rhapontici, & hujusmodi, item spermate ceti, ligno lentiscino, mumia, cancris fluvialibus, astacis. Quibus etiam quandoque addantur diuretica, ut portio excrementitiæ materiæ ad urinæ vias perducatur, veluti radices rubiæ, petroselini, fœniculi, asparagi, & hujusmodi, & interdum ad majorem attenuationem, cinnamomum, galanga, macis, Zedoaria, sabina &c. sed maximum momentum ad exsiccandum habent decoctum Guajaci, sarsæ, & chinæ, atque non tantum per se exsiccant, sed etiam per accidens, resolvendo videlicet materiam per insensibilem halitum, aut per sudorem evacuando. Quare hæc erit alia fors evacuantium in vulneribus commoda. Quod si corpus lue illa Venerea fuerit infectum, tanto magis necessarius erit ligni, & sarsæ usus.

Sed circa horum usum duo sunt animadvertenda, unum est, *Animad- ut, quæ calida sunt, non exhibeantur, nisi transacto inflammatio- vertenda* nis periculo, & cautè in temporibus, regionibus, atque naturis *circa potio- calidis; alterum, ut præcedant universales evacuationes. Immo num usum.* ad hæc exsiccantia non devenimus, nisi quando purgantibus non possumus excrementitios succos penitus absumere. Potissimum autem præevacuatum corpus sit oportet, quando iis uti placuerit, quæ calefaciunt & humores attenuant, ac fundunt: colliquando enim succos, atque calefaciendo insignes concitarent fluxiones. Paratur decoctio non ex vino potenti, ut multi consueverunt, ne calidior, quam par sit evadat potio, sed ex aqua communi chalybeata, aut equiseti, vel veronicæ, & hujusmodi: quod etiam magis à Gal. probatur, qui eas conficiebat ex aqua, aut vino imbecilli, ut videre est 5. Meth. 9. Addetur ergo potius in fine decoctionis vinum album optimum, ut distributionem adjuvet. Ne verò quidquam desiderent tirones, exempla quædam harum potionum subjicere volui.

Prima quidem recipit.

*Equiseti*

*Plantaginis*

*Cariophyllatæ*

*Pilosellæ*

*Saniculæ*

*Pyrolæ*



*Pyrole*

*Quinquesolii ana m. j.*

*Radic. Consolida unc. i. s.*

*Dictamni albi.*

*Tormentilla.*

*Bistorta.*

*Valeriana.*

*Petroselini.*

*Fœniculi dulcis ana unc. s.*

*Rubia.*

*Cinnamomi ana drach. ij.*

*Aquæ chalybeata q. s.*

*Misce, & f. decoctio. s. a.*

*Deinde R. hujus decoctionis lib. iiij.*

*Mellis optimi lib. i. s.*

*Vini albi electissimi, neque nimis potentis lib. ij.*

Misce, & bulliant simul, donec fiat veluti mulsa. Dosis est ab unc. 6. usque ad decem.

Secunda recipit.

*Ligni lentiscini.*

*Visci quercini ana un. ij.*

*Radic. consolida.*

*Aristolochia.*

*Centaurea.*

*Rubia.*

*Valeriana.*

*Tormentilla.*

*Bistorta ana unc. s.*

*Aquæ communis chalybeata lib. xij.*

Misce, & f. inf. s. a. per viginti quatuor horas, postea bulliant duplici vase ad consumptionem medietatis, & cum ad consumptionem tertiæ partis fuerit perventum adde.

*Radic. Petroselini un. s.*

*Summitatum rubi.*

*Cannabis.*

*Pilosella.*

Trini-



*Trinitatis.*

*Vincæ pervincæ.*

*Equiseti.*

*Fragariæ.*

*Florum lilii convallium ana m. s.*

*Rha Pontici drach. ij.*

*Cinnamomi unc. s.*

Et in fine decoctionis adde vini aromatici lib. iij. deinde facta  
expressione, & colatura cum saccharo fiat veluti mulsa.

Tertia recipit.

*Ligni Guajaci preparati unc. jv.*

*Corticis Guajaci.*

*Sarsæ parillæ ana unc. ij.*

*Santali citrini.*

*Radic. Tormentillæ.*

*Bistortæ.*

*Valerianæ.*

*Dictamni albi.*

*Consolidæ ana unc. s.*

*Aquæ communis lib. xvj.*

Misce, & f. inf. s. a. per 24. horas, postea bulliant duplici vase  
s. a. ad consumptionem tertiæ partis, tunc adde:

*Equiseti.*

*Betonica.*

*Pilosellæ.*

*Dictamni Cretici.*

*Pyrolæ.*

*Potentillæ.*

*Summitatum rubi.*

*Trinitatis.*

*Fragariæ ana m. s.*

*Cinnamomi unc. s.*

Bulliant simul, donec remaneant lib. 6. & in fine ebullitionis  
adde vini albi optimi lib. 3. facta deinde expressione, & colatura  
cum melle, vel saccharo fiat veluti mulsa. Si tamen febricitaret  
vulneratus detrahendum esset vinum.



Maximi etiam momenti est potio illa de pyrola à Matthiolo descripta commento de limonio. Sed & pulveres, & electuaria conficiuntur, & confectiones solidæ, quæ eundem præstant usum, & si non æque ad remotas partes distribuuntur, nisi accommodato liquore dissolvantur, in vulneribus tamen ventriculi, intestinorum, atque thoracis sunt maximè accommodata. Quamvis ubi vulnere thoracis gratia suscipiuntur, non insimul sint devoranda, sed sensim in ore liquefacta deglutienda, ut ejus portio per asperam arteriam ad pulmones feratur. Ejus generis est diatrágacanthæ cum bolo: Electuarius confectum ex radicibus consolidæ majoris decoctis, ac setaceo trajectis, ac melle, seu saccharo, & ex saccharo rosaceo veteri, bolo Arm. orientali, terra sigillata, terra Samia, sem. plantaginis, acetosæ, syr. de rosis siccis, aut myrtino. Præstantissimum est, quod sequitur. Accipit autem.

*Succi ophioglossæ.*

*Equiseti.*

*Verbena.*

*Pilosellæ.*

*Saniculæ.*

*Trinitatis ana lib. f.*

*Sacchari albi lib. iij.*

Misce, & bul. simul ad elect. consistentiam, tunc addatur.

*Radic. Bistortæ.*

*Tormentillæ.*

*Aristoloch. rot. ana una. j.*

*Dictamni albi.*

*Rha Pontici ana unc. f.*

*Cariophyllatæ.*

*Vincapervincæ.*

*Betonice.*

*Dictamni Cretici ana drach. iij.*

*Cinnamomi.*

*Galangæ.*

*Macis.*

*Zedoariæ.*

*Semina.*



*Semin. Plantaginis.*

*Acetosa.*

*Portulacæ ana drach. ij.*

*Gummi tragacanthæ.*

*Amili ana unc. f.*

*Radic. Consolidæ majoris sub cineris co-  
ctarum, ac setaceo trajectarum unc. iij.*

*Misce, & f. electuarium f. a.*

Hac ratione innumeræ compositiones parari poterunt, quæ judicio prudentis Medici relinquemus. Non est autem prætermittendum, quando vulnus in remotis est partibus, quin ea permisceantur, quæ vehiculi præstent vicem, ut in vulneribus capitis betonica, in vulneribus renum, & vesicæ radices apii, & fœniculi, syr. de duabus, & quinque radicibus, & alia diuretica, in vulneribus uteri artemisia, & ejus syr. in vulneribus articulorum iva, & sic de reliquis.

Nec sunt spernenda id genus præsidia, quasi sint recentiorum inventa, constat enim, & antiquos iisdem interdum fuisse usos, unde & eorum meminit Gal. 5. Meth. 9. tractans de curatione vulnerum thoracis, dicebat enim: Cæterum danda est opera, ut ea quacunque ratione siccemus, tum per ea præsidia, quæ extrinsecus imponuntur, tum per ea, quæ ex aqua, vinove tenui bibuntur. Porro maximè idonea sunt, & quæ, propterea quod ex feminibus fiunt, diaspermata Græcè dicuntur, & quod solemne nobis est, quod in pectore perforato semper utimur, quod ex cassia componitur. Antiquissimus igitur est harum potionum usus. Quas non tantum exsiccando, adstringendo, ac detergendo prodesse certum est, verum etiam & calorem innatum partis roborando, ut eorum auxilio propria munia longè fœliciùs exercent. Idque quotidianus eventus abundè patefacit. Hinc Germani fœlici, ut ajunt, cum successu etiam à principio hisce potionibus utuntur. Quamvis ab iis abstinendum censeam, quæ calidiores sunt, quamdiu urget inflammationis periculum. Necessarius tamen omnino erit hujusmodi præsidiorum usus statim à principio, quando interiorum aliquod unà fuerit vulneratum: posteaquam externis auxiliis



parum in hisce vulneribus proficimus. Debent autem non exsiccandi solum, verum etiam adstringendi facultate esse prædita.

Utimur denique in vulneribus repellentibus, atque intercipientibus, sed quoniam immediatè fluxionem respiciunt, de illis in capite de supprimenda fluxione diffusè tractabimus. Sunt postremo, quæ ingesta vulneratæ partis calori tantum adjiciunt roboris, ut una hac ratione certa quædam munia foelicissimè exerceat. Hoc est videre in dictamno Cretico, cujus succus, vel pulvis epotus in expellendis peregrinis corporibus mirificè nativum calorem adjuvat, & in lapide illo, qui Germana lingua *Beinbruch* appellatur, cujus drachma in vino rubro ex infusione vincæpervincæ exhibita quatuor, aut quinque subsequentibus diebus fracturis cum vulnere brevissimè magna cum omnium admiratione medetur; & in potionibus etiam illis vulnerariis, non solum enim excrementa respiciunt, atque materiam generandæ carnis, verum & ipsum nativum calorem.

## CAPUT LVIII.

*De ratione victus.*

**E**xplicatis chirurgicis, & pharmaceuticis præsidiis quæ in vulneribus sunt opportuna, tempus est, ut ad victus rationem transeamus, qua neglecta parum, vel nihil alia proficerent. Quoniam igitur huc debemus spectare, ut arceantur omnia, quæ vulnerum curationem interturbant, impedimentisque occurratur, atque opportunè adsit congrua materia pro glutinis, vel carnis generatione, ac naturalis calor roboretur, quæ necessariò nostrum corpus afficiunt, ita sunt moderanda.

*De aëre.*

In primis aër in activis eligendus est temperatus, & in passivis ficcus. Scio ab aliquibus magis probari frigidum aërem, quia magis humores ineptos ad motum reddit, & vias etiam, per quas fieri deberet fluxio, quodammodo adstringit, sed quoniam talis aër vulneri est inimicus, & reliquas etiam afficiens partes, ipsi vulneratæ parti potest esse infestus, & corporis poros obstruit, unde assidua diligentia requiritur, ut corpus totum, nedum pars vulnerata



nerata protegatur, ac solum inspiretur, & ex erratis non contemnenda mala proveniunt, propterea temperatum magis laudo. Calidus licet vulnere prodest, suspectus tamen est, quoniam vias laxat, humores liquat, & attenuat, & aptos ad motum reddit, & ita fluxionem commovet, ideo Celsus lib. 5. cap. 26. Locus, in quo cubabit, tepidus esse debet. Et lib. 5. Oportunissimum curationi tempus vernum est, aut certe neque fervens, neque frigidum, siquidem vulnera, & nimius calor, & nimium frigus infestat. Nisi igitur talis fuerit, qualis dictus est, arte parandus, quando hoc fieri possit. Sin minus, is eligatur, qui magis ad dictum accedat, & inæqualis tanquam maximè adversus omninò fugiendus: ideoque Celsus loco citato autumnum perniciosissimum dicebat. Calidus, & humidus pessimus, crassus partium inferiorum, tenuis, præsertim si juncta sit insignis frigiditas capitis, & penetrantibus omnibus vulneribus inimicus turbulentus, & nebulosus, foetidus, inquinatus, & putridus maximè fugiendus: Amanus verò purus, liber, nulloque halitu vitiat. Verum si aër, in quo moratur vulneratus, minus sit ad rem nostram accommodatus, saltem curetur, ut sit liber: cæteræ verò pravae qualitates arte corrigantur, quod alibi traditur, aut aliò transferatur patiens.

Quies est imperanda, & præcipuè vulneratæ partis, motus *De motu* enim humores commovet, & ad fluendum promptos facit, & si *& quiete,* vehemens sit, ad vulnus præcipitat, & magis si pars vulnerata aut quæ illi proximæ sunt, moveantur, naturam quoque interturbat. Ambulare enim non æquè nocet iis, qui vulnerati sunt capite, aut brachiis, ac iis, qui cruribus, & femoribus, unde Celsus loco citato: Optimum etiam medicamentum quies est. Moveri, & ambulare, nisi sanis alienum est: minus tamen his est periculosum, qui in capite, vel brachiis, quàm qui inferioribus partibus vulnerati sunt. Minimeque ambulatio convenit femine, aut crure, aut pede laborante. Ambulationis vice præcipi poterunt leves frictiones, non tamen iis partibus, quæ vulnere sunt propinquæ, ne ad partem vulneratam attrahant, sed iis, quæ longinquæ sunt, ut potius avertant, unde Celsus loco citato: Levis frictio rectè adhibetur, sed iis partibus, quæ longius absunt à vulnere.

Cavendæ



*De somno, &  
vigilia. De  
repletione, &  
inanitione.  
Motus ani-  
mi.*

*Quomodo  
captandus  
sit vulnera-  
tus.*

Cavendæ quoque sunt immodicæ vigiliæ, succos enim ex-  
vigilia. De cuunt, & commovent. Alvus lubrica sit oportet, ideò si talis  
repletione, & natura non fuerit, mollibus clysteribus, aut suppositoriis non  
inanitione. acribus supplere opus erit. Motus animi immodici sunt evitan-  
di, præcipuè autem ira. Lætus sit ægrotans, & benè speret. Sed  
quoniam id esse non posset, nisi pro comperto haberet, se viro  
in arte peritissimo salutem suam commisisse, propterea illud po-  
tissimum apud ægrotum debet Medicus contendere, ut æger de  
ipso benè sentiat, existimetque eum optimè res ad vulneratos at-  
tinentes intelligere, sic enim se ipsi, ut dicebat Hipp. 1. Prælag.  
majori cum fiducia committet, & in confidente infirmo, & præ-  
clara expectante præsidia longè magis proficiunt, quæ pro ejus  
recuperanda sanitate adhibentur. Ut ad hoc inducat ægrotan-  
tem, opus est, tales ejus esse actiones, ut ex ipsis nullam in arte  
captandus pati exceptionem possit dijudicare: quare cum variæ sint homi-  
sit vulnera- num sortes, non erga omnes se debet eodem modo præstare, sed  
tus. prout fuerit cujusque natura, alios fabulis capiet, alios in rebus  
agendis se prudentem præstando, & de hisce discurrendo,  
alios de iis, quæ ad artem spectant, tractando, hoc enim  
est hominum proprium, qui ad sapientiæ fines adhuc non  
pervenere, ex uno particulari universale colligere, dijudicantes.  
Medicum in eo, de quo sermonem habet, peritum, in eo  
etiam, quod ad totam artem pertinet, peritum colligunt. At  
quoniam qui sciunt, id, quod est, judicant, ideò cum quis ha-  
bet præ manibus viros sapientes, non laudarem, ut ludicris co-  
ram ipsis ageret, & inanem quamdam lætitiæ ostenderet, quæ  
apud ipsum levioris ingenii essent notæ, sed consideret quod ab  
Aristotele 1. Prob. 30. dicitur sapientes videlicet esse melancholi-  
chos, eo quod humor melancholicus faciat ad quietem, & gra-  
vitatē, atque judicii sit auctor, qua ratione dici solet, animam  
quiescentem fieri sapientem. Non quidem quod velim Medicum  
melancholicum, & quasi tristem, ac metuentem sese ostendere,  
neque enim abundantia melancholici succi est sapientiæ causa,  
sed cum ad sapientiam requiratur, ut dicebat Gal. lib. Art. med.  
in signorum tractatu tenuitas, & claritas spirituum cum modica  
bilis, & melancholiæ permixtione, bile quidem ad discursuum  
velocitatem, & ad solertiam conferente, melancholia verò ad  
stabili-



stabilitatem iudicii, se talem præbeat, ut promptitudinem quamdam in discurrendo ostendat: in iudicando autem, & eligendo, non se ostendat præcipitem, sed acris, & exquisiti iudicii. Hoc volebat Celsus, quando dicebat: Si interrogatus semper velociter respondeas, dubitandus es. Alia via incedunt nonnulli nostris temporibus, & aliter suos ægrotantes capiunt, coram ægrotante enim, & assistentibus præclaras, & memorandas curationes à seipsis antea gestas prædicant, atque ut sibi major fides adhibeatur, secum habent gnationes, viles tonsores, qui omnia amplificant, & adhuc majora de curante enarrant, ut comœdiam agi diceret, & colloquia inter gnationem, & Thrasonem audire; res quidem viro, & arte indigna, & magis etiam eis Medicis, qui, ut ipsi profitentur, & prædicant, ex dignitate artem exercent. Nec magis laudandi sunt, qui scurrilibus, tanquam mimi agunt, nihil aliud curantes, nisi ut ea dicant, & faciant, quæ ægrotantibus, & assistentibus risum moveant, qui ob id histriones potius, quam Medici essent dicendi. Elegans verò Medicus ea amplectatur, quæ artis dignitatem sapiunt, non quæ artis dignitati detrahunt.

*Reprehenduntur Thrasones.*

*Reprehenduntur mimi.*

Coitus est vitandus, nam vires dissolvit, & succos exagitat. Sic tractandum esse vulneratum in hisce rebus, ex universali curandi ratione, quam superius proposuimus, facile quisquis conicere poterit.

*De coitu.*

Sed & ex eadem generali methodo non erit difficile colligere, quisnam victus sit instituendus, quomodo scilicet in iis, quæ comeduntur, & bibuntur, tractandi sint vulnerati: Manifestum enim est rationem instituendi victus in vulneribus non desumi ab iis, quatenus tales morbi sunt, postquam morbi immateriales sunt, & ut tales morbi sunt, eadem ipsis competeret vivendi ratio, quæ reliquis immaterialibus morbis, sed ut morbi sunt, quibus supervenire possunt alii affectus eorum sanationem impediētes, immò & ad mortem ducentes; cuiusmodi sunt inflammatio, abscessus, corruptio, copiosior excrementorum provenus, febres, & huiusmodi, quæ ne fiant, & majori vi, eo magis timendum est, quo majus fuerit vulnus propter alias allatas causas. Ut autem hæc in vulneribus facilius accidant, aut ubi supervene-

*Unde desumatur ratio victitantis vulnerati.*

pervenire-



*Quomodo  
cibi, & potus  
evadant  
morbificæ  
causæ.*

pervenerunt, ut majora fiant, in causa esse possunt cibi, & potus exhibiti, sicuti & in omnibus morbis possunt esse morbificæ causæ, & ideò Gal. 8. Meth. 9. dicebat: Si morbosam affectionem nullo pacto offenderet alimonia, nos virtuti soli attendentes, ægros ut sanos nutrirems, sed quoniam sæpius noxam affert, ob id morbosam affectionem non tanquam cibi indicatricem, sed tanquam prohibetricem contemplamur. Sic ergo in vulneribus, quoniam alimenta exhibita detrimentum inferunt, vel novorum affectuum generationi occasionem præbendo, vel jam genitos augendo, idcirco cogimur aliter nutrire vulneratos, quam sanos. Itaque si habuerimus quando, & quomodo alimenta exhibita sint morbificæ causæ, procul dubio, & quomodo alendus sit vulneratus, quando mala adfunt, aut imminet, habebimus.

*Alimenta  
quomodo  
substantia  
sint noxia.*

Fiunt autem alimenta morbificæ causæ substantia potissimum, & qualitate, & quantitate, non enim modos omnes recensere propositum est, quibus quæ ingeruntur, detrimento esse possunt humano corpori, sed qui in vulneribus sunt peculiariter animadvertendi. Substantia ergo noxia sunt alimenta vulneratis, quatenus generatur copiosior sanguis, quam in vulnerato oporteat, ex quo contingit, uberiores materiam adesse fluxionis, & inflammationis, & majorem propensionem sanguinis ad fluxionem, posteaquam superfluens nutrimentum non retinetur à natura, sed facile qualibet occasione transmittitur ad alias partes; potissimum autem ad imbecilliores, & generari copiosiora excrementa in parte vulnerata, quandoquidem natura transmittit eandem alimenti copiam ad partem vulneratam, quam prius sanitatis tempore transmittere solebat, & forsan majorem: at vulneratæ partis natura nequit tantam alimenti copiam conficere propter imbecillitatem ex vulnere, quam prius, unde inflammationes, putredines &c. ob causas alias allatas. Sic igitur major sanguinis copia existens, ac manens in vulnerata parte, quam ab eadem confici possit, putrescat necesse est, hinc inflammationes, putredines, & alia mala. A substantia quoque alimenti provenire potest detrimentum vulnerato, si alimentum, quod exhibetur, non in bonum succum aptum sit converti, sed in malum potius, ut enim dicebat Gal. 3. de cav. sympt. cap. 2. & idem quotidie experientia



perientia deprehendimus: Ex alimentis alia suapte natura ad atram bilem declinant magis, alia ad aquositates, alia ad bilem amarā. Si ergo quæ pravi sunt succi, exhibeantur alimenta, cacochymum redditur corpus, pravus sanguis fertur ad vulneratam partem, hinc præter quam quod deficit materia pro carnis generatione, quæ est sanguis bonus, temperatura vulneratæ partis majus dispendium patitur, atque labefactatur ob affluxum pravorum succorum, qui etiam præter justitiam affluunt, cum semper consueverit natura totius excrementa ad imbecilliores particulas demandare, sive talis natura sit, sive ascititia causa. Hinc fit, ut natura vulneratæ partis ea opera, quæ necessaria sunt pro vulneris sanatione, præstare nequeat, non concoquere, non aliena expellere, non carnem generare, unde non mirum, si postea succedant inflammationes, putredines, & alia mala.

Ex qualitate verò alimentorum possunt provenire mala in vulneribus, quatenus alimentum potest aliqua esse qualitate præditum, qua humores attenuentur, calefiant, acresque, & fluxiles reddantur, sive qualitatem hanc à natura habeant, ut allia, & cæpæ, & hujusmodi; sive artis, ut si aromatis condiantur alimenta, aut aliqua alia qualitate, quæ vulneratam partem lædat, puta si vulneratum sit caput, & exhibeatur lac amygdalarum, quod vaporosum est, & caput replet vaporibus, & sic de aliis multis.

Ad hæc igitur capita respiciat oportet, qui convenientem in vulneribus victum malorum tempore instituere voluerit, ne suppeditetur materia pro generatione inflammationis, nec tanta alimenti copia ad partem vulneratam transmittatur, quæ sanitatis tempore transmitti consuevit, posteaquam ut imbecillior ob vulnus non eandem quantitatem, quam prius, potest conficere, & ita eodem suppeditato alimento, aut inflammatio generetur, aut excrementorum abundantia, quæ vulnus nimis humectarent, & forsan id esset alicujus corruptionis causa, ut generetur probus sanguis; si namque generarentur pravi succi, cum pars vulnerata hoc tempore sit imbecillior, ad eam vitiosi succi geniti à natura transmitterentur; ne quæ exhibentur qualitate aliqua prædita sint vel natura, vel arte, qua possint humores ad fluxionem



nem aptos reddere, & ad inferendum irritamentum naturæ habiles, vel aliter vulneratæ parti obesse, imo potius qualitatem habeant, quæ humorum impetum coerceat, humores ineptos ad motum reddat, ne copiosiora alimenta exhibeantur, quam par sit; natura enim coctioni alimenti nimis intenta, turbamentum, quod ex vulnere contingit, defereret, aut saltem totis viribus ad illius sedationem non uteretur. Ut primum scopum attingamus, considerandum erit ex vulneris qualitate, & vulnerati statu, quantum sit inflammationis periculum, & quanta foret inflammatio, seu quanti momenti, si vulnere superveniret, & quandiu perduret inflammationis periculum. Ex consideratione quantitatis periculi habebitur, quis victus in quolibet vulnere possit materiam præstare pro inflammationis generatione, non enim censendum est, unum, & eundem victum in omnibus vulneribus æqualiter præstare materiam inflammationis in vulnere, siquidem exempli gratia duræ meningis victus aliquis id faciet, quod non in vulnere carnosæ partis faceret.

*Quæ forma victus in vulneribus conveniat.* Sed consideratio quantitatis inflammationis nobis distinctius ostendet, quæ victus forma peculiariter sit eligenda in quolibet vulnere, idem enim victus imminente inflammatione convenit, qui ea præsentente conveniret. Semper quidem in vulneribus, dum subest inflammationis periculum, tenuis victus est injungendus, ut evitetur inflammatio, cum enim ex tali victu minor sanguinis quantitas generetur, minus abundabit inflammationis materia, & partes alimenti indigentes fortius continebunt quod in seipsis continetur sanguinis, & minor portio sanguinis in alimentum vulneratæ partis deferetur, sicque facilius inflammationem evitare licebit, unde Hipp. meritò dicebat lib. de affec. n. 37. Vulneratos fame affligito. Et lib. de ulc. n. 1. Modicus cibus, & aqua quam maximè omnibus vulneribus conducunt, & magis recentioribus, quam vetustioribus, & si quod aliud ulcus inflammatum est, aut inflammationem minatur. Sed tamen pro majori, vel minori inflammationis periculo, & pro quantitate imminens inflammationis, tenuius, vel uberius alere vulneratum oportet: in majoribus enim vulneribus longè minor sanguinis quantitas inflammationem efficere poterit, unde quo vulnus fuerit majus,



maius, & magis lethalis imminet inflammatio, eo tenuior victus est injungendus. Hinc in lethalibus vulneribus tenuissimus convenit, quamdiu perseverat periculum, & sicuti progressu temporis imminuitur periculum, ita etiam paulatim ad crassiorem victum transeundum est. Minus vero tenuis convenit, quando vulnus non est lethale, & omninò quanto magis distabit vulnus ab illa magnitudine, eò uberiùs reficiendus erit vulneratus. Sic Hipp. lib. de frac. text. 4. com. 1. Simplici existente fractura, victum licet parciolem usque ad decimam instituit, non tamen admodum exquisitum præcipit, unde dicebat: Quibus inter initia nulum adest ulcus, neque os erupit extra cutem, illi satis erit victus non admodum exquisitus, tamen usque ad diem decimam illi parciore sit, utpotè quia jam quiescunt, & subjungebat, mollibus obsoniis utantur, quæ ad dejectionem moderatè faciant: A vino autem, & carniū usu caveant. At in fracturis cum vulnere tenuiorem victum injungit, unde text. 12. com. 3. dicebat: Exquisitiorem prætereà victus rationem illis instituere oportet, ac longiori tempore, quibus ad fracturam ulcus inter initia accessit, quibusque ossa extra cutem extant, atque ut in universum dicam, graviora vulnera victum tenuiorem, & eum diuturniorem requirunt. Et Gal. hoc declarans lib. de fract. com. 1. tex. 44. dicebat: Exquisitum igitur victum illis instituit, qui unà cum fractura ulcus etiam inter initia contraxere, in primis vero si os conflatum se extra cutem exeruit. Simplicem verò, id est, nulla adhibita diligentia, illis, qui nulli periculo sunt obnoxii: At simplicem, qui & inter hos medius est, illis imperat, qui fracturam habent, in primis nimirum diebus, quorum terminum voluit esse decimam. Et paulo post: Ob id autem istis medium hunc victum adhibet, quia neque adeò magnum ipsis periculum imminet, ut illis, quibus nudata sunt ossa, neque eo ita vacant, ut quibus simplex adactum vulnus est in carne citra vitium aliquod ipsius ossis. Quibus ergo res media est inter statum, qui omninò periculo caret, & eum, qui plurimo periculo complicatus est, medium quoque victum merito indicit. Ex quibus colligere possumus, quando Hipp. lib. de affect. dicebat: Vulneratos fame affligito, omnes vulneratos æqualiter fame affligendos noluisse,



luisse, sed pro ratione vulneris. Famem autem appellabat, quoniam inducitur semperimenti indigentia. Quo modo etiam intelligendus est locus ille in lib. de ulc. Modicus cibus, & aqua quàm maximè omnibus ulceribus conducunt. Hæc eadem consideratio nos cautos reddit, quando omninò exquisitam debeamus servare victus rationem, & ab ea, quæ indicatur, nihil omninò recedere, & quando aliquid possimus condonare, licetandum sit semper aliquid, ut dicebat Hipp. 1. Aph. ætati, tempori, regioni, consuetudini, temperaturæ, & hujusmodi, & quando nihil omninò spernendum sit in instituendo victu, quod ad inhibendam fluxionem possit conferre. Quando enim imminens inflammatio est lethalis, nihil negligendum, non est vulnerato indulgendum. Hæc victus forma non solum materiam inflammationis subtrahit dum sub ea modicus sanguis generatur, verum etiam eadem ratione efficit, ut partes melius proprium alimentum retineant, nec aliò transmittant, ut quæ indigentesimenti redduntur, & ita simul, & semel secundum scopum consequimur.

*Alimenta  
conveniunt  
præbi succi.*

Non generabuntur pravi succi, si alimenta exhibeantur, quæ sui natura bonum sanguinem procreent, & sint coctu facilia, contraria verò fugiantur. Quartum scopum assequemur, si à calidis, acribus, & mordacibus abstinuerimus, & ab iis, quæ aliquo alio modo vulneratæ parti possunt obesse, ut in vulneribus capitis à vaporosis, & ea potius exhibeantur, quæ aliqua qualitate humores ad motum ineptos reddant sive natura eam qualitatem habeant, sive arte, & partis vulneratæ robur adaugeant, si aliqua talia qualitate prædita haberi possint. Itaque frigida potius, & sicca sunt eligenda, nisi humores adsint acres, & mordaces: quo in casu refrigerantia, & humectantia convenient, ut quæ acrimoniam, & mordacitatem humorum obtundunt. Et si aliter peccaverint humores, studendum erit, ut talia sint alimenta, quæ vitium illud corrigere valeant, fugiantur verò quæ vitium illud foveant, vel augent; & ideo in putrescentibus succis frigida, & sicca conveniunt, ut quæ putredinem cohibeant, & quæ obstructions parere, aut augere possunt, cavenda immò si sint de obstructiva, attenuantia videlicet, atque si putredo fuerit intensa, atque



atque maligna, vel pestilens, ea quoque convenient, quæ à tota substantia putredini resistent, & vires contra ipsam muniant. Tandem non distrahemus naturam à suo opere, si ea victus forma instituat, quam periculi, & inflammationis magnitudo præscribit, non enim possunt copiosiora ingeri sub tali victu. Transacto inflammationis periculo, ut pristinum robur corpus recipiat, paulatim incrassandus erit victus, semper tamen habita ratione debilitatis ipsius vulneratæ partis, quippe cavendum est semper ab eo victu, sub quo periculum imminet, ne major portio sanguinis in alimentum partis vulneratæ deferatur, quàm ejus natura perferat. In gravioribus, & lethalibus vulneribus, non solum ut pristinum robur restituatur corpori, sicuti imminuitur periculum, ita paulatim incrassare victum oportet, verum etiam ut virtus partis ex alimento facta robusta melius generationi carnis incumbat, atque insuper eidem suppeditetur materia pro carnis generatione, quæ est sanguis probus, cujus adest indigentia, & propter victus tenuitatem, & propter institutas evacuationes in gravioribus vulneribus, non autem in levioribus, in quibus nullæ, aut parvæ evacuationes sunt ex usu, & plenior instituitur victus. Hoc est, quod intendebat Hipp. lib. de loc. in hom. numero 47. *Explicatur* quando dicebat: Et siquidem adstringere oporteat ulcus, ac im-*locus Hipp.* plere, tumefacere prodest, etiam si in capite carnem velis, re-*in lib. de* nutrita enim à cibis caro propulsat eam, quæ à medicamento pu-*loc. ho.* trefacta est, simulque debellat; per illud enim, tumefacere, corporis nutritionem intelligit; cum enim antea dixisset, ulcera simul cum medicamentis etiam fame curanda, ne quis existimasset, id convenire omni tempore, voluit terminum apponere tenuis, & exquisiti victus, qui est, ubi tempus est, ut caro generetur, atque cavitas impleatur. Ne verò talis victitandi ratio quidquam obsit, cavenda sunt edulia, quæ adversam aliquam qualitatem participant, sicuti superius dicebamus observandum malorum tempore, & ab iis, quæ difficilis sunt coctionis, & pravi succi, ex quorum usu vulnus redderetur excrementosum: & exhibenda, quæ facilis sunt coctionis, & boni succi, ex quibus insuper idonea materia præparabitur pro carnis generatione, probus videlicet sanguis, non enim quilibet sanguis est idonea materia,



*Alimenta  
medicamen-  
tosa,*

sed bonus. Immò quoniam sanguis per exsiccationem quādam, & condensationem in carnem vertitur, & propterea siccior sanguis facilius formam carnis recipit, cum natura non laboret in absumenda superflua humiditate, si alimenta exhibeantur, ex quibus sanguis siccior generetur, siue talia fuerint suapte natura, siue arte parata, in gravioribus præsertim vulneribus, existimandum est, faciliorem futuram carnis generationem.

*Quæ ali-  
menta con-  
veniant vul-  
neratis.*

In lethalibus igitur vulneribus fercula ex pane convenient cum lacte seminum melonum ex jure parvi pulli, aut vituli lactentis parata, item fercula ex lactuca, borragine, cicerbita, cicorio, cucurbita, & hujusmodi, pariter ex dicto jure parata, quibus addi poterit omphacium, vel limoniorum, aut aurantium succus. Fercula item ex hordeo, vel ipse hordei cremor cum lacte seminum melonum. Oriza quoque cum eodem lacte exhiberi poterit. Pyra, aut poma cineribus cocta conceduntur. Item persica, quæ & saccharo condita non displicent, sicuti neque ipsa cidonia. Si qualitatem adstringentem in alimentis voluerimus, addentur ferculis terra sigillata, vel bolus Arm. orient. Juscula quoque quibus fercula parantur, alterari poterunt lactuca, borragine, acetosa, cicerbita, portulaca, & hujusmodi, nisi tamen ex istis sint fercula. Quod si timor affuerit alicujus malæ putredinis, ut contingit in pravis aëris constitutionibus, & ubi vulnerati pravæ victus rationi fuerint assueti, & omnino pravis succis scatent, & aër putredinem minatur, non prætermittendum, quin cum cibariis ea permisceantur, quæ non solum manifesta qualitate huic malignæ putredini occurrant, ut sunt frigida, & sicca, atque acetosa præsertim; verum etiam à tota substantia eam cohibeant, viresque contra eandem muniant, idcirco succi citri, limonum, aurantium, & granatorum acidorum, aut medii saporis erunt maximè ex usu. Oxalis, & cicerbita cibariis injectæ non parum conferent. Aqua scorzonæræ, vincetoxici, scabiosæ, acetosæ, rosarum cum utilitate permiscentur, immò ab re non erit, si ex iisdem aquis parentur juscula. Permisceri quoque poterit aqua florum citri, nimis enim calida est, quam ut ex ipsa conficiantur juscula. Margaritæ præparatæ succo præsertim limonum, vel citri dissolutæ non erunt prætermittendæ. Probantur, & co-

ralli



alli præparati, terra sigillata, bolus Armena orientalis, cornu cervi præparatum, cornu Rhinocerotis. Inter composita verò laudatur Diamargariton frigidum in rotulis, manus Christi appellata, confectio cum margaritis, pulvis cordialis pro cibo absque moscho, & ambra paratus.

Transacto inflammationis periculo, primò ova forbilia concedentur; & fercula vitellis ovorum præparata, deinde etiam carnes pullorum, & lactentis vituli, quæ in levioribus vulneribus, & quæ omninò periculo carent, statim à principio dari possunt, modò non in tanta quantitate exhibeantur, quæ vulnus excrementosum reddere valeat. Dari etiam poterunt carnes parvarum avicularum montanarum, & postremò caro caponis, phasianorum, perdicis, grandioris vituli, castrati, quæ & in levioribus vulneribus, non tamen ad saturitatem conceduntur. In mediocribus vulneribus media quadam via incedendum est, & quoniam in his inflammationis periculum citius transit, citius etiam ad uberio-rem victum fiet transitus.

Potiones, & ipsæ non aliter ac cibi multipliciter obsunt, substantia videlicet, & qualitate, & quantitate, nam & sunt potiones nutrientes, ut cervisia, & quæ pravos gignunt succos, ut quæ ex fructibus parantur, & quæ mala qualitate participant, idcirco eadem observanda sunt in præscribendo potu, quæ in instituenda alimonia diximus. Semper ergo cavendæ sunt potiones, quæ pravum succum generant, & quæ qualitatem habent contrariam ei, quod intendimus. In lethalibus etiam vulneribus cavenda est cervisia, præcipuè quæ ex tritico paratur, ut nimis nutriens, & vinum, non solum tanquam nutriens, verum etiam tanquam humorum vehiculum ob sui caliditatem, & partium tenuitatem, quandiu durat inflammationis periculum, idcirco aqua simplici utendum, unde Hippocrates lib. de ulc. n. 1. Modicus cibus, & aqua quam maximè omnibus vulneribus conducunt, & magis recentioribus, quàm vetustioribus, & si quod aliud ulcus inflammatum est, aut inflammationem minatur, & si periculum est corruptionis in ulceribus, ac inflammationis in articulis, & ubi convulsionem fieri periculum est, & vulneribus in ventre, maximè verò omnium fracturis in capite, ac femore, & si cui alii parti fractu-

*Quæ convenient trans-  
acto inflam-  
mationis pe-  
riculo.*

*De potionibus.*



fractura contigerit. Utilis etiam erit potus quispiam ea qualitate præditus, quæ ad inhibendam fluxionem valeat, unde aqua hordeacea erit ex usu, & in qua coriandri semen bullierit, aqua ex cerasis acidis parata: Vinum granatorum, & limonum succus cum aqua simplici, & saccharo probatur. Debent autem hujusmodi ea proportionem commisceri, ex qua sapor resultet gustui gratus. Etsi malignæ alicujus putredinis fuerit suspicio, idem potus ex aqua, & vino granatorum, vel limonum succo, & saccharo paratus est maximè probandus. Aqua ex toto citro per destillationem extracta est optima. Similiter aqua simplex, in qua & cortex, & citri succus, vel etiam semina, ex quibus tamen seminibus amara redditur potio, bullierit. Paratur optima potio ex aqua simplici, vel acetosæ duplici vase extracta, succo citri, & saccharo, vel ex eadem aqua, & acido citri condito, vel syrupo de succo acido citri. Si addatur istis potionibus aqua scorzonæræ, & etiam citri florum, in pauca tamen quantitate, longè præstantior evadet potio. Aqua scabiosæ, & cicerbitæ non est spernenda. Quòd si in dictis aquis aurum ignitum pluries extinguatur, id erit maximè opportunum, immò maximè probanda est ipsa aqua simplex extinctionis auri. Transacto inflammationis periculo vinum oligophorum concedi poterit, primò dilutum, deindè simplex, seu impermixtum. Vinum autem potens nunquam concederem, nisi repleto jam vulnere, aut quando parum abest à repletionem: & semper in modica quantitate, ne vulnus evadat excrementosum. In mediis vulneribus etiam à principio interdendum est vinum, & quandiu durat periculum inflammationis. In gravioribus vulneribus, & mediis, quæ in corporibus sunt excrementosis, transacto inflammationis periculo, non erit ab re, si aliquo exsiccante alteretur potus, ut sanguis siccior generetur, & superflua humiditas absumatur, puta equisetum, consolida, pilosella, pyrola, bistorta, tormentilla, sarfa, ligno lentiscino, ligno visci quercini, & hujusmodi aliis, quæ proponuntur capite de alterantibus.



C A P U T L I X.

*Quid agendum in simplici vulnere.*

**N**on esset profecto difficile, quicquid attinet ad curationem tam simplicis appellati, quam cavi vulneris, ex hactenus traditis colligere: sed quia tironibus fortasse videbitur sparsa nimis, ac minus distincta hæc tractatio, & in aliquibus præterea deficere, cum nonnulla fuerint solummodo universaliter tradita, & significata, quæ magis particulatim erant tractanda, idcirco ne quid habeant, quod desiderent, tam de simplicibus, quam de concavis vulneribus peculiarem sermonem, qui omnia distinctè complectatur, instituere operæ pretium duximus. A simplicibus igitur exordiamur. Hæc agglutinationem postulare diximus, quæ naturæ est opus; Medici vero partes esse, adducere labia, si dissideant, ad mutuum contactum, adductaque conservare, & præcavere, ne quid labiis vulneris intercitat, ac demum salubrem partis substantiam conservare, ac robori naturalis caloris consulere.

Oblato igitur simplici vulnere, si ab eo adhuc fluat sanguis, *Non illico* nec tamen adhuc tantum ejus fluxerit, quantum satis est ex se ad *sistendus* tollendum inflammationis, & putredinis periculum, non illico *est sanguinis Fluxus.* sistendus est, sed permittendum, ut quantum satis est, effluat, hoc enim facit ad salubrem partis substantiam conservandam, unde Hippocrates libro de ulceribus text. 3. Omni recenti vulnere, præterquam in ventre, conducit frequenter sanguinem defluere facere (hoc est, sæpe conducit, ut sanguinem defluere faciamus, seu permittamus, non enim probaret Hippocrates ut quotidie fluxus sanguinis à recenti vulnere procuraretur, quandoquidem hoc fluxionem advocaret) prout opportunum esse visum fuerit, & ab ipsis partibus ulcus complectentibus, & inferius: Sanguine enim fluente, gracilescentia sicciora fiunt, ac minora, prohibet enim hoc maximè talia ulcera humectari; deinde vero in omnibus putredo sanguinis ex sanguinis transmutatione fit; suppresso deinde sanguine, sive sponte, sive congruis auxiliis, quæ suo loco tradentur,



dentur, ad auferenda peregrina corpora, quæ intra vulnus continentur, accedendum est: non ignorantes, quicquid extranei intra vulneris labia continetur, agglutinationem impedire, & propterea necessarium erit vulnus abstergere vel linteo, vel molli lana, aut xilo specillo obvoluto ab omnibus in ipso contentis, ita ut nec pilus, nec grumus sanguinis relinquatur: in quo quidem quorundam negligentiam, vel inscitiam potius noto, qui vulnus consuunt, fluente etiamnum sanguine, ex quo fieri non potest, quin inter agglutinandas oras interponatur sanguis à proprio vase effluxus, qui paulò post concreescit, & tandem putrescit, aut suppurat, & non solum agglutinationem impedit verum etiam inflammationis est causa. Expurgato diligenter vulnere, ad quod, si opus fuerit, vino subdulci, eoque calente uti licebit, operæ pretium erit, adducere labia ad mutuum contactum, & ut adducta maneant, curare, distantia enim labia certum est, agglutinari non posse. Manibus quidem adducentur.

*Quomodo adducantur, & adducta conserventur labia vulneris.*

*Deligatio agglutinativa quibus in vulneribus locum habeat.*

Ut verò adducta conserventur, excogitarunt Medici plura auxilia, videlicet deligationem convenientem, futuram, fibulas, & gluten. Decens deligatio ea est, quam Medici agglutinativam appellant, non quæ retentiva tantum est; cujus est solummodo apposita medicamenta continere, nec quæ expulsiva dicitur, cujus ope contentum pus exprimitur, de quibus tribus deligationis fortibus meminit Avicen. 44. tract. 1. cap. 3. & Galen. lib. de fasciis. Eorum autem tantummodo vulnerum labia adducta conservare potest deligatio, quæ per longitudinem musculorum sunt inflicta, aut leviter per obliquum, quando enim transversa sunt, deligatio non sufficit, sed ut dicebat Galen. 3. Method. ultimo tum futuris, tum fibulis in his utendum est. Præterea & in solis artubus uti deligatione possumus.

*Fascia idonea.*

Si igitur vulnus per longitudinem musculorum fuerit inflictum, vel parum per obliquum in ipsis artubus, & deligatione ad agglutinanda labia uti quis velit, in primis idonea fascia sibi erit deligenda. Idonea est illa fascia, qua propositum finem consequi tutò licet, & ex ea nihil incommodi provenit, & parari etiam potest ex ea deligatio, quæ aspectu sit jucunda. Elegantem enim deligationem laudat Hippocr. lib. de Chirurgi off. & Galen.



Galen. libr. de fasciis, quam quidem elegantiam in omnibus etiam artis operibus attendendam præcipiebat Hippocrates, ut ibidem refert Galen. ex Hippocr. Nobis, dicebat. Hippocrat. gratum est admodum, ut in universa arte omnis diligentia adhibeatur. Ubicunque enim pulchrè possumus, pulchrè agendum est; quæ etiam politè, & expeditè fieri possunt, politè, & expeditè præstentur. Item ubi caveri dolor potest, admodum jucundè; atque omnia hujus generis præstantius facere debemus, quam alii, qui eandem artem exercent. Periti enim artifices ut interdum in his, quæ efficiuntur, videmus, imperitis, ac artis expertibus in his præstant, quod expeditè, & eleganter operantur, quapropter subjungebat Galen. Medicus quo nobiliorem habet subjectam materiam, eò par est, ut præ omnibus aliis artificibus suum præstet artificium, unde sive secet, sive urat, sive deliget, & tandem quicquid aliud manu efficiat, non solum utilitatem spectare debet, verum etiam ut mundè, & eleganter operetur.

Amanada est igitur in deligatione elegantia, & pulchritudo, quam & exposcit, qui curatur, & laudant qui ad ægrotum accedunt licet ad morbi curationem nihil conducatur, unde Gal. loco citato: Morbi namque qui aliquas corporis partes occupant, accommodatum deligationis modum requirunt, sæpissime verò, ut illa polite fiat, homo exposcit. Tenendum ergo, tum ægrotantis gratia, cum vero omnium, quos ipse ad se videndum admittit, quæ simplices, quæque variæ deligationes singulis partibus congruant. Ut ergo fascia adducta labia conservare valeat, firma, & valida sit, oportet, non fragilis, & lacera, unde Gal. 3. Meth. 4. Expedit autem, quod circumjicitur, neque molle nimium sit, & algæ ritu fragile, quo tuto contineat, sufficientemque habeat latitudinem, quam communiter statuunt quinque digitorum transversalium in femore, quatuor verò in crure, trium in brachio, & unius in digito; sed pro vulneris varietate varianda quoque est fasciæ latitudo, namque non vulnus tantum comprehendere debet, verum etiam aliquid sanæ partis, tam in superiori, quam in inferiori parte, ne vulnus tanquam zona vinciat, quod importunum esset, veluti docuit Hippocrates lib. de frac. tex. 8.



comm. 3. & sufficientem longitudinem, & toties membrum circumdet, quoties opus est ad adductionem labiorum conservandam. Licēbit etiam plures circumvolutiones facere, si tempus sit hibernum, ut ab injuriis frigidi ambientis pars protegatur: quamvis hoc non sit necessarium, cum alia via huic possimus occurrere, suprapositis videlicet linteis post deligationem. Tandem æqualis esse debet, & eminentiis carere, quæ inæqualem reddunt deligationem, nec aliqua extent, ut filamenta, seu fibræ, quæ faciant, ne expedite circumducatur. Unde Galen. lib. de fasciis: Careant quoque eminentiis, ita ut nullas oras habeant à lateribus, aut contextas, aut inversas, consutasque, nihil etiam, ut fila, seu fibræ extent, ut enim, quæ eminent, inæqualem reddunt deligationem, ita quæ extant, impediunt, ne expedite circumducatur: ne autem detrimentum aliquod afferat fascia, mollis esse debet, ne duritie premat, & levis, ne sit nimis onerosa, futurisque inæqualibus carere, & aliis eminentiis, quibus possit comprimere, & dolorem afferre, sordibusque diligenter expurgata, ut si fortè aliquo liquore aspergi debeat, id admittat, nec illi aliquam malam qualitatem impertiatur, nec alienum habeat calorem, ut, quod ex vulnere profluit, possit observari, id enim fieri commode non posset, si foret colorata. Denique ut ex fascia fieri possit deligatio, quæ aspectu sit jucunda, munda eligi debet, sordida enim turpitudinem affert, & tenuis ne convoluta nimium tumorem efficiat. Hinc Hippocrates lib. de his, quæ in med. off. com. 2. tex. 9. fasciæ mundæ, leves, molles, tenues. Et tex. 26. lintea vero paranda sunt, per lintea fascias intelligit, ut notat Galen. in com. ejus loci, levia, tenuia, mollia, lata, futuris carentia, & eminentiis, integra, hoc est firma, ut possit extensiones ferre. Et Galen. libro de fasciis: Fasciæ parentur tenues, leves, mundæ, molles, latæ, sine futuris, sine eminentiis, validæ ita, ne abrumphantur, dum extenduntur, aut paulò amplius. Mundæ quidem esse debent, propterea quod præter id, quod sordidæ turpitudinem habent, si aliquo aspergantur liquore; id non admittunt, & id quo perfunduntur, malè afficiunt; neque alienum colorem habeant, alioquin enim si purpura, aut alia quapiam simili re infectæ sint, eodem modo officient,



cient, aut coloris similitudine fluentis sanguinis opinionem afferent. Tenuēs sint, ne convolutæ tumorem nimium efficiant, molles verò, ne duritie premant, leves, ne suo pondere molestiam inferant. Careant etiam futuris inæqualibus, quibus comprimere possint, careant quoque eminentiis, ita ut nullas oras habeant à lateribus, aut contextas, aut inversas, confutasque, nihil etiam, ut fila, seu fibræ, extent, ut enim, quæ eminent, inæqualem reddunt deligationem, ita quæ extant, impediunt, ne expedite circumducantur.

Parata idonea fascia, adhibenda est deligatio, quæ oras adductas fideliter conservet, & propterea ex duobus initiis circumducendum est vinculum, ut monebat Galen. 3. Meth. 4. & Celsus lib. 5. cap. 26. plicari enim debet fascia ex utroque capite ad medium usque ab opposita vulneris parte initium sumendo, primaque, & secunda revolutio supra vulneris labia reduci debet. In quo opere illud animadvertatur, ut fascia aliquid de sana parte utrinque comprehendat, sursum videlicet, & deorsum, ut enim dictum est cavere oportet, ne veluti zona vulnus cingat, præterquam quod enim non perfectè adduceret labia, dolorem etiam inferret, ac præterea, ne deligatio evadat, aut nimis laxa, quia nihil efficeret, non enim adducta ad amissim labia contineret, aut nimis arcta, quia comprimeret, & esset dolorosa, atque fluxionem advocaret, hinc Gal. 3. Meth. 4. Tum verò ipsa circumductio nec ita laxa sit, ut nihil efficiat nec ita vehemens, ut premendo dolorem excitet. Et Celsus lib. 5. cap. 26. Si ab altera parte caro magis recessit, ab ea magis attrahetur, si æque ab utraque transversa comprehendere oras debet, aut si id vulneris ratio non patitur, media primùm injicienda est, ut tamen in utramque partem ducatur. Talis deligatio non solum adducta labia conservat, verum etiam partem à fluxione defendit. Avic. 4. 4. tract. p. cap. 8. eadem deligandi ratione utitur, ex duobus enim initiis circumducit vinculum: verum in majoribus vulneribus, ut melius fiat, atque conservetur labiorum adductio, duos pulvillos triangulares excogitavit, & utrinque unum apponebat, ita ut amborum latera secundum vulneris longitudinem disposita, quæ proinde vulneris longitudinem excedere oportet, se respicerent,



cerent, inde ex duobus initiis deligabat. Et quidem hoc non mediocre est auxilium ad id, quod intendimus. Et magis faciunt ad labiorum adductionem isti triangulati plumaceoli, quam si quadrati essent, aut lintea multipliciter plicata apponerentur, nam fascia super triangulati plumaceoli angulum ducta impellit plumaceolum unà cum subjecto labio ad contrariam partem, & ut dicebat ibidem Avic. coarctat super fissuram tantum, quod non sic fieret, si quadrati essent plumaceoli. Ratio autem ex Geometricis principiis petenda est. Vicem præterea tegumenti gerunt illi plumaceoli, parantur enim ex lana molli, vel cottone, aut tenui stupa tenui linteo excepta. Aliqui non parum se fecisse existimant, si hosce pulvillos aliquo liquore madefecerint, puta vino, vel oxycrato, vel albo ovi, aut alio repellente, aut etiam agglutinante, vel aliquo similis facultatis medicamento, quæ postea describentur, illinierint.

*Deligatio  
agglutina-  
tiva non  
omnino pro-  
banda.*

*Alia ratio  
adducendi  
& adducta  
labia con-  
servandi.*

Completa deligatione, capita fasciæ consuantur, non autem mutuò nectantur, quod dolorosum esse solet. Attamen, ut verum fatear, deligationem agglutinandi gratia, neque penitus probo, neque etiam vitupero, quod enim tot viris sapientibus placuit, atque etiamnum placet, ego ne minimus reprehendam? Sed quod me cogit, ne penitus illam probem, est, quod in peragendo opere non possumus cernere, quando labia rectè sint composita, posteaquam fascia vulnus tegit; quo fit, ut ferè fortunæ decentem compositionem videamur committere; ac præterea quod medicamentum linteo exceptum apponere non possumus, præterquam quod enim magis tegeretur vulnus, periculum etiam esset, ne dum fascia circumvolvitur, & magis constringuntur vulneris labia, aliquid lintei, quod corrugari est necesse, intra vulneris labia comprehendatur. Hinc est, quod mera deligatione nunquam utar, si vulnus sit alicujus momenti, sed aliquo tenaci medicamento curo, ut labia adducta conserventur, donec fascia effecerit, ut vulneris labia ab eo statu, & ab ea adductione discedere nequeant: neque linteam accipio, quod totum vulnus comprehendat, sed lintei portiones non magis latas, quam sit adstrictoria ligula, quibus tenax illud medicamentum illinio, & ex illis tot vulneri adhibeo, quot satis sunt ad conservanda ad-  
ducta



ducta labia. Satis autem esse solet, si unius digiti spatium distent. Semper autem primum in medio ipsius vulneris colloco, curans, ut primum uni labio adhæreat, quod versus alterum linteo illo traho, simulque alterum labium versus illud, cui pharmacum adhæret, altera manu impello, & ad amissum adductum linteo pharmaco illito excipio, atque contineo. Si ita administretur agglutinativa deligatio, nunquam error continget. Congruum etiam medicamentum linteo, quod totum ulcus comprehendat, exceptum adhiberi poterit, facta videlicet adductione illa. Si hoc tenaci medicamento illiniantur Avicennæ plumaceoli, perbellè succedet adductio, soli enim absque ipsis labiis adduci deligatione non poterunt.

Et quoniam, ut dictum est, deligatio hæc neque in omnibus vulneribus, neque in omnibus partibus locum habet, idcirco ad alia auxilia non raro confugere oportebit, videlicet ad futuram, & alia superius proposita. *Sutura,* Suturae autem usus frequentissimus est, qua in omnibus vulneribus uti licet, modo ad manus sint. Verum eam non uno modo facere consueverunt, aliqui enim acum dextra trajiciunt per utrumque vulneris labium, eo meliori modo, quo fieri possit, opposito vulneris labio indicem, & medium sinistræ manus apponentes, ne occurrenti acui, & dum unà cum filo post trajectionem ex adverso trahitur, labium cedat, & filum subsequens invertatur. Itaque faciunt, ut acus inter utrumque digitum permeet: aliquando utrumque labium pollice, & indice sinistræ manus apprehendunt, & dextra acum per utrumque trajiciunt, & denique sicuti occasio dat, labia acu trajecta perforant, posteaquam non potest dari generalis regula propter varietatem partium, & vulnerandi modum, ut quandoque hoc, quandoque illo modo trajicienda sint vulneris labia: quod enim quidam neoterici dicunt, alteri labio apponendam esse cannulam quandam in cujus fine adsit fenestella, qua illud comprimatur, ut facilius unico ictu utrumque vulneris labium possit trajici, nec insequatur, & invertatur labium, dum acus, & filum ex opposita parte trahitur, non esse adeo certum, & commodum compertum est, ut sunt proprii digiti, quando situs partis, & vulneris qualitas eos admittunt. Acu trajecta  
filum



filum ex utraque parte pendens nectunt duobus nodis, in primo quidem duabus circumvolutionibus factis, in secundo vero unica tantum, & postea filum scindunt nonnihil remotum à nodo quamvis in modo curandi parum referat, siue remotum à nodo scindatur, siue quam proximum. Fortasse tamen procul à nodo scindunt, quia si quam proximum nodo id fiat, periculum subesse videtur, ne elapso fili capite dissolvatur nodus, & ita punctum evadat inutile. Si vulnus unico puncto non sit sufficienter adductum propter sui longitudinem, aliud punctum eodem prorsus modo injiciunt, & tot denique puncta faciunt, quot sufficiunt ad labiorum adductionem, siquidem huc spectant puncta, ut labia vulneris ubique se tangant.

In punctis autem injiciendis hæc observant, primum punctum in medio vulneris ponunt, deinde subsequenter alia puncta, donec totum vulnus sit consutum, tantum spatii inter unum, & alterum punctum relinquentes, quanta est unius digiti latitudo, plus tamen, vel minus juxta occasionis varietatem. Alii accipiunt tot acus, quot puncta injici debent, iisque in convenientibus locis utrumque labium trajiciunt, atque ita acus relinquentes filum obvoluunt ex una in alteram acus partem; ea prorsus ratione, qua faciunt quidam, dum volunt acus suas cum filo trajecto alicubi infixas conservare, eatenus obvolutiones adstringentes, quatenus sufficiant ad mutuuum labiorum contactum. Alii acum trajiciunt per utrumque labium, filum vero usque ad sui extremum per oppositam partem non attrahunt, & rursus per idem foramen in parte, ex qua exiit acus eandem trajiciunt ad partem primò perforatam, atque sic duplicato filo in utraque parte confurgit ansula quædam, in qua ponunt frustula calami scriptorij, vel cannæ, vel fili crassi contorti, aut alterius rei, quæ tantundem valeat, & hisce frustulis, ac ansulis labia hinc inde constringunt, quantum fuerit opus. Fit autem hæc constrictio, quoniam imposito frustulo illo in prima ansula, quæ orta fuit ex duplicato filo in labio secundo loco perforato, aliud similiter frustulum inter utrumque filum ponitur in labio primo trajecto, trahiturque simul utrumque filum, quantum satis est ad adductionem labiorum, & super frustulum illud duplici nodo connectun-



nectuntur, ut adducta labia firmiter contineant. Verum hi duo postremi suendi modi pravi sunt, & fugiendi etiam, tanquam crudeles, nimis enim vulneratum torquent, & ob nimium dolorem, quem inferunt, fluxionem advocant. Primus vero modus mitior est, & proinde etiam maxime est ex usu.

Attamen, ut prospere cedat, oportet acus idoneas deligere, *Suendi ratio.* & filum aptum, & in ea vulneris parte opus aggredi, in qua maxime convenit, & eo progredi, quo magis sit necessarium, atque acum in perforando labia tam profundè demergere, quantum sit satis, & conveniens intervallum inter unum, & alterum punctum derelinquere; omnia ea dexteritate peragentes, ut operatio non tuta solum, verum etiam cita, & jucunda dici mereatur, id enim propositum esse debet, ut futura labia adducta, prout convenit, conservet, & quam minimum detrimenti ex ea proveniat.

Acus igitur longa sit, lævis, perpolitaque cuspide triangulari, cauda aptè excavata, ut pertranseundo filum in ea cavitate recondi possit, aliter transitum acus immoraturum. Sit autem vel recta, vel obtorta, prout natura loci consuendi requirit, sunt enim quædam partes, in quibus futura fieri nequit, commodè saltem, acubus rectis, sed obtortæ, vel angulares requiruntur, ut sunt quædam palpebrarum partes, nasi, & hujusmodi. Hoc tamen sufficienter praxis docebit. *Acus qualis.*

Filum debet esse firmum, æquale, & læve, ex lino potius, *Filum quale* quam serico, hoc enim carnem magis scindit, quam linum, non nimis obtortum, ne carnem laceret. Atque non nimis crassum, sed nec valde tenue, ne carnem disrumpat, vel scindantur puncta. Sit tamen vulneribus proportionatum, quia in aliquibus crassius, in aliquibus tenuius requiritur; absurdum enim esset uti in futura palpebrarum filo, quo utimur in vulneribus cruris, & eo quo utimur in vulneribus magnis, & profundis, uti in parvis, & cutaneis vulneribus. Ut etiam levius evadat, & facilius pertranseat, & minus carnem possit scindere, illiniri debet tragacantha aqua rosarum, vel vino dissoluta, aut, quod etiam magis ex usu est, & magis in promptu, ex cera alba, quo pariter fiet, ut minus putrescat.



*Ut puncta  
injicienda.*

Porro in punctis efficiendis acus quam citissimè trajiciatur, & si fieri possit, unico ictu utrumque labium, quod tamen si qua de causa fieri nequeat, ut ob cutis duritiem quandoque contingit, & propter futuræ profunditatem, vel partis conformationem, unum post aliud trajiciatur, ita tamen, ut puncta è directo respondeant, aliter figura partis vitaretur, unde non erit inutile si atramento scriptorio signentur loca, quibus injicienda sunt puncta. Ut plurimum autem oportet initium sumere à medio vulneris, secundum autem, & tertium punctum inter primum illud, & vulneris fines, in medio videlicet injicientur & si pluribus opus fuerit; sic deinceps procedendum est, factis semper in medio spatio punctis, donec totum vulnus sit confutum. Aliquando tamen, & in multiformi vulnere potissimum, aliter facere cogimur. Est vero generalis quædam regula, ut ab ea parte opus aggrediamur, ex qua speramus, magis æqualem evasuram futuram, & unionem. Spatium, quod intercedere debet, communiter statuitur inter unum, & alterum punctum, est unius digiti latitudo. Aliquando tamen crebriora injicimus, sic requirente vulneris qualitate, omnino enim quantum unum ab altero puncto distare debeat, manifestè declarabit scopus, cujus assequendi gratia punctis utimur; qui est exquisita labiorum adductio; neque enim probaverim, quod oræ vulneris ex toto non jungantur, quamvis Celsus id præcipiat, ut si quid intus humoris concreverit possit emanare, nam quando simplex fuerit vulnus, ut supponitur, non est, quod nos ad hoc cogat. Et si ex toto non jungantur, quomodo dicentur adducta ad mutuum contactum, aut quomodo agglutinari rectè poterunt? Et quo paucioribus punctis absolvi res poterit, eo melius vulnerato fuerit consultum, nam quo sæpius acum injicimus eò majores dolores concitamus, & majorem occasionem inflammationis præbemus. Unde Celsus lib. 5. cap. 26. Utraque, de futura, & fibulis loquebatur, neque nimis rara, neque nimis crebra injicienda est. Si nimis rara est, non continet, si nimis crebra est, vehementer afficit, quia quò sæpius acus corpus transivit, quoque plura loca injectum vinculum mordet, eo majores inflammationes oriuntur, magisque æstate. Quod vero ad profunditatem attinet,



attinet, non æqua profunditas in omnibus vulneribus est servanda, siquidem in aliquibus sat est cutem comprehendere, ut in iis, quæ paucam habent cavitatem. At in iis, quæ magis sunt cava & quæ sunt cum musculorum sectione, præsertim si per transversum secti sint muscoli, ut dicebat Gal. 3. de comp. med. per gen. cap. 2. necessarium est quoque subjectam carnem, & musculus comprehendere, si usque ad penitiores partes fieri debeat adductio, unde Gal. 3. Meth. ult. At quæ profunda multum, longaque sunt, ut duplici ratione sunt magna, sic duplicem quoque indicationem præstant, namque, & quæ valenter siccent, postulant, & ut à duobus initiis deliges, & ut altis futuris consuas. & 3. de comp. med. per gen. cap. 2. musculos confuit. Semper tamen cavere oportet, ne venæ, aut arteriæ, vel nervi, ac tendines acu trajiciantur.

Sed quid, si carnosæ pars musculi tendine dilatato contegatur? In hoc casu denudandus est musculus à tendine, & sola car- *Tendines non sunt consuendi.* nosa pars sine tendine unà cum cute est consuenda. Si enim cutem solam fueremus, dissectæ musculi partes inglutinatæ permanerent, ipse verò tendo absque periculo convulsionis acu trajici non potest. Hoc faciebat Galen. ut videre est 3. de comp. med. per gen. cap. 2. ubi hæc refert: Contemplatus enim gladiatorem quendam ex his, quos equites nominant, transversam divisionem in priore, ac inferiore femoris parte habentem, eamque satis altam, tum vulneris labium intuitus sursum alterum revulsum, infra alteram, quasi ad patellam detractum, non dubitavi, distantes invicem musculorum partes futuris contrahere, curatione illa, quæ Græce à latitudine *κατὰ πλάτος* dicitur, quod quidem est, quando vulnera citra futuram, & omnem labiorum adductionem curantur, neglecta. Itaque veritus tendines ipsos confuere, denudatis prius illis, sic altioribus futuris usus sum, haud ignarus, carnosam ipsam musculorum partem periculo vacare, tendines verò non item. Quamquam hoc nullum ex præceptoribus facientem viderim. Quidam siquidem ipsorum in hujusmodi vulneribus solas cutis oras consuebant. Nonnulli in carnosis partibus musculos ipsos fuere ausi, id in superficie ipsorum facere solebant. Proinde si quando vulnus insigniter altum non se-



cundum membri longitudinem contingeret, summam quidem musculi partem glutinabant, reliquam verò totam inglutinatam relinquebant. Cavere tamen oportet, ne à subjectis musculis membranas, quæ tutò consui possunt, tendinum vice avellamus, quod aliquos facere consuevisse ob Anatomes imperitiam ibidem refert Galen. ignorabant enim tendines crassiores, & duriores esse membranis ipsis, præterquam in musculis abdominis, si rectos excipias, in quibus membranæ modo dilatantur. Hic est communis, & jam universaliter receptus suendi modus; quamvis neque in omnibus partibus administretur, nam alia suendi via utimur in intestinis, alia in abdomine, de quibus suo loco.

*Suendum  
est vulnus,  
quando est  
recens.*

Illud non omitam, quod illo suendi modo, quo pelles consui solent, & quem in vulneribus intestinorum servamus, perbellè adducuntur labia carnosarum partium, & adducta conservantur. Sed duplicatum esse debet filum, & quando primum punctum injicitur, inter utriusque fili extrema ponendum est frustulum calami scriptorii, vel alterius rei similis, quod prohibeat, ne fili extrema, quamvis nodo juncta, foramen ab ictu in carne relictum ingrediantur, quod puncta omnia relaxaret; neque tutus est simplex ille nodus, posset enim erodendo dictum acus foramen amplius reddere, sicque sibi viam parare. Idem faciendum est in ultimo puncto, ne retrocedat filum.

*Fibulae.*

Illud etiam observare oportet in omni futura, ut fiat, quando adhuc vulnus est recens, & sanguinolentum, & labia non evasere rigida, nisi enim trahenti facilè obsequantur, futura ipsis vim inferret, & dolores acciderent, & forsan caro à filo abrumperetur, hinc Celsus loco toties citato: Neutra etiam, de futura, & fibulis loquebatur, vim ullam desiderant: Sed eatenus utilis est, qua cutis ducentem, quasi sua spontè subsequitur.

Tertium instrumentum, quo vulneris labia ad mutuum contactum adducuntur, & adducta conservantur, sunt fibulae apud antiquos usitatae, verum nostris temporibus adeo exoleverunt, ut nec ex qua materia ab antiquis conficerentur, neque qua figura essent præditæ, aut quomodo injicerentur, apud omnes conveniat, & si nonnulli contendunt, non aliud esse fibulas, quam futuram primo loco positam. Quod si esset, jam de illis actum esset.



esset. Sed eas missas faciamus, & ad gluten recentiorum deveniamus, quod forsan locum fibularum subiit.

Constat autem ex portionibus quibusdam liniei variis figuris præditis pro partium vulneratarum differentia, quibus adaptantur filamenta quædam, veluti anfulæ, ita ut ex ea liniei parte, quæ vulneris labium debet respicere, superemineant ipsius liniei extremitatem, quanta est circiter unius digiti longitudo, & quantum satis sit, ut cum opponendis possintnecti. Tot autem sint filamenta, quot puncta essent injicienda, vel etiam plura inter se distantia, sicuti puncta, vel paulo minus: linteo hoc modo parato, super inducitur gluten aliquod, ac postea uni ex vulneris labiis adaptatur, & idem fit in labio opposito, ita ut filamenta supereminentia, labiaque vulneris spectantia sibi è directo corresponsdeant. Ubi gluten postea fuerit exsiccatum, quod in his, quibus communiter utuntur Chirurghi, solet accidere sex circiter horarum spatio, filamenta, seu anfulæ è directo respondentes simul nectuntur. Itaque ut opus est, vulnus constringitur: quamvis non desint: qui linetorum portiones absque filamentis apponunt, sed postea oppositas portiones acu consuunt. Parant autem gluten illud ex sang. draconis, thure, sarcocolla, myrrha, mastiche, sumptis ex his aquis portionibus, atque in tenuissimum pollinem redactis, deinde tanta quantitas albuminis ovi subagitati additur, quanta satis est, ut glutinis formam acquirat, consistentiam videlicet mellis, omniaque perfectè commiscentur, & agitantur, ut exacta fiat unio. Aliud etiam parant ex mastiche, sarcocolla, & bolo Arm. atque ovi albumine. Aliud ex tragacantha, mastiche, thure, & farina volatili, atque ovi albumine. Aliqui aliud conficiunt ex tenuissima calce viva, & albumine ovi diligenter subacto ad mellis consistentiam redactis. Quod quidem fere statim exsiccatur, aliis sum expertus, hoc vero nunquam, timens erosionem à calce. Cautius incedunt, qui patinam stanneam albumine ovi subacto inficiunt, & pariter lin-teum postea aliquantulum calcis vivæ inspergunt super patinam, ita ut vix appareat, tandemque ipsum lin-teum super patinam opponunt, & non nihil comprimunt, ut calx linteo hæreat, & sic paratum parti applicant.

*Gluten.*



*Gluten præ-  
stantissimū,  
quod statim  
usurpari  
potest.*

Ego quidem tanti facio gluten propterea quod absque dolore operam suam præstat, quod non contingit de futuris, ut ferè semper eo utar, nisi vulnus sit valde profundum, in iis partibus, in quibus potest in usum revocari, & ob id futuram adhibeo tantummodo in palpebrarum vulneribus, nasi, linguæ, labiorum, intestinorum, aurium, & hujusmodi, quia his non potest adaptari gluten. Non eo tamen modo illud conficio, quo plerique consueverunt, cum enim non statim exsicceatur, sed requirat temporis spatium gluten illud, & ante exsiccationem nullius sit usus, interim, nisi vulnus adduceretur, labia contraherentur, ac rigida evaderent, & minime obsequentia, ex quo deinde recta unio perfici non posset, cujus rei gratia & qui glutine dicto utuntur, prius futuram adhibent, postea gluten. Ego autem volens dolorem ex acus traiectione devitare, nec non & vestigia, quæ injecta puncta solent relinquere, aliud gluten paro, quod statim potest unum vulneris labium alteri copulare, non secus ac futura, & continere usque ad perfectam sanationem, hac ratione,  
Accipio

*Lachrymæ abietinæ unc. iiij.*

*Liquoris ulmini unc. iiij.*

*Resinæ pini*

*Picis Græcæ.*

*Navalis*

*Ceræ anæ unc. j.*

*Ammoniæ*

*Mastichæ*

*Tacamahacæ anæ drach. x.*

*Sarcocollæ*

*Lachrymæ sang. draconis*

*Gummi juniperini*

*Hederæ anæ drach. vj.*

*Radic. Consolidæ majoris*

*Aristolochiæ rotundæ*

*Bistortæ*

*Tormentillæ anæ drach. ij.*

Atque gummi, quæ liquari patiuntur, cum portione lachrymæ abie-




abietinæ ad ignem liquefacio, deinde reliqua, quæ ad ignem liquari solent, s. a. liquefacta addo, & optimè, ac diligenter commisceo, ut in unum corpus, quasi homeomerum redigantur, omnia deinde in alembicum conjicio, atque balneo calentis aquæ subjicio, ac liquorem omnem extraho, cumque existimo fœces omni humore aqueo esse exutas, ipsis adhuc præ calore liquefactis pulveres reliquos addo, ac diligenter commisceo, rursusque destillationi subjicio, donec omnis humor prorsus exierit, dein balneum, detracto igne, refrigerari permitto, accidit enim, ut materia, quæ in vase continetur, in solidum veluti ceratum coëat, quod est valdè tenax, neque calore humani corporis funditur, ut muneris sui obliviscatur.

Ubi ergo occasio postulat, extendo partem hujus cerati super corium tenue, vel, quod etiam melius est, quia non cedit, super linteum ex tela nova, tenui tamen, deinde forcipibus ex linteo hoc tot partes longitudine digitorum æquantes, vel longiores etiam, si partis natura ferat, atque latitudine, ligulam adstricturam, quot puncta requiri in vulnere videntur, vel non multò pauciora, primumque in vulneris medio colloco, ita tamen, ut uni tantum vulneris parti, seu lateri secundum dimidiam sui partem adhæreat, ex opposito vero eodem profus modo aliam ex his partibus appono, non tamen omninò è directo, sed à latere, ita ut post vulneris adductionem secundum latera possint se tangere, si id vellemus, deinde, portiones lintei, quæ nulli parti adhærent, apprehendo, unam quidem dextra, alteram verò sinistra, & utramque versus oppositum labium contraho, donec labia ad mutuū contactum adducantur, postea utranque portionem, quam manibus continebam, opposito labio, cui non hærebat, applico, primo tamen unam, dein alteram, & ut rectè adhæreant omni ex parte curiosè studeo. Una quidem ex ipsis satis esset, verum quia in altera retrahenda, quæ valdè adhæret, inverti posset labium, satius est, ut relinquatur, nisi quis oleo portionem illam lintei perungens, quæ parti adhæret, facilem redderet detractiōnem; sed tunc etiam nimis protrahitur operatio; & propterea utramque relinquere consuevi; illam tamen, cui præcipuum munus incumbit, longiorem, & in extremis latiorē



rem paro, ut fortius  
figuram æmulatur, al-  
teram, ut vix ad lata ex-



contineat, unde hanc  
teram vero brevio-  
rema illius, cui præ-

fertim labiorum adductio committitur, perveniat. Alias dein  
ex his portionibus subsequenter pono, ut inter unam, & alteram  
sit illud fere intervallum, quod inter puncta solet intercedere.  
Hoc modo prosequor, donec totum vulnus confutum fuerit. cir-  
ca futuram.

Hic modus, ubi natura partis administrationem ejus permit-  
tit, & vulnus non sit nimis profundum, reliquos valdè antecel-  
lit, tum quia citra dolorem perficitur, & pulchram cicatricem  
relinquit, tum etiam quia ad detectionem non cogit. Qui fu-  
tura utuntur plerique inspergunt facta futura super vulneris labia  
quosdam pulveres, quos agglutinantes appellant, paratos ex ma-  
stiche, bolo Arm. sang. draconis, sarcocolla, & hujusmodi, po-  
steaque albumen ovi subagitatum, ac stupis exceptum applicant,  
modo per se, modo cum rosaceo, aut aliquod aliud medica-  
mentum, quod vim habeat refrigerandi, & repellendi, atque,  
& interdum agglutinandi, alii siquidem posca utuntur, alii vino  
nigro austero, alii succo sempervivi, lactucæ, plantaginis, lin-  
teolis duplicatis exceptis, ac demum superpositis petiis, deligant  
fascia, ut medicamenta retineantur, quod etiam medicamenti ge-  
nus alii quotidie permutant, alii saltem in quarta, alii postero  
die, ut quando vulnera sunt in facie, nam in hoc casu, ut quàm  
primùm possint puncta auferre, ne turpem reddant cicatricem,  
postero die gluten apponunt, ablato priori medicamento, &  
aliud medicamentum admovent, iisdem viribus præditum, alii  
nimirum ceratum ex cerussa accipientes, alii diapalma vocatum,  
alii barbarum, alii ex minio, quod etiam nonnulli quotidie im-  
mutant usque ad perfectam sanationem. Quocunque autem mo-  
do adducatur vulnus, non solum ante opus diligenter omne pe-  
regrinum corpusculum est avellendum, verum etiam in opere  
ipso accuratè observandum, ne quid tale, ut pili portio, olei  
gutta, inter labia vulneris cadat, opus enim nostrum irritum  
faceret.



C A P U T L X.

*Quid agendum in simplici Vulnere post labiorum adductionem.*

**I** Actis fundamentis insistendo, postquam adducta fuerint labia ad mutuum contactum futuræ, vel glutinis ope, conveniens tegumentum apponendum est. Verum, quoniam medicamenta, licet non sint necessaria, conferunt tamen, si ea ad manus fuerint, aliquod ex eis deligere oportebit, quæ agglutinantia appellantur, plurium tamen dierum. Satis quidem esset, si quod apponitur medicamentum vim tantum haberet naturalem calorem fovendi, & roborandi, aut corpulentia, aut qualitate, attamen eligibilius erit, si præterquam quod nihil agglutinationi obsit, ut faciunt humida, & oleosa, aliquam etiam qualitatem habuerit, quæ eam adjuvet, quod facit facultas exsiccans, & adstringens, nam ejus ope defluens sanguis pro vulneratæ partis nutritione, ab omni superflua humiditate expoliatur, & ad quandam visciditatem reducitur, ut facili negotio fiat gluten, & ipsa quoque labia magis connectantur. Tale quidem medicamentum fuerit resina terebinthina, & abietina, potissimum densior; & si fluidiores fuerint, ut diutius perdurent, addita aliqua ceræ portione ad majorem compagem ignis beneficio sunt redigendæ. Tacahamacha Indæ optima est, debet autem oleo aliquo simili facultate prædito dissolvi, ut extendi super linteum possit, tale quidem oleum est de momordica, hypericinum commune officinarum, sed longè præstantius est, quod nos paramus, & ejus componendi rationem posterius afferemus. Pro qualibet autem uncia Tacahamachæ sufficient drachmæ duæ olei. Liquor in folliculis ulmi conclusus non ultimas partes obtinet, & maximè si densior factus fuerit. Balsamum Peruvianum est præstantissimum. Debet autem & ipsum dissolvi, quando nimis fuerit exsiccatum. Ex iis quoque & aliis insuper, quæ similem habuerint facultatem, verum consistentia ipsis non est talis, qualem convenire diximus, parari poterunt innumera medicamenta decentis consistentiæ, hujusmodi sunt symphitum, ophioglossum, lachryma sanguinis



guinis draconis, sarcocolla; equiseti folia, fanicula, pilosella, trinitas, aloes, brassica silvestris, equisetum, hypericum, plantago, polygonum utrumque verbascum, verbena, utrumque centaurium, bistortæ, & tormentillæ radices, & alia, quæ superius etiam fuere proposita, non solum solida, verum etiam liquida. Ceratum, quo ad adducendum labia utimur, optimum est. Ceratum palmeum, & de cerussa, & quod Barbarum appellatur, ac de minio, & tutia non reprobarem. Utor felicissimo cum successu tali unguento,

*℞. Lachrymæ abietinæ unc. j.*

*Tacahamachæ unc. s.*

*Balsami artificialis drach. ij.*

*Sarcocollæ.*

*Lachrymæ sang. draconis.*

*Radic. Consolidæ majoris ana drach. s.*

*Olei nostri hyperici. vel communis drach. iij.*

*Ceræ q. s.*

Dissolvatur cera cum abietina lachryma, & oleo hyperici, & cum aliquantulum densari cœperint, addantur paulatim balsamum, virgula ferrea, aut argentea semper commiscendo, & tandem pulveres. Servetur postea unguentum in vase vitreo, aut simili stricti orificii, quod diligenter claudatur, & ita servantur semper unguenta, in quorum compositionem ingreditur oleum aliquod stillatitium: immo si talia medicamenta, quando ignis requiritur, parentur in vase vitreo stricti orificii, quod insuper orificium diligenter claudatur, & calentis aquæ balneo, longe erit melius, promptè enim talium medicamentorum pars tenuior, si, ut in cæteris compositio fiat, in auras dissolvitur.

Aliud.

*℞. Terebinthinæ claræ*

*Lachrymæ abietinæ ana drach. vj.*

*Balsami Peruviani*

*Artificialis*

*Tacahamachæ ana drach. iij.*

*Ceræ q. s. M. & f. unguent. s. a.*

Aliud.



Aliud.

*℞. Radic. consolida majoris recent. lib. ℥.*

Diligenter expurgentur ab omni superfluo, & in frustula incisæ: bul. in aqua communi ad perfectam coctionem, inde contundantur, & setaceo trajiciantur, & rursus bul. cum melle despumato ad justam cocturam, tunc adde

*Radic. Tormentilla**Bistorta ana drach. ij.**Centaurea minoris**Sarcocolla**Aloes ana drach. j.**Misce, pulver. subtil. pulveris.*

Aliud.

*℞. Terebinthina**Lachryma abietina ana unc. ℥.**Olei hyperici drach. iij,**Sarcocolla drach. j.**Lachryma sang. draconis.**Centaurea minoris ana drach. ℥.**Cera q. ℥.**Misce pulver. pulveriz. & ℥. unguentum.*

Nec tamen citra delectum usurpari debent omnia medicamenta, cum mollioribus corporibus, & partibus, & exiguis vulneribus, ut superius etiam dictum est, imbecilliora convenient, *Rectus usus medicamenti.* contrariis vero fortiora. Linteum igitur, super quod extensum fuerit aliquod ex supradictis medicamentis convenientis longitudinis, & latitudinis, post adductionem labiorum apponendum est, sic ut & vulnus tegat, & aliquid etiam de circumstantibus partibus apprehendat. Deinde superponendi sunt plumaceoli, seu tot lintea duplicata; aut triplicata, quot satis sint ad fovendum naturalem partis calorem, & ad arcendas injurias ambientis, inde deligatio retentiva adhibenda est. Si tamen vulnus esset valdè profundum, antequam lintea pro tegumento apponantur, valdè erit ex usu, si deligatio agglutinativa dicta, quando pars eam admittit, adhibeatur; aut si vulnus fuerit per transversum, ea, quam Hippocrates libro de fract. & de iis, quæ in Med. Off.



Asciam appellat, futuram enim non leviter adjuvabit. Et Galenus pluribus auxiliis ad labia adducenda quandoque utebatur, unde 3. Meth. 4. dicebat: Quippe aut vinculo ex duobus initiis circumdato, aut futura, aut fibulis impositis, aut horum quibusdam, aut omnibus. quæ diducta sunt in idem adduces. Dicitur autem ascia deligatio, ut Galenus tradit libro de his, quæ in med. off. com. 2. tex. 2. quæ à rotunda parum declinat. Est autem rotunda, quæ in orbem affectam partem undequaque sine ulla declinatione complectitur. Dicta est autem ascia per translationem ab instrumento quodam fabrilis ascia appellato, quod parte sui extrema, qua cæduntur ligna incurvatum habet quasi supercilium quoddam crepidini simile, unde dicebat: Nam ubi jubet, pannos esse ad imitationem asciae membro circumjiciendos, à rotunda revolutione discernit eam, quæ declinando fabrilis asciam imitatur, neque enim ita vult injectionem pannorum plurimum obliquam esse administrandam, ut à rotunda, quam appellant, sit nimium distans, sed ut parum ad eam declinet, nempe quatenus sit satis ad ossa fracta firmissime continenda.

*Situs conveniens.*

Facta deligatione, nisi fascia, quantum satis est, vulnus teneat, pulvilli, aut lintea supra fasciam deligentur; inde in conveniente situ pars est collocanda, otiumque ac quies imperanda; & si muscoli sint læsi, videndum est præcipue, ne ullus ex ipsis laboret. Conveniens situs est, qui doloris est expers, & in quo vulneris orificium saltem secundum aliquam sui partem deorsum vergit. Quamvis in simplicibus vulneribus sæpius id parum referat, ut in quibus pauca excrementa generantur, præsertim si nostro modo curentur. Si tamen timeretur cupiosior proventus, conveniens effluxus esset parandus.

*Repellentium, & interceptantium usus.*

Ad inhibendam fluxionem proximis partibus, & iis præsertim, quæ vasorum radicem respiciunt, apponenda sunt repellentia, & interceptientia quoque si urgeat fluxionis periculum, in itinere sunt applicanda, quæ videlicet angustiores reddant vias, per quas fluenti humori transeundum est. In cuius gratiam utuntur aliqui unguento quodam defensivo appellato, quod quidem constat ex bolo Arm. sanguine draconis, oleo rosato, & huiusmodi. Verum hoc medicamentum paulo post exsiccat, & hæret parti ut,

non



non nisi vi possit detrahi, qua ratione & quia poros cutis obstruens calorem non naturalem in parte, cui hæret, accendit, potiusque occasionem fluxioni præbet, quam eam prohibeat, idcirco solis repellentibus uti consuevi, & ex iis, quæ fluxibilia sunt, eligere, cuiusmodi est posca, succus sempervivi, lactuæ, plantaginis, solani, omphacium, vinum granatorum, vinum austerum, & huiusmodi, quibus lintea tenuia duplicata, aut triplicata madefacio, & dictis partibus appono, æstate quidem frigida, hieme vero tepida, & ut crebro immutentur, jubeo. donec periculum fluxionis transferit. In leviori periculo fluxionis oleo rosaceo sum contentus, quo modicè calente proximas partes inungo, eas enim consolari, & roborare potest, sed & modicè digerit, atque repellit, magis autem repellit, quod ex olivis immaturis conficitur, omphacinum dictum. Vulnus ipsum usque ad perfectam agglutinationem servandum est tectum, nisi pro labiorum adductione adhibita fuerit futura, & ob id ante perfectam agglutinationem solvere vulnus oporteat, ut scindantur puncta, filaque removeantur, potissimum autem id observamus in facie, quoniam puncta diutius retenta cicatricem turpem reddere consueverunt. Sed de faciei vulneribus suo loco. In aliis partibus, in quibus non ita habetur decoris ratio, non prius scindenda sunt puncta, quam adeo agglutinatio processerit, ut labia citra opem futuræ adducta permaneant; nisi futuræ loco gluten sit apponendum, hoc enim in casu citius removeri potest futura.

Hac curandi via patet, nullum eorum prætermitti, quæ necessaria esse ad simplicium vulnerum agglutinationem superius dicebamus, quantum tamen ad partis procurationem attinet, nam peregrina omnia corpuscula auferuntur, adducuntur labia ad mutuum contactum, & adducta conservantur, præcavetur etiam, ne quid labiis vulneris intercidat, & ne in posterum etiam aliquid extranei inter vulneris labia colligatur, ut ichor, & purulenta materia, prohibemus, tum medicamentis excrementitiam humiditatem absorbentes, tum ut à naturali calore roborato digeratur, procurantes. Et parantes etiam idoneum effluxum, si is fuerit necessarius. Conservatur quoque salubris substantia partis, cum excrementa omnia absorbantur. Sed & hac altera ratione, quia



fluxio inhibetur, quantum est ex parte vulnerata, qua maximè infalubris redditur. Robori tandem naturalis caloris consulimus, vulnus rectum servantes, & medicamenta naturali calori amica diligentes. De totius procuratione jam actum est in superioribus.

## CAPUT LXI.

*De curatione vulneris cavi.*

**S**I vulnus fuerit cavum, ita ut necessarium sit, carnem generari pro ejus sanatione, sive quia à telo, & vulnerante causa fuerit dempta, aut lacerata, & contusa, & omninò taliter affecta, ut necessarium sit, eam in pus verti; sive quia labia adeo dissideant, vel rigida sint, & contracta, aut vulnus adeo sit profundum, ut nulla arte secundùm omnem ejus partem adduci possit, & ideò requiratur carnis generatio, qua cavitās repleatur, & ita restituatur pristina unitas, quando res transigi non potest citra puris, & excrementorum generationem, quicunque curationem vulnerum profitentur, in hæc præsertim oculos dirigunt; non omnes tamen eodem modo illis consulunt, alii siquidem siccis medicamentis curant, ut quam paucissimum pus generetur, Galenum forsan imitati, qui passim exsiccanda esse vulnera contendit. Alii verò prius suppurantibus utuntur, ut puris generationem adjuvent, deindè abstergentibus, postea sarcoticis, ut eorum ope cavitās repleatur, & tandem epuloticis, ut cicatrix inducatur, qua via constat, processisse ipsum Celsum, ut videre est lib. 6. cap. 26. & Avicennam, & reliquos principaliores Arabes. Utraque tamen secta Hippocratem ducem sequi videtur, qui utrumque modum insinuavit lib. de ulc. ubi dicebat: At vero recentia vulnera omnia tum ipsa, tum circumsitæ partes, minimè inflammationem incurrent, si quis quam citissimè suppuret, & pus ab osculo ulceris non interceptum supprimatur: aut si quis avertat, ut omninò non suppurentur, præterquam necessario, eoque paucissimo pure, & sicca sint quam maxime ex medicamento non molesto. Qui igitur exsiccationem sibi proponunt, aqua ardenti, & aqua Balsami, & arte factò Balsamo, & aliis oleis ex multi-  
plici



piici infusione rerum exsiccantium paratis, cujusmodi est, quod oleum Hispanæ vulgo appellatur, & oleum quoddam magistrale, hyperici potissimum uti consuevere quibus linamenta illiniunt, aut imbuunt, & per vulnus disponunt, aut si vulnus est profundius, portionem horum medicamentorum calentem in cavitatem instillant, & orificio ejusdem existente angusto, turundam simili medicamento imbutam imponunt. Extrinsecus etiam linteum apponunt eodem medicamento refertum. Tandem pulvillos, seu lintea superponunt, ac deligant, & hoc modo quotidie non semel tantum, sed & bis vulnus tractant. Alterius autem sectæ, ut suppurationem promoveant, primis diebus utuntur digestivo appellato medicamento, quod aliqui conficiunt ex terebinthina lota, & ovi vitello, additur etiam quandoque farina tritici, & pulvis ex thure, quandoque etiam parum croci, aliqui vero ex oleo rosaceo, vel communi cera, & terebinthina, ad ignem mistis in æquali portione, quamvis hiemali tempore minus ceræ imponatur, ut in cæteris unguentis, deinde aqua communi, vel rosacea, vel malvarum ipsum lavant, donec albescat. Sunt tamen, & aliqui, qui ad pus movendum solo rosaceo oleo utuntur, quo imbuta linamenta vulnere admovent.

Si verò contusio insignis carni sit adjuncta, ut contingit in vulneribus bellico fulmine illatis, aliqui digestivum parant ex oleo communi, vel rosaceo, vel terrestrium vermium, terebinthinaque lota aqua communi, vel malvarum, necnon & recenti butyro, vel axungia porcina, ut majorem vim habeat suppurandi.

In usu igitur suppurantium persistunt, quotidie semel, & bis ea permutantes, donec vulnus dolore vacet, & omnis rubor circum vulnus existens evanuerit, ipsaque labia mollia æqualiter evaserint, inde ne vulnus sordidum fiat ad abstergentia transeunt, variam seligentes materiam, prout varia est cujusque praxis, unde alii unguento quodam mundificativo appellato utuntur, alii terebinthina, & melle rosaceo, alii melle crudo, alii ex farina hordei, melle crudo, vel rosaceo, succo apii, & croco detergens parant. Alii videntes modicam absterfionem satis esse in vulneribus digestivo appellato permiscent farinam hordei, & mel rosaceum,



ceum, vel modicum unguenti Iſidis, aut Apoſtolorum, aut Damasceni, & eodem proriſus modo hiſ utuntur, quo digeſtivis appellatiſ. Mundificato vulnere, quod cognoscunt ex rubedine vulneriſ ſine dolore, & ex eo, quod vulnuſ medio modo ſe habet inter humiduſ, & ſiccum, ut cavitaſ carne repleatur, ad ſarctica deveniunt, & alii unguentuſ reſinuſ appellatuſ uſurpant, alii unguentuſ de betonica. Alii pulveribuſ utuntur, quos conficiunt ex aloë, & thure, iride, ariſtolochia rotunda, myrrha, thucia, panace, ſarcocolla, & huiuſmodi aliis, quibuſ indoctiores & ea, quæ adſtringunt, permilcent, cujuſmodi eſt maſtix, ſanguis draconis, boluſ Armen. terra Lemnia, terra ſigillata, & huiuſmodi, ignorant, vulnuſ cavuſ adſtringi non debere, ut ſuperiùſ ex Galeno etiam oſtenſuſ eſt. Scio viroſ barbam canam habenteſ hac via etiamnuſ incedere, quàm optimuſ eſſet, ſi dedicerent. Sed turpiùſ malum moduſ dedicere exiſtimant, quam in errore perſiſtere, ac mori. Ipiſi viderint. Apud Bononieneſ maxime ex uſu eſt pulviſ ex æquiſ portioneſ myrrhæ, thuriſ, & aloëſ paratuſ. Quamviſ ſint non pauci, qui non omneſ uno calceamento calceant, ſed ſiccioribuſ corporibuſ, & partibuſ humidiora, & humidioribuſ, ac majoribuſ vulneribuſ ſicciora adhibent medicamenta, contrariis contraria juxta illud Gal. 3. Meth. 4. In ulceribuſ quanto natura corporiſ eſt humidior, tanto medicamentiſ minus ſiccantibuſ eget, quanto ſiccior, quæ vehementiùſ ſiccent. & 3. Meth. 7. Pariſ, quæ ſiccioſuſ temperamentuſ obtint, quæ magiſ ſiccant, poſtulat, quæ humidioſuſ, minus ſiccantia. Et 3. Meth. ult. Magna ulcera iſiſ, quæ valentiuſ ſiccant, curabiſ, parva verò, vel quæ moderatè ſiccent, ſanabunt, & 4. Method. 1. Si humidior, quam pro naturali habitu, caro fuerit, medicamentoruſ facultaſ ad ſiccioſuſ eſt transferenda. Sicuti etiam obſervat, dum totuſ eſt humidioriſ temperamento prædituſ, & pariſ ſiccioriſ, utriſque enim à mediocri æqualiter labentibuſ, tale adhibent medicamentuſ, quale ſi vulnuſ eſſet in mediſ temperamenti parte corporiſ mediocriter temperati, tantuſ verò ad alteruſ extremuſ vergenſ, quantum particula totiuſ temperamentuſ excedit, modo excedat, juxta illud Galen. 3. Meth. 8. Si laborantiſ temperamentuſ humidioſuſ eſt, ipſa verò ægra particula



cula ex eorum sit numero, quæ sicciore sunt, siquidem quanto ægri temperamentum iusto est humidius, tanto particula iusto est sicciore, tale pharmacum adhibendum, quale si ulcus in mediæ temperamenti particula corporis mediocriter temperati consisteret: Sin sicciore debito particula magis fuerit, quam corporis temperamentum iusto est humidius, utique in tantum intendi siccitatem medicamenti conveniet, quantum particulæ temperamentum totius temperamentum excedit. Ubi autem pulveribus utuntur, eos vulnere inspergunt, superponuntque fila evulsa sæpius sicca ad imbibendam profluentem humiditatem, quandoque etiam aliquod ex dictis unguentis, vel ceratum quoddam exsiccans, ut est diapalma appellatum, ceratum barbarum, de betonica, & huiusmodi. Quotidie autem, & semel, & bis medicamenta imponunt. Repleta vulnere cavitatem, ad reparandam cutem vel potius ad aliquid parandum, quod vicem cutis gerat, postquam vera cutis, ut membrum spermaticum, regenerari non potest iis, quæ carnem vehementius siccant, & adstringunt, utuntur, quo caro exsiccata, & indurata reddatur, in modum cutis juxta Galeni dogma 3. Meth. 5. & fiat cicatrix. Ad hoc igitur usurpant varia cerata, potissimum autem diapalma, barbarum, de cerussa, de minio, & de thuria, hæc super linteam extendentes; Plerumque tamen ipsi supponunt filamenta evulsa, arida, ut imbibant, si quid emanaverit humiditatis, pariterque quotidie vulnus curant.

At juxta methodum nostram curationem instituentes, cum natura ea sit, quæ carnem generat, pus movet, & præterea eadem pellat excrementa, quæ naturæ opus impediunt, illud tantum necessarium est, propositum habeatur, tueri, adjuvare, & roborare naturalem calorem, cujus in omni curandi modo parum admodum habetur ratio, & excrementis idoneum effluxum *Quid agendum in vulnere cavo.* parare, quantum scilicet ad procurationem vulnere attinet. Nam & hic procul dubio si superfluat sanguinis fluxus, suppressendus est, si peregrina corpora intra vulnus contineantur, sunt extrahenda, & ne fiat fluxio ad vulneratam partem, prohibendum.

Oblato igitur vulnere cavo, illud in primis considerandum *Subfluxiones consideranda.* est, an adsit conveniens effluxus pro expurgatione excrementorum, quæ necessario generabuntur; nisi adsit, parare cum oportet.

H h h

bit,



bit, aut ejusdem, aut contrarii loci divisione, aut turundæ impositione, quemadmodum superius traditum est. Vulnere tali existente, ut commodè effluere possit materia, videndum est, an cavitas ipsius reddi possit minor, absque quod tollatur idoneus effluxus, hoc enim non contemnendum caloris naturalis auxilium foret, quia minus aëris vulnus admitteret, & juxta se posita labia proprium calorem sibi invicem communicant, & minori carnis portione vulnus repletur, ut omittam, quod ad cicatricis decorem. Reddi autem minor cavitas potest, quando causa vulnerans non omnino substantiam carnis detraxit, aut consumpsit, sed secans, aut lacerans solummodo effecit, ut labia nimis à se invicem distarent. In hujusmodi casu adducenda sunt labia, non tamen ad mutuum contactum, & exactè, sed aliquod interstitium inter ipsa relinquendum, ut excrementa commodè possint expurgari. Fiet autem talis adductio, vel futura, vel glutine: plerique vulnus exactè consuunt, præter quam in decliviori parte, in qua turundam imponunt, ut foramen ad puris expurgationem hians detineant. Sed turundarum usus reprobatus est, & in nostra methodo nullum habet locum, propterea satis est interstitium relinquere. De cætero tractandum est vulnus, ut reliqua cava.

*Quomodo  
tractandum  
vulnus.*

Sic autem tractari omnia debent, ut voti nostri compotes simus; Accipiendum est spatula medicamentum quodpiam, si ad manus sit, quod vim habeat calorem naturalem consolandi, mordacitatis verò considerandæ sit expers, mediocris consistentiæ, & cujus vires non statim evanescant, sed aliquanto tempore perdurent, aut simplex, aut compositum, & ad ignem candelæ moderatè calefaciendum, sic ut liquari incipiat, & labiis vulneris illiniendum, ita ut portio medicamenti per oras vulneris ad cavitatem possit descendere. Si fuerit liquidius, calefactum instillari poterit, dein, si vulnus ex gravioribus fuerit, fila avulsa eodem medicamento imbuta extrinsecus ori vulneris superponenda; inde linteo, super quod extensum fuerit medicamentum aliquod ejusdem facultatis, sed plurium dierum, tegendum est vulnus. Poterit & sine filamentis illis negotium transigi, præcipuè si vulnus ex gravioribus non fuerit. Proximas partes litu olei rosacei æstate quidem



quidem tepidi, hieme vero calidi consolari oportebit, immo super linteum, quod unguentum excepit, ponendum aliud tenue linteum dicto rosaceo madidum, quod adjacentes partes comprehendat. Tandem addendi pulvilli, vel tot lintea, quot ad complementum tegumenti sufficiant, cavendo, ut aliàs dictum est, ne evadat nimis grave, & onerosum, & fascia idonea ad retentionem deligandum. Convenienti quoque situ, & figuratione partis curandum, ut pars citra dolorem jaceat, & orificium vulneris saltem secundum partem, per quam speremus posse materiam effluere, deorsum spectet. In eo vero, quod sequitur, tempore ad inhibendam fluxionem proximis partibus adhibenda sunt repellentia, sæpeque immutanda, ut superiori capite dictum est. Communis ferè usus est, ut primo apparatu stupis utantur albumine ovi subacto madefactis, quibus cavitatem replent, & alias postea extrinsecus apponunt, tum, ut sanguinem supprimant, tum ut etiam repellant, & fluxionem arceant, immo dicto albumini addunt aliqui, si fluxus sanguinis præsertim urgeat, pulveres constringentes, bolum Armen. terram sigillatam, sang. draconis, thus, aloen, omnia tenuissimè pulverizata accipientes, & tenuiores etiam leporis pilos minutim incisos, vel combustos, & hujusmodi. At de ratione supprimendi sanguinem suo loco pertractabitur. Certum est ejus fluxum, quando superfluit, ad se curam trahere.

Si tamen primo apparatu compesci sanguis possit absque medicamento impositione, quod sæpe consuevi ego facere sola digitorum impositione, quando majora vasa, & præcipuè arteriæ non sunt dissectæ, aut laceræ, id longe melius erit, quam stupatas illas adhibere, nam exsiccatae contrahunt vulneratas partes, & infectæ, ac dolorificæ evadunt; Et si pars, cui apponuntur, pilos habuerit, non possunt postea, nisi vi & multo tempore detrahi, & quod ad fluxionem attinet, ei melius consulitur, si dolorifico hoc medicamento prætermisso congruo tegumento, ut naturali calori amico, vulnus foveatur, & proximis partibus repellentia adhibeantur, ut dictum est in vulnere simplici, quamdiu inflammationis periculum perdurat. Hinc ego rarissimè ad stupatas confugio, & tunc tantum, quando alio meliori modo supprimere



mere sanguinem non licet, aut amplum reddendum est vulnus in posterum diem propter aliquam chirurgicam operationem, quamvis & hoc fieri possit ope spongiæ in frustra incisæ, & compressæ, & linamentorum aliis medicamentis illitorum.

*Medicamenta idonea.*

Medicamentum, quod spatula accipiendum diximus, & vulneris labiis illiniendum, ac instillandum, & filamentis etiam excipiendum, erit veluti terebinthina, & abietina lachryma, valdè enim probandum est, ut medicamentum sit ex iis, quæ aliquam vim adstringendi habeant, qua naturalis caloris diffilationem magis prohibeant.

*Adstringentia an locum habeant in cavis vulneribus.*

Nec me carpat quispiam in verbis, quod modo adstringens medicamentum in cavis vulneribus comprobem, cum tamen non multo ante eos reprehenderim, qui vulnera cava adstringentibus curant, hi etenim medicamentis curationem faciunt, iisdemque excrementorum curam committunt, unde & volunt, ut perpetuo vulnera medicamentorum qualitate afficiantur; at nos nihil aliud, quam naturæ robur intendimus, & à principio, quando adhuc non generatur effatu digna excrementorum copia, omni ratione caloris naturalis robori consulimus, idcirco & semel medicamentum imponimus, quod adstrictione sua naturalis caloris dissolutionem potest prohibere, & nihil officere, affigendo magis sordes ipsi vulnere, nam paulò post vis adstrictiora vulnus deferit. Poterit etiam dictis resinis permisceri oleum hyperici commune, & aqua ardens, præsertim si vulnus fuerit profundius, sic enim facilius ad vulneris fundum substantia medicamenti perveniet, & hæc ipsa robur adauget naturalis caloris. Quando vulnus fuerit ex majoribus, non erit improbandum, si terebinthina, & abietina lachryma, & hyperici oleum, nec non & aqua ardens æquis portionibus misceantur, & quando profundum est, ac stricti orificii, maxime probandum, si liquetur aqua ardenti, nam tenuius factum ad penitiores partes facilius permeat. Si cui etiam placuerit aliquod ex dictis medicamentis addere, quæ à totius substantiæ proprietate calorem naturalem adjuvant ad propria munia obeunda, non reluctabor, non enim probo, ut sola usurpentur; nam aut nimis fluida sunt, & substantiam habent, quæ citò evaporat, aut nimis densam, ut illiniri non possint, igitur  
aliorum



aliõrum miscella ad convenientem consistentiam sunt reducenda : si tamen quidpiam esset, quod justam haberet consistentiam ; absque aliorum miscella in usum posset revocari. Addetur ergo, neque cum exigua utilitate terebinthinæ, & abietinæ lachrymæ oleum nostrum de hyperico, balsamum arte confectum, aqua balsami, balsamum Perunianum, oleum Hispanæ vulgo appellatum, quod aliqui connumerant inter ea, quæ mira quadam facultate vulneribus conferunt ( ejus autem descriptionem, sicuti & artificialis balsami, & olei nostri de hyperico in fine hujus capituli, subjungam ) exempli gratia.

℞. *Terebinthina clara.*

*Lachrymæ abietinæ ana unc. j.*

*Balsami artificialis unc. s. Misce.*

*Aliud.*

℞. *Terebinthina clara unc. j.*

*Balsami Peruniani.*

*Olei nostri de hyperico, vel Hispanæ ana drac. ij. m.*

*Aliud.*

℞. *Terebinthina.*

*Lachrymæ abietinæ.*

*Olei nostri de hyperico.*

*Aquæ balsami ana p. eq.*

Si Terebinthina, & abietina lachryma non fatis sint ad prohibendam evaporationem artificialis balsami, aliquid ceræ addendum erit, quæ magis liget substantiam illius. Si vulnus fuerit cum insigni carnis contusione, & attritione, ita ut necessarium sit, contusam carnem suppurare, non erit improbandus usus aliqujus medicamenti, quod carnem contusam facilem ad suppurationem reddat, moderatè videlicet calefacientis, & humectantis, cujusmodi est id, quod digestivum lotum appellatur, tetrapharmacum, unguentum basilicon, & id quod ex oleo rosaceo, terebinthina aqua malvarum lota, butyro recenti, & cera paratur, ipsum quoque butyrum recens accipi poterit. Poterit etiam parari unguentum ex oleo amygd. dul. terebinthina lota, & cera, & aliud ex oleo sem. lin. & violaceo in quibus decocti fuerint catuli recens nati, & terrestres lumbrici, terebinthina lota, & cera ;



Attamen in hoc non multum laboro, sed in eo maximè ut calorem naturalem foveam, & ejus dissolutionem prohibeam, ideoque in caloris naturalis penuria, vel imbecillitate appono emplastrum circumfisis partibus, quod vires naturalis caloris adaugeat, & una excrementa generanda respiciat, vim habens illa absumendi: Parare autem consuevi hoc emplastrum ex farina hordeacea, & fabacea, pulvere florum camæmeli, rosarum rubearum, dictamni Cretici, anethi, rosaceo, & hypericino oleo, terebinthina, & posca, vel vino rubro adstringente. Interdum accipio summitates hyperici cum floribus, & folliculis, si haberi possint, plantaginis, & verbasci, ac verbenæ folia, & ex posca, vel vino rubro adstringente decocta contundo, iisdemque myrrham, thus, mastichem, terebinthinam, camæmeli flores, rosaceum lumbricatum, & hypericinum oleum addo, & cum farina fabarum, & hordei emplastrum conficio. Ex tacahamacha pariter, gummi Elemi, thure, myrrha, rosis siccis, terebinthina, rosaceo, omphacino, & hypericino oleo conficitur emplastrum non parum efficax, modo absit inflammatio.

*Tempus solutionis.*

Solutio, ut alias dixi, usque ad id tempus est differenda, in quo rationi consonum est, vulnus esse carne repletum, vel parum ab hoc statu abesse, nisi cui placuerit in intermedio tempore quando vulnus ex iis fuerit, quæ tardius replentur carne, vulnus inspicere aliqua de illis causis, quas ibidem attuli si ad vulneris repletionem differatur solutio, & quidem comperiatur vulnus carne repletum, vel parum abesse, quin cavitas sit repleta, facta diligenti abstersione adjacentium partium, & vulneris exsiccatione ex mundo linteo, aliquod imponendum erit epuloticum, cujusmodi sunt cerata superius dicta, videlicet diapalma, de cerussa, barbarum, de thutia, & hujusmodi. Et quamvis non omninò repletum carne sit vulnus nihil refert, nihil potest obesse epuloticum, quia paulo post repletur vulnus. Et superponantur tot lintea, quot ad caloris tutelam sufficiant, ac deligatio retentiva adhibeatur deinceps. Quod ad solutionem attinet, observandum, quod capite, de inducenda cicatrice dictum est. Plerumque tamen una, aut ad summum secunda medicatione cicatrix contrahitur. Communiter fit solutio de tertio, vel de quarto

in



in quartum diem. Si intermedio tempore fiat solutio, eodem prorsus modo curandum erit vulnus, ac primo apparatu factum est, nisi quod medicamentum quod primo fuit appositum, suppurans fuerit, tale enim secunda vice apponi non debet.

Absterfis igitur circumfritis vulneris partibus, & ipso vulnere exsiccatō, parum enim invenies, quod abstergi postulet, & si quid esset, eodem linteo, quo vulnus exsiccas, non minus absterges, labiis vulneris acceptum spatula medicamentum, terebinthina videlicet, aut abietina lachryma, vel unguentum nostrum, aut simile aliud igni candelæ calefactum, labiis vulneris adhibeatur, ut prima vice peractum fuit, filamentaque, si placuerit, eodem medicamento illita, modicè prius calefacto, extrinsecus ori vulneris apponantur, & desuper linteum, super quod extensum fuerit aliquod exsicicans ex superius positis videlicet aut terebinthina, aut lachryma abietina densior facta, vel à tempore, vel ceræ permixtione, vel unguentum nostrum, linteaue apponantur, aut plumaceoli, veluti etiam primo apparatu fuit factum, ad fovendum, & roborandum, ac defendendum. Et eadem prorsus deligatio adhibeatur, & in eodem situ, ac figuratione pars contineatur. Inde ad repletionis tempus differatur solutio.

Oleum nostrum de Hyperico sic paratur.

*Rx. Summitatum hyperici m. iij.*

*• Ophioglossæ.*

*Consolidæ majoris.*

*Equiseti ana m. j.*

*Vini albi odori & potentis lib. v.*

Contundantur herbæ, & dicto vino macerentur per 24. horas, ore vasis diligenter obturato, deinde facta expressione, & colatura, par quantitas dictarum herbarum assumatur, & fiat altera infusio, & sic tertio. Facta postrema expressione, & col. adde vino dicto.

*Olei antiqui lib. vj.*

*Summitatum hyperici m. ij.*

*Ophioglossæ.*

*Herbæ Regina vulgo appellata.*

*Con-*



*Consolida majoris.*

*Cardui benedicti ana m. j.*

*Radic. Dictamni albi.*

*Consolida majoris.*

*Aristolochiæ rotundæ.*

*Tormentilla.*

*Bistortæ ana unc. s.*

*Grani tinctorii drach. ij.*

*Sem. hyperici drach. vj. Misce.*

Contusis contundendis & macerentur balneo calentis aquæ, ore vasis obturato per 24. horas, postea bul. duplici vase ad vini consumptionem, deinde facta expressione, & colatura, sacculo prius vino albo optimo madefacto, adde olei.

*Summitatum hyperici m. ij.*

*Ophioglossæ.*

*Herbæ Regina.*

*Consolida.*

*Matrissilvæ ana m. j. Misce.*

Contusis herbis, & f. inf. in balneo calentis aquæ per 24. horas, postea facta expressione, & col. ut prius, par quantitas dictarum herbarum accipiat, & fiat altera infusio, ut supra, & sic tertio, factaque postrema expressione, & col. adde olei.

*Florum hyperici m. ij.*

*Betonica.*

*Pimpinella.*

*Pilosella.*

*Trinitatis ana m. j.*

Ex his fiant tres infusiones, ut supra dictum est, facta postrema expressione, & col. adde olei.

*Florum hyperici m. ij.*

*Valeriana.*

*Equiseti.*

*Cardui benedicti.*

*Stellariæ ana m. j.*

Ex his f. tres inf. ut supra facta ultima expressione, & col. adde olei.



*Folliculorum hyperici m. ij.*

*Consolida.*

*Centaurea minoris.*

*Viticella.*

*Vincepervinca ana m. j.*

Et f. pariter tres inf. hac ratione, tribus diebus vas, quod vitreum esse debet, Soli exponatur, quarto verò die balneo calentis aquæ detineatur, ut ibidem 24. horas moretur, postea f. expressio, & col. & oleo rursus addantur.

*Folliculorum hyperici, qui jam ad maturitatem pervenerint m. iij.*

*Centaurea minoris m. j.*

*Fructus balsamine n. vj. f. ut supra.*

Facta postrema expressione, & col. oleo adde.

*Dictamni Cretici unc. j.*

*Radic. dictamni albi.*

*Consolida majoris.*

*Aristolochia rotunda.*

*Iridis Illirica.*

*Arundinum.*

*Bistorta.*

*Tormentilla ana drach. vj.*

*Grani tinctorii drach. ij.*

Et f. tres inf. hac ratione, exponatur vas Soli sex dies, postea per duos dies in balneo calentis aquæ detineatur, inde fiat expressio, & col. & sic fiat ter. Tandem facta postrema expressione, & col. adde oleo.

*Olei stillaricii de terebinthina.*

*De lachryma abietina ana lib. s.*

*Sem. hyperici unc. j.*

*Radic. Consolida.*

*Aristolochia.*

*Dictamni albi.*

*Tormentilla.*

*Bistorta.*

*Iridis ana unc. ij.*

*Grani tinctorii unc. j.*



*Myrrha.*

*Thuris ana unc. i. s.*

*Sarcocollæ.*

*Gummi juniperini.*

*Aloes ana unc. s.*

*Poma balsamine n. xii.*

*Balsami Peruniani unc. ij.*

Poma incidantur, cætera contundantur, & cum oleo misceantur, & vas toto tempore hiberno detineatur sub fimo equino, inde extrahatur, & facta expressione, atque col. usui servetur in vase vitreo, cujus osculum diligenter obturetur.

*Balsami  
artificiosi  
descriptio.*

Balsamum præstantissimum arte sic paratur.

*R. Gummi Elemi unc. iv.*

*Balsami Peruniani unc. iij.*

*Tacamahachæ.*

*Carannæ.*

*Liquoris in vesiculis ulmi contenti ana unc. ij.*

*Olei laurini.*

*Styracis liquida.*

*Myrrha ana unc. i. s.*

*Thuris albi unc. j.*

*Gummi hederæ unc. j.*

*Lasæris odorati.*

*Ladani.*

*Styracis calamitæ pinguis.*

*Ammoniæ.*

*Edellii.*

*Opopanacis.*

*Galbani.*

*Sarcocollæ ana drach. vi.*

*Radic. Aristoloch. rotund.*

*Imperatoria.*

*Angelica.*

*Dictamni albi.*

*Consolida.*

*Acori.*

*Ridis.*



*Iridis.**Tormentilla.**Bistorta.**Sem. hyperici.**Citri.**Cortic citri ana unc. s.**Cinnamomi.**Cariophyllorum.**Nucum myrticarum.**Macis ana unc. j.**Mastichis.**Aloes.**Lachrymæ sang. draconis.**Grani tinctorii ana unc. s.**Dictamni Cretici unc. j.**Olei glandis unguentaria unc. iij.**Baccarum juniperi unc. i. s.**Ex cera unc. ij.**Ex resina pinea unc. i. s.**Terebinthina claræ.**Abietina lachrymæ ana lib. i. s.**Aquæ ardentis electissima lib. vi.*

Misce diligenter liquatis gummis, quæ liquari possunt, seorsum cum portione terebinthinæ, cæteris verò aridioribus grosso modo pulverizatis, conjicianturque omnia in retortam, quæ balneo calentis aquæ per tres dies detineatur, inde luto obducatur, & in æstuario maneat, donec exsiccatum sit lutum, postea igne cineritio s. a. extrahatur oleum, exhibit autem primò aqua, quæ seorsum debet asservari, & est ea quam balsami aquam dicunt, deinde exhibit oleum, quod balsamum dicitur. Verum quidem est, quod cum aqua illa exit etiam olei portio, quod oleum balsami dici solet, sicuti & cum balsamo ipso portio aquæ nigricantis, quæ mater balsami dicitur, & unumquodque horum seorsum debet servari.

Oleum, quod Hispanæ appellant, sic paratur.

℞. Olei olivarum antiqui lib. iij.

Oleum Hi-  
spanæ.



*De terebintbina lib. ij.*

*Thuris lib. j.*

*Valeriana.*

*Hyperici.*

*Cardui benedicti ana lib. s.*

*Myrrhæ electæ unc. j.*

*Cocci infectorii unc. iv.*

*Resinæ pini recent. unc. iij.*

*Vini Malvatici lib. iij.*

Valeriana colligatur mense Majo, & abjiciantur radices. Hypericon colligatur mense Iulio cum floribus & seminibus. Herbae igitur manibus confractæ, & in mortario aliquantulum contusæ infundantur in vino malvatico posito in olla terrea vitro obducta, cujus tertia pars omnibus in ea positis vacua permaneat, per quatuor horas, deindè superpone coccum infectorium aliquantulum fractum in mortario unâ cum oleo, absque cooperimento bul. lento igne, donec vinum ferè evanuerit, idque animadvertatur, ne herbae cumburantur. Auferatur postea ab igne, & dum adhuc valde calet, sacculo vino malvatico madefacto exprimantur herbae. Et vas, in quo facta fuit ebullitio, diligenter abstergatur, neque enim penitus exsicceetur, nam debet relinqui vinum, quod adhæret, & in eodem rursus ponatur oleum, & ad ignem ponatur cum oleo de terebinthina, vel abietina lachryma. Et quando propè erit, ut bulliat, addetur myrrha tenuissimè pulverizata, & in mortario cum aliquantulo ex oleo in vase existente ad ignem liquefacta. Addatur pariter resina eodem oleo liquefacta, prius tamen percolari linteo debet, & thus tenuissimè pulverizatum, omniaque curiosè misceantur, & ubi parumper bul. auferatur vas ab igne, & ubi refrixerit, servetur in vase vitreo, nulla facta colatura, & Soli per 15. aut 20. dies exponatur. Valere dicunt ad vulnera apostemata, bubones, strumas, hæmorrhoides, combusta, contusiones, & casus ab alto. Venenis etiam conferre dicunt, si per os assumatur, & peste correptis, pariter doloribus tam calidis, quàm frigidis, & ipsi erysipelati, facta ex eo inunctione.

Unguentum nostrum sic paratur.

*℞. Olei*



℞. Olei nostri ex hyperico lib. j.

Ceræ aqua balsami lotæ unc. iij.

Liquefiant simul in vase vitreo stricti orificii, liquefactis adde. *Unguenti nostri de- scriptio.*

Balsami nostri lib. j.

Gummi Elemi unc. iij.

Balsami Peruniani.

Tacahamachæ Indæ.

Carannæ ana unc. ij.

quæ quidem gummi dissolvi seorsim debent oleo nostro de hyperico.

Ammoniæ.

Galbani, eodem prorsus modo dissolutorum ana unc. s.

Myrrhæ.

Thuris.

Aloes.

Gummi hederæ ana drach. ij.

Radic. Consolidæ.

Aristolochiæ.

Bistortæ.

Tormentillæ ana drach. i. s.

Dictamni Cretici drach. iij.

Scordii drach. ij.

Humane pinguedinis præparata unc. ij.

Pinguedinis cygni unc. j.

Misce, & f. unguentum.

Asserveturque in vase vitreo, vel argenteo stricti orificii, quod etiam diligenter obturari debet, ne expiret. Ex iisdem confici ceratum posset, addendo resinam pini, & ceræ quantitatem augendo. Qui artem callet componendi medicamenta, alia conficit non minus utilia. Victus ratio in hisce vulneribus conveniens ex universali tractatione petenda est. Alia pariter fluxionis præsidia ab eadem requirantur. In gravioribus verò locum habent, & vulnerariæ portiones, quæque ingesta robur adjiciunt nativo calori, de quibus in superioribus actum est.



## CAPUT LXII.

*Quid agendum, quando vulneratus offertur secundum communem modum curatus.*

**D**iffert valdè, si quis à principio vulnerati curationem suscepit, vel postquam pluribus diebus ab alio secundum communem illum modum fuerit curatus. A principio siquidem licet calor naturalis imbecillior sit factus ob alias adductas causas, nihilominus imbecillitas est longè minor, quàm si jam pluribus diebus communi via quis curando incesse- rit: ob crebram enim solutionem, atque detectionem magis diffatur caloris substantia, & magis ejusdem qualitas hebetatur, ac frangitur. Præterea imbecillitas, quæ à principio occasione vulneris oritur, non adeò obest, ut quæ in progressu ob frequentem detectionem accidit, nondum enim in effatu digna quantitate pus, & alia excrementa generantur, & ex consequenti neque adeo valida expultrice est opus ad eorum propulsionem. Interea autem ob tegumentum, & vim medicamenti calor naturalis partis fit robustior, atque ad propriam naturam redit, regenerata ejus substantia, & prohibita ejus diffatione à tegumento, atque qualitate vegetiori reddita. Quapropter eum tempus est, ut pus copiosius generari incipiat, jam tantum roboris acquisivit calor naturalis, ut munia sibi debita, & quæ ad vulnere sanationem requiruntur, probè possit exequi. At quando pluribus diebus vulnus fuerit ambienti expositum, ex tegumento non potest tam citò ad propriam naturam redire. Et quoniam longè imbecillior est, quam à principio, idcirco excrementa in majori quantitate generantur, (non enim de eo vulnere intelligo, quod ad sanitatem properat) quæ tamen per se non potest promptè expellere, eoque minus, cum jam prave fuerit assuetus sub manuali illa abstersione ex hac enim quotidiana abstersione naturali calori accidit, quod & intestinis, dum clysteribus in dies excretio sæcum provocatur, quippe natura ipsorum segnior redditur ad expulsionem sæcum, sed quod adjuvet expectat. Qua de re ubi vulneratus offertur ab aliis curatus com-  
muni



communi modo, diligenter natura vulneris, & vulnerati consideranda erit, & quamdiu fuerit curatus illo modo, namque si una tantum, vel altera, vel etiam tertia, aut quarta die eo fuerit curatus modo non aliter instituenda erit curatio, ac si primo die nobis oblatum fuisset vulnus, nondum enim pars ad eam imbecillitatem valuit devenire, quam superius diximus.

Quod si statim à principio fuerimus advocati, & ab aliquo *Quid agemus* invenerimus impositas fuisse, stupatas, seu turundas ex stupis, ut *dum, si invenimus* fieri consuevit, albumine ovorum imbutas, nisi vulnus hujusmodi fuerit, quod aliquam operationem manualementem requirat, *stupatas impositas.* aut malè impositæ fuerint turundæ, quæ ob id partem distendunt, doloresque concitant, & omninò totum vulneris orificium claudunt, ut contingit in vulneribus punctim inflictis, non erit, quod eas removeamus, & refrigeremus vulnus, sed usque ad puris generationem sunt relinquendæ, puta usque ad quartam; cum enim toto hoc tempore non generentur copiosa excrementa, neque eorum suppressionem à turundis vereri debemus, paucum enim est, quod suppressi potest, sed ex refrigeratione vulneris non parva consequi potest noxa.

Si verò diutius fuerit curatum vulnus communi illo modo, ob idque hebes, & piger evaserit calor naturalis partis, siquidem vulnus fuerit patens, neque multum profundum, ut sunt ea, quæ cæsim infliguntur, neque pars sit detecta, aut etiam læsa, quæ ab aliqua puris copia diutius in eo contenta possit noxam contrahere, ut contingeret, si vulnus esset in capite cum detectione, aut læsione membranæ, vel etiam cerebri, & orificium possit deorsum respicere, statim quoque nostro hoc modo curari poterit, nam paulatim ob tegumentum validior redditur calor, & quod à principio non poterat ob imbecillitatem, mox perficiet, nec interea suppressi excrementa possunt in effatu digna quantitate.

Si verò angustum fuerit vulneris orificium, neque deorsum possit vergere, aut dilatari, & corpus fuerit impurum, aut os aliquod læsum, vel nobilis aliqua pars detecta, non est sperandum ex tegumento ad pristinum statum posse naturalem calorem reverti, antequam enim ad eam dispositionem perveniat, ex re-

tento



tento pure aliquod subsequeretur malum; quocirca melius erit proficui curationem per turundas; verum hasce fistulatas laudarem, & ut omni tertia die tantum semel curarentur, quod si deorsum vergere posset vulneris orificium, imposita ex cerata tela cannulata turunda, diutius possemus vulneris detectionem differre, & cum multa vulnerati utilitate. Et omnino si neque omnia faveant, neque omnia adversentur, media quædam via tenenda est, à principio temporis sæpius solvendo, puta tertia vel quarta quoque die, deinceps autem rarius, sic enim optimè & excrementis, & naturali calori fuerit consultum.

## CAPUT LXIII.

*De sanguinis immoderato profluvio in vulneribus.*

**Q**uid agendum sit, ut vulnera fœliciter ad sanitatem perducantur, generatim expositum est, ordo expostulat, ut orationem nostram ad ea convertamus, quæ vulneribus adjuncta curationem interturbant, atque impediunt, cujusmodi sunt sanguinis immoderatus fluxus, peregrina corpuscula intra vulnus contenta, dolor, fluxio, inflammatio, putredo insignis, corruptio & gangræna, atque mortificatio partis, supercrescens caro, animi deliquium, & syncope, convulsio, delirium, febris, & hujusmodi. Quorum quidem alia ortum ducunt ab ipsa vulnerante causa, ut sanguinis profluvium, peregrinum corpusculum, alia verò superveniunt, vel ob vulneris pravitatem, vel ob malam corporis dispositionem. De his igitur sigillatim agendum, cui non minor habenda sit ipsorum ratio, quàm vulneris, imò nonnunquam etiam necessarium sit vulneris curationem protrahere ac posthabere, ut illis occurramus. Principium autem sumemus ab ipso sanguinis fluxu, utpotè frequentiori, cum propè fieri non possit, quin à causa vulnerante secetur, vel perforentur vel lacerentur vasa sanguinem continentia, quæ si alicujus momenti fuerint, facilè sanguinis immoderatus fluxus sequitur.

Primum quidem evacuatur sanguis in vulnerata parte contentus, deinde qui in proximis, & tandem etiam qui in remo-



continetur partibus, posteaquam consecutione quadam egredientem sanguinem proximus sequitur, ut sic non levem impetum suscipiat sanguis ad vulneratam partem, præter quam quod etiam expellitur à spiritibus, & à partibus molestiam persentientibus ad ipsam vulneratam. Sed & vasa ob molestiam, quam persentiunt sese contrahunt, propter quam contractionem necessario effluit sanguis.

Sed quoniam ex vasis alia sunt majora, alia minora, aliaque *Differentia* pulsant, arteriæ videlicet, alia verò nequaquam, ut venæ ipsæ, *profluvii* modoque plura, modo pauciora vulnerantur, vel unum tantum, *sanguinis.* propterea contingit modo majori, modo minori impetu fluere sanguinem, modoque copiosius, modo minùs copiosè, aliumque fluxum esse contumaciorem, alium verò minus contumacem. Major, aut minor divisio non facit necessariam differentiam fluxus penes ipsius vehementiam, aut impetum, nam si media secetur arteria, quæ sit alicujus momenti, insignis fluxus, quique difficulter compescatur, subsequitur; at si tota præcidatur arteria, cum dissectæ partes sese contrahant, atque in carnosum genus se recipiant, plerumque minor accidit sanguinis fluxus, faciliusque is compescitur. Cum etiam ex vasis alia sint in summis, alia verò in penitioribus partibus, tot etiam succrescunt fluxus sanguinis differentia. Alia quoque differentia constituitur, si ad divisionem venæ consequatur, alia verò si ad arteriæ. Præterea aliquando sanguis è vase profluit, cujus etiam substantiæ portio deficit vi ictus, aliquando verò nullus adest substantiæ vasis defectus. Tandem aliquando sanguinis fluxus statim consequitur, aliquando verò temporis progressu. Non est, quod signa cujusque harum differentiarum subjiciamus, cum satis ex se innotescant. Sola ea afferemus, quibus distinguere licet, an à vena, an ab arteria fluat sanguis, cum hæc distinctio maximi sit momenti in curatione, ut videbimus, & tamen non adeò omnibus manifesta. Præterea cum sanguis à penitioribus erumpens aliquando sensui sit conspicuus, aliquando verò non, ut contingit, quando sanguis ab aliquo viscere effluens intra cavitatem thoracis, vel abdominis manet: afferenda sunt etiam signa, ex quibus conjicere possimus, quando sanguis effluit à penitiori aliqua parte, & fluxus est in-



conspicuis, cum id cognoscere, & ad curationem, & ad prognosticum non parum conducatur.

*Num sanguis à vena & qualitas exeuntis sanguinis demonstrabit; exeundi modus, & an ab arteria profluat.* Num ergo à vena, an ab arteria profluat sanguis, substantia, symptomata consequentia; nam arteriæ pulsant, & sanguinem continent tenuem, imò potius flavum, clarum, spumofumque ob spirituum permixtionem, & ferventem, & propterea si ejusmodi fluat sanguis, & cum impetu, ac quasi saliendo, evidentissimum signum est ab arteria effluere. Et quoniam maxima vitalium spirituum portio unà cum tali sanguine evacuatur, propterea facile in hujusmodi fluxionibus prosternuntur vires, animique deliquia, & syncope contingunt. Venæ autem minimè pulsant, & sanguinem continent crassum, minus calidum, & magis ad atrum vergentem, nec valdè spirituosum, & ideò quando sanguis exiens hujusmodi fuerit, & sine pulsu, ac uniformiter exierit, certum est signum ex vena prodire. Cæteris quoque paribus minus prosternuntur vires ex tali fluxione. Sed digito immisso id licebit investigare, & cognoscere, & præterea ejus vasis positum, ac magnitudinem, unde Gal. 5. Meth. 3. Quin imò si vas, unde profluit, altè sit demissum, certius ipsius tum positum intelligat, tum magnitudinem, præterea vena ne sit, an arteria.

*Num ex penitioribus partibus sanguis effluat.* Ex penitioribus porro partibus fluere, cæterum intra aliquam cavitatem colligi, ideoque inconspicuum esse ea indicabunt, quæ prostrationem virium significant, cum tamen hujus non adsit manifesta causa. Unde si viderimus vulnus esse in loco, ad quem insignia vasa pertingunt, & permutetur pulsus ad parvitatem, imbecillitatem, frequentiam, inæqualitatem, intermittentiam, fiatque facies illa, quæ, quoniam ab Hip. in Præfagiis describitur, Hippocratica dici solet, extrema vera fiant, frigida, & sudores frigidi appareant, animique deliquia, & syncope contingant, singultus deliria, & hujusmodi; arguere possumus effluere sanguinem ad internam cavitatem, ibidemque retineri.

*Signa futuri profluvii.* Futurum sanguinis profluvium timendum est, etiamsi non adsit, quando vulnus est in locis, ad quæ insignia vasa pertingunt, ut sit necessarium, aliqua fuisse divisa, namque non semper statim



statim inflato vulnere sequitur profluvium, quod in vulneribus contusis passim observamus; quamvis enim lacerata sint vasa ob contusionem, tamen subsident, & à carne etiam lacera per aliquod tempus obstruuntur, unde non sequitur profluvium sanguinis, nisi quando impetus fluentis sanguinis, quod ejus egressum prohibebat, superaverit, aut caro contusa, quæ divisionem occludebat, suppuraverit: timendum est quoque profluvium sanguinis post fortem pulsum in vulneribus. signum est enim naturam copiosum sanguinem transmittere ad partem, ex quo vasa nimis repleta distendantur, & ipsæ arteriæ nimis distentæ fortius pulsant, quamvis sentiatur magis earum pulsatio, ut dicebat Gal. 6. Aph. 21. quoniam pars est inflammata, & ex consequenti est magis sentiens, ac minus spatium relinquit arteriis, in quo dilatentur, minusque cedit percutienti arteriæ. Cum ergo adeo copiosus sanguis ad partem vulneratam transmittatur, periculum est, ne divisa vasa, sed occlusa, recludat, aut etiam oscula eorum, quæ soluta non sunt, aperiat, unde sanguinis profluvium. Merito igitur dicebat Hip. septima Aph. 21. A forti in vulneribus pulsu profluvium sanguinis.

Horrendum verò est symptomata, posteaquam evacuatur sanguis, vitæ thesaurus, & cum eo vitales spiritus, quorum est symmetriam innati calidi, & omninò vitam conservare. Hinc ad immoderata sanguinis profluvia non rarò mors sequitur, vel totius corporis, & præcipuè hepatis refrigeratio, tandemque malus corporis habitus, ac hydrops ob naturalis caloris jacturam, unde ad hoc symptomata alia prava symptomata subsequi consuevere, videlicet animi deliquium, & syncope ob immodicam spirituum dissipationem: singultus, convulsio, & delirium ob immodicam evacuationem; fit enim, ut dicebat Gal. 4. Aph. 9. desipientia ex defectu. At quando singultus, convulsio, & delirium superveniunt, malum est. Desipientia enim ob maximam virium jacturam contingit, convulsio verò, & singultus, qui est & ipse convulsio quædam propter extremam inanitionem, ex qua causa lethales esse hujusmodi affectus prodidit Hip. ut videbimus cap. de convulsione. Unde Hip. 5. Aph. 3. Ubi sanguis plurimus fluxerit, singultus, aut convulsio superveniens malum. Et septima

*Præsentia.*

*Explicatur  
Aphor. 3.*

*Aph. quinta & 9.*



*Septimæ sectionis.*

Aph. 9. A profluvio sanguinis desipientia, ac convulsio, malum. Unum tamen noto, si sola desipientia subsequatur, non esse omninò lethale signum, sed si desipientiæ accidat convulsio, actum est de ægrotante, hic enim est incorrigibilis inanitio, ibi verò spes non levis remanet, cum non adeò processerit. & propterea Gal. 7. Aph. 9. Si ergo convulsio aliquando tali desipientiæ jungatur, omninò salus est desperata. Et inferius, quoniam aliqua exemplaria ita legunt Aph. 9. septimæ sectionis, A profluvio sanguinis desipientia, vel convulsio, malum, dicebat, secundum hanc lectionem, etiam desipientia non bonus est casus post sanguinis fluxum, etiamsi sola contigerit, multò autem magis convulsio, vel si absque desipientia facta fuerit, maximum verò malum est ambarum conventus, quando & ex immoderata evacuatione convulsio est casus admodum exitialis; nam desipientia minus mala est.

*Profluvium sanguinis ab arteria periculosiùs quàm à vena.*

Quòd verò periculosius sit profluvium sanguinis ex arteria, quam ex vena satis constat. Nam & spirituosior est sanguis in arteriis contentus, & difficiliùs sistitur ob arteriæ duritiem, & continuum ejus motum; durities enim, & motus agglutinationi repugnant. Unde Gal. 6. Epid. sec. septima text. 3. Melius autem est, ut ex venis, quam ex arteriis effluat, cum propter particulæ nobilitatem, tum verò, quia pars ipsa pulsu agitata, tantum quietis naturæ, ut cicatricem inducat; non concedit. & 2. Meth. 7. Arteriæ natura difficultatem quidem durioris tuniciæ suæ conglutinandæ prorsus indicat. Difficiliùs etiam sistitur sanguis, si per longum dividatur arteria, quam si per transversum, quoniam & difficiliùs agglutinatur arteria per longum divisa, eò quòd divisæ partes in qualibet dilatatione magis distrahuntur, quam si per transversum secetur arteria.

*Indicationes.*

Quamvis autem sanguinis profluvium sit symptoma excretorum immodicè, & ut tale nihil indicet, nullum enim symptoma, qua symptoma est, curandi rationem indicat, nec primum immutat, ut dicebat Galenus 12. Meth. 1. attamen quoniam rationem causæ subinduit, vires prosteruens, & affectioni officiens, quandoquidem non potest curari vulnus, nisi priùs sanguinis profusio sistatur; propterea ex accidenti vim indicandi acquirit. Scopi autem



autem spectandi pro sanguinis profusione sistenda, innotescunt, si quæ ad ipsam concurrant, consideraverimus; hæc autem sunt quæcunque in quolibet motu reperiuntur; videlicet mobile, quod est sanguis, spatium, per quod fit motus, videlicet venæ, vel arteriæ, terminus à quo, scilicet partes, à quibus sanguis profluit, sed potissimum venæ majores, ac arteriæ, & terminus, ad quem, scilicet vena, vel arteria hians ob sectionem, vel disruptionem, seu lacerationem, & pars ob calorem, vel dolorem attrahens. Tempus omittimus, quia ad rem nostram non facit.

In sanguine considerata veniunt aptitudo ad motum, quam habet à caliditate, & tenuitate, & pondere, & impetus, quo ad partem vulneratam fertur. In spatio considerata venit amplitudo, quò enim laxiores sunt viæ, eò promptius, & in majori quantitate confluit sanguis. In termino ad quem considerata est solutio continui venæ, vel arteriæ, nec non impetus sanguinis ad ipsam, atque attrahentes causæ puta dolor, vel calor. In termino à quo considerandus est sanguinis ab ea discessus & discessus causa: quare si voluerimus profluentem sanguinem sistere, necessarium erit sanguinem ineptum reddere ad motum, atque retrahere, motum videlicet ipsius aliò convertere, & ad contraria potissimum, atque ad terminum à quo, indigentiam alimenti inducere, ut partes transmittentes nutrimenti egentes, quod in ipsis continetur sanguinis avidè retineant, vias, per quas fit fluxus, adstringere, posteaquam eas intercipere non datur, quo minori cum impetu, & in minori quantitate fluat sanguis ad vulneratam partem, & os hians venæ, vel arteriæ claudere, ab eademque sanguinem repellere, & tandem ne pars doleat, aut nimis incalcescat, curare. Si os statim liceret claudere, aliorum forsan non esset opus, aut quoniam non semper id licet, idcirco & alia sunt peragenda. Ubi enim sanguis retrahatur, & reperiatur, ineptusque ad motum reddatur, & viæ non sint liberæ, certum est fore, ut ad partem vulneratam non confluat. Unde Gal. 5. Meth. 3. Sistitur sanguis rupto vase, obturato quidem, quod præruptum est, averso autem, atque aliò translato, quod per ipsum ferebatur. Et eodem cap. 5. tum hæc proponit, tum

*Capita sistendi profluvii sanguinis.*



viarum angustationem, necnon & quæ sanguinem ineptum ad motum reddunt. Unde Avic. 4. 4. tract. 2. c. 17. Galenum æmulatus, dicebat: Res, quibus virtus inest abscindendi, vel retinendi sanguinem fluentem, aut sunt divertentes, vel attrahentes ad partem aliam à parte illa, in qua est exitus, aut sunt retinentes infra partem exitus, aut adventum ad locum exitus, aut sunt prohibentes in loco exitus illud, quod egreditur ab egressione, aut sunt aggregantes duas res de illis, aut plures. In quibus quidem verbis primò tangit Avic. translationem sanguinis ad alias partes; secundò ea, quæ reddunt sanguinem ineptum ad motum; tertio adstrictionem, & obturationem divisionis. Retrahetur igitur sanguinis motus ad alias partes, si revellatur, vel derive- tur: revulsio quidem fit ad contraria, derivatio verò ad proxima, unde Gal. 5. Meth. 3. Avertitur sanguis, atque ad alia membra convertitur, cum ad proxima derivatus, tum ad contraria revul- sus: ineptus redditur ad motum, si refrigeretur, & incrassetur hinc Gal. 1. Meth. 5. Confluere prohibetur sanguis, & propter animi deliquium, & refrigerationem corporis totius, hac enim ratione etiam frigida pota sæpè hæmorrhagias suppressit. Et Avic. loco citato: Retinens autem sanguinem sine exitu est illud quod pro- hibet motum sanguinis, & ejus penetrationem, & est, aut pro- pter causam ingrossantem, vel inspissantem, aut propter causam stupefacientem. Et stupefaciens quidem aut est medicina, aut est dispositio corporis, sicuti syncopis, ipsa enim multoties retinet sanguinem. Viæ adstringentur refrigerantibus, ac adstringentibus tam assumptis, quàm extrinsecus admotis. Unde Gal. 5. Meth. 5. medicamenta proponit refrigerantia, & adstringentia in itinere supra vasa posita. Et 7. de comp. med. per loca cap. 4. multas proponit potiones vulnerarias ad supprimendum sanguinem, re- frigerantes, atque adstringentes, non solum ut iis os vasis ad- stringatur, verùm etiam ut viæ coarctentur, unde eisdem potio- nibus utitur 3. de comp. med. per loca cap. 4. ad eruptiones san- guinis è naribus. Avic. quoque loco citato corpus frigori ambienti exponit, illudque nudatum, non solum, ut sanguis refrigeratus ineptus reddatur ad motum, verùm etiam, ut angustentur viæ.

Os secti, vel disrupti vasis claudetur, si adstringatur, vel obtu-



obturetur, quæ quidem adstrictio fieri potest, vel medicamentis, *Quomodo*  
vel ligatura, vel contorsione. Obturatio autem fieri potest tum *obturetur os*  
à medicamentis emplasticis, vel alio imposito, ut sunt filamenta, *vasis.*  
gossipium, tum à grumo sanguinis, tum à carne, vel cute super-  
inducta, tum ab eschara excitata vi ignis, vel medicamentorum  
cauterizantium. Unde Gal. 1. Meth. 3. Ulcus clauditur, vel la-  
bris ejus, quæ dissident, adductis in idem nostrarum manuum  
opere, si vulnus ad manum se exhibet, tum per deligationem,  
tum per ea remedia, quæ refrigerant, & adstringunt, vel osculo  
vasis obstructo, quod obstruitur, & sanguine ipsa concreto, &  
iis, quæ foris illi imponuntur, sive sint carnosæ ipsæ partes, quæ  
circa ulcus sunt, sive ipsa cutis, sive quæ ipsi comminiscimur, ut  
sunt filamenta, & emplastica medicamenta, quæ ex lenta, crassa-  
que substantia consistunt, sive & ea, quæ crustam, iaducunt,  
sive sit ignis, sive medicamentum æscharoticum. Et 5. Meth. 5.  
Clauditur ipsa divisio, vel si contrahatur, conniveatque id, quod  
divisum est, vel obstruatur. Sane contrahitur tum adstrictione,  
tum refrigeratione, tum deligatura, tum vinculo exceptum. Ob-  
struitur vel extrinsecus, vel intrinsecus. Et intrinsecus quidem à  
sanguine concreto. Extrinsecus tum hoc ipso, tum verò linamen-  
tis, & spongiis, & crustis, & medicamentis iis, quæ lentitia,  
crassitieque sua meatus obstruant, Græcè emplastica vocata. Ad  
hæc corporibus iis, quæ circumjacent, propius admotis. Et  
Avic. loco citato: Causa autem retinens sanguinem in locis est  
oppilans exitum, aut cum ligatura, aut cum strictura facta cum  
re obturante foramen, aut eschara cum cauterio, aut medicina  
cauterizante, aut cum congelatione rei retentæ, aut cum invis-  
catione, aut cum incarnatione, aut cum coarctatione carnis cir-  
cumdantis venas, quare oppilat ipsum, & claudit ipsum clausione  
vehementi. Repelletur influens sanguis ad partem sectam refri-  
gerantibus, & adstringentibus parti vulneratæ appositis. Unde  
Gal. 5. Meth. 5. Confluere prohibetur sanguis per refrigeratio-  
nem partis affectæ. Et subjungebat; Idem facit frigida foris in  
foru adfusa, aliaque, quæcumque vel adstringenti, vel simpliciter  
refrigerandi vim habent. Sed & deligatio versus sanam partem,  
feu radicem vasis ducta sanguinem à loco exitus repellit. Unde  
Gal.



Gal. 5. Epid. sec. 7. tex. 3. Deligatio quoque sanguinem profluentem sedat, præsertim si deligatio non à sanis partibus ad ægras perducatur, quoniam ita sanguinem attraheret, sed si ab ægrotis ad valentes pertineat. Ne verò propter gravitatem etiam promptius fluat sanguis ad locum exitus, quod contingit, quando pars est declivis, tunc enim propria gravitate fertur ad partem, sic pars est situanda, ut sursum spectet; nam hoc modo collocata parte gravitas non solum non adjuvabit sanguinis motum, verum potius eidem erit impedimento. Amplius, quoniam dolor sanguinem ad locum exitus advocat, qua ratione dicebat Gal. 5. Meth. 5. Nihil est, quod magis profluvium proritet, quam dolor, danda est opera, ut pars sine dolore jaceat. Unde Gal. 5. Meth. 3. Inter hæmorrhagiæ remedia censetur situs partis vulneratæ appositus, porro appositus fuerit, si ad geminum hunc finem sit directus, nempe ut & dolore pars careat, & sursum spectet. Si verò vel prona spectet, vel doleat, non solum profluvium non sistitur, sed etiam si non adsit, provocabitur. Et 6. Epid. sect. 7. Artis multa sunt opera, nam cohibet etiam figura, quæ sursum spectat, ut si ex partibus inferioribus, ut à pede sanguis exeat, pede in sublimi collocato, ille supprimitur. Et Avic. loco citato, & omnis præparatio dolorosa est mala, & oportet, ut præparatio sit aggregans duas res, quarum una est defectus doloris, & altera est elevatio partis, ex qua fluit sanguis, quare non adjuvatur appensione, & suspensione, ut fiat facilis descensus sanguinis, & ejus exitus. Capita supprimendi sanguinis breviter complexus est Hip. 6. Epid. sec. 7. tex. 3. dicens: Sanguinis venarum suppressiones faciunt animi deliquium, figura alterata, alia interceptio, linamentum insertum, appositio, deligatio lib. etiam de locis in homine meminit de unctione, & totali venæ præcisione. Hic tamen omisit Hipp. quæ ad aversionem sanguinis spectant tanquam alibi explicata.

*Non statim  
supprimen-  
dus est flu-  
xus sangui-  
nis.*

Ubi igitur in oblato vulnere urget sanguinis fluxus, omni ratione sistendus est. Dico autem ubi urget, quoniam non statim, ut aliàs diximus ex Hip. lib. de ulceribus supprimendus est sanguinis fluxus à vulnere, sed fluere in aliqua quantitate permittendus, quantum videlicet expedire videbitur, ut partes red-  
dantur



dantur quoquo pacto avariores, & alimenti indigentes, ex hoc enim fiet, ut quod in ipsis remanet sanguinis tanquam alimento egentes fortius retineant, & ab ipsis etiam fluentem propter hanc indigentiam attrahant, ex quo partes vulneratæ melius ab inflammatione præservantur, & facilius exinde si fortè fluxus fiat sanguinis, supprimitur sanguis fluens.

Cum igitur præter modum sanguis fluxerit tunc est sistendus. Et cum multi sint sistendi sanguinis modi, ut superius visum est, non in omni casu omnibus propositis auxiliis procedendum est, sed debilioribus fluxibus debiliora, fortioribus, atque magis contumacibus fortiora sunt convenientia. Id ergo in primis considerandum, num ex vena, vel arteria sanguis profluat; *Non indistinctè sunt usurpanda remedia ad cohibendum sanguinis profluvium.* valde enim refert, cum ab arteria contumacior fluxus proveniat, ideoque oporteat, ut dicebat Avic. nos esse magis sollicitos, fluentem ab ipsa sanguine, quam à vena. Si à vena, & exiguus sit fluxus, tunc adstricto vasis ore, aut grumo obturato, vel emplastico aliquo medicamento, sistitur sæpissimè fluens sanguis. Dico autem adstricto, non vinculo, sed ipso digito compresso vase per aliquod temporis spatium, vel etiam contorto, quo insuper grumus ori hianti vasis opponitur, tum intrinsecus, tum extrinsecus, dum videlicet ipso digito vas obturamus tamdiu, donec sanguis in osculo concreseat, vel vas vossellis apprehendimus, atque contorquemus. Sed chirurgi communiter utuntur emplastico medicamento, eo vulnus replentes, & supra vulneratam partem apponentes, cujus materia plerumque est ovi albumen subactum ablata spuma, stupis exceptum. Hoc emplastico, & os vasis obturant, & etiam faciunt, ut grumus concreseat in ipso osculo. Sed quoniam necessarium est postea hoc medicamentum auferre, quod est contra nostrum medendi modum, idcirco consuevi ego confluentem sanguinem à principio sistere, digito leniter, & citra dolorem per aliquod temporis spatium comprimens osculum vasis, quò ora subsideant, & adstringantur, & operculum etiam paretur, quod quidem paratur, dum in grumum sanguis concrecit, & postea etiam carnem circumpositam ad ipsum os adducens, aut unco, si suspicio fuerit major, vas attollens, atque paululum intorquens. Hanc supprimendi rationem proposuit



Gal. 5. Meth. 3. his verbis: Ergo qui hæc norit, si quando astiterit ei, cui ex vulnere sanguis profluit, illico digitum super os vulneris vasis imponat, blandè innitens, ac sine dolore comprimens, quippè simul tum sanguinem sistet, tum eum concreescere in vulnere faciet. Post hæc injecto unco attollat, ac modicè intorqueat. Hanc etiam vasis sublevationem, & intorsionem tetigit Avic. loco citato, dicens: Et de regimine in illo est, ut pervenias ad extrahendam venam cum uncino, & etiam cum incisione paucae carnis, quæ velat eam, & occultat ipsam, deinde involuere eam. Hoc ergo modo omnes eos fluxus, quos ipsi albumine ovorum sistunt, compesco. Si verò digitus immitti non possit aliqua de causa, vel scilicet ob naturam partis, ut quando sanguis à cerebro, vel membranis profluit, vel vulneris, ut quando à profundis admodum partibus erumpit, & vulnus est angustum; vel patens quidem est vulnus, verum ob vasis magnitudinem eo modo sisti non possit sanguis fluens, tunc necessarium est devenire ad ea, quæ vasis divisionem obstruunt, emplastica dicta, ex lenta, & crassa substantia consistentia, & etiam adstringentia. Unde Gal. eodem loco subjungebat: Quòd si nec tunc quidem sistatur sanguis, si vena fuerit, tentet citra vinculum sanguinem suppressimere aliquo ex iis medicamentis, quæ sanguinem suppressimendi facultatem habent, ut sunt emplastica, de quibus, & Avic. plura loco citato. Libenter quidem albumine ovi utor, quoniam præter vim emplasticam, qua præditum est, etiam refrigerandi, & repellendi vim habet. Huic quandoque alia emplastica, & adstringentia fortiora adjungo, si videlicet fluxus major videatur, cujusmodi est bolus Armena, sanguis draconis, tela aranæ, præsertim sumpta ex locis, ubi triticum molunt, vel farinam purgant à furfure, & pulvis ille Galeni ex ture, & aloe, præsertim si loco stuparum accipiantur pili leporini tenuissimi, & molissimi, folia mespili sicca, & in pulverem redacta, bistortæ, & tormentillæ pulvis, gypsum, terra sigillata, mastice, pili leporini combusti, cotum combustum, ossa usta, sponsia usta, cinis gallæ combustæ, & vino adstringente extinctæ, & similiter aliorum lignorum adstringentium cinis, acacia, hypocistis, succus rubi, hederæ succus, porri succus, polygoni succus, lapis hæmatites, & alia propemodum

*Suppressimere  
via sanguinem.*



dum infinita, quæ emplastica sunt, & vim habent refrigerandi, adstringendi, & etiam siccandi. Miros autem effectus præstat aqua nostra ovorum albuminibus subactis permixta, cujus hæc est descriptio,

*Recipe Succi plantaginis*

*Vvæ acerbæ*

*Cidoniorum*

*Granatorum acidorum*

*Aceti ex vino nigro ana lib. j.*

*Succi expressi ex asinino stercore recenti lib. ij.*

*Albumina ovorum subacta n. xxx.*

*Equiseti*

*Fragariæ*

*Pilosellæ*

*Linguae serpentina*

*Trinitatis*

*Pyrolæ*

*Vincepervincæ*

*Potentillæ*

*Auriculæ ursi recent. ana m. j.*

*Radic. recent. Consolidæ majoris lib. j. magni centaurii lib. s.*

*Corticum granatorum*

*Balaustiorum*

*Gallarum quercus immaturarum*

*Gummi Arabici*

*Tragacanthæ*

*Sarcocollæ*

*Thuris albi gummosi ana unc. s.*

*Rad. Tormentillæ*

*Bistortæ*

*Boli Armen. or.*

*Terræ sigillatæ*

*Lachrimæ sang. draconis*

*Terræ Samiæ ana drach. iij.*

Misce contusis contundendis, & pul. pul. & post triduanam macerationem duplici vase eliciatur aqua f. a.

*Aqua præstantissima ad cohibendum sanguinis profluvium.*



*Animad-  
vertenda in  
usu empla-  
sticorum.*

Sed in usu emplasticorum, aliorumque medicamentorum, quibus os vasis obturare decernimus, scire oportet, non esse vulnere temerè applicanda, ut multi faciunt, qui existimant, se satisfecisse, si hujusmodi medicamenti vulnus repleverint, & extrinsecus etiam apposuerint, quo fit, ut non rectè os vasis obturetur, neque etiam supprimatur, sanguis. Oportet ergo diligenter animadvertere locum, unde sanguis erumpit, & vas, ex quo profluit, deindè alterius manus summis digitis divisum vas ad inferiorem partem comprimere, aut complexum tenere, si id fieri possit, alterius verò manus digitis medicamentum consistentiam mellis habens pilis leporinis exceptum, aut tenui stupa, vel cotone divisioni apponere, atque ad ipsam comprimere, & tandiu detinere, quoad non ampliùs fluat sanguis, deinde aliam partem medicamenti superponere, atque eandem digitis per aliquod temporis spatium comprimere, & sic deinceps, donec vulnus fuerit repletum. Aliquando ante humidi medicamenti impositionem confert pulverem cui facultas insit sanguinem supprimendi, ori vasis apponere, & super ipsum linamenta humido medicamento imbuta, ut decet, disponere. Extrinsecus deindè apponendum linenum iisdem medicamenti madidum, vel stupæ eodem imbutæ, & desuper lintea munda, ac postremò fascia idonea deligandum.

*Deligatio  
qualis.*

Ducenda autem deligatio est versus vasis radicem, factis quatuor, aut quinque circumvolutionibus supra ipsum vas dissectum, seu divisionis locum, ita ut fascia adstringat, quantum satis est ad repressionem ejus, quod influit, modò id citra dolorem fieri possit, quamvis interdum magis urgeat profluvium, quam dolor. Hinc Gal. 5. Meth. 4. Non est autem in his committendum, ut in opere properes, veluti quidam stolidi Chirurgi faciunt, sed altera manu inferiorem vasis partem comprimēs, aut complexum tenebis, altera medicamentum vulnere imponens, ac blande ei apprimes, donec concretum adhæserit. Mox deligabis supernè deorsum, non, ut in artubus infernè sursum, siquidem radicem versus vasorum ducere deligationem oportet, ac quod confluit, reprimere. Et superiùs etiam cum docuisset modum conficiendi medicamentum illud famosum ad sanguinis suppressionem ex parte una thuris mixta partis unius semissi aloes, & ovi candido, cum quo



quo tantum illius pulveris subigendum dicebat, quantum mellis reddat crassitudinem, subjungebat: Hoc dehinc mollissimis leporis pilis, excipitur, deinde tum vasi (non temerè replendum dicit vulnus) tum ulceri toti liberaliter imponendum. Alligandum autem id forinfecus fascia est ex tenui linteo, cujus fasciæ primæ quatuor, quinque ve amplexus ipsi profluenti vasi injiciuntur. Ab hinc vasis radicem versus ducentur, in quibus videlicet partibus versus ducere licet. Et Avic. Constrictio verò sine re obturante foramen est, ut imponatur, verbi gratia, illa res in orificium ejus, & ligetur desuper præter penetrationem ejus in venas, & ut retineatur cum eis, quæ sunt sicut pulvilli, & propriè spongia, & cum vittis fortiter stringentibus, & strictura cum eis sit è converso, vel è contrario stricturæ, quæ fit ad attrahendum, quoniam strictura prima oportet, ut sit propè orificium, deinde fiat involutio procedens retrò, & minuetur strictura gradatim, & in hac fit è contrario. Et ut scias, strictura pulvillorum, & vittarum, quando est debilis, venit ex ea nocumentum stricturæ, & est attractio, & non provenit ex ea juvamentum stricturæ, & est retentio, & impletio. Oportet ergo, ut subtilietur in hoc capitulo. Cum ergo stringitur strictura bona, & stringitur iterum ex latere diverso, declinat materiam, & resistit attractioni hæc strictura. Et non oportet, ut perveniatur cum strictura, & prohibitione, nisi quæ fit infra dolorem: nisi si illud fuerit necessarium in primis, deinde mollifica paulatim. Inferius etiam modum tradens applicandi medicamenta, jubet, ut digitis alterius manus vas comprimatur, & alterius manus digitis imponatur medicamentum ad orificium vasis. Aliquando etiam vult Avic. ut licinium medicamento imbutum in ipsum vasis orificium immittatur, quando tamen vas est magnum, unde ipse exemplificat de magna arteria, sic enim habet: Constrictio autem cum buccellatione, sive re obturante foramen non est possibilis, nisi in arteriis magnis. Fac ergo licinium ex pilis leporis, aut tela aranæ, aut subtili coto, aut panno lini veteri, deinde pulveriza super ipsum medicinas prohibentes sanguinem, & mitte in ipsam arteriam, sicut bucellam, deinde stringe super ipsam ligaturam. Et fortasse administrabis licinium ex pilis leporis solis,



& excusat sollicitudinem. Et oportet, ut stringas strictura adhærente, quæ non separetur, donec incarnetur. Si haud licuerit medicamentum ad os vasis dissecti comprimere, ut contingit, quando à membranis, vel cerebro effluit sanguis, unde neque licet ibi arctè deligare ad reprimendum, imponatur medicamentum eo meliori modo, quo fieri possit, & adhibeatur retentiva solùm deligatio. Si vulnus fuerit angustum, ut digitis nequeamus medicamentum ad os vasis divisi apponere, neque dilatari possit, replendum est vulnus, ut melius visum fuerit, & adhibeatur deligatio, quæ adstringat, & repellat, si pars eam admiserit.

*Secundo ap-  
paratu quid  
agendum.*

Tertia postea die solvendum est vulnus, & siquidem siccum medicamentum reperiatur, quoniam nondum genitum est pus, quod negotium faciat, non est detrahendum medicamentum, si adhuc fluxurum sanguinem timeamus, sed relinquendum, ac novo superposito medicamento, ut quod adhæret adhuc madefiat, rursus ut priùs deligandum. Si verò medicamentum madidum fuerit, & à parte separatum, ita ut spontè decidat, detrahendum est, & si adhuc suspicemur, ne sanguis erumpat, aliud medicamentum imponendum. Verùm neque hic temerè procedendum, oportet enim altera manu inferiorem vasis partem comprimere, ut sanguinis exitus prohibeatur; altera verò manu medicamentum detrahare, novumque imponere, emundato priùs vulnere à pure, si quid in eo extiterit, à medicamento priori suppressum, non aliter ac primùm imposuerimus. Et sic deinceps procedendum, donec nullus ampliùs subsit timor. Hoc docuit nos Gal. 5. Meth. 4. his verbis: His factis ubi tertio die solveris, si tuto adhuc medicamen ulceri adhæret, aliud rursus superponens, ac veluti linamentum id, quod ex pilis factum inhæsit, madefaciens deligabis, ita ut initio deligasti. Sin priùs sua spontè linamentum decidat, radicem vasis digito blande comprimes, quatenus videlicet nihil confluat, hoc quidem suspenſa manu adimes, atque alterum impones. Ad hunc modum, quoad carne muniatur, curare vas debebis. Et Avic. loco citato Galenum sequutus sic dicens: Cum ergo feceris illud, deinde annexueris ei medicinas, tunc dimitte ligaturam usque ad diem tertium, quod si tunc videris medicinam glutinationem facientem adhærentem loco ejus  
tunc



tunc non eradices eam omninò, sed pone in circuitu ejus de genere ipsius aliquid, quod madefaciat ipsam parumper. Quod si accadat ei separatio medicaminis ex se ipso, quando tu auferis illud, quod est super ipsum, tunc deprime cum manu tua, quod est infra locum exitus in via, & situ, per quem venit vena ad locum exitus, & preme pressione, cum qua fiat securitas de saltu sanguinis, & eradica illud medicamen, quod jam per se elevatum est, & separatum ex eo, & commovetur in loco suo, & permuta illud cum alio.

Quia verò dictum est versus radicem vasis ducendam esse *Quæ sit rad-* deligationem, ne tiro hæreat, sciendum, radicem vasis, ut no- *lix vasis.* ravit Gal. 5. Meth. 3. esse priorem ejus partem, quæ vel jecinori prior est, vel etiam cordi. & hæc in collo ab inferiori est parte, in brachiis verò; & cruribus à superiore, in singulisque reliquarum partium, prout ex dissectione intelligere licet.

Si vulnus esset absque deperditione substantiæ, absque lina- *Sutura.* mentorum ope adductis vulneris labiis ad mutuuum contactum ope futuræ, prius tamen expurgato diligenter vulnere, aut etiam vino adstringente loto, utilissimum operculum diviso vasi comparatur, atque per bellè supprimitur sanguis, potissimum si facta futura super aspergantur pulveres supprimentes sanguinem, vel etiam superponantur liquidiora medicamenta, stupis, aut coto, vel mollissimis pilis leporinis excepta. Sutura autem erit vel ea, qua communiter ad simplicia vulnera uti solemus, vel, si majori impetu erumpat sanguis, qua pelliones utuntur, & in hoc etiam casu altiùs defigi acus debet. Utor tamen aliquando etiam futura, licet non omninò vulnus sit absque deperditione substantiæ, modo labia aliququaliter adduci possint ad mutuuum contactum, præsertim à parte extima, aliter nihil proficeret; facit enim futura, ut in ipso osculo tam ab interna, quam ab externa parte concreascit sanguis, & ita supprimatur. Aliquando etiam portio carnis ipsi vasis osculo ob futuram objicitur, itaque comprimitur sanguis. Verum transacto fluxus periculo, puncta aufero, ut sanguis concretus intra vulnus existens aliqua ex parte saltem in pus versum expurgari possit unà cum aliis excrementis; permittendum enim, ut concretus ille sanguis suppuret, quia, si vi extraheretur, periculum esset, ne iterum sanguis erumperet. Si



*Totalis arteriæ præcisio.*

*Aneurisma*

*Deligatio vasis.*

Si à divisa arteria sanguis profluat, ut ex parte tantum sit divisa, rarò aliquid boni hac medendi ratione præstamus propter continuum ejus pulsum, sed operculum, quod magis possit, parandum est. Duplici igitur ratione os obturamus, prima quidem si penitus arteriam secemus; inde enim accidet, ut utræque partes arteriæ ex utraque parte sese retrahant, atque in carnosam partem sese recondant, atque ita ex circumpositis partibus, veluti subsidentibus paretur operculum utrique parti resectæ, quo sanguis effluere prohibetur. Immo, ubi à principio animadvertimus arteriam ex parte tantum esse divisam, statim eam penitus recidere debemus, ne contingat aneurisma; ut enim aliàs dictum est, partes arteriæ vulneratæ, & ob siccitatem, & ob motum difficillimè coalescunt, unde enata in circumstantibus partibus carne, & minimè agglutinata arteria, exit ab arteria sanguis, & spiritus, & carnem superpositam in tumorem attollit, qui aneurisma dicitur. Unde Gal. 5. Meth. 4. Nisi enim producta caro prius locum, qui circa præcisam arteriam est impleverit, sed locus aliquis vacuus superfuerit, utique quod Græcè aneurisma dicunt, sequitur, quare tutius est statim totam arteriam præcidere, nisi talis sit, ut aliter ei parari possit operculum, in summis videlicet partibus, ita ut laqueo comprehendi possit, & ligari, & hic est alter modus obturandi arteriæ divisionem, seu venæ cujuscumque. Ligandum autem est vas versus suam radicem. Ex hac deligatione id insuper habemus, quòd sub deligatione arteria non amplius pulsabit, unde studere oportebit carnis generationi, & ita resectæ arteriæ coalitui, ut quando ob putredinem ligamentum deciderit, jam ora arteriæ coaluerit. Ut autem tutius res peragatur, aliqui duplici vinculo arteriam vinciunt, hoc est supra, & infra vulnus arteriæ, inter duas deligationes, deindè arteriam penitus rescindunt, atque exinde carnis generationi student. Aliqui versus radicem tantum arteriam vinciunt, deindè eam secant sub deligatura.

Idem penitus observandum est in magnis venis, in quibus sæpè emplastica apposita parum proficiunt. Hinc Gal. 5. Meth. 4. Sin arteria sit, duorum alterum, aut vinculo amplectens, aut totum vas præciciens profluvium sistes. Sanè vinculum magnis quoque



quoque venis injicere interdum cogimur, atque etiam totas præcidere utrique transversas. Incidit autem hujus necessitas in iis, quæ ex profundissimo loco rectè assurgunt, præsertimque per angustas, vel principes particulas, quippe ita retrahitur ex utraque parte pars utraque, celaturque, ac integitur à superioribus corporibus vulnus. Tutius tamen fuerit utrumque facere, & vinculum vasis radici injicere, & quod deinceps habetur, præcidere. In deligando autem vase animadvertere oportet, ut moderata sit restrictio, nimis enim arcta vas secatur, prætereà deligenda materia, qua deligatur, talis, ut difficile putrescat, & propterea filum sericinum duplicatum optimum est. His igitur peractis, implendum quamprimum est carne vulnus, priusquam vinculum à vase decidat, nisi enim producta caro prius locum, qui circa præcisam arteriam est, impleverit, sed locus aliquis vacuus superfuerit, utique aneurisma sequetur. Et Avic. 4. 4. tract. 2. cap. 17. Coarctatio autem loci facta à carne est sicuti, si incidatur vena in latitudine, & contrahatur ad duo latera in prima vice, quare claudit super eam caro ex latere, ex quo currit, & hoc non fit nisi in loco carnosio. Et multoties quidem accidit, ut necessarium sit incidere rarum extremitatis venæ, ut sit introitus ejus in profundum vehementior, deinde ponuntur desuper medicinæ, & multoties quidem accidit incarnatio meatus absque matre sanguinis. Et superius dixerat, quod si fuerit pulsatilis, tunc melius est, ut liges eam cum filis lini, & similiter si non fuerit pulsatilis.

Quod verò attinet ad vasis operculum, quod mediante igne, vel caustico medicamento paratur, ad escharam scilicet, scire oportet, hujusmodi remedium esse admodum fallax, nisi enim caro generetur ad vasis osculum, antequam eschara pus facta decidat, error contingit peior priore, quia ob exustionem patebit magis os vasis, & vulnus erit magis cavum. Et proptereà, quantum fieri potest, cavere oportet in recentibus vulneribus hoc remedium, unde Gal. 5. Meth. 4. Quamobrem eo potius genere sanguinem sistentium utendum suadeo, quæ sua lentitia meatus obstruant, emplastica vocant, quam eorum, quæ crustam efficiant, proptereà quod & citius, & minore cum periculo post ipsa impletur vulnus. Quippè periculum in altero adurentium genere

*De eschara*



imminet, ne si defluat crusta, rursus sanguinis profusio ex vase excitetur: Et inferius: At quæ crustas generant, ubi crusta decidat magis nudam partem, quam pro ipsius naturali habitu, derelinquunt. Est namque ipsius crustæ generatio ex subjectis, circumpositisque corporibus, ut ita dicam, semiustis, sic, ut cuiusmodi in hiemem extinctos hos carbones rem parant, ejusmodi ipsæ crustæ carnis exustæ sint reliquæ. Quare quantum particulæ adustum ad crustam est, tantum profectò ipsi de naturali carne perditur; id itaque omne particulæ decedit, cum crusta cadit, atque ob eam rem nuda, sineque carne visetur. Multisqne posteaquam crusta decedit, profusio sanguinis, quæ ægre suppressi potuit, supervenit. Et Avic. loco citato: Verum timor in illo est, quod eschara est velocis eradicationis ex se, & ex quolibet resistente ex eruptione sanguinis, & qualibet aliarum causarum; & quando cadit eschara, redit timor vehementior.

*Ignem utendum potius in ulceribus quam in vulneribus.*

Dixi autem in recentibus vulneribus fugiendum esse, quantum fieri potest, hoc remedii genus, quia in ulceribus erodentibus ac putridis non raro est admodum salutare, præterquam quod enim sanguinem suppressit, putredinem cohibet, absumentque superfluum humiditatem, & excrementitiam carnem, & robur parti addit, si actuali præsertim igne utamur, unde Gal. loco citato: Maxima est necessitas utendi crustificis medicamentis, vel ignitis ferramentis, ubi ex erosione putrescentis alicujus profluvium sanguinis excitatur. Quin etiam ubi in tali affectu totum, quod computruit, est sublatum, tutius est vel ipsius veluti radicem adurere, vel certe crustificis medicamentis uti. Attamen in recentibus vulneribus quandoque adeo urget sanguinis profluvium, ut nihil intentatum relinquere cogamur. Itaque ubi offertur casus, omnes modi, quibus suppressi solet sanguis, accuratè, perpendantur, isque deligatur, qui rutior videbitur, neque ullus respuatur, quando urget necessitas, unde Gal. 5. Meth. 4. Quis quis methodo omnia administrare volet, is tum modos omnes, quibus sanguis suppressitur, longè ante considerabit, tum eum eliget, qui minus sit cum periculo, utens non minus reliquis omnibus cum necessitas urgebit. Quando igitur necessitas urgebit, & ad crustifica deveniendum est, magis autem laudarem in recentibus vulneribus



vulneribus ipsum ignitum ferrum ; illius enim operatio vehemens est, citò absolvitur, unde longè minùs fluxionem advocat, quam medicamentum septicum, aut escharoticum ; oportet autem, ne eschara citò decidat ferrum esse vehementer ignitum, & profunde imprimere, ita ut eschara fiat profunda, & crassa, sic enim tardius decedet, unde Avic. loco citato, & propter illud præceperunt, ut fiat cauterium cum ferro vehementer ignito profunde, ita ut faciat escharas profundas, grossas, quarum casus non sit facilis, & cadant in tempore longo, in quarum simili caro jam est nata. Ex cauterio natura debili proveniunt escharæ debiles, quæ cadunt ex qualibet causa, & attrahitur materia plurima, & calefacit vehementer. Cauterium autem forte implet cum escharis fortibus, & remover upturam, & oppilat, seu stringit, & contrahit eam.

Aliud etiam est animadvertendum in usu igniti ferri, videlicet ipsum dum imprimitur, & postea removetur à carne, secum solere attrahere carnis exustæ portionem, & ipsius etiam vasis, unde fit, ut ægrè supprimatur sanguis. Ne ergo id contingat, antequam ferrum ignitum admoveatur, eo tangi debet axungia porcina, vel alia pinguedo, hoc enim prohibebit, ne exusta caro ipsi ferro adhæreat. *Animad- vertendum in usu igniti ferri.*

Si cui forsitan placuerit crustificorum medicamentorum usus, is ea deligere debebit, quæ adstrictionem etiam adjunctam habent, quo fiat eschara diutiùs permanens; interea enim suborietur caro, quæ vasis divisionem, obturabit, unde Gal. 5. Meth. 4. Id verò, quo pro incrustantium pharmacorum delectu consilium diriges, erit, non utique solus calor, sed cum quo adstringendi facultas sit conjuncta, qualis in chalcitide, & misy, & atramento futorio, sive ustis his, sive inustis utaris, visitur. Et paulò inferius: Hærent autem corporibus diutius crustæ, quæ ab adstringentibus fiunt, quod utique longè est utilius, quando ita prius nascitur in imo earum caro, efficiturque profluenti vasi operculum. Hinc est, quod tantopere extollitur ab omnibus arsenicum sublimatum, facit enim præ omnibus escharam maximè profundam, & diutius hærentem, ut interim facilè locus subsit ipsius carnis generationi: Calx viva autem non ita; cum enim adstrin-



gendi vi careat, debiles efficit crustas, & quæ citiùs excidunt. Quidam tamen ut huic defectui consulant, ipsi permiscant, quæ adstringendi vim habeant, ut sunt bolus Arm. sang. draconis, cortices granatorum, balauſtia, hypocistis, gypſum lotum terra Samia, gallæ, & huiusmodi, immo ut facilius suborietur caro, non adstringentia tantùm, sed & sarcotica crustificis omnibus permiscant, cuiusmodi sunt, thus, aloes, myrrha, aristoloch. radix, & iridis, & huiusmodi. Quod quidem primi fecerunt Arabes antiquiores, ut Rhasis, & Albucasis, & ipse Avic. & eos posteriores ferè omnes sunt sequuti, unde communiter maximè probatur pulvis ab Avic. descriptus loco toties citato c. 18. qui recipit.

*Calcanthi*

*Gypsi subtil. pul. ana p. xx.*

*Thuris minuti p. xvj.*

*Aloes*

*Glutinis sicci ana p. viij.*

*Arsenici p. iv.*

Misce omnia subtilissimè pulverizata, & pulvis hic super licinia inspergatur, & super locum ipsum. Alium conficiunt ex partibus æqualibus calcis vivæ, sanguinis draconis, gypsi, aloes, thuris, calcanthi, omnibus subtilissimè pulverizatis, & mixtis, addendo etiam leporis pilos, vel araneæ telam, & albumen ovi; interdum reducunt medicamentum ad mellis consistentiam. Sed longè meliora sunt medicamenta, quæ arsenicum recipiunt.

*Notandum  
circa procu-  
rationem  
casus es-  
charæ.*

Quia verò Chirurghi post usum igniti ferri, vel Crustificorum medicamentorum communiter, ut escharæ lapsus procuretur, pinguibus, & pus moventibus utuntur, cuiusmodi est butyrum, monendus est tiro, in sanguinis fluxu alia via incedendum esse, nam ut dictum est, amamus, ut eschara tardè decidat, & propterea tantùm abest, ut ejus lapsus suppurantibus sit accelerandus, ut potiùs quæ ipsius casum differunt, sint apponenda, cuiusmodi sunt siccantia, & adstringentia, ideo Gal. 5. Meth. 4. Unde nec nosmet præcipites esse veluti nonnulli sunt ad crustas, ubi hæmorrhagiæ periculum imminet, detrahendas oportet, nisi in illis tantùm affectibus, in quibus propter putredinem candens ferrum corpori hominis admoveere coacti fuimus. Ut



Ut verò simul, & semel coerceatur sanguinis impetus ad osculum jam clausum, quod causam securiorem reddit, repellentia sunt usurpanda, quibus tum pars roboretur, tum qui influit sanguis reprimatur, eoque magis, cum iisdem, utpotè refrigerantibus, & adstringentibus, hæc enim potissimum sunt eligenda, etiam angustæ reddantur viæ, & sanguis segnior ad motum. Hæc proposuit Gal. 5. Meth. 5. Hæc eadem Hippocrates 5. Aph. 23. dicebat enim. In his frigido utendum, unde fluit sanguis, aut fluxurus est non ad ipsa, sed circa ipsa, unde fluit. Neque tamen semper à principio statim usurpanda sunt repellentia; ubi quidem profluit sanguis, à vasis in superficie positæ, à principio repellentibus uti possumus; neque ullum imminet discrimen, aut si à profundioribus partibus sanguis erumpat, periculum est, ne, si repellentibus utamur ante revulsiones, sanguis in superficie positus repellatur ad partes profundas, & copiosior proritetur fluxus. Unde Gal. 5. Meth. 6. Nec omninò, nec sine discrimine, neque omni tempore loca, quæ circa particulam, unde sanguis profluit, sunt posita, refrigeranda sunt, immo postquam in aliam prius averteris.

Repellentia ergo, quibus uti necessarium est ad partem vulneratam, & propinquas partes, refrigerandi, & adstringendi vim habeant, quamvis, & sola refrigerantia sint ex usu. Igitur hæc admoveri poterunt, frigida, posca aquosa, vinum oligophorum adstringens, vinum granatorum, succus plantaginis, lactucæ, sempervivi, portulacæ, cucurbitæ, lenticulæ palustris, solani, polygoni, cidoniorum, uvæ acerbæ, posca ex aqua plantaginis rosacea, atque aceto rosaceo, ovi albumen subactum, ablata spuma, unà cum aceto, & aqua rosata, vel plantaginis, gypsum lotum, & oxycrato maceratum, aqua nostra superius descripta, & huiusmodi alia, quibus addi possunt pulveres refrigerantes, & adstringentes, ut parati ex bol. Arm. terra Lemnia, sang. drac. malicorio, baccis, & foliis myrti, nucibus cupressi, gallis præsertim immaturis, balauistiis, terra Samia, & huiusmodi. Et propterea consuevi ego parare medicamentum ex ovi albo subacto, dempra spuma, atque aceto rosaceo, vel aqua ex rosis imperfectis extracta, aut aqua nostra superius proposita, nec non & bol. Arm.



sang. drac. & quandoque etiam gypso loto tenuissimè pulverizatis, ita ut conficiatur medicamentum ad consistentiam mellis liquidi, quod super linteola extendo, & circumjacentibus partibus appono, atque per aliquot dies non amoveo, sed quantum exsiccatur, jubeo, ut per intervalla madefiat posca, aut vino granatorum, aut plantaginis succo. Vulgares utuntur unguento quodam vulgari, quod defensivum appellatur. Eadem applicari poterunt intermediis viis intercipiendi gratia fluxum sanguinis, licet improprie id faciant, ope siquidem horum medicamentorum adstrictis viis minus promptè fluat sanguis, & eo etiam minus, quia iis refrigeratur, & incrassatur, ac ulterius propellitur.

*De revellenti-  
bus, &  
reddentibus  
sanguinem  
ineptum ad  
motum.*

In gravioribus casibus non debemus iis esse contenti, quæ partem, unde sanguis fluit, respiciunt, sæpe enim non sufficient sed prætereà opus est sanguinis impetum aliò convertere, sanguinemque ipsum ineptum ad motum reddere, refrigerare videlicet, & incrassare, nec non & adstringere, in quibus solis sperandum est, quando ex alto corporis profluvia erumpent; hæc enim dicebat Gal. 5. Meth. 5. nec vinculo, nec deligatura sanes, veluti nec ignitis ferramentis, nec, ut semel dicam, iis, quæ divisum ipsum corpus contingere machinamur, immo per revulsionem, & derivationem ad vicina. Prætereà cibum, potionemque quod & emplasticam vim habeant, & refrigerent, & medicamenta, quæ adstringant. Revulsio autem fieri potest tum per evacuationem, tum per attractionem citra sensibilem evacuationem, unde Avic. loco citato: Et divisio prima, quæ est diversio, & attractio ad partem aliam, fit aut cum attractione ad contrarium, præterquam quod fiat exitus alius, sicut ponuntur ventosæ super hepar, & removeretur fluxus sanguinis ex nare dextra, aut ita quod accidit exitus alius, sicut phlebotomatur patiens fluxum sanguinis narium ex manu pertinente nari phlebotomia stricta. Revulsio per sensibilem evacuationem multis modis fieri potest, videlicet per venæ sectionem, ut aliàs dictum est, cucurbitulas scarificatas, hirudines, per pharmacum purgans, vel vomitorium, nec non per clysteres, & suppositoria, præsertim acuta.

Sed



Sed inter hæc in sanguinis profluvio primum locum tenet *De venæ sectio.*  
 venæ sectio, hæc enim non solum cohibet impetum sanguinis ad *Arteriam.*  
 locum vulneratum, verum etiam contrarium motum in ipso excitat, ad locum videlicet sectæ venæ, quia ratione revulsionis fieri debet in parte remota, & contraria, ut superius satis diffusè explicatum est. Ut vero majorem vim habeat revellendi venæ sectio, non est simul, & semel educendus sanguis, sed per plures vices, unde Gal. lib. de cur. ra. per sang. miss. Revulsionem, quæ sæpe adhibetur vena secta, quanto majorem in numerum particulares auxeris detractioes, tanto efficacior efficies. & 5. Meth. 3. Ubi paulum detraxeris, mox unam horam intermittens, rursus detrahes, post iterum, atque iterum pro laborantis viribus. Non solum autem oppositio servanda est, verum etiam rectitudo, unde Gal. loco citato Revulsionis gratia si venam secueris, in directe quidem oppositis sanguinis eruptionibus citissimè conspiciam videbis utilitatem, at si contra feces, nihil profuerit. Id tamen animadverto peculiariter in sanguinis profusionibus cum sanguis ad locum vulneratum à majoribus vasis majori ex parte confluat, necessarium etiam esse ad majores venas, tanquam ad primam originem, sanguinem retrahere: qua de re nisi ipsa brachia sint vulnerata, venæ cubiti plerumque sunt secandæ, quæ immediatius pertinent ad venas magnas, unde, & per earum sectionem promptius venæ majores inaniuntur, atque ita ad ipsas retrahitur sanguis, & ad ipsa brachia simul. Hoc etiam à brachiis habemus, quòd in medio corporis sunt, & sunt extrema, superioribus partibus contraria secundum sursum, & deorsum, & similiter inferioribus. Unum etiam brachium alteri est oppositum secundum dextrum, & sinistrum, & non minus partibus ventris medii, & inferioris, & dorso. In imbecillioribus tamen viribus ut minori cum ipsarum dispendio fiat evacuatio, venas minores secamus, ut quæ sunt in manibus.

Cucurbitulæ scarificatæ & ipsæ non levem obtinent vim re- *Cucurbitulæ*  
 vellendi, nam & revellunt ratione evacuationis, & ratione excitati doloris, atque caloris, & vi vacui. Et ipsæ quoque remotis, & contrariis partibus sunt admovendæ.

Hirudines levem obtinent vim revellendi propter sensim factam *Hirudines.*  
 ctam



etiam attractionem, & ideo earum rarus est usus in sanguinis profusionibus.

*Purgatio,  
& vomitus  
improban-  
tur.*

Similiter purgatio, & vomitus parum valent in sanguinis profusionibus ut quæ immediate sanguini motum contrarium non præbent, immo suspicione non carent, eo quod corpus, & succos exagitant. Potius convenirent purgationes, si gratia biliosi, & tenuis succi sanguis magis flueret, nam per evacuationem biliosorum, atque tenuium succorum, non ita promptus erit deinceps sanguis ad motum. Rarissimus tamen est usus purgationis, & vomitus in sanguinis profusionibus revellendi gratia, maximè verò cum per hujusmodi remedia præpediatur utiliorum usus, immo vomitu ipso nunquam uterer, cum nimis exagitet. Clysteres, ac suppositoria & ipsa parum faciunt ad revellendas sanguinis profusiones, quia tamen aliis non præripiunt occasionem, iis uti quandoque possemus, si deorsum esset revellendum, ab acribus tamen est abstinendum.

Primum igitur locum inter evacuantia obtinet venæ sectio, deinde cucurbitulæ, & postea hirudines, dein purgationes, & vomitus, ac suppositoria, & clysteres. Quæ verò citra evacuationem sensibilem revellunt, sunt frictiones asperæ, vincula, cucurbitulæ absque scarificatione, balnea calida, medicamenta acria, & dolorifica ad partes remotas, & contrarias. Frictiones quidem asperæ revellunt, quantum & ad contrarium movent sanguinem ratione motus frictionis, & quantum attrahunt ratione caloris excitati, & doloris. Cucurbitulæ quoque siccæ revellunt attrahendo ad locum, cui apponuntur, & vi doloris excitati, & caloris, & vacui. Vincula revellunt ratione doloris concitati, debent enim esse dolorifica, balnea calida, & medicamenta acria, tum ratione caloris, tum doloris.

*Cavendum  
ab iis, quæ  
calefaciendo  
revellunt.*

Inter hæc autem crebrius utimur cucurbitulis, frictionibus, & vinculis, aliis non ita, timentes, ne calefaciendo sanguinem fundant, & promptiorem ad motum faciant. Si ergo facta revulsione per venæ sectionem, adhuc perseveret fluxus, cucurbitulis primò scarificatis uti poterimus, deinde citra scarificationem, quibus etiam, quantum non evacuat, & ita neque vires prosternunt, sæpius utemur: non aliter & frictionibus, & vinculis, ut, quamdiu fluxus



fluxus persistit, semper uti oporteat reliquo revellente præsidio. Derivatione non ita utimur in hisce profusionibus, quia fit per proximas partes, ne fortè dum ad proxima attrahimus, concite-  
tur magis fluxus ad partem vulneratam, quamvis non utamur derivationibus nisi prius factis universalibus revulsionibus, & cum evacuatione sensibili, & citra evacuationem. Si verò opus sit tenues, & calidos humores educere, quò sanguis ex accidenti red-  
datur crassior, & frigidior, iis agendum, quæ non exagitent hu-  
mores, & prætereà vi adstringente sunt prædita, ut sunt Rhabar-  
barum, & mirobalani, tamarindi, & syrupus rosatus solutivus,  
hæc itaque non sunt transcendenda.

Quæ verò per os sumpta sanguinem refrigerare, & incrassare  
possunt, atque vias adstringere, sunt syrupi refrigerantes, & ad-  
stringentes, vel etiam emplasticam vim habentes. Parari autem  
possunt ex syrupo myrthino, violaceo, rosaceo recenti, de om-  
phacio, de rosis siccis, de succo cidoniorum, de cichorio, ad-  
dita aqua plantaginis, equiseti, cichorii, endiviæ, lactucæ, ace-  
tosæ, portulacæ, florum myrti, vel decocto ex rosis siccis, myr-  
thi foliis, & baccis, plantagine, equiseti, acetosa, cichorio,  
lactuca, endivia, pyrola, pilosella, fanicula, potentilla, fantalis.  
Item electuaria ejusdem facultatis: unde parari poterunt mixturæ  
ex saccharo rosaceo veteri, additis bolo Arm. or. terra Lemnia,  
terra Samia, semi. plantaginis acetosæ, equiseti, pulvere corallo-  
rum rubeorum, lachryma sang. draconis in electuarii formam  
redactis cum syrupo de rosis siccis vel alio hujusmodi. Aquam fri-  
gidam probat Gal. 5. Meth. 5. & Avic. loco citato. Parantur etiam  
in eandem gratiam pulveres ex equiseti, bolo Arm. or. terra  
Lemnia, trohisci de charabe, terra Samia, lapide hæmatites, la-  
chryma sanguinis draconis, & hujusmodi. Refrigerari prætereà  
solet sanguis manibus, ac pedibus in frigida aqua detentis, vel  
refrigerantibus ad testes apposis, quamvis hujusmodi remedia  
suspecta habeam, timeo enim ne sanguis repellatur ab extimis ad  
locum vulneratum. Quòd si hæc non sufficiant, duo remanent  
extrema remedia ad compescendum sanguinis motum, unum est  
animi deliquium, utpotè quod refrigerat totum corpus, & in  
causa est, ut sanguis ad cor fluat, unde Gal. 5. Meth. 5. Con-  
fluere

*Refrigeran-  
tia extremis  
partibus ad-  
hibita sunt  
suspecta.  
Animi de-  
liquium.  
Narcotica.*



fluere prohibetur sanguis propter animi deliquium. Alterum narcoticorum usus ; hæc enim abunde refrigerando stupefaciunt, atque ita sanguinem fluentem sistunt. Hæc duo reducit Avic. ad ea, quæ sanguinem retinent sine exitu, Retinens autem sine exitu, dicebat, est illud, quod prohibet motum sanguinis, & ejus penetrationem. Et est aut per causam ingrossantem, vel inspissantem, aut per causam stupefacientem. Et stupefaciens quidem aut est medicina, aut dispositio corporis, sicut syncopis, ipsa enim multoties retinet sanguinem.

*Ut inducatur arte animi deliquium.*

*Ut incutiat timor.*

Animi deliquium inducitur quandoque sine artis auxilio, ob copiosorem videlicet profusionem, quandoque etiam artis ope, si timor ingens incutiat, quamvis omnis timor possit ad suppressendum sanguinem, in causa existens, ut sanguis concentratur, & ad cor iter suscipiat, ac etiam congeletur. Dupliciter autem incutietur ingens timor, primo verbis, si videlicet ægrotanti dicatur, ut rebus suis consulat, eo quòd de ejus vita actum sit; verum non quilibet medicus ad id est idoneus, sed is tantum, cui ægrotans credat, ut qui jam famam, & existimationem fuerit adeptus, oportetque insuper, ut medicus ostendat, se loqui serio, & etiam ex improvise, ac subito id faciat: tali enim improvise, atque inopinato mortis nuntio certo perterritus, facile sanguine ob metum ad cor recurrente in animi deliquium incidet laborans, atque sanguis partim retrocedet, partim veluti congelabitur. Incutietur non minus timor re aliqua circa ægrotantem facta, quæ ipsi timorem inferat, ut si multa aqua gelida, eo nequaquam animadvertente, supra ejus caput, & humeros, ac faciem multo impetu projiciatur, vel si quis eum nequaquam cogitantem armis adoriatur. Verùm hujusmodi multa cum providentia oportet exequi.

Quod verò ad propriè dicta narcotica attinet, ut quæ naturali calori sunt inimica, non nisi in maxima necessitate sunt usurpanda, neque simplicia, sed contrariis refracta, & quandoque etiam additis adstringentibus, & primo à levioribus est inchoandum, nisi urgeat necessitas, cujusmodi est syrupus de papavere: deinde his non conferentibus ad validiora confugiendum, ut est theriaca recens, Philonium Romanum, vel Persicum, Requies Nicolai.



Nicolai. Sed in quo maximam expertus sum utilitatem, præterquam quod pauca vi narcotica est præditum est saccharum rosaceum cum trochiscis de charabe cum opio.

In instituendo victu huc debemus spectare; ut sanguis refrigeretur, & incrassetur, ac ineptus ad motum reddatur, viæque adstringantur. Propterea frigidus aër probatur, unde Avic. corpus frigori exponebat, si aer talis natura non fuerit, arte parandus. Cibaria, atque potiones vim refrigerantem, atque adstringentem, & emplasticam habere debent. Quare probantur lentes, far, oriza, præsertim decocta ex jure extremitatum vituli, aut castrati, fercula ex pane, & eodem jure, juscula addito succo uvæ acerbæ, vel granatorum, pedes vituli, vel castrati. Incoquantur etiam cibaria multa cum utilitate in aqua chalybeata, alterabunturque jura iis, quæ refrigerandi, & adstringendi vim habeant, cujusmodi sunt acetosa, lactuca, plantago, portulaca, endivia, equisetum, cidonia. Quocirca hujusmodi cum alimentis incoquantur, aut etiam addentur ferculis pulveres refrigerantes, & adstringentes, emplasticamque vim habentes, unde parari poterit pulvis ex bolo Arm. or. lachryma sang. draconis, terra sigillata, terra Samia, amilo, pyrola, pilosella, potentilla, & id genus. Potiones ejusdem erunt facultatis, aqua chalybeata erit ex usu, & in eadem utiliter incoquantur coriandrum, pilosella, potentilla, equisetum, pulpa cidoniorum. Item vinum granatorum, aut cidoniorum cum aqua chalybeata.

Victus autem tenuis instituatur, ut partes alimenti indigentes cogantur sanguinem retinere, nisi vires labentes aliter suadeant, aliter enim necessarium esse exhibere ovorum lutea, carnem pullorum caponis, perdicum, phasianorum, & hujusmodi, immo aliquando vinum, verum illud sit nigrum, & adstringens, & aqua chalybeata permixtum. Ira est evitanda, timor verò incutiendus, si ab extimis partibus fluat sanguis, nam in timore sanguis ad intimas partes movetur. At si à parte interna profluat sanguis, suspectus ea ratione est timor. In summa quiete detinendus est vulneratus, & in obscuro loco jacere debet, ut non solum corpus, verum etiam anima quiescat, & ne proprium sanguinem, & rem aliquam rubram videat, curandum. Somnus

*Ratio vi-*  
*ctus.*

*Cibaria.*

*Potus.*

*Victus re-*  
*nuis conve-*  
*nit.*



convenit, nam fluxiones omnes sedare solet, quare nisi propensus fuerit in somnum, lac amygdalarum dulcium conciliandi somni gratia conferet, & cum ferculis ex farre, vel oriza permisceri poterit. Saccharum violaceum à cibo conducet, aut lactuca decocta, & si fortiora requirantur, cremor seminum papaveris albi ferculis additum præclaram operam præstabit. Idem faciet syrupus de papavere cum aqua lactucæ à cibo propinatus. Inunguntur etiam non sine fructu nares, ac tempora ex unguento populeo. Verum dum vulneratus dormit, semper assistat aliquis, qui observet, quomodo se habeat vulnerata pars, & caveat, ne super ipsam decumbat vulneratus. Alvus sit lubrica natura, vel arte.

*Quæ à proprietate totius substantiæ sanguinem supprimunt.*

Aliquando adeo urget sanguinis fluxus, ut etiam experiri cogamur quæ à totius substantiæ proprietate sanguinem suppressere feruntur, quamvis apud cordatos viros paucam habeant fictiæ sanguinem, hujusmodi sunt asininum, & equinum stercus, aceto fervefactum, & emplastri modo appositum, aut exsiccatum, & in pulverem redactum, aliisque medicamentis permixtum. Item succus ab iisdem recentibus expressus, & succus vel aqua ozymi majoris linteis excepta, & applicata, apis viva lineo linteo involuta, ac parti, unde sanguis fluit, alligata, jaspis lapis collo suspensus, aut manu nuda apprehensus, ita tamen, ut ea manu detineatur, quæ è directo sit vulneris. Lapis in capite buffonis repertus, & pariter manu nuda apprehensus, vel collo suspensus. Aliqui non sunt his contenti, sed insuper verba quædam susurrant, characteres pingunt, & alia parum decencia faciunt, quæ cum Christiana Religio abhorreat, & ab eleganti medico penitus sunt fugienda.

Suppresso sanguine de partis statu sollicitos nos esse oportet, interdum enim profundum valde est vulnus, & à penitioribus partibus sanguis effluit, ad quas medicamentorum virtus nequit pertingere; unde accidit ut sanguinis videatur compressus fluor, quia clauso vulneris orificio extra ferri prohibetur; verum quia adhuc hiat vasis foramen, adhuc etiam ab eo sanguis profluit; qui necessariò cum non habeat egressum collectus in ipsa parte eandem in magnam molem attollit; Tandemque cum non possit majorem



maiores pati distensionem pars vulnerata, totus concrefcit; atque nisi consultum fuerit, ob magnam ejus copiam oppressus natus calor valde periclitatur, & procedente tempore adhuc augetur periculum, quod necessario sanguis ille putrescat, pravamque sibi asciscat qualitatem, quæ non minus extinguere nativum calorem potest, quam copia. Huic dupliciter opem ferre consuevimus; Aut videlicet sanguinem concretum antequam putrescat, evacuando; aut suppurationem promovendo; Primus modus locum habet quando loca periculosam sectionem non faciant, congruis enim sectionibus detrahendi sunt sanguinis grummi, & pars quæ nigricare cepit; quam quidem denigrationem præcedere durties quædam solet, & renitentia; Hic neque nimis properandum, neque etiam segniter agendum; nimis enim properantes, ut sanguis ante osculum vasis concrefcatur, & foramen obturet, non permittimus, & propterea sublatis grummi sanguis, confestim effluit; Quamvis & prosperè nonnunquam res succedat, quod ob dissectiones quas sumus machinati, ipsi vasis osculo manum admoveere possimus, quod quidem denegabatur prius; At agentes segniter, gangranam advocamus; Itaque cum potuerimus conjectari à concreto sanguine obstructum esse vasis foramen, ad sectionem deveniemus; Ut verò tutius agamus, non simul & semel totum concretum sanguinem educimus, sed paulatim eum detrahimus; potissimum autem cautè incedendum cum ad ipsum vas unde sanguis fluebat, fuerit perventum; imò nunquam à circumfritis partibus vi separandum, sed expectanda potius suppuratio, ne dum vi detrahimus, rursus fluxum promoveamus. At si loca periculosam sectionem faciant, neque moles aut durties partis eo devenerint, ut subitum interitum vereri oporteat, expectanda, & procuranda suppuratio; & cum primum alicujus suppurationis indicia apparuerint, secare conveniet; locum verò puris inclinatio; & ipsa inspectio Anatomica nos docebit. Suppurationem verò procurabimus cataplasmatibus idoneis, quæ tamen non tantum suppurationem promoveant, verum etiam aliquam rarefaciendi vim habeant oportet, ut & aliqua fiat materiæ digestio; quod tutiorem à gangræna reddet partem. Itaque parare cataplasma consuevi ex malva & violaria, floribus meliloti,



& camæmeli, farina hordeacea & fænugreci, oleo rosaceo, amigdarum dulcium, ac butyro recenti & pinguedine gallinæ; ex rad. quoque alteæ, & liliorum alborum capis, malvis, sem. lini, oleo violaceo, amigdarum dul. & butyro recenti; axungia porcina recenti, atque hordeacea ac fabacea farina; Aut ex vino dulci, in quo bullierint flores camæmeli, oleo com. aut violaceo, butyro, & farina hordeacea, &c. Sed & alia multa poterit quis fingere ex jam propositis materiis, & iis similibus.

## CAPUT LXIV.

*De inhibenda fluxione.*

**S**I quod aliud in curatione vulneris medenti faceffit negotium, id sane præstat decubitus, seu fluxus humorum ad partem vulneratam, atque inflammatio. His vulnus non invadentibus pauca sunt, quæ nos terreant; neque enim delirium, neque convulsio, neque febris, nisi illa præcedant, solent supervenire vulneribus ideoque hæc mala omni studio, antequam partem adoriantur, arcenda dicebamus: In recensenda fluxionis natura, & causis non laborabimus, cum de ipsis abunde superius fuerit pertractatum, ubi etiam scopos spectandos ad fluxiones inhibendas proposuimus. Reliquum est igitur, ut quibus prædictos scopos adimpleamus, magis particulatim explicemus.

Prò revulsione igitur confluentium succorum ad partem vulneratam, quod est primum, & potissimum caput arcendæ fluxionis, quando videlicet periculum est, ne humores influant, ut in magnis vulneribus & cohibendæ, si jam cæperit: nisi satis sanguinis sponte fluxerit, quam primum secanda est vena, aliis suadentibus & viribus permittentibus. In sectione autem venæ ea servantur, quæ proprio capite dicta sunt. Iterum tamen tirones moneo partitis vicibus extrahendum sanguinem, ut revulsio majorem vim habeat, & ex majoribus venis faciendam esse missionem sanguinis, ut ex jecoraria, vel communi cubiti, nisi virium imbecillitas suadeat ex minoribus venis extrahendum sanguinem, quemadmodum diximus in capite de venæ sectione. Neque vul-

nus.



nus video, à quo non possit revulsio fieri per sectionem venæ in altero brachio, vel manu, nisi utraque brachia, vel manus essent vulnerata, quo in casu secanda esset in poplite, aut malleolo vena. Verum de particularum venarum sectione agemus, cum de vulneribus partium erit sermo. Si forte inconcoctus cibus adhuc fuerit in ventriculo, & fluxionis periculum non urgeat, permittendum est, ut coquatur, deinde secanda vena, premisso clystere ad educendas fæces, vel si timeamus ex ipso posse sanguinis exitum impediri, secta vena statim poterit immitti, immo erit injiciendus, nisi sponte alvus egerit. Si tamen non adeo periculosum foret vulnus, posset differri venæ sectio ad horam matutinam subsequentiis diei. Verum quò vulnus periculosius est, eò etiam magis acceleranda est venæ sectio, ut in maximo fluxionis lethalis periculo neque fæcum, neque cibi adhuc in ventriculo commorantis habenda sit ratio, ut monebat Celsus, sed confestim tundere venam oporteat. In majori quoque periculo major sanguinis quantitas extrahenda cæteris paribus. Copiosius enim est mittendus sanguis in majoribus vulneribus & ubi per vulnus pauca exiit sanguinis quantitas, & corpus magis abundat sanguine: parcius in reliquis est detrahendus; dandum etiam aliquid ætati, tempori, regioni, consuetudini, &c. At si propter ætatem, aut vires non possit per venæ sectionem mitti sanguis, cucurbitulæ affigendæ sunt cum scarificatione, aut hirudines apponendæ.

Misso sanguine, quoniam tenues, & calidi succi facillime confluunt, hi quam primum educendi, & alii quoque supervacui succi, si totum corpus cacochymum videbitur, per ea medica- *Purgatio.* menta, quæ neque exagitent, neque humores commoveant, si fieri possit, sed clementer evacuent, & quæ post evacuationem vestigium corroborationis relinquunt, à quibus etiam beneficium revulsione habebimus, quæ autem medicamenta ad purgandum sint eligenda, superius traditum est. Iterum etiam moneo, non semper convenientem esse usum purgantium, aliena enim sunt, & fugienda, ubi in ventriculo, hepate, intestinis, vesica, & sede fuerit vulnus; exhibita siquidem potius essent in causa attractionis humorum ad vulneratam partem, quam revulsione. Unde dicebat Gal. 13. Meth. 6. Neque cum circa sedem, vel aliquam  
huic



huic vicinam partem initium phlegmonis incidit, alvum dejicies, neque cum in vesica, vel collo, vel renibus cæpta, &c. & eodem cap. 10. Si quis in jecinore cum phlegmone laborare incipit purgationem per alvum tentet, maximum concitabit phlegmonem. Et inferius: Si ventrem, aut intestinum phlegmone occupare jam cœperit, medicamine, quod alvum dejiciet, uti non convenit: Si tamen circa sedem, aut vicinam partem fuerit vulnus, per vomitum fieri poterit purgatio unde Gal. 4. Meth. 6. Si fluxio valenter irruat, revellere ad contraria studebimus, utique si in superioribus ulcus constiterit, per inferna purgantes, si in inferioribus superiorem ventrem evacuantes. Sed ubi purgatio adhiberi non potest, in reliquorum revulsivorum auxiliorum usu non oportet esse parcos.

*Purgatio locum habet tantum in vulneribus magnis.*

Atque sicuti sanguinis missio non in omnibus vulneribus admittenda, sed solum in magnis, ita etiam & purgatio. Unde Gal. 4. Meth. 6. Omnibus ulceribus, quoties prævalida sunt, purgatio est utilis. Facta hac prima purgatione, ut caliditas atque tenuitas calidorum succorum corrigatur, & motus humorum coerceatur, ea, quæ ipsos ineptos ad motum reddunt, ac vias angustant, exhibenda erunt, ut serapia refrigerandi, & incrassandi vim habentia, & aliquam etiam adstringendi; si pituita tamen, vel atra bilis redundarent, ea essent permiscenda, quæ hosce humores respicerent, quo & ipsi præpararentur pro ulteriori evacuatione, licet in minori quantitate, quam reliquorum propter eorum caliditatem. Ratione igitur calidorum succorum conveniunt syrupus de cichorio, de endivia, de omphacio, violaceus, rosaceus de succo citri, de succo limonum, de succo granatorum cum aquis cichorii, endiviæ, lactucæ, portulacæ, plantaginis, acetosæ, &c. vel horum decoctione. Ratione verò pituitæ jam dictis permisceri poterunt oxymel, syrupus de betonica, de stæchade, de menta, & aquæ betonicæ, mentæ, vel betonicam, & mentam decoctionibus addere oportebit. Ratione vero atræ bilis syrupus de succo boraginis de pomis simplex, de lupulis, de fumoteræ, mel rosaceum erunt ex usu, & aquæ melissæ, boraginis, lupulorum, vel hæc herbas decoctionibus adjicere conveniet, quibus per aliquot dies exhibitis, ante septimam iterum exhiben-



exhibendum est purgans: cum enim id potissimum exhibeamus gratia revulsione, tunc erit exhibendum, quando aderit periculum inflammationis, non post septimam, vel undecimam, vel decimam quartam, ut quidam faciunt, quando jam præterit inflammationis tempus. Verum tamen est ab hac secunda purgatione, si vulnus fuerit valde periculosum, vel maxime aptum ad concitandam fluxionem, ut sunt vulnera capitis cum detectione, vel offensione duræ matris, & subjectarum partium, & articulorum, & quando corpus est valde caco-chymum, iterum serapia exhibenda esse, tertiamque præscribendam purgationem, quo totum corpus reddatur, ab excrementis purum, & ita etiam vulnus magis tutum à succorum influxu. Dum autem serapia exhibemus, alia revulsione genera erunt usurpanda, videlicet cucurbitulæ siccæ, frictiones asperæ, ligaturæ dolorosæ, vesicatoria, lotiones calidæ, quamdiu periculum inflammationis perdurat, majora tamen, vel minora, & plura, vel pauciora auxilia in usum revocanda pro vulneris magnitudine, & fluxionis periculo.

*Tempus  
exhibendi  
pharmacum*

Ut autem angustentur fortius viæ, per quas fieri debet fluxio, intermediis viis apponenda refrigerantia, & adstringentia, de quibus actum est in superiori capite, quæ tamen frustra adhiberentur, ubi vis eorum ad deferentia vasa pervenire non posset, quod fit potissimum, cum ab internis vasis imminet fluxus, ut quando vulnus est in trunco, non in artubus at quando est in artubus videlicet manibus ac pedibus cruribus & brachiis, possumus vias adstringere: applicanda autem erunt medicamenta hæc non cuicunque parti, sed partibus excarnibus ut eæ sunt, quæ prope articulos reperiuntur; in his enim vis medicamenti ad vasa pertingit, quia nimis profunda non sunt. Chirurghi communiter utuntur unguento defensivo appellato, sed in capite de sanguinis profluvio multa fuere proposita.

*Intercipientia.*

Repellendæ vero influentis materiæ gratia, necessarius erit assiduus ad vulneratam partem refrigerantium, & adstringentium etiam usus, nam utraque facultas à parte succos propulsat, quod ex Gal. habetur 5. de simp. med. fac. c. 16. 13. Meth. c. 16. 11. Meth. 15. lib. Art. med. cap. 95. & 6. de comp. med. per loc. c. 1. Ut & quæ refrigerant, quæ tantum, & quæ solummodo ad-

*Repellentia.*



*Qua ratione repellunt.*

stringunt, vim habeant repellendi, & utramque habeant qualitatem majori vi repellant, unde Gal. 5. de simp. med. fac. c. 16. Repellit perpetuo frigidum, sed junctum cum crassitudine partium, veluti adstringens, id violentius propellit: duplici autem ratione tum refrigerantia, tum adstringentia repellere certum est, exprimendo videlicet contentos, & influentes succos, & roborando partem, dum enim pars qualitate frigida, & adstringente cogitur, densatur, & constringitur, necessario sequitur contenti succi expressio, modò neque nimis crassus sit, neque impactus, sicuti aqua in spongia existens exprimitur, dum manu spongia densatur, & constringitur. Pariter dum pars robustior efficitur, facilius propellit, quod ad eam transmittitur. Quod quidem voluisse visus est Gal. 13. Meth. 16. idcirco enim statuit retrocedere humores propter usum repellentium, quoniam cogitur, densatur, & adstringitur pars, & ita exprimitur contenta materia, & robur facultati impartitur, quo fit, ut quæ transmittuntur, aliò impellat: Reprimentibus dicebat, cedit materia in principio, quoniam tum parum est, quod affluit, tum magna ex parte non ita crassum, tum partis ipsius, quæ recipit, virtus nonnunquam valentior, utpotè nondum lassata, tum quod in afflicta continetur parte nondum violenter impactum. At cum phlegmone in vigore suo jam consistit, tum multus in ea sanguis continetur, isque crassior subindè, ac vehementer impactus, tum virtus partis jam est debilior, quam alioqui valentem requirimus, quo scilicet à se supervacua amolitur, quandoquidem haud satis potens est adstringentium usus, quæ sola totum efficiat. Quippe potest hæc cogendis, ac constringendis, & veluti densandis, ac exprimendis corporibus quæ tenuiora consistentia sunt, ad circumpositas partes expellere. Cæterum nisi etiam laborantis particulæ virtus aliquid auxilietur, nihil adeo magnum efficiat. Idem habet 11. Meth. 15. dicebat enim. Reprimentia in principiis fluxionum sunt idonea, eo quod adstrictione robur partibus inferant, & quod, quæ in iis jam contenta sunt, tenuissimum exprimant. Quæ non per se, sed per accidens, hoc est dum in partem agunt, à medicamenti succos repelli, facile persuadent, quod quidem de adstringentibus libenter admitto; at quæ refrigerant, dum  
calidæ



Sed antequam ad horum usum deveniamus, diligenter animadvertendum, an adsit, quidpiam, quod ea prohibeat, quod quidem potest esse dolor effatu dignus, nam augetur dolor usu  
O o o 2                      repell-



*Prohibentia.* repellentium, & potissimum, si vehementer adstringant, unde tunc parum proficiunt repellentia, & sunt incommoda. Interdicit quoque eorum usum actio partis, quæ à tali qualitate offenditur, hinc thoraci cautè sunt admovenda, quoniam respiratio ab illis læditur. Imbecillitas partis eorum usum prohiberet, cum ad repellendum valida opus sit facultate, ut superius ex Gal. dicebamus, & à frigidis exiguus calor extinguatur, at in vulneribus rarò ad eam imbecillitatem pars devenit. Impedit autem repellentium usum materia existens inter vulneratam partem, & eam, cui applicanda essent repellentia, quæ à medicamentis in ipsam affectam trudi possit, ideò in pulmonis vulneribus à repellentibus & hac ratione abstinemus, & vulneratis intestinis cautè eisdem utimur. Est etiam quædam conformatio partium, quæ licet omninò reprimentia non renuat, admonet tamen parcè, & imbecillioribus utendum, ne in penitiores ipsius partes potiùs, quàm ad circumstantes fiat repulsio. Hujusmodi sunt articuli, periculum enim est, ne à validis repellentibus in eorum cavitationem materia impellarur. Et propterea Gal. 13. Meth. 11. dicebat: In particulis, quæ circa arctus sunt, sat esse, spongiam vel ex frigida aqua, cui paulum aceti sit immixtum, vel aqua sola madentem imponere, sicut etiam ex vino aliquo austero.

*Alia consideranda.*

Si nihil sit, quod repellentia prohibeat, ut rectè iis utamur, opus est perpendere, num medicamentum facilem habeat aditum ad partem, à qua repellendi sunt succi, ut quando pars extima est, & rara, an difficilem, ut quando pars est profunda, ac densa quippe repellentia omnia, ut superius dicebamus, meatus partis densant, & cogunt, maximè verò adstringentia atque sibimetipsis viam præcludunt, quocirca parte existente profunda, & densa, cum repellentibus permiscenda sunt ea, quæ tenuiunt sint partium, ut vicem gerant vehiculi; sic à cerebro, & ejus membranis volentes repellere, acetum addimus, ut sui tenuitate ad penitiores partes repellentem facultatem manuducat. Quæ doctrina fuit Gal. 4. de comp. med. per gen. 5. Eodem vehiculo utimur in hepatis, & lienis, & aliarum internarum partium vulneribus: Natura quoque partis ob oculos habenda est, non enim omnia refrigerantia, & adstringentia cuilibet parti sunt convenientia,

*Varianda sunt repellentia pro varietate partium.*



entia, sed pro natura, & dignitate partis sunt varianda, nam in oculis fugienda sunt valdè adstringentia, & acria, ac mordacia, ut dolorifica; idcirco in iis utimur lacte, aqua rosacea, & plantaginis, ac violacea, albumine ovorum subacto, Sief albo sive opio & hujusmodi. In ore verò, quæ sunt ingrati saporis, idcirco in eo utimur aqua hordeacea, posca, lacte, diamoron, rob nucum, vino granatorum, vino adstringente, syrupo rosaceo, syrupo myrthino, syrupo de rosis siccis, syrupo violaceo, & aliis similibus. In partibus internis, quæ vim habent corruptivam, & deleteriam, vel aliam adversam, propterea cerussam ablegamus, gypsum, alumen, calcanthum, & similia. de quo Gal. nos admonuit 13. Meth. 20. sed & propter partis dignitatem vulnerato hepate, aut ventriculo ab actu frigidis abstinemus. Quod Gal. consuluit 13. Meth. 12. quamvis si jecur jam inflammatione flagraret, & robur ejus constaret, & tempus esset æstivum, non inutiliter admoverentur actu frigida. Nervis quoque vulneratis actu frigida sunt vitanda. Tempore verò frigido non solum vulnerato ventriculo, aut jecinore, aut nervis, sed & aliis partibus cavenda sunt actu frigida. Applicari autem debent hæc medicamenta circumjacentibus partibus, ita tamen ne vulnus extra tempus detegatur: neque contenti esse debemus una, vel altera applicatione quolibet die, sed in urgente fluxionis periculo nunquam sint lintea hujusmodi medicamentis exuta.

## CAPUT LXV.

*De dolore.*

**N**Emini dubium est, non satis esse ad arcendam fluxionem à parte vulnerata, materiam fluentem retrahere, atque à parte repellere, sed insuper id maximè spectandum, ne ad partem ipsam aliquo modo fiat fluxionis attractio. Existente enim causa aliqua attrahente in parte vulnerata, constat, reliqua administrata auxilia non ita opem suam præstare posse. Inter ea verò, quæ fluxionem ad partem attrahere consueverunt, principem locum sibi vendicat dolor partis vulneratæ. Unde Galen.



5. Meth. 4. Nihil est, quod magis phlegmones augeat, quam dolor & 3. Meth. 2. ac 6. Ob dolorem fluxionibus partes laborant. & 13. Meth. 5. Dolor, & membri, in quo phlegmone residet, calor, etiamsi purum ab excrementis sit totum corpus, fluxionis causa fiunt: ut enim dicebat 13. Meth. 3. Excretrix suo munere fungitur, cum triste aliquid sensit: unum verò quoddam est ex iis, quæ eam contristant, ipsa, quæ dolorem excitat, causa, quæcunque ea sit. Hanc igitur ejicere dum properat, phlegmonem interdum in particula concitat, cum enim in primis suis conatibus nihil profecit, vehementiùs aggressa quod infestat expellere, sanguinis aliquid, & spiritus ex suppositis partibus in affectam simul exprimit, atque hinc fit, quòd ex dolore particula proportionem confluentis in eam humoris in tumorem attollitur. Ex quibus etiam Gal. verbis colligi posse videtur, dolorem nequaquam attrahere fluxionem, sed esse occasionem tantum fluxionis, quatenus partes aliæ ad ipsam ægram transmittunt, quamvis communis loquendi modus illi attrahendi vim tribuat. Sed de his superiùs actum est.

*Dolor ingens induit vim causæ.*

*Qua ratione præcaveatur dolor.*

Doloris igitur maxima habenda est ratio, primò quidem, ne ingruat, deinde etiam, ut, si adsit, mitescat, quamvis enim dolor sit symptoma, & ut tale nihil indicet, accipi tamen vim indicandi, dum causæ rationem induit, ut contingit in vulneribus, in quibus fluxionis, & inflammationis est causa, ac etiam vires prosternt. Præcavebitur dolor, si fluxiones coerceantur, & pars vulnerata, ut decet, tractetur, si videlicet congruis tegumentis tegatur, neque à suprapositis gravetur, neque à fascia nimis arcta prematur, & congruo situ collocetur, de quo quidem tunc verba faciemus, cum de partium vulneribus erit. Sed hoc in generali sufficiat, quod congruus situs partis vulneratæ is est, in quo melius quiescit, atque se habet pars vulnerata; præterea si in quiete fervetur, si manus vulnere sæpè non admoveantur, detergendi, vel apponendi medicamenti gratia, & medicamen minimè acre à principio admoveatur. Præcavendum etiam, ne intra vulneris labia pus colligatur, parato effluxu, vel sectione, vel situ vulneratæ partis, unde animadvertendum, ne penicillis occludatur os vulneris, pus enim interciperetur, qua ratione Hip. lib.



lib. de ulceribus, tex. 2. At verò recentia vulnera omnia, tum ipsa, tum circumstitæ partes minimè inflammationem incurrent, si quis quam citissimè suppuret, & pus ab osculo ulceris non interceptum supprimatur.

Verùm, si dolor à principio statim superveniat, diligenter *Quaratione* considerandum, num ob fluxum materiæ accidat, an ob aëris *tollatur do-* actionem, an potius, quia sit aliquid intra vulnus, quod pun- *lor.* gat, aut extendat, ut est nonnunquam frustulum ossis, vel teli &c. quo in casu facta diligenti inquisitione, auferendum quod pungit, aut tendit, prius æstimando, an major futurus sit dolor ex inquisitione, & extractione, quàm sit is, qui ex punctura provenit, si enim tantus immineret dolor ab inquisitione, & extractione, ut longè superaret dolorem extensione, ac punctura, & majus etiam periculum immineret, quàm à diuturniori dolore, verum leviori, quod rarò tamen evenire potest, dimittendum penitus esset, quod intra vulnus continetur. Perpendendum igitur erit damnum hinc, indeque emersurum, & minus eligendum; quandoque enim adeo potest dolor ex punctura proveniens, ut cogamur omnem etiam efferum dolorem ab extractione pungentis proventurum spernere; & quod pungit, vel aliter molestiam infert, auferre sectionibus, scalpellationibus, dilatationibus, & quibusvis aliis auxiliis. Hoc potissimum contingit, quando os aliquam præcipuam partem pungit, & comprimit.

Si dolor vulnerei supervenerit, quia diutius fuerit ambienti *Dolor ex* aëri expositum, vel frigida madefactum, ut etiam quandoque *ambiente ut* contingit, paratò parti congruo tegumento (siccato tamen prius *sedetur.* vulnere; si aqua erat madidum) fotu ex oleo rosaceo calenti circa vulnus facto, sedari solet dolor.

Si verò ob affluxum materiæ, hic omni studio inhibendus *Ex materie* supraposita jam methodo, præcipue autem revulsioni opera *affluxu.* danda: neque detegendum vulnus confestim quolibet ingruente dolore, ne recrudescat. Sed si in tumorem pars elevetur, ac fascia nimis arcta appareat, in quibusdam locis incidatur, ne possit partem comprimere, ut superius dictum est. Verùm, si dolor adeo incre scat, ut ab ægro perferri non possit, necessitas expo-



expostulat, ut solvatur vulnus, atque relicto eo linteolo unguento illito supra vulneris orificium existente, ne suppuratio impediat (nisi ex suppressione puris excitaretur dolor, qua peracta dolores sedari solent, dicebat enim Hip. lib. de ulc. tex. 2. Vulnera quàm minimum dolorem, & inflammationem incurrere, si quam citissime suppurentur) circumcirca apponatur anodynum aliquod medicamentum. Quod si cataplasma ponamus, cavendum, ne supra ipsum vulnus apponatur, sed circumstantibus partibus, ne suo pondere nimis comprimat, juxta decretum Hip. lib. de ulceribus tex. 2. dicebat enim: Cum verò cataplasmate opus esse visum fuerit, non ipsum ulcus cataplasmate integere oportet, sed circumsitae partes, quo pus decidat, & quæ indurata sunt mollescant. Et idem repetit tex. 6. Hip. utebatur pro cataplasmate in circumsitis partibus verbasco cocto, & trifolii foliis crudis, & ligustri foliis coctis, & polygono.

*Anodyna in  
duplici dis-  
crimine.*

Sed antequam materia deligatur, ad methodum recurrendum, anodyna enim, hoc est, dolorem sedantia, sunt in duplici discrimine, alia siquidem anodyna sunt anodyna tantum, alia verò sanantia etiam, quæ videlicet causam removendo dolorem sedant, si non penitus, saltem ex parte. Unde Gal. 5. simp. med. c. 19. Anodyna alia sunt anodyna tantum, alia verò etiam sanantia. In causa enim frigida calefacientia sunt anodyna, in calida

*Anodyna  
proprie di-  
cta qualia.*

refrigerantia. At anodyna tantum id habent, partem quidem dolentem relaxant, & humidam reddendo in causa sunt, ne ita à causa dolorifica divellatur, & quod in spatiis inanibus reperitur, partem distendens, concoquunt, attenuant, ac digerunt, & æquabile reddunt, sive id sit humor tenuis, sive crassus, & frigidus, sive etiam vaporosus spiritus conclusus, quare anodyna partem leniunt, & minus dolorificam efficiunt, causam verò doloris reddunt mitiorem, non tamen summovent. Unde Gal. loco citato: Anodyna necesse est, ut evacuent, tum digerant, tum rarefaciant, extenuent, concoquant; & æquabile reddant, quicquid in partibus dolore vexatis, aut humorum acrium, aut lentorum, aut crassorum, aut multorum tenuibus spiramentis infarctorum, aut etiam vaporosi, aut crassi, aut admodum frigidi spiritus exitum commodum non invenientis inhæsit, atque conclusum



clusum est. Calida ergo erunt Anodyna in primo gradu, vel in eodem gradu cum calore partis, non secus ac suppurantia, & tenuium partium, adstrictionis expertia, aliter non præstarent dictos effectus, unde Gal. loco citato: Anodyna quædam sunt primi ordinis calefacientium, quæ propriè sunt anodyna, utpote præstantia propriè supradictos effectus, alia verò similiter, ut corpus nostrum, ut suppurantia: unde sicuti suppurantia varia sunt juxta partium varietatem, cum simillima esse debeant calori partis, ita & talia anodyna, quæ magis propriè dicenda sunt anodyna per quandam similitudinem: & hæc eatenus dictos effectus præstant, quatenus occludendo poros, & fovendo naturalem calorem sunt in causa, ut naturalis calor fortior redditus, quod molestum est, concoquat, extenuet, ac digerat.

*Anodyna  
per similitu-  
dinem.*

Non ignoro tertium esse anodynorum genus, quod improprie anodynum dicitur, utpote quod revera dolorem non sedat, sed sensum partis tollit, ne, quod molestum est, sentiat, cum enim ad dolorem efficiendum non solum requiratur objectum triste agens in sensitivam partem, verum etiam ut ejus actio deprehendatur, ac judicetur, tale anodynorum genus sensum partis tollens, judicium quoque tollit, unde manet eadem doloris causa, sed sensus defectu non percipitur. Tollit autem partis sensum stupefaciendo vehementissima refrigeratione, ideo Gal. loco citato: Anodynorum facultas alia re vera est, & est eorum, quæ primo ordine excalefaciunt, si in essentia tenui contineantur, alia tantum dicitur, ut est eorum, quæ frigore obstupeciant. Et eodem inferius: Anodyna improprie, quæ scilicet dolorem sedant, soporem inducentia, temperiem fortiuntur summe diversam iis, quæ re vera sunt anodyna, refrigerant enim corpus; & sensum ejus obstupeciant, & si paulo liberius ebibantur, mortem afferunt. Inquit autem Gal. si ebibantur, quoniam talia anodyna vel sensum partis dolentis tantum auferunt, ut quæ parti applicantur, vel primum sensorium, videlicet cerebrum stupefaciunt, ut quæ ebibuntur, soporem enim inducentia sunt in causa, ut cerebrum amplius non judicet objecti molestiam. Horum quidem anodynorum rarus est usus, vel nullus in vulneribus, & potissimum ad partem vulneratam, ut quæ è directo opponuntur

*Anodyna  
impropria.*



principiis vulnus sanantibus : Ebibuntur quandoque , urgente maxima necessitate , ut laborans aliquantisper recreetur , viresque reassumat, castigata tamen calefacientibus, unde quamvis multa adsint hujusmodi vi prædita, potiùs tamen utimur compositis, & jam fermentatis, ut ex fermentatione castigata quodammodo à contrariis vi illa deleteria, minus etiam detrimenti inferant; certi enim sumus, quod doloris causam non solum relinquunt, sed etiam contumaciorem reddunt, dum eam crassiolem, & immobiliorem efficiunt, & ita medicamentis magis rebellem, præterquam quod etiam naturalem calorem offendunt, & ita pro certo habemus denuò rediturum dolorem, & forsàn graviolem, nisi interim dum abest dolor, validius contra doloris causam pugnetur.

*Quæ respi-  
cienda, an-  
tequam ad  
stupefacien-  
tium usum  
deveniamus*

Quibus de causis antequam quispiam in dolore talibus stupefacientibus utatur, pro scopo sibi proponens ægrotantis utilitatem, diligenter perpendat, num adeo dolor urgeat, ut Medico contra causam pugnante vel anodynis insistente agatur interim de ægrotantis capite, quo in casu necessarium erit quacunque via dolorem auferre. Dico de ægrotantis capite agi non solum quando vi doloris, ac pervicacia periculum est, ne viribus labefactatis æger succumbat, verùm etiam quando vi doloris periculum est, ne concitetur alius affectus, ex quo discrimen ægrotantis immineat, ut ingens inflammatio, gangræna, ac demum sphacelus. Quod si à dolore hæc pericula non immineant, frustrà est, & amethodon causam doloris spretam contumaciorem reddere, & affectum in longius protrahere, neque enim crudeles nos esse oportet, neque nimis blandientes, & adulatores, unde rectè dicebat Gal. 12. Meth. 1. Ubi virium roboris fiducia est, adeò nunquam contra symptomata pugnamus, ut contra potiùs per ea prorsus nonnunquam præfidia, quæ dolorem afferant, morbos curemus; & inferiùs : Duplex est Medicorum contra dolorem instantium ratio, altera, qua delitiis cubantium subscribant, altera ex artis ratione, unde subjungens dicebat: Esto terminus in ægrotantibus quem non transibit is, qui ex arte generosè contra morbum pugnat, ut tutò medicetur, ei verò, qui dolorem mitigat, & vires custodiat, aliter facere, vel est crudelis officium vel



vel adulatoris. Hinc enim quoque consilium illud sapientis amplecti oportet: Ne quid nimis, habentes pro fine, quo tendamus, cubantis utilitatem. Ubi enim qui contra doloris causam pugnat, pro scopo habeat, ut tuto medicetur, hoc est per tutam viam laborantem ducat, non permittit ipsum sævitia doloris conteri, sicuti si quis dolorem mitigans, sibi proponat custodiam virium, ut, scilicet, ad usum mitigantium non trahatur, nisi à periculo virium labentium, ut eas custodiat, non ita simpliciter dolorem mitigantibus hoc est narcoticis utitur, sed solum pro virium custodia.

Ubi ergo necessitas postulat, id tamen raro contingere solet, *Narcotica* primò quæ mitiora sunt exhibeantur, & quæ simul etiam vim *opportuna.* habeant vitium dolorificæ causæ corrigendi, quatenus enim narcotica iudicium tollent, quatenus verò corrigentia causæ vitium, habebunt etiam aliquid sanantis, huiusmodi sunt Theriaca, & Mithridatium, absumere enim solent pravos illos habitus partem in atrocem dolorem attollentes, & pravitatem humoris corrigere, & vi narcotica somnum, vel soporem potius conciliando, iudicium, ac sensum tollere. Ut tamen vi narcotica polleant, non eligenda sunt nimis vetusta, sed mediæ ætatis, si modicum tantum stupefacere sit animus, recentiora verò ubi magis; quo enim recentiora sunt, eo etiam sunt magis stupefacientia, quia nondum per fermentationem satis potuit castigari à calidis vis illa narcotica. Antè sextum tamen mensem à principio suæ confectionis non sunt in usum revocanda. Consuevi ego fœlici cum successu exhibere eorum alterum ad semidrachmam cum totidem sacchari rosacei, vel violacei, eo quod, licet sint somnifera, habent tamen non levem vim calefaciendi. Fortiora his sunt requies Nicolai, & Philonium Romanum, ac Persicum, verum hisce nunquam indigui. Parti nequaquam apponenda narcotica censeo, cum enim jam debilis sit ob vulnus, huiusmodi medicamenta calori naturali inimica facilè imbecillum jam redditum calorem extinguerent, atque gangrænam, & sphacelum exciterent, & ideo semper ab his abhorruì. Quamvis non desint qui oleum de papavere probent, & cataplasmata ex mandragora, & hyosciamo, solatro, additis aliquibus insuper, quæ propriè sint



anodyna, quæ urgente maxima necessitate non essent fugienda.

*Usus anodynerum.*

His ergo ad partem utendum, quæ proprie anodyna sunt, vel saltem secundum similitudinem, quibus tamen si addentur, quæ insuper nonnihil sanantis habent, maximè esset ex usu. Aliquid sanantis dico, ut vim haberent non solum partem dolentem laxandi, & rarefaciendi, nec non & extenuandi, concoquendi, ac digerendi, verum etiam remittendi acredinem, atque caliditatem influxi succi, si calidus, & acris fuerit, cujusmodi est unguentum rosaceum, oleum rosaceum completum, lumbricatum præsertim, oleum violaceum & ipsum lumbricatum, lac vel solum, vel permixtum cum dictis oleis, vel etiam albumine, & vitello ovi, hujusmodi est violaria lacte decocta, verbascum similiter coctum, ac folia ligustri, additis præsertim oleis prædictis. Si verò vehemens fuerit incendium, etiam oleum de nenuphare erit optimum, & solatrum coctum. Verè autem anodyna sunt in primo ordine calida, vel similia calori nostro, atque tenuium partium, ut flores camæmeli, & oleum ex ipsis, lini semen, oleumque ex ipso, anetum, & oleum ex eodem; Quod si etiam vim humectandi habuerint, fortiora erunt, ut oleum olivarum recens, & dulce, oleum amygdalum dulcium, oleum lumbricorum, oleum camæmeli lumbricatum, oleum vitellorum ovorum, & ipsi vitelli, flos Cassiæ, pulpa pomorum dulcium sub prunis coctorum, oleum ex floribus sambuci, oleum, in quo caro vulpeculæ, vel herinacea fuerit decocta. Adeps recens anseris, gallinæ, cuniculi, humanus, suillus, butyrum recens, omentum vervecis. Præstantissimum anodynum est mica panis lacte fervefacta, addito oleo rosaceo lumbricato, vel violaceo, & etiam ovi vitello crudo. Similiter farina tritici eodem modo decocta. Item malvarum, & violariæ folia simul decocta, addita tritici farina, vel panis mica, atque oleo rosaceo, vel camæmeli, aut butyro etiam. Sed ex dictis varia cataplasmata, & inunctiones præparari poterunt. Ubi causa non est adeo calida optimum est furfur tenuissimum oleo rosaceo, & sapa fervefactum, atque appositum. Si tamen ex fluxione appareret non phlegmonis, sed erysipelatis initium, à cataplasmatibus, & oleosis, ac pinguibus esset abstinendum, ut quæ ex igneo bilis calore inflammantur:

& ex



& ex ipsis inflammatis magis accenditur calor in parte. Hæc quidem de ratione sedandi dolorem in vulneribus. Semper autem animadvertendum est, quando res transigi potest iis tantum, quæ contra causam pugnant, quæ & ipsa anodyna dici solent, longè melius esse. Verùm, ut dictum est, ob oculos habenda cubantis utilitas, & utilitas, ac detrimentum, quæ hinc, & inde evenire possunt perpendenda, atque invicem comparanda. Sed ad inflammationis curationem accedamus, ex quibus etiam innotescunt, quæ contra doloris causam pugnant.

## CAPUT LXVI.

*De inflammatione.*

**P**ER inflammationem haud intelligi volumus siccam illam inflammationem, quæ nihil aliud est, quàm exustio quædam partis absque ulla materia, de qua dicebat Gal. 2. ad Glauc. 9. quòd fit, quando absque ullo influente humore calor naturalis effervescent, veluti febris membri existens, sed humidam, quæ ex calida fluxione ortum habet, nec qualicumque, nam & omnis tumor calidus quandoque nomine inflammationis appellatur, sed de propriè dicta, quæ ex affluxu sanguinis procreatur, & ejus sinceri, si fuerit legitima inflammatio, quod rarò admodum contingit, posteaquam sinceri humores rarissimè confluunt, ut dicebat Gal. lib. dif. morb. 12. vel aliis succis admixti, ex qua mixtione nothæ inflammationes oriuntur. Quod verò ex sanguinis fluxione ortum habeat inflammatio, pluribus in locis testatus est Gal. & ideò dicebat 2. ad Glauc. 1. tradens ipsius generationem: Sanguine optimo, ac mediocrem crassitudinem obtinente, ad particulam aliquam universim fluente, atque ob multitudinem conculcato, vehemens dolor arripit hominem, nisi membrum sensum omninò habuerit difficilem: pulsusque in profundo molestus accedit, tendique omnino, ac frangi membrum apparet, & vehementem dolorem persentit, adeò ut comburi videatur, unde, & refrigerari desiderant, & rubor per summa viget, hæc passio inflammatio nominatur. unde & lib. de dil. morb. 12.

*Differentiæ  
inflammationis.*



dicebat, inflammatio est rubescens, renitens, dolorificusque tumor, utpote quæ fiat, quemadmodum ipse aliàs quoque asserit:

*Inflam- Cum sanguis copiosior in aliqua animalis partem procubuit, tunc  
tio quid, & enim majora ejus vasa protinus distenduntur, ab his deinceps mi-  
ejus genera- nora, mox exudat foras in ea ampla spatia, quæ inter vasa sunt  
tio.* sic, ut etiam omnia, quæ in circumposita carne habentur, loca occupet, atque hæc est phlegmones affectio. Et ideo 13. Meth. 3. Omnis phlegmone ex sanguinis fluxu consistit copiosioris, quam sit parti ex usu. Quod etiam diffusè satis ostendit lib. de tumoribus præternat. cap. 2.

*Quomodo & qua ratione vulneribus superveniat inflammatio.*

Supervenit ergo vulneribus inflammatio, quando congrua præsidia pro inhibenda fluxione non administrantur, aut fluxionis causæ adeò validæ sunt, ut administrata ex methodo licet præsidia spernant, vel prius quam sufficientia administrentur, faciant, ut fluxione pars laboret. Non est, quòd in recensendis inflammationis, quæ vulneribus superveniunt, causis laboremus, cum nullæ aliæ sint, quam eæ, quas fluxionis esse causas superius traditum est, si de antecedentibus inflammationis causis loquamur. Conjuncta verò ipsius causa est sanguis, vel sincerus, vel aliis succis permixtus, ut dictum est.

*Differentiæ inflammationis.*

Inflammationis differentiæ, & ex magnitudine ipsius desumuntur, namque alia magna est, alia parva, & ex affecta parte, alia namque est in parte externa, ut in oculo, femore, brachio &c. alia in interna: & quæ in externa est parte, aut summa tantum partis occupat, aut una etiam penitiores ipsius partes, aut etiam ipsas solas, ut ob id latens inflammatio dici possit. Prætereà & ex conjuncta causa, quæ si fuerit sincerus sanguis constituit veram, & exquisitam inflammationem, à Græcis phlegmonis nomine appellatam. Si verò aliis succis permixtus notham, quæ vario modo denominatur pro varietate succi sanguini permixti, si enim is fuerit bilis, dicitur inflammatio erysipelatosa; seu phlegmon erysipelatodes, si pituita, phlegmon œdematodes, si atra bilis, phlegmon scirrholes. At si omnes hi succi commisceantur, modò dominetur sanguis, affectus quidem est inflammatio notha, verum peculiarem nomenclationem non habet. Tandem ex qualitate, seu more inflammationis oriuntur quædam



dam inflammationis differentiae, alia si quidem est benigna, alia mali moris.

Supervenisse vulnere inflammationem significant tumor cum *Signa in-*  
dolore, tensione, quæ & ab ipso ægrotante animadvertitur, ru-*flammatio-*  
bore, calore, & pulsu, si in partibus externis suborta fuerit in-*nis.*  
flammatio, neque in penitioribus delitescat. At si in partibus  
internis acciderit, quandoque quidem tumor, ac tensio sensu  
ipso percipi potest, tactu videlicet, ut quando partibus accidit,  
quæ ossibus non teguntur, ut ventriculo, hepatis, lieni, utero,  
intestinis, & hujusmodi, immo & quandoque pars è regione po-  
sita in tumorem elata conspicitur, & aliquando etiam ad sensum  
latet tumor, ut quando inflammatio partibus accidit, quæ ossibus  
teguntur, ut pulmone, pericardio, cerebro, & ejus involucris  
minimè detectis. Dolor etiam accedit non levis, si pars fuerit  
exquisito sensu prædita, unde maximus adest dolor in ventriculi,  
intestinorum, uteri, septi transversi, atque membranarum cerebri  
inflammatione. At quando inflammatio aut jecur, aut lienem,  
aut pulmonem corripit, dolor effatu dignus haud percipitur,  
posteaquam viscera hæc paucò sensu sunt prædita, gravitatem ta-  
men in ea regione sentiunt ægrotantes. Quamvis autem multis  
signis destituantur inflammationes internarum partium, quibus  
externas partes esse inflammatas cognoscimus, præter dicta tamen  
sunt & alia, quæ evidenter inflammationem partibus internis  
supervenisse demonstrabunt: Sunt autem hæc febris, & propria  
partium affectarum symptomata. Omni quidem effatu dignæ in-  
flammationi etiam in partibus externis existenti accidit febris, &  
ea continuâ, attamen quæ succedit inflammationi internarum par-  
tium longe pravior est, & sæpius acuta. Et, si pars inflamma-  
tione affecta fuerit membranosa, durities, aut etiam ferrinitas in  
pulsu percipietur major, aut minor pro majori, aut minori mem-  
branarum læsione. Propria etiam partium symptomata id osten-  
dunt, nam inflammationem cerebri, atque membranarum deli-  
rium, & illud continuum comitatur, pulmonis verò respiratio-  
nis difficultas, tussis, & rubor ille maxillarum, diaphragmatis in-  
gens respirationis difficultas, atque delirium, & sic de reliquis,  
non enim animus est signa inflammationis omnium internarum  
partium



partium hic recensere, satis est innuisse, reliqua à propriis capitibus sunt petenda. Si inflammatio fuerit œdematis, aut erysipelatis, aut scirrhi particeps, declarabunt horum tumorum notæ, quæ cum notis inflammationis confundentur. Benignam inflammationem ostendunt mollities ipsius. Unde Hip. 5. Aph. 67. Molles boni, levitas symptomatum, & omnino facilis tolerantia, nec non & boni puris generatio, contraria verò mali moris inflammationem significant, & in corpore plethorico, & valdè cacochymo malignam inflammationem vereri oportet, habent enim validas corruptionis causas, & in illis facilè suffocatur innatus calor, in his verò ob penuriam bonorum succorum exiguus existens non minus prompte suffocatur, aut corrumpitur.

*Præfagia.*

Quid; verò de vulnerato, si parti supervenerit inflammatio, sit præfagiendum, inflammationis magnitudo, & qualitas, nec non & natura affectæ partis palam facient, si enim affecta fuerit pars carnosæ, nisi maxima fuerit inflammatio, aut maligna, quæ ideò possit perspirationem partis tollere, & ita calorem naturalem suffocare, aut corrumpere, & gangrænam, aut sphacelum invehere, interitum non minatur, quamvis curationem remoretur: at in parte nervosa, nisi summa tantum attigerit, convulsionem facili negotio invehit. Quare in externis partibus non est periculosa inflammatio, nisi quia aut corruptionem partis affert, aut convulsionem concitat. Unde quando inflammatio non est adeò tensa, sed mollis potius, quoniam non adeò inculcantur succi, ut possint perspirationem partis notabiliter lædere, & magis obsequantur naturæ, atque in ejus sunt potestate, haud mala est hujusmodi inflammatio, sicuti quando nimis dura est, ac tensa, atque renitens, in qua magis inculcantur succi, & magis rebellis sunt naturæ. Qua ratione dicebat Hippocrat. 5. Aph. 67. Molles boni, crudi verò, mali. Et Gal. in com. ejusdem Aph. Neque enim fieri potest, ut sit tumor renitens, benè concoquente membri natura humores ad ipsum confluentes. Semper autem mala est inflammatio, quæ penitiores partes occupat, quando enim humor influens ad externas partes fertur, relictis quæ magis sunt intimæ signum est illum à natura regulari. Unde ad ignobiliores partes pulsus non multum potest negotii facessere: at quando in  
penitio-



penitioribus partibus detinetur, est naturæ rebellis, & in partibus nervosis detentus convulsiones accersit. Et ideò dicebat Hippocrates 5. Aph. 62. Si in vulneribus fortibus, & pravis tumor non appareat, ingens malum. Non enim ibi vult Hippocrates absolute bonum esse vulneribus pravis supervenire inflammationem; nunquam laudaret Hippocrates complicationem gravis affectus cum alio pravo affectu. Semper inflammatio vulneribus superveniens curationi vulnerum officiet, ut quæ partis temperamentum oblædit; sed supponit Hippocrates fluxionem materiæ ad vulneratam partem, quæ tamen in penitioribus partibus detenta partem in tumorem conspicuum non elevat; sed potius nervosas partes distendens convulsionem facit, & propterea dicebat Hippocrates: Si tumor non appareat, quasi dicat, si tumor quidem adsit, seu tumoris causa, verum non appareat, malum: non absolute inquit, si tumor non superveniat, idcirco 5. Aph. 65. eadem ratione dicebat: Quibus tumores in ulceribus apparent; Ecce quomodo supponit tumoris causam, sed latentem, non convelluntur maximè, neque insaniunt. Internis partibus superveniens inflammatio semper est mala, & lethalis, potissimum autem in ventriculo, hepate, utero, & renibus. Pulmoni adveniens, vel interficit, vel in ulcus terminatur, quod curationem postea non suscipit. Septo transverso adveniens interficit, sicuti & quæ cerebrum corripit, & ut plurimum etiam, quæ membranas cerebrum ambientes.

Supponendo igitur ex influxu sanguinis fieri inflammationem, sinceri quidem, si exquisita sit inflammatio, mixti verò cum aliis succis, si notha fuerit, siquidem adhuc in generatione fuerit, id, quod factum est, auferendum, quod vero nondum factum est, prohibendum ne fiat. Unde Galen. 2. ad Glauc. 2. Phlegmone, quæ est in generatione duplex est, nam, quod genitum est curari oportet, quod futurum prohiberi. Futurum ergo ne fiat prohibebitur ea prorsus ratione, qua superius ostentum est fluxiones averti, iis videlicet consulendo, quæ attractionis sunt in causa, si adfuerint, ut dolor, & calor, & motus sanguinis alio convertendo, & coercendo. Ei vero, quod factum est, consuletur, si fluxus sanguinis à parte evacuetur.



Unde Galen. 2. sd Glauc. 2. Curationis indicatio in phlegmone est evacuatio redundantis in parte phlegmone obseffa sanguinis. Quod ergo sanguinis in parte continetur, vel infarctum in parte est, vel non, vel partim sic, partim non; si infarctum non sit, neque admodum sit crassum, repellere ab ipsa oportebit, nisi multum fuerit, quod retrocedat, sic enim pars evacuabitur. Unde Gal. 13. Meth. 8. Quod, quicquid in laborante membro continetur, in proximas partes repellit, hoc phlegmonis jam genitæ medela est. Et eodem: Vacuatur quod impletum est, non modo medicamentis iis, quæ digerunt, sed etiam quæ adstringunt, & refrigerant: magisque ad incipientes phlegmonas frigidis, adstringentibusque, quam iis, quæ digerunt, utendum: atque etiam magis ubi crassum, quod influit, non est. Animadvertendum tamen, quæ adstringunt, cavenda esse, si dolor ob tensionem urgeat, utpote contrahentia partem, immo anodyna sint oportet, quæ refrigerant. Unde Gal. 2. ad Glauc. 4, Si cum magno dolore fluxus incidat, anodynus utendum est ad frigidum vergentibus, immo semper doloris habenda est ratio. Anodynus refrigerantibus admixtis sæpè incrementum inflammationis prohibetur, immo curatio inflammationis absolvitur. Hæc quidem repellentia si quatenus refrigerantia considerantur, alteri indicationi satisfaciunt in phlegmone jam genita, cum duplici ratione à statu naturali exeat particula phlegmone obseffa, & quatenus repleta, & quatenus calidior, unde & ut repellentia, & ut refrigerantia etiam, non solum quod factum est, curant, verum etiam, quod futurum est, inhibent, repellendo videlicet, quod influit, & caliditatem, quæ fluxionem attrahit, tum per se, tum dolorem excitans, temperando. Unde Galen. 13. Meth. 8. Quantum refrigerationis phlegmone, ceu calido morbo convenit, tantum & incrementum ejus inhibere aptum est. idem parem gratiam præstat, & cum repercutit id, quod influit. Quod etiam ad adstringentia attinet, sciendum est in progressu ab iis, quæ fortiora sunt, cavendum esse, tum quia dolorem inferunt, partem tendentia, tum etiam quia possunt affectum scirrhum efficere.

*Quando repellentia, &*

Ubi verò sanguis est multus, & valdè impactus in parte, ut  
in



in augmento phlegmonis contingit, sed in statu magis, tunc hu- *quando di-*  
 jus gratia frustrà adhiberentur repercutientia, hisce enim non ce- *gerentia con-*  
 dit materia impacta, sed ad digerentia deveniendum. Cedit e- *venians,*  
 nim materia repercutientibus in principio, quia pauca est, non  
 crassa valde, neque impacta, & virtus etiam membri fortior est,  
 unde ope repercutientium, quæ robur parti indunt, atque quod  
 in ipsa est, exprimunt, tum à parte expellitur quod fluxum est,  
 tum exprimitur. Unde Gal. 13. Meth. 16. Reprimentibus cæ-  
 dit materia in principio, quia paucum est, quod affluit, tum ma-  
 gna ex parte non ita crassum, tum partis ipsius, quæ recipit, vir-  
 tus nonnunquam valentior, utpotè nondum lassata, tum, quod  
 in afflicta continetur parte, nondum violenter impactum; at non  
 in vigore, quia jam phlegmone consistit, tum multus in ea con-  
 tinetur sanguis, isque crassior subinde, ac vehementer impactus,  
 tum virtus membri jam debilior est, quam alioqui valentem re-  
 quirimus, quo scilicet supervacua à se propellat, quandoquidem  
 haud satis potens est adstringentium vis, quæ sola totum efficiat,  
 quippe potest hæc cogendis, ac constringendis, ac veluti den-  
 sandis, ac exprimendis corporibus, quæ tenuiora sunt ad cir-  
 cumpositas partes expellere: cæterum, nisi etiam laborantis par-  
 ticulæ virtus aliquid auxilietur, nihil adeò magnum efficiet. In  
 augmento igitur digerere oportet, sed magis etiam in vigore,  
 quoniam & major est sanguinis quantitas, quæ partem obsidet,  
 & magis etiam impactus est. Verum quidem est quod usque ad  
 vigorem nunquam reprimentibus parcimus ratione ejus, quod  
 assiduè influit, semper enim usque ad vigorem sumenda est indi-  
 catio & ab eo, quod jam influxit, & ab eo, quod influit, quam-  
 vis in augmento etiam magis repellamus, quam in vigore, in de-  
 clinatione vero solæ digestionis incumbendum; In vigore quidem  
 utimur repellentibus mixtis cum digerentibus, non quidem, quia  
 adhuc materia influat, in vigore enim cessavit fluxus, loquimur  
 de vigore tumoris, non fluxionis, sed propter digerentia, quæ  
 cum calida sint rursus possunt fluxionem concitare, unde Gal. 5.  
 simp. 10. In principiis inflammationum, quæ refrigerant, & ad-  
 stringunt, per incrementum vero tepida, & mediocriter con-  
 stringentia. At in vigoribus quæcumque tum moderatè calefa-



cere, laxareque, per declinationes verò, quæ tum calefacere, tum valenter discutere valeant. Et 1. de comp. med. per gen. 4. Cum in vigorem phlegmonis tumor pervenerit, pares invicem ait convenire posse potestates repellendi, ac digerendi, cum prius dixisset in principiis vim repulsoriam validiorem esse oportere, in augmento vero hanc nonnihil imminuendam, & augendam digerentem. Et Avic. quarta quarti, tract. 1. cap. 3. Et incipe cum percussivis, deinde appone augmento cum intromissione mollificativorum, & humectantium cum percussivis, & quantum procedit in augmento, procedas in actione mollificativorum paulatim, & apud finem, & statum, & ultimitatem tensionis fac vincere mollificantia; & fac ea pura.

*Alia præ-  
sidia eva-  
cuantia par-  
tem.*

Non solum autem repellentibus, atque digerentibus vacuatur redundans sanguis in phlegmone affecta particula contentus, sed & aliis auxiliis, quorum alia sensibiliter per ipsam partem affectam evacuant, cujusmodi est scarificatio: alia vero etiam sensibiliter evacuant, verum per proximas partes, ut est venæ sectio derivatoria: alia vero insensibiliter evacuant partem affectam, præterquam quod materiam digerant, & sunt ea, quæ faciunt, ut integræ, & sanæ partes attrahant ad se materiam in parte affecta contentam, cujusmodi sunt revulsoria præsidia absque evacuatione sensibili. Verum non eidemmet materiæ omnia hæc præsidia conveniunt, sed impactæ jam in parte digerentia magis sunt opportuna, nec non & scarificationes, repellentibus enim non cedit impacta materia, neque ad venas potest retrocedere, reliqua autem auxilia materiæ, quæ nondum impacta est, conveniunt, quamvis & scarificationibus, & digerentibus etiam possit evacuari; cum enim adhuc in venis contineatur, ad proximas retrocedere potest, & ab his etiam ad remotiores, & ita repelli, & ad insignes partes attrahi haud difficili negotio potest. Hæc

*Repellentibus non cedit materia impacta.*

omnia vacuantia præsidia recensuit Gal. 13. Meth. 9. his verbis: Quoniam igitur momentum omne curationis laborantis phlegmone partis in redundantis in ipsa sanguinis vacuatione consistit, vacuatio autem hoc genus affectorum excogitata est duplex, aut translato ad alias partes, qui in ægra continebatur, sanguine, aut foris à corpore expulso, satius profecto est utraque uti, observantibus



vantibus diligenter, ne qua ex accidenti læsio sequatur. Ergo cum gemina sit dictarum evacuationum utraque quadruplex in universum oritur vacuantium auxiliorum genus. Translationis enim sanguinis ad alias partes alterum genus est, ubi ipsa pars, quæ phlegmone laborat, sanguinem abigit. Alterum, cum eæ, quæ integræ sunt, ad se trahunt. Ejus autem, quæ extra educit, alterum sensibili effluxu, alterum ratione tantum contemplabili perficitur. Atque id, quod sensibili effluxu peragitur, alias per ipsam fit partem, in qua phlegmone residet, alias per ea, quæ unà cum hac aperiuntur. Neque existimandus est Gal. voluisse omnia hæc præsidia cuilibet materiæ posse adaptari, cum aliàs docuerit, neque repellentibus cedere materiam impactam, neque omninò aliò posse transferri, sed cum allata limitatione intelligenda est ejus sententia.

Si verò inflammatio signum suppurationis præbuerit, tunc *Si inflam-* adjuvanda erit suppuratio aliquo cataplasmate suppurante circum- *matio sup-* sitis partibus appposito. Unde Gal. 2. ad Glauc. 2. Quod si pus *puret, quid* in particula se ostenderit cataplasma offerre oportet semel, aut *agendum.* bis; sed hoc jam nimis excedit limites nostri instituti, hoc unum admoneo, si materia suppurata per vulnus expurgeretur, alioqui enim digerentibus non cedens, congrua sectione esset educenda, quod quidem ex copiosiori per vulnus puris exitu cognoscitur, deligatura expressiva opus esse, & spleniis, vel spongiis, quibus melius fiat expressio, apposis ad radicem abscessus, & suppuratas partes, & incipienda deligatio à parte sana, ducendoque ad vulnus; non tamen hoc fit, priusquam mollita, & sedata fuerit inflammatio. Unde Hip. lib. de ulcer. Quæcunque verò ex casu, aut alio quopiam modo diffecantur, & contunduntur, & intumescunt ita, ut vicinæ circumcirca partes suppuratæ pus de tumoribus per ulcus egerant, in talibus quicquid cataplasmate opus habere visum fuerit, non super ipsum ulcus cataplasma ponere oportet, sed super circumscitas partes, quo pus decidat, & indurata molliantur. Postquam autem mollita fuerint, & inflammatio sedata, spongiis super ea, quæ abscesserunt deligatis, compescito, initio à parte sana facto atque ita procedendo.

Sed tempus est, ut ea proponamus, quibus tum repellere,



*Repellentia.* tum digerere, seu discutere liceat, de repellentibus tamen superius egimus, de inhibenda fluxione pertractantes. Quibus addere licet emplastrum Avic. ex granatis vino adstringente decoctis, quod optimum est, si præsertim rosaceum permisceatur. Item emplastrum ex foliis portulacæ, & plantaginis vino adstringente, vel posca, vel etiam lacte doloris ratione decoctis, additis pulveribus rosarum, santalorum, corticum granatorum, sumach, rosaceo, atque hordeacea farina, item emplastrum ex lactuca, lenticula palustri, solano, blito, sempervivo majori, lacte decoctis, addito pulvere rosarum rubearum, & foliorum, & baccarum myrthi, & sem. sumach, nec non & oleo rosaceo, vel violaceo, ac suf. quantitate farinæ hordeacæ. Item emplastrum ex sempervivo, & corticibus malorum punicorum in vino decoctis, & sumach, & farina hordei compositum, quod à Gal. proponitur 2. ad Glauc. c. 2. Emplastrum quoque diachalciteos, diapalma vulgo appellatum, quod tamen vinum austerius, ætate medium, substantia non crassum, sed quam maximè fieri potest, lucidum, ut sit tenuiorum partium, receperit, ut monet Gal. 1. de comp. med. per. gen. 4. Ut autem vinum ab emplastro recipiatur, liquefacto medicamine, vinum infundito, dicebat Gal. ibidem, manibus conterens, dum excipitur, tempereturque nec humidum fluctuet, quod non contuso, & emollito pharmaco mixtum sit. Valet etiam idem pharmacum, ut ibidem testatur Gal. si rosaceo liquetur, præsertim omphacino, vel myrthino oleo, aut si receperit succum hyosciami, aut mandragoræ, aut solani, aut lactucæ, vel lenticulæ palustris. Sæpissimè autem usus sum fœlicissimo cum successu unguento, & cerato albo. Iterum tamen moneo, quando urget dolor, iis utendum esse, quæ repellendi, quod influit, sine dolore vim habeant, & propterea si ob tensionem dolor urgeat, quæ nimis adstringunt, sunt fugienda, ut quæ partem tendendo, atque cogendo majorem dolorem concitent. Unde Gal. 1. de comp. med. per gen. 4. Nam tales affectus, de rheumaticis morbis loquebatur, ne quidem ferunt nimis adstringentium impositionem, ut à quibus dolore, ac tensione molestantur, & 2. ad Glauc. 2. Quæ enim vehementer intendunt, atque idcirco dolorem afferunt, plus obsunt, quam exsic-

*Fugienda  
nimis ad-  
stringentia.*



exsiccando profint: quare quæ repellendi gratia adhibentur, urgente dolore non solum refrigerantia sint oportet, ut superius ex Gal. dicebamus, sed etiam anodyna.

Quæ verò digerere impactum jam sanguinem valent, omnia *Digerentia* calida sunt, & tenuium partium, talia enim sanguinem attenuant, *qualia*, & in vaporem vertunt, atque cutim rarefaciunt, ut diffilare is vapor facile possit. Non eadem autem caliditas cuilibet digerendæ materiæ est conveniens, & in qualibet parte, & in quolibet corpore, nam materia calida, ac tenuis, & in superficie corporis existens, & in parte rara, & rari, ac mollis habitus corpore, moderatè calidis discutitur, at frigida, & in profundo corporis, existens, & cute densiori oblecta, & in densi, ac duri habitus corpore calidiora requirit, ac etiam, quæ exsiccandi vim habeant, ut penitus possint materiam contentam absumere, tum siccitate, ut dicebat Gal. 5. de simp. med. fac. c. 4. materiam ebibendo, tum caliditate totam alterantia partem. Et propterea Gal. 9. de simp. med. fac. cap. de paronychia, hujusmodi statuebat esse ex tertio ordine calefacientium, & exsiccantium cum partium tenuitate, quæ tamen in crassa materia ableganda sunt, ut quæ, quod subtile est digerant, crassum verò ad lapidosam duritiem convertant. Et propterea Gal. 5. de simp. med. fac. cap. 8. in induratis affectibus à crasso, & lento humore congelato satis esse dicebat, si sint secundi, aut tertii ordinis excalefacientium, primi exsiccantium. Hinc Gal. digerentium medicamentorum duo genera constituit, quorum primum leniora continet, quæ areotica vocat, & sunt moderatè calida, parum, aut nihil sicca, vel etiam non nihil humida, ac præterea tenuium partium, quæ materiæ tenui discutiendæ sunt apta, non in profundo positæ, neque dura, ac densa cute oblecta, cujusmodi sunt flores camæmeli, ac meliloti, anethum, fænugrecum, semen lini, cro- *Digerentia* *leviora*, cus, althea, farina hordei, orobi, lupinorum, furfur, vinum dulce, aut subdulce, sapa, oleum camæmelinum anethinum, semen lini, liliorum alborum, cheirinum, & hujusmodi; talia enim præter quam quod materiam attenuant, cutim etiam laxant, ac rarefaciunt, ut promptissimè perficiatur digestio. Alterum verò genus fortiora continet, quæ diaphoretica appellat, & effi-  
caciter



*Digerentia  
fortiora.*

caciter calefaciunt, atque exsiccant cum tenuitate partium, ut est oleum rutaceum, laurinum, de terebinthina, hypericinum, balsamum artefactum, ammoniacum, bdellium, galbanum, opopanax, sulphur, oleum vetus, medullæ veteres, & adipēs, præsertim calidorum animantium, & hujusmodi: igitur summis partibus inflammatione affectis, leviora sufficient, materia enim non est in profundo corporis, ac præterea calida est, nec crassa valdè, ut levioribus discuti valeat. Sed & ea ratione his uti debemus, quod, quæ calidiora sunt, acrimonia non vacant, & propterea dolorem inferunt, & rursus phlegmonem concitant, digerere enim ita per halitum debemus, dicebat Gal. 5. de simp. med. fac. c. 12. ut morsus absit, unde Gal. lib. Art. med. c. 95. Maximè verò evacuabis, si in spatiis intermediis aliquid contineri conjectura assequeris, & scarificationum auxilio, & medicaminum, quæ vim habeant dispergendi.

Sed quoniam omnia discutientia vires calidas habent, ejus vero temperaturæ effectus est mordere, quando caliditatis modum exceßerint, cavenda ex eis sunt vehementissimè calida, ac tum præsertim, cum patiens locus in superficie fuerit, neque enim paucus excitabitur dolor, si præter proprium affectum insuper mordeatur, omnisque præterea dolor fluxiones commovet. Quod igitur mediocrem caliditatem obtinet, in his sensum doloris non invehit, atque eo amplius omni dolore vacat, si humidum extiterit. Et quidem quicquid per summa hæret, potens est id medicamen dispergere, quod etiam validas non habuerit ad dispergendum vires. In levioribus igitur affectibus sæpè sufficit inunctio ex oleo camæmelino, liliorum alborum, atque anethino permixta idonea repellentium quantitate. Quòd si hæc non sufficiant, parari fomenta poterunt, puta ex vino dulci in quo bullierint flores camæmeli, meliloti, rosarum rubearum, anethum, fœnugræcum, & hujusmodi, vel cataplasma, aut emplastrum ex sapa, vel vino dulci, & furfure, addito oleo camæmelino, vel anethino, & repellentibus. Aliud etiam parari poterit ex granatis dulcibus vino dulci decoctis, addito aliquo ex dictis oleis, & hordeacea farina. Item aliud ex farina hordei, orobi, lupinorum, & oxymelite, addito aliquo ex dictis oleis. Fre-

quen-



quentissimè autem utor, & fœlici cum successu emplastro confecto ex floribus camæmeli, meliloti, nec non & anetho, & fœnugræco, & ejus seminibus, & lini seminibus ex vino, vel aqua decoctis, prout magis, aut minùs digerere voluero, & lacte etiam, si dolor urgeat, & quando cupio, ut & aliquid repellentis habeat, addo flores rosarum rubearum, plantaginis folia, & hujusmodi, vinumque adstringens accipio; his adjungo oleum camæmelinum, anethinum, liliorum alborum, & repulsionis gratia rosaceum, & myrthinum. Demum cum hordeacea farina emplastrum conficio, cui vis inest digerendi, atque repellendi, & insuper dolorem sedandi; fœlici etiam cum successu sæpè usus sum cataplasmate ex hordacea farina, floribus camæmeli, & posca aquosa, addito rosaceo, & violaceo oleo. At inflammatis, quæ in profundo sunt, partibus, fortiora discutientia convenient, à quibus dolorem haud timemus, eo quod summæ partes sint sanæ, sicuti & quando nimis densa cute materia tegitur, & omnino pars densa, ac dura est affecta; non enim satis est considerare, quanta sit medicamenti vis, atque efficacia, & eam ad digerendam materiam conferre, sed insuper necessarium est perpendere, quanta futura sit vis medicamenti, ubi ad partem affectam pervenerit; in itinere enim vis ejus exolvitur. Unde Gal. 13. Meth. 19. Ex laborante etiam loco didicimus, quod quæ in summo corporis phlegmone laborant, ea propriis phlegmone remediis curantur, quæ in alto sunt corpore, si cum his aliquod acrium medicamentorum sit immixtum; resolventur enim eorum vires, dum altè descendunt. Quod etiam diffusius tradidit 2. ad Glauc. 2. Et 13. Meth. 5. Et aliis in locis. Calor quoque difficilius in partem duram, ac densam sese insinuat, quàm in raram, & mollem, & propterea fortiora convenient affecta parte dura, ac densa, quàm rara, & molli, & eo magis, si in profundo extiterint. Unde Galenus libro Art. med. capitulo nono: Quòd si summæ quidem partes omni noxa caruerint, id verò, quod evacuari oporteat, in penitioribus partibus fuerit, intendendus, atque augendus dispergentis medicaminis calor, cum dubitandum sit, ne priusquam profundas attigerit partes, interim vires amittat. Neque tamen ex eo superiores partes aliquem dolorem sen-



tient, cum omni vacent affectu. Quare nunc hæc duo simul invitant ad calidorum pariter, & acrium medicaminum usum, & summæ partes, quæ tolerant, & profundæ, quæ egent. Et paulo inferius: Affectæ partes, in quibus fluxionis superfluitas retinetur, nonnullæ quidem igitur raræ, & laxæ, & molles natura existunt, nonnullæ autem densæ, ac pressæ, ac duræ. Priores igitur facile evacuantur, reliquæ autem acrioribus evacuantibus, ac præterea tenuiores partes habentibus indigent, atque eo etiam magis, quanto profundiorum situm habuerint. Illud autem animadvertendum est, cum summis partibus laborantibus applicari debeant medicamenta, quæ dolorem non inferant, quando cataplasmatibus, aut emplastris uti proponimus, non solum non esse applicanda dura, verum nec talia, quæ ex calore partis exsiccata possint dura evadere; talia enim partem exasperant, comprimunt, atque contrahunt, & sic dolorifica existentia, ut dicebat Gal. 13. Meth. 5. rursus phlegmonem in ægra parte excitant.

*In inflammatione partium præcipuè adstringentia permiscenda sunt cum digerentibus.*

Si verò pars inflammatione obfessa fuerit aliqua ex præcipuis, quarum opere, vel etiam virtute aliæ partes indigent, cuiusmodi sunt hepar, lien, ventriculus ne à solventibus virtus eorum exoluatur, quæ consistit etiam in compage, & firmitate solidæ earum substantiæ, atque spiritibus, adstringentia erunt admiscenda, quæ substantiam solidam firment, ac tueantur, & spirituum dissipationem prohibeant. Sed, quoniam talia sibi ipsis viam præcludunt, ut penetrare valeant, aliqua tenuium partium, cuiusmodi sunt aromata, erunt permiscenda, nisi ipsa aromata fuerint, cum enim talia subtilium sint partium, vim adstringentem ad partem ducunt; sicuti & à valde refrigerantibus cavendum est, dum percussioni incumbimus, ut quæ nativum calorem extinguunt, immo & ab actu refrigerantibus: quod quidem prius docuerat Gal. 2. ad Glauc. 2. clariusque lib. Art. med. 95. sumens exemplum à jecinoris phlegmone his verbis: Sed præter supradictas alia est indicatio ab hepate ipso, veluti à venarum principio, nam cum non tantum seipsum regere natura aptum sit, ut pleræque animalis partes, sed venis præterea virtutem largiatur, periculum imminet, ne si ejus vigor madefacientibus, ac relaxantibus cataplasmatibus fuerit resolutus, & ipsum primum  
ad



ad sui opus, atque omnes subinde venæ ejus ratione imbecilles efficiantur. Quare in ejus curationibus aliqua ex adstringentibus medicaminibus miscere oportet. Sed quoniam in profundo admodum loco situm est, dubitandum erit, ne adstringentis medicaminis vis debilitetur, nisi ab aliqua alia subtilium partium substantia, qualis aromatum est, traducatur. Melius verò fuerit, si & ipsum adstringens medicamen unum protinus ex aromatum genere fuerit: nam si duas habuerit natura insitas qualitates, ac potestates, valentiùs operabitur. Valdè refrigerantia timuit Gal. 2. ad Glauc. 2. actu refrigerantia 13. Meth. 12. Partibus ignobilibus, ut quæ circa articulos sunt, actu refrigerantia possunt applicari. At si jecur phlegmone laborare cæpit, actu frigida non sunt applicanda, quæcunque ea sint. Aliud etiam nobis observandum est in electione medicamentorum, quibus utamur, tum ad repellendum, tum ad discutiendum in inflammatione, & illud natura partis suadet; cum enim ex partibus quædam sint, quæ acutissimi sunt sensus, in iis cavere oportet, quæ acria sunt, non simpliciter tantum, sed in respectu ad eas partes, & omnino mordere possunt. Unde ut in inflammatione oculorum, non quæcunque admittimus repellentia, sed mordacitate carentia, ut lac, aquam rosaceam, albumen ovi, sief album sine opio. Similiter neque resolventia, sed citra mordacitatem, ut est fœnugræcum, althea, flores camæmeli, anethum, nec etiam quacumque forma, pulveres enim, nisi fuerint tenuissimi, asperitate dolores concitant, sed parato ex eis, exempli gratia, decocto sub forma fomenti. Patet ergo & à partis substantia, ut animadvertit Gal. lib. Art. med. cap. 95. & 2. ad Glauc. 2. Et 13. Meth. 11. & 12. & à positu, ac dignitate partis sumendam esse indicationem in topicorum auxiliorum electione. Verùm & partis conformatio, ut ibidem suadet Gal. quomodo derivandus sit humor in inflammata parte contentus, nos docet, ex ea enim cognoscimus, partes hepatis convexas per urinam magis evacuari, concavas verò per alvum. Et renes per urinam, uterum per venæ sectionem in maleolo, aut talo, & menstrua: cerebrum per venam in fronte sectam, aut hirudines post aures affixas, item per palatum, aures, & nares, & sic de reliquis. Scarificationes, quas etiam superius



proposuimus tanquam remedium ad evacuandum sanguinem in particula phlegmone obseffa contentum, palam est, in partibus exterioribus solummodo locum habere posse. Nostri tamen temporibus ferè exoleverunt, neque enim, nisi quando inflammatio gangrænam minatur, iis uti consuevimus. Si cui tamen placuerit iis uti Gal. auctoritate fretus; eas enim citatis jam locis proponit, & ratione ipsa ductus, animadvertat eas non convenire, adhuc perseverante fluxione, & nisi sublata sit fluxionis materia; plus enim esset id, quod attraheretur ad partem, quam quod evacuaretur. Unde Gal. 2. ad Glauc. 2. Sic & aliud quolibet membrum patiens scarificamus, si non amplius humores influant (tunc enim magis humores irritaveris, ac malum duplicaveris) sed quando jam totum corpus expurgatum fuerit, neque jam aliquid influit, aliquid verò, quod pridem fluxerat, in membro continetur. Et 13. Meth. 5. Ubi distentæ vehementer glandulæ sunt, vel alia denique particula inflammata, cogimur toto corpore prius evacuato, ipsum scarificare. Scarificationes verò neque valdè profundæ esse debent, neque nimis superficiales, sed mediocres. Si inflammatio fuerit erysipelatis particeps, magis refrigerandum, quam si simplex esset inflammatio; in erysipelate enim, ut dicebat Gal. 13. Meth. 8. refrigerationis indicatio vacuationis indicationem superat, cum in phlegmone res è converso se habeat. Unde & 14. Meth. 7. Erysipelas ampliolem refrigerationem exposcit, quam inflammatio. In œdematosa verò inflammatione è converso minus refrigerandum, quam in phlegmone propter materiæ frigiditatem. At in scirrhusa non solum minus refrigerandum, verum etiam emollitioni studere oportebit. Quæ victus ratio sit servanda, parte vulnerata inflammatione obseffa, ex iis est manifestum, quæ superius dicta sunt generatim de victus institutione in vulneratis. Quæ spectant ad partium inflammationem, in particulariori tractatione prosequemur, ubi materias medicas cuilibet parti congruentes recensebimus.



## CAPUT LXVII.

*De sorditie, ac putredine, & corruptione in vulneribus.*

**N**onnunquam evenit, ut in vulneribus puris illius laudabilis vice generentur copiosæ sordes, crassæ adèò, & viscidæ, ut difficulter à parietibus vulneris amoveri possint, in quas etiam sordes interdum abeunt carnosæ ipsæ partes. Aliquando purulenta materia variæ consistentiæ, & pravi coloris in multa copia ab ipsis vulneribus profluit, ut & caro ipsa, & molliores omnes partes colliquari videantur, & in graveolentem putredinem secedere. Sæpè etiam caro ipsa flaccida, & mollis, immò crustosa, cadaverosa, & putrescens visitur, à qua pravi, & foetidi vapores elevantur, via profectò ad sphacelum; is enim si ulterius malum progrediatur, subsequitur.

Quòd vulnera fiant talia, in causa est, aut corporis plenitudo, aut cacochymia insignis, aut aëris pravitas, aut vulneratæ partis intemperies, vel plura ex his. In sanguinis enim plenitudine dum major transmittitur sanguinis copia ad vulneratam partem, quam ab ea confici aliquo modo possit, calor nativus partis opprimitur, ut ab ipso regi nequaquam possit tanta sanguinis quantitas, quare non potest non putrescere, cum præsertim ab eo viæ obstruantur, & modò in saniem virulentam abire, modò etiam calorem ex parte suffocando impedita transpiratione esse in causa, ut ipsa partis substantia corrumpatur, & cadaverosa fiat. In cacochymia verò insigni partim languet calor naturalis ob penuriam boni succi quo fit, ut quantitate sit paucus, partim etiam à pravorum succorum copia opprimitur, unde cum non desit excrementorum materia, multa necessariò generantur, & ea putrida, ac virulenta ob agentis, ac materiæ vitium, & pereunte ipso partis calore, ipsa quoque partis substantia corrumpitur. In aëris pravitate, quot mala sanis etiam corporis partibus adveniant nemo ignorat. Quid ergo existimandum est posse accidere parti vulneratæ ab aëre pravo, inquinato & putrido? Profecto tangens partes proprio, & naturali tegumento destitutas, nativum partis calorem



calorem corrumpet, & eas putrescere coget, sed & humores corrumpit, & spiritus inficit. Hinc videmus in malis aëris constitutionibus, & in pestilenti potissimum aëre ex minimis vulneribus corruptiones maximas contingere, & ægros celerrimè interire.

*Signa causarum.*

Ob intemperiem verò partis languet ejusdem nativus calor, accedente itaque vulnere major redditur imbecillitas partis, ut ob id ad ipsam omnia supervacua promptè transmittantur, quæ ipsius potentiam magis dejiunt. Aëris quidem vitium morbi populariter grassantes, iidemque lethales ostendent. Plenitudinem verò, & cacochymiam propria signa ostendent quæ modò recensere esset ab re. Intemperies partis, si considerabitur, quomodo constitutum esset corpus antequam vulnus infligeretur, haud facili negotio innotescet.

*Præfagia.*

Quando hæc vulneribus superveniunt, timendum est ægro-  
tanti, putredo enim facilè serpit, & pars emoritur. Sæpè etiam  
communicatur venis mala putredo, quæ ægrum tollit.

*Curatio.*

Sordities deterforia postulat, & ea quidem validiora, quo  
& ipsa fuerit major: sed & causæ habenda est ratio, unde ro-  
borandus est partis calor, plenitudo tollenda, si adfuerit: si verò  
cacochymia fuerit in causa, purgandum est corpus. Pariter pu-  
treto mala, atque corruptio valdè exsiccantibus est corrigenda,  
calor partis est roborandus, dissolutio ipsius prohibenda. Atque  
si aëris pravitas fuerit in causa, corrigenda, & contra eandem  
muniendum corpus, si cacochymia, purgandum, si verò ple-  
thora, mittendus est secta vena sanguis, levioribus enim præsi-  
diis, & quæ longiori tempore id faciant, non est procuranda plenu-  
dinis sublatio imminente tam gravi affectu. Et quoniam, quæ  
præsentibus morbis facimus, iisdem imminentibus sunt adhiben-  
da, si ex apparatus corporis hæc mala futura timuerimus, protinus  
toti consulendum, est, parsque exsiccanda, & calor roborandus.  
Si verò ex aëris vitio, illud corrigendum, &, ne ab eo afficia-  
tur corpus, providendum. Intemperies partis contrariis erit tollen-  
da. Et quoniam de sanguinis missione, atque expurgatione, &  
omninò de totius providentia aliàs tractatum est, hic tantùm ea  
proponemus, quibus aëris vitium corrigi possit, & contra idem  
corpus



corpus defendi, vel ab eodem etiam liberari, nec non & quibus sordes abstergere, & putredini, ac corruptioni partis resistere, & quæ presens est, emendare valeamus.

Ad aëris igitur vitium corrigendum valebit pavimenti irro- *Corrigentia*  
ratio ex aceto, & aqua ros. & florum citri, ac myrthi, aceto *aëris pravi-*  
etiam, vel aqua, aut vino infundi, vel incoqui poterunt rosa- *tatem.*  
rum folia, lavendulæ flores, lauri, & juniperi baccæ, cortices  
citri, aurantiorum, & eorundem semina; pariter scordium, pim-  
pinella, melissa, cinnamomum, gariophilli, nux miristica, campho-  
ra, fantali, radices angelicæ, cyperi, calami aromatici, & hujus-  
modi, & ex infuso hoc, vel decocto pavimentum irrorari. Suf-  
fumigia maximam vim habebunt ad aërem expurgandum. Con-  
fici autem poterunt ex ladano, styrace, benzoino, thure, gum-  
mi juniperino, baccis lauri, atque juniperi, corticibus, & semini-  
bus citri, atque aurantiorum, gariophillis, nuce moschata, cin-  
namomo, ligno aloës, camphora, fantalis, radicibus angelicæ, sty-  
raci liquida, moscho, & ambra, terebinthina, vel abietina lachry-  
ma, aut tragacantha, aqua rosarum dissoluta exceptis, quantum  
videlicet sit satis, ut trochisci, vel pasta, pro suffitu possit confi-  
ci. Ex iisdem, & aceto, vel ros. aqua, aut utroque parari de-  
coctum poterit, super ignitum ferrum, aut candentes lapides in-  
fundendum. Æstate tamen frigidiora potius convenient, hieme  
vero etiam calidiora locum habebunt. Ne vero aëris pravitate ita  
afficiatur vulneratus, ex jam dictis, addita insuper theriaca, vel  
Mithridatio parabitur pomum odorandum. Non minus ex usu  
erunt epithemata, & alia, quæ proposuimus ad inhibendam ma-  
lam putredinem Capite de Alterantibus.

Sordes abstergentur lotionibus ex aqua falsa, vel lixivio ad- *Abstergen-*  
dito melle rosaceo, & paucis Ægyptiaco, vel ex lixivio, in quo *tia.*  
bullierint absinthium, marrubium, apium, centaurium utrum-  
que, myrrha, aloë, & hujusmodi, addito melle rosaceo, & etiam  
Ægyptiaco, item unguento Isidis, Apostolorum, pariter mundi-  
ficatorio illo parato ex terebinthina, melle ros. farina hordei, &  
lupinorum, succo apii, & absinthii, quod erit fortius, si eidem pro  
qualibet uncia addatur scrupulus, vel semidrachma præcipitati.  
Egregiè inter simplicia abstergunt utrumque veratrum, hermo-  
dacty-



dactylus, nitrum, cornucervi ustum, leviora sunt aquæ thermales falsæ, & nitrosæ, aloë, myrrha, terebinthina, aristolochiæ utriusque radix, marum, marrubium, apium, absinthium, utrumque centaurium. Herba regina appellata præclare abstergit. Ex his varia componuntur medicamenta, quibus in contumacioribus sordibus adduntur & cathæretica appellata, ut cinis tartari, æs viride, præcipitatum, calcanthum rubificatum, & hujusmodi. Subsequens pharmacum præclare abstergit.

*Abstergentia composita.*

℞. *Succi herbe regine un. vj.*

*Infus. rosar. simpl.*

*Succi apii ana. unc. iij.*

*Mellis optimi lib. j.*

Misce, & bulliant simul ad electuarii consistentiam, tunc adde

*Cornu cervi usti*

*Myrrha*

*Aloes*

*Farina lupinorum*

*Herbe regine ana drach. ij.*

*Veratri nigri drach. j.*

Misce. Non leviter abstergit fyr. ex melle, & succo herbe regine confectus, isque, si addatur terebinthina, & farina hordei, ac lupinorum, & alia ex suprapositis erit præstantissimus. Pulvis confectus ex æquis portionibus myrrhæ, aloes, farinæ lupinorum, centaurei minoris, rad. aristolochiæ, & veratri nigri nec non & cornucervi usti, præclaram operam præstat, cui in contumacioribus sordibus addetur præcipitatum,

Verum in usu horum abstergentium animadvertendum, ut, quam primum vulnus à sordibus purum est redditum, ab eorum usu desistamus, quæ vehementer abstergunt, carnem enim, quam antea sordes protegebant, morderent, & colliquarent, cavitationemque majorem redderent, ut dicebat Gal. 2. de comp. med. per gen. cap. 22. sed & dolorem concitando fluxionem advocarent, caro enim pura mordacitatem medicamentorum statim experitur, at quando sordibus tegitur, ad eam non pertingit medicamentorum mordacitas. Unde & Gal. 4. de comp. med. per gen. cap. 2. Præterea notandum venit pura ulcera ab iis medicamentis,



mentis, unde prius, cum essent sordida, nihil rosionis percipiebant, (sordes, & humiditatis copia id genus ulceribus incumbens, ut idemmet Galenus dicebat eodem lib. cap. 1. veluti propugnacula quædam ulceratis partibus facta rosionem valentibus pharmacis adimunt, solvuntque) nunc erodi, morderique. Quæ causa est, ut à valentioribus absterforiis pharmacis ad mitiora levioraque digrediamur, ubi ulcus adamussim purum invenerimus. Quemadmodum rursus in sordidis ad magis abstergentia transimus, nisi ex rosione sordida apparuerint. Hoc siquidem Medicis etiam bonis existimatis nonnunquam imposuit, ut ad absterforium valentiùs, acriusque se conferrent: unde iterum ulcus erosum, ex æquo sordidum, vel etiam magis adhuc, altera solutione visum fuerit, carne, quæ id fœdat, à medicamento colliquata: nam ita in pravam saniem degenerat colliquata caro: cæterum quicquid in his ipsis tenuioris substantiæ est, à pharmaco difflatur, reliquum ibidem ulceribus infixum sordida ipsa reddit.

Putredinem vero, & corruptionem prohibent lotiones ex *Inhibentia* aqua salsa, oxycrato, aqua ardenti, si præsertim Ægyptiacum *putredinem* unguentum addatur, quod quidem ad hanc rem est præstantissi- *& corru-* mum, & quando vulnus est patens, ipsum solùm adhibitum, sic *ptionem.* ut tangat omnes vulneris partes, modò natura vulneratæ partis illud admittat, optimè corruptionem non solùm prohibet, verùm etiam sistit. Acetum sale permixtum egregiè corruptionem emendat. Unguentum Isidis & ipsum, seu Apostolorum, & Damascenum, addito præsertim præcipitato, aut calcantho rubificato valdè probatur. Extrinsecus tamen apponendum est aliquod medicamentum, quod vim habeat calorem roborandi, ejusque dissolutionem prohibendi, nec non & exsiccandi, atque putredini resistendi: quare in vino optimo, vel aceto, vel oxycrato incoqui poterunt rosarum folia, santali, folia rorismarini, flores camæmeli, & lavendulæ, & citri, scordium, & hujusmodi, & eo decocto æstate quidem tepido, hieme verò actu calido imbuta linthea extrinsecus parti apponi poterunt. Maximè etiam ex usu est emplastrum ex farina hordei, orobi, lupinorum, atque oxymelite additis camæmeli floribus, & rosis rubris siccis, ane-



tho, fœnugræco, myrrha, & radicibus aristolochiæ longæ, nec non & oleo rosaceo, mastichino, & camæmelino. Iisdem licebit præsentem putredinem, atque corruptionem corrigere. Verùm si his sisti haud possit, ad validiora erit confugiendum, & ad ea interdum, quæ ipsius ignis vires habeant, immo & ad ipsum ignem, quando hæc non sufficiunt, immo & ad ipsius partis sectionem. Unde Galenus secundo ad Glauc. 2. Omne ulcus, dicebat, sive sponte, sive ex percussione factum fuerit, exsiccari desiderat, ut inquit Hippocrates non aspero, hoc est non mordente, neque vehementer irritante præterquam ubi malignum, & cum putrilagine fuerit, talia enim acriora expetunt medicamenta, & quæ ignis vires habeant, qualis est misy & calcithis, & arsenicum, & calx, & sandaracha; etenim non aliter quam ignis adurunt medicamenta hujusmodi; sæpius verò ubi ista cesserint, ipsum ignem adhibemus. Er Avicenna quarta quarti, tract. tertio capitulo nono: Et iterum cum hujusmodi ulcera superfluunt ea corruptione, sit necessarium, ut evellantur cum cauterio, cum igne, aut cum medicamine acuto, aut cum incisione, ut non remaneat, nisi caro sana. Si igitur prædictis haud inhibeatur corruptio, adhibendum erit Ægyptiacum, cui pro qualibet libra additæ fuerint tres drachmæ arsenici sublimati, & semuncia calcanthi rubificati, quod nunquam me fefellit. Et si vulnus fuerit profundum, dissolvi poterit cum vino, vel aqua ardenti, & injici. Aqua etiam plantaginis, in qua sal copiosum, & præcipitatum, vel etiam sublimatum bullierit, non mediocres obtinet vires. Aut si eidem addatur oleum ex calcantho, quod per se adhibitum maximas corruptiones sistit, sicuti & ipsum arsenicum, quod in genere medicamentorum est ultimum. Trochisci Andronis, Polyidæ, atque de minio mediocria excedunt.

Si medicamentis igitur inhiberi corruptio nequeat, ad ipsum ignitum ferrum est deveniendum. At si adhuc ulterius malum procedat, ut servemus, necesse est, ut partem præcidamus. In usu horum medicamentorum, quæ ignis vires habent, cavendum est, ne, quod ab illis provenit, corruptioni perseveranti tribuamus; cum enim partis calor sit valdè debilis, hujusmodi medicamenta non parvam carnis portionem cadaverosam reddunt. Quod  
 si in



si in usu medicamenti persistas, corruptionem ulterius serpere existimans, integram partem facilè corrumpes. Ubi ergo semel, aut bis talia medicamenta admoveris, suppurantia adhibe, permixtis exsiccantibus, quæ te admonebunt, quo in statu sit res; nam si effectus medicamenti id fuerit, in eodum statu dempto suppurante partem comperies, in quo erat, quando suppurans adhibuisti, unde & in eodem perseveres, donec emortua caro decidat, at si corruptio serpat, corruptionem inveniens majorem.

## CAPUT LXVIII.

*De supercrescente carne.*

**S**I vulneri caro supercreverit, quod contingere solet, quando diutius, quam par sit, vulneris detectio differtur, medicamentumque humidum nimis applicatur, non unus tunc est morbus, sed duo, vulnus scilicet, & caro supercrescens. De vulnere jam dictum est. Nunc de aucta carne pertractandum, quam morbum esse in aucta magnitudine constat. Unde Galenus 3. Meth. 6. Est porro is quoque morbus, de hyperfarcosi loquens, ex eo genere, quod in quantitate, magnitudineve partium spectatur.

Obiter tamen animadvertendum non semper superfluam carnem esse morbum in aucta magnitudine; stat enim quandoque superflua caro cum imminuta carnis quantitate. Hoc videtur paradoxum, & tamen est verissimum; id enim contingit, quando mala generatur caro ob malam carnis subjectæ temperaturam, vel ob pravum succum affluentem, ut in ulceribus malis, & cancro-sis licet observare: nemo non asserit superfluere tunc carnem. Sed quomodo dici potest aucta quantitas naturalis carnis, cum deficiat naturalis caro ad explendam cavitatem? Est ergo caro illa morbus in numero, non in aucta magnitudine; pars enim carnosa minimè necessaria, immo noxia superabundat, nisi velimus dicere nomen carnis etiam ad non naturalem se extendere, utpotè quæ vivens est, idcirco quamlibet carnis additionem huius rei respectu dici morbum in aucta magnitudine. Sed hæc



obiter. Superfluens igitur caro palam est sui ablationem indicare, unde Gal. loco citato: Indica autem quæ præter naturam est, primam indicationem, quam etiam veluti metam invenientium remediorum diximus, ipsius scilicet exuperantis ablationem. Hanc natura, quamvis pleraque ad vulnerum curationem attinentia perficiat, efficere non potest, sed id solius medicamenti est opus. Unde Gal. loco citato, at hæc sola medicamentorum ope perficitur.

*Absumentia.*

Quæ carnem absumentur medicamenta, vehementer siccent oportet, ideo Gal. loco citato: Supercrescentis carnis detractio non naturæ opera, sed medicamentis perficitur, quæ vehementer siccent. Porro proxima sunt medicamenta hæc tum iis, quæ valenter detergunt, tum iis, quæ cicatricem inducunt. Sed quoniam non una est omnium natura, neque etiam eadem omnino siccantia in omnibus conveniunt, sed in mollioribus natura corporibus, & partibus mitiora, in siccioribus sicciora; namque &

*Causæ supercrescentis carnis.*

de his intelligi debet, quod dicebat Galenus loco citato, videlicet infirmiores, mollioresque natura mitiora, validiores, siccioresque valentiora postulare. Præterea inspicienda adauctæ carnis causa, nam ejus quandoque in causa est copiosa humiditas assidue fluens, seu quia totus sanguis sit tenuior, seu quia ad vulneratam partem, tanquam ad imbecilliorē, excrementa confluant, ideoque etiam siccantia sint oportet juxta mensuram superabundantis humiditatis, quæ quandoque ita contumax est, ut licet caro sit modica, nequeat tamen à communibus extirpari, victa eorum vi ab ipsa superflua humiditate si hæc inspexerimus in aliis naturis, & in aliis casibus, comperiemus à parvis exsiccantibus (ut tamen hæc parva siccantia in genere absumentium carnem comprehendere intelligantur) interdum absumi superfluam carnem, aliquando validiora requiri, aliquando etiam ad ea, quæ veluti ignis, carnem destruunt, atque devastant, vel ad ipsum ignem, quod tamen rarissime contingit, vel ad manualet operationem, quæ novacula, aut forcipe perficiatur confugiendum esse.

Leviora igitur sunt alumen combustum, pulvis hermodactylorum, radicū veratri nigri. Filamenta arida, & spongia incisa inter hæc collocantur: verum si diligentius inspiciatur, ab

his



his non tollitur re vera superflua caro, tolli tantum videtur; contingit enim aliquando tumidulam esse carnem, eò quòd aliqua sit humiditate imbibita, qua à filamentis, vel spongia exucta, vel absumpta, subsidet caro, & videntur filamenta eam absumpsisse, cum tamen non nisi humiditatem, quæ superfluae carnis speciem efficiebat, absumant. Fortius autem exsiccant si in aluminosa aqua madefiant, dein exsiccentur; at alumen, & reliqua mox enarrata verè carnem absumunt, leviter tamen, unde in multa superflua carne, vel in contumaci humiditate parum, vel nihil proficiunt, sed cogimur ad validiora ascendere, videlicet ad ea, quæ carnem longius devastant, quæque septica dicuntur, quorum cum duo sint genera, ut monet Gal. 5. symp. 12. leviora videlicet, quæ extimam superficiem non transcendunt, eò quòd ignea quidem sint, & quandam vim causticam habeant, verum paucam, atque tenuioris essentiae existunt, & ob id cathæretica, seu detractoria nuncupantur: & vehementiora, quæ propter fortio-  
*Septic 1.*  
 tiorem vim causticam, & minorem partium tenuitatem altius subeunt, & carnem uberius colliquant, relinquunt enim carnem veluti cadaverosam, decolorem videlicet, laxam, humidissimam, parvumque dolorem excitant, in vulneribus rarò ad hæc fortiora cogimur, sed prioribus rem totam peragimus, ad ea autem pertinent unguentum Apostolorum, Isidis, Damasceni, Ægyptiacum, præcipitatum, alumen combustum, ærugo æris. His fortiora sunt oleum calcanthi, aqua fortis Chymistarum, oleum sulphuris, ut quasi ad vera septica accedant, auri pigmentum cum butyro præclaram operam præstat, sublimatum, realgar, & arsenicum sunt extrema. Atqui in vulneribus plerumque priora sufficiunt, & nullam vidi in vulnere carnem, quæ Ægyptiaco, atque præcipitato non fuerit eleganter detracta, si non una, iteratis saltem vicibus. Sed principem locum ipsi præcipitato deferimus, satis enim fortiter carnem absumit, altius non subit, ut ob diuturnam moram vereri possimus aliquid mali ab eo, & citra dolorem effatu dignam operam suam præstat. Rarissimè cogimur ad usum olei ex calcantho devenire: quod si fortiora septica non conveniunt, seu potius necessaria non sunt, tantum minus quæ escharotica dicuntur, vehementissima vi caustica prædita, qua carnem urunt,



non secus ac ignis, ob idque, ut ignis, escharam inducunt, à qua escharotica dicuntur, quod à maxima sua caliditate, quæ in substantia crassa, & terrea essentiam habet, obtinuerunt, & profundè pertinaciter agentia dolorem concitant maximum, veluti si stips carni infingeretur, quale est causticum ex aqua saponis paratum.

## CAPUT LXIX.

*De variis febrium generibus in vulneribus.*

**N**ON unius generis supervenire consueverunt vulneratis febres, aliæ siquidem ortum habent à spirituum agitatione, & effervescencia propter animi motus, puta iram, timorem, aut corporis: aliæ generationem puris consequuntur, juxta illud Hippocratis. Dum pus conficitur dolores, & febres magis accidunt, quam confecto pure, aliæ inflammationem, aliæ corruptionem, & putredinem, aliæ denique apparatus morbificum; priores duæ sunt diariæ, postremæ, putridæ, quæ inflammationem sequuntur, modò diariæ sunt, modò putridæ. Ab his nonnunquam in hecticam fit transitus. Primum ephemerarum genus ut plurimum statim à principio accidit, alterum in puris confectio-  
ne, videlicet circa quartam, nec tamen semper contingunt, sed quandoque, sicuti neque putridæ, quarum quidem quæ apparatus morbificum consequitur, sæpius quidem circa primos fit dies, aliquando etiam posterius. Quæ verò putredinem, & inflammationem partis, solummodo quando putredo, & inflammatio est in parte. Verum quidem est quandoque ephemeram primo incipere, subsequique deinde putridam, ut à principio statim etiam putrida ratione putredinis partis supervenisse videatur.

*Quanti momenti sit hæc tractatio.*

Supervacanea omninò, & præter rem videbitur hæc febrium tractatio, cum alterius id sit negotii: sed qui vulnera quotidie tractant, & qui præsertim castra sequuntur, quanti sit momenti febrium in vulnerato cognitio, & ad præsagium, & ad ægrotantis salutem, optimè norunt; Quæso ignorans, an febris, quæ supervenit vulnerato, sit ex animi motu, an ex inflammatione, an

ex



ex apparatu morbifico, quomodo rectum poterit proferre iudicium de ægrotantis salute, aut morte? Nonne scimus ab exiguis vulneribus secundum propriam essentiam, & ratione partis affectæ mortem contingere? Subsecuta febre mali moris ob apparatus morbificum, quis malum eventum præfagiret, nisi cui natura supervenientis febris esset cognita? Si vulnerato in capite superveniat febris, quis rectum proferret iudicium, ignorans, num ex animi affectu, an ex generatione puris sit genita, an potius ex inflammatione, vel cohibita sanie sub cranio? aut quomodo laboranti succurret, si unam ab altera non distinxerit? si quæ ob inflammationem, aut pus cohibitum, judicaverit à generatione puris, ut in pluribus magnis vulneribus fieri solet, ortum habere, quid erit de ægrotante? aut si quæ à generatione puris, vel exagitatione spirituum ob animi motus è converso judicaverit à retenta sanie subsequutam, nonne sectiones faciet & terebrationes inutiliter, & cum ægrotantis periculo? Decet igitur Medicum elegantem, qui methodo vulnera curat, seu potius vulnerati saluti consulit (non enim tantum vulnus sanat, sed vulneratum etiam) non autem Empyricorum more negotium ægrotantis tractat, statim ac febris invadit, eam in suam causam referre, tum ut certius futura possit præfagire, tum etiam, ne aut, quæ fieri deberent, omittat, aut quæ minimè conveniunt, ea in ægrotantis detrimentum in usum revocet. Verum quidem est alterius esse negotii febrium doctrinam tradere, verum non cuiuscunque est, quod de febribus alibi pertractatur, ad vulnera applicare, & multa etiam omittuntur in ea universali febrium tractatione, quæ hic particularius sunt exprimenda.

Vulnerato igitur à febre correpto, in id elaborandum, ut quam primum nota sit nobis febris illius natura, & ut ex ea vulneris status nobis innotescat, & percunctantibus assistentibus de futura salute ægrotantis, non temerè, sed maturè, & firmo nixi fundamento ex arte possimus eventum præfagire, aut quid de superveniente illa febre sit sentiendum. Et quoniam hæctica rarissimè ad vulnera consequitur, sed tantum ubi in ulcera permurantur, & longo temporis spatio, nisi forsan ob vulnus pulmonum, totum negotium ad id reducitur, ut dignoscatur, num  
febris



*Signa ephemeræ.*

febris sit ephamera, an putrida, & si putrida, an ob inflammationem partis vulneratæ, aut sibi proximæ, & consentientis supervenerit, an ob putredinem in parte vulnerata, vel alia, an ob apparatus morbificum contracta in humoribus putredine citra partis inflammationem. Multa à Gal. proponuntur primo de dif. feb. ex quibus possumus certò cognoscere, num febris sit ephamera, nec ne, in primis enim considerandum proponit omnem ephemeram fieri à causa procatarctica, sed ut reliqua omittamus, consideremus nos, quæ maximè locum habent in vulnerato, duplici enim de causa solent accendi in vulnerato, videlicet ex motu corporis, & animi, ira, scilicet, timore, mœstitia, &c. potest etiam fieri ex dolore. Itaque prægressi motus tam animi, quam corporis vel etiamnum existentes sunt considerandi, atque cum ægrotantis natura conferendi, dein, si febris eosdem statim fuerit consecuta, vel modico temporis intervallo, probabile est febrem illam esse de ephemerarum genere. Similiter si vehementi dolore, ac vigiliis fuerit agitato, & subsequatur febris possumus ambigere, eam esse ephemeram. Sed quoniam & putridæ interdum à causis procatarcticis oriuntur, & interdum etiam mox inflicto vulnere subsequi potest inflammatio, à qua febris, hoc signum cum aliis quidem censendum est vim aliquam habere, per se verò parum admodum esse efficax. Unde si præcesserit aliqua ex dictis causis, aut etiam modo perseveret, considerandum, num febris genita sit proportionalis illi causæ, & quæ in vulnerato conspiciuntur, arguant illam causam. Non enim existimandum est ab omnibus dictis causis eundem affectum provenire. Quibus ira fuit in causa febris, iis ob sanguinis fervorem circa cor pulsus est magnus, creber, & vehemens, copiosiorque est calor, non tamen mordacior: oculi non cavantur, nec calor concidit, quamvis si vulnus fuerit insigne, aut copiosa facta fuerit sanguinis profusio, ex hac una causâ tum decolores reddi possunt, tum etiam iis possunt excavari oculi. Quibus verò mœstitia, pulsus parvi sunt, tardi, languidi, & rari, calorque non adeo copiosus, mordax, & acris. Si timor, iisdem ferè pulsus erunt, qui tristibus, nisi timor fuerit recens, aut etiamnum duret, tunc enim pulsus sunt inæquales, inordinati, vibrantesque quodammodo.



modo. Si cogitatio, corporis tenuitas, oculorum cavitas, & insolita decoloratio sunt majores, & manifestæ magis, quam in tristibus, utrisque tamen oculi sunt sicci. In omnibus etiam animi affectibus urinæ sunt decoloratiores. Ad vigilias verò oculorum sequitur cavitas, qui & calidiores sunt; isti quoque tumentes habent palpebras, easdemque tardè commovent, immo & subtumidam faciem, non resolutis vaporibus. Inflammatio si fuerit in causa febris ephemeræ statim à principio pulsus est magnus, celer, cum copioso, & miti calore, rubent maxillæ, albicat urina, ad locum inflammationis confluentibus succis. Si corporis motus, aderunt lassitudinis signa, vel ulcerosæ, vel tensivæ, vel phlegmonosæ, & sic de singulis. Sed ut certius innotescat, an ephemera sit, considerata sunt alia generalia signa; cum enim ephemera sit citra humorum corruptionem, rationi quoque consonum est, neque in urinis, neque in pulsibus ullum apparere putredinis indicium, unde urina statim mingitur cocta (natura tamen peculiaris ægrotantis considerata; quibusdam enim ob iram urina evadit subjugalis, ut inexpertes adducere possit, ut credant insignem subesse humorum corruptionem) & in pulsu non adest alia inæqualitas præterquam febrilis, nam dilatio est major, & celerior constrictione, quod major sit necessitas attrahendi externum aërem ad attemperationem, quam expellendi fuligines, cum è contra in putridis febribus celerior sit constrictione, eò quòd major adsit necessitas expellendi fuligines à putridis humoribus ad cor elevatas, & non immutatur illa pulsus æqualitas per omne febris tempus: nam à principio usque ad statum sicuti æqualiter crescit calor, ita etiam cum æqualitate augetur pulsus, in putrida verò valdè differt pulsus principii ab eo, qui in augmento, statu, & declinatione deprehenditur, & vice versa. Et ubi febris recessit, protinus pulsus ad propriam redit naturam, cum tamen in putrida adhuc remaneat inæqualitas quædam in pulsu. Sed & caloris modus maximam vim habet id ostendendi: quamvis enim augeatur calor in ephemeris, at tamen hic calor aliarum febrium respectu suavior est, & mitior, & vaporosior, nec solum primo manus occursum, sed posterius etiam. Amplius febres ephemeræ id habent, ut parum sint molestæ,



lestæ, immò facilè per omne tempus tolerantur, & ubi recesserint, nihil relinquunt, de quo conqueri possit ægrotans, sed corpus omninò ad propriam naturam redit, quod non reperies in putridis. Præterea solent ephemeræ cum sudore declinare attenuatis succis ob totius auctum calorem, & ad cutim evocatis. Ex his elici potest, si febris incæperit cum rigore, aut horrore valido (nam & quandoque ephemeræ non levi horrore incipiunt, quando & corpus est cacochymum, & multam exhalationem calidam, & aërem transmittit, quæ tamen neque promptè diffletur; vel ob cutis densitatem, vel ob meatuum stipitationem, ut retenta partes nervosas feriat, & horrorem faciat) vel frigore, & pulsus contractione, etsi malæ per febrem mingantur urinæ, crudæ videlicet, & tenues, aut perturbatæ, & confusæ, & cum adustionis, & corruptionis signis, calorque acer sit, & mordax, & inæqualis, eam febrem non esse ephemeram, sed alterius generis conjectari oportet. Addamus, quod tales febres à principio statim subsequi solent, quod non est de aliis.

*Febris ex  
generatione  
puris signa.*

Accedamus ad aliam febrem, quæ vulneratis accidere solet non rarò, eam videlicet, quæ ex generatione puris contingit; dum enim pus conficitur, dicebat Hip. 2. Aph. 47. dolores, & febres magis accidunt, quam confecto pure, namque ut dicebat Galen. ibidem & Hip. lib. de ulceribus in generatione puris fit veluti ebullitio quædam sanguinis, unde pars concalescit præter naturam, quo calore ad cor perveniente per continuam successionem, fit febris. Non erit autem difficile invenire, quomodo fiat hic præternaturalis calor, & qui naturaliter inest vulneratæ parti, quomodo augeatur, etiam si dixerimus ex vulnere hebetari, si recordati fuerimus, quod aliàs diximus agentes de suppuratione, ea videlicet de causa contingere suppurationem in vulneribus, quod natura partis, seu calor ipsius naturalis nequit tantam alimenti copiam conficere, quantam sanitatis tempore. Eadem ergo sanguinis quantitate ad partem lata in ejus alimentum, quæ prius, & forsan majori, cum natura in subsidium etiam partis affectæ transmittat sanguinem, & spiritum, neque calor partis eam possit conficere, relinquitur, ut quemadmodum dicebat Galenus primo de dif. feb. cap. ultimo ad putredinem convertatur,



tatur, quæ pars redundat, neque in substantiam partis vertitur, & ita quandam præternaturalem caliditatem concipiat. Calor ergo naturalis cum non possit eam materiam in substantiam partis vertere, facit, quod potest, eamque elaborat, & concoquere, ac vincere conatur, & sic fit illa ebullitio materiæ, & neque prorsus corrumpitur, neque etiam prorsus vincitur, sed quoddam medium contingit, quod est puris generatio. Ex hac ergo ebullitione fiunt febres, non aliter, ac in puerperis in generatione lactis contingat. Patet igitur febrem hanc esse de eo ephemerarum genere, quod ad bubones, & inflammationes subsequitur. Quocirca non erit difficile hanc febrem cognoscere, & per carentiam signorum putredinis, & inflammationis, & per jam tradita signa, in generali diariarum, calor enim erit multus verum suavis, pulsus erunt magni, celeres, & frequentes ob necessitatem adauctam, urina erit vel naturalis, vel à naturali parum distans, facilis aderit tolerantia, nullumque pravum symptoma conspicietur, & contingeret in generatione puris, & perinde eo tempore, quo consuevit pus generari in vulneribus, scilicet circa quartam, quamvis pro natura ægrotantium, ac temporis in aliis prius, in aliis posterius generetur.

At si partis inflammatio febrim efficiat, sive ea ephemerâ fuerit, sive putrida, utrumque enim accidit, postquam interdum sola caliditas per partem post partem communicatur cordi, accendunturque spiritus, aliquando verò putres vapores ad cor feruntur ab inflammata parte, videndum, ne nos lateat, ac decipiat; plurimum enim refert nosse, an inflammatio parti supervenerit, nec ne, tum ad præsagium tum ad curationem. Diligentur ergo considerata, quæ ad naturam vulneratæ partis, & adjacentium attinent, & quæ accidentia in parte superveniant, & adhuc quæ supervenirent, si pars illa inflammaretur, alia siquidem contingunt, si cerebrum, aut ejus involucra inflammentur, alia si hepar, & alia si ventriculus, & sic de reliquis, & ex his conjectari oportebit statum ipsius partis. Si qua ergo superveniant parti, quæ sint affectus inflammationem consequentes, veluti est calor, tensio, & dolor, ubi partes sensibiles sunt, gravitas quædam, & hujusmodi, atque febris advenerit, non existentibus in urinis putredinis



tredinis notis (nisi hepar fuerit affectum) conjiciendum est ex inflammatione supervenisse febrim. Quod si pars fuerit insensibilis, aut parum sentiens veluti est cerebrum, ex ejus actionibus læsis signa erunt elicienda, veluti in cerebro ex læsione principum functionum. Sed & in omnibus partibus internis propria symptomata considerata sunt, veluti in ventriculo appetentia, retentio, coctioque alimentorum læsæ, in œsophago deglutitio, quamvis & in aliquibus nonnunquam liceat factam tensionem, & tumorem sensu ipso deprehendere, veluti in ventriculo, & hepate, & liene, & intestinis, & utero, &c. ut superius dicebamus. Quod si febris illa fuerit ephemera, dignoscitur per propria diariarum signa. Si putrida, ex eo, quod systole sit major diastole, quia major sit necessitas expellendi putres fuligines, quam attrahendi aërem externum, calor acrior, & mordacior, difficilisque adsit tolerantia, & prava symptomata comitentur, & nisi putredo communicata fuerit venoso generi, in urinis non aderunt signa putredinis. Illud etiam non ignorandum, inflammationem partium nervosarum pulsus efficere tensum, & ferrinum, itaque ferrinitate in pulsu apparente, procul omni dubio censendum erit ex inflammatione ortam fuisse febrem.

*Signa febris  
ex putredine,  
& corruptione.*

Si verò ex putredine, & corruptione in vulnerata parte oriatur febris, quæ quidem erit de earum genere; quæ ex minera putredinis ortum habent, namque vulnus mineram putredinis continet, præterquam quod aderunt signa ostendentia febrem esse de putridarum genere, ut in pulsu systole diastole major, calor mordacior &c. Qua ad partem ipsam attinent, erunt considerata, ut puris quantitas, qualitas, substantia, odor, pus enim effluens non erit bonum in substantia, sed potius erit materia virulenta, aut putrescens, quàm pus, color non erit albus, sed varius, & interdum permixtæ erunt, quædam fuligines; amplius fœtor non levis aderit, colorque adjacentium interdum immutatus est à naturali ad nigricans, quando videlicet non continetur putredo tantum in excretis, verum etiam in ipsis carnibus. Quantitas verò puris non erit proportionata vulneri, sed vel erit longè copiosior, vel parcior, quam convenerit. Quòd si parcior fuerit, & potius virus quoddam extiterit, verendum est de partis.

corru-



corruptione. Verùm si talis non fuerit, attamen sit materia mala, existimandum est materiam non expurgari à vulnere, sed sup-primi in penitioribus partibus, quod & dolor manifestabit, & gravitas in parte. Ab urinis, nisi putredo communicata fuerit toti, seu venoso generi, sumi non possunt certa indicia, posteaquam urina ostendit solummodo affectiones hepatis, & venosi generis. Exciperem tamen vulnera partium, quæ urinæ excernendæ sunt dicatæ, quoniam & harum partium affectus urina ostendit.

Febris ob apparatus morbificum duplici ratione contingit, *Signa febris* aut enim solummodo ob eam commotionem, & vim illatam na-*ob appa-* turæ putredo accenditur in materia alioqui ad putredinem para-*tum morbi-* ta, non aliter, ac ex laboribus partus aliquando videmus evenire, *ficum.* aliquando vero ex putredine, & corruptione partis communica-  
tur putredo etiam venoso generi, & toti corpori, non aliter, ac in puerperis ex retenta secundina, vel puerperio, ea siquidem putrefacta accenditur putredo in venoso genere, eo quod mate-  
ria ad putredinem disposita in vasis contineatur, quæ idcirco pu-  
tredinem contrahit, quoniam vapores pravi à loco putredinis ele-  
vantur ad venas, qui materiam in eis contentam ad putredinem  
paratam pravius disponunt, & putrefaciunt, quod enim à pu-  
trido tangitur ad putredinem dispositum, fit putridum. Sive igi-  
tur hoc, sive illo modo contingant febres, non unius sunt ge-  
neris, sed variæ naturæ, prout varius est apparatus morbificus.  
Hac enim ratione fit, ut aliquando febres consequantur intermit-  
tentes, quando videlicet materia morbosa est extra venas, vel  
intra venas, verum virtus est robusta, ut possit penitus eandem  
à venis propellere, vel saltem ad venas capillares, aliquando vero  
continua, quoniam videlicet materia morbifica est intra venas,  
& virtus non est adeo robusta, ut eandem possit propellere, aut  
extra venas; aut ad extrema venarum, quod plerumque con-  
tingit.

Amplius prout varia est natura materiæ, quæ ad putredinem *Varia pus-* trahitur, varia quoque sunt febrium genera: aliquando enim *tridarum* tertianæ naturam referunt, modo simplicis, modo duplicis, ali-*febrium sor-* quando quotidianæ, aut exquisitæ, quod raro contingit, aut no-*des vulneri-* bus *super* *tha, venientes.*



thæ, si fuerint intermittentes; rarissimè enim quartana consequitur, cum sit humor maximè putredini reluctans. At si continuæ, quandoque sunt continentes, quandoque verò proportionatæ tertianæ, aut simplici, aut duplici, aut quotidianæ, & quandoque etiam compositæ fiunt febres. Adhæc aliquando sunt benigni moris, aliquando vero mali, & aliæ etiam pestiferæ, pessima enim nonnumquam est, quæ accenditur putredo.

*Signa.*

In genere noscuntur febres ex apparatu morbifico, quod & modus caloris, & urinæ, & pulsus manifesta proferunt putredinis indicia. Num vero ex vulnere accensus sit apparatus morbificus, an potius ex commotione, & agitatione sanguinis, & spirituum, ex statu vulneris notum fiet; ubi enim vulnus benè se habeat, & omninò non fuerit accensæ febris proportionatum, existimandum ex commotione apparatus morbificum putredinem contraxisse. At verò ubi quæ ad vulnus attinent, non bene se habuerint, præsertimque si vulnus purulentum, vel potius putredinosum esse cognoscatur, occasione vulneris accensum fuisse apparatus morbificum existimandum est. Præterea & ex tempore, quo supervenit febris, indicium confirmari potest: namque à principio febris superveniens putrida, potius censendum est ex commotione fuisse concitatam, namque putredines non ita fiunt à principio. Cujus verò naturæ sit febris, ex propria febris forma petendum erit, addendo tamen considerationem ætatis, naturæ ægrotantis, temporis, consuetudinis, &c. Ex his enim poterimus assequi, quis humor magis peccet in febricitante, & magis putredini sit expositus, & ex consequenti cuinam febrium generi magis sit paratus: velle enim cujusque febris indicia hic subicere, nimis excedit propositi nostri limites.

## CAPUT LXX.

### *De præsagiis vulneratorum febrientium.*

**N**On febrium vulneribus supervenientium præsagia quærimus, siquidem ad rem vulnerati id parum facere videtur, quandoque enim nullius momenti ex se est febris; cum tamen adhuc  
in



in summo discrimine posita sit ægrotantis salus; ut in vulneribus capitis est videre, in quibus febris supervenit circa primos dies ob generationem puris, exempli gratia, aut ex spirituum agitatione, quæ quidem nullius est momenti, quod ad ejus naturam spectat, & tamen adhuc laborans periclitabitur, dato, quod vulnus ex sui natura sit lethale.

Quærimus igitur præfagia non febrium, sed vulnerati febrientis: quid videlicet ex febre superveniente possimus conjectare futurum de ægrotante. Ex variis igitur febrium generibus varia præfagienda erunt de ægrotante; namque si febris fuerit ephamera ex causa externa, ut quæ à principio contingit, cum adhuc non sit fluxionum, & inflammationum tempus, nihil certi possumus inferre de vulnerato; de ipsa quidem febre possumus proferre, eam ex se nullius momenti esse, sed & illud erit addendum, quod etiam ex se nullum habet momentum ad salutem, aut mortem; neque enim ob id vulneratus ab aliis supervenientibus redditur tutus, neque ex ea aliquid mali supervenisse, aut superventurum vulneri possumus colligere. Eadem ratione, si ex generatione puris fuerit suborta.

*Quid præfagiendum ex febre ephamera.*

Verum si ex dolore, id poterit præfagiri, quod ipse dolor pollicetur, ut proprio capite dictum est, quandoque enim dolor inflammationem minatur; aut consequitur, & quandoque convulsione est præludium.

*Ex dolore.*

Si verò febris inflammationem consequatur, & à febris magnitudine petendum est judicium; namque major febris majorem inflammationem significat, & à parte ipsa affecta; namque pro partis dignitate, & præstantia variatur periculum, veluti in proprio capite de inflammatione dictum est.

*Ex inflammatione.*

Si ob putredinem, & corruptionem in parte subsequatur febris, prout ea fuerit major, vel minor, & in nobiliori, aut ignobiliore parte, & pejoribus comitata symptomatis, vel è contraria, eo periculosior, vel minus periculosus censendus ægrotantis status, ex ea enim licebit conjicere majorem esse, & pejorem putredinem, & corruptionem, vel minorem, atque leviolem. Sed, quoniam quandoque tales febres ob pus inclusum contingunt, quando ex tali causa fuerint, existimandum est augeri, aut

*Ex putredine, & corruptione.*

minui



minui periculum, prout pus in nobiliori, & majoris momenti parte concluditur, proutque ei facilius, vel difficilius parari potest arte effluxus, & in majori, aut minori quantitate contineatur.

*Ex appa-  
ratu morbifi-  
co.*

Si ob apparatus morbosum subsequuta fuerit febris, sicuti si ea fuerit intermittens, ex sui natura periculo vacat, dicente Hip. 4. Aph. 43. Quocumque autem modo intermiserint, periculum abesse significatur, ita si fuerit continua, periculo non vacat, quod tamen periculum modò est gravius, modò est levius prout major fuerit ipsa putredo, & in præstantiori parte, & magis viribus impar: unde hic habebunt locum quæ ab Hipp. & in lib. præfag. & in Aphor. & alibi dicuntur, attinentia ad iudicia, & ideo ab ipso sunt petenda; non enim exequi propositum est, quæ ad alias artis medicæ partes attinent. Quod tamen ad præsentem locum, admoneo, ut consideretur in istis febribus, num etiam pars ipsa vulnerata sit malè affecta; tunc enim cum duplici ex parte, seu ex causa affligantur vulnerati vires, & una quoque forsan alteri incrementum, aut saltem fomentum præbeat, magis etiam ipsius periclitari salutem existimare oportet.

## CAPUT LXXI.

### *De procuratione vulneratorum in febribus.*

**F**ebbris in vulneratis, nisi ob apparatus morbosum eveniat peculiarem procurationem non exigit, est tamen, quod Medicum admonet, ut studeat inhibendæ ejus causæ, alioquin exitio vulnerato ipsi futuræ. Namque ubi inflammationis principium consequitur, aut conclusum pus, commonefacit, ut ibi nihil prætermittat, quod ad inhibendam fluxionem, & ad sedandam inflammationem faciat: eoque magis si principis partis fuerit inflammatio, hic verò, ut quam primum exitus saniei paretur, eoque citius, quò in nobiliori parte fuerit contenta, & majoris momenti. Quod si pus à superpositis linteis fuerit interceptum, non ob id erit detegendum vulnus, & refrigerandum, sed forcipibus incidenda erunt lintea usque ad vulnus, ut sic effluat sanies:



nies: si verò alia de causa conclusum fuerit, detegendum erit vulnus, & quod impediēbat, auferendum. Similiter si putredinem, & corruptionem consequatur, admonet, ut omni studio eandem coerceamus. Si verò aut ex generatione puris, aut ab externa causa ephemera proveniret, spernenda erit febris, hoc est, non erit à præsidiis abstinendum propter eam febrem, quæ & natura vulneris requirit, & fluxionem inhibere valeant, & alia futura mala prohibere.

Si verò ob apparatus morbificum accensa aliqua putredine orta fuerit febris, peculiarem procurationem exposcit; cum enim ejus causa sit humorum putredo, quæ partim est facta, partim verò in fieri, quod omninò putridum est, evacuandum erit; quod verò semiputridum, & ad putredinem proclivi est, concoquendum, refrigerandum, & exsiccandum: ad inhibendam etiam putredinem plurimum facit, quod humores diffentur, unde tollendæ erunt obstructions, si quæ erunt, & minuenda plenitudo, aut cacochimia, cum hac de causa, tum etiam, ut natura deposita ea, qua premebatur, sarcina, facilius, quod reliquum est, possit conficere. Febris verò ipsius refrigeratio, & humectatio remedia erunt. Itaque ab evacuatione, tum per sanguinis missionem, tum per expurgans pharmacum, prout expedire videbitur, auspicanda erit curatio, inde coctionibus incumbere oportebit, & inhibitioni putredinis, unde cum coctiones à calido innato peragantur, ea convenient, quæ ipsum tum per se, tum ex accidenti adjuvent, facilius enim concoquitur humor biliosus, si attemperetur, pituitosus verò, si attenuetur, & indicatur, ex iis verò, quæ putredinem inhibent, non solum erunt exhibenda, quæ primis qualitatibus id faciunt, sed quando intensioris putredinis est suspicio, etiam ea, quæ à tota substantia id peragunt, de omnibus autem capite de alterantibus actum est. At si natura imbecillior non tulerit insignes evacuationes unica vice factas, per epicrasim eas moliri oportebit. Quod etiam intelligendum est, ubi natura nequit ob materiæ multitudinem, & contumaciam unico apparatu concoquere, tunc enim & per epicrasim instituendæ erunt purgationes, ut sicuti paulatim concoquitur materia, ita paulatim educatur, ut in dies minori reddita,

*Curatio febris ex apparatus morbifico.*



*Victus.*

semper etiam natura reddatur fortior supra residuum. Dum alterationi humorum incumbimus, manifestum est & ipsius etiam caloris rationem haberi posse. Virtus verò convenienti victus forma erit servanda, & quoniam ejus munus est concoquere, idcirco cavendum erit, ne uberiori victu eam à coctione distrahamus. Quod si utrumque eadem victus forma assequi non poterimus, magis erit studendum conservationi virium; indicatio enim ab ipsis sumpta est omnium prima, siquidem ab ipsa sumimus indicationem, non ut à morbis liberemur, sed ut vivamus.

*Tria indicantia in putridis febribus.*

Cum ergo sint tria in putridis febribus, quæ indicent, videlicet febris, ejus causa, & virtus, considerandum, quantam vim ad indicandum habeat unumquodque eorum, & invicem illa conferenda, & si nihil urgeat, prædicta methodus erit tenenda,

*Quando vulneratus febricitat, cautos nos esse oportet in purgationibus.*

at si unum eorum urgeat, vel plura, urgenti, vel urgentiori, si plura urgeant, incumbere oportebit, cæteris, si fieri poterit, non neglectis. Quod si exortum fuerit aliquod symptoma, quod urgeat, eandem legem, & ipsum subibit, habet siquidem tunc symptoma rationem causæ morbificæ. Est & alia vulnerati providentia in vulneribus, ob calorem enim febrilem cauti esse debemus in purgationibus moliendis, ubi videlicet ob inflammationem febris supervenit, validiora siquidem purgantia adhuc magis calefaciunt succos, exagitantque, & ad motum aptos reddunt. Hinc Hippoc. lib. de frac. com. primo, fracturas cum vicere febre non existente, aut ea levi, album veratrum molle exhibet, at validiori existente, ab eodem abstinet, quod consilium & à Gal. probatur. Si ergo febris fuerit, aut ex puris generatione, aut ab externa causa, ea spreta, quod humor fluens, aut fluxurus indicat, id exequi oportet. At si ex inflammatione supervenerit, verum levis, quia & levis sit inflammatio, cum præmeditatione aliquibus fortioribus uti poterimus, si ita fluxio requisierit; at ubi calor febrilis est multus, omnino à fortioribus illis, quale veratrum est, aut scammonium, abstinere debemus. Si vero ex putredine, vel corruptione fuerit febris, quoniam hæc à caco-chymia multa provenit, non erit ab re usus fortiorum pharmacorum. Verum ubi ex apparatu morbifico provenerit, servandum erit illud Hip. aureum documentum, quod prima Aph. tradidit,



didit, videlicet concocta medicari, & movere, neque in principiis, nisi materia turgeat, & aliud 2. Aph. positum, nempe: In principiis morborum si tibi quid videtur movendum, move, in statu verò quiescere oportet. Movendum autem in principiis etiam non turgente materia, vel ob multitudinem materiæ, vel malignitatem. Res non postulat, ut in his simus longiores, satis sit innuisse. Intelligenti pauca. Reliqua à proprio febrium tractatu sunt petenda, non enim hujus sunt loci, & ob id quoque hæcticarum curam prætermittimus.

## CAPUT LXXII.

*De syncope, & animi deliquio.*

**G**Raviter vulneratis supervenire non rarò consueverunt repentina virium omnium prostratio, seu casus, qui syncope dicitur, & animi deliquium. Verùm non debet utcumque generosus Medicus turbari, & quasi eodem affectu teneatur, vulneratum & seipsum unà deferere; non rarò etenim licet ab adeo gravi affectu patientem eximere. Et propterea nihil, quod ex arte sit, prætermittat, ut eum, qui servari potest, conservet. Quod quidem præstabit, si naturam, & causas horum affectuum diligenter consideraverit. Quæ ut clariùs pateant, primò in universum videre oportet, quæ sint ea, à quibus uterque hic affectus ortum habet, & quomodo fiat. Syncopis igitur nomine, *Syncope ut dictum est, significatur repentinus, & affatim contingens virium casus, unde Galen. 12. Meth. 5. Syncope, dicebat, est præceps virium casus. Venit autem id nomen à verbo Græco συνκίπτω, quod est concido. Hinc syncope, id est, concisio, & casus scilicet virium. Animi verò deliquium levio rem affectum significat, namque in eo non penitus cadunt vires, licet notabiliter, & affatim prosternantur. Dicitur autem animi deliquium Græcè λειψθυμία, seu λιποψυχία, idem enim significant hæc duo nomina, nam lipothimia dicitur à λείπω, quod est linquo, seu deficio, & θυμός, quod est animus, hinc lipothimia, id est animi defectus. Lipopsychia verò à verbo Græco λείπω, quod*



est linquo, & ψυχή, quod est anima, unde lipopsychia, id est, animæ deliquium, seu defectus. Ut verò horum affectuum natura melius intelligatur, videndum est, quænam sit ratio generationis ipsorum.

*Ut generentur hi affectus.*

Nemini dubium est, partes omnes ad proprias functiones obeundas vitali facultate indigere, ut quæ radix est, & fundamentum omnium virtutum, calore videlicet à corde influente, qua ratione dicebat Galen. 5. loc. af. c. 1. Peculiari cordis temperie partes omnes actiones suas perficiunt. Et 5. de usu pul. cap. 2. & 3. Cum non ab aliis ad cor, sed à corde cæteris membris calor vitalis confluat, & ipsa vitali calore, & peculiari cordis temperie actiones suas perficiunt; hinc fit, ut cordis virtute, & vitali calore pereunte, reliquorum etiam membrorum actiones perire necesse sit, ob idque ad omnes partes vitalis spiritus transmittitur, qui suo vivifico calore eas reddit idoneas ad proprias actiones, dum symmetriam intimi caloris conservat, eandemque fovet, ac roborat. Unde si contingat, ut repente calor hic vitalis in partibus deficiat, repente etiam concidunt animales functiones omnes (dempta respiratione, quæ nunquam penitus aufertur, stante animalis vita) vel notabiliter prosternuntur, pro ut defectus iste fuerit major, vel minor. Naturales etiam lædi necesse est, nam deficiente vitali calore in partibus qui vitam in ipsis conservat, conservando insiti caloris symmetriam, temperamentum quoque ipsorum ex consequenti vitiatur, à quo naturales operationes prodeunt. Verum cum hæ non ita manifestè lædantur, dicitur syncope potissimum à casu animalium virium, atque vitalis facultatis.

*Syncope quid. Animi deliquium est levior affectus.*

Est igitur syncope præceps virium lapsus ex defectu vitalis caloris in partibus subito contingente. In animi verò deliquiis non penitus cadunt vires, sed solum imminuuntur, unde Gal. probabat lib. de cur. ra. per sang. mis. sanguinis missionem usque ad animi deliquium, non tamen usque ad syncopen. Non est autem existimandum, omninò deficere vitalem calorem in partibus quia vita cum huiusmodi defectu stare non posset, cum sit vitalis caloris vitam servare intimi caloris symmetriam servando, & propterea extincto in parte aliqua vitali hoc calore, continuo

pars



pars illa emoritur. Cum igitur hi affectus, quos in genere symptomatum actionis læsæ reponendos esse nemo dubitat, fiant ob subitum caloris vitalis defectum in partibus; necessario dicendum est, morbum, qui talium affectuum est in causa, nullum alium esse præter intemperiem frigidam partium omnium, non quidem positivam, sed privativam, partes enim destituuntur calore vitali, qui intimi caloris symmetriam conservabat, & à quo partium temperamentum recipiebat absolutionem. Quia verò talis intemperies fit in partibus ob subitam carentiam vitalis spiritus, quæcunque in causa esse possunt, ut partes vitalibus spiritibus confestim destituantur, eæ omnes lipothimiæ, & syncopis erunt in causa.

Destituuntur verò partes hisce spiritibus, aut quia cor, quod eorum est origo, eos subito retrahat, ac retineat, veluti illis indigens, aut quia loco eorum, qui dissipantur, alios transmittere ad partes nequeat. Primum contingit, vel quia spiritus vitales sunt pauci, vel ob aliquem dolorificum affectum, vel alium. Pauci sunt spiritus, quia vel non generantur, vel evacuantur, vel corrumpuntur. Non generantur defectu vel agentis, vel materiæ, vel utriusque defectus agentis, scilicet cordis, quia sit intemperatum, immodicè scilicet calidum, vel frigidum, vel calidum, & siccum, vel frigidum, & siccum. Defectu materiæ, quia non subministreretur conveniens materia ipsi cordi pro eorum generatione, scilicet probus sanguis in sufficienti quantitate, quod contingit, vel ob inediam, vel ob abundantiam succorum crudorum, & bonorum defectum. Porro abundant crudi succi, & boni deficiunt, vel ob pravam victus rationem, vel ob intemperiem membrorum naturalium, vel ob corruptionem bonorum succorum, ut in febribus malignis, & pestilentibus contingit, & in assumptione veneni. Evacuantur verò spiritus, vel in ipso corde, vel extra cor, in ipso quidem corde, vel per hiatus sensibilem egressi, ut in solutione continui, vel per meatus insensiles resoluti, & hoc vel ob intemperiem cordis calidam modum excedentem, ut in febribus ardentibus, vel ob apertionem vasorum, & pororum ex aliquo animi affectu, ut ex gaudio. Unde Gal. 12. Meth. 5. Magni timores omnes, & cum his magnæ volupta-



voluptates, & si non jugulant, at certè facilè resolubilem spiritum reddunt, infirmantque, tristitia vero, anxietas, & ira, & cura eo genere sunt noxiæ, quo frequentes vigiliæ. Contingit autem præsertim eorum resolutio, quoniam spiritus vitales admodum tenues, & diffilabiles generantur, quo in casu, ut inquit Gal. loco citato, duobus modis imbecilla redditur spirituum substantia, & tanquam temperie alterata, & tanquam dissipabilis, seu exhalabilis. Extra cor verò contingit spirituum dissipatio ob immodicam evacuationem, dolorem, labores, vigiliæ, ardores febriles, & hujusmodi. Quibus addamus ex Gal. loco citato immodicam raritudinem corporis, ut ob id facilè substantia spirituum digeratur, quod & ipsa tenuium sit partium, & corpus eam non contineat. Unde Gal. loco jam citato: In omnibus ejusmodi casibus videntur ægrotantes tum animo linqui, tum usibus resolutis esse, nonnulli etiam mori. s. alias spiritu ipso corrupto, vel alterato, aliquando ex parte digesto, non rarò hæc utraque perpeffo. Corrumpuntur spiritus ab aëris pravitate, ut contingit tempore pestis, pravis halitibus, ut fit in febribus malignis, in gangræna, & sphacelo, in bubone pestilenti, & in bubonibus maligna putredine corruptis, nec non & venenata qualitate, ut accidit in veneni assumptione. Quod retrahantur ad cor vitales spiritus, & in eo retineantur, in causa sunt vel dolorificus affectus tum corporis, sive corde ipso primariò laborante, sive alterius membri dolori consentiente, ut in morsu oris ventriculi, tum animi, exempli gratia, timor, tristitia, & hujusmodi: vel intemperies ex vapore, vel humore maligno, & pestilenti, seu venenato, ut in febribus malignis, & pestilentibus, in suppressione mensium, seminis, & assumptione veneni, vel corruptio, & etiam alteratio spirituum, quæ commemorat Gal. 12. Meth. 5. ut cor indigens propter malam ipsorum dispositionem, ad sese omnes retrahat. Non potest autem cor vitales spiritus ad partes transmittere ob viarum obstructionem, quæ fieri potest à vaporibus, vel humoribus pestilentibus, & prava qualitate infectis, item ab humoribus crudis, & crassis, à copia sanguinis, à tumore, ab aëre pestilenti, & etiam non pestilenti, sed prava qualitate infecto. Item ob quosdam animi affectus, ut ob tristitiam,

timo-



timorem, &c. Verùm ut inquit Gal. loco citato: Crudorum succorum copia multis nominibus syncope opportunos reddere potest, & copia sua vires premendo, & propter tum multitudinem, tum crassitudinem exiguos animalis meatus obstruendo, unde animal sub tali affectu non nutritur, & suffocatur, & mediocritas temperamenti ejus non solum alteratur, sed etiam corrumpitur. Quòd si, dicebat inferius, non obstruantur, nec onerent, syncopen non inferunt, sed animi deliquia. Ex quibus patet in omni syncope fieri aggregationem quandam spirituum vitalium in corde, & propterea Avic. xi. 2. trac. 2. cap. 6. definiens syncopen dicebat: Syncope est distractio majoris partis plurimum virtutum motivæ, & sensibilis propter debilitatem cordis, & aggregationem spiritus totius ad ipsam propter causam moventem eum ad interiora, aut propter causam præfocantem ipsum interiorius, quare non inveniunt spiraculum, aut propter paucitatem, aut subtilitatem suam, quare non superfluit super illum, qui est in minera.

Verùm, si causas spectemus, quæ per vulnera aggregationem hanc spirituum in corde efficiunt, reperiemus propter vehementes dolores, & immoderatas sanguinis profusiones, & pravos halitus à parte vulnerata elevatos, & spirituum infectionem à venenata qualitate, quando vulnus, aut telo venenato, aut dente venenatæ feræ fuerit inflictum fieri posse hanc aggregationem. Ex accidenti tamen potest, & ex aliis causis proficisci: & sæpè ex aliquo animi affectu syncopen incurrunt, præsertim verò ex timore, quo ex inspectione profluentis sanguinis, qui parum cordati sunt, corripiuntur. Superveniens vulneribus syncope facile innotescit, namque aufertur sensus, & motus, saltem ad sensum, & ipse pulsus, aut summè imbecillis, & parvus secundum omnem dimensionem, deprehenditur, aut neque percipitur, saltem ad sensum ablatum. Facies pallida redditur, & imaginem mortis præsentat, cum spiritu enim una & sanguis ad interiora movetur, & ideò etiam extrema frigent, sudores frigidi apparent, & præcipuè circa frontem, quorum quidem materia non est excrementitia, sed humiditas ipsa rorida, quam partes calore proprio destitutæ continere nequeunt (& hoc est signum vitiari tempera-

*Causæ horum affectionum in vulneribus.*

*Signa.*

mentum



mentum partium omnium) & sunt frigidi, quia transit materia per cutem, quæ frigida est ob caloris defectum. Vocem quoque necessario amittunt syncope deprehensi, cum sine motu fieri non possit. In animi verò deliquio omnia sunt imbecilliora, hinc non omnino aufertur motus licet valde debiliatur, nec vocem amittunt.

Causæ verò, ipsæ haud sunt cognitu difficiles, unde dolorem ægrotans prodit, antequam syncope invadat, immodica sanguinis profusio sensui est conspicua. Pravos halitus elevari status vulneratæ partis optimè demonstrat; adest enim corruptio, & putredo in parte. Infectionem spirituum causa vulnerans, & quæ subsequuta sunt symptomata.

*Præfagia.* Quia verò syncopen, sicut & quemvis alium affectum, magnam esse contingit, aut ratione propriæ essentiae, aut ratione dignitatis affectæ partis, aut ratione facultatis, & magnitudinis, cognitio necessaria est tum ad rectè præfagiendum, tum ad præsidiorum electionem, hac de causa quam magna existat, perpendere oportebit.

*Signa magnitudinis horum affectuum.*

Signa quidem magnitudinis affectus ratione dignitatis sunt ea, quæ ostendunt partem primario affectam, vel per consensum, & si per consensum, aut absolutum, aut non absolutum, & vel in parte propinqua, & nobiliori, vel remota, & ignobiliori: quando enim cor primario læditur, cæteris paribus, major est affectus ratione dignitatis. Dico autem cæteris paribus quoniam manifestum est cor primario laborare in tristitia, major tamen est syncope, quæ est ex pestilenti vapore, verum non ratione dignitatis, sed facultatis. Verum, si duæ sint syncope ex vapore pestilenti, manifestum est, eam vehementiorem futuram, in qua vapor elevatur ad cor à parte proximiori ipsi cordi, & nobiliori, cæteris tamen paribus. Signa magnitudinis, quo ad propriam essentiam sunt ea, quæ vehementiam essentiae causarum significant, exempli gratia, vel ingentem tum suffocationem, tum resolutionem, ac evacuationem, vel obstructionem. Unde hac ratione animi deliquium est minor affectus ratione essentiae ipsa syncope, cum non penitus in ipso auferantur actiones neque ita partes vitali spiritu destituantur. Ex quibus manifestum est, syncopes  
illas



illas vehementiores futuras ratione propriæ essentiæ, in quibus pulsus magis debilitabitur, & ipsa respiratio magis imminuetur. Signa vehementiæ ratione facultatis sunt ea, quæ facilem, vel difficilem tolerantiam affectus ostendunt, & quæ majus, vel minus facultatis vitalis robur, e. g. pulsus formicans, vel ablati, saltem ad sensum, Item quæ materiam indicant participem, vel expertem malignitatis, vel etiam pestilentiae, vel alterius venenatæ qualitatis, exempli gratia, febris pestilens, assumptum venenum, suppressio seminis. Difficilem tolerantiam, & facultatis imbecillitatem significant difficilis excitatio, crebra invasio, longè ante prægressa palpitatio, & hæc quandoque est major, quandoque, est minor.

Quodcunque horum malorum vulneribus superveniat, non est despiciendum, propterea quod afficitur pars præcipua, & ea quidem, quæ ad vitam præ cæteris est necessaria. Si tamen syncopen cum animi deliquio comparemus, minùs periculosum, cæteris paribus, esse animi deliquium statuendum est, quia in eo minor est vehementia ratione propriæ essentiæ, ac facultatis, augetur tamen, & minuitur periculum, prout magis, vel minùs ad syncopen accesserit, diutiùs, vel breviori tempore perduraverit, & frequentius, aut rarius inciderit, & causa fuerit contumacior, aut minus contumax, pravum est enim, quod putredinem, & corruptionem vulneratæ partis consequitur, & adhuc magis, quod venenatam qualitatem. Sicuti quod animi affectum, puta ex-inspectione vulneris, vel profluentis sanguinis, nisi debilis valdè sit animula, periculo vacat. Sed hoc non est præsentis loci.

Syncope vero semper est periculosa, in ipsa enim omnem vehementiam spectare possumus, & est veluti via ad mortem. Augetur tamen periculum, prout intensior est quælibet vehementia, & ea præsertim, quæ spectatur ratione facultatis, unde si quispiam syncope corripiatur, eaque diutius perseverante, color faciei mutetur, ita ut lividus fiat, aut niger, vel viridis, non evadet. Neque is, cui pulvis sternutatorius injectus fuerit in nares, nec sternutaverit, signum est enim mortui caloris; & emortuæ facultatis. Sed & causa syncope videtur esse considerata, hæc enim, quanta sit ipsius vehementia, præclarè docet; unde



eam, quæ fit ex solutione continui in corde, prorsus lethalem judicamus, cui proxima est, quæ fit à venenata causa, & huic, quæ ex corruptione partis. Sed non minus lethalis est, quæ ex superflua sanguinis profusione ortum ducit, modo superflua evacuatio, non repentina mutatio, aut animi affectus, aut mordaces humores os ventriculi vellicantes, sive in eo prius coacervati fuerint, sive in ipso remedii usu ad ipsum defluerint, causam syncope attulerint. Animadvertendum tamen in syncope, quæ ex fluxu materiæ biliosæ ad os ventriculi contingit pro ratione causæ hujus influxus variari periculum; namque si ex vulnere hepatis, aut ventriculi, aut tenuium intestinorum id acciderit, aut ex cerebri, vel meningum affectibus, summi periculi res est plena.

Vulnerato igitur syncope deprehenso, quoniam ea semper sequitur ad spirituum vitalium defectum in partibus extra cor existentibus, retrahente eos corde præternaturaliter, communis oritur indicatio attrahendi hosce spiritus ad partes illis destitutas, & à centro ad circumferentiam. Verùm ab illis attrahentibus erit cavendum, quæ causas syncope augere nata sunt; nam si fieret ob superfluam aliquam evacuationem, malè fieret attractio ad partem, per quam fit evacuatio, ut etiam ad sibi proximas. Porro spirituum defectus, seu imminutio indicat eorundem reparationem, quapropter cum ex tenuiori, & magis vaporosa sanguinis parte sit eorum generatio, & quodammodo etiam ex aëre per respirationem attracto, indicantur tum alimentum vaporosum, & tenue, quod tamen causam non augeat, tum odora-menta tenuium partium, tum frigida, quæ spiritus recreare valeant, neque ex accidenti noxam inferre. Sed præterea & defectus causæ erit occurrendum, puta superflue evacuationi. Si dolor retractionis fuerit in causa, is erit removendus, si spiritus inficiantur ob pravorum halitus, ii sunt revellendi, & dissipandi, materiaque pravorum halituum auferenda, & contra ipsos cor est muniendum alexipharmacis, cordique amicis, quæ non minus requirit venenata, & pestilens qualitas. Immo, quia semper robur cordis dispendium patitur, iis utendum in qualibet syncope, quæ cor tum manifestis qualitatibus, tum proprietate totius



totius substantiæ roborent. Si dicti affectus syncopen efficiant, quia acres, & mordaces succos ad os ventriculi commoveant, attemperandi erunt, revellendi, & etiam evacuandi, & ventriculus, ne facilè recipiat, corroborandus, atque adstringendus. Cum etiam in omni syncope humiditas roscida partium sudoris specie evacuetur, præsertim circa thoracem, cervicem, & faciem, eo quod à partibus influente calore destitutis contineri nequeat, & unà etiam facilè dissipetur insiti caloris substantia, cuius symmetriam conservabat influens ille calor, propterea oritur indicatio leviter refrigerandi has partes, ut cutis extima aliquatiter constipetur, & evacuatio substantiæ roscidæ, & ipsius insiti caloris prohibeatur. Amplius in omni syncope sopita est virtus, erit igitur excitanda. Eadem propemodum in animi deliquiis proposita esse debent, leviora tamen indicantur, quoniam & levior est affectus.

Sed dubitatio oritur, cur in omni syncope revocandi sint *Dubitatio* ad partes spiritus, qui ad cor confluxerunt, seu attracti sunt; *Cur omni in* cum enim non confluant ad cor, aut ab ipso attrahantur, nisi ut *syncope re-* eorum præsentia fortius reddatur, quod etiam rationabile est con- *vocandi sine* tingere, melius forsan fuerit, si ita permittantur in ipso corde *spiritus ad* manere, donec spontè rursus cor eos ad partes expellat; nullum *partes.* enim ex hoc imminere vitæ periculum videtur, cum vitæ principium sit robustius per eorum præsentiam, immo rationi consonum est, ipsum longè melius actiones, quæ ad vitam pertinent, præstiturum hoc modo robustum factum. Verùm duplici ratione necessarium est in omni syncope spiritus revocare ad partes, una quidem est, quoniam ipsorum qualitate conservatur nativi partium omnium caloris symmetria, unde si diutius abesset, periclitaretur partium reliquarum nativus calor. Altera est, quoniam ex illa aggregatione spirituum ad cor, periculum est, ne suffocentur nimis concentrati, & ita pereat nativus calor. Quare ex illa concentratione non redditur fortius cor, quamvis spiritus attrahat, tanquam indigens; sed tamen perperam operatur, confertim, atque repentè attrahens, & ab omnibus partibus à causa præternaturali impulsus, & ideo mirum, si ex perperam facta operatione & ipsum periclitetur. Hinc oritur pulsus imbecillitas.



*Quomodo  
revocentur  
Syncope de-  
prehenſa.*

Revocandi ſunt igitur ſyncope deprehenſi vociferationibus, narium apprehenſionibus, frictionibus, ac vinculis, ad partes tamen vulneratæ oppoſitas, vellicationibus, ac pilorum evulſionibus; odoramentis ex aqua roſ. & aceto roſ. aqua florum citri, corticibus recentibus citri, & aurantiorum, floribus purum odorem reddentibus, cujuſmodi ſunt roſæ, jaſmini, hyacinthi, præſertim ex Hiſpania delati, gariophilli, violæ, leucorii flores, citrique, limonum, & aurantiorum, & alii innumeri; Theriaca naribus admota facultatem excitat, pariter & palato, & linguæ illita. Sal item ori impoſitum idem facit. Revocantur etiam epithematibus, atque inunctionibus cordialibus, & irroratione denique, faciei præſertim, & cervicis ex frigida, nec non & flabellatione.

*Curatio ſyn-  
cope ex ſan-  
guinis pro-  
fluviis.*

Si ergo ex ſuperfluo ſanguinis fluxu ſyncope contigerit, omni ratione quam primùm ſiſtendus eſt fluxus, ut verò revocentur ſpiritus ad partes, frictiones, & vincula ad extrema in uſum ſunt revocanda, non tamen his uti oportet ad vulneratam partem, ne major concitetur fluxio, ſed potius ad oppoſitas partes, aut ad eas, in quibus eſt evacuationis origo, ſic enim revocabuntur ſpiritus, & avertetur influens ſanguis. Frigida quoque eos ſpergere convenit, naresque iisdem apprehendere, unde Gal. primo ad Glauc. 14. Eos, qui ex choleris, & multiſ aliis univerſim factis evacuationibus, diſſolvuntur, aqua frigida ſpergere oportet, & nares apprehendere. Sed neque malum extrema alligare, ut nexis ſiant plures, & fortiores, circa manus quidem in evacuationibus per inferiores partes, circa crura verò, & inferiores partes in evacuationibus per superiores partes. Et inferius: In univerſum autem ad communia membriſ patientibus in adverſum trahere oportet, aut ad ea, in quibus eſt evacuationis origo. Ad ſpirituum autem reſectionem & optimi odores ſunt maximè ex uſu, idonei autem ſunt, qui ex frigidis potiùs, vel parum calidis elewantur; qui enim ex nimis calidis, ut ex moſcho, ambra, minùs ſunt convenientes. Aqua ergo roſ. & acetum roſ. erunt idonea, his addi poterit aqua florum citri, vel aurantiorum, vel limonum, & florum myrthi, & ſantalorum. Et quoniam ex nimia profuſione nimis imminuti ſunt ſpiritus, idcirco aliquod etiam eorum, ex quibus citò reparantur, erit exhiben-



hibendum, cujusmodi est succus, & jus consumptarum carniū, stillatitium caponum, & vinum, vel mica panis vino madefacta, quod tamen vinum frigida sit temperatum, unde Gal. loco citato: Vinum aqua frigida temperatum curat eas, quæ ex magnis fiunt evacuationibus, dissolutiones, immò in omnibus syncopticis affectibus conveniet, nisi in aliquo viscere sit, aut immineat inflammatio, celeriter enim virtutem recreat, & spiritus reficit. Unde Gal. 12. Meth. 3. Vinum, quod calidum sit, & deductionem in corpus promoveat, omnibus, quos syncope male habet, offerre convenit. Sed, ne ex vino reddatur magis fluxilis sanguis, oportebit deligere vinum nigrum, quod crassum sit, & austerum. Unde Gal. primo ad Glauc. 14. In sanguinis fluxibus vinum crassum sit, nigrum, & acerbum, in reliquis casibus etiam album, seu fulvum concedi poterit, quod mediæ ætatis sit, & boni odoris. Animadvertendum tamen, si adsint indicia fluxus materiæ biliosæ ad ventriculum, quod sæpe contingere solet, antequam vinum exhibeatur, nisi periculum sit in mora, curandum esse, ut patiens evomat ventriculum fricando, immittendoque in guttur digitum, aut pennam oleo inunctam. Unde Gal. loco cit. Oportet os ventriculi perfricare, de iis loquebatur, qui ex superfluis evacuationibus dissolvuntur, ut evomat, stomachum irritando digiti, vel pennæ immissione. Ad majorem cordis corroborationem epithemata cordialia temperata erunt applicanda, utpotè parata ex aqua ros. aceto ros. aqua florum citri, florum myrthi, melissæ, florum borraginis, additis speciebus cordialibus temperatis, camphora, croco, & portiuncula vini alicujus potentis, & aromatici cum aliis, de quibus actum est capite de alterantibus. Inunctiones quoque cordiales parari poterunt ex unguento ros. aceto ros. loto, speciebus cordialibus, oleo florum, vel seminum; aut corticum citri cum aliis ibidem propositis.

Qui ex nimia corporis dissolutione in affectum incidunt ob alimentum totius ferè ad partem vulneratam transmissum, & in pus versum, ex quo reliquæ partes orbantur proprio alimento, ferè eadem ratione sunt revocandi: extrema igitur fricare oportet, & deligare, ea sola tamen, quæ ex adverso sunt vulneratæ



partis, leuiusque, quam in supradictis, & odoribus fovere, ac vino reficere, forbitionibus concoqui facilibus, & multi nutriti, cuiusmodi sunt stillatitium caponum, jura consumptarum carniū, succus carniū caponis, vitelli ovorum ex jure dissoluti, unde Gal. 1. ad Glauc. 14. Qui ex disruptione abscessus, aut simili evacuatione animo deficiunt, confestim optimis odoribus sunt fovendi paulò post autem forbitionibus concoqui facilibus. Cordialibus item corroborare, & in faciem frigidam inspergere oportet, non tamen eos vomere utile est, ne ob laborem vomitus penitus prosternantur vires. Verum, ubi revocati fuerint, ut præserventur, studere maximè oportet corporis nutritioni, & ob id omni quinta, vel sexta hora cibus aliquis exhibendus, qui sit facilis coctionis, & distributionis, & multum præbeat, alimentum, cuiusmodi est succus expressus carnis caponis, jus consumptitium ejusdem, contusum carnis pulli, aut caponis, vitelli ovorum recentium forbiles, aut consumptitio jure subacti, stillatitium caponum, confectiones restaurantes appellatæ, paratæ videlicet ex carne caponum, aut perdicis, vel phasiani, amygdalis, pineis, pistaceis, & saccharo. Assiduo etiam quæ vitalem facultatem roborant, tum extrinsecus applicare, tum per os exhibere oportebit, maximèque conducit, si talibus alterentur cibaria. Hujusmodi sunt citri succus, vel etiam saccharo paratus, fragmenta pretiosa, potissimum smaragdus, diamargariton frigidum, & margaritæ ipsæ, confectio de hyacintho, terra sigillata, bolus Arm. orientalis, coralli, cornucervinum præparatum, monocerotis, aqua ros. florum citri. Studendum autem, ut hæc semper, aut ut plurimum habeant aliquam vim adstringendi, qua impediatur innati calidi dissolutio, unde permixtio boli, & terræ sigillatæ erit maximè conveniens, aut si quæ ex dictis saccharo ros. veteri permisceantur. Proponimus autem refrigerantia, quoniam talis copia puris sine febre esse non potest. Roboranda quoque omni arte erit vulnerata pars, prout alias dictum est. Extrinsecus cordi, & testibus cordialia superius proposita erunt applicanda.

*Curatio syn-  
cope ex pra-*

Si ex putridis, & omninò pravis, & malignis vaporibus à parte vulnerata ad cor elevatis oriatur syncope, revellere hosce vapores



vapores oportebit frictionibus extremarum partium, & vinculis, *vis vaporibus.* nec non & cucurbitulis. Optimis quoque odoribus sunt fovendi, & reliquis jam propositis revocandi. Non leviter etiam conducet extrema vino optimo calente lavare, in quo potissimum maderint gariophilli, nux moschata, rosæ, citri flores, fantali; aut cui permixta fuerit aqua florum citri, & hujusmodi alia. Mirificè proderit theriacalis aqua exhibita, aut modicum theriacæ, vel Mithridatii aqua ardenti dissolutum exhibere; hæc enim & cor roborant, & muniunt, & pravos halitus dissipant. Eadem epithematibus cordialibus, atque inunctionibus utiliter addentur. Atque ne rursus invadat, tollenda erit corruptio, & mortificatio partis, prout suo loco expositum est, assiduoque vitalis facultatis roboranda, & quæ puros reddunt spiritus, exhibenda, veluti est confectio de hyacintho cum Mithridatio, aqua theriacalis, & reliqua supradicta.

Si ob venenatum vulnus, bezoarticis propriis contra veneficam qualitatem pugnandum, de quibus, quando de vulneribus venenatis erit sermo.

Si ob dolorem, sedandus dolor; tictiones quoque, & ex-*Ex dolore.* tremorum vincula convenient: Odoribus similiter erunt reficiendi, & aliis jam propositis.

Si ob fluxum materiæ biliosæ ad os ventriculi, vomitus ci-*Ob fluxum bilis ad os ventriculi.* endus, immisso in guttur digito, aut penna oleo intincta, aut etiam ante exhibendo hydrælaum, vel aquam tepidam. Fricare pariter conducit ventriculum, & circumjacentes partes, si difficulter vomuerit, & post vomitionem vinum exhibere. Extrinsecus autem applicanda, quæ robur ventriculo addunt, cujusmodi est emplastrum diaphœnicon, de crusta panis. Nec minus conveniunt, quæ corroborandi ventriculum vim habent per os exhibita cujusmodi est saccharum ros. vetus, conserva cidoniorum, syr. granatorum acidorum, panis succo granatorum acidorum madefactus, & hujusmodi alia. Animadvertere tamen oportet, si humor biliosus ad ventriculum fluxerit ob vulnus in ventriculo, aut proximis partibus, non esse cogendos ad vomitum; major enim copia materiæ ad vulnus, & ventriculum attraheretur, & ob violentum motum magis divellerentur vulneratæ partes.



*Ob animi  
affectus.*

Si ob animi affectum, odoribus sunt reficiendi, apprehensione nasi, pilorumque evulsione, & hujusmodi excitandi, & quoniam semper biliosa materia ad ventriculum fertur, idcirco vomitum provocare conducit. Unde Gal. I. ad Glauc. c. 14. Si ob animi affectum exolvantur, odoribus, & narium apprehensionibus sunt revocandi, cogendique ad vomitum. Revocatis spiritibus, ne rursus corripiantur syncope, appositis verbis animi affectus sedandus.

## CAPUT LXXIII.

*De delirio.*

**D**elirii nomine mentis aberrationem intelligimus, quacunque ratione contingat, eam aberrare. Quamvis enim intellectiva facultas organica non sit, ut quæ non utatur membro aliquo corporis in propriis objectis suscipiendis, attamen multipliciter intellectio lædi potest, eo quod licet anima non utatur organo corporeo pro intellectu, hæc tamen sine organo corporeo fieri nequit, citra phantasma namque non fit intellectio; unde Philosophus dicebat: Necesse est intelligentem phantasma speculari. Requiritur ergo phantasia, ut potentia præparans objectum ipsi intellectivæ potentiæ, phantasma scilicet, quod speciem intelligibilem producit, qua in anima recepta fit intellectio. Et proinde in cerebro fit intellectio, non ut in organo, sed tanquam in loco, in quo præparantur intelligibiles species mediantibus phantasmatis, his enim præsuppositis intellectus potest per se actum intelligendi explere: ideoque, si male, aut nullo modo præparentur phantasmata, nil mirum, si intellectio ipsa lædatur. Præterea cum ad discursum requiratur compositio, & divisio, quæ & ope memoratricis peraguntur, hæc enim suppeditat, quæ cohæreant, & quæ disjungantur, ex memoriæ quoque læsione lædi ratio potest: hinc quidam à morbis convalescentes etiam scientiarum obliti sunt.

*Delirium ut  
fiat.*

Delirium igitur contingit, non quod ratio per se lædatur, sed ex accidenti, videlicet ob imaginatricis, vel memoriæ læsio-

nem;



nem; imaginatricis quidem, ut quæ phantasmata perperam subministret intellectui, memoriæ verò, quoniam discursus fit mediante compositione, & divisione, at compositio, & divisio rectè fieri nequit absque opere memoratricis, siquidem necesse est rerum simulacra, quæ in memoria adservantur, imaginatrici repræsentari, unde si contingat hæc perperam repræsentari, perperam quoque fiet compositio & divisio ab intellectu.

Causas autem delirii facilius erit invenire, si quæ in organo *Quæ requi-* requirantur ad principes functiones edendas, consideraverimus. *rantur ad* Hæc duo esse potissimum nemo ambigit, videlicet idoneam ce- *principes* rebri temperaturam, & congruam dispositionem animalium spi- *functiones.* rituum: compositio enim principibus functionibus non officit, nisi quatenus illa duo pervertit, aut malè disponit. His ergò male se habentibus, modo auferuntur, modo imminuntur, modo corumpuntur principes functiones. Congrua dispositio animalium spirituum in hoc sita est, ut sint in convenienti quantitate, & qualitate, neque inordinatè moveantur. Qualitas spirituum naturalem ipsorum caliditatem complectitur, tenuitatem, puritatem, claritatem, seu splendorem. In quocunque horum vitium *Paucitate* extiterit, facile deliria contingunt; Etenim si animales spiritus in *Spirituum* minori quantitate, quàm par sit, reperiantur in cerebro, non *leduntur* solum hebetatur ratio, verum etiam corrumpitur, hinc ex su- *principes* persuo sanguinis fluxu dissipatis spiritibus, & ex immoderatis vi- *functiones.* giliis, studiis, & cogitationibus fiunt deliria; namque ut dicebat Gal. 7. Aph. 9. Objecta sensibilia principem facultatem imbecillam ob parvitatem spirituum excedentia, ipsique improporcionata, eidem oblata, in causa sunt, ut quasi sub pondere improporcionato vacillet.

Debent etiam spiritus esse tenuissimi, & puri, idcirco si *Spirituum* contingat, eos reddi crassiores, vel ob crassorum vaporum per- *crassitie, im-* mixtionem, vel quia generentur ex spiritu vitali crasso, sive ta- *puritate ac* lis sit ob cordis vitium, sive materiæ, ex qua generatur spiritus *turbulentia,* vitalis, quia videlicet suppeditetur crassus sanguis ipsi cordi pro *& tenebri-* spirituum vitalium generatione, affato in hepate sanguine ob ejus *cositate.* caliditatem, sive quia ex aëre inspirato, qui crassus sit, reficiantur, principes omnes functiones oblædi possunt, quamvis ob



solam crassitiem magis hebetentur, aut auferantur, quam corrumpantur. Verum, si impuri reddantur, aut turbati, & turbulenti, vel etiam nigri, corrumpitur imaginatio, & ex consequenti aberrat ratio. Ex ipsis enim producitur phantasma turbulentum, aut etiam tenebricosum: turbulentum quidem; si spiritus facti fuerint turbulenti, non tamen tenebricosi, aut nigri, tenebricosum vero, si tenebricosi, & nigri.

*Spiritus  
quomodo red-  
dantur tur-  
bulenti.*

Turbulenti autem redduntur animales spiritus ob pravorum vaporum permixtionem, qui à subjectis partibus eleuantur, ut contingit in febribus ardentibus, & pravis, in mensibus suppressis, & semine retento, in gangræna, & spacelo, & huiusmodi aliis affectibus, item ob vitium aëris inspirati, ut contingit in pestilentibus constitutionibus, vel quia generentur ex spiritibus vitalibus turbulentis, quacunque ex causa tales fuerint.

*Spiritus quo-  
modo red-  
dantur tene-  
bricosi.*

Tenebricosi autem redduntur animales spiritus, aut in sui substantia citra alicujus rei permixtionem, aut ob permixtionem rei tenebricosæ, quæ quidem est vel humor melancholicus, vel vapor ejusdem generis. In sui verò substantia tales redduntur, quando ex materia tenebricosa generationem habent, cujusmodi est ipse vitalis spiritus tenebricosus, sive talis generetur ob cordis vitium, puta ob ipsius fervorem, sive materiæ, quia videlicet supeditetur sanguis crassus, & melancholicus, materia generationis ipsorum: quamvis enim correctè se haberet, ex tali materia tamen non posset, nisi opacos, & tenebricosos, ac nigros spiritus generare, ex quibus cum postea fiant animales, nil mirum, si & ipsi tenebricosi generentur. Inesse quoque debet animalibus spiritibus temperata quædam caliditas, unde & cerebrum contemperat excedentem caliditatem vitalium, ex quibus animales gigni debent, quapropter si calidiores reddantur, quam par sit, imaginatio, & mens aberrabit.

*Ex calidi-  
tate spiri-  
tuum le-  
duntur prin-  
cipes fun-  
ctiones.*

Calidiores verò redduntur vel ob calidam cerebri intemperiem, sive cum materia, sive sine materia. Hæc autem materia potest esse bilis, modò quidem assata, modò etiam non assata, sanguis fervens, & melancholia adusta, vel ob permixtionem calidorum vaporum, qui à subjectis partibus eleuantur, ut in ardentibus febribus contingit ob humorum fervorem; vapores enim



enim à fervente, & exusta bile flava, & sanguine affato ad caput elati, calidiores, quàm par sit, reddunt animales spiritus, unde perturbatur, corrumpiturque imaginatio, atque discursus. Calidiores item redduntur ob ingesta aliqua calida, & maximè vaporosa, ut ex vini potentis, & vaporosi potatione fieri solet, unde ebrietas nascitur; & ex assumptione eorum, quæ lolium recipiunt, vel lupuli flores, & hujusmodi. Humores quoque calidi, & acres, atque mordaces, cujusmodi sunt sanguis adustus, bilis flava, & atra, calidiores reddere possunt animales spiritus: nec non & venenum aliquod assumptum, quod quidem observamus in assumptione anacardorum, & mali castorei.

Alterum, quod requirebatur ad principes functiones edendas, erat temperamentum cerebri, unde, temperamento ipsius <sup>Ex intem-</sup> everso, <sup>perie cere-</sup> pervertitur quoque imaginatio, & discursus. <sup>br.</sup> Id autem accidit, quando in calidam intemperiem mutatum est ejus temperamentum, calidi enim est corrumpere, sicuti frigidi hebetare, & imminuere. Huic calidæ intemperiei quandoque adnectitur sanguis fervens, quandoque bilis flava etiam affata, quandoque atra bilis per adustionem genita, & quandoque materia tantum alluit, quandoque verò infixæ est, & quandoque insuper tumorem excitat, aut in cerebri substantia, aut in membranis. Amplius pervertitur temperamentum cerebri ob pravam dispositionem calidi innati ipsius, aut quia videlicet sit imminutum, quo fit, ut sub onere facultas titubet, aut aliqua mala qualitate infectum. Hoc licet observare in venenorum potione, aut esu, namque mandragora pota non aliter dementiam inducit, quàm sua frigiditate innatum cerebri calorem obruendo. Cerebrum cati similiter est in causa dementiæ, eo quia calidum innatum cerebri aliqua mala qualitate afficit: non enim dici potest, affectionem ad ipsos animales spiritus pertinere, namque ii fluxiles sunt, & iidem non permanent, sed assiduo permutantur regenerati, ideo, si talia venena prave afficerent ipsos spiritus, necesse esset tandem ex continua animalium spirituum proba regeneratione, & additione vitium illud corrigi. At nisi alexipharmaca exhibeantur, semper manet affectio, imò si diutius curatio differatur, quandoque alexipharmaca nihil profunt, ut videre est in iis, qui cati



cerebrum comederunt, aut quibus radix mandragoræ fuit exhibita non quidem quod venenata qualitas id faciat, ut talis, non ignoramus enim, veneni proprium esse cor petere, & innatum ejus calorem, spiritusque vitales demoliri, sed alios quoque prævios affectus producere nihil prohibet, verum hæc non sunt præfentis loci.

*Ex inordi-  
nato spiri-  
tuum motu.*

Tertium, quod ad principes functiones rectè obeundas necessarium esse diximus, est motus spirituum animalium ordinatus, idcirco si contingat perperam, & inordinatè moveri animales spiritus, sequuntur deliria, quoniam inconstantes, & inquietæ redduntur rerum sensibilibium species, atque ita perperam subministrantur phantasmata intellectivæ potentiæ. Inordinatè verò moventur animales spiritus ob vaporum permixtionem, ob capitis ictus, ob calidam cerebri intemperiem, ob sanguinis serositatem, præcipuè si calefactus fuerit sanguis, qua de causa dicebat Hippoc. lib. de morb. Cum igitur bilis commota ad venas, & ad sanguinem ingressa fuerit, sanguinem ex compacta compage, & commotione dimovet, & serosum facit, ac calefacit, calefactus autem etiam reliquum corpus totum percalefacit, & desipit homo, & non sibi constat ex sanguinis ad serositatem transmutatione, & motione non solita contingente, & paulò inferius: Eo verò commoto, neque auditum quiescere, sed aliàs alia videre, & audire, & linguam talia loqui, qualia singulis vicibus viderit, ac audierit: quamdiu verò cerebrum quieverit, tandiu etiam homo sapit.

Ex quibus non erit difficile reddere causam, cur aliqui continuo delirent, alii verò nequaquam, sed per quædam temporis intervalla modo longiora, modò breviora, sive ordinatè id fiat, sive absque ullo ordine. Et cur quædam deliria febres consequantur, alia verò comitem habeant, alia verò prorsus sint absque febre. Amplius, cur quædam deliria contingant cum timore, & mœstitia, alia verò cum ira, & audacia, alia cum risu. Præterea, cur aliqui, quæ re vera sunt, non videant, alii verò, quæ non sunt, videre sibi persuadeant. Et cur alii in omnibus delirent, alii verò in una re tantum, vel pluribus, in reliquis autem constet judicium. Verum, ne iis, quæ ad rem nostram non



non faciunt, tempus conteramus, ad eas mentis motiones, quæ in vulneratis fieri consueverunt, orationem nostram convertemus, earumque causas indagabimus, ut per earum propulsionem liceat vulneratos ab hoc miserando symptomate eripere.

Deliria igitur, quæ in vulneratis contingunt, alia ex propria cerebri affectione ortum habent, alia verò fiunt per consensum laborante cerebro. Ex propria cerebri affectione fiunt deliria, vel quia cerebrum, aut membranæ ipsum vestientes inflammatione laborent, aut calidis succis alluantur, aut putredine, vel corruptione afficiantur, vel ex cerebri vulnere. Item ob ambientis injurias, quando vulnus alicujus momenti capiti fuerit inflictum, & nimiam sanguinis profusionem, tandem ob compressionem membranarum, & ipsius cerebri, sive quia cerebrum, & spiritus calida intemperie laborent, ut quando cerebrum, vel membranæ etiam inflammatione tenentur, vel calidis succis alluntur, sive quia spiritus animales inficiantur pravis vaporibus à vulnere elevatis, ut in vulnere purulento, & cum substantiæ corruptione fieri potest; sive quia spiritus animales per vulnus, quod ad cerebri substantiam pertingit, exhalent, atque ita pauciores reddantur, unde sub onere facultas imbecilla titubat: sive quia perperam repræsententur simulachra rerum à memoratrice, parte læsa, vel ob spirituum imminutionem ex vulnere, vel ob inflammationem, vel coarctationem viarum, & meatuum ab humorum copia, vel alia re comprimente, veluti est os depressum: sive quia species confundantur, & inquietæ fiant ob spirituum agitationem, & inordinatum motum. Fit autem hæc agitatio, & inordinatus spirituum motus ob vim ictus, ob membranarum, & cerebri compressionem, vel ab osse, quod introcessit, vel à purulenta materia, vel sanguine extra venas effuso: ex compressione siquidem coarctantur viæ, & meatus, ut ob id species confundantur, non habentibus spiritibus liberum suum naturalem motum. Agitantur etiam spiritus ob membranarum punctiōem, unde in capitis vulneribus quando ossis spiculum subjectam membranam pungat, sequi deliria videmus. Vehementissimus quoque dolor capitis solet spiritus exagitare, & propterea ad eum sequi deliria non rarò observamus.



*Deliria per  
consensum.*

Per consensum affecto cerebro delirant vulnerati, quando à parte vulnerata elewantur vapores ad cerebrum alioqui bene se habens, qui prava qualitate cerebrum, & spiritus malè afficiunt, suoque inordinato motu spiritus ipsos inordinate commovent. Hoc observamus in vulneribus venenatis, & iis, quibus putredo, aut corruptio supervenit. Delirant non minus, quando vulnere supervenit inflammatio, & per nervos cerebro communicatur incendium, ut fit in vulneribus nervosarum partium: In quibus casibus perseverans affectio facilè in delirium per essentiam migrat, subsequuta videlicet inflammatione. Ex dolore pariter communicata cerebro per nervos molestia, accidunt deliria ob spirituum agitationem. Contingunt præterea in vulneribus deliria nonnunquam ob subsequutam putridam febrem ex apparatu moribifico, elevatis ad cerebrum vaporibus ab ebullientibus succis, sed hujusmodi non sunt propria vulneratorum deliria.

*Delirium in  
vulneratis  
non est ci-  
tra febrem.*

Ex quibus colligere possumus, non delirare vulneratos citra febrem; namque ipsorum delirium, aut putrilaginis, & corruptionis in vulnere existentis est soboles, ab hac autem promptius ad cor feruntur putres vapores, quam ad cerebrum, ob amplas vias, quæ à parte vulnerata sunt ad cor, si extra cerebrum, & ipsius involucra vulnus extiterit, quod si in hisce fuerit partibus, causaque delirii in vulnere, non minus in eodem erit febris causa, aut est inflammationis comes, quam si delirium consequatur, longè facilius etiam sequetur febris, vel alicujus magnæ exagitationis spirituum, propter quam, vel ejus causam saltem accenduntur spiritus. Verum quidem est, non eandem esse ubique sortem febris, quandoque enim ipsa febris est delirii comes, & veluti symptoma, seu potius illius causa, ut quando cerebri inflammationem, vel putredinem in ea existentem consequitur, aut compressionem membranarum, & cerebri, vel punctiorem, & hujusmodi: quandoque verò delirium est febris symptoma, ut quando ob ebullitionem humorum feruntur ad cerebrum vapores. Ex his etiam licet colligere, cur aliquando delirium vulnerati sit continuum, aliquando verò intermittat; quandoque enim cerebrum propria affectione laborat, per idiopathiam dicunt, quoniam semper eodem modo se habet, delirium est con-  
tinuum,



tinuum, nisi affectio, ex qua fit delirium sit in fieri nondum autem facta.

Contingit enim aliquando humorem ad cerebrum, & membranas confluere inflammationem excitaturum, & à principio, par-<sup>Delirium per essen-</sup>va existente ejus copia, à natura superari, & discuti, & ita deli-<sup>tiam non</sup>rium ab eo excitatum cessare: novo deinde affluente humore,<sup>semper con-</sup> iterum hominem delitare, eoque dissipato, iterum quiescere, & sic deinceps, donec eo res devenerit, ut amplius natura nequeat, quod influxerit, discutere, & affectio sit facta; tunc temporis enim delirium redditur continuum.

Fit quoque delirium continuum per consensum, eo quod in-<sup>Delirium per consen-</sup>desinenter delirii causa ad cerebrum transmittatur, ut quando<sup>sium inter-</sup>vulneratum est diaphragma, aut alia pars nervosa, & ad vulnus<sup>dum conti-</sup>sequuta fuerit inflammatio; incendium enim continuò per ner-<sup>nuum.</sup>vos ad cerebrum delatum delirium continuum efficit. At quando non assiduo fertur à parte primariò affecta ad cerebrum delirii causa, ut quando à parte vulnerata elewantur vapores ad cerebrum, delirium non est continuum.

Ex verbis, & actionibus vulnerati satis constat; num mens aberraret, nec ne, verum an mentis aberratio sit per essentiam, an per consensum, & ex qua causa evenerit, ex aliis conjecturam facere oportet. Per essentiam cerebrum laborare nihil magis ostendit, quàm ipsum vulnus, namque vulnere existente in capite, censendum est, per essentiam laborare cerebrum: atqui num ratione vulneris, vel putredinis, vel supervenientis inflammationis, ex tempore, quo accessit delirium, dignosci poterit, & ex aliis symptomatis, quæ prædictos affectus comitari solent; etenim si statim, inflicto vulnere, accedat delirium, & sit continuum, ratione ipsius vulneris verisimile est accidisse, aut quia videlicet aliquid sit, quod membranas, & cerebrum comprimat, ut os depresso, telum, & sanguis inter os, & membranam effusus, aut sub ipsa dura membrana, aut in cerebri substantia collectus, vel quidpiam, quod membranas, & cerebrum pungat, ut ossis spiculum, telum infixum, & hujusmodi: an vero hoc potius, quam illud malum efficiat, modus vulneris patefaciet. Si verò supervenientis inflammationis ratione fiat, id posterioribus diebus

*Signa.*



diebus contingit: præterea ejusmodi delirium non fit subito, sed paulatim, ipsumque præcedunt vigiliæ, capitis dolor, somnia turbulenta, urina decolor, quæ omnia ex materiæ raptu ad caput proveniunt. Spuma quoque circularis in urina desuper natans multoties delirium præcedit, eo quod vapores, qui in cerebrum feruntur unâ cum humoribus inflammationem effecturis materiam agitent; sæpè manuum, & pedum tremor præcedit, paulatimque vulneratus fit magis loquax. inde incipit manifestè desipere, inflammantur oculi, facies fit rubicunda, splendorem non ferunt, lachrymæ involuntariæ effluunt, oculi squalidi fiunt, naturalia excrementa supprimuntur, aut modica excernuntur facultate distracta, & bile, quæ ad expellendum proritare solebat, alio confluente: & si excernantur, albicantia sunt bilis defectu: obliviosi fiunt, respiratioque ob id etiam fit rara, sed magna, cum enim respirare obliviscantur, magnitudine respirationis coguntur indigentia ventilationis supplere; festucas carpunt, flocos evellunt, pulsus duri sunt, crebri, & parvi, ob membranæ inflammationem. Aliquando delirium per essentiam fit propter irrigationem membranarum, & cerebri ab humore bilioso, vel sanguineo putrefacto; quod multoties observavimus secantes cadavera vulneratorum in capite, qui à delirio perierunt, sæpè enim invenimus materiam quandam citrinam alluere modo cerebrum, modo membranas, quandoque etiam purulentiam. Et hoc delirium est cum ignavia, & propensione quadam ad somnum, neque in eo adest illa oculorum inflammatio, & rubedo, sed prominentia quædam apparet, atque citrinitas, neque durities illa in pulsu deprehenditur: proprieque hujusmodi delirium præcedit vertigo, somnia varia, ac turbulenta, capitis gravitas, & dolor obtusus; Atqui si cerebrum sit, quod alluitur, in pulsu nulla erit durities, sed potius magnus est pulsus, mollis, & undosus, præsertim quando est à materia purulenta; atque si per totum cerebrum sparsa fuerit materia, fit phrenitis illa hæctica, in qua deliramenta sunt quieta, & ægri ejus, qui dormiturus est, speciem referunt, clausas continuo habentes palpebras, quas, vocati attollunt, & submissa voce loquuntur, sed mox oculos claudunt, hi autem excavantur, & squalidi fiunt. Festucas quoque  
ave-



avellunt, & manus habent tremulas. Pulsus adfunt languidi, & parvi. Si verò humore bilioso alluantur membranæ, in pulsu erit aliqua durties, creberque erit, & parvus, dolorque gravior præcessit. Non solùm fit delirium, affecto per essentiam cerebro, quando in capite est vulnus, verùm & quando vulneratæ sunt aliæ partes, præcipuè vero nervosæ, & inflammantur, communicatur enim incendium per nervos ipsi cerebro, & longius procedente malo, inflammatio in ipso cerebro suboritur. Idem fieri potest ob elevationem vaporum ad cerebrum. Sed quoniam huiusmodi delirium non fit, nisi propter inflammationem, non erit difficile cognoscere, quando affectio evaserit cerebro essentialis ex signis, quæ inflammationem cerebri ostendunt.

Ex absentia vero eorum, quæ cerebrum, aut membranas per *Signa delirii* essentiam affici significant, dignoscitur delirium esse per consen-  
sum: deliriumque non est continuum, sed interpolatum, præ-*per consen-*  
terquam ubi vulnus diaphragmatis, cui inflammatio supervenit, sum.  
consequitur: quod contingit non solùm ob insignes nervorum propagines, quæ ad ipsum feruntur, verùm etiam & magis ob continuum diaphragmatis motum, quo fit, ut semper affectio communicetur cerebro, vel ab inflammata parte continuo moveantur vapores ad cerebrum: sed hoc delirium ab eo, quod per essentiam est, distinguitur tum ex situ, & qualitate vulneris, tum ex absentia eorum, quæ cerebri, vel membranarum inflammationem ostendunt. Delirium etiam per consensum illud habet, quod ad alterius affectionis remissionem remittitur, intensioremque intenditur, veluti accidit omnibus affectionibus, quæ per consensum fiunt, unde si ob elevationem putridorum vaporum à vulnerata parte ad cerebrum factum fuerit, expurgato à purulenta materia vulnere, intermittit, aut saltem imminuitur delirium, ea verò rursus collecta revertitur, aut intenditur. Num vero delirium fiat, sola mala qualitate communicata, an etiam vapore; & si vapore, an elevato ab ipsa vulnerata parte, vel potius à venis, qualitas vulneris & febris declarabit. In vulnere namque partium nervosarum sola qualitas communicari solet: At si vulnus fuerit putridum, aut cum corruptione, etiam vapores cerebrum petunt. In vulneribus quoque venenatis aura venena-



ta cerebrum adurit: quod si ratione febris ob ebullitionem humorum vapores ad cerebrum eleventur, deliriumque concitent, aderunt signa putridæ febris, ejusque intensæ, & fervoris humorum, & ideò præcedunt capitis dolores, & urinæ perturbatæ, quales subjugalium, atque tales perseverant, quandiu soli vapores ad cerebrum moventur, at quando & ipsi succi eò moveri incipiunt, urinæ redduntur decolores. Si ex dolore ortum habuerit, dolor vulneratæ partis ostendet, atque ad intensiorem doloris intendetur delirium, ad ejusque remissionem remittetur. Auram venenatam ad cerebrum ferri signa venenati vulneris patefacient, quæ proprio loco tradentur.

*Præsentia.*

Si per essentiam fuerit delirium ex inflammatione, vel ex irrigatione, maximè periculosus est affectus, immò rarissimi evadunt; vehemens enim est affectus in parte principe, facillimeque adnectitur vehementia ratione facultatis. Si tamen irrigatio fuerit ex purulenta materia, & in loco in quo eidem parari possit idoneus exitus, minus malum, quando id à Medico cognoscatur, & non pauci ex his servantur, modò nullum ex auxiliis necessariis prætermittatur. Quoniam autem facilius paratur exitus, & cum minori dispendio materiæ, quæ inter cranium, & duram meningem continetur, quam ei, quæ sub dura membrana reperitur, idcirco pauci admodum servantur ex istis. Quid verò sentiendum sit de illo delirio, quod ex compressione ab osse, vel telo, aut à punctione ortum ducit, declarabitur, quando de capitis vulneribus erit sermo. Et de eo pariter, quod à putredine pendet, & corruptione vulnere capitis superveniente. Delirium ex super-

*Explicatio* fluo sanguinis fluxu malum est, dicente Hip. 7. Aph. 9. A pro-  
*9. Aph. 7.* fluvio sanguinis desipientia, ac convulsio malum. Pulium tamen  
*sectionis.* consulere oportebit, constante enim vitali facultate, aliquid boni sperari potest, modò sanguinis fluxus compescatur, si tamen convulsio accesserit, desperata est salus, unde Gal. 7. Aph. 9. Secundum hanc lectionem, & desipientia non bonus est casus post sanguinis fluxum, etiam si sola contigerit, multo autem magis convulsio, vel si absque desipientia facta fuerit; maximum verò malum est ambarum conventus, quando & ex immoderata evacuatione convulsio est casus admodum exitialis. Si delirium ex

vulnere



vulnere capitis venenato factum fuerit, prælagium petendum est ex natura veneni, & de vulneribus venenatis suo loco pertrahabitur.

Delirium per consensum modò magis, modò minus periculolum censendum, prout affectus, à quo principaliter provenit, erit magis, aut minus contumax; hinc si nervi vulnus subsequatur, pauci liberantur, sed phrenitidis, & convulsione lethalis præludium esset solet, signum est enim vel vulneratum nervum inflammatione correptum esse, vel materiam virulentam in ejus substantiam absorptam esse, unde propter maximam communionem, quam habent nervi cum cerebro, facile admodum affectio fit essentialis in ipso cerebro. Si vero ob putredinem, & corruptionem pravi vapores ad cerebrum ferantur, deliriumque excitent, prout putredo, & corruptio fuerit magis contumax, eo augebitur, aut imminuetur periculum. Non solùm ergo natura vulneris erit consideranda, & ejus status, verùm etiam temperamentum ægrotantis, ætas, consuetudo, præcedens victus ratio, anni tempus, & temporis constitutio præsens, & præterita, regio, & hujusmodi, quæ ad certiores faciunt cognitionem status vulnerati. Si delirium ex dolore evenerit, solet sedato dolore quiescere. Si ex aura venenata ad cerebrum delata, evicto veneno, nullum amplius negotium faceffit; proinde natura, & vis veneni judicium determinabit.

## CAPUT LXXIV.

*De curatione delirii.*

SI delirium fuerit ex inflammatione cerebri, aut membrana-  
rum, in principio quidem revellenda est materia ad caput  
fluens, à capiteque repellenda, astringendæque viæ, ut minus  
prompte fluat, incraffanda quoque ipsa materia, ut segnis red-  
datur ad motum. In augmento repellentibus digerentia sunt per-  
miscenda, ut, quod impactum est, & repellentibus non cedit,  
digeratur. Prædominari tamen debet vis repellens, sicuti etiam  
majus negotium faceffit, quod influit, quam, quod impactum



est. In statu æqua debet esse vis repellens, ac digerens, ne digerentia plus suo calore attrahant, quam digerant. In declinatione vero soli digestionem incumbendum. Quas indicationes magis diffusè prosequuti sumus capite de inflammatione, & de fluxione, iidem ferè scopi sunt spectandi, quando bilis cerebrum, & membranas alluit. Si materia purulenta fuerit in causa, digerenda, ejusdemque procuranda expurgatio per ea loca, quæ cerebrum expurgare à recrementis consueverunt, videlicet per aures, nares, & palatum. Et si fieri possit, parandus est arte idoneus exitus. Si quid comprimens, aut pungens delirium effecerit, illud quam primum auferendum, antequam videlicet inflammatio, aut putredo superveniat. Si putredo, atque corruptio, hæc valde exsiccantibus, & acribus etiam sistenda. Si venenum, alexipharmacis expugnandum est, & iis, quæ venenum ad locum vulneris evocent. Si dolor, sedandus.

*Delirium  
per consen-  
sum.*

Si delirium fuerit per consensum, & quidem ex nervorum vulnere, omni revulsionum genere prohibendum, ne materia fluat ad caput, fiatque delirium essentielle: unde & repellendum erit, & adstringendæ viæ, nec non & incrassanda materia. Sed in primis sollicitudinem ipsius vulnerati nervi habere oportet, ut videlicet quamprimum absorpta in ipso materia exsiccet, & digeratur, & omnino absumatur: & si inflammatus sit nervus, ut inflammatio mitescat. Si ob elevationem vaporum ad caput à vulnere propter putredinem, & corruptionem, putredo, & corruptio emendanda, sed studendum, ne affectio fiat essentialis. Si aura venenata è venenato vulnere elevata delirium fecerit, ad vulnus advocanda, venenumque alexipharmacis expugnandum. Si dolor, sedandus. Si igitur ex inflammatione, aut irrigatione membranarum cerebri ab humore bilioso ortum habuerit, protinus congruis revulsionibus incrementum prohibere oportebit. Secare itaque venam utile erit, si vires ferant, unde & Gal. 2. de comp. med. per loc. Optimum itaque fuerit, nisi ætas prohibeat, & nisi vitalis facultas debilis appareat, à venæ sectione curationis initium facere. Sin minus hirudines erunt affigendæ, aut cucurbitulæ cum scarificationibus dorso, & superioribus brachiorum partibus affigendæ. Vena autem communis, aut cephalica



phalica erit eligenda, & in ejus sectione ea servanda, quæ dicta sunt in communi tractatione. Cucurbitulæ quoque tum scarificatæ, tum sine scarificatione fuerint ex usu. Item frictiones asperæ, vincula, & lotiones extremarum partium ex aqua calente. Purgans medicamentum hic etiam locum habebit, modò exhibeatur, antequam affectus factus fuerit, nam ubi humor firmatus est, frustra, & cum detrimento potius exhiberetur. Clysteres, & suppositoria convenient, neque lenia tantummodo, sed & acria. Quæ succos ineptos ad motum reddunt, ac vias angustant, non erunt prætermittenda.

Quòd verò ad partem attinet, abraso capite, irrigationes in-<sup>Purgans me-</sup>stituentur ex oleo rosaceo, eoque lana imbuta caput contegetur.<sup>dicamentum</sup>  
Gal. 2. de comp. med. per loca cap. 1. utebatur oleo dulci lana<sup>convenit an-</sup>  
excepto. Acetum quoque permisceri rosaceo poterit, ut ad pe-<sup>tequam af-</sup>netrationem faciat. Laudatur & ipsum oxyrhodinum loco rosa-<sup>fectus fir-</sup>metur.  
cei, si materia fluens fuerit biliosa, violaceum accipiendum erit,<sup>Localia.</sup>  
aut saltem rosaceo permiscendum, locoque aceti succus acidus  
limonum, aut citri. His addi poterit, cum præsertim vigilæ  
urgent, succus lactucæ, cucurbitæ, solatri, vel earum aquæ stil-  
latitiæ. Aqua rosacea, si vires santalorum habuerit, erit optima.  
Procedente malo, si phlegmonè causâ extiterit, ut deriverit ma-  
teria in parte contenta, convenient hirudines post aures, sectio  
venarum, quæ sub lingua sunt, sectio ejus venæ, quæ in fronte  
reperitur inter unum, & alterum oculum; apèriuntur etiam ma-  
ximo cum fructu venæ, internæ præsertim, nasi, aut hirudini-  
bus, aut alio instrumento, sic, ut sanguis copiosus fluat.

Ut vero materia jam impacta, quæ neque repellentibus, ne-<sup>Digerentia.</sup>que attrahentibus cedit, digeratur, decocto camæmeli, rosarum  
rubearum, malvarum, meliloti, fœnuigræci, & hujusmodi, ad-  
dendum oleum rosaceum completum, atque camæmelinum, vel  
liliorum alborum, irrigationesque parandæ. Perbellè quoque  
digerunt, & tutius, quæ calorem habent nostro similem, cujus-  
modi sunt omenta vituli, arietis, suis, recens ab animali vivente  
adhuc extracta, & applicata, & ubi refrixerint immutata. Item  
pulmones arietis pari modo extracti, & cum suo naturali calore  
applicati. Atque si tot omenta, vel pulmones haberi non pos-



sint, ubi refrixerint, oleo rosaceo, atque camæmelino mixtis, aut oleo olivarum dulcissimo calefient, deinde linteo involuta applicabuntur. Eundem usum præstant pulli columbini vivi per dorsum dissecti, atque applicati, sæpeque immutati, nec non & gallinacei pulli, & catulus nuper natus. Eadem usurpari poterunt, quando ex irrigatione pendet delirium. Consistente jam affectu, in usu eorundem resolventium persistere oportebit, suspecta etenim sunt, quæ validius calefaciunt, fortasse namque fluxionem novam advocabunt. Sed prætereà grandis cucurbita cum scarificationibus profundioribus occipitio affigenda erit, ut deturbetur materia in parte affecta collecta. De his tamen omnibus diffusius agemus, de capitis vulneribus sermonem habentes. Si materia purulenta sub osse cohibita delirii causa extiterit, dandus erit exitus per ossis excisionem, de qua proprio loco tractabitur. Si putredo, & corruptio vulneris, corrigenda hæc erunt, veluti proprio loco explicatur. Si compressio, aut punctio, quod comprimit, aut pungit auferendum, quam auferendi rationem in doctrina vulnerum capitis diffusè prosequemur.

*Delirium  
ex defectu  
spirituum.*

Si defectus spirituum ex superfluo sanguinis fluxu, sanguinis, & spirituum reparationem procurabimus cibus boni succi, & facilis coctionis, ac distributionis, postquam sedatus fuerit sanguinis fluxus, nec non & optimis odoribus, itaque ova forbilia exhibenda erunt, juscula, contusum pulli, vel caponis, aut perdicis, succus carniū expressus, præsertim caponis, stillatitium caponum, quibus omnibus margaritæ addi poterunt, aut Diamargariton frigidum in rotulis, ut magis roboretur virtus. Vinum quoque concedi poterit, sed tamen, quale proposuimus capite de syncope, in ea videlicet, quæ ex superfluo sanguinis fluxu contingit, expedit autem sæpe alimenta exhibere, parum tamen pro qualibet vice offerendum. Odoramenta parari poterunt ex aqua rosacea, aceto rosaceo, aqua florum citri, vel aurantiorum, santalis, & aliis, quæ ibidem proposuimus. Si deficient spiritus, quia per vulnus exhalent, tectum servandum vulnus.

*De delirio  
per consensum.*

In delirio per consensum omne studium adhibendum est, ne fiat per essentiam, & propterea in revulsionibus persistere oportet.



oportebit, repellentiaque capiti erunt continuò admovenda. De vulnere autem ipso maximè sollicitos nos esse oportet. Proinde si ex nervi vulnere id acciderit, & quidem, quia inflammatio supervenerit, sedanda erit quam primum inflammatio, ut proprio capite traditum est. Maxime autem confert in inflammationibus partium nervosarum cataplasma ex farina hordeacea, fabarum, & orobi, atque posca acetosa confectum, addito rosaceo lumbricato. Huic in principio inflammationis addo pulverem rosarum rubearum, in progressu vero pulverem florum camæmeli, & loco etiam poscæ accipio oxymel simplex, aut si reum. Non mediocriter confert, si pars foveatur lana, aut spongia oleo rosaceo lumbricato imbuta, dein leviter expressa. Oleum verò æstate quidem sit tepidum, hieme vero actu calidum. Sed de his suo loco: si verò putredo, vel materia virulenta in ipsum nervum absorpta fuerit in causa, procurandus est materiæ exitus, & absumptio per ea, quæ citra morsum exsiccant, ad quæ etiam licebit ascendere, quando ingens fuerit putredo, & corruptio: de quibus omnibus partim agemus capite de convulsione, & de corruptione, atque putredine, partim tractabimus, cum de nervorum vulneribus determinabimus. De nervi sectione, quid sentiendum, dicemus capite de convulsione. Si ob dolorem mens non constet, sedandus dolor, prout proprio capite traditum est. Si venenata aura ad cerebrum elevetur à vulnere, occurrendum veneno, prout capite de vulneribus venenatis exponemus.

## CAPUT LXXV.

*De resolutione.*

**P**ER resolutionem, quæ à Grecis Paralysis appellatur, intelligimus ablationem sensus, aut motus, aut utriusque, unius, vel plurium partium corporis, non tamen omnium, quia tunc esset apoplexia, unde Galenus primo de cav. symp. Ubi nervi sensum, & motum amittunt, huiusmodi ipsorum vitio paralysis, seu resolutio dicitur.

Sed cum modò motus illæso sensu, modo sensus illæso motu,



*Exquisita  
resolutio.*

tu, modo uterque auferatur, magis propriè dicitur, partem esse resolutam, quando motus amittitur, quàm ubi sensus. Quin partem, quæ sensum tantum amisit, sensus expertem potius, quam resolutam appellamus, unde Galenus tertio loc. af. quarto: Nervorum resolutio potissimum dicitur, ubi motus est deperditus, ubi verò partium aliquarum motus periit, eam partem sensus expertem, resolutam vero non adeo dicere consuevimus. Quod si sensum simul, & motum pars amiserit, tunc exquisita erit resolutio. Liceat autem in præsentia nobis resolutionem appellare, siue sensus amittatur, siue motus.

*Resolutio  
quid.*

Contingit autem hic affectus defectu qualitatis animalis, quæ à cerebro per nervos influere consuevit, in parte resoluta, cujus qualitatis ratione pars illa reddebatur conveniens instrumentum, aut sensus, aut motus, aut utriusque simul. Quocirca resolutio nihil aliud est, quam ablatio sensus, aut motus, aut utriusque ob defectum qualitatis animalis in parte. Unde si causas invenerimus, propter quas non reperitur qualitas illa in parte resoluta, causas hujus symptomatis habebimus.

*Causæ.  
Cur qualitas  
in malis  
non recipiatur.*

Non reperitur ergo qualitas illa in parte aliqua, vel quia transmissa non recipiatur, vel quia non transmittatur. Transmissa non recipitur, eo quia pars non sit disposita ad ejus receptionem, quod potissimum contingit, si ob frigiditatem densetur, ut quando quis partem diutius continet in aqua frigida, quod etiam ex Galeno colligi potest primo loc. af. capitulo sexto. Non transmittitur, seu non pervenit ad illam partem, aut quia prohibeatur transitus hujus qualitatis, aut quia à cerebro non transmittatur. Prohibetur transitus ob vitium aliquod in nervis, per quos ejusdem ad partes fit irradiatio, obstando quo minus ulterius pergat irradiatio. Quod vitium potest esse continuitatis solutio, & angustia. Continuitatis quidem solutio, quoniam irradiatio requirit continuitatem partis. Angustia verò, siue sit compressio, siue constipatio, siue obstructio, quoniam irradiationi est veluti obstaculum, cujus gratia radii nequeunt ad partes tendere. Non aliter solis irradiatio prohibetur, quando crassa quæpiam nubes, aut nebula ipsi opponitur: deberent enim nervi esse rari, ac puri, sed hæc raritas, & puritas tollitur ab angustia, ideoque non

*Quomodo  
prohibeatur  
transitus  
qualitatis  
animalis.*

est



est mirum, si irradiatio intercipiatur. Compressio quidem fieri *Compressio.* solet à re externa comprimente nervum, aut spinalem medullam, cujusmodi est vinculum, vel aliud quid extrinsecus adveniens, ut os à propria sede egressum, ut in luxationibus vertebrarum, tumor durus, & hujusmodi, unde Galenus loc. af. 3. Ad compressionem nervorum resolutio sequitur earum partium, ad quas compressus nervus pervenit. Constipatio similiter fit à tuberculo *Constipatio.* substantiam ipsius nervi, aut spinalis medullæ pervadente, vel etiam in ipsa exorto, aut ab humore crasso, & viscido. Similiter *Obstructio.* obstructio ab humore crasso exoritur, nec non & à materia purulenta: quamvis propriè loquendo solum illæ partes obstruantur, quæ conspicuis cavitatibus sunt præditæ, ideoque soli nervi optici propriè obstruuntur, reliqui verò nervi constipantur potius. Densitate quoque nervi angusti redduntur, ut ob id prohibeatur transitus qualitatis animalis: quæ quidem densitas oritur potissimum ab ingenti frigiditate, qua nervorum partes quodammodo adstringuntur, & in unum coguntur, ut ob id longè densior sit substantia nervi, quàm prius.

Aliqui appellant hunc affectum subsidentiam, sicuti & quando præ nimia humiditate laxantur nervi, & ita pori eorum clauduntur, & præ nimia siccitate partes similiter nervorum colliguntur, & nimis uniuntur, & ita clauduntur nervorum pori. Ex alimento quoque crasso, & glutinoso nervum densari contingit: sed ex eo ad tantam densitatem pervenire non existimo, quæ possit omnino prohibere transitum, & irradiationem hujus qualitatis, & paralysem efficere, sed ex parte tantum, ut stupor potius, vel tremor generetur. Hæc paralyse causas recensuit Galenus secundo de simp. caus. primo dicens: Nervus aut stupore, aut resolutione infestatur, si vel frigus eum constringat, aut crassi, lentique humores obstruant, aut aliqua externa causa ipsum suo pondere comprimat.

Porro non transmittitur qualitas illa à cerebro, eo quod *Cur non* omnes spiritus ad unam partem ipsius cerebri, seu capitis natura *transmitta-* transmittat, aut quia ipsi spiritus à quapiam ipsius parte, quæ in- *tur qualitas* flammata sit, attrahantur, unde si unus ex temporalibus musculis *animalis.* inflammetur; alter resolvi consuevit, & quoniam destituitur ani-



mali qualitate, quæ in inflammatum musculum confluit. Non transmittitur etiam ob penuriam spirituum animalium in cerebro, hinc diuturnas inedia quandoque resolutio subsequitur, præcipuè in senibus. Sæpius tamen ex spirituum defectu in cerebro fit universalis paralyfis, quæ apoplexia dicitur.

*Differentiæ  
resolutionis.*

Ex his apparet, multas esse resolutionis differentias, omnes tamen ferè à triplici fonte proveniunt, videlicet ab actione læsa, à partibus affectis, & à causis ipsius. Ab actione quidem læsa quoniam læditur sensus, vel læditur motus, vel uterque.

*Cur modo  
sensus tan-  
tum, modo  
motus, mo-  
do & sen-  
sus, & mo-  
tus deper-  
dantur.*

Sed antequam ulterius progrediamur, videre oportet, cur aliquando sensus, aliquando verò motus deperdatur, aliquando tum sensus, tum motus. Scire igitur oportet, omnes nervos, sive à spinali medulla, sive à cerebro oriantur, deferre qualitatem animalem ad partem, in quam feruntur, quæ ex se sufficiens est, ut pars illa reddatur apta tam ad sensum, quam ad motum: non enim alia est qualitas animalis motiva, alia sensitiva, sed una, & eadem, sicuti unus est, & idem spiritus animalis, non alius motivus, alius sensitivus. Hoc sensu ipso licet deprehendere, namque ramus unius, & ejusdem stipitis ad unam partem defert sensum tantum, ad alteram verò motum, nervus enim sextæ conjugationis ad orificium ventriculi sensum defert, ad laringis verò musculos vim motivam. Similiter quinta conjugatio aliqua sui portione ad aures perveniens, auditoriam defert qualitatem, alia verò portione ad temporales musculos vim motivam; & sic de aliis multis, evidentissimum argumentum, à nervis omnibus utramque facultatem deferri, seu potius unam, & eandem qualitatem, quæ apta est, tum ad sensum, tum ad motum, sed quod pars per qualitatem à nervo receptam, aut sentiat, aut moveatur, id in propriam partis naturam referendum est, quæ nervum recipit: namque si ea pars fuerit organum voluntarii motus, & mediante illa qualitate apta erit ad motum voluntarium: at si nervus non inseratur in musculosas partes, pars non erit apta ad motum, quoniam instrumentum voluntarii motus est musculus, sed ad sensum tantum, unde si esset organum tactus, pars erit ad tactum apta, si visus, ad visum, si auditus, ad auditum, si olfactus, ad olfactum. Sed qui ad musculos feruntur,

omnes



omnes quoque vim sensitivam deferunt, constat enim musculos omnes sentire, unde etiam Galenus septimo de plac. Hippocratis, & Plat. cap. 5. & 7. de Anat. administ. asserit, nervos omnes motivos esse sensificos. Contingit ergo, ut aliqua accepta pars duos recipiat nervos, quorum altero motivam qualitatem recepit, altero verò sensitivam tantum, quoniam in ea particula reperiuntur partes, quæ sunt instrumentum motus voluntarii, & quæ solummodo sunt instrumentum sensus, ut in brachio sunt muscoli, & cutis, muscoli sunt instrumentum motus voluntarii, cutis est instrumentum tactus solummodo, unde alia nervi portio deferat vim motivam, quæ videlicet ad musculum fertur, alia vero sensitiva externi objecti, seu tactiva, quæ videlicet ad cutim: & oculus alia nervorum portione movetur, alia videt, alia vim habet tactivam; Contingit etiam alias partes sensum, & motum simul recipere ab uno, & eodem nervo, cum enim unus, & idem nervus deferat eandem qualitatem; quæ sufficit ad sensum, & motum, si contingat partem aliquam simul esse instrumentum motus voluntarii, & sensus tactus, uno, & eodem nervo sensitivam habebit facultatem, ac motivam, ut patet de musculo. Quando ergo una tantum actio pereat altera illæsa, in partibus, quæ duplicem nervorum differentiam recipiunt, facile est causam invenire, nulla enim alia ratione id contingit, nili quia unus tantum nervus afficitur, vel sensitivus, aut motivus: quamvis ubi motivus afficiatur, plerumque lædatur quoque musculi sensus. Verum si uno, & eodem nervo tum sensitivam, tum motivam potentiam pars habeat, difficilior est causam assequi; animadvertendum tamen, ad sensum efficiendum, quoniam in pati potius consistit, longe minorem qualitatem animale sufficere, quam ad motum, qui in actione magis consistit: quare, si contingat, leviolem esse affectionem in nervo, motus auertur, illeto sensu. In hoc autem casu nunquam contingit servari motum ablato sensu, quoniam affectio, quæ tollit irradiationem sufficientem ad sensum, longè magis tollit eam, quæ ad motum requiritur, cum ut dictum est, longè copiosior requiratur irradiatio pro motu, quam pro sensu, unde Galenus primo de cav. simp. capitulo quinto: Quomodo igitur quorundam partium movendi



quidem ab impetu functio resolvi videatur, illæsa sentiendi facultate, ac quomodo rursus aliæ moventur quidem, sed non sentiant, in lingua, & oculis, quæ duplici nervorum genere præditæ sunt, nihil habet ambiguitatis. At in quibus membris dumtaxat nervi inveniuntur, hac ratione quæstio explicabitur. Si ablata cute, subjectus musculus, qui nudus est, immobiliis videatur, sentiat autem tangentes, exiguam ei noxam accidisse putandum est, nempe quod tantam animalis facultatis partem susceperit, quanta ad sensus excitationem sufficiat, ad musculi motum non sufficiat. Quippe tactionis sensus pati aliquid potius, quam agere deprehenditur, proinde ab exigua facultate functio ejus perfici potest; musculorum verò motus in agendo, non in patièdo actionis efficaciam habet, is enim totum corpus transferre potest, quapropter plurima indiget animali facultate.

Neque aliter accidere unquam deprehendes, ut moveatur quidem nudus musculus, sed non sentiat. Verùm nihil mirum videri debet, si adjacens illi cutis sensum amittat, musculus verò ipse moveatur. Quemadmodum etiam usu venit, dum duorum musculorum alter quidem movetur, alter verò immobilis sit, aut alter quidem sentiat, alter vero sensum amiserit. Id verò hanc ob causam eis evenire solet, quòd nervus alterius læsus est, alterius verò mansit illæsus. Sic etiam fieri potest, ut nervus per cutim dispersus offendatur, qui verò per musculum spargitur, noxa careat. Sic è converso fit, ut illæso cutis nervo, lædatur nervus musculi. Neque huic determinationi obstat, quod in apoplexia servetur respiratio sensu ablato, atque ita ablato sensu, servetur motus musculorum thoracis, quamvis enim sensus tactus in cæteris partibus sit ablatum, adhuc tamen permanet in ipsis thoracis musculis, sicuti enim qualitas motiva influit, ita & sensitiva (cur verò omnibus aliis actionibus animalibus ablatis, solus permaneat musculorum thoracis motus, alia est quæstio, neque ad præsentem locum facit) quantum est ex ratione facultatis. Verùm quoniam ad sensum tactus non sufficit, ut objectum sit præsens, & instrumentum sit ex se dispositum, sed insuper requiritur, ut judicetur à communi sensitivo, unde & fani non advertentes quandoque objecta sensibilia, præsentia non sentiunt, idcirco



circò, quoniam commune sensitivum in apoplexia afficitur, ita ut iudicium fieri nequeat, fit ut muscoli thoracis, quamvis sensitiva facultate non sint destituti, non tamen sentiant. Idem in epilepsia accidit, in qua sensus partium aufertur, & tamen partes omnes contrahuntur, non percipiuntur enim objecta sensibilia ob communis sentiendi principii affectionem. Licet dici quoque possit, epilepticos motus non esse motus, qui fiant mediante qualitate animali à cerebro influente, sed motus involuntarios ad contractionem cerebri consequentes, qui citra opem illius qualitatis fiunt, unde & quandoque partes resolutæ convelluntur, veluti ex Hippocrate colligi potest primo Epid. sect. tertia: Ægroto decimotertio, ubi hæc habet, statim lingua voce destituta est, dextra manus resoluta est cum convulsione, veluti attonitis solet. Quare sicuti prohibetur influxus sensitivæ qualitatis, ita etiam motivæ. Evenit etiam quandoque sensum imminui, vel auferri superstitie motu, eo quod instrumentum sit ad sensum ineptum, aptum tamen ad motum, sed non est affectio hæc vera partis resolutio. Id contingit ob nimiam sensitivarum partium exsiccationem, qua minus aptæ sunt ad sensum, sed ad motum robustiores.

Differentiæ, quæ sumuntur penes resolutas partes, multæ sunt, namque vel pars dextra resolvitur, vel sinistra, atque nonnunquam cum læsione etiam partium capitis, aliquando verò citra læsionem earum, vel una tantum, aut plures partes tam à dextris, quam à sinistris resolvuntur. Ratio harum differentiarum referenda est in diversitatem partis, quæ primò afficitur; *Causa differentiarum* namque si affectio fuerit in principio spinalis medullæ utraque ex *paralysis penes affectas partes.* parte, totum, quod sub capite est, resolvitur, tam scilicet dextra, quam sinistra pars. Si verò dimidia tantum pars, vel dextra tantum, vel sinistra pars resolvitur, quæ videlicet è directo respondet affectæ parti. Si unà quoque afficiantur nervi per capitis loca disseminati, initium videlicet ipsorum, quod in cerebro est, una quoque partes faciei, & capitis resolvuntur. Si peculiaris quispiam nervus ad partem aliquam latus, ea tantum pars, in qua fertur ille nervus, resolvitur, si plures afficiantur, & plures partes resolvuntur. Unde Galenus tertio loc. af. deci-



mo: Ubi nervi alicujus partis vel dextræ, vel sinistræ sensum, & motum amiserint, resolutio dicitur partis ejus, in qua consistit affectus,

Si in aliquo membrorum idem evenierit, ejusdem membri resolutio dicitur, & inferius: Circa primum spinæ medullæ processum facta aliqua dispositio, per quam cerebri facultas, quo minus ad ipsam perveniat, prohibetur, omnia inferiora membra dempta facie, sensu, motuque privabuntur. Ubi verò dimidia ejus processus pars fuerit affecta, vel dextræ, vel sinistræ dumtaxat, & inferius: Si pars aliqua faciei simul cum toto corpore resoluta est, resolutionis dispositio in ipso cerebro consistit. Si particularis aliqua faciei pars dumtaxat afficiatur, particularis etiam cerebri pars, unde ad eam veniunt nervi, est affecta, & inferius: Si pars aliqua est resoluta, nervum qui ejus motioni deputatus est, vel muscolum affici necesse est.

Differentiæ à causa efficiente ex supradictis satis sunt manifestæ, alia siquidem fit ab obstructione, alia à constipatione, alia à compressione, alia à subsidentia, alia à continui solutione, & sic de reliquis. Quomodo verò in vulneribus contingat resolutio, jam videamus.

*Quomodo in  
vulneribus  
accidat re-  
solutio.*

Per vulnera igitur contingunt resolutiones, aut ob nervi præcisionem, vel musculi, aut ob ejusdem contusionem facta compressione, aut ob inflammationem facta constipatione, & compressione, aut propter obstructionem, seu constipationem à materia purulenta, aut ob retrocessum animalis facultatis, ut in cerebri inflammationibus, vel musculi temporalis. Potest etiam contingere ob humores crassos, & viscidos, qui prius in cerebro existentes occasione ictus ad principia nervorum lati sunt. Item ob compressionem factam ab aliquo ossis frustulo, vel ab osse luxato.

*Dubitatio.*

Sed inquisitione dignum est, quomodo ex vulnere spinæ medullæ quandoque contingat resolvi tantum pedem, & crus, non superiores partes, quæ tamen, ut videtur, magis deberent resolvi. Verum duplici de causa hoc in vulneribus solet evenire, prima quidem propter spinæ medullæ compositionem, quæ licet primo aspectu unius rationis esse videatur, re vera tamen est  
veluti



veluti capillorum acervus, indistinctus ad sensum. Unde & ab ipso spinæ initio ad unamquamque partem diriguntur nervi, qui tamen à reliquis non sunt distincti, nisi dum egrediuntur ipsam spinam. Quamvis autem distincti sint in hoc egressu, nihilominus sunt efformati ex portione illa capillorum, unusquisque videlicet nervus ex sua: quare si contingat per vulnus præsecari in spina capillamenta, ex quibus exempli gratia ortum ducit portio illa nervorum, quæ ad crus, & pedes fertur, confestim crus, & pedes resolvuntur, illæsis superioribus partibus: à capillamento enim præsecto non habent ortum nervi, qui ad superiores partes tendunt. Ex quo quidem reddi potest ratio miræ varietatis convulsionis epilepticæ. Potest etiam id contingere, & est altera causa, quoniam ex vulnere tenuis quidam humor, prius existens in spina, decumbit in inferiores nervos, & eorum robur dissolvit. Purulenta quoque materia ad eosdem descendens, idem efficit. Sed tunc non statim affectio vulnus consequitur, præsertim si purulentia eam effecerit.

An verò ab hac, an ab illa causa accidat resolutio in vulneribus, non est difficile cognoscere, namque si ex sectione, aut contusione ortum habeat, statim inflictio vulnere ea subsequitur. Si ob inflammationem fiat compressio, & constipatio, aderunt inflammationis signa in parte vulnerata. Si ob materiam purulentam facta fuerit obstructio, sive constipatio, non nisi processu temporis contingit resolutio, adsuntque alia signa retenti puris. Potissimum vero id contingit per capitis, aut spinalis medullæ vulnera. Si verò occasione vulneris crassi, & viscidî succi in nervos decumberent, hoc ab ictu statim contingit, absque tamen nervi præcisione aut contusione, & in capitis vulneribus præsertim conspicitur; ob violentiam enim ictus materia pituitosa in cerebro existens agitur, & cum impetu movetur, & quasi projicitur in nervorum principium, unde resolutio modo dextræ, modo sinistræ partis, modo unius particularis membri, pro ratione quantitatis materiæ, & loci, ad quem decumbit. Idem aliquando accidit ob cerebri flammæ dispositionem. In qua autem parte consistat causa, ubi materia purulenta, vel pituitosa, & crassa eam fecerit, partes affectæ demonstrabunt; nam, si unica tantum

*Signa.*



tantum pars resolvatur, initium nervi, qui ad eam fertur, causam continet, si plures, stirps nervorum ad eas venientium, si tota pars dextra, aut sinistra sub capite, initium spinalis medullæ. Si ob retrocessum animalis spiritus resolutio contigerit, vulnus est in capite, supervenitque inflammatio aut facta est magna cerebri concussio.

*Præsentia.*

Resolutio ex se lethalis affectio non est, sed tamen lethalis affectionis signum esse potest, ut quæ inflammationem vulnerati musculi temporalis, vel membranarum cerebri, aut ipsius cerebri, vel putredinem in his partibus contentam consequitur. Item quæ spinæ inflammationem, quamvis hæc non sit adeo lethalis, curatur enim quandoque inflammatio spinalis medullæ, unde Gal. 1. loc. af. 6. septem diebus scribit inflammationem spinæ curari. Resolutionem quoque interdum contingit lethalem esse ex accidenti, hoc est ratione partis affectæ; nam resolutio partis ad vitam necessariæ in mortem, si causam habeat stabilem, seu contumacem, plerumque terminatur, ut quando resolvuntur musculi deglutitioni inservientes, & qui excrementorum primæ coctionis expulsionem sunt dicati, fœcum videlicet, atque urinæ: unde etsi auferatur intestinorum sensus, in mortem solet finire, quia non sentiunt irritamentum fœcum, ideoque non insurgunt ad eorum expulsionem, & ita modo involuntariè exeunt, modo penitus supprimuntur, & idem est de urina. Ad curationem autem, quæ non est lethalis affectionis signum, neque ex accidenti lethalis est, se habet hoc modo, quæ ex præcisione nervi, aut vehementi contusione ortum habet, incurabilis est; illa quidem, quoniam cum irreparabilis sit nervi dissecti continuitas, siquidem nervus sectus non coalescit, ut dicebat Hippocrates 6. Aph. 19. & sine hac non possit fieri influxus animalis qualitatis, necessario in posterum remanebit pars illa, ad quam fertur sectus nervus, animali qualitate orbata, & propterea deficiet aliquis ex partis motibus. Non aliter, si attritus fuerit vehementer nervus, nam post sequutam sanitatem in ea parte nervi tanta remanet densitas, ut præpediatur transitus influentis qualitatis. Quæ ex purulenta materia, aut alia crassa materia, ortum habet, modò principalis affectio curetur, & ipsa plerumque curatur, nisi in sene, aut decre-



decrepito fuerit. Ut plurimum tamen diuturna est affectio, ægrè enim discutitur materia crassa in intima exanguis partis substantia impacta. Quæ ex inflammatione non lethali alicujus partis ortum ducit, & ipsa curari solet. Quando autem in paralyfi nimis extenuantur, & contabescunt resolutæ partes, vel earum color immutatur, malum, signum est enim imbecillitatis naturalis caloris, qua causam conficere non poterit, vel cum maxima difficultate. Quod si non extenuentur notabiliter, bonum, signum est etenim roboris nativi caloris. Sperare autem sanitatem citiùs potuerimus, si resolutis partibus tremor accidat, quoniam causam resolutionis imminui, & alicui influxui locum dari significat, utpote quod præsentiam alicujus animalis qualitatis in parte supponat, siquidem, ut dicebat Galenus secundo de cav. simp. 2. Tremor ex duplici motu constat, altero quidem proficiscente ab innata membri gravitate deorsum trahente, altero verò à facultate sursum attollente, in qua pugna necessum est membrum tremore corripì.

## CAPUT LXXVI.

*De curatione resolutionis.*

**C**um igitur resolutio sit symptoma, per causæ ablationem, *Indicatio- nes.*  
ut cætera symptomata, auferri debet, unde si in causa fuerit inflammatio, quod ejus futurum est, prohibendum, ne fiat, quod verò factum est, tollendum, veluti proprio capite explicatum est. Si verò ob materiam purulentam facta fuerit, hæc attenuanda, & digerenda, aut sudoris specie expellenda, quando per meatus sensiles, neque naturales, neque artefactos evacuari non potest. Si ob materiam crassam, & viscidam, hæc erit evacuanda, tum per meatus sensiles, videlicet per alvum, & urinam, tum per insensiles. Si à telo, quod in vulnere permansit, vel ab ossis frusto, vel ab osse extra proprium locum pulso facta fuerit compressio, quod comprimit auferendum, etsi luxatum sit os, in propriam sedem reducendum. Si facultas retrocesserit revocanda, si defecerit, instauranda.



*Curatio resolutionis si ab inflammatione.*

Quando igitur ab inflammatione ortum ducit resolutio, curanda erit per ea, quæ inflammationem remonent, non secus ac proprio capite traditum est, verum, quoniam in curatione inflammationis secanda est vena, sanguinis autem missio totum corpus refrigerat, nec amplius refrigerandæ sunt resolutæ partes, ut quæ propter quietem, & defectum animalis qualitatis satis refrigerantur, non oportebit tantum sanguinis mittere, quantum alias mitteretur pro curatione inflammationis.

*Si à materia purulenta.*

Si à materia purulenta facta fuerit, peractis universalibus evacuationibus, ea digerenda erit, unde inunctiones illæ probantur, quæ in convulsione ex repletionem, de quibus in sequenti capite, & quæ conveniunt in ea, quæ à materia fit crassa, & viscida. Sed & fortis parari poterunt ex vino, in quo bullierint flores camæmeli, rosmarinus, iva, salvia, spica, seu lavendula, & ejus flores, calamintha, ruta, lauri, & juniperi baccæ, gario-philli, & hujusmodi madefacta in vino hoc calente spongia ampla, deinde expressa, partique pluries apposita. Sed & ea, quæ ad cutim materiam promovent, & per insensibilem halitum, vel sudoris specie eandem evacuant, utile erit per os exhibere, cujusmodi est decoctum Chinæ, Gaujaci, Sarsaparillæ, & hujusmodi, modò vulneris dispositio non prohibeat.

*Si à materia crassa, & viscida.*

Si materia crassa, & viscida fuerit resolutionis causa, facta congrua humoris præparatione per ea, quæ attenuant, & incidunt, cujusmodi est syr. de betonica, de stœchade, de iva, oxymel simplex, decoctio ivæ, salviæ, rorismarini, amaraci, betonicæ, pimpinellæ, lavendulæ, mentæ, origani, & hujusmodi, hanc evacuare oportebit pharmacis phlegmagogis, & iis etiam vehementioribus, ut à longinquis quoque partibus pituitam evocent, modò vires ferant. Hujusmodi erunt pilulæ cochix, fœtidæ, de nitro, hyera, diacolocinthidos, stibium præparatum, & similia, neque unica sat erit purgatio, raro enim unica purgatione educuntur humores crassi, & viscidi, eo autem minus, ubi in partibus remotis continentur. Iteranda itaque erit, donec exquisitè evacuatum sit corpus. Si virtus non ferat hæc validiora, imbecilliora erunt offerenda, sed crebrius ea exhibere opus erit, ut quasi per epicrasim fiat evacuatio, hujusmodi erunt agaricus



trochiscatus, pilulæ de agarico, de hyera cum agarico, Arabica, syr. de polypodio, & quæ sunt hujus census. Evacuato toto corpore, ut quod in parte affecta remansit materiæ absumatur, exhibenda erunt, quæ materiam illam, aut per insensibilem halitum evacuent, aut per sudores, vel urinas expellant, aut etiam exsiccent, ac prætereà nervos roborent; itaque resina terebinthina erit ex usu cum pulvere ivæ, atque betonica; præstantissima sunt Theriaca, & Mithridatium, elixir vitæ, castoreum, Quinta essentia appellata florum rorismarini, vel eorum oleum: leviora his sunt saccharum è floribus rorismarini, salviæ, betonica paratum. Sed maximè omnium prodesse solet decoctum Guajaci, & Chinæ, Sassafras additis herbis capitalibus, & quæ nervos respiciant, cujusmodi est betonica, rosmarinus, salvia, iva, &c.

Extrinfecus admovenda erunt, quæ vim habeant attenuandi, digerendi, & ex alto evocandi cum aliqua mollificatione, & hoc, ne subtili parte resoluta, quod crassum est remaneat resolutioni ineptum: quare eædem inunctiones convenient, quæ in convulsione ex tali causa, ex unguento videlicet arogon, marciaton, de bdellio, oleo laurino, vulpino, de castoreo, de euphorbio, de terebinthina, de croco, sinapino, balsamo arte confecto. Summopere etiam laudatur inunctio ex pinguedine, quæ deciderit ab anseris in veru asso, in cujus ventre confuta fuerint bdellium, opopanax, ammoniacus, tacahamaca, nuces myristicæ fractæ, mumia, castoreum, & frustum carnis vulpinæ. Ab inunctionibus autem utiliter superimponitur pellis vulpina suffumigata cum pulvere nucis moschatae, gariophyllorum, & ivæ: probantur etiam irrigationes ex aqua ardenti, in qua præsertim infusa fuerint iva, salvia, lavendulæ flores, betonica, amaracus, & similia: pariter fodus ex vino, in quo efferbuerint eadem herbæ, item stæchas, pulegium hyperici flores, & folliculi, hyssopum, anethum, thymus, fatureja. His addi possunt balnea naturalia sulphurea, & bituminosa, & duciæ ex iisdem aquis. Sed de hac resolutione satis hæc funto: hic enim non est proprius tractationis hujus locus. Animadvertendum autem, in hac affectione topica non rarò videri parum conducere, quoniam citò dissipatur eo-

*Topica.*



rum vis in auras dissoluta substantia, vel simul cum materia innatus calor exhauritur, proinde paranda erunt medicamenta ea forma; qua apta sunt diutius perdurare, & addenda frigida, ut prohibeant innati calidi dissipationem. Ut quoque excitetur calor nativus partis, qui ob otium, & irradiationis privationem languet, imperandæ erunt frictiones asperiores ex calido linteo, crebroque fieri poterunt si concussum fuerit cerebrum, aut dissipati fuerint animales spiritus, curatio petenda est è doctrina vulnerrum capitis. Ibidem quærenda est medela compressionis cerebri.

## CAPUT LXXVII.

*De Convulsione.*

**M**iserandum symptoma in vulneribus involuntaria illa partium ad propriam originem contractio, quæ appellatur convulsio, à qua paucos evadere observatum est, proinde omnistudio in ejus ablationem insistendum, non quidem, quia sit symptoma, sed quoniam rationem causæ induit, tum vires prosternendo doloris ratione, tum voluntarium omnem motum auferendo, ut & deglutitio, & respiratio tollantur, & aliæ voluntariæ motiones, sine quibus vita consistere non potest. Quòd vero sit morbifica causa, dum tollit hæc motiones manifestum est, siquidem ad ablatam respirationem sequitur excessus caloris, & suffocatio à fuliginibus retentis, & ita morbus tum in intemperie, tum in cavitatibus. Dum vero deglutitio impeditur, sequitur partium omnium inanitio, & tabes. Sicuti, dum retinentur fæces, & urina, morbi fiunt in cavitatibus, & etiam in intemperie, magnitudine, & continui solutione. Nihil ergo mirum, si promptè interficiat, potissimum autem in vulneribus, utpotè causam contumacem sequens. Natura igitur convulsione diligenter consideranda, & causarum ejus, ut adinveniamus, quibus, & quomodo in vulneribus, si fortè invaserit, convulsis possimus consulere.

Appellavimus autem symptoma convulsionem, quia nemini dubium est esse symptoma voluntarii motus, cum iste oblædatur,



tur, non quia auferatur, vel imminuatur, sed quia depravetur; retrahuntur enim partes convulsæ ad proprium principium, veluti in motionibus secundum naturam fieri consuevit præter voluntatis imperium, sed vi morbi, in quo tantum differt convulsio à motu secundum naturam, unde Gal. 3. loc. af. 6. & 3. de morb. vulg. c. 1. tex. 4. & lib. de trem. palp. & c. c. 2. & ult. Convulsio in convulsis partibus facta hac sola ratione à motu secundum naturam differt, quod præter voluntatem nostram fiat, & 2. de symp. cav. 1. convulsio pro generatione motum habet illegitimum, & morbi est opus, & 6. Aph. 3. Convulsio est passio involuntaria ad similem venientibus partibus nervosis in ea dispositionem, quam etiam in motibus factis secundum appetitum assumebant, & 2. de symp. cav. 1. Convulsio nervos, musculosque ad eundem cogit affectum, in quem ab animali facultate, cum naturalem habitum servarent, ducebantur, & 6. Aphor. 39. Convulsio fit convulsis ad propria capita musculis, & est passio involuntaria, unde & 2. de symp. cav. 2. Convulsionem inquit esse læsionem voluntariæ functionis, quoniam potentia motrix in convulsione veluti ligatur, ut nequeat propriam edere functionem, & ita læditur actio motiva, sed vitium totum referendum est in instrumentum motionis, facultas enim motiva non deest in parte, sed non operatur, quia ligatur vitio ipsius instrumenti, & ob id convulsio est morbi symptoma, non facultatis, solus enim morbus ad generationem ejus concurrit, nequaquam natura, unde Gal. 2. de symp. cav. 1. Ex symptomatis motus alia morbidus sequuntur affectus, ut palpitatio, & convulsio, nihil ad ipsorum generationem conferente natura. Et ideo etiam eod. lib. c. 1. dicebat: Convulsionem esse morbi opus.

*Convulsio quid.*

*Convulsio est morbi symptoma, non virtutis.*

Est igitur convulsio contractio musculorum ad propriam originem præter voluntatis imperium in morbo contingens, si non velint muscoli, contrahuntur, ut dictum est, in quo à naturali motione differt convulsio. Differt autem convulsio à motu convulsivo, & ejus differentia noscenda, ne, quæ uni ipsorum attribuuntur, alteri attributa quis existimet. Convulsio igitur est retractio jam facta, contracti enim servantur muscoli, & ideo non est interrupta concussionibus, & accessionibus, at motus

*Convulsio quid.*

*Differentia inter convulsionem, & motum convulsivum*



*Motus convulsivus est symptoma naturæ irritatæ.* convulsivus est cum concussionibus, & accessionibus, quare non manent membra contracta, sed contrahuntur tantum. Diverſa ergo ſunt ſymptomata, nam convuſio eſt ſymptoma morbi, motus verò convulſivus naturæ irritatæ; hoc pacto enim concutitur pars, ut rem moleſtantiſſimam fugiat, ſeu expellat, unde eſt motus depravatus expultricis ab irritamento proveniens. Huiusmodi motus in epilepſia licet carere.

Noto tamen in motibus convulſivis, quod non ſemper ea pars, quæ motus illos paritur, irritatur principaliter, nam in epilepſia cerebrum eſt id quod vellicatur, & irritatur, & ideo concutitur, ut expellat rem noxiā, ad cuius quaſſationem nervi omnes ab eo prodeuntes neceſſario concutiuntur, & contrahuntur verſus proprium principium. Differunt igitur convuſio, & motus convulſivus penes cauſam, convuſionis enim cauſa eſt morbus, motus convulſivi natura irritata, hinc eſt, quod convuſione pars moveri nequit, quia facultas eſt ligata vitio inſtrumenti, ex motibus verò convulſivis nequit quieſcere, quia nequit facultas membrum in quiete continere, quia neceſſe ipſi eſt, ut ſemper operetur, quamdiu irritatur. Appellat hos motus convulſivos Avic. ſpaſmum non proportionatum ad materiā, hoc eſt ad ſubjectum, in quo fit, etenim veræ convuſionis ſubjectum eſt muſculus, inſtrumentum motus voluntarii, at motus convulſivi ad facultatem expultricem perinent, cum ab irritamento fiant.

*Quæ ſit pars primaria affecta.* Sed ad convuſionem revertamur, atque partem primario affectam inquiremus, cum enim contrahantur muſculi ad proprium principium, & in muſculo adſit portio, & fibroſa, ac membranofa, & nervi, & in capite, & finibus muſculi tendines ut plurimum, non ab re dubitabit quiſpiam, an inter has partes una quæpiam, quæ principaliter afficiatur, an æqualiter omnes, denique cuius præcipuæ partis ſit affectio. Videtur Galenus omnes partes ſtatuiſſe eſſe affectas, dicebat enim 3. de morb. vulg. com. primo text. 4. & lib. de trem. palp. &c. cap. 2. convuſionem eſſe affectum quodammodo germanum muſculorum, & nervorum; & alibi etiam dicebat, convuſio eſt affectus qui nervis, & muſculis accidit. Capiſaccius exiſtimavit nervos eſſe primario



mario affectos, unde definiens convulsionem dicebat esse motum pravum retractionis mobilis dependentem à musculis contractis præter naturam à nervis. Sed quoniam convulsio est motus depravatus, necessario dicere oportet, partem primario affectam esse eam, quæ est principium, & præcipuum motus instrumentum, quæ quidem cum sit tendo, idcirco convulsio primo in tendinem referenda est, secundario verò ipsi musculo, ut communi instrumento, & potissimum secundum fibras, ipsæ enim propriè convelli dici possunt, quapropter cum nervus non sit instrumentum motus voluntarii, nisi quatenus defert facultatem motivam ad partem, propriè convelli non dicitur, sed solùm per quandam similitudinem. Et quamvis nervi possint distendi in latum, ita ut sint in causa, ut musculus contrahatur, non tamen convulsio erit proprius nervorum affectus, sed ipsorum musculorum, nam affectio retractionis membri ad proprium principium est solius muscoli, affectus verò ipsorum nervorum distensio dicitur. Unde cum membra contrahantur ratione nervorum, affectio dicenda est potius nervorum distensio, quam convulsio, & Hip. ut plurimum non convulsionem, sed distensionem appellat. Et fit quandoque mixta affectio ex convulsione, & distensione, ubi tendines, & fibræ musculorum, ac pariter nervi tenduntur. Si verò ratione ligamenti acciderit membri contractio, dicendus haud esset talis affectus convulsio, quia ligamentorum non est convelli, sed membri contractio. Ex quibus manifestum est, quid inter convulsionem, distensionem, & membrorum contractionem intersit.

Statutum est convulsionem esse symptoma actionis motivæ, videlicet depravati motus, & à morbo tantum ortum ducens, nihil natura concurrente. At quoniam symptomata nunquam verè auferuntur, nisi ad morborum ablationem, quos, veluti umbra corpus, consequuntur, videre oportet, qui sint morbi, qui convulsionem efficiant. Cur ergo præter voluntatem contrahantur muscoli ad proprium principium, si invenerimus, causas convulsionis effectrices invenisse pro comperto habendum est. Si ergo muscoli ad propriam originem debent retrahi præter voluntatem, necesse est, ut breviores fiant, quam antea, fier enim ex

hac

*Convulsio est propria passio musculorum non nervorum.*

*Quem morbum sequatur convulsio.*



*Causa.*

hac brevitate necessario contractio musculorum una cum parte ad proprium principium. Duobus autem de causis fieri potest, ut breviores reddantur, una est, si præter modum repleantur, ita ut nervi, & fibræ in latum distendantur, unde cum in latum crescant, necesse est, ut secundum longitudinem breviores fiant, atque ita sequitur contractio: altera est, si præter modum inaniantur, & siccentur, sic enim fibras concidentes breviores fieri quodammodo corrugatas, ac nervos necesse est, non aliter ac chordis evenire solet propter nimiam humiditatem, & siccitatem, utraque enim de causa, contrahuntur, & disrumpuntur, & ideo, qui fidibus canunt, ubi fidibus parcere, ac deponere instrumentum volunt, eas remittunt, non ignorantes propter nimiam humiditatem, ac siccitatem eas disrumpi. Itaque morbus, quem convulsio sequitur, nullus alius erit, quam perversa figura musculorum, ut qui breviores fiunt, vel concisis fibris ob siccitatem, seu inanitionem, vel in latum aucti ob repletionem, seu intemperiem humida cum materia, quo tamen in casu materia est, quæ primario figuram pervertit replendo, intemperies verò quid accidentale. Quod enim intemperies non sit vera convulsiois causa, ut quidam asserunt, ex eo facile deprehenditur, quod talis intemperies non facit convulsionem nisi replendo, atque distendendo, sed id quod distendit, est materia, accidit autem ipsi adnexam esse intemperiem: intemperies enim repleti non potest, sed materia, quæ replet, quare etiam materia erit convulsiois causa: unde quacumque qualitate prædita fuerit materia, dum modo repleat, convulsionem pariet. Has duas convulsiois causas proposuit Hip. 6. Aphor. 38. dicens: Convulsio fit vel ex repletionem, vel inanitionem. Et Galenus easdem recipit 2. de cav. symptom. 2. & in primum proreth. cap. text. 69. & 3. loc. aff. 6. & lib. de trem. palp. &c. & easdem posteriores ferè omnes receperunt.

*Dubitatio  
de convul-  
sione ex ina-  
nitione.*

Sunt tamen clarissimi viri, qui dubitant, & existimant re vera, & propriè non posse fieri convulsionem ex siccitate, eò quod ad tantam siccitatem non possint devenire partes, stante vita, ut ex ea convellantur, nam, dicunt, quæ major siccitas dari potest, quam ea, quæ in tertia specie hæcticæ reperitur, & in



in marasmo, & tamen nulla sequitur convulsio; Et quamvis huic objectioni respondeatur, valdè differre siccitatem illam, quæ confestim fit, & inæqualiter ab ea, quæ æqualiter, & paulatim fit; per hanc enim non contrahuntur partes sicuti per illam, quod ostendunt animalium pelles, quæ dum paulatim extensæ, atque distentæ exsiccantur, non contrahuntur, sin confestim non distentæ, corrugantur, & contrahuntur, non acquiescunt; instat enim Argenterius dicens, aliter rem se habere in inanimatis, quæ soli, vel igni exponuntur, & aliter in animalibus, ibi enim nulla fit deperditi reparatio, at in animalibus ex alimento semper fit aliqua humidi reparatio, unde videtur impossibile, ad eam siccitatem pervenire partes hominis stante vita, ad quam pelles brutorum soli, aut igni expositæ. Prætereà nulla, dicit Sclanus, videtur esse ratio, quod convulsio magis sequatur siccitatem inæqualiter, & confestim factam, quam æqualiter, & paulatim: cum enim hoc fiat, quia breviores reddantur nervi, ac muscoli, adeò brevabit nervos siccitas hæc paulatim facta, atque illa, quæ confestim, quia hoc procedit à siccitate, ut siccitas est; quò major igitur est siccitas, major etiam deberet esse breviatio, sicuti si nodus funem breviat, quò plures fient nodi eò brevior reddetur funis. Amplius si eò quòd distentæ exsiccentur pelles, non contrahuntur, atque idem in animalibus contingit, sequeretur, quod, si partes hominis distentæ servarentur, dum convulsionem ex inanitione timeamus, vel ea jam caput, non possent breviores reddi, atque ita contrahi, & convelli, quia sic fieret æqualis exsiccatio à causa siccante, quod est absurdum: ex quibus adducuntur viri doctissimi, ut existiment, à siccitate propriè non fieri convulsionem, sed quæ ab Hip. & Gal. appellatur convulsio ex siccitate, fieri ab evacuantibus, & inanientibus, non quia exsiccent, sed quia humores acres excitent, vel eliquent, qui postea musculosas, & nervosas partes mordicant, & ita convulsionem faciunt, & interpretantur dictum Hip. & Gal. ex siccitate, hoc est ex causa siccante. Ad argumentum verò, quod desumitur à curatione, quæ fit per humectantia, quo astrui videbatur, convulsionem esse verè ex siccitate, respondent, quod humectantia non curant convulsionem propriè humectando, sed mordicantium humorum acrimoniam obtundendo.



Rationes, istæ, etsi aliquibus maximè urgere videantur, quia tamen contra sensum pugnant, nam aperte conspicitur ex nimia inanitione confertim facta, quamvis nunquam adeò citò fiat, ut repletio, convulsionem excitari absque ullo rei mordentis signo, & quoniam ex tali causa potius fiunt motus convulsivi, quam vera convulsio, utpote materia mordaci expultricem irritante, propterea non omnino subscribendum videtur prædictæ sententiæ; & eo magis, cum haud difficili negotio dissolvi posse

*Cur in marasmo non fiat convulsio.*

videantur quæ in contrarium sunt adducta, si causa videlicet inveniatur, cur in marasmo non sequatur convulsio, non enim existimatur id esse tantum, quia exsiccatio fiat paulatim, & æqualiter, nam & hæc ut siccitas contrahit, & si soli muscoli, & nervi in marasmo exsiccarentur, necessario sequeretur convulsio, quia necessario fierent breviores: cum exemplo sint ipsæ brutorum pelles, quæ quantumvis distentæ paulatim, & æqualiter exsiccentur, semper tamen siccatae breviores longè deprehenderentur, quam ante exsiccationem, & si ligna, quibus exsiccandæ brutorum pelles extenduntur, cederent, profecto contractio sequeretur, nam manifestè videmus siccatas pelles non mediocrem vim ob tensionem lignis iis inferre: quare si per marasimum breviores reddantur soli muscoli, & nervi, necessarium quoque esse, ut ii ad propriam originem contrahantur, nemo arbitror dubitabit. Verum quoniam in hectica, dicunt, non tantum muscoli, & nervi exsiccantur, sed omnes corporis partes, hinc fit, ut quamvis breviores reddantur muscoli, non tamen revellantur; partes enim & aliæ non minus exsiccatae in eadem proportionem se habent ad nervos, & musculos, qua prius; at quando ex siccitate repentina, puta ob evacuationem, sequitur convulsio, non omnes siccantur partes, sed breviores fiunt muscoli, & nervi, reliquæ vero partes suam longitudinem servant, & ita necesse est membrum contrahi ob musculorum brevitatem.

Objiciebatur, non posse stante vita, partes ad eam siccitatem pervenire, ad quam pelles, vel chordæ, ut ob eam breviores reddantur: verum objectio hæc nullius momenti censetur, illud enim solummodo tamquam exemplum affertur, quo intelligatur, ut siccitas breviores faciat nervos, ac musculos, majorem habet diffi-



difficultatem intelligere, quomodo ex superflua evacuatione, puta sanguinis, siccentur istae partes: cur enim immoderatum sanguinis profluvium magis siccat nervos, & musculos, quam venarum, & arteriarum tunicas, ligamenta, cutem, tunicas e. g. intestinorum, quod si & has quoque exsiccat, cur non & ipsae breviores reddantur: aut quomodo sanguinis evacuatio possit nervos exsiccare, cum in nervis non contineatur sanguis, & quomodo potius in hac, quam in illa parte?

Sed neque illud difficultate caret, quod contractio non videtur esse siccitati proportionata, minus enim contrahuntur lora, & pelles penitus exsiccatæ, & omni humiditate exutæ, quam corporis partes, quæ ad tantam siccitatem stante vita pervenire nequeunt, magis ergo recondita videtur esse convulsio hujusce naturæ. Et nisi viderem clarissimos viros communiter recipientes, concisis fibris ex inanitione convulsionem fieri, dicerem convulsionem hanc non esse solius morbi symptoma sed & naturæ, quæ nocumentum perferens ex substantiæ humiditatis in partibus nervosis existentis evacuatione, partem contrahat, unde fiat, ut soli muscoli contrahantur, quoniam solius ipsorum actio est contractio. Sed hæc missa faciamus, quoniam suscepti operis limites nimis excedunt; & parum ad curationem facit sive hac, sive illa ratione contingat. Cum ergo convulsio sit symptoma consequens nervorum, & musculorum breviationem ex repletionibus sit is, ne, vel inanitione, manifestum est, morbum, ad quem sequitur ad quem sequitur convulsio, esse in mala compositione, videlicet in imminuta magnitudine. *Quis morbus sit is, ad quem sequitur convulsio.*

Cum autem magnitudo triplicem dicat dimensionem, scilicet longitudinem, latitudinem, & profunditatem, constat morbum, ad quem convulsio sequitur, esse vitiatam, hoc est, imminutam magnitudinem secundum longitudinem: cujus porro causa est materia repellens, aut siccitas, imminuta tamen longitudo videtur consequi immediatius alium morbum in compositione, ubi enim breviatio fit ob repletionem, causa hujus breviationis videtur esse aucta magnitudo secundum latitudinem, quantum enim muscoli secundum latitudinem augentur ob materiam replentem, tantum breviores redduntur, ut etiam in re-



bus exterioribus, observamus, quæ dum secundum latum extenduntur, & crescunt, secundum longitudinem breviores fiunt. Ubi verò breviatio fit ob siccitatem, videtur adesse alius morbus in mala compositione, scilicet imminuta latitudo, quia concidunt fibræ. Verùm quoniam nullum horum fieri potest citra figuræ decentis læsionem, idcirco Galenus, quandoque reponit convulsionem inter morbos figuræ. Aliquando etiam inter morbos in intemperie, respiciens ad breviationis causas, quamvis non in omni convulsione ex repletione intemperies propriè vim causæ sortiatur, sed potius sit quid annexum. Possimus etiam morbum in situ adducere, cum musculi, & nervi breviores facti proprio loco non circumscribantur.

*Causæ remotiores.*

*Nisi fibræ repleantur non fit convulsio.*

Cum igitur duæ sint præcipuæ convulsionis causæ, scilicet repletio, & inanitio, quæcunque vim habebunt replendi, & inaniendi, ea omnia statuenda sunt convulsionis causæ. Itaque materia omnis humoralis, cum replere possit fibras, convulsionis causa esse potest. Dico autem fibras, quia nisi ipsæ fibræ repleantur, non sequitur convulsio, hinc in athleticis repletionibus, non sequitur convulsio, quia plenitudo adest quoad vasa. Quamvis autem omnes humores replere possint, duo tamen sunt possumus, quæ convulsionem facere consueverunt, videlicet pituita crassa, & viscida, unde Galenus 2. Aph. 36. Nervi replentur à frigidis, & glutinosis humoribus, ex quibus etiam nutriuntur, atque sanguis, dum in nervis inflammationem efficit. Unde Gal. 4. loc. af. 3. Ad tensiones nervorum, ubi inflammatio accesserit, convulsio comitatur. Purulentam materiam non excludimus, quæ in vulneribus non rarò convulsiones parit.

*Dubitatio.*

Sed de materia pituitosa est dubium, quomodo contractionem partium efficiat, cum experientia attestetur, à materia pituitosa relaxari partes: ideò & uteri prolapsus fieri solet ob relaxationem ligamentorum, quibus uterus dorso, & aliis partibus alligatur, à pituitosa materia in illis imbibita. Pari ratione luxari artus videmus ob materiam pituitosam ligamenta madefacientem, atque relaxantem: quomodo ergo convulsionem pariet, si potius relaxat? Verùm hujus discriminis ratio sita esse videtur in hoc, quod dum humor pituitosus alluit tantum, atque humectat partem,

*Solutio.*

tem,



rem, non in ejus fibras imbibitur, relaxationis est in causa, ubi vero in fibras imbibitur, convulsionem parit distendendo. Relaxat ergo inter fibram, & fibram existens, contrahit verò in fibras ipsas absorptus.

Sed altera oritur difficultas, quomodo videlicet ex materia crassa oriatur convulsio, cum ex eadem fiat resolutio; sed nullum est in conveniens eandem materiam utriusque affectus esse in causa ratione modi lædendi ipsius, etenim duplici substantia constat nervus, interiori videlicet, & medullari, & exteriori veluti membranea, ubi ergo substantia medullaris ab humore afficitur, quoniam per eam fit transitus qualitatis animalis ad partes, qui ab humore obstruente prohibetur, fit resolutio. At ubi fibræ externæ substantiæ replentur, nervi tunc tenduntur, & breviores fiunt, itaque membrum contrahitur manente qualitate animali in parte, quoniam substantia medullaris est illæsa. Quamvis autem materia omnis humoralis apta sit ex sui natura replere, quoniam tamen materia biliosa, acris, & mordax antequam repleat, à natura expellitur, hinc à tali materia non fit convulsio, sed motus tantum convulsivus, quæ tamen, si ad hoc perveniret, ut nervos repleret, non minus convulsionem veram faceret. Flatus quoque replere adeò possunt musculorum, & nervorum fibras, ut inde convulsio quædam sequatur, quemadmodum experimur in ea affectione, quæ vulgo appellatur, gransi, nihil enim aliud est, quam convulsio ex materia flatulenta, ideoque & facilè dissolvitur.

*Dubitatio*

*altera.*

*Solutio.*

Quæ igitur ad generationem, retentionem, & collectionem materiæ replentis faciunt, ea omnia remotiores erunt convulsionis causæ, ut præcedens victus ratio, viscerum intemperies, inflammatio, solutio continui, suppressa consueta aliqua evacuatio, & hujusmodi.

*Causæ remotæ convulsionis ex repletione.*

Quod vero ad inanitionem attinet, quæcumque hanc efficiendi vim habent, ea omnia erunt convulsionis à siccitate causæ, unde immodicæ evacuationes, puta sanguinis profusiones, immodica alvi profluvia, & vomitus convulsionem interdum faciunt, hinc convulsio ex helleboro: præterea, quæ valide exsiccant, & ideo ardentes febres quandoque convulsionem inve-

*Causæ remotæ convulsionis ex inanitione.*



hunt, & medicamenta valde exsiccantia, qua ratione etiam helleborus est convulsionis causa, & labores, & vigiliæ, & sollicitudines, & alia hujusmodi. Unde Gal. 3. loc. af. 6. cum convulsio fit à labore, vigiliis, vel fame, vel sollicitudine, vel arida, æstuantequæ febre, ut in phreniticis, causa est vacuitas, & ariditas: Si vero temulento cuipiam homini, & omnino pleno, qui videlicet in otio degit, eveniat, plenitudinem in causa esse est existimandum.

*Dubitatur  
num detur  
alia convul-  
sionis causa  
præter re-  
pletionem,  
& inanitionem.*

Sed præter repletionem, & siccitatem, seu inanitionem videtur Gal. tertiam addidisse convulsionis causam, videlicet causam contrahentem, dicebat enim: Itaque nervos, tendinesque in animalium corporibus, sive ex humore superfluo tensos, sive ex exsiccantibus causis arefactos ad tantam deduci extensionem, quanta benevalentibus satis erat, ut suos voluntarios motus absolverent, cogitato: insuper evenire posse aliquam corporis partem aut ob inflammationem, aut alia aliqua de causa vehementer affectam nervos sibi continuos secum revellere intelligito. Hæc enim cum cogitaveris, omnes dispositiones, quibus convulsio advenit, invenies. Nervosarum enim partium inflammationes, præcipueque cum in nervorum principio oriuntur, veluti citharædi chordas, ita nervos sibi continuos contrahendo tendunt. Verum cui nervosa corpora ab ingenti humorum copia obturata tenduntur, passio chordis haud absimilis ob continentis humiditatem vehementer tensis fieri solet. At in malignis ex ingenti ardore febribus, & validis phreniticis versa vice passio evenit, ut enim lota ab igne propinquo exsiccata contrahuntur, & tenduntur, eodem modo convulsiones utique fiunt ob excellentem siccitatem morborum, quæ vehementer nervosum membrorum genus exsiccet. Ecce quomodo Galenus tres hæc causas distinguit, repletionem, inanitionem, & causam contrahentem 12. quoque Method. capit. 8. addidit mordacem, & tenuem humorem, & vehemens frigus, dicebat enim: Nam convulsio vel ex repletionem nervosarum partium incidit (qua ratione eos, quos magna phlegmone premit, adoritur) vel ex mordente, & tenui humore, qui nervosa corpora rodat, vel ex ingenti frigore, quod tale quidpiam, quale, gelu efficit. Atque hæ tres convulsiones subinde



inde percurantur. Sed quæ ex nervosarum partium siccitate provenit, insanabilis est. Hippocrates quoque convulsionis ex frigidityte meminit. unde 5. Aphor. 17. Frigidum convulsiones, distensiones, livores &c.

Ad primam difficultatem dicimus, in omni convulsione adesse causam attrahentem, cum muscoli ad proprium principium attrahantur, sed causa hæc attrahens vel est plenitudo, vel siccitas, Gal. autem voluit peculiariter distinguere duos convulsionis modos ex plenitudine, quandoque enim nervi omnes convulsi sunt repleti, quandoque verò aliqua tantum nervi portio repleta est, ac tensa ob inflammationem, & hæc tendit propinquas partes attrahendo, veluti dum artifex citharæ chordas attrahit; & quando spinalis medulla inflammatur, hac ratione totum convellitur, namque principium nervorum inflammatum, tensum, ac brevius redditum, necessariò attrahit ad sese omnes nervos inferiores. Præterea in inflammatione principii nervorum convulsio in eodem principio est per essentiam, in reliquis verò partibus per consequutionem quandam.

Quod ad secundam difficultatem, convulsio, quæ fit à frigore ingenti, reducitur ad convulsionem ex repletionem, vel inanitionem, eò quia frigiditas vel roscida humiditatem nervi congelat, & ita convulsionem ex repletionem adducit, roscida enim humiditas rarefacta majorem locum occupat, & ita fibras distendit, vel excrementorum excretionem prohibet, quo in casu etiam facit convulsionem ex repletionem, ideò Gal. 6. Aph. 13. asserit ex rigore, vel frigidityte singultum fieri, quoniam omnia nervosa corpora efficiunt ad distendendum habilia, & ita sunt in causa, ut hæc repleantur, vel humiditatem exprimit, quo in casu convulsio ex siccitate sequitur. Quæ verò fit ex mordaci, & tenui humore, non est convulsio propriè dicta, sed convulsivus motus, cujus causas tempus est, ut inquiremus.

Motus convulsivus fit, ut supra dictum est, propter causam *Causæ motus convul-* mordacem agentem in nervos, & expultricem irritantem, & pro-*sivi.* pterea diximus motum convulsivum esse symptoma non morbi, sed naturæ irritatæ, videlicet expultricis. Quare causæ motus convulsivi erunt, quæ nervorum expultricem vim habent irritandi,



di, cujufmodi funt humor tenuis, & mordax, quem proponit Gal. 12. Meth. 8. vapores acres, & mordaces, ut contingit in febris vehementioribus, & in deliriis, quæ febris accidunt aura venenata, ex qua Gal. 3, loc. af. 7. interdum oriri, comitalem morbum afferit. Potest autem elevari aura hæc venenata, vel à veneno intra corpus infumpto qua etiam ratione helleborus convulsivos motus efficit, vel à vermibus, vel à veneno intra corpus genito, ut non rarò contingit in mulieribus ex fuppreffione menfium, & feminis: qualitas non venenata, ut ingens frigiditas, unde Gal. 9. Meth. 5. convulfionem fieri dicebat ob frigidi potionem immodicam, & importunam, nam frigiditas per ventriculum communicatur nervolis partibus, arque iis irritatis oritur convulfio, quamvis etiam ob naturalis caloris defectum ex fuffocatione quandoque convulfio contingat, unde Gal. 4. de ra. vic. 27. dicebat, convulfionem fieri ob copiofum sanguinem venas replentem, ut fpiritus non poffit penetrare, unde fanguis veluti in corpore mortui concrefcit, & frigidus evadit, & hæc frigiditas nervis quoque communicatur, quæ cum ipforum nativo calido fit inimica juxta illud Hip. 5. Aph. 18. Frigidum inimicum offibus, dentibus, nervis, cerebro, fpinali medullæ, &c. irritat ipforum expultricem, & ita fit convulfivus motus, neque neceffarium eft, ut in omnibus partibus, quæ hosce convulsivos motus patiuntur, caufa irritans reperiatur, fed fufficit, ut unam quampiam partem afficiat, cui aliæ consentiant, & ideo ob acres, & calidos vapores principium nervorum, & cerebrum petentes oriuntur convulfivi motus, quia cerebrum, aut nervorum principium concutitur, ut rem moleftantem expellat, ac fugiat. Idem in epilepfia contingit. Convulfivus motus ex erosione oris ventriculi, de quo Galen. 3. loc. af. 7. reducitur ad eum, qui fit ex mordaci humore, quamvis enim humor immediatè non afficiat nervos, consentiunt tamen ipfi ventriculo, tanquam parti nervosæ, & moleftiam perferunt, unde irritantur, & ita fit convulfivus motus. Qualitas venefica non minus vim habet irritandi ipfum cerebrum, & nervorum principium, & ideo mirum non eft, fi epilepfiam, & convulsivos motus pariat.

*Differentiæ  
convulfionis.*

Sed ad veram convulfionem redeamus, quæ vel eft univerfalif, vel particularis: fi univerfalif, vel in anteriorem partem flectitur



flectitur corpus, & dicitur emprostotonos, vel in posteriorem, & dicitur opisthotonos, vel in neutram, sed totum corpus rigidum, & tensum manet, eo quod oppositi muscoli sint convulsi, & dicitur tetanos. Quas quidem convulsiones differentias proposuit Galen. libro de tremore, palp. convul. & rigore, cap. ultim. & libro de symp. diff. cap. 3. & 4. Aph. 57. & aliis in locis. Et de iisdem etiam sæpius meminit Hippocrates.

Particularis convulsio denominatur ab affecta parte, quandoque enim convellitur brachium, quandoque oculus, quandoque cervix, & sic de reliquis. Quorundam tamen partium convulsio proprium habet nomen, nam si muscoli oculum moventes convellantur, dicitur strabismus, si qui labia movent, dicitur spasmus cynicus, seu risus Sardonius, si mandibulares, dicitur trismus, hoc est, invita concussio, & stridor dentium. Quamvis ubi dentes concutiuntur, non sit vera convulsio, sed convulsivus motus. Reliquæ convulsiones differentia ex jam dictis patent.

Superest, ut videamus, quæ convulsio, & quomodo in vulneribus generetur. Et cum dictum sit, aliam esse convulsionem propriè dictam, & veram, aliam non veram, quam Arabes non proportionatam ad materiam vocant, nos convulsivum motum; utranque vulneratis contingere experientia testatur. Atque cum convulsio vera alia sit ex repletionem, alia ex inanitione, utraque etiam fit in vulneribus: Ex repletionem quidem, vel quia nervi repleantur materia purulenta, vel alia excrementitia, quæ aut in ipsa vulnerata parte genita est, aut aliunde ad eam transmissa, atque in nervis absorpta, ut contingit, quando ex dimidia parte sectus est nervus, vel ob inflammationem, ex affluente enim copioso sanguine replentur, atque distenduntur partes nervosæ, præcipuè autem si principio nervorum communicetur affectio, aut ipsum primario afficiatur, & muscoli breviores reduntur, itaque ad proprium principium contrahuntur. Sed & inflammationis ardor una quoque substantificam nervorum humiditatem non raro absumit, quo fit, ut duplici nomine convulsio succedat. Ob frigiditatem etiam ambientis, quando vulneratæ sunt partes nervosæ, facile accidit convulsio, ob id potissimum,



quod excrementorum excretionem prohibet, vel nervi humiditatem roscidam veluti congelat. Ex inanitione pariter fieri solet convulsio, & propter inflammationem, ut dictum est, & propter superfluum sanguinis fluxum, & propter frigiditatem ambientis roscidam nervi humiditatem exprimentis. Plerumque tamen convulsio vulneribus supervenit ob inflammationem, ubi nervosae etiam partes corripuerit tunc, nisi in cerebro, aut ejus involucris, aut nervorum principio fuerit inflammatio, primo convellitur pars inflammata, deinde quæ ipsi è directo respondent, & tandem affectio communicatur principio, & inde ad totum corpus extenditur, attrahente principio nervos à se ortos. Unde Gal. 5. Aph. 2. Ex vulneribus fiunt convulsiones ratione sequentis ipsa inflammationis, ubi partes nervosas attigerit: nam primò videntur convelli quæ è directo sunt partium inflammatione laborantium, deinde sic, postquam & principium ipsum attigerit, passio ad totum extenditur corpus. Accidit etiam convulsio in vulneribus propter exolutionem vulneratæ partis ex dissectione musculi congeneris, quæ oppositæ partis facit convulsionem atqui non est vera convulsio, sed accidentalis.

*Convulsio in vulneribus plerumque fit ob inflammationem.*

*Quomodo fiant motus convulsivi in vulneribus.*

Motus similiter convulsivi accidunt, quia pravi halitus à parte vulnerata ad cerebrum eleventur, atque nervorum principium, ex quibus cerebrum vellicatur, & irritatur, atque sic concutitur, ut molestiam fugiat, ac rem molestantem expellat, & ex consequenti succedunt motus convulsivi in subjectis partibus, sed tunc isti motus fere sunt universales, sicuti & quando qualitas tantum spiritalis defertur ad cerebrum per nervum affectum, punctum videlicet, aut dissectum, & ex læsione continentem putredinem. Cito enim ob communionem patitur nervorum principium. Ex frigiditate quoque contingunt convulsivi motus, & universales etiam, cum enim frigidum inimicum sit nervis, quamvis frigiditas ambientis agat tantum in nervos vulneratæ partis primò, noxa tamen citò communicatur reliquis, & ipsi principio, unde expultrix irritatur, atque ita motus hosce, ut rem molestantem & fugiat, & expellat, concitare consuevit. In parte quoque vulnerata tantum, aut una etiam sibi proximis contingunt interdum convulsivi motus, quando videlicet causa in parte affecta solum-



solummodo continetur, & sibi proximis, sive ea sit humor acris, vel sui natura, vel ob putredinem, vel pravus, & mordax halitus, vel alia qualitas spiritalis. Semper enim ubi convulsio, vel convulsivus motus est universalis, nervorum principium est affectum, vel primarium, hoc est, cerebrum, vel spinalis medulla, ubi verò est particularis, causa tantum continetur in parte illa, unde Gal. 1. de simp. fac. cap. ult. Convulsio, quæ per totum corpus fit citra delirium, aut soporem, à spinalis medullæ, quæ in cervice continetur, morbo dependet. Si vero vel manus, vel crus, vel musculus vi quapiam distenditur, aut convellitur, ad illum semper nervum, qui partem movet, referenda est noxa.

Convulsivi motus ad sensum patent, nam pars modò contrahitur, modò redit ad naturalem statum, musculi quidem, si in ipsis sit affectio, & levior sed quandoque etiam tota pars, quando affectio gravior est, & fortis fit attractio. *Signa convulsivi motus.*

Non minus nota est ad sensum convulsio vera, contractæ siquidem manent partes, neque extendi possunt, dolent etiam non leviter: Convulsio enim, ut dicebat Gal. in 1. Proreth. c. 2. text. 20. est affectio doloris plena: magis tamen plena est doloris, ubi fit ex repletionem. Subitò quoque fit affectio, si præsertim fiat ex repletionem. *Signa veræ convulsionis & ejus causarum.*

Quando autem affectio communicatur principio, ex eo cognoscitur, quòd angustatur guttur, dentes constringuntur, neque aperiri os potest, labia contrahuntur, collum tenditur, ac dolet, & dorsum: oculi, totaque facies pervertitur. Demum difficile spirat, & omnino intercepta respiratione perit. *Quomodo cognoscatur affectionem communicatam esse principio.*

Ex qua verò causa fiat, & quæ præcesserunt, & vulneris status indicabunt: utpote si ambientis injuriis expositum fuerit vulnus, si profluvium sanguinis præcesserit, si vulnus sit dolorosum, crudum, siccum, & squallens, vel putridum, obcæcatum, nigricans, fœtens, si inflammatio supervenerit, aut cum vulnus sit ex pravis, nullus tamen tumor supervenerit, aut qui supervenit repente citra manifestam causam evanuerit. Item si telo venenato fuerit inflictum, vel dentibus venenatæ feræ, &c. *Signa causarum.*

Qua autem in parte fuerit affectio, partes affectæ ostendent, namque si totum convellatur præter faciem, signum est, primo affectæ, *Signa partis primo affectæ,*



cipium nervorum, scilicet spinalem medullam secundum primas sui partes affectam esse: si verò etiam facies, signum est affectionem quoque esse in cerebro: si verò peculiaris quædam pars convellatur, affectio attinet ad eum nervum, qui eam partem movet. Veluti colligitur ex Gal. 1. de cav. simp. c. ult. & 3. loc. af. 6.

*Signa differentiarum*

*Tetani signa.*

Species, seu differentie convulsionis universalis, & ipsæ sensu cognoscuntur, namque in tetano convelluntur tam partes anteriores, quam posteriores, & ideò ad neutram partem inclinat corpus, hinc Hippocrates libro de intern. af. text. 59. Si ob vulnus tetanos, sive distensio fiat, æger hæc patitur, maxillæ conglutinantur, & rigent, & os aperire non potest, & oculi lacrimantur, ac contrahuntur, & dorsum conglutinatum riget, & crura flectere nequit, neque manus, neque spinam. Aliquando tamen affectio est levior, & dat inducias, atque intermittit, unde Hippocrates loco citato text. 61. dicebat: Totum corpus convellitur, & primum quidem obambulat, postea temporis progressu in lectum cadit, & rursus remittit convulsio, & dolor, & si surrexerit, & fortassis ad paucos dies obambularit, postea rursus in iisdem affectionibus jacet, atque hæc patitur, & transmutat per multum tempus.

*Opisthotoni signa.*

In opisthotono verò convelluntur tantum posteriores partes, & ob id ad posteriora flectitur corpus, neque potest ad anteriora curvari, unde Hippocrates emprosthotonon vocavit. Cum autem distensio in posteriores partes opisthotenos appellata, tenuerit, reliqua quidem utrimque eadem sunt, verum in posteriores partes convelluntur, & vociferantur aliquando, & dolores emergunt vehementes, & crura interdum contrahere non permittit, neque manus extendere: sunt enim cubiti incurvati, & digiti in pugnum contracti, & pollicem plerumque aliis digitis continet, & clamat, & nugas garrit quandoque, & non potest se ipsum continere, sed aliquando exilit, ubi dolor premit, cum verò dolor remittit, quietem habet. Aliquando etiam vox intercipitur simul ut morbo corripiuntur, aut infani, & atra bile perciti fiunt. Et lib. de intern. af. text. 60. In distensione retrorsum contingente (opisthotonum vocant) alia quidem eadem

æger



æger patitur. Fit autem, cum tendines, qui sunt retro in cer-  
vice, ægrotarint, & paulo post: Hic trahitur in partem postero-  
rem, & præ dolore circa dorsum, & pectus, ejulat. Hic con-  
vellitur vehementer, ut vix detinere possint ipsum præsentis, ne  
è lecto excidat: Hic sæpe die dolore affligitur, sæpè etiam le-  
vius degit.

In emprostotono verò corpus ad anteriora flectitur, unde  
partes contrario modo sunt dispositæ, ac in opistotono: Hoc  
tamen intelligendum de partibus, quæ utroque modo flecti pos-  
sunt, non enim crus ad anteriorem partem flectet convulsio, ne-  
que femur ad posteriorem.

Futuram convulsionem in vulnere significant ea, quæ con- *Signa fu-*  
vulsionis causas adesse, vel imminere significant, ut immodica *turæ convul-*  
sanguinis profusio, malus status vulneris in parte nervosa existen- *sionis.*  
tis, aut in ea, quæ facile affectionem suam nervoso generi com-  
municat, ut si vulnus siccum fuerit, & crudum, ac dolorosum;  
si ingens sit vulnus, & tumor non appareat, vel ubi apparuerit  
mox, & repente citra manifestam causam delitescat, juxta illud  
Hippocratis §. Aph. 64. Quibus tumores in vulneribus apparent,  
hi non maxime convelluntur, neque insaniunt, verum his de  
repente evanescentibus, quibusdam à tergo convulsiones, & di-  
stensiones fiunt, &c. Sed neque contemnenda sunt alia signa,  
quæ materiæ lapsum ad cerebrum, & nervorum principium si-  
gnificare possunt, ut est alba urina. Convulsivi autem motus *Prælu-  
dia*  
veram convulsionem præcedere solent, ideoque eam præfagire *convulsiva.*  
dicuntur: Dolor cervicis, ac dorsum jam principium convulsionis  
adesse significat, nisi adsit alia aliqua manifesta causa. Caco-  
chymia, quando vulnus est in parte nervosa, corpus exponit peri-  
culo non levis convulsionis.

Quid verò futurum sit de vulnerato, quando jam supervenit *Præfagia*  
convulsio, brevibus tradit Hippocrates §. Aph. 2. dicens: Con-  
vulsio ex vulnere lethalis: Et libro de Coacis prænot. Convulsio  
comati superveniens funesta; nec immerito, afficitur enim pars  
nobilis, videlicet nervosum genus, & sæpius ipsum cerebrum, si  
non à principio, saltem non multo post, unde adest insignis ve-  
hementia ratione dignitatis. Sed & adnexa est vehementia ra-  
tione



trione facultatis, consequitur enim causam contumacem, & naturæ rebellem, inflammationem videlicet nervosarum partium, vel ipsius etiam cerebri, aut immodicam sanguinis profusionem, aut nervi putrefactionem, vel puris, & malignæ materiæ suppressionem, quo fit, ut non nisi longo temporis spatio corrigi possint hæ causæ, interim autem convelluntur muscoli respirationis, tolliturque respiratio, moriturque suffocatus, qui etiam ob sublatam deglutionem non secus interiret, licet longiori temporis spatio. Videtur enim convulsio mortem inferre ob respirationis defectum, namque etsi primò convellantur partes, quæ è directo sunt partium vulneratarum, tandem tamen affectio communicatur principio, & exinde ad totum corpus extenditur, ubi verò musculos respirationis apprehenderit, tollitur respiratio.

*Convulsio  
ex frigidi-  
tate ambien-  
tis curabilis.*

Scire tamen licet si vulnere supervenerit convulsio ob aliquam externam causam, puta ob frigus ambientis, sæpè, neque difficili negotio evinci. Et ideo Gal. 3. de comp. med. per gen. cap. 2. curavit quendam convulsum ob frigus ambientis unica die; Memini, dicebat, cujusdam ex hujusmodi vulneratis, de vulneribus nervorum loquebatur, qui cum diem quartum citra omnem dolorem ageret, partemque affectam absque phlegmone videret, multo in frigore domo egressus ad opus quoddam necessarium, eique diu immoratus, domum rediit, membro universo ad cervicem usque tenso, idque cum ingenti ipsius dolore. Postquam vero, quodam me accersente, profectus ad eum, vidi, quibus in malis esset, oleum ex itinere refrigeratum à particula auferre jussi, calente verò totum membrum fovi, deinde cervicis partem è directo positam lanis oleo respersis, & imposito medicamento liquido ex euphorbio simul cum castorio, hominem statim mitigavi, & somno accedente usque ad vesperam, omnia cessarunt symptomata. Pariter servari possunt, quibus convulsio accidit ex retenta sanie, cui dari exitus potest, si paretur hic exitus, antequam incorrigibile damnum effecerit. At quando affectio communicata est principio, pauci evadunt: sicuti & quando à superfluo sanguinis fluxu contingit, fit enim ob inanitionem, quam rarò admodum datur corrigere. Qua ratione dicebat Gal. lib. de trem.



trem. palp. convul. & rigore cap. ult. & 12. Meth. c. ult. Convulsiones ex siccitate insanabiles, & 2. Aph. 26.

Convulsio ex inanitione maximum, ac ferè insanabile malum est, quoniam longum tempus exigunt nervi ad siccitatem removendam, sed morbi acuties tempus non expectat, quin citò vires dissolvit, & subito exitium affert. Et ideò etiam 7. Aph. 9. dicebat: Quod ex immoderata evacuatione convulsio est casus admodum lethalis & si addatur desipientiæ, quod omninò desperata est salus, nam prius dixerat Hippocrates: A profluvio sanguinis desipientia, & convulsio, malum. Et 5. Aph. etiam 3. Sanguine multo fluente, convulsio, aut singultus superveniens, malum est. Ex quibus colligere possumus unà cum Gal. 5. Aph. 2. Hippocratem non dixisse, convulsionem ex vulnere lethalem esse, quia ex necessitate, & semper interitum afferat, sed quia admodum crebro; unde & ipse Hippocrates 5. Aph. 6. dicebat: Quicumque à distensione capiuntur, in quatuor diebus pereunt, si hos vero effugerint, salvi fiunt, si videlicet remittatur affectio. Et libro de Coacis prænot. tex. 3. Convulsionem solvi ait, urinis multis de repente redeuntibus, & eidem sudores paulatim oborientes prodesse, sicuti acervati lædunt. Ad eam autem vehementiam pervenisse, convulsionem, quæ à facultate perferri nequeat, significant vocis interceptio diu durans, rejectatio eorum, quæ ingeruntur per nares; clamare, & nugari, ab initio vox intercepta, corpus dissolvi, inflatio ventris, oculorum tortuositas, & strabismus, & stridor dentium, assiduusque palpebrarum motus, narium pinnae convulsæ, & acervatim sudare, hinc Hippocrates lib. de intern. af. tex. 59. Cum autem lethalis fuerit, de Tetano loquebatur, potum, & cibos, quos prius accepit, aliquando per nares reddit. Et lib. de Coacis prænot. num. 3. In convulsionibus vocis interceptio diu durans, mala est, & paulo post: In distensionibus ante, & retro contingentibus, & in tergum solum contingentibus, si maxillæ solvantur, lethale est. Lethale est etiam sudare in distensione in dorsum contingente, & corpus dissolvi; & in eadem affectione remove per nares, aut clamare, aut nugari, si ab initio vox intercepta fuit. In posteram enim diem mortem significat. Et 3. de morb. tex. 14. Qui  
opisto-



opistotono corripuntur, tertia die moriuntur, voce, quæ prius erat intercepta, soluta, & revomunt per nares. Et 4. de ra. vic. in morbis acu. text. 60. Nares quoque inspiciendæ, nam si per utramque spiritus æqualiter trahatur, & si multus ex ipsis feratur, convulsio fieri consuevit: quæ si fiat, propinqua mors est, & Rhasis primo cont. Oculorum tortuositas, & stridor dentium, & assiduus palpebrarum motus, & strabositas in convulsione, pessimum, & alibi: Inflatio ventris in convulsione lethalis.

*Curatio.*

Si convulsio ex inflammatione ortum habuerit, huic occurrendum, prout proprio capite explicatum est. Si vero ex putredine, & corruptione, quod putridum est, auferendum, humiditasque superflua absumenda. Si ex purulenta materia, & sanie retenta, hæc evacuanda tum sensibiliter, tum insensibiliter, seu per halitum insensibilem, atque ne in posterum colligatur, consulendum, paratis congruis subfluxionibus, & quæ eam ex alto attrahant, adhibitis. Si ex dolore, hic aut anodynus sedandus, aut per ea, quæ causam ejus abscindunt, auferendus. Si ex frigidityte, calefaciendum; si à siccitate, humectandum; si à veneno, Bezoartice erit occurrendum. Si igitur ob inflammationem contigerit convulsio, auxilia petenda sunt à proprio capite.

*Sanguinis  
missio in  
convulsione.*

Quod tamen ad missionem sanguinis attinet, quoniam ob dolorem prosternuntur vires, neque tantum sanguinis mittendum est, quantum aliàs mitteretur, neque quod mittitur, unica vice extrahendum est, sed partitis vicibus: quæ quidem doctrina est Hip. lib. de Coacis prænot. text. 3. ubi dicebat: Sudores paulatim fientes profunt, acervati verò itemque sanguinis detractiones acervatæ lædunt. Et Gal. 1. ad Glauco. 14. quo loco dicebat: Si quis simul distensione nervorum laboraverit, & sanguinis eguerit missione, neque huic tantum semel mittere oportet, quantum exigit morbus, sed aliquid etiam accidenti est relinquendum.

Dum autem inflammationi occurritur, convulsorum quoque nervorum habenda est ratio, & maximè principii nervorum, videlicet spinalis medullæ, ut quantum fieri potest molliantur, & laxentur (dictum est enim ab inflammationis ardore exsiccari quoque nervorum humiditatem) eorumque calor roboretur: id-

circò



circò largè inungendæ sunt oleo de castoreo ex oleo amygd. dul. *Inunctiones*  
 confecto, aut oleo vulpino; vel laurino, aut de costo, vel de  
 terebinthina stillatitio, aut dialthea, cui præsertim aliquod ex  
 dictis oleis fuerit permixtum. Cavendum autem à nimis calefa-  
 cientibus, pauca enim eorum possunt humectare, & mollire. Et  
 ideo ubi aliquo ex eis, quæ nimis calefaciunt, uti proponimus,  
 addendum erit aliquod refrigerans, cujusmodi est oleum rosa-  
 ceum, & violaceum. Emunctoria quoque largè oleo aliquo re-  
 laxante sunt perfundenda, superiora quidem, si in superioribus  
 fuerit vulnus, inferiora verò, si in inferioribus. hujusmodi erunt  
 oleum amygd. dul. camæmelinum, seminum lini, liliaceum, &  
 similia. Optimè quoque fuerit consultum, si partem convulsam  
 in oleo aliquo emolliente diutius contineat, cujusmodi est oleum  
 commune, in quo emollientia fuerint incocta, ut althææ ra-  
 dix, malvarum folia, & flores, melilotum, sem. lini, & alia  
 hujusmodi; & oleum amygd. dul. & sem. lini. Maximè autem  
 à principio revulsioni erit studendum, ut quantum fieri potest  
 prohibeatur, ne affectio principio communicetur. Quod si fortè  
 repositus fuerit articulus, & convulsio, inflammatione oborta,  
 supervenerit, statim ejicere articulum oportet, quemadmodum  
 monet Hip. lib. de artic.

Si à dolore orta fuerit convulsio, illi consulendum erit, *Curatio con-*  
 quemadmodum capite de dolore expositum est. *vulsioni ex*

Si à corruptione partis, & nervi, corruptio emendanda, *corruptione,*  
 de qua etiam superius actum est. Potissimum autem cauterium *ac putredine*  
 actuale hic locum habebit, ubi enim periculum est in mora, va-  
 num est à debilioribus exordiri, sed extremis morbis extrema re-  
 media sunt adhibenda. Atque etiam ut superflua humiditas ner- *Topica ad*  
 vis imbibita absumatur, & nervosum genus roboretur, convulsæ *partes con-*  
 partes oleo, seu litu quopiam digerente largè erunt perfunden- *vulsas.*  
 dæ, & ipsum nervorum principium. Itaque optima fuerint oleum  
 laurinum, de costo, de castoreo, liliaceum, rutaceum, de croco,  
 de terebinthina, laterum, unguentum arogon, marciaton, bal-  
 samum arte confectum. Sed cum variis modis confici soleat,  
 mihi maximè arridet, quod secundum hanc formulam præparatur,  
 accipiuntur



*Olei laurini*

*Ligni juniperini*

*Baccarum juniperi*

*Pinguedinis humanae.*

*Lumbricorum terrestrium ana unc. jv.*

*Olei florum rosmarini*

*Florum lavendulae*

*Florum salviae ana unc. ij.*

*Petrolei*

*De terebinthina ana lib. v.*

*Laterum ( quod philosophorum à chimistis appellatur )*

*Glandis unguentariae ( quod de been dici solet ) ana unc. iij. s.*

*Myrrhae*

*Thuris*

*Ladani*

*Benzoi*

*Gummi juniperini ana unc. iij.*

*Cinnamomi*

*Cariophyllorum*

*Macis*

*Nucum myristicarum ana unc. j. s.*

*Bdellii unc. ij.*

*Ammoniaci*

*Opopanacis*

*Galbani ana unc. j.*

*Tacahamachae Indae.*

*Carannae ana unc. iij.*

*Castorei*

*Croci ana drach. vj.*

*Radic. Imperatoriae.*

*Angelicae*

*Valerianae.*

*Acori*

*Costi ana unc. s.*

*Styracis calamitae pinguis unc. ij. s.*

*Pinguedinis leonis*



*Tauri ana. unc. ij.*

*Aquæ ardentis optima lib. ij.*

*Misce, & d. s. a.*

Si à conclusa purulenta materia, vel alia excrementitia accidat *Curatio si à conclusa purulenta materia fiat.* convulsio, & quidem in ipsa vulnerata parte evocanda, & digerenda: unde si vulnus fuerit obcæcatum, amplum reddere oportebit congrua sectione, indeque in vulnus instillare liquorem aliquem tenuium partium, qui vim habeat absumendi materiam, & foras educendi, vel etiam linamentum eodem liquore imbutum, aut unguento, cui vis similis insit, illitum intra vulnus immittendum. Extrinsecus quoque applicandum erit aliquid, cui vis insit ex alto attrahendi. Instillari igitur in vulnus poterit oleum terebinthinæ. Balsamum arte factum, Balsamum naturale aqua ardenti liquatum, terebinthina cum hypericino oleo, & aqua ardente. Parari verò unguentum poterit linamentis excipiendum ex aliquo dictorum oleorum, terebinthina, tacahamacha, resina pinea, & cera, atque portiuncula sulphuris, vel præcipitati, quod expertus sum sælici cum successu, aut euphorbii, si tamen nervus haud fuerit denudatus, tunc enim ab acris erit cavendum. Verùm de his, cum de vulneribus nervorum erit sermo, copiosius pertractabimus, sicuti & de iis, quæ extrinsecus sunt applicanda, fuerint autem hæc, quæ euphorbium recipiunt. Item tacahamacha, & caranna aliquo ex jam dictis oleis dissoluta cum sulphuris portione, aut stercoreis columbini aridi, & hujusmodi alia, quæ ibi proponuntur. Habenda quoque erit nervorum, & spinæ ratio, quæ supra posita est.

Si verò materia non fuerit in vulnerata parte, sed aliò fuerit expressa, aut aliter ceciderit ob gravitatem, vel etiam fuerit transmissa, ut contingit in capitis vulneribus, in quibus transferri solet materia à vulnere ad nervorum principium, duplici ratione erit occurrendum, namque procurandus est materiæ exitus per vulnus amplum ipsum reddendo, & ea applicando, quæ vim habeant pus evocandi: quod verò translatus est ad nervos, & in eis absorptum, digerendum, unde lotus digerentes convenient ex rebus supra commemoratis, & foci calefacientes, puta ex decoctione ivæ, stœchadis, salviæ, lavendulæ, rorismarini, camæ- *Fotus.*



meli, anethi, rad. angelicæ, & hujusmodi. Neque inutile erit occiput profundius inurere, si ad nervorum principium translata fuerit materia. Utile non minus futurum est si sudores provocentur, & vi ignis, & congruis potionibus, sicuti & quando à corruptione provenit convulsio, namque vi sudorificæ potionis attenuata materia, quæ in nervis absorpta est, ad circumferentiam expellitur, partimque in halitum versa digeritur, partim sudoris specie effertur, unde Hip. lib. de intern. aff. n. 59.

*Curatio ex  
Hip.*

Hunc cum sic habuerit, loquebatur de apprehenso à tetano, fovere oportet, & pinguius unctum, ad ignem non ita prompte calefacere, & tepefactoria illito corpori adhibere. Et absinthium, aut lauri folia, & hyosciami semen, & thus terito, deinde vino albo diluta in ollam novam infundito, & oleum pari cum vino mensura affundito, & cum his calefactis large calidis corpus, ac caput illinito. Postea super pelliceum indumentum reclinatum, ita ut pars, ad quam fuit animalis caro, sursum vergat, mollibus, ac puris stragulis, ac vestimentis contegito, quo vehementer exsudare possit, &c. & lib. de loc. in hom. n. 48. Convulsioni sic mederi oportet: Ignis ab utraque lecti parte succendatur, & mandragoræ radix in potu præbeatur, minore pondere quam quod insaniam faciat, & ad tendines posteriores sacculi apponantur.

Non est silentio prætereundum à Gal. propositum auxilium 3. de comp. med. per gen. 2. & 3. Meth. 9. pro curatione convulsions ratione obortæ inflammationis, aut conclusæ materiæ, videlicet totalis nervi præcisio, aut tendinis vulnerati, vel muscoli, quamvis enim mancus ex ea parte superfuturus sit vulneratus, hoc tamen magis eligendum, quam certa mors. Methodus siquidem suadet non solum quandoque affectum aliquem despiciere, verum etiam novum inducere, & eum insanabilem, ut ægrotantis vitam tueamur. Unde loco citato dicebat: Urgentis vero indicatio inter ista non habetur, in aliis verò habetur, nam affectus, unde primum maximeque homini imminet periculum, hic primus curari debebit, interim verò non primus modò, verum etiam solus: veluti si puncto muscoli capite, convulsio, quæ nulla convenientium medicamentorum vi remittat, superveniat, quippe præciso per transversum toto musculo, convulsionem quidem

*Nervi, aut  
musculi to-  
ralis præci-  
sio curat  
convulsio-  
nem.*



dem sanaveris, aliquem tamen ex particulæ motibus vitiaveris, & inferius: Iam nervum punctum sæpe cogimur transversum præcidere quoties, vel convulsiones, vel deliria, vel ambo magna, ægreque sanabilia supervenire vulnerationi cernimus. Animadvertere tamen oportet, fieri debere hanc totalem præcisionem, antequam affectio communicetur principio, namque ubi hoc affectionem contraxerit, inutiliter arbitror secari nervum, cum ex principii affectione totum nervosum genus afficiatur. Priusquam tamen affectio confirmetur in ipso principio, si quis totaliter nervum præcideret, non abhorrerem, satius est enim anceps experiri remedium, quàm nullum, & remedia incerta administrare, quàm certum interitum expectare. Illud etiam est animadvertendum, ne fiat hæc præcisio, nisi quando reliqua auxilia nihil contulere, & ideo dicebat Gal. Convulsio, quæ nulla convenientium medicamentorum vi remittat; & inferius: Quoties vel convulsiones, vel deliria magna, ægreque sanabilia, &c.

Si ex frigidityte evenerit solvere statim vulnus expediet, *Curatio convulsionis ex frigidityte,* collocato ægro in loco calido, ipsumque & proximas partes fore moderate calefaciente quopiam oleo actu calido, cuiusmodi est oleum rutaceum, anethinum, camæmelinum, liliorum alborum, quæ etiam magis erunt nervosis partibus amica, si fuerint lumbricata. In horum penuria, commune accipere licebit, quo calente lana excepto pars fovebitur. In vulnus verò ipsum instillanda est terebinthina cum aqua ardente, vel oleum de terebinthina, vel abietina lachryma, aut balsamum arte factum. Extrinsecus verum medicamentum de euphorbio, de quo in capite de nervorum vulneribus agitur, apponendum, aut gummi taca-hamacha, vel caranna, quæ maximè erunt ex usu, & iis, si punctus fuerit nervus, & vulnus angustum, addi poterit paululum euphorbii, aut aliquid stercoreis columbini, vel sulphuris. Super hæc quoque imponenda est lana aliquo ex oleis dictis calentibus imbuta, curando ut semper calida permaneant. Convulsæ autem partes, cervix, & tota spina aliquo calefaciente litu erit inungenda. Optimum erit oleum costinum, de castoreo, de terebinthina, de euphorbio, & laterum, ac laurinum superpositis lanis oleo calente respersis. Quin & optimum erit ipsum



oleum commune, sed vetus, balsamumque arte confectum ad convulsionem, de quo superius. Quod si his peractis, qua curandi ratione Gal. brevi curavit quendam à convulsione suborta, eo quod puncturam in nervo habens iter fecisset in ambiente frigido, ut videre est 3. de compos. med. per gen. 2. non cedat affectus, in laconico continendus est, æger, propinandaque theriaca, aut Mithridatium, vel elixir vitæ; hic enim est casus, in quo licet febrem excitare, nam ut dicebat Hip. lib. de loc. in hom. n. 48. & lib. de Coacis prænot. n. 3. A convulsione si febris invaserit sedatur eadem die, aut sequenti, aut omnino tertia. Sed & in his febrem præexistentem augere conducet, unde Hip. lib. de Coacis prænot. n. 3. Convulsionem solvit febris acuta, quæ prius non fuit, si verò fuit prius, jam exacerbata. In aliis casibus solet febris præcedere ipsam convulsionem. Quæ nisi præcederet non minus eam excitare liceret, modò tamen convulsio inflammationem non consequeretur, siquidem febrilis calor materiam in nervis absorptam, quæ convulsioni est causa, absumit, & magis, quam quodlibet medicamentum appositum, non enim adeò in penitiores partes sese insinuat vis medicamenti, ut febrilis caloris. Sed quoniam, ut dixi, solet ipsa febris præcedere, licebit eam augere, nisi ab inflammatione orta fuerit convulsio. Si laconici facultas non fuerit, ignis ab utraque lecti parte succendatur, calefacientia partibus convulsis adhibeantur, & benè cooperiatur æger, & similiter quæ dicta sunt, per os exhibeantur, unde Hip. lib. de loc. in hom. n. 28. Convulsioni sic mederi oportet, ignis ab utraque lecti parte succendatur (hoc vice laconici usurpatur) & mandragoræ radix in potu præbeatur minori pondere, quam quod insaniam faciat, & ad tendines posteriores sacculi imponantur, ut videlicet calefiant convulsæ partes.

*Ex veneno.*

Si veneni adjuncti ratione oborta fuerit convulsio, evocandum est venenum, & bezoartica exhibenda, de quibus capite de vulnere venenato.

*Animad-  
vertenda in  
sopitis.*

Si ab inanitione ortum habuerit, quamvis omninò lethalis sit, attamen ad ægri solatium humectantibus convulsæ partes erunt tractandæ, ut largis perfusionibus ex oleo communi, amygd. dul.  
balnea



balnea quoque ex ipsis parari poterunt, incoctis etiam alijs emollientibus, vel addito decocto emollientium ipsismet oleis. Ferè autem semper observavi convulsionem hanc accidere in vulneratis, quando propè est mors, & dejectis omnibus viribus, quo in casu à balneis erit abstinendum.

Quod ad perfusiones, & inunctiones pro convulsionis curatione attinet, animadvertere oportet, nos in perfundendo assiduos esse debere negligentia enim, & raritas perfusionis multoties interitum attulit. Hinc Galen. lib. de artic. sect. 1. text. 62. cum sibi avulsam fuisset somnum humerum à jugulo, & propter nimiam extensionem ab illis factam, qui existimabant elapsam fuisse ad alam humerum, seu brachii caput, & propter arctam deligationem, quam diebus quadraginta pertulit, quo ad brachii caput jugulum adduceretur, muscoli malè affecti fuissent, ut principium quoddam convulsionis appareret, oleo calente continuo locus affectus perfundebatur, quod si, dicebat, aliquando, vel paululum intermitteretur, statim percipiebam, cervicis musculos intendi, ut jam manifestè convulsio esset expectanda, si ministri in perfundendo negligentiores essent. In hoc maxime peccatur nostris temporibus, existimant enim plerique satis esse, si semel in die, vel bis cervicem, & spinam oleo quopiam inungant.

Quod verò ad motus convulsivos attinet, si in sola affecta parte extiterint, enitendum, ut prava materia partim per ulcus, vel proximas partes educatur, partimque absumatur, partesque nervosæ oleo quodam amico fovendæ. Si verò in alijs quoque partibus, eò quòd pravi vapores ad cerebrum ferantur, idem peragendum, sed propterea, & revellere hos oportebit, & cucurbitulis, & frictionibus, & ligaturis, & clysteribus, & balneis, & alijs revulsoriis præsidis, quæ tamen virtus possit perferre. Nec enim ab re fuerit revulsioni studere, etiam si nondum ad cerebrum ferantur vapores, ut quantum fieri potest, omnis affectio ab ipso cerebro arceatur.

Ubi etiam convulsionem invadere cognoveris, quamprimum immittendus est inter ægri dentes bacillus, tum ut prohibeatur, ne dentes penitus constringantur, mutuoque adhæreant, quod alimen-

*Curatio motus convulsivi.*



alimentorum assumptionem impediret, tum ut præcaveamus mutuam illam dentium collisionem ex genarum concussione, ex qua contingit interdum linguam amputari, dum inter ipsos fortè interponitur.

Victus tenuissimus conveniret, affectio enim est acutissima, sed quoniam plerumque accidit postquam inedia, & evacuationibus consumpti sunt vulnerati, sæpè cogimur pleniorum victum injungere, & exhibere ova forbilia, juscula, contusum pulli aut caponis, succum expressum carniū, & hujusmodi.

## CAPUT LXXVIII.

*De turpi, aut minus decora cicatrice.*

Quamvis ea pulchritudo, quæ statum naturalem consequitur, quodammodo sub considerationem Medici cadat, & propterea turpis cicatrix, ut huic pulchritudini officiens, quando præsertim est in facie, & partibus, quæ non teguntur, corrigi à Medico desideret, eò tamen libentius de illa pertracto, quod artis, vel artificis potius defectum patefacere videtur. Turpis enim est cicatrix, quando aut nimis cava est, aut nimis crassa, & eminens, aut nimis lata, aut inæqualis, seu inæqualiter labia committens, vel aliquo extraneo colore infecta: at nimis est profunda, quia nimis propere fuit inducta, nimis verò eminens, quia nimis tarde, nimis lata, quia vulneris labia ad amissum non fuere adducta: inæqualis verò, quia inæqualiter labia fuerint commissa, aut à principio per futuram, aut in progressu, quando ad sanitatem vulnus properat: extraneo denique colore fœdata, quoniam vitiosi succi non fuerint evacuati, aut adhibita fuerint medicamenta, quæ colorem illum inducere potuerunt. Quæ omnia culpa ipsius Medici evenire probabile est; licet aliquando res aliter se habeat, non solum enim profunda est cicatrix, quia nimis propere fuerit inducta, verum etiam, quoniam deficiat pars aliqua spermatica, vel ejus portio, quæ regenerari non potest, unde Hippocr. 6. Aph. 45. Ulcera quæcunque annua sunt, aut etiam diuturniora, os abscedere est necessarium, & cicatrices

cavas



cavas fieri. Similiter non solum latior fit cicatrix, quia labia *Causa cicatricis deformatis.* exacte non fuerint adducta, verum etiam quia deerat magna aliqua cutis portio à telo dissecta, aut lacerata, aut auxilio aliquo, *Quæ cicatrix emendari possit.* cujus necessarius fuit usus, destituta, aut simili alia de causa. Neque semper inæqualis est cicatrix, quia Medicus ex incuria inæqualiter labia commiserit, quandoque enim natura vulneris, & supervenientium accidentium aliter fieri non patiuntur. Pariter non semper cicatrix inæqualiter labia committit culpa ipsius Medici, vel ob id quandoque unum ex labiis alteri superemineat, cum dictis ex causis nonnunquam aliter fieri non possit. Denique pravo colore non semper inficitur, quia Medicus ex incuria, & inscitia vitiosos succos non evacuaverit, verum etiam quia sibi non relinquitur tantum temporis, quantum requiritur, ut fiant convenientes evacuationes, eò quod nimis propere vulnus sanetur, cum tamen copia vitiosorum succorum longius tempus requirat, ut educatur. Quandoque etiam causa vulnerans aliquo indelebili colore est infecta, & eum vulneris labiis communicat, unde generatur turpis admodum cicatrix. Quandoque etiam quod colore inficit non est telum, sed quid causæ adjunctum.

Sed quomodocunque res se habeat, scire licet, non omnem *Curatio.* pravam cicatricem corrigibilem esse, nam quæ ex defectu substantiæ spermaticæ oritur, prorsus correctionem refugit, quoniam neque substantia spermatica deperdita regeneratur. Quæ pariter nimis lata est, angustior reddi non potest, neque licet talis genita fuisset, quia labiorum adductio fuisset prætermissa, aut negligenter facta, laborantes, ut cicatrix magis decora redderetur, iterum vellent aleam hanc subire, ut sejungerentur labia, & quod carnis, & cicatricis superfluum est, devastaretur. Ali-

Ffff

quando



quando etiam colores extrinsecus advenientes adeò hærent, ut amoveri non possint, nisi & subjecta cutis, vel caro simul amoveatur.

Crassa igitur cicatrix tenuior reddetur cerato de mucilagibus, diaquilone, cerato de lythargiro, medulla cervina, oleo glandis unguentariæ oleo vitellorum ovorum, asini pinguedine, humana pinguedine, si præsertim arte chymica oleosa ipsius substantia eliciatur. Si vero inveterata sit cicatrix conferet oleum balsaminæ, oleum ex myrtha, radix cucumeris agrestis trita, & apposita, chrysocola cum camphora trita & medulla bubula illita, balsamum arte confectum, & ipsum naturale balsamum, unguentum ex vitro. At si nimis crassa sit cicatrix, ut turpiter admodum supereminet, novacula detrahendum, & rursus inducenda cicatrix: detrahi etiam poterit ex edente aliquo medicamento: maxime autem probatur oleum de sulphure, & de calcantho. Et fortan satis non erit, quod supereminet auferre, facilè enim supercrefcit caro, antequam inducta sit cicatrix, sed aliquid amplius absumere utile erit, caro enim, quæ generatur, dum cicatricis inductio procuratur, cavitatem æquabit. Neque alia est curandi via, quando unum labiorum alteri supereminet, nam tantùm de supereminente labio detrahendum est, quantum satis est, ut æqua cicatrix inducatur: detrahetur autem vel novacula, vel exedente medicamento. Pariter quando nimis concava est cicatrix, scalpello excidenda, vel exedente medicamento auferenda, dein procurandum, ut cavitas carne repleatur. Paucos tamen reperias, qui decoris gratia velint dolores perferre, qui ex vulneris innovatione contingunt, & ideo Celsus lib. 5. cap. 25. At si vel excrevit cicatrix, vel concava est, stultum est



est decoris causa rursus & dolorem, & medicinam sustinere. Alioquin res utrique succurri patitur. Siquidem utraque cicatrix exulcerari scalpello potest. Si medicamentum aliquis mavult, idem efficiunt compositiones hæ, quæ corpus exedunt. Cute exulcerata super eminentem carnem exedentia medicamenta con-  
jicienda sunt, super concavam implentiam, donec utrumque ul-  
cus sanæ carni æquetur, & super ipsam cicatrix inducatur. Si  
pravus quispiam color cicatricem turpem reddiderit, & hoc pro-  
pter abundantiam vitiosorum succorum, totum corpus erit eva-  
cuandum, & iis medicamentis, quæ à longinquis partibus at-  
trahunt, ut Medicorum loquendi more utar, dein curandum,  
ut qui in parte remansit vitiosus succus diffletur, unde lotiones  
ex aqua dulci calida erunt ex usu, aut ex decocto malvarum, &  
violaria. Atque si nigra fuerit cicatrix, conferet inunctio ex  
oleo, in quo radix brionia, & alba, & nigra fuerit incocta.  
Item calamintha ex vino cocta, & lythargirum rosaceo nutritum,  
nec non & radices chelidonia majoris cum sulphuris portiunculæ  
tusæ, & emplastri modo applicatæ. Si verò alba fuerit cicatrix,  
plumbum album, si ex eo lamina conficiatur, & desuper lige-  
tur, colorem naturalem conciliat. Idem facit radix cucumeris  
agrestis, pituitam, quæ albam reddebat cicatricem, evocando.  
Ad fuscas etiam, & lividas, ac versicolores cicatrices valet oleum  
de Been albo, linimentum paratum ex plumbo eloto, & ærugine  
oleo rosaceo decoctis ad formam linimenti. Si color pravus  
extrinsecus advenerit, & nihil deterforia profecerint, ad exeden-  
tia confugiendum: præclaram autem operam præstat oleum  
sulphuris, & calcanthi, nec non & aqua fortis dicta argentario-  
rum, his enim leviter illitis detrahetur substantia illa colorata,  
quæ interdum sola auferri non potest, sed necessarium est, ut  
una



una auferatur aliquid de substantia ipsius cutis, aut carnis, quo in casu denuò inducenda cicatrix cerato de cerussa, aut palmeo, aut lamina plumbea superligata: oportet autem, ut plumbum sit album.

*FINIS PRIMI LIBRI.***Index**



# INDEX CAPITVM PRIMI LIBRI.

*De Rara Medicatione Vulnerum, in quo de  
vulneribus generatim pertractatur.*

P	Præfatio, scribendi occasionem, & quæstiones pertractandas com- plectitur.	pag. 1
Cap. 1.	Proponuntur rationes, ex quibus præstantia communis modi, qui quotidie Vulnus solvit, colligitur.	7
Cap. 2.	Reprobatur nova Methodus.	14
Cap. 3.	Nova Methodus pluribus Argumentis comprobatur.	16
Cap. 4.	Destruuntur fundamenta novæ Methodi.	19
Cap. 5.	Num turundarum, & penicillorum usus in Vulnerum curatione sit methodicus, & necessarius.	22
Cap. 6.	Undenam petenda sit harum difficultatum solutio.	25
Cap. 7.	Quid sit Vulnus.	27
Cap. 8.	De Vulnerum differentiis.	33
Cap. 9.	De Vulneris effectibus in parte vulnerata.	36
Cap. 10.	In quo ratio temperamenti sit constituta, & quod à Vulnere lædatur temperamentum partis.	41
Cap. 11.	De fluxione, & fluentibus humoribus & quod à Vulnere red- dantur partes fluxioni obnoxia.	52
Cap. 12.	De signis vulnerum.	65
Cap. 13.	De Vulnerum præfagiis in genere.	68
Cap. 14.	Quæ unio in solutis partibus sit speranda, & in quibus deper- ditæ substantiæ regeneratio sit expectanda.	71
Cap. 15.	Quod partes seminales in adultis neque verè coeant, neque re- generentur.	77
Cap. 16.	Unde elicienda sint præfagia in Vulneribus, & num ex parvo vulnere mors possit subsequi.	88
Cap. 17.	In quibus consistat vulneris magnitudo, & quotuplex ea sit.	94



Cap. 18. Ex Varia magnitudine vulneris varii eliciuntur eventus.	98
Cap. 19. Num integra sanitas sit expectanda, an vitiata, quando ex vulnere non sit intereundum vulnerato.	108
Cap. 20. De tempore salutis, & mortis.	111
Cap. 21. Quomodo computandi sint dies Critici in vulneribus, & quæ ratione in iis natura moveat.	115
Cap. 22. Quomodo præcognoscantur futuræ permutationes in vulneribus.	126
Cap. 23. De Curatione vulnerum in genere.	127
Cap. 24. De agglutinatione, & agglutinantibus medicamentis.	134
Cap. 25. De carnis regeneratione, & sarcoticis.	141
Cap. 26. De abstersione, & abstergentibus.	154
Cap. 27. De suppuratione, & suppurantibus.	156
Cap. 28. De peregrinorum corporum extractione.	166
Cap. 29. De præcavenda, & inhibenda fluxione.	171
Cap. 30. De cicatricis inductione, & epuloticis.	183
Cap. 31. Prætermittam fuisse à Galeno indicationem maximi momenti in Curatione Vulnerum, ideoque ad inutiles, & superfluas confugere fuisse coactum, atque minus probè succorum fluxioni consuluisse	189
Cap. 32. Quod melius sit Vulnera quam rarissime solvere, atque detergere, quam quotidie, ad extrahenda peregrina corpora, quæ primis diebus extractionem refugerunt, ad agglutinandum, ad carnem generandam, ad suppurationem promovendam, nec non & ad præcavendam fluxionem.	194
Cap. 33. Excrementa, quæ in vulneribus generantur, non cogere, ut quotidie vulnera detegamus, immò melius expurgari vulnus sub artificioso tegumento.	198
Cap. 34. Quod pro inducenda cicatrice non sit necessaria crebra solutio.	211
Cap. 35. Concluditur officium Medici in Curatione vulnerum, & de qualitate tegumenti.	214
Cap. 36. Cur aliis medicamentis citius, aliis tardius sanentur Vulnera, & quod dentur medicamenta à totius substantiæ proprietate vulneribus conferentia.	221
Cap. 37. Non esse absurdum asserere unica medicina omnia simplicia vulnera posse agglutinari, & cava carne repleri. Immò quolibet dato	



dato medicamento non corruptivo, neque deleterio, si decentis fuerit consistentiæ, vel ad eam reducatur, posse idem præstari ostenditur.	229
Cap. 38. Quando detegere vulnus oporteat.	233
Cap. 39. Quomodo cognoscamus vulneris statum, dum linteis tegitur.	238
Cap. 40. Colligitur præstantia novi modi, eumque communi præponendum esse ostenditur.	242
Cap. 41. Ut reddatur manifestum, quid in hac re senserint Hippocrates, & Galenus, adducuntur loca, ex quibus nonnulli colligunt hoc modo utrumque vulnera curasse.	251
Cap. 42. Ostenditur hac via non fuisse curata Vulnere ab Hippocrate, & à Galeno, & interpretando loca, ex quibus oppositum deducebatur.	261
Cap. 43. Quid in hac re senserint Cornelius Celsus, & Avicennas, & quomodo primi auctores hanc curandi viam invenerint.	274
Cap. 44. Solvuntur argumenta, quibus ab initio probabatur ad curationem Vulnerum necessariam esse crebram solutionem, & quæ novam impugnabant.	280
Cap. 45. De turundarum, & penicillorum usu in Vulneribus.	288
Cap. 46. De erratis, quæ in hoc curandi modo committi solent.	297
Cap. 47. De venæ sectione in vulneribus.	299
Cap. 48. Quantum sanguinis extrahendum.	307
Cap. 49. Quo in loco secanda sit vena.	311
Cap. 50. De tempore, quo debet secari vena, & de modo utendi hoc auxilio.	329
Cap. 51. De hirudinibus, cucurbitulis, & scarificationibus.	334
Cap. 52. De cucurbitulis non scarificatis, & nonnullis aliis revellentibus auxiliis.	337
Cap. 53. De purgatione in vulneratis instituenda.	340
Cap. 54. De tempore exhibendi medicamentum purgans.	358
Cap. 55. De electione purgantis pharmaci.	367
Cap. 56. De clysteribus, & suppositoriis.	370
Cap. 57. De alterantibus in vulneribus.	375
Cap. 58. De ratione victus.	388



Cap. 59. Quid agendum in simplici vulnere.	401
Cap. 60. Quid agendum in simplici vulnere post labiorum adductionem.	417
Cap. 61. De curatione vulneris cavi.	422
Cap. 62. Quid agendum quando vulneratus offertur secundum communem modum curatus.	438
Cap. 63. De sanguinis immoderato profluvio in Vulneribus.	440
Cap. 64. De inhibenda fluxione.	470
Cap. 65. De dolore.	477
Cap. 66. De inflammatione.	485
Cap. 67. De sorditie, ac putredine in Vulneribus.	407
Cap. 68. De supercrescente carne.	507
Cap. 69. De variis febrium generibus in vulneribus.	510
Cap. 70. De præsagiis vulneratorum febricitantium.	518
Cap. 71. De procuratione vulneratorum in febribus.	520
Cap. 72. De syncope, & animi deliquio.	523
Cap. 73. De delirio.	536
Cap. 74. De curatione delirii.	547
Cap. 75. De resolutione.	551
Cap. 76. De curatione resolutionis.	561
Cap. 77. De convulsione.	564
Cap. 78. De turpi, & minus decora cicatrice.	592

# INDEX

## QUÆSTIONUM

### QUÆ IN HOC PRIMO LIBRO

#### De Rara Medicatione Vulnerum deciduntur.

*Due præcipue Quæstiones.*

Quæst. 1.	<b>V</b> trum melius sit Vulnere quotidie solvere, an pluribus	pag. 7
Secunda.	interjectis diebus.	
	Utrum turundarum, & penicillorum usus in curatione	
	Vulnerum sit methodicus, aut etiam necessarius	22

*Quæ-*



Prima

- V**trum propositæ Quæstiones spectent ad Quid agendum,  
an ad rectum usum. 25
2. Utrum actiones similium partium semper lædantur à Vulnere. 36
3. Utrum à Vulnere lædatur temperamentum partis. 38
4. Utrum fluxio fieri possit citra actionem partium. 60
5. Utrum seminales partes possint verè coalescere, & deperditæ re-  
generari. 75
6. Utrum ex parvo Vulnere mors possit subsequi. 90
7. Utrum observandi sint dies decretorii in Vulneribus. 121 &c.
8. Utrum critici dies sint computandi simpliciter in Vulneribus. 120
9. Utrum peregrina corpora intra Vulnus contenta sint causæ proca-  
tarcticæ, an antecedentes. 130
10. Utrum agglutinatio sit opus nutritivæ facultatis. 135
11. Utrum carnis regeneratio sit opus nutritivæ facultatis. 142
12. Utrum revulsio debeatur tantummodo fluentibus, aut fluxuris hu-  
moribus, an etiam fluxis. 173
13. Utrum per se conveniat revulsioni, ut fiat ad proxima 179
14. Utrum cicatricis inductio sit opus Naturæ, an medicamento-  
rum. 184
15. Utrum excrementa, quæ in Vulneribus generantur ad crebram  
solutionem cogant. 199
16. Utrum excrementum tenue, & crassum generetur in Vulnere ex  
coctione alimenti. ibid.
17. Utrum sit aliquod Vulnus simplex. 217
18. Utrum dentur medicamenta à totius substantiæ proprietate Vul-  
neribus conferentia. 221
19. Utrum absurdum sit illud Assertum, Unica medicina possunt sa-  
nari omnia vulnera. 229
20. Utrum præstantior sit Nova Methodus, an communis. 243
21. Utrum Hippocrates cognoverit novum appellatum modum cu-  
randi Vulnera. 252
22. Utrum Galenus raram solutionem cognoverit. 258
23. Utrum secari possit vena pueris, senibus, & utero gerentibus. 306



24. Utrum derivatio competat fluenti humori. 326
25. Utrum secanda sit prius vena, an exhibendum pharmacum, quando utroque auxilio quis indigeat. 329
26. Utrum iteratio venæ sectionis spectet ad Quantum agendum. 332
27. Utrum purgatio vulneratis competat, & ea potissimum, quæ fit feligenti pharmaco. 340
28. Utrum purgantia opus suum perficiant attrahendo proprios & sibi familiares succos. 343
29. Utrum non existentibus vitiosis succis in corpore vulnerato conveniat purgatio. 347
30. Utrum medicamentum purgans exhibendum sit vulneratis à principio. 359
31. Utrum ex siccitate fiat convulsio. 568
32. Utrum dentur aliæ convulsioni causæ præter repletionem & inanitionem. 574





# I N D E X

## RERUM ET SENTENTIARUM OMNIUM MEMORABILIMUM,

*Quæ in hoc primo Libro de rara medicatione vulnerum continentur locupletissimus.*

### A.

- A** Bdominis penetrantia vulnera periculosa, pag. 100.  
 Abscessum vulnere supervenisse quomodo innotescat. 487.  
 Abstergentia alia per se, alia per accidens abstergunt; per se sunt, quæ vi sua deterforia abradunt à parietibus ulceris crassa excrementa; per accidens verò abluentia, 147. 148. Composita, 504. Fortia cavenda sunt, ubi vulnus redditum est purum, 504. medicamenta semper habent aliquid mordacitatis, 207. 208. non requiruntur in vulneribus, pro excrementorum absterfione, nisi propter naturalis caloris imbecillitatem; 208. Simplicia, 156. 503. Sordes malas in vulneribus, 503. Simplicia & composita, 504.  
 Abstergunt sordes ab ulceribus non solum nitrosa, & amara, verum, & viribus minora, ut sunt dulcia, & tenuium partium, 156.  
 Abstersio cur sit medicamentorum opus, non naturæ, 155. Duplici ratione fit, videlicet manuum opera, & medicamentis, quæ vim habeant abstergendi, non enim naturæ est opus, sed medicamentorum, ibid. Est opus, quo quæ vulnerum herent parietibus defixa, aut impacta abraduntur quodammodo, & amoveantur, 154.  
 Absterfionis necessitas in vulneribus, ibid.  
 Accidentia consequentia, quomodo faciunt ad cognitionem vulneratæ partis, 68.  
 Actio læsa quomodo vulneratam partem ostendat, 66.  
 Actionis læsionem à vulnere remansuram post adeptam sanitatem differentia vulneris ostendet, & natura supervenientis affectus, 110.  
 Acus qualis esse debeat, ut sit idonea pro sutura, 409.  
 Adstringentia alia per se, alia per accidens adstringunt, 138. Calida fugienda in vulneribus, 490. Cavenda sunt in inflammatione si dolor urgeat, 489. Et in progressu fortiora, ne affectum scirrhum efficiant, 490. Non omnia glutinant, non enim quæ detergunt vehementer, & expurgant, 139. Qua ratione repellant, 474. Repellunt, 473 Si vehementer asringant non repellunt, sed potius



# I N D E X

- potius fluxionem concitant, partem plus quam par sit cogendo, densando, constringendo, atque exasperando, 475.
- Adstringentibus cautè utendum, quando adest suspicio malæ putredinis, ne obstru-  
ctiones fiant, 381.
- Aer crassus partium inferiorum, tenuis partium superiorum vulneribus inimicus, præsertim cum frigiditate junctus, 389. Inæqualis fugiendus; calidus & frigidus suspectus; calidus, & humidus pessimus; ibid. pravus pravè disponit vulnera, 501. qualis conveniat vulneratis, 388.
- Aeris vitium in vulneribus quomodo corrigendum, 503.
- Affectus sanari non potest, manente adhuc ipsa, unde natus est, causa, 133. Simplex unum tantum indicat, eò quod unam tantum habeat naturam; compositus tot requirit, quot ea, quæ in compositionem veniunt, 129. Urgens appellatur, unde primum, maximeque homini imminet periculum, 132. Ubi adfuerit, ad eum dirigi primum curantis consilium debet cæteris si fieri possit, non neglectis: imo solus interdum curari debebit, & pro ejus curatione licet interdum novum, & insanabilem affectum inducere, ib.
- Affectus complicati quomodo tractandi, ib.
- Agglutinantia composita, 140. & 417. &c. Impropiè glutinantia dicuntur, cum revera non glutinent, sed solum impedimenta removeant absumentia omnem humiditatem, quæ inter agglutinanda ora posset colligi, & esse impedimento agglutinationi, 138. Non solum superfluam humiditatem absument, verum etiam fluentem in majori quantitate sanguinem, & propriam carnis humiditatem intactam relinquunt, ib. Non sunt necessaria adstringentia, sed sola siccitas ad agglutinandum satis est, modo partes divisæ ad amussim sint compositæ, 139. Si simul fuerint adstringentia tanto efficacius agglutinationem adjuvabunt, ibid. Simplicia, ibid. Sunt mediocriter exsiccantia, medium enim locum tenent inter sarcotica, & epulotica. 137.
- Agglutinantium finis est, nullam inter coitura subnasci humiditatem permittere, 186.
- Agglutinantia sicciora, & valentiora requirunt corpora sicciora, & valentiora, 140.
- Agglutinatio, aut omninò carnis generatione non eget, aut planè exigua, 135. Est opus, quo divisæ partes ad pristinam continuitatem, seu unitatem reducuntur, 134. Nec præsidii cujuspiam medici, sed naturæ, ibi. Fit alicujus glutinis interventu, 135. Melius perficitur raro solutis vulneribus, 195. Quomodo fiat, 135.

Aggluti-



# INDEX

- Agglutinationis glutinis materia est sanguis probus.* 135.
- ad Agglutinationem quatuor requiruntur, applicatio distantium labiorum, conservatio istius conjunctionis, præcautione quid labiis vulneris intercідat, & conservatio salubritatis partis,* 136. 137.
- pro Agglutinatione perficienda quid agendum specificum & determinatum, desumitur ex consideratione eorum, quæ naturæ opus impediunt, aut irritum faciunt, aut sine quibus ejusmodi opus nullo modo, vel ægrè admodum perficeretur,* 136.
- Albumen ovorum optimum in profluvio sanguinis,* 450.
- Alimenti substantia noxia est vulnerato, primo quatenus generatur copiosior sanguis quam par sit, secundo, quatenus non in bonum succum aptum est verti alimentum,* 392.
- Alimenta alia declinant ad atram bilem, alia ad aquositates, alia ad bilem amarā,* 393. *Convenientia in lethalibus vulneribus,* 398. *Convenientia transacti inflammationis periculo,* 399. *Fiunt noxia vulneratis substantia, qualitate, & quantitate,* 392. 393. *Medicamentosa contra putredinem,* 398. *Possunt qualitate esse infensa, quatenus possunt esse prædita aliqua qualitate, qua humores attenuentur, calescant, acresque, ac fluxiles reddantur,* 393.
- Alimentorum qualitas,* 396. *Substantia conveniens,* 394. 395.
- Alterantia convenientia pro exsiccanda & absumenda excrementitia materia totius, atque ad præparandam idoneam materiam pro carnis generatione,* 382. *in vulneribus exsiccandi vim habentia,* 383. *Quæ nativum calorem roborant ad certa quedam munia,* 388. *Quæ primo conveniunt in vulneribus sunt refrigerantia, incrassantia, & adstringentia,* 375. *Syrupi, decocta, & conservæ hujus facultatis,* 376. *Quæ putredini resistunt, quæque manifestis qualitatibus eam cohibent, & quæ à tota substantia, tum simplicia, tum composita, ibid.*
- Alteratio secundum naturam fit ex familiari animantis natura, & ab ingenito calore eam planè superante, ejusque finis est corporis nutritio. At quæ præter naturam ab aliena caliditate profisciscitur, & ad nihil est utilis,* 157.
- Alterationes tres fiunt in humano corpore; una est omninò secundum naturam, & in alimento attenditur, cum videlicet à calore naturali coquitur, ut ex eo nutriatur corpus, ibid. Altera est omninò præter naturam & in omnibus putrescentibus attenditur, & ejus finis est putredo. Tertia est media, & mixta ex utraque, & est suppuratio, ibid.*
- Aneurysma est tumor contingens ex eo, quod ab arteria dissecta non totaliter, ac minimè agglutinata, cum jam enata sit in circumstantibus partibus caro, efflu-*



# I N D E X

- unt sanguis, & spiritus, attollunt enim in tumorem superpositam carnem, 456.
- Animalis qualitas in parte ut deficiat*, 552. *Sensitiva & motiva una & eadem est*, sed quod pars per qualitatem à nervo receptam sentiat aut moveatur, id in propriam partis naturam referendum est, 554.
- Animi deliquium quid*, 523. Est levior affectus syncope, ibid. & 528. Inducitur vel spontè ob copiosiore sanguinis profusionem, vel artis ope, dum timor incutitur, 465. 466. sanguinem supprimit, 466.
- Animi deliquii præsagia*, 528. Vide Syncope.
- Anodyna alia sunt anodyna tantum; alia verò etiam sanantia*, 480. *improprie sunt narcotica*, quæ idcirco dolorem sedant, quia sensum partis tollunt, 481. *Non summovent causam*, 482. *Quæ sunt in eodem gradu cum calore partis dicuntur anodyna per similitudinem*, 481. *Quæ usurpari possunt in vulneribus*, 483. 484. *Quomodo iis uti debeamus*, 481. 484. *Sanantia sunt*, quæ causam removent, & omnino contra eam pugnant, 480. 482. *Tantum calida sunt in gradu primo*, vel in eodem gradu cum calore partis, ut suppurantia, 481. *Tantum id habent*, partem dolentem relaxant, & humidam reddendo in causa sunt, ne ita à causa dolorifica divellatur, & quod in spatiis inanibus reperitur partem distendens concoquunt, attenuant, ac digerunt, & sic equabile reddunt, sive id sit humor tenuis, sive crassus, & frigidus, sive etiam vaporosus spiritus conclusus, 480.
- Anodynorum usus*, 484.
- Aphorismus 18. 6. part. explicatur*, 98. 66. 5. part. 101. 4. 6. part. 106. 68. 5. part. ibid. 23. 4. part. ibid. 67. 5. part. 488. 65. 66. 5. part. 489. 21. 7. part. 443. 3. 5. part. ibid. 9. 7. part. 444.
- Apis viva linteo lineo involuta*, ac parti, unde sanguis profluit alligata, sanguinem supprimit, 468.
- in Apoplexia cur maneat respiratio*, cum tamen sensus factus sit ablatum, 556.
- Aqua nostra ad sanguinis fluxum è vulnere*, 451. *Rosacea Santalina*, 381. *The-riacalis*, 377. 380. 381.
- Argumenta comprobantia novam methodum*, 16. *Destruentia fundamenta novæ methodi*, 19. solvuntur, 286. 287. *Probantia communem curandi vulnera modum*. 7. solvuntur, 280. *Probantia necessitatem turundarum & penicillorum*, 22. solvuntur, 295. *Probantia temperamentum non vitiari à vulnere*, 39. solvuntur, 50. *probantia temperamentum vitiari à vulnere*, 39. *Reprobantia novam*



# INDEX

- novam methodum*, 14. *solvuntur*, 285. *Reprobantia usum turundarum*. 23.
- Arsenicum sublimatum omnium est sarcoticorum optimum ad suppressendum sanguinem*, facit enim *escharam* maximè profundam, & diutius hærentem, 459.
- Arteria antequam penitus præsecetur deligenda est versus radicem*, 456. Non ex toto dissecta statim totaliter recidenda est, ne contingat aneurisma, faciliusque sistatur profluvium sanguinis, *ibid.* Quomodo deliganda, *ibid.*
- Ateriæ partes divisæ agrè coalescunt ob siccitatem*, & motum, *ibid.*
- Arteriæ an agglutinentur in adultis*, 82.
- Articulorum vulnera sunt magna ratione dignitatis partis*, 97. *lethalia*, 100.
- Artifices periti imperitis ac artis expertibus in his præstant, quod expedite & eleganter operantur*, 403.
- Artis præcepta exequimur, quando ei, quod magis urget, occurrimus, reliquis, si fieri possit, non neglectis*, 285.
- Artes per additamenta fiunt*, 287. in *Artium principiis latent multa, quæ temporis progressu forsân elucescent.* *ibid.*
- Asinium stercus ad sanguinis fluxum.* Vide *Sanguinis profluvium*, &c.
- Attractio an fiat à vacuo*, 56.
- Attractionis causæ duæ, dolor & calor*, 52. *Revera tamen neque dolor, neque calor attrahit*, 54. 339.
- Attrahentia à totius substantiæ proprietate*, 168. *Composita*, *ibid.* *Medicamenta qualia*, 167. *Simplicia*, *ibid.*
- Attrahit perpetuo calidum, sed quod est tenuium partium fortius attrahit*, *ibid.*
- Avicennas an cognoverit raram solutionem*, 83. I. C. non cognovit, 275.

## B.

**B** *Alsami artificiosi ad vulnera descriptio*, 140. *alia descriptio præstantissima*, 434. *Alia ad convulsionem.* 585. 586.

## C.

**C** *Acochymia magna vulnera pravè admodum disponit*, 307. 537. &c.

*Calidum innatum quid*, 45. *Est de essentia temperamenti*, 46. *Præmanet*  
(B) 2
in



# I N D E X

- in partibus usque ad mortem, postquam eas efformavit, 45. Quomodo possit perdurare usque ad extremum vitæ, 45. 46.*
- Cali, & carnis interpositio per se prohibere regenerationem, & agglutinationem potest, 79.*
- Calor connectit animam cum corpore, & ideo dicitur vitæ principium. 45. influens à corde est de temperamenti essentia, 46. Quem usum præbeat, ibid. Revera non attrahit, licet sit fluxionis causa, 54. 339.*
- Calor naturalis est qui sanat vulnera, 221. In suppuratione vincit praternaturalem, sed materiam non omnino obtinet 223. 158. In vulneribus conservandus & roborandus. 191. In vulneribus languet. ibid. Leditur in vulneribus. 190. Quas indicationes præbeat. 192. Quid postulet, ut suppurationem promoveat. 160. Valde leditur ambientis occursum. 49. Exemplis ostenditur. ibid.*
- Caloris naturalis vires in absorptione excrementorum. 205. &c.*
- Caloris qualitas conservanda, & quomodo. 193. Substantia in vulneribus reparanda, & quomodo. ibid. Substantia reparatur, & qualitas conservatur, & roboratur ope tegumenti. ibid.*
- Caro generatur à natura partis vulneratæ ex sanguine, qui ad partem pro nutritione transmittitur. 142. Ut regeneretur, requiritur, ut pars vulnerata sit temperata, & sanguis, qui affluit, bonus & mediocris quantitate. ibid. Superflua, quis morbus, & quibus detrahenda. Vide. Supercrescens caro.*
- Carnis generatio melius absolvitur, si raro solvantur vulnera. 195. Interpositio prohibet regenerationem, & agglutinationem seminalium partium. 79. Regeneratio est naturæ opus. 141. Regeneratio sequitur operationem nutritivæ facultatis. 142. Regenerationem quæ impediunt. 144. vulnera tutissima. 100.*
- Carni producenda dum studemus, cavere oportet ab austeris & adstringentibus, ut quæ sordem ulceribus arctius affigant. 147.*
- Carnem generantia, quorum usus est in vulneribus post abstersionem. 424.*
- Carne humida & laxa repletum esse vulnus quomodo cognoscatur, dum tectum est. 240.*
- Carnosæ partes uniuntur vera unione. 74.*
- Cataplasmata non sunt apponenda supra vulnus, sed ad circumscriptas partes. 480.*
- Causa sine qua non, si adsit, ad id quod ordo dicat respiciendum; in quo consilio quid ante quod, quid cum quo & quid post quod sanari possit animadvertendum. 133. Ubi præsens est, in curatione ipsa spectanda. 132.*
- Cerata attrahentia infixa vulneribus. 168.*

*Cerebrum*



# I N D E X

- Cerebrum cati quomodo dementiam inducat.* 539.
- Cerebri temperamentum quomodo pervertatur, adeo ut delirium excitetur.* *ibid.*  
vulnera etiam magna, & ad alterum anteriorum ventriculorum penetrantia interdum sanari visa sunt. 98. 99. Vulnera propter dignitatem partis sunt magna. 97.
- Chirurgia utilitates in curatione vulnerum.* 300.
- Chirurgus simplex non potest esse perfectus vulnerarius.* 115.
- Cibaria, quæ convenient in fluxu sanguinis è vulnere.* 467. *Vide victus ratio.*
- Cicatrix concava* 594. *Crassa quomodo corrigatur* 593. *Eminens curatur.* 594.  
Nihil est aliud quam caro exsiccata, condensata, & indurata. 184. Non omnis emendari potest. 593. Non potest induci, nisi caro pro naturali modo se habeat. 184. Pravo colore infecta. 594. Sub tegumento melius inducitur, quam sub crebra solutione; si videlicet pauca excrementa profluant, vel multa, sed aëris causa; Si multa profluant, quando solvendum est vulnus. 212. 213.  
Turpis artis vel artificis defectum patefacere videtur. 593.
- Cicatricis formam natura præstat, medicamenta temperamentum.* 185. *Inductio opus naturæ Galeno.* 184. *opus medicamentorum.* 185. *turpis causa.* 593.
- Cicatricem inducentia medicamenta quæ.* 186. *alia per se, alia per accidens cicatricem inducunt.* *ibid.* 187. *Alia sicciora & valentiora sunt, alia minus sicca & imbecilliora, quod & naturæ aliæ sicciores sint & valentiores, aliæ imbecilliores.* 188. *Non debent esse aspera ad tactum.* 189. *Non solum superfluum humiditatem absument, verum etiam & propriam carnis, ac præterea adstringunt & indurant.* 186. *Per accidens id faciunt cathartica, cum in tenuissimum pollinem redacta in modica admodum quantitate applicantur.* 187. *Quæ per se cicatricem inducunt, in satis magna quantitate sunt applicanda.* *ibid.* *Sunt multo sicciora glutinantibus.* 186.
- Cicatricem per accidens inducunt siccantia sine astrictione; sed aliquando promissa frustrantur.* 189. *Per accidens inducentia simplicia.* 187. *Per se simplicia.* 188. *Composita.* *ibid.* 425. *Per se inducentia sunt mordicationis expertia.* 187.
- ad Cicatricem caro inepta, vel ob temperaturæ vitium, vel ob aëris injurias, sic apta ope tegumenti.* 213. *Inducendam rara solutio laudatur à Galeno, & Avicenna.* *ibid.*
- Clysteres acres quibus morbis competant.* 372. 373. *Acres, & attrahentes ex quibus.* 374. 375. *Ad fœces educendas ex quibus parentur.* 374. *Evacuant*



# INDEX

non solum quæ circa ventrem & mesaraeum, sed quæ sunt circa hepatis sima. 373. Fortes in vulneribus partium naturalium, in vulnerato notabiliter febricitante, in imbecillioribus, in pueris, in decrepitis & longo morbo confectis sunt cavendi. 374. Irritantes & attrahentes quando convenient. 373. Irritantes ex quibus. 374. Simpliciter alvum subducentes quando convenient. 373. 374. Tribus rationibus locum habent in vulneribus. 370. Vim insignem habent revellendi. 372.

*Coctiones tres in humano corpore.* 157.

*Coitus vitandus à vulnerato.* 391.

*Communio venerarum servanda in venæ sectione quæ.* 318. interdum ita proxima est, ut venæ, quæ secatur, possit partem affectam exhaurire, eo quod unà ipsius venæ aperiantur: aliquando non aperiantur simul venæ partis affectæ, sed exhauriuntur, quæ proximæ existentes mittunt ad affectam, & hæ inanitæ ab ipsa affecta attrahunt. 319.

*Complicati affectus quomodo tractandi.* 132.

*Computatio dierum semper incipienda est à primo vulnere, nisi quando primum vulnus exiguum est, secundum autem lethale, hoc enim in casu a die secundi vulneris exordienda esset.* 125.

*Conservæ, quæ refrigerant & succos reddunt ineptos ad motum in vulneribus.* 375. 376.

*Contradictio in Galeno de causa efficiente suppurationis.* 158.

*Contrarietas servanda in revulsione, à quo præscribatur.* 181.

*Convulsio a motu secundum naturam differt, quod præter nostram voluntatem fiat.* 565. An fieri possit a materia crassa, cum ab eadem fiat resolutio. 573. An fieri possit à materia pituitosa, cum eadem relaxentur partes. 572. Est contractio muscutorum, ad propriam originem præter voluntatis imperium. 565. Est symptoma morbi, motus convulsivus naturæ irritatæ. 566. Est symptoma voluntarii motus, qui depravatur, cum retrahuntur partes convulsæ ad proprium principium, præter voluntatis imperium 365. Ex inanitione lethalis. 583. Ex materia absorpta in nervo, aut ex nervi inflammatione, curatur totali nervi præcisione, quæ tamen fieri debet priusquam affectio communicetur principio, & solum quando reliqua auxilia non proficiunt 588. Ex repletionem quot modis fiat in vulneratis 577. Ex vulnere lethalis. 581. In vulnere lethalis dicitur, non quia semper & ex necessitate mortem affert, sed quia crebro. 583. Licet sit symptoma, evadit tamen causa morbifica, dum vires prostermit & pravas affe-



# INDEX

- affectiones concitat* 564. *Notha.* 578. *Ob frigus ambientis, saepe facile tollitur.* 582. *Plerumque supervenit in vulneribus ob inflammationem.* 578. *Quando affectio est communicata principio, pauci evadunt.* 564. 567. *Quandoque fit à materia flatulenta.* 575. *Quid differat à nervorum distensione & a contractione membrorum.* 576. *Quomodo distinguatur a convulsivo motu.* 565. *Quomodo interficiat.* 581. 582. *Sequitur morbum in immutata magnitudine, secundum longitudinem scilicet, sed quandoque reponitur inter morbos figura, quoniam citra figurae persionem non possunt breviari muscoli.* 576. 571.
- Convulsionis causa est materia replens, aut siccitas. ibidem. Cause immediatiores repletio, & inanitio, non intemperies, sed materia.* 568. *Cause remotiores* 572. 573. *Causarum signa.* 579. *Differentia.* 576. *Epileptica mira varietatis causa.* 559. 566. *Ex corruptione & putredine curatio.* 584. 585. *Ex frigidity curatio; in qua licet febrem excitare.* 589. 590. *Ex inanitione causa.* 573. *Ex inanitione curatio.* 590. *In curatione cautio circa topicorum usum. ib. ex inflammatione curatio.* 584. *Ex purulenta materia curatio, ex Hippocrate.* 187. 188. *Partis affecta signa.* 581. *Prasagia. ibidem signa.* 579. *Signa, quando eo devenit, ut sperari non possit salus.* 583.
- Convulsionem futuram quae significant.* 581. *Solvit febris acuta, quae prius fuit, jam exacerbata.* 590.
- ad Convulsionem oleum praestantissimum.* 586.
- ex Convulsione pars moveri nequit quia facultas est ligata vitio instrumenti: in motu convulsivo nequit quiescere, quia facultas semper irritatur.* 566.
- in Convulsione, quavis ex inflammatione facta, caute detrahendus sanguis, & partitis vicibus.* 584. *Quae sit pars primario affecta.* 566. *Tendo primario afficitur.* 567.
- Convulsivus motus est cum concussionibus & accessionibus convulsio vero est contractio jam facta.* 565.
- Convulsivi motus causa.* 575. *Curatio, & in ea cautio.* 591.
- Convulsivi motus quomodo, & quibus de causis fiunt in vulneribus.* 578. *Solent praecedere veram convulsionem.* 581.
- Convulsivorum motuum signa.* 579.
- Cordis peculiari temperie partes omnes suas actiones perficiunt* 524. *vulnera etsi exigua, sunt magna ratione dignitatis partis.* 97. *vulnera necessario mortem inferunt.* 98.



# I N D E X

*Cornelius Celsus an cognoverit raram solutionem.* 274.

*Corpus totum dividitur à Galeno in carnosam & osseam partem.* 30.

*Corruptionis & putredinis in vulneribus causa.* 487. &c.

*Corruptionem in vulneribus quæ medicamenta cohibeant.* 489. &c. *Sistentium medicamentorum in usu cautio, contra eos qui semper in usu medicamentorum, quæ vires ignis habent, persistunt, donec illis putredo serpere videatur.* 490. 491.

*in corruptione & putredine curativæ & præservativæ indicationes.* 489. *Si nihil proficiant medicamenta ad ignitum ferrum deveniendum: Et si adhuc ulterius malum procedat, ut totum servemus, necesse est, ut partem præcidamus.* 506.

*Crisis est subita alteratio ad salutem vel mortem, vel ad dispositionem, cum qua accedit sanitas aut mors,* 117. *In solis materialibus morbis est expectanda.* ib. *Per excellentiam dicitur subita alteratio ad salutem.* ibid. *Præsupponit naturæ actionem in causam morbificam, & materiæ evacuationem, aut saltem permutationem,* ibid. *Vera non fit in vulnere, nisi ex accidenti, hoc est, ob conjunctum affectum.* 121.

*Crisis nomine appellari solet & pugna, & expulsio, & alteratio.* 117.

*Crisin semper perturbatio præcedit propter pugnam, & expulsio subsequitur, inde alteratio.* ibid.

*Crises aliæ sunt perfectæ, aliæ imperfectæ, aliæ bonæ, aliæ malæ, quoniam separationem boni à malo, & mali expulsionem quandoque integre assequitur natura, quandoque imperfectè, & aliquando unà cum malo evacuatur bonum, vel pro malo id, quod bonum est.* 117.

*Critici dies alii sunt principes & radicales, alii indicantes seu contemplabiles, alii intercalares seu incidentes.* 118. *Computandi sunt simpliciter, non dupliciter.* 125. *Computantur in vulneribus ut in puerperio.* 124. *Considerandi sunt in morbis non solum gratia veræ crisis, verum etiam ut omnes naturæ actiones perpendi possint, & à malis bonæ sejungi* 120. *Observandi sunt in vulneribus, primò, ob turbamentum à vulneratione contingens, quod non utcumque sedat natura, sed statutis diebus.* 121. *Secundo, propter conjunctam febrem putridam.* 123. *Tertio, propter supervenientem inflammationem, ut habeatur supurationis & eruptionis tempus, aut resudationis, aut corruptionis* 124. *Tandemque gratia curationis, utque possimus melius veras & utiles naturæ actiones cognoscere.* ibid. *Verè tantum sunt habendi, in quibus frequenter solent*

con-



# I N D E X

- contingere vera, secure & perfecta crises, cujusmodi sunt qui radicales appellantur, inter quos perfectissimi sunt, qui vigesimam non transcendunt: iis proximi sunt indicantes: intercidentes non sunt dicendi verè decretorii. 118.
- Criticorum dierum causa. *ibid.*
- Criticorum dies observavit in vulneribus Hippoc. 119.
- in Criticis diebus tantopere amica est motio naturæ, ut in illis non solum veras crises moliatur, verum etiam alias motiones & operationes tentet, ut se à re molestante liberet. *ibid.*
- Crustifica medicamenta. 457. &c. Vide Escharotica.
- Cucurbitulæ non scarificatæ revellunt. 464. Præstantia earum. *ibidem* 337. Quando fortius revellant. *ibid.* unde habeant vim revellentem. *ibid.*
- Cucurbitulæ scarificatæ fortius revellunt hirudinibus. 335. Non evacuant immediate a venis majoribus, sed à capillaribus. 334. Quando fortius revellant. 336. Quibus partibus applicentur, 337. Revellunt evacuando, attrahendo ob vacuum, & dolorem inferendo. 335.
- Cucurbitularum præstantia. 337. Præsidium in profusionibus sanguinis optimum. *ibid.* 463.
- Cucurbitulis raro utimur derivationis gratia. 335.
- Curandi modus immutandus, quando melior haberi potest 284. Rationem præscribit illud idem, quod curatur. 127. Rationes optimæ judicantur tum ex temporis curandi brevitate, tum ex maxime tute curando, tum ex curando citra dolorem. 246.
- Cutis non coalescit vera unione. 77.
- Cute sua partes omnes subjectæ maxime delectantur. 260.

## D.

- D**Eligatio agglutinativa quibus vulneribus simplicibus conveniat, 402. Agglutinativa quomodo adhibeatur, 405. agglutinativa suspecta, 406. Ascia, & ejus usus, 420. in sanguinis fluxu è vulnere qualis esse debeat, 452. in vulneribus vapores non suppressit, etiamsi diutius non solvatur, 283. Rotunda quæ, 420.
- Deligationis agglutinativæ loco quid usurpari possit, 406.
- Deligatione simplici vulnere adhibita quid agendum. 420.
- Delirium fieri potest per essentiam, etiamsi vulnus non sit in capite, sed in parte  
(C)
nervosa,



# I N D E X

- nervosa*, 548. 550. Fit ob imaginatricis vel memoriae lesionem, & quomodo, 536. per consensum quando est continuum, 543. per essentiam cum est in fieri, non est continuum necessario, sed tantum cum affectio facta est. *ibid.*
- Delirii causa*, 545. *Curatio*, 547. ex defectu spirituum ob superfluum sanguinis fluxum *curatio*, 550. ex inflammatione, aut irrigatione cerebri *curatio*, 548. ex irrigatione membranarum, & cerebri *signa*, 545. per consensum *curatio*, 550. per consensum *signa*, 545. per essentiam *signa*, 544. *presagia*, 546. *varietatis causa*, 547.
- Delirio facto non competit medicamentum purgans*, 548. 549.
- Delirium per essentiam quæ comitentur symptomata*, 543. &c. quæ præcedant, *ib.*
- Deliria contingunt in vulneratis*, & per essentiam, & per consensum, & quibus de causis, 541. &c. Nunquam sunt sine febre, quæ interdum est symptoma delirii, aliquando verò delirium est febris, vel ejus causæ symptoma, 542.
- Derivatio quid*, 326. duplex, 327. competit post revulsionem, 330. Et revulsio sunt remedia cujuslibet immodicæ evacuationis, 326. Fit ad vicina, 175. Fit per communes vias, *ibid.* Medela est humorum qui jam membrum obsederunt, *ibid.* Non solum competit humori fluxu non impacto, verum etiam ei, qui leniter & parce ad partem fertur, 176. 177. Quæ sit per evacuationem materiae in parte phlegmone affecta contenta, non potest dici particularis revulsio, 325.
- Derivationis gratia quæ vena secanda*, 326. quando vena secanda, 329.
- Dictamnium Creticum præcipuè calori naturali suffragatur ad extranea corpora propellenda*, 225.
- Differentiæ vulnerum.* Vide vulnerum differentiæ, uti & de reliquis affectibus vulnere supervenientibus.
- Digerentia calidiora sint oportet, ac etiam exsiccantia*, quando materia est frigida, & in profundo corporis reperitur, & cute densiore est obducta, & in densi ac duri habitus corpore, 495. Conveniunt in augmento cum repellentibus mixta, magis autem in vigore, 491. Fortiora quæ, 496. Fortiora conveniunt in declinatione, *ibid.* Fortiora non conveniunt in inflammatione in summis partibus existente, acria enim sunt & dolorifica, *ibid.* in inflammatione partium exquisiti sensus debent esse expertia omnis mordacitatis, non simpliciter tantum, sed in respectu ad eas partes, 496. 497. in inflammatione præcipuarum partium, quarum opere, vel etiam virtute aliæ partes indigent, debent esse permixta cum adstringentibus, ne simul robur partis dissolvatur, *ib.* Leviora, areotica



# I N D E X

ca dicta, sunt moderatè calida, parum aut nihil sicca, vel etiam nonnihil humida, ac tenuium partium, 495. Leviora conveniunt summis partibus inflammatione affectis, 496. Moderatè calida discutiunt materiam calidam & tenuem, & in superficie corporis existentem, & in parte rara, & mollis habitus corpore, 495. Omnia calida sunt, & tenuium partium, ibid. quæ sunt ex tenuitate, ableganda sunt, quando materia est crassa, ne quod subtile est digerant, & crassum ad lapidosam duritiem convertant: quo in casu sufficient, si fuerint ex secundo vel tertio ordine calefacientium, & primo exsiccantium, 495. qualia esse debeant, ibid. Simplicia quæ, ibid.

Digerentium materia in levioribus affectibus, ibid. 496.

Digestiva varia, 429. 495. 496.

Discissio quid, 98.

Dolor dum vim causæ induit vim accipit indicandi, 478. Principem locum sibi vendicat inter fluxionis causas, 477. Qua ratione tollatur, 480. &c. Quando curandus anodynus, quando narcoticis, & quando contra causam pugnantibus, 482. quomodo fluxionem concitet, 52. 489. quomodo præcaveatur in vulnerato, 478. Revera non attrahit, 54. 339.

Dolori à frustulo ossis vel teli quomodo consulendum 479. ex affluxu materiæ quomodo consulendum, ibid. ex ambiente ut consulatur, ibid.

## E.

**E**ffectus vulneris. Vide. Vulneris effectus.

Effluxus nisi conveniens adsit in vulnere cavo, parandus ejusdem aut contrarii loci divisione, aut impositione turundæ, 425. 426. quomodo parandus, 209. 210.

in Effluxu parando, quæ consideranda, 209.

Elegantia in artis operibus omnibus attendenda, 403.

Elementa ex Hipp. & Gal. sunt in mixto actu, 41.

Ellychnia quid, & eorum usus. Vide Turundæ.

Emollientia & laxantia omnia fiunt emplastica quando crassioris sunt substantiæ, 163.

Emplasticum medicamentum est, quod tenaciter corporis poris illitum hæret, ibid. Terrenæ est consistentiæ, ac viscosum, ibid.

Emplastica medicamenta ad fluxum sanguinis è vulnere cohibendum, 450. dum apponuntur oportet alterius manus summis digitis divisum vas ad inferiorem



# I N D E X

- partem comprimere, aut complexum tenere, alterius verò manus digitis medicamentum consistentiam habens mellis, pilis leporinis exceptum, aut tenui stupa, vel cotone, divisioni apponere, atque ad ipsam comprimere, & tamdiu detinere, quoad non amplius fluat sanguis; Deinde aliam medicamenti partem superponere, atque eandem digitis per aliquod temporis spatium comprimere, & sic deinceps donec vulnus sit repletum, 452. nonnulla non solum terrena sunt, sed aquea natura, quin etiam quadam non parum aëris in se continent, omniaque glutinosa, 163.*
- Emplastra attrahentia peregrina corpora intra vulnus contenta, 168. Digerentia. Vide Digerentia, &c. Repellentia, 494. Roborantia naturalem calorem in vulneribus, 430.*
- Emprosthotos quid, 577.*
- Emprosthotosi signa, 580. 581.*
- Epileptica convulsionis miræ varietatis causa, 559.*
- Epithemata cordis ad malignam putredinem, 380.*
- Epulotica medicamenta quæ. Vide Cicatricem inducentia.*
- Eschara ne citò decidat, quando supprimendi sanguinis gratia ferramenta ignita adhibentur, oportet ferrum esse vehementer ignitum, & profunde imprimere, ita ut fiat eschara profunda, & crassa, 459. non supprimit tuto fluentem sanguinem, 457.*
- Escharæ lapsus, quando imminet profluvium sanguinis, non est procurandus pinguis, & pus moventibus, 458.*
- Escharotica quæ 459. 510. Fugienda in recentibus vulneribus, 457. Potius conveniunt in ulceribus putridis, & malignis, 458. Quæ adhibentur supprimendi sanguinis gratia, adstrictionem adjunctam habeant, quo fiat eschara diutius permanens: interea enim suborietur caro, quæ divisionem vasis obturabit, 459.*
- Evacuante omnia præsidia viribus officiunt, 307.*
- Evacuatio revulsoria quæ, 316.*
- Evacuationes decretoriæ in vulneratis, 121.*
- Eventus in vulneribus unde habeatur, 88.*
- Excrementum crassum quomodo naturæ cedat, 204. 205. Non semper eget siccantibus, ibid. Tam tenue, quam crassum duplex est in vulnere, 201. Tenue & crassum quomodo generetur in vulneribus, 144. 200. Tenue, & crassum sunt excrementa tertiæ coctionis vulneratæ partis, 201. Tenue quid obsit vulnere, 206. Tenue quomodo absumatur à natura, 207. Tenue reddit vulnus humidum, crassum sordidum, suntque impedimento carnis generationi, 206. 207.*

Ex-



# INDEX

*Excrementa aliquando copiosius generantur in vulneribus ob injuriam ambientis, & crebriorem detectionem, 213. Crassa non semper auferuntur ope abstergentium, sed interdum ope naturæ, 202. Generantur, aut ex sanguine in parte vulnerata contento, aut ex ipsamet partium substantia putrescente, 200. Partim per halitum insensibilem digeruntur, partim sensibilibiter à natura extra vulnus propelluntur, quando idoneus adest effluxus, 24. & 25. & 277. 278. Quæ sint propria vulneris, 200. Vulnera non exigunt crebram solutionem 25. 26. Num ad crebram solutionem cogant, 196. Non cogunt, 203. Vulnerum quot ex Galeno, 199. Tria ex Celso, ibid.*

*Excreta quomodo ostendant vulneratam partem, 66.*

*Expurgari non debent totius excrementa per vulnus, 246.*

*Expurgatio quid sit, seu quando censendum sit expurgatum esse vulnus, 247. Vulneris, quæ sit ope tegumenti, melior est ea, quæ manu aut medicamentis perficitur, 208. Quæ laudanda, 246.*

## F.

**F***acultas bifariam leditur, aut per suam ipsius essentiam, aut per aliquem instrumentorum morbum, 40. in divisis partibus existens opifex est ejus substantiæ, quæ innascitur, 74. in temperamento fundatur, 39.*

*Facultatum essentia est temperamentum, 40. Imbecillitas temperamenti vitium arguit, ibid.*

*Fascia ad deligandum, ut agglutinetur vulnus, idonea est illa, qua propositum finem tuto consequi licet, & ex ea nihil incommodi provenit, & parari etiam potest ex ea deligatio, quæ aspectui sit jucunda, 402. eligenda, 404. ut circumducenda in deligatione agglutinativa, 406.*

*Fasciæ debent esse tenues, leves, munda, molles, lata, sine suturis, sine eminentiis, valida, ita ne abrumpantur, 404.*

*Febris cur accendatur ex generatione puris, 511. ephemera à principio contingens nihil certi potest præagire, quod idem est de ea, quæ puris generationem consequitur, 519. ex apparatu morbifico peculiarem procurationem exposcit, 521. nisi ob apparatus morbificum eveniat, peculiarem procurationem non exigit; aliquando tamen admonet Medicum, ut studeat inhibenda ejus causæ, alioquin exitio vulnerato ipsi futuræ, ibid. Putrida quomodo accendatur in vulneribus ob apparatus morbificum, 517. Quæ ratione tractanda, 521. Vulnerato superveniens maximè consideranda ab iis, qui vulnera tractant. 510.*



# I N D E X

- Febris ephemeræ signa*, 512. *ex apparatu morbifico præfagia*, 520. *ex apparatu morbifico signa*, 517. *ex dolore præfagia*, 519. *ex generatione puris indicia*, 514. *ex inflammatione præfagia*, 519. *ex inflammatione signa*, 515. *ex putredine & corruptione in vulnerata parte præfagia*, 519. *ex putredine & corruptione in vulnerata parte signa*, *ibid.*
- Febres ephemeræ accenduntur in vulnerato ex motu corporis & animæ, atque ex generatione puris, ac inflammatione*, 510. 512. *Multiplices in vulneribus*, 510.
- Februum putridarum varia genera fieri possunt per vulnera*, 510.
- Fibula*, 412.
- Filum pro sutura quale esse debeat*, 409.
- Fluentis humoris qualitas & quantitas unde*, 55.
- Fluentium humorum revulsio medela est*, 173.
- Fluxio duplici ratione impeditur*, 171. *inhibenda, ut agglutinari possit vulnus*, 141. *interdum fit à toto, & tunc in quamcunque partem potest decumbere*, 58. *Quomodo fiat à dolore*, 52. *Vitiat sanguinem, qui futurus est gluten, & ipsam partis temperaturam*, 141.
- Fluxionis causæ duæ præcipuæ, quarum altera refertur in transmittentem partem, altera verò in eam, vel eas, quæ recipiunt*, 52. *causarum vis respectu subiecti est dijudicanda*, 63. *in omni vulnere habenda est ratio, & si humores adhuc quiescunt, curandum, ne iter arripiant ad vulneratam partem: & si jam moveri ceperint, cohibendus, & alio avertendus est humorum motus*, 134. *Occasiones & causæ*, 62. *Velocitas, & tarditas unde*, 55.
- Fluxioni consulitur rara solutione*, 193. 196.
- Fluxionem quæ faciliorem reddant*, 55.
- in Fluxione quæ agenda*, 171. *Quæ vitanda, ut impediatur*, 172.
- Fluxionibus obnoxia redduntur partes à vulneribus*, 63.
- Frictiones habent vim revellendi*, 337. *Quando fortius revellant*, 338. *Unde vim revellentem habeant*, *ibid.*
- Functiones principes qua de causa ledantur*, 543.
- Futura permutationes in vulneribus ex quibus præcognosci possint*, 126.
- Futurum eventum in vulneribus indicabit magnitudo vulneris*, 88. *Partis interitum superveniens affectus demonstrabit*, 110.
- Futurorum præcognitio quem usum afferat*, 69.



# I N D E X

## G.

- G**alenus in usu turundarum varius, 294. Non cognovit novum modum curandi vulnera, 264. Purgat à principio in vulneribus, 360. Usus est purgatione in vulneratis, atque ea, quæ fit pharmaco seligente, 341.
- Galenus locus, circa indicationem à magnitudine morbi desumptam, explicatur, 353. Locus de usu anodynorum & narcoticorum, ex duodecimo Methodi, primo, explicatur, 482. Loca, ex quibus deducebatur ipsi cognitam fuisse raram solutionem, interpretantur, 273.
- Galenus placuit rara solutio in ulceribus, 258. 259.
- Gangræna & sphacelus sequuntur ut plurimum vehementes inflammationes, aut caloris naturalis penuriam, 240.
- Gangrænam, & sphacelum vulnere supervenisse quomodo innotescat, dum vulnus est tectum, ibid.
- Glandes acres & revellentes ex quibus conficiantur, 375. emolliunt, irritant & revellunt, 374. irritantes ex quibus fiant, 375.
- Gluten, quo adducuntur labia vulneris, quomodo conficiatur, 413. præstantissimum describitur, 414.
- Glutinis laudes, ibid. Materia, 413.
- Glutina varia ibid.

## H.

- H**epatis inflammatio sectionem venæ postulat ab eodem latere etiam si plenitudo adsit in toto, 318. Vulnera sunt magna ratione dignitatis partis, 97. vulnera lethalia, 99. 100.
- Hippocrates num cognoverit raram solutionem, 252. non cognovit, 261. Purgat à principio in vulneribus, 361. Turundas reprobat in vulneribus, 293. Usus est purgatione in vulneribus, 340. & ea quæ fit seligente pharmaco, 341.
- Hippoc. locus explicatur ex lib. de aff. tex. 27. 340. Varia loca, ex quibus videtur colligi, eum cognovisse raram solutionem, 252. Quæ explicantur, & ad verum sensum trahuntur, 267.
- Hirudines evacuant sanguinem citra virium dispendium, unaque ad partem, cui applicantur, revellunt, 334. Minus revellunt, quam venæ sectio & cucurbitula, ib. Revellunt peculiari quadam attractione, scilicet suctu, ib. Vicem gerunt venæ sectionis in imbecillitate virium, ibid.

Hira-



# I N D E X

- Hirudinum applicatio est modus quidam aperiendi venam, ibid.*
- Historia multorum, qui ex parvis vulneribus perierunt, 89.*
- Homo, quo longius distat à generationis principiis, eo plus habet de calido extraneo; semper tamen dicitur calidum innatum, seu spiritus innatus, quia semper habet de illius natura & proprietate, 46.*
- Humor nullus in corpore talis, qualis erat ab initio, permanere potest, sed necesse est, ut aut concoquatur, apponatur, atque assimiletur solidis animalis partibus, aut corrumpatur & putrescat, 202.*
- Humores cur fluant, 171. in vulnerato etiam si vitiosi non sint, possunt fieri noxii, & facile in vulneribus magnis iter arripiunt ad vulneratam partem, 345. non moventur à se ipsis, 62. & 351. non moventur citra actionem partium, 62. Sinceri rarissime confluunt, 350.*
- Humorum motus ad vulneratam partem magis potest ad indicandam purgationem, quam modica præparatio, vel etiam cruditas, ad eam prohibendam, 362.*

## I.

- I**aspis lapis collo suspensus, aut manu nuda apprehensus, sanguinem supprimit, 468.
- Iecur lupi aridum à tota substantia hepaticis auxiliatur, 224.*
- Ignis non supprimit tuto fluentem sanguinem, 457.*
- in Igniti ferramenti usu animadversio, 459.*
- Ignita ferramenta debent esse vehementer ignita, & profundè imprimi, ita ut fiat eschara profunda, & crassa, quo tardius decidat, 459. magis probantur in recentibus vulneribus, quam medicamenta crustifica, 458. Sunt maxime opportuna, ubi ex erosione putrescentis alicujus profluvium sanguinis excitatur, ibid.*
- Impedimenta naturæ in curatione vulnerum, 216.*
- Imperitiam labor compensat, 249.*
- Indicantis specifici natura sciri ad unguem non potest, 128.*
- Indicare magis potest quidquid de se quam de alio, 127.*
- Indicat unum non nisi unum, 217.*
- Indicatio prætermissa à Galeno in curatione vulnerum, 190.*
- Indicationes curativæ in profluvio sanguinis ex vulneribus, 444. in curatione convulsionis, 583. 584. In curatione inflammationis, 489. in curatione resolutionis,*



# I N D E X

- lutionis, 561. in curatione vulnerum, 128. 129. in delirio, 547. in febre ex apparatu morbifico, 522. in procuratione fluxionis, 171. in sorditie mala atque putredine, seu corruptione, 502. in syncope, 530. primæ faciendorum in omni arte omnibus hominibus natura sunt præsto, 128. Ubi plures habentur, semper ea est præponenda, quæ ceteras vincit, 319.
- Indigentia* alimenti pluribus modis inducitur, sed citissime venæ sectione, 302.
- Infixa* in vulneribus quomodo extrahenda, Vide peregrina corpora.
- Inflammata* aliqua parte præcipua, cujus ope vel etiam virtute aliæ partes indigent, ne à solventibus virtus earum exolvatur, adstringentia erunt admiscenda; cavendum etiam à valde refrigerantibus, ut quæ nativum calorem extinguant; & ab actu frigidis, 498.
- Inflammatio* duplex, sicca & humida, 486. dura, tensa ac renitens, mala, 488. Humida, à fluxione scilicet, alia vera & legitima, quæ ex influxu sinceri sanguinis procreatur, alia notha, quæ ex sanguine cum aliis succis permixto, 486. in parte carnosa, nisi maxima fuerit, aut maligna, interitum non minatur, 488. Quæ penitiores partes occupat, mala, 489. quando superveniat vulneribus, ibid. Si fuerit erisypelatis particeps, magis refrigerandum, 488. 490. Si suppurationis signum præbuerit adjuvanda erit aliquo cataplasmate suppurante, 493. Superveniens internis partibus vulneratis, semper mala est & lethalis 489.
- Inflammationis* benignæ indicia, 488. Curatio, 489. Differentiæ, 486. & putredinis periculum non est æquale in omnibus vulneribus, 345. malignæ indicia, 488. materia evacuatur digerentibus, repellentibus, 490. 491. revulsionibus scarificationibus, venæ sectione, 492. materiæ impactæ conveniunt digerentia & scarificationes, ibid. non impactæ repellentia, revellentia, ac derivantia; quamvis & eadem digeri posset, 491. periculum ut evitetur in vulneribus, quæ sint agenda, 303. Præagia, 488. Signa, tam in partibus externis, quam internis, 487.
- Inflammationi* exposita est pars vulnerata pluribus de causis; & quæ sint illæ, 307. omni effatu dignæ accidit febris, & ea continua: at, quæ succedit inflammationi internarum partium, longè pravior est, & sæpius acuta, & si pars inflammatione affecta fuerit membranosa, durties & ferrinitas in pulsu percipitur, 487.
- Inflammationem* vulnere supervenisse, quomodo cognoscatur, dum vulnus est tectum, & eam suppurare, 439.



# I N D E X

*Inflammatione in summis partibus existente non sunt applicanda cataplasmata aut emplastra dura, nec talia, quæ calore partis exsiccata possint dura evadere, dolorem enim inferrent, partem continendo, & exasperando, 498.*

*in Inflammatione contentus sanguis alium colorem & aliam consistentiam habet, ac sanguis in reliquo corpore existens, 309.*

*Inflammationes in summis partibus curantur propriis phlegmones remediis, quæ in alto sunt corpore, si cum iis aliquod acrius medicamentum sit immixtum, 497. Nothæ, 486.*

*Influens calor est de temperamenti essentia, ut innatus, 46.*

*Intellectio fit in cerebro non tanquam in organo, sed tanquam in loco, ubi preparantur species intelligibiles, 536. Læditur, si malè, aut nullo modo præparentur phantasmata, ibid.*

*ad Intellectionem requiritur phantasia tanquam potentia preparans objectum intellectivæ potentiæ, phantasmata scilicet, quod speciem intelligibilem producit, ibid.*

*Intellectiva facultas quomodo ledatur, cum non sit organica, ibid.*

*Intestinorum tenuium vulnera lethalia, uti & crassorum, si per transversum fiat plaga, & magna; si verò parva & recta, quidam evadunt, 99.*

*Intercipientia in vulneribus ad sistendam fluxionem seu prohibendam, 420.*

*Irrorationes pavimenti ex iis, quæ putredinem cohibent, aeris vitium emendant, 503.*

*Iteratio venæ sectionis an spectet ad quantum agendum, 332. quo præscribatur, 313. quando facienda, 314. spectat ad modum agendi, 315. 316.*

*Iudicatio. Vide Crisis.*

*Iudicatorii dies. Vide Critici dies.*

*Iudicium exactum requiritur in Medico in cognitione convenientis subfluxionis & ejusdem præparatione, 210.*

## L.

**L***abia vulneris simplicis quomodo adducantur ad mutuum contactum, & adducta conserventur, 402.*

*Lambitiva in vulneribus thoracis, 386.*

*Lapis in capite bufonis repertus, & manu nuda apprehensus, vel collo suspensus, sanguinem supprimit, quod idem facit jaspis, 468. Lingua Germanica Beinbruch appellatus drachmæ pondere ex vino rubro infusionis vincæpervincæ exhibitus,*



# I N D E X

bitus, quatuor aut quinque subsequentibus diebus fracturis cum vulnere brevissimè magna cum omnium admiratione emedetur, 388.

*Linamentorum usus in vulneribus. Vide Turunda.*

*Lintea munda quomodo necessaria in curatione vulnerum, 282.*

*Lipothymia & lipopsychia quid, & quomodo differant à Syncope. 523.*

*Litus ad consolandas circumjacentes partes in vulneribus simplicibus, 420. 421. ad præservandum cor à mala putredine, 380. conveniens in resolutione, 562. in convulsione, 585. in vulneribus cavis, 426.*

*Luxatio si cum vulnere fuerit, mancus erit ex illa parte vulneratus, licet sanetur vulnus, quoniam restitui os in pristinum locum non potest, 110.*

## M.

**M**agnitudo morbi non indicat magnum remedium sed est signum indicantis, 353. morbi non indicat neque missionem sanguinis neque purgationem, ibid. Morborum omnium una est tantum, quæ attenditur penes quantitatem declinationis à statu naturali: sed facilioris doctrinæ gratia triplicem excogitarunt Medici, 94. 95. Secundum quid æstimatur respectu facultatis partis affectæ, 187. Vulneris ratione dignitatis penes quid attendenda, 95. Vulneris ratione facultatis penes quæ attendenda, ibid. Vulneris ratione propriæ essentiae penes profunditatem potissimum attenditur, 96. Vulneris simpliciter, quam respectu facultatis totum corpus dijudicamus, quid de vulnerato futurum sit ostendit. At magnitudo secundum quid, quid de vulnerata parte, 107. Vulneris triplex, 94.

*Magnitudinis ratione facultatis ultimus gradus, quibus vulneribus citius adnectatur differentia vulneris ostendet, quæ connectuntur, status corporis, atas, consuetudo, aeris temperies, regio & hujusmodi, 107. Vulneris ratione facultatis multi sunt gradus, desumpti à vario excessu eorum, quæ sunt præter naturam supra naturæ vires, 96.*

*Magnitudinem particularem vulneris, quæ videlicet æstimatur ratione facultatis partis, pendentem ab essentiali imbecillitate, ostendet substantia partis, & superveniens pravus affectus, eam verò, quæ ab accidentali, substantiæ modus, actio, situs & usus, 109.*

*Magnum est vulnus secundum quid, quando facultas est imbecillior, quam ut corrigere vulnus possit, & in quo hæc imbecillitas consistat, 108. Quæ duplex est, essentialis & accidentalis, 109. Remedium competit magno morbo, 353.*



# I N D E X

- in Magnis morbis cur modo mittamus sanguinem modo expurgemus, 352.*
- Mandragora quomodo dementiam inducat, 539.*
- Materia fluens cur non semper feratur ad locum vulneratum, sed aliquando ad alias & oppositas partes, 101.*
- Materia medicæ debent habere vim remedii specifici & determinati, 332.*
- Mederi novit is, qui viam omnem curationis eousque percalluit, ut ipsum consequi finem destinatum queat, 128.*
- Medicamentum etiam si qualitates opportunas non habeat, eo tamen potest vulnus sanari, 229. Glutinatorium plus siccet oportet, quam quod carnem producit. Præterea quod carnem producit, statim etiam detergendi vim obtineat oportet, quo non modo redundantiam humoris siccet, sed etiam sordem auferat, glutinatorium verò neque detergeat, neque expurget, sed contra potius substantiam omnem in idem cogat, 147. Vide Agglutinantia, & Sarcotica. Quod requiritur ad perfectionem tegumenti quale, 220. Quod sordibus copiosis repurgandis est, non semper carnem potest gignere, nisi vel uberiore oleo, vel rosaceo liquatum deterfionis vehementiam remittat, 147.*
- Medicamento quolibet dato convenientis corpulentia, quod non sit corruptivum & deleterium, aut adeo acre & mordax, ut fluxionem concitet, possunt omnia vulnera cava sanabilia carne repleri, 233.*
- Medicamenta, à tota substantia conferentia vulneribus, dantur, & quænam sint, 222. applicata vulneribus vim suam retinere diutius nequeunt, 198. Cur alia aliis magis sint efficacia in curatione vulnerum, 221. Dantur quæ à totius substantia proprietate partibus quibusdam conferunt, & peculiare quosdam morbos & morbificas causas demoluntur, 222. Dierum plurium & paucorum quæ, 257. Dupliciter calori naturali opem ferunt, per se, & per accidens, 221. Efficacia ad vulnera, ibid. Idonea in vulnere cavo, 428. imposita pro cohibendo sanguinis fluxu è vulnere, quando & quomodo detrahenda, 454. Mitiora infirmioribus & mollioribus, fortiora validioribus ac siccioribus conveniunt, 226. non sanant per se vulnera, sed opem ferendo naturali calori, qui sanat per se, 221. non solum reperiuntur, quæ à tota substantia vulneribus conferunt, verum etiam, & quæ vulneribus partium, 225. quæ sunt plurium dierum, conveniunt ulceribus cum luxatione, 257. Sicciora & calidiora adhiberi possunt vulneribus, modo ex iis sint, quorum substantia ac vis promptè evanescat, 228.*



# I N D E X

*Medicamentorum ad sanguinis fluxum è vulnere rectus usus, 452. manifesta qualitas quomodo mensuranda, 221. quando fieri potest, habendus est delectus, & quæ efficacia sunt amplectenda, 220.*

*in Medicamentorum electione quæ consideranda, ibid. 221.*

*Medicamentis ad interna vulnera cur assiduo utamur, 288.*

*Medicina etiamsi qualitatem habuerit vulnere minus opportunam vulnus tamen sanare poterit, 229. 232. Unica potest tegumentum perficere in omnibus vulneribus, 230.*

*Medicina unica possunt omnia simplicia vulnera glutinari, & cava carne repleri, 230. 232.*

*Medicus agrotantis saluti consulit præsidis, propria existimationi potissimum futura prædicendo, 68. in curatione dupliciter se habet, nam vel remedia adhibet, & hæc per indicationes invenit, vel ab adversis præcavet, & hoc non elicit per indicationes, sed tamen ad indicationes consequitur, 130. Longè minorem partem habet in curatione vulnerum, quam cujusvis ferè morbi, 214. Quæ debeat animadvertere ut decentes subfluxiones paret, 211. quomodo debeat se gerere cum vulnerato, & assistentibus, 390. quomodo opem ferat naturæ in expellendis vulnerum excrementis, 209. 210.*

*Medici conatus omnis in duos scopos dirigitur, in conservationem videlicet, & robur naturalis caloris, & in remotionem impedimentorum, idque in vulnerum curatione, 214. partes in vulnerum curatione, ibid.*

*Medico duo debent esse proposita in medicina facienda, unum est, ut agrotantis saluti consulat, alterum ut propriæ famæ, atque existimationis rationem habeat, 68.*

*in Medico acre judicium desideratur pro paranda subfluxione idonea, 210.*

*Medici mimi & thrasones reprehenduntur, 391.*

*Medicis evenit propemodum quod malis gubernatoribus, qui cum in tranquillitate navigantes delinquant, non sunt manifesti; cum autem eos deprehenderit ventus magnus, & tempestas, palam jam conspicui sunt omnibus hominibus ignorantia & culpa erroris sui navem perdidisse, 231.*

*Medium heterogeneum eundem præstat usum, quem homogeneum, præterquam in nervis & ligamentis, 81. Heterogeneum seminales partes solutas connectens, magis vel minus recedit à partis natura, prout pars mollior vel siccior fuerit, magisque vel minus sanguine participaverit, ibid.*



# I N D E X

*Methodus curandorum vulnerum huc debet spectare, ut natura probè sua munia exerceat, 242. medendi complicatis affectibus, 132. quæ raro solvit, communi præferenda, 242. quæ raro solvit, congruis auxiliis non privat vulnera, 286. solam naturam sanationis vulnerum auctorem cognoscit; sed & eam auxilio nostro indigere accipit, 288.*

*Methodi communis medendi vulneribus perfectio, & imperfectio, 243. medendi vulneribus in hoc sita est, ut optimè, seu quam melius fieri possit, egenti naturæ succurratur, 242. quæ raro solvit, perfectior, 243.*

*Methodo, quæ raro solvit, quæ objici possint, 247.*

*Missio sanguinis convenit in vulneribus, & propter inflammationem, & propter apparatus morbificum, & ad cohibendum sanguinis profluvium, 304.*

*Mixtiones duæ possunt considerari in constitutione mixti, substantiarum scilicet, & qualitatum, 42.*

*Mixtum fit per mutuam actionem & passionem contrariarum qualitatum elementis inexistentium, ibid.*

*Modus medendi novus melius adjuvat naturam quam communis, eo quod ipsam robustiorem reddit, & à pluribus, quæ illi officere, & impedimento esse possunt, securiorem, & ita perfectior, & illi præponendus, 244. Utendi medicamento, quando tegumentum est parandum, 299.*

*Morbus non est periculosus, nisi quia magnus, 88. &c.*

*Morborum magnitudo. Vide Magnitudo morborum.*

*Moriuntur citius ex vulneribus senes quam juvenes, nisi ex fluxione & putredine mors accadat, 114.*

*Mors & ejus signa non possunt dies verè decretorios statuere, & cur, 115. non sequitur vulnus parvum per se, 90. Sed tantum per accidens, 91.*

*Mortem citius aut tardius futuram in vulneribus, quæ significant, 114. quæ vulnera inferant, 98. &c. ut inferant vulnera, 95.*

*Motus cavendus à vulneratis, 389.*

*Mundificantia, quorum usus est in vulneribus cavis post suppurantia, 423. Vide Abstergentia.*

*Musculi debent consui, quando sunt dissecti, 411. 412. Si dilatato tendine contegantur debent denudari à tendine ibid.*

*Musculorum membrana possunt consui, ibid.*

*Mutationes apparentes in vulneribus in diebus decretoriis, 121.*



# I N D E X

## N.

- N** Arcotica composita & jam fermentata sunt in frequentiori usu, 482. Composita quæ sint opportuna, 483. Cum sint calori naturali inimica, non nisi in maxima necessitate sunt usurpanda pro custodia virium, 282. Non sunt applicanda vulneratæ parti, 480. non sunt in usum revocanda ante sextum mensem à principio suæ confectionis, 483. quæ convenient, quem usum habeant in vulneribus, 481. sanguinem supprimunt, 466. Sunt anodyna improprie, sedant enim dolorem, sensum partis tollendo, 481.
- Narcoticorum compositorum ad usum quando deveniendum, 482. de usu Galeni locus explicatur, 481.
- Natura corporis offensa, aut læsa, propriam in se continet sanationem, 215. dat formam cicatricis, 185. est sibi met proprius medicus qui, quod in ipsa deficit, optimè reparat, 216. expellit contenta extranea in vulnere una cum pure modo citius, modo tardius, 169. in suis operibus ordinate procedit, & ideo non quocunque tempore ad expellendum insurgit, sed statutis diebus, qui ob id critici appellantur, 118. perficit quicquid necessarium est pro curatione vulneris, nisi impediatur, 215. potest expellere excrementa vulnerum, etiam crassa, 203. Robusta sæpè errata contemnit, 296. Transmittit eandem alimenti copiam ad vulneratam partem, quam prius sanitatis tempore transmittere solebat, & forsitan majorem, 392.
- Naturæ minister & adiutor est Medicus, & ei opem fert in expellendis excrementis, 209. 210. Opus est agglutinatio, 134. opus est carnis generatio, 141. opus est suppuratio, 157. opus impediunt peregrina corpora intra vulnus contenta, distantia labiorum, quæ propulsionem excrementorum impossibilem, aut saltem difficilem efficiunt, humorum decubitus in partem vulneratam, materia, ex qua parari gluten, & caro debet generari, pravitas, & quæ calorem naturalem partis offendunt, 216. 217. Vis in curatione vulnerum, 231.
- Naturæ sunt morborum medicatrices, ibi.
- Nervo dissecto si perierit voluntarius motus alicujus partis, non potest sperari nisi vitiata sanitas, quia natura non potest nervum dissectum agglutinare, nisi per heterogeneum medium, quod irradiationem animalis qualitatis non admittit, 108.
- Nervi omnes deferunt qualitatem animale[m] à cerebro in omnes partes sentientes, 554. omnes motivi etiam sensifici, 555. qui ad musculos feruntur, non solum motivam, sed & sensitivam facultatem deferunt, 554. 555.

Ner-



# I N D E X

*Nervorum, & nervosarum partium vulnera sunt lethalia, 99. sunt magna ratione dignitatis partis, 97.*

*Nitrosa sunt & amara, quæ poros expurgant, 155. Si intra corpus sint assumenda, etiamsi quedam adstrictio illis sit adjuncta, non minus expurgant, impellente veluti manu adstrictoria facultate, 155.*

*ad Nutritionem partium necessario sequitur coalitus simplicis vulneris, 135.*

*ad Nutritivæ facultatis operationem vulneris cavi repletio sequitur, 143.*

*Nutriuntur partes seminales immediatè ex semine, non ex sanguine. Vide sanguis.*

## O.

**O***culus si vulneretur, ita, ut effluat humor albugineus, quia hunc in adultis natura regenerare non potest, nec aliud substituere, quod officium ejus suppleat, non sequitur integra sanitas, sed visione in posterum carebit oculus, 108.*

*Oculi mentis acutius intuentur, quam corporis, 282.*

*Oleum ad attrahenda peregrina corpora, 169. ad convulsionem præstantissimum, 586.*

*Olei Hispanæ appellati descriptio, 435, Nostri de hyperico descriptio, 431.*

*Opisthotonos quid, 577. 580.*

*Opus facile reddit peritia, 248.*

*Opera necessaria in curatione vulnerum sunt: agglutinatio in simplici vulnere, carnis generatio in cavo, & cutis reparatio in cutis defectu; & hæc sufficiunt ad vulnerum curationem, 134.*

*Operationes quæ ledantur à vulnere. Vide vulnus.*

*Operationum prima causa est anima, instrumentalis verò temperamentum, & quomodo earum causa dicatur tum temperamentum, tum facultates, & anima, 44.*

*ad Operationes principes edendas requiritur idonea cerebri temperatura, & congrua dispositio animalium spirituum, 538.*

*Orbicularia vulnera tardius sanantur, 112.*

*Os secti vel prærupti vasis quomodo obturetur seu claudatur, 447.*

*Os quod abscesserit contineri in vulnere quomodo deprehendatur, dum vulnus est tectum, 240. Si cariem contraxerit, nunquam ulcus carne replebitur, nisi quod cariosum est cesserit, & propterea periculum est, ne remaneat ulcus fistulosum, 109.*

*Ossa*



## I N D E X

*Ossa fracta non agglutinantur in intima fracturae parte, sed circumcirca tantum callo alligantur, 80. propter siccitatem, si fracta sint, vera unione non coeunt, sed per medium heterogeneum, quod tamen eundem usum praestat, quod homogeneum, ib.*

*Ossium fractura vulneri adnexa sanationem valde protrahit, & si recedere os oporteat, longius etiam protrahetur, 112.*

*Ovi albumen probatur valde in fluxu sanguinis. Vide Sanguis. Reprobatur in curatione vulneris cavi cum stupis adhibitum, nisi fluxus sanguinis urgeat, 427.*

*Orymi majoris aqua linteis excepta & applicata sanguinem supprimit, 468.*

### P.

**P***Aracelsus cognovit indicationem, quae desumi debet à calore naturali in curatione vulnerum, 215. cognovit unica medicamenti impositione posse vulnus sanari; non tamen assecutus est raram solutionem, 277.*

*Partis natura ostendet, quae vera unione coalescant, 74. Unionem impedire possunt actio partis, usus ac situs, substantiaeque tenuitas, quod inter uniendas partes existens, & superveniens pravus affectus, 71.*

*Partes omnes ad proprias functiones obeundas calore vitali indigent, 537. omnes similes solutae ex sui natura uniri possunt, 71. Organicae unionem non admittunt, 69. quae verè sunt conglutinandae ex tali materia constitutae sint oportet, quae solutionis tempore praesto esse possit, nec deficiat pro novae regeneratione, 74. quae verè sunt conglutinandae molles sint oportet, ibid. Quae verè sunt conglutinandae ut facultate valida, copiosoque calore sint praeditae oportet, ib. seminales coalescere non possunt vera unione, & cur. 77. seminales cur vera unione non coeant, non est prima causa calli & carnis interpositio, 79. similes solutae aliae verè unione coeunt, aliae per medium heterogeneum, 73.*

*Penicilli. Vide Turundae.*

*Peregrina corpora intra vulnus existentia habent rationem causae internae, & proinde indicant sui remotionem, 130. non obvia, & quae infixae sunt, extrahuntur aut manu Medici, vel attrahentis ab ea parte, qua venerunt, vel impellentis in partem, in quam tetenderunt, aut experimentis ad hanc vel illam partem; quandoque medicamentorum attrahentium ope; quandoque naturae, 167. obvia quomodo extrahantur, ib. Quae medicamentis cedant, 167. 168. quae naturae opus desiderent, à natura facilius propelluntur, si vulnera tecta*



# INDEX

- serventur*, 194. quando manuali operatione sint extrahenda, aut quando medicamentis agendum, vel opus naturæ committendum, 169. 170.
- Peregrina corpora quæ medicamenta simplicia attrahant*, 167. quæ composita, 168.
- Periculum in vulneratis est majus & urgentius à pravis succis, quam à sanguinis motu*, quando ob eorum exuperantiam vel malitiam imminet putredo & febris mala, aut raptus eorum ad aliquod membrum princeps, 345.
- Permutationes futurae in vulneribus tam ad bonum, quam ad malum, ex quibus præcognoscantur*, 126.
- Phantasma requiritur ad intellectionem. Vide Intellectio.*
- Pharmacum debet esse proportionatum expurgando succo*, 346. exhibendum à principio antequam putredo accendatur, si ob exuperantes pravy succos febris mali moris immineat, *ibid.* 367. 502. Humores crassos expurgans in vulneratis preparationem supponit, 363. 364. Immutandum pro modo humoris sordisque 145. Pluries exhibendum, ut prohibeatur inflammatio in forti causa, 362. Præmittendumne venæ sectioni, quando utroque auxilio opus fuerit. 329. Quod in uno carnem generat, in alio forsan sordem & saniem producet, & in alio etiam ultra modum siccabit & deterget. 145. Quomodo cognoscatur an magis siccaverit, quam par sit, an parcius. 146. Unum inveniri non potest, quod omne ulcus cavum sanet. 145. Ut purget, non est necessarium, ut à calore ventriculi ad actum reducat, sed satis est, ut à nostro calore alteretur, fundatur, & attenuetur. Hinc quædam extrinsecus admota purgant. 373. *Vide Purgans Medicamentum Medicina.*
- in Pharmaci electione dandum aliquid ætati, tempori, regioni, consuetudini, & naturæ agrotantis.* 368. 370.
- Pharmaca lenientia in materiis biliosis.* 368. Lenientia in materiis pituitosis & melancholicis superfluitatibus. 369. Purgantia laudantur in vulneribus, quæ præterea adstringentem habeant facultatem. 367. Solventia fortiora in materiis biliosis. 368. Solventia leviora in materiis biliosis. *ib.* Solventia fortiora & leviora in pituitosis materiis. *ibid.* 369. Solventia fortiora & leviora in melancholicis materiis. *ibidem.* Solventia in varietate succorum. *ib.*
- Pharmacorum purgantium in usu fugienda effatu digna adstrictio, quando purgamus ob apparatus morbificum.* *ibid.*
- Pharmacis validioribus infortiori causa utendum, si ferant vires, imbecillioribus in leviori.* 367. Variis commixtis resultant varii gradus solventium. 369.

Phar-



# I N D E X

*Pharmacia quæ commoda præstet vulneribus.* 300.

*Pilorum leporinorum vis in sanguine sistendo.* 452.

*Plenitudo in toto existens prohibet quandoque quo minus venam in latere affecto primitus secemus revulsionis gratia.* 317. *Non in inflammatione hepatis.* 318.

*Vulnera prave disponit.* 324. 325. 490.

*Plumbi lamina ad turpes cicatrices.* 595.

*Poros expurgantia si intra corpus assumenda sint, si quædam adstrictio illis sit conjuncta, fortasse melius expurgant: Et præterea viscera corroborant. At si extrinsecus sint apponenda, solam nitrosam qualitatem possideant exactam, opus est.* 155. 156. *Subtiliora iis sunt, quæ sordes in superficie auferunt, sive in cute, sive in ulceribus & emplasticis contraria, nitrosa autem sunt & amara.*

155.

*Potiones vulnerariæ calidæ non exhibeantur, nisi transacto inflammationis periculo, & caute in temporibus, regionibus, & naturis calidis, neque ante totius expurgationem.* 383. *Ex quibus conficiantur* 382. *Non sunt recentiorum inventum sed antiquorum.* 387. *Quando, & quæ à principio usurpandæ* 383. *Varia ibid. &c.*

*Potionum vulnerariarum in usu quæ animadvertenda ibid.*

*Potus conveniens in fluxu sanguinis è vulnere.* 467. *Qui vulneratis conveniat.*

399. *Vulneratis obesse potest substantia, qualitate, & quantitate.* ibid.

*in Potu quæ cavenda vulneratis.* ibid.

*Præcipitatum egregie superfluam carnem in vulneribus detrahit.* 506.

*Præsagia convulsions, quæ vulnere supervenit.* 581. *Delirii.* 546. *Inflammationis.* 488. *Resolutionis.* 560. *Syncopes & animi deliquii.* 529. *Vulneratorum ex febre.* Vide, *Febris.*

*Præsagiorum utilitas in facienda medicina.* 21. I. D.

*Præsagire volenti in vulneribus quæ sint consideranda* 68. *Tria sunt prænoscentia:*

*Primum, num partes omnes similiares ex sui natura unionem admittant, sitque idem in omnibus unionis modus, & num omnes ejusmodi sint, ut, si portio ipsarum fuerit deperdita, regenerari possit. Secundum, num oblatum vulnus sit sanabile vel insanabile, & si sanabile num facilis, & prompta, an difficilis futura sit sanatio, & an inculpata sanitas sit expectanda, an potius cum alicujus functionis dispendio. Tertium, brevene an longum post tempus futura sit sanitas: si verò insanabile, num ad mortem sit terminandum, an ad ulcus incurabile, & si ad mortem, quando & quomodo sit secutura. Postremum,*



# I N D E X

- quæ permutationes futuræ sint in vulneribus tam ad bonum quam ad malum. 69. 70.
- Præsidium si in usum sit revocandum, adesse oportet, quod illud indicet, abesse, quod prohibeat. 321.
- Præsidia debent esse morbis equalia. 346.
- Præstantia communis, & novæ Methodi. Vide Methodus.
- Præstantior est judicandus, qui idem opus facilius, & minori cum labore perficit. 248.
- Principium est viribus maximum, & quæ in principio latent, sunt propemodum infinita. 287.
- Profunditas vulneris indicari debet habito respectu ad partem. 96.
- Profundo vulnere non adnectitur magnitudo ratione facultatis, nisi propter facultatis imbecillitatem aut dignitatem partis affectæ. ibid.
- Pueris, ubi septimum annum attigerint, potest tuto secari vena. 306.
- Pulmonis vulnera sunt lethalia. 100. Sunt magna ratione dignitatis. 97.
- Pulvis abstergens sordes malas. 504. Ad cohibendam putredinem in vulneribus. 506. Sarcoticus. 424.
- Puncta in vulnere ut injicienda, quando consuuntur labia. 410. Quando scindenda. 421.
- Purgandum est in vulnerato, quando periculum fluxionis imminet, & ita quam primum. 360. Etiam ex Galeno ibid. Et ex Hippocrate. 361.
- Purgante exhibito necessarium est minorem reddere materiam etiam præsentente febre, si pravorum succorum tanta sit copia, ut vereamur, ne succumbat, aut deficiat natura ante eorum coctionem, vel ea sit succorum malitia, ut naturæ gratiam recipere nequeant, quo natura possit facilius, quod reliquum est, evincere, atque à putredine præservare. 364.
- Purgantia fortiora conveniunt, ubi majus est inflammationis seu fluxionis periculum, ejusque lethalis. 346. In leviori periculo tenuiora conveniunt. 347. Num purgent attrahendo. 343.
- Purgatio convenit post venæ sectionem, quando vehementi pharmaco uti propositum est, & quando majus, & urgentius periculum imminet ex motu sanguinis, quam ex pravitate succorum à sanguine diversorum: At si majus ab his imminet periculum, ante venæ sectionem, 365. 366. Est evacuatio humorum qualitate peccantium. 342. Est remedium succorum, non vulneris. 353. In fluxionibus articularibus cur non competat. 358. In omnibus vulneribus non potest esse remedium revellens; non enim revellit in vulneribus partium naturalium,



## I N D E X

*um*, sed potius est fluxionis causa. 355. In vulneratis febricitantibus cautè instituenda. 522. In vulneribus competit ob apparatus morbificum. 356. Instituitur non solum evacuationis gratia, sed & revellendi, ex Galeno & Hippocrate. 344. Parum valet, vel potius obest, in sanguinis profluvio, nisi sanguis fluat ob tenuitatem illi præstitam à permixtione calidorum & tenuium succorum 464. Pravos succos evacuat aut per superiorem, aut per inferiorem ventrem, & ad partes naturales revellit. 344. Tantum locum habet in vulneribus magnis. 346. Vulneratis competit ex Hippocrate & Galeno, etiam seligenti pharmaco facta. 343. 344. Vulneratis competit etiam in principio. 359. Vulneratis non competit, nisi sint vitiosi succi in corpore. 353.

*Pus* excrementum vulnerum, & quomodo generetur. 202. Fit optimum superante integrè natura. 158. Generatur etiam ex partibus 203. In vulnere non exigit crebram solutionem. 281. Neque à solo calore secundum naturam neque à solo præter naturam fit, sed ab utroque mixtis 158. Præter naturam quomodo generetur 160. 161. Ut fiat. 158.

*Puris* consistentia media est inter sordem & saniem, & cur aliquando crassum & viscidum fiat. 203.

*Pus* moventia. Vide suppurantia. Suppressum esse quomodo cognoscatur, dum vulnus est tectum. 239.

*Putredo* fit natura superata, quando scilicet vis cognoscendi imbecillis facta est, ut nullam amplius facere possit in putrescente superfluitate optimam transmutationem, vel quia humor est vitiatus, etiamsi vis ipsa non sit omnino imbecillis, vel quia vis ad ultimum imbecillitatis pervenit, etiamsi humor non sit maximè vitiatus. 57. In vulneribus ut corrigatur. 502.

*Putredinis*, & corruptionis in vulneribus causa. 501. Quæ febris est causa, procuratio. 521.

*Putredinem* & corruptionem quæ cohibeant. 505. Sistentiam tam qualitatibus manifestis, quam à tota substantia, tam simplicia, quam composita. 503. &c. Superpervenisse quomodo innotescat, dum vulnus tegitur. 240.

Q.

**Q**uestiones præcipuæ totam medendi vulneribus methodum exposcunt. 26.

*Quæstus* est minor ex nova Methodo, uberior ex communi. 248.

*Qualitas* animalis in parte cur deficiat. 552.

(E) 3

Quan-



# I N D E X

*Quantum agendum in venæ sectione unde desumendum. 330.*

*Quercetanus cognovit indicationem, quæ à naturali calore desumi debet in curatione vulnerum. 215.*

*Quies, & præsertim vulneratæ partis, imperanda vulneratis. 389.*

## R.

**R**editudo quid sit. 316. Duplex est. 319. Servanda in venæ sectione, quæ sit revulsione gratia. 312. 319.

Refrigerantia fortiora conveniunt tam in erysipellate, quam in inflammatione. 500. Qua ratione repellunt 474. Repellendi vim habent. 473. 474. Si simul adstringant magis repellunt. *ibid.*

Regeneratio carnis est opus naturæ, non medicamentorum. 141. Vide Carnis regeneratio.

Remedium magnum competit magno morbo. 352. 353. Vide Presidium.

Rerum vulnera lethalia. 99.

Repellit quod adstringit, non tamen si violenter adstringat; cogendo enim & exasperando partem, potius erit in causa attractionis. 475. 476.

Repellentia actu frigida in vulnere hepatis, ventriculi, & nervorum fugienda. 477.

Adhibenda post vulneris procurationem. 420. Dum in partem agunt per accidens repellunt; at quæ refrigerant, dum calidæ materiæ repellendæ gratia adhibentur, etiam per se agunt. 474--475. Frigida omnia actu tempore frigido fugienda 477. In ore, quæ sunt ingrati saporis, fugienda, *ibid.* In partibus internis, quæ vim habent corruptivam & deleteriam, vel aliam adversam, vitanda. *ibidem.* In sanguinis profluvio è vulnere conveniunt. 450. Leviora & fortiora. 449. 450. Non sunt citra discrimen usurpanda, sed varianda pro varietate partium. 452. 476. Opportuna in sanguinis profluvio. 461. Prohibentur, à dolore, ab actione partis, quæ ab eorum qualitate offenditur, ab imbecillitate partis, à materia existente intra partem, cui adhibentur, & profundam vulneratam, à conformatione partis aliquo modo, seu fortiora. 476. Sunt assidue admovenda in magno fluxionis periculo. 477. Valde adstringentia, & acria, ac mordacia, fugienda sunt in oculis, sed lenientia conveniunt. *ibid.* Validiora conveniunt in majoris momenti fluxione, & in majori fluxionis periculo. 475.

Repellentium rectus usus. *ibid.* Usu retrocedunt humores, quando cogitur, densa-



# I N D E X

- tur & adstringitur pars, & ita exprimitur contenta materia, & robur imper-  
titur facultati, quo fit, ut quæ transmittuntur, aliò impellat. 474.*
- Repellentibus cedit materia in principio, quia pauca est, non crassa valde, neque  
impacta, & virtus membri fortior, non autem in vigore. 474. Parte existen-  
te profunda ac densa, permiscenda sunt ea quæ tenuium sunt partium, ut vi-  
cem gerant vehiculi. 476.*
- Repellentibus etiam à principio uti possumus, ubi sanguis profluit à vasis in super-  
ficie positis, at si à profundioribus partibus erumpat, revulsiones præcedant,  
oportet. 461.*
- Resolutio est ablatio sensus aut motus, aut utriusque ob defectum qualitatis anima-  
lis in parte. 552. Non est ex se lethalis affectio, sed tamen lethalis affectionis  
signum esse potest. 560. Quæ curabilis sit, & quæ curationem non admittat.  
ibid. Quæ sit signum lethalis affectionis. ibid. Quid importet. 551.*
- Resolutionis causæ. 552. Causarum signa. ibid. Curatio. 561. Differentiæ. 557.  
Ex inflammatione curatio. 562. Ex materia crassa & viscida curatio. ibid.  
Ex materia purulenta curatio. ibid. Præsentia. 560.*
- in Resolutione cur aliquando lædatur sensus tantum, aliquando motus tantum, ali-  
quando sensus & motus simul. 553. &c. Cur magis resolvatur una pars  
quam altera 557. Ex materia crassa & viscida topica. 563. Mala signa sunt,  
nimis extenuari aut contabescere resolutas partes, vel earum colorem immutari.  
561.*
- Resolutiones cur accidant inferioribus partibus, illæsis superioribus. 558. Quomodo  
accidant in vulneribus. ibid.*
- Resolutis partibus tremor accidens bonum, causam enim resolutionis imminui, &  
alicui influxui locum dari significat. 561.*
- Revellunt cucurbitulæ non scarificatæ, frictiones asperæ, vincula, sinapismi, vesican-  
tia, inustiones, & hujusmodi. 337. &c. Purgationes. 344. Venæ sectio, hi-  
rudines, scarificationes. Vide suis locis.*
- Revellendi rationem quomodo invenerint Medici. 172. 179.*
- Revellendum primo, deinde derivandum. 330.*
- Revellentia cur revellant. 173. 174. Cum evacuatione sensibili, & citra evacua-  
tionem sensibilem. 462. Non sint citra discrimen usurpanda. 171. 172.  
Præsidia. 181. Quæ citra evacuationem sensibilem operam suam præstant, etsi  
minus viribus officiant, non est tamen negandum, quin & aliquid detrimenti  
inferant, cum & insensibiliter evacuent, & plura dolorem inferant. 340.*

*Revel-*



# INDEX

- Revellentium cum & citra evacuationem sensibilem usus* 462. &c. *Usum aliquando intermittere oportet, etiamsi humores influant, & cur.* 181. 182.
- Revulsio quid.* 172. *Cur non semper fiat ad maxime longinqua & remota.* 176. *Cur rectitudinem requirat.* 177. *Debetur confluentibus aut confluxuris succis, non confluxis.* 173. *Debetur humoribus, qui vehementiori impetu & copiosè influunt.* 321. *Est medela fluentium humorum.* 324. *Et derivatio est remedium cujuslibet immodicæ evacuationis.* 326. *Fit ad contraria & remota.* 176. *Fit aut per sensibilem evacuationem, aut citra eam.* 462. *Fluxionum remedium est.* 171. *Futura est efficacior, si partitis vicibus extrahatur sanguis.* 330. *Non competit humoribus reluctantibus, sed obsequentibus.* 357. *Non semper fit ad fluxionis originem.* 176. *Particularis quæ.* 179. 325. *Præcautionem importat illius nomen.* 174. *Quæ fit ope cucurbitularum scarificatarum maximi momenti æstimanda est.* 335. *Quæ fit per hirudines est imbecilior ea, quæ fit per venæ sectionem & scarificatas cucurbitulas.* 334. 335.
- Revulsione finis.* 180. *Gratia si vena secetur, quam primum secanda.* 329.
- in Revulsione particulari singularis quedam oppositio, & longinquitas, & rectitudo servanda.* 327. 328. *Quæ fit per venæ sectionem, non satis est motum sanguinis ad partem remotam & contrariam concitare, sed insuper necessarium est, ut hic motus sit talis, ut vis ejus opportune ad eam partem perveniat, à qua timebamus motum sanguinis ad affectum locum, ac talis sit, ut sufficiat ad prohibendum ad eam motum.* 313. *Quid metiatur longinquitatem.* 138. *Quid præscribat contrarietatem.* 141. 181.
- Revulsoria evacuatio quæ.* 316.
- Revulsorium remedium quomodo indicetur & à sanguine, & à positu partis.* 319.
- Rhabarbarum maximè laudatur in vulneribus.* 370.
- Rhyptica quæ.* 155.

S.

**S**anguis ab arteria profluens, ut suppressendus; Si arteria non sit penitus dissecta, statim recidenda est penitus, facta tamen prius deligatione ad arteriæ radicem, aut deliganda versus radicem. 456. A vulnere profluens non illico sistendus, nisi tantum ejus fluxerit, quantum satis est ex se ad tollendum inflammationis periculum. 401. *Cur à venis sectis egrediatur.* 441. 442. *Difficilius*



# I N D E X

lius sistitur, si per longum dividatur arteria, quam si per transversum. 444. Eget multis transmutationibus, ut fiat nervus, aut membrana, vel os, facillimè verò fit caro. 79. 80. Ineptus redditur ad motum, si refrigeretur & incrassetur, 446. In revulsione ad eam partem remotam & contrariam attrahendus, ad quam si moveatur sanguis celeriter, & citra virium dispendium insigne ad mittentem partem possit motus consecutio pervenire. 313. Nec non & pus in modica quantitate potest sub cranio contineri aliquo tempore, præterquam quod febrem & alia prava symptomata concitet. 93. Non est immediatum alimentum seminalium partium, sed semen; & proinde oportet, ut in semen vertatur, si ex eo nutrienda sint. 78. Num à vena, an ab arteria profluat. 442. Tenuis, flavus, clarus, spumofus, feruens, & quasi saliendo egrediens, provenit ab arteria: Crassus verò, minus calidus, & ad atrum vergens, & sine pulsû, à vena. *ibid.*

Sanguinis detrahendi quantitas uti innotescat, considerata est quantitas vulneris, & natura ac status vulnerati. 308. Extrahendi quantitatem id, cujus gratia venam secamus, facile demonstrabit. 307. Immutatio expectanda est, quando insignis inflammatio in aliqua parte cæperit, & venam secuerimus è directo, cum qua aperiantur venæ partis, modo vires perferant. 310. Missio: Vide Venæ sectio Missio in quot vices partiri debeat, & quantum sanguinis pro qualibet vice extrahendum. 332. 333. Missio revulsione gratia partienda. 330. Motus ad contraria & remota qualis esse debeat. 313. Motus & inclinatio convertendus est non versus proximam, sed versus remotam & contrariam. 312. Motus retrahitur, si revellatur vel derivetur. 446. Profluvium cohibet potissimum venæ sectio; quæ tamen partitis vicibus fieri debet. 463. Profluvium cohibent repellentia. 461. Profluvium cohibent narcotica & animi deliquium. 465. Profluvium ex alto beneficium recipit potissimum ex revellentibus & derivantibus, & iis, quæ sanguinem ineptum reddunt ad motum. 462. Profluvium ex arteria periculosius quam ex vena. 444. Profluvium ex erosione putrescentis alicujus supprimitur utiliter crustificis medicamentis & ferramentis ignitis, sed potissimum ferramentis ignitis. 458. Profluvium futurum quæ significant. 442. Profluvium quæ cohibeant à totius substantiæ proprietate. 468. Profluvium quando urget in recentibus vulneribus, omnes modi, quibus supprimi solet sanguis, accurate perpendantur, isque deligetur, qui tutior videbitur, neque ullus respuatur necessitatis tempore. 456. 457. Profluvium vires prosternens, & affectioni officiens, rationem causæ induit. 444. Profluvii è vulnere differentia.



# I N D E X

441. Profluvii præfagia. 443. Profluvii remedia. 449. &c. Profluvii sistendi capita. 445. Suppressio, quæ fit ope escharæ, mediante igne, vel caustico medicamento, parum tuta est; nisi enim caro generetur ad vasis osculum ante casum escharæ, patebit magis os vasis. 457. Tantum detrahendum, quantum vires possunt perferre. 308. 309. Venarum suppressiones faciunt animi deliquium, figura alterata, alia interceptio, linamentum insertum, appositio, deligatio. 448.
- ad Sanguinis profluvium quæ requirantur. 444.
- in Sanguinis profluvio imposita medicamenta non sunt auferenda ante tertium diem. 454. Imposita medicamenta quomodo detrahenda. ib. Quomodo utendum medicamentis sanguinem supprimentibus. 452. Versus vasis radicem ducenda est deligatio: nec sit adeo arcta, ut inferat dolorem, quæ quatuor aut quinque circumvolutionibus fieri debet supra ipsum vas dissectum. ibid. 453.
- Sanguinem effluere, aut intra cavitatem aliquam contineri seu colligi, quæ significant 442. Ineptum quæ reddant refrigerando & incrassando. 465.
- Sanitas quando expectanda sit integra, & quando vitata per vulnera. 107. &c. Quando expectanda tardius, quando citius. 110. 111. Vide Vulnus. Summa non datur. 354.
- Sanitatis futuræ determinatum tempus cognoscet ad amussim qui in operibus naturæ optimè fuerit versatus. 113.
- Sarcoticum, ut habeamus quam siccans esse debeat, ægri, partisque naturæ est considerata, & ulcerum diversitas. 145.
- Sarcotica ad carnis productionem primariò non conferunt. 143. Debent esse paulo calidiora ipsa carne, quo sanguinem attrahant. 152. Modicè siccant & detergant, ita ut sint primi ordinis. 145. Quorum usus est in cavis vulneribus post abstersionem. 424. 425. Siccantia sunt & detergentia. 144. 145. Sicciora & validiora conveniunt in siccioribus & valentioribus; mitiora in humidioribus, & imbecillioribus. ibid. Simplicia & composita. 150. 151. Superfluum tantum humiditatem debent absumere, nequaquam affluentem sanguinem. 145.
- Scarificationes leves & superficiales nullam præstant revulsionem: longæ & profundæ, sicuti copiose sanguinem evacuant, ita vehementer revellunt. 336. Mediores inter utrasque mediæ sunt. ibid. Quibus partibus adhibendæ ibid. Simplices minus revellunt, quam ubi facta scarificatione admoventur cucurbitula. 336.
- Scarificationum usus in inflammatione. 492.



# I N D E X

- Semen etsi generetur in omnibus seminalibus partibus, prolificum tamen solummodo generatur in partibus generationi dicatis.* 78. 79.
- Seminalium partium deperditarum regeneratio in adultis non fit.* 80. 81. *In pueris fit aliquando, si videlicet deficiat aliqua portio partium molliorum.* 88.
- Septica.* 509.
- Signa variorum affectuum. Vide in propriis notis. Vulnerata partis unde haurienda, quando pars latet.* 66.
- Sinapismi ex quibus parentur.* 338. *Revellunt calefaciendo, doloremque inferendo.* *ibid.*
- Situs conveniens vulneratae partis est, qui doloris est expers, & in quo vulneris orificium saltem secundum aliquam sui partem deorsum vergit.* 420. *Vulneris maximam vim habet indicandi partem vulneratam.* 67.
- Solvitur vulnus propter complicatum affectum.* 233. &c.
- Solutio continui, ut talis, specificas indicationes non subministrat.* 134. 135.
- Solutio crebra non est necessaria ad cognitionem status vulneris.* 283. *Crebra quaedam afferrat. Quantum facit ad ostentandam diligentiam, tantum, & amplius, rebus egrotantis officit.* 213. *In fluxu sanguinis ad tertium diem protrahenda.* 454. *In simplici vulnere differenda usque ad perfectam agglutinationem.* 233. 234. *In vulneribus cavis quousque protrahenda.* 430. *Rara laudatur à Galeno pro cicatricis inductione.* 213. *Et ab Avicenna.* *ibid.*
- Solutionis prima tempus in cavis vulneribus est, quando vulnus carne repletum est.* 234. *Raræ auctores, quomodo eam invenerint.* 251. &c. *Tempus in omnibus vulneribus unde habeatur.* 234. *Tempus non est unum & idem in omnibus vulneribus.* 233.
- Solutionem crebram non postulant vulneribus excrementa* 273. *Exigentium affectuum signa.* 234. &c. *Postulat abscessus superveniens: caro supercrescens: Dolor vehemens: Erosio & ingens pruritus: Erratum in paranda subfluxione commissum: Foetor: Gangræna & sphacelus: inflammatio partis: Ingens putredo & sordities: Nimia caloris imbecillitas: Ossa fracta non probe coaptata: Purulenta materiae suppressio, nisi supprimatur ab apposis linteis: Retentum peregrinum corpusculum, quod primis diebus extrahi non potuit, & sine manuali operatione, aut medicamentorum ope extrahi non potest: Sanguinis profluvium: Superflua humiditas ubi vulnus carne repletum est.* 235. &c.
- Raram cur adhibuerit Hippocrates luxationibus cum ulcere.* 272.



# I N D E X

- ad* Solutionem indicandam magis possunt ea, quibus sine manuali operatione succurri non potest, & tamen nisi eis quam primum succurratur, magnum quodpiam malum minantur; aut nisi ipsis consulatur, impedimento sunt, ne optatum finem consequamur. 234.
- in* Solutione crebra plerumque aufertur medicamentum priusquam operationem perfecerit, imò sepe ubi vix ad actum à natura deductum fuerit. 213.
- Sordes copiosæ & malæ in vulneribus unde proveniant. 501. Quibus abstergantur. 503. Quibus auferendæ. 505. 506.
- Spasmus cynicus quid 577. Non proportionatus ad materiam, Avicenna, quid sit. 566.
- Spinalis medulla, licet primo aspectu unius rationis esse videatur, revera tamen est veluti capillorum acervus indistinctus ad sensum. 558. 559.
- Spinalis medullæ vulnera lethalia. 99.
- Spiritus vitalis ad omnes partes transmissus suo vivifico calore eas reddit idoneas ad proprias functiones, dum symmetriam innati caloris conservat, eundemque fovet ac roborat. 524.
- Spiritu vitali deficiente in partibus repente concidunt functiones animales omnes. *ibid.*
- Spiritus animales quomodo reddantur calidiores quam par sit. 537. Animales quomodo reddantur crassi, quomodo inordinati in motu, quomodo tenebricosi, *ibi.* Vitales cur deficiant in partibus. 532.
- Spirituum animalium dispositio requisita ad principes functiones. 537.
- Stercus asininum & equinum sanguinem supprimit. 468.
- Strabismus est convulsio musculorum oculi. 577.
- Stupata cum ovi albumine in vulneribus reprobantur. 427.
- Sudores cur frigidi erumpant in syncope & animi deliquio. 527.
- Suendi vulnera ratio. 409.
- Sui non possunt tendines. 411. Possunt membranæ, & muscoli. *ibid.*
- Subfluxio, ut rectè paretur, acre iudicium in Medico requirit. 210. Ut rectè paretur, quæ sint à Medico consideranda. *ibid.*
- Suffluxionis necessitas in vulneribus. 425.
- Suffumigia ad aëris vitium corrigendum. 503.
- Supercrescens caro medicamentis detrahatur, quæ vehementer siccent. 508.
- Supercrescentem carnem absumentia fortiora. 509. Leviora. *ibid.*



## I N D E X

*in Supercrescente carne medicamenta mitiora esse debent in mollioribus corporibus, fortiora in valentioribus, in majori humiditatis copia fortiora, ut aliquando ad ea, quæ ignis vires habent, & ad novaculam confugere oporteat.* 508.

*Superflua caro morbus in aucta magnitudine.* 507. *Quandoque in numero aucto.* ibid.

*Suppurantia alia per se, alia per accidens ad suppurationem faciunt.* 160. *Calida sunt & humida, sed hæc caliditas & humiditas non dicit excessum supra naturam nostram, sed similitudinem.* 161. *Cujusque hominis sigillatim sua sunt ac propria.* 164. *Cur aliquando calida & humida appellentur, aliquando temperata.* 162. *Emplastica sunt.* 163. *Etiam si calida sint, non ob id tamen possunt calorem intendere; ita etsi sint humida, non ob id possunt augere similium partium humiditatem, quamvis ut calida & humida superfluam quandam humiditatem in spatiis vacuis contentam attenuare possint ac digerere,* 162. *in vulneribus cavis cum contusione, & attritione carnis,* 431. *per accidens,* 166. *proprie dicta non ob id talia dicuntur, quia revera pus generent, sed quia suppurationem adjuvant opem ferendo naturali calori,* 169. *Similia sunt naturali calori, ibi. Simplicia, & composita,* 165.

*Suppuratio est in pus mutatio,* 157. *est media alteratio inter eam, quæ omnino est secundum naturam, cujus finis est nutritio corporis, & eam, quæ omnino est præter naturam, cujus finis est putredo, ibid. est putredo aliquid in se continens coctionis,* 157. *unum ex operibus naturæ, nam & illic perficitur quedam coctio, ibid. Fit à naturali calore non planè vincente, quia nec ex materia, quæ prorsus sit benigna,* 158.

*Suppurationem quæ promoveant,* 160. 165. 166. *Ut promoveat naturalis calor, postulat, ut ejus substantia augeatur absque qualitatis intensiōe, aut imminutione.* 163.

*in Suppuratione calor naturalis vincit extraneum, sed non habet integram victoriam supra materiam,* 158.

*Sutura conservans adducta labia vulneris,* 407. *Facienda est, quando vulnus est recens & sanguinolentum & labia non evasere rigida,* 412. *Neque nimis rara neque nimis crebra esse debet,* 410. *Pellionum,* 412. *Supprimit fluentem sanguinem, si vulnus sit absque deperditione substantiæ, saltem effatu dignæ, potissimum sutura pellionum,* 455.

*Suturæ diversitas,* 407. *Frequentissimus usus. ibid. Vicem gerit gluten quoddam præstantissimum,* 414.



## I N D E X

*Sutura peracta quid agendum, 417.*

*in Sutura altius defigi acus debet, 455. Quando scindenda puncta, ibid.*

*Syncope quid, 524. Cur fiat in vulneribus, 527. Est gravior affectus animi deliquio, 529. est princeps virium lapsus ex defectu vitalis caloris in partibus subito contingente, 524. ex superflua sanguinis profusione lethalis, 530. propter fluxum materiae biliosae ad os ventriculi in vulnere hepatis, ventriculi, & intestinorum, valde periculosa, ibi. Propter solutionem continui in corde lethalis penitus; cui proxima est, quæ fit à venenata causa; & huic, quæ ex corruptione partis, ibi. Quando omnino lethalis, 529. semper periculosa, ib. Via est ad mortem, ib.*

*Syncopes causa, 525. ex animi affectu curatio, 536. ex dolore curatio, 535. ex fluxu materiae biliosae ad os ventriculi curatio, ibid. ex nimia corporis dissolutione curatio, 533. ex putridis, pravis & malignis vaporibus à parte vulnerata ad cor elevatis curatio, 534. ex superfluo sanguinis fluxu curatio, 532. ex veneno, 535. Indicationes curativæ, 530. &c. magnitudinis ratione dignitatis partis signa, 528. magnitudinis ratione facultatis signa. 529. magnitudinis ratione propriæ essentiae signa, ibid. Prasagia, ibid.*

*Syncope correpti quomodo revocandi, 532.*

*in Syncope omni fit aggregatio quædam spirituum vitalium in corde, 527.*

*Syrupi convenientes pro inhibenda fluxione, 375. 472.*

## T.

**T**egumentum aptum ad conservandum, & roborandum naturalem calorem, est, quod partes proprio & naturali tegumine destitutas ab injuriis ambientis defendit, calorisque evaporationem ac dissolutionem prohibet, ipsumque fovet, ne noxam effatu dignam inferre possit, 219. ex qua materia conficiatur, ibi. majorem affert utilitatem quam medicamento, 281. Non supprimit fuliginosa excrementa, 280. quando auferendum, 233. &c. quas utilitates prabeat ex Galeno, 213.

*Tegumentum aptum quodnam medicamentum perficiat, 220.*

*in Tegumento apto præparando quæ consideranda, 219.*

*Telum intra vulnus existens ex quo deducatur extrahendum esse, 130. inter internas causas videtur connumerandum, ibi.*



# I N D E X

*Temperamentum accidentale* quid, 42. est *essentia facultatum*, 40. *Hominis* est quodpiam corporis nostri partibus inexistens, quatenus etiam sunt *viventes*, 44. non est *harmonia*, aus *concentus*, 43. non est *mistio calidi*, *frigidi*, *humidi* & *sicci*, *ibid.* Non est *prima operationum causa*, sed *anima*, *temperamentum* verò idcirco dicitur *operationum causa*, quod per ipsum partes evadant idoneum *instrumentum animæ pro actionibus obeundis*, 44. *partis* quomodo ledatur à *vulnere*, 48. *partium*, ut *viventes* sunt, & quod est proprium *hominis temperamentum*, ex *elementali temperamento*, & *innato ac influente calore* constituitur, 47. proprium *hominis* non est *quinta illa qualitas ex elementorum miscela resultans*, sed quod est *causa operationum vitæ*, 44.

*Temperamenti essentia.* Vide *Calor*, *Facultas*. *Prima causa* sunt *calidum frigidum*, *humidum*, & *siccum*, *ratio* verò *officiendi* est *ipsarum primarum qualitatum proportio*, 43.

*Temperatura carnis* est, quæ *agglutinat* & *carnem generat*, 142.

*Tempus* non *indicat*, 128.

*Tempus determinatum futuræ salutis* ad *amissum cognoscit*, qui in *operibus naturæ* probè fuerit *versatus*, 113. *futuræ mortis*, quæ *significent*, 114. Vide *vulnus*. *Futuræ salutis* & *mortis differentia vulneris ostendet*, & quæ cum *vulnere* *complicantur*; quibus *addenda* est *consideratio corporis*, *ætatis*, *temporis*, *regionis*, *consuetudinis*, & *hujusmodi*, 114.

*Tendines* non debent *consui*, ob idque si *carnosa pars musculi tendine dilatato* *contegatur*, *denudandus* est *musculus à tendine*, *solaque carnosa pars musculi consuenda*, 411.

*Tetanos*, 377.

*Tetani signa*, 580.

*Timor* quomodo *incutiatur artis opera*, 466. *Sanguinem fluentem* *supprimit*, *ibid.*

*Thoracis penetrantia vulnera periculosa*, 100.

*Transmissio materiæ* cur non semper fiat ad *vulneratam partem*, 105.

*Transmissionis causæ*, 56.

*Transmittentes partes* unde habeant *superflua*, quæ *transmittant*, 59.

*Transmittunt partes* à *copia materiæ oppressæ*, vel à *qualitate irritatæ*, *ibid.*

*Tremor* ex *duplici motu constat*, altero *proficiscente ab innata membri gravitate deorsum trahente*; altero verò à *facultate sursum attollente*, 561.

*Tumor apparens in vulneribus pravis bonum*, 101. *Non apparens*, *malum*, *ibidi*



# I N D E X

Si repente citra manifestam causam delitescat, malum, *ibid.* Si summas tantum partes occupet, bonum; at si simul etiam penitiores, malum, 102.

Tumorem non apparere, vel repente delitescere non est semper malum, quando enim iusta de causa id accidit, puta, quia ob evacuationes sublata sit materia tumoris, non est malum: aut quia materia retrocedens in aliquam aliam externam & ignobiliorem feratur partem. 105. Quæ mala sequantur. *ibid.* &c.

Tumores crudi, mali. 106. Molles, boni. *ibid.*

Turbamentum accidens in corpore vulnerati occasione vulneris. 121. Vide vulnus.

Turunda quid 289. Conveniunt in vulneribus quando remorari eorum sanationem oporteat. 293. Curationem protrahunt. 296. In octo casibus conveniunt. 289. Non conveniunt in vulneribus, ut servant orificium adaperitum. *ibid.* Quæ imponuntur ut medicamentum recipiant, ex qua materia constent. 290. Quæ imponuntur, ut servant os vulneris patens ex qua materia fiant. 289. Quæ imponuntur, ut vulnus dilatent, ex quibus fiant. 290. Quæ damna afferant. 293. Reprobantur ab Hippocrate. *ibid.*

Turundarum & penicillorum in usu Galenus varius. 294. usus in vulneribus triplex: primo enim vulneris orificium hians conservant: secundo amplius reddunt: Tertio eorum ope medicamenta melius hærent parietibus vulneris. 289. Usus non est necessarius neque utilis in curatione vulnerum, præterquam ubi necessaria est aliqua manualis operatio, quæ amplitudinem vulneris requirat. 290.

## V.

**V**Acuum an attrahat. 56. Non attrahit. *ibid.* 339.

Vas recidendum sistendi profluvii sanguinis gratia, sed prius deligandum saltem versus radices, & quomodo deligetur. 456.

Vasis disrupti os quomodo claudatur, ut supprimatur fluens sanguis. 447. Radix quæ dicenda. 455.

Vena quæ primum secanda in vulneribus 328--330. Quæ secatur revulsionis gratia, habere debet communionem proximam cum mittente parte. 312. Quando secanda derivationis gratia. 330. Secanda materia partim fluit, partim quiescit, partim influxit. 322. Secanda, quando materia partim fluit, sed quæ influxit parvum, aut nullum faceffit negotium 314. Secanda, quando materia partim influit, partim influxit, sed quæ influxit negotium faceffit. *ibid.* Secanda,



# I N D E X

canda, quando non adhuc influxit humor, sed tamen fluxurus est. 312. Secatur κατ' ἰξιν, seu per directum in gratiam affectæ partis, ut videlicet ab ea fiat evacuatio. 318.

Venæ sectio κατ' ἰξιν facta quæ dicat. 316. Competit in vulneribus ex Galeno & Hippocrate. 302. Derivationis gratia. 326. Fluxionem inhibet. 463. 300—302. Immediate sanguinis impetum convertit ad partem, in qua secatur vena. ibid. In vulnere indicatur à sanguinis vitio, hoc est, vel à motu sanguinis, vel à propensione ipsius ad motum. 312. In vulnerato non convenit aut propter ætatem, aut propter penuriam boni sanguinis. 306. 307. In vulneratis est materia remedii sanguinis impetum ad aliam partem à vulnerata convertentis. 312. Non convenit, quando tantum sanguinis effluxit è vulnere, ut sublata sit fluxionis & inflammationis materia. 303. Partienda est in plures vices. 330. 463. Plerumque præmittenda est pharmaco etiam lenienti. 366. Pluribus nominibus competit vulneratis ut inflammatio prohibeatur. 302. Principem locum obtinet inter præsidia, quæ inflammationem prohibent. 300. Quæ in gratiam tantum evacuationis alicujus partis administratur, sæpe totius expurgationem præsupponit. 367. Quando facienda usque ad immutationem coloris sanguinis. 309. Quibus nominibus conferat ad sistendam & prohibendam fluxionem. 300. &c. quo vulnus est periculosius, eo magis acceleranda, ut in magno fluxionis lethalis periculo, neque fœcum, neque cibi in ventriculo existentis habenda sit ratio, 471. quoniam evacuat sanguinem, atque ita viribus officit, fieri debet in parte, in qua majorem utilitatem, & minus damni secuturum cognoscamus, 325. Rectitudinem exposcit, 319. Revulsionis gratia in quot vices partiri debeat, 332. Revulsionis gratia partienda, 330. Revulsionis particularis gratia facta postulat singularem quandam oppositionem, longinquitatem, rectitudinem, 327. 328. sanguinis profluvium cohibet, sed fieri debet in parte remota & contraria, 463.

Venæ sectionis iteratio ad agendi modum pertinet, 331. iteratio quando facienda, 332.

Venæ sectionem in eodem latere revellendi gratia interdum prohibet plenitudo totius, 317. Imbecillitas sola virtutis prohibet, 307. Integram ætas prohibet, 305. 306. Integram non tolerant pueri ex Galeno, ibid. Interdum neque fœces neque mox ingestus cibus prohibet. 329. Nullam tolerant valde parvi pueri, 306.



# I N D E X

Perferunt pueri, ubi septimum annum attigerint, item firmus puer, robustus senex, & gravida mulier valens, *ibid.* Prohibentia, 305. quid indicet in vulneribus, 304.

in Vena sectione ita res moderanda est, ne revulsioni exquisitæ nimis intendentes permittamus partem ex ingruente fluxione nimis repleri, aut nimis de affecta parte solliciti, ob idque nimis ejus evacuationi studentes ipsam magis repleamus, 325. Iterata quantum sanguinis extrahendum pro qualibet vice, 333. 334. Meræ derivationis gratia hoc tantum respicimus, ut vena secetur proxima, quæ possit partem affectam, hoc est, materiam nondum impactam, evacuare, 328. quæ sint considerata antequam fiat, 307. quantum agendum undenam sumendum, 330. 331.

Venam secamus, quando revellendi gratia id facimus, ut impetum sanguinis coercamus, ne videlicet vulneratam partem petat, mediante altero motu, quem ipsi sanguini tribuimus, 312. Secuit Galenus septuagenario, 306.

Vena cubiti plerumque sunt secandæ in sanguinis profusionibus, nisi ipsa brachia sint vulnerata, 463. Deperditæ, an regenerentur, 82. magnæ, non dissectæ penitus, quando alioquin parum proficiunt, sunt penitus resecandæ, ut sistatur fluens sanguis, 456. Parvæ an magnæ sint secandæ revulsione gratia. 317. 318. quæ potissimum sint recidendæ, 456. 457.

Venarum communio. Vide Communio. Crassarum vulnera lethalia, 99. Jugalium vulnera magna, 97.

Veneni proprium est cor petere, & innatum ejus calorem spiritusque vitales demoliri; sed alios quoque effectus posse producere, nihil prohibet, 540.

Ventriculi vulnera lethalia, 98.

Ventriculo altero anteriorum cerebri vulneratus adolescens superstes evasit, sed ne temporis momento vivere potuisset, si utrumque simul vulnus violasset, 99.

Vesica discissa lethale, 98.

Vesicantia dupliciter revellunt, 338. ex quibus parentur, 339. Revellunt calefaciendo & dolorem inferendo, 338.

Via,



# I N D E X

*Via, per quas fluit sanguis ad osculum vasis, ut adstringantur, 462.*

*Victitare cogimus aliter vulneratos quam sanos, quoniam alimenta exhibita detrimentum afferunt, vel novorum affectuum generationi occasionem præbendo, vel jam genitos augendo. 392.*

*Victus probus instituendus, ut recte procedat agglutinatio, quo sanguis probus generetur, & quantitate mediocris. 141. Quando incrassandus. 363. Quis possit materiam inflammationis subministrare, habetur ex consideratione quantitatis periculi. 141. Tenuis semper injungendus in vulneribus, dum subest inflammationis periculum; pro majore tamen vel minori inflammationis periculo,*

*& pro quantitate imminentis inflammationis, tenuius vel uberius alere ægotantem oportet. 394. Unus & idem non in omnibus vulneribus æqualiter inflammationis præstat materiam. ibid.*

*Victus forma, quæ peculiariter sit eligenda, habetur ex consideratione quantitatis inflammationis præsentis, aut futuræ ibid. Instituendi ratio non desumitur ab iis, quatenus tales morbi sunt, sed ut morbi sunt, quibus supervenire possunt alii affectus eorum sanationem impediens, imo ad mortem ducentes. 391. Ratio in sanguinis fluxu è vulnere. 467. Ratio in vulneribus quæ commodâ præstet. 300. Rationem exquisitam servare debemus, quando imminens inflammatio lethalis est, & nihil indulgendum vulnerato. 396. Rationem instituturæ in vulnerato, quæ capita sint respicienda. 391.*

*Vigiliæ immodicæ cavendæ sunt vulneratis. 390.*

*Vincula fortius revellunt quando sunt arctiora. 338. Revellunt doloris ratione. ibid.*

*Vinculorum in usu cautio. ibid.*

*Vinum antequam exhibeatur, si adsint indicia fluxus materiæ biliosæ ad os ventriculi, curandum est ut patiens evomat. 533. Cavendum est in vulneribus quamdiu durat inflammationis periculum. 399. 400. In gravioribus vulneribus exsiccantibus alterandum. 400. Nigrum, crassum & austerum competit in syncope ex profusione sanguinis. 533. Syncope apprehensis conveniens ibid. Transacto*



# I N D E X

*inflammationis periculo conceditur primo quidem oligophorum & dilutum, deinde permixtum. 400.*

*Vires, sanguinis detrahendi mensuram determinant. 309.*

*Virium imbecillitas sola venæ sectionem prohibet. 307.*

*Vlcus, quod est humidius medicamento, quod magis siccet indiget, corporis vero natura quanto est humidior, tanto quod minus siccet medicamentum postulat; & idem est de parte. 145. Quomodo à vulnere differat. 32. 33. Remansurum incurabile, vel difficilis & longæ curationis, substantia partis vulneratæ ostendet, & ejus actio, ac usus & situs. 109. Ut humidum eget siccantibus, ut sordidum detergentibus. 151. 152.*

*Vlceris puritas rationem obtinet ejus, sine quo non potest cavitas carne repleri. 147. 152. 198.*

*Vlcera maligna, & cum putrilagine, acriora medicamenta exposcunt, & quæ ignis vires habeant. 506.*

*Vnguentum fuscum Nicolai contenta intra vulnus attrahit. 168. Præclare abstergens. 504.*

*Vnguenti nostri ad vulnera descriptio. 437.*

*Vnguenta agglutinantia varia. 418. 419. Detergentia varia usurpanda in cavis vulneribus post suppurationem. 423. 428. &c. Epulotica. 188. Pus moventia varia, digestiva appellata. 165. 423. Sarcotica. 151.*

*Vnio in seminalibus partibus & regeneratio fieri nequit, ob materiæ & agentis defectum ac siccitatem. 78. Seminalium partium fit in pueris vera, ob copiam & robur naturalis caloris, & mollitiem partium; & quia adhuc materia seminalis in ipsis continetur. 88. Vera quomodo fiat. 73. Vera seminalium partium in adultis non est speranda. 85.*

*Vnione obstat calli carnisque interpositio. 79. Repugnat siccitas. 74.*



# I N D E X

*Unionem partium similarium quæ impédiant. 71.*

*Vniri partes quæ possint vera unione, ipsarum natura docebit. 74. Vide partes.*

*Vuiuntur partes aliæ vera unione, & per medium homogeneum; aliæ per medium heterogeneum. 70. Vera unione partes carnosæ. ibid.*

*Vulnus quid sit. 30. 31. An semper ledat operationes similarium partium. 36. &c.*

*Carnosæ partis cito sanatur. 111. Cavum quando solvendum. 430. Cavum quomodo tractandum. 425. &c. Citius sanatur in robustis, & in iis, qui nec sunt nimis tenues, nec nimis crassi, & in iis, qui sunt integri habitus, in exercitatis, & sobriis, ac temperantibus, & in aëre calido, & in æquali constitutione, quam in contrariis. 113. Contusum tardius sanatur, quam incisum tantum, 111. Cui magis imminet postremus magnitudinis gradus, periculosius est. 96. Cum carnis deperditione indicat carnis regenerationem & unionem. 129. 218. Cum ossis fractura tardius sanatur, & præcipue si recedere os oporteat. 112. Cum peregrino corpore, quod à principio non fuit extractum, tarde sanatur, præsertim si ossi fuerit infixum, nisi corpus illud habuerit affinitatem cum humano corpore. 113. Cum sit continui solutio, unionem indicabit. 128.*

*Cur partes fluxionibus obnoxias reddat. 63. 64. Curatum communi modo, quomodo tractandum. 438. Est solutio continui conspicua. 31. Excitat turba-*

*mentum in corpore, quod quandoque à natura robusta facile sedatur, quandoque difficulter, quandoque sedari non potest, verum potius progrediente tempore auge-*

*tur: Hinc varii affectus superveniunt vulneribus. 121. 122. In parte existens,*

*quæ facile superfluitates recipit, tardius sanatur, ut articulorum & vulvæ. 112.*

*In pueris & adolescentibus citius sanatur ob virtutis robur, tardius in senibus ob*

*caloris imbecillitatem. 113. Ledit operationes & similarium & organicarum*

*partium. 36. Magnum ratione facultatis dicitur, quando adjunctum est aliquod*

*ex eis, quæ facultatem prosternunt; vel impediri non potest, quin aliquid tale*

*superveniat, aut saltem cum difficultate & labore. 95. Male afficitur in cali-*

*da & humida aëris constitutione. 113. Nullum simplex est affectus. 128. 129.*

*217. Periculosum non est nisi quia magnum. 88. Prohibet influxum caloris. 37.*

*Quod interficit, & si videatur parvum, revera tamen est magnum, sed ejus*

*magnitudo delitescit. 90. Quod subfluxionem non probam habet, tardius sanatur.*

*112. Quomodo differat ab ulcere 32. 33. Quomodo perveniat ad supremum*

*magnitudinis gradum. 96. Quomodo vitiet temperamentum partis. 48. Reddit*



## I N D E X

partes fluxionibus obnoxias. 63. Reperitur absque intemperie positiva, non privativa; nec ob id tollitur principium sanationis vulnerum. 50. Sanari eo tardius solet, quo secundum essentiam majus extiterit, & pro sanatione pluribus operibus indiguerit. 111. Sanatur tardius, cum quo complicatur alius affectus, quia natura facilius & citius corrigit unum affectum, quam plures 112. Sanatur tardius, ex quo portio aliqua partis abscissa, aut lacerata fuerit, vel ita excisa, ut etiam ex parte pendeat, quam si sola adesset sectio cum substantia defectu. 111. 112. Seminalium partium tardius sanatur, & omnino quod est in parte, cujus substantia, vel actio, vel usus, vel situs sanationi repugnat, cæteris partibus, 111. Semper lædit operationes similarium partium. 36. 37. Simplex cum quibus affectibus sit connexum. 217. Simplex quomodo procurandum. 401. Ubi supremum magnitudinis gradum ratione facultatis acquisivit, artem & naturam deludit. 96. Vitiat temperamentum partis 38.

*Vulneris cavi procuratio varia.* 422. &c. Cavitas quomodo reddi possit minor 424. 425. Causa est extra carnosam partem non extra corpus necessario. 32. Curatio per exsiccationem, & per suppurationem. 422. Definitio à Galeno desumpta reprobatur. 28. Definitio ex Avicenna & aliis reprobatur ibid. Definitio vera. 32. Distinctio in simplex & carum, quomodo intelligenda. 218. Effectus primarius est sensibilis operationum læsio. 36. Labia adducta quomodo conserventur. 402. Labia melius conservantur adducta aliquo tenaci medicamento, quam deligatione agglutinativa. 406. 407. Labia, quamvis non imponentur turundæ aut penicilli conjungi immaturè non possunt. 290. Magnitudo. Vide Magnitudo. Magnitudo eventum futurum indicat. 88. Magnitudo ratione facultatis penes ea, quæ superveniunt, attendi debet 95. Magnitudo triplex. 94. Nomen accipitur pro continui solutione in parte carnosâ, ex Galeno etiam. 30. Purgatio, quæ fit ope tegumenti, melior est ea, quæ per quotidianam medicamentorum appositionem atque manualementem abstersionem perficitur. 206. 207. Purgatio, quæ laudanda. 246. 247. Quod verè cavum est, non potest nisi per regenerationem carnis fieri repletio. 129. 218. Sanationem aliquando impedire oportet. 293. Simplicis adductis labiis quid agendum. 417. Simplicis cavitas per applicationem labiorum repletur. 218. 402. Suendi ratio. 409. Tecti status cognosci potest, & quomodo cognoscatur. 239.

*in Vulneris cavi secundo apparatu quid agendum.* 426.



# INDEX

*Vulneri cavo quæ medicamenta conveniant.* 428.

*Vulnus bene se habere ex quibus innotescat, dum tectum servatur.* 241. *Nimis intumescere periculosum, nihil intumescere periculosissimum.* 102.

*Vulnere cavo oblato imprimis est considerandum, an adsit conveniens effluxus pro expurgatione excrementorum, & an cavitas reddi possit minor, suturæ vel glutinis ope.* 425. 426.

*in Vulnere adhibendi medicamenti modus.* 406.

*Vulnera carnis tutissima* 101. *Circumglabra prava.* 106. *Cordis, cerebri, & hepatis, licet secundum essentiam sint parva; sunt tamen magna ratione dignitatis, videlicet propter principalitatem membrorum: cordis etiam propter necessitatem partis ad vitam.* 97. *Cordis, cerebri, hepatis, ventriculi, septi transversi, tenuium intestinorum, ac vesicæ, lethalia, & cur.* 98. *Cur sanentur, etiamsi male curentur.* 230. *Felicius sanantur novo modo, quam communi* 245. *Omnia quæ præstantem aliquam partem lædunt, & sunt cum periculo vitæ, tardè sanantur.* 112. *Omnia simplicia unica medicina possunt sanari, & cava carne repleri.* 229. *Omnia sunt cava.* 218. *Orbicularia tardius sanantur.* 112. *Prava quæ* 101. &c. *Per se non interficiunt, sed supervenientis, aut connexi affectus ratione.* 114. *Quæ citius aut tardius carne repleantur.* 229. *Quæ pulmone accidunt, sunt magna ratione dignitatis, propter actionem partis; continuus enim motus ipsius sanationi repugnat,* 97. *Quæ sibi citius associant ultimum gradum magnitudinis ratione facultatis, citius interficiunt; & quænam illa sint.* 114. *Quanto tempore indigeant, ut carne repleantur.* 245. *Quomodo mortem inferant.* 95. *Sanari possunt, etiamsi medicamentum non habeat vires & qualitates requisitas.* 230--231. *Transeunt in ulcera.* 29. *Venarum jugalium sunt magna ratione dignitatis partis propter comitantia symptomata: sic & vulnera nervorum, & nervosarum partium, & articulorum.* 97.

*Vulnerum differentia aliæ veræ & propriæ, aliæ improprie; Unde desumantur.* 33. *Differentia propria aliæ substantiales, aliæ accidentales; & unde desumantur.* 34. 35. *Differentia substantiales non sunt verè essentielles.* 34. *Differentia improprie unde desumantur.* 35. *Sanitatis causa referenda est in robur naturalis caloris.* 229.

Vul-



## I N D E X

*Vulneribus simplicibus, quæ sunt per longitudinem musculorum, aut leviter per obliquum, deligatio agglutinativa competit, & in solis artubus. 402.*

*Vulnera curaturi conatus omnis in duos scopos dirigitur, in robur scilicet, & conservationem naturalis caloris, & remotionem impedimentorum. 214. Magna discissiones appellat Hippocrates. 98.*

*ad Vulnera carne implenda requiritur medicamentum exsiccans & detergens modiciter sine morfu, æstimata facultate in respectu ad excrementorum copiam & qualitatem, corporisque & partis affectæ naturam. 146. 147.*

*in Vulneribus cavis duplici ratione est siccandum, prima ob tenuem humiditatem, à qua ulcus redditur madidum; & hæc perficitur iis tantum, quæ ebibendo & sugendo ejusmodi saniem ulcus ab illo madore liberant, qualia sunt linea filamenta, non medicamentis potestate siccis. Altera, ut caro generetur similis præexistenti; quæ perficitur medicamentis siccis potestate. 151.*

*Vulneratæ partis signa. 66. Situs eligendus in vulnere cavo. 427.*

*Vulneratus quomodo captandus à Medico. 390.*

*Vulnerati lati esse debent, & bene sperantes. ibid. Non delirant citra febrem. 542.*

*Vulneratis alimenta fiunt noxia, substantia, qualitate & quantitate, & quomodo. 392.*

















